











## বিজ্ঞাপন

সিপাহীযুদ্ধের ইতিহাসের পঞ্চম অর্থাৎ শেষ ভাগ প্রকাশিত হইল। চারি ভাগে এই ইতিহাস সমাপ্ত করিবার ইচ্ছা ছিল, কিন্তু তাহা হয় নাই। পঞ্চম ভাগ উহার পূর্ববর্তী অন্যান্য ভাগ অপেক্ষা বড় হইল। যে সকল ঘটনা স্তরে স্তরে স্তূপীকৃত হইয়া রহিয়াছে, তৎসমুদয়ের যথারীতি বিশ্লেষণ ও বর্ণনা না করিলে, ইতিহাস, পাঠকের আমোদলাভের সহায় হয় না। ১৮৫৭ অঙ্কের সিপাহীযুদ্ধ ঘটনাবৈচিত্র্যে পৃথিবীর প্রধান প্রধান ইতিহাসবর্ণিত ঘটনার সহিত তুলনীয়। এইরূপ ঘটনাবৈচিত্র্যের বর্ণনা গ্রন্থের আয়তনবৃদ্ধির কারণ।

পৃথিবীর এই প্রধান ঘটনার অভিঘাতে ইংরেজ এক সময়ে একান্ত বিব্রত হইয়া পড়িলেও, উহা অপরের সমক্ষে প্রচ্ছন্নভাবে রাখেন নাই। ইংরেজ লেখকগণ সিপাহীযুদ্ধের বিস্তৃত, সংক্ষিপ্ত ও খণ্ডিত ইতিহাস প্রণয়ন করিয়াছেন। অতীত তঁাহাদের এতদ্বিষয়ক উত্তম তিরোহিত হয় নাই। প্রতিবর্ষে তঁাহারা এই মহাঘটনার সংস্ঠ দুই এক খানি গ্রন্থ জগতের সমক্ষে প্রকাশ করিতেছেন। যঁাহারা গম্ভীরভাবে মানবের মনোগত ভাবের এইরূপ আকস্মিক পরিবর্তনের কারণ পর্যালোচনা করিয়াছেন, এবং ঐ পরিবর্তন-জনিত ভয়াবহ ঘটনাবলীর অনুসন্ধান ব্যাপ্ত হইয়াছেন, তঁাহারা উহার বিস্তৃত ইতিহাসরচনায় নিরস্ত থাকেন নাই। যঁাহারা বিপ্লবের ক্ষেত্রে উপস্থিত ছিলেন, তঁাহারা উহার অসামান্য প্রচণ্ডভাব, উহার অভাবনীয় শক্তি, উহার অচিন্ত্যপূর্ব অতিবিস্তৃতি দর্শনে অতিমাত্র বিস্মিত হইয়া, আপনাদের দুর্গতি, অধিকারচ্যুতি, প্রাধান্য-পুনঃপ্রাপ্তির বিবরণ অপরকে জানাইতে বিমুখ হইয়া নাই। তঁাহাদের কুলমহিলাগণ? যঁাহারা পৃথিবীতে সর্বাপেক্ষা প্রিয়, সর্বাপেক্ষা স্নেহাস্পদ ধনের সহিত সুখে ও শান্তিতে থাকিবার আশা করিয়াছিলেন, তঁাহারাও সেই সকল প্রাণাধিক ধন হইতে জন্মের মত বিচ্ছিন্ন হইয়া, আপনাদের শোচনীয় দুর্ভাগ্যের কথায় অপরের হৃদয়ে করুণরসের সঞ্চার করিতে উদ্যত প্রকাশ করেন নাই। আর এই সময়ে যঁাহাদের উপর সুবিস্তৃত জনপদের শাসন ও পালনের ভার সমর্পিত ছিল, তঁাহারা এই ঘটনাপ্রসঙ্গে বিবিধ বিজ্ঞাপনী

লিপিবদ্ধ করিয়া, আপনাদের কল্পনাশক্তির পরিচয় দিতেও ক্রটি করেন নাই। এইরূপে সিপাহীযুদ্ধের ইতিহাসের বিস্তৃতি ঘটয়াছে। সিপাহীযুদ্ধ অপেক্ষা ভারতবর্ষসংক্রান্ত আর কোন ঘটনা বোধ হয়, ইংরেজ লেখকদিগের অধিকতর মনোযোগের বিষয়ীভূত হয় নাই।

এই প্রচণ্ড বিপ্লব-বহ্নির নিকীপণে ইংরেজের অসামান্য শক্তির নিদর্শন পরিব্যক্ত হইয়াছে। স্মৃতির বিষয়, ইংরেজ ঐতিহাসিক এবং ইংরেজ রাজ-পুরুষদিগের অনেকে এই শক্তিতে আশ্চর্য হইয়াছেন নাই। তাঁহারা এ বিষয়ে যেরূপ সংযতভাবে আশ্চর্যশক্তির প্রমাণ দেখাইয়াছেন, সেইরূপ উদারভাবে অনিবার্য ঘটনাস্রোতে পরিচালিত বিজিত জাতির প্রতি সমবেদনার পরিচয় দিয়াছেন। প্রধানতঃ ভারতবাসীর সাহায্যে এই ঘোরতর বিপত্তি হইতে ইংরেজের নিষ্কলিতলাভ ঘটয়াছে বলিয়া, সমবেদনাপর ইংরেজ লেখকগণ সাহায্যকারী ভারতবাসীদিগের গুণগৌরবের ঘোষণাতেও বিমুখ হইয়াছেন নাই।

যে বিষয়ের বর্ণনায় ইংরেজ এরূপ মনোযোগী হইয়াছেন, আমাদের স্বদেশীয় ভাষায় তাহার একখানিও ইতিহাস নাই। আমি বহুকাল হইল, এই ইতিহাস প্রণয়নে ব্রতী হইয়াছিলাম। বহুকাল পরে, এখন আমার ব্রতের উদ্ঘাপন হইল।

মহামতি কে সাহেব প্রভৃতির ইতিহাস উপস্থিত গ্রন্থের অবলম্বনস্বরূপ। ইংরেজ লেখকগণ যেমন আপনাদের জাতীয় ভাবে আকৃষ্ট হইয়া, সিপাহীযুদ্ধের ইতিহাস লিখিয়াছেন, উপস্থিত ইতিহাসে ইংরেজের সংগৃহীত উপাদানের প্রয়োগকালে, আমিও সেইরূপ আমাদের জাতীয় ভাবের দিকে দৃষ্টি রাখিয়াছি। আমি জানি যে, এ বিষয়ে আমার প্রয়াস সর্বাংশে সফল হয় নাই। বিপত্তিময়, পিচ্ছিল পথে আমাকে অনেক স্থলে স্থলিতপদ হইতে হইয়াছে। যাহা হউক, স্বদেশীয়দিগের সংগৃহীত বিবরণে আমি অনেকপরিমাণে উপকৃত হইয়াছি। কুমার সিংহ, লক্ষ্মী বাঈ প্রভৃতির বিষয় প্রধানতঃ ঐ বিবরণের অবলম্বনে লিখিত হইয়াছে। আরার অবস্থিতিকালে আমি অনুসন্ধান করিয়া, কুমার সিংহ সম্বন্ধে কোন কোন বিষয় জানিয়াছিলাম। তৎপরে এক জন শ্রদ্ধাম্পদ বন্ধু এসম্বন্ধে যাবতীয় বিবরণ দিয়া, আমায় উপকৃত করিয়াছেন। লক্ষ্মীর মৌলবীর বিবরণ সম্বন্ধে আমি এই রূপে অপর বন্ধুজনের নিকটে উপকৃত

আছি। অত্র এক জন মহারাষ্ট্রীয়ভাষাভিজ্ঞ বন্ধু আমার মরাঠীভাষায় লিখিত লক্ষ্মী বাঈর জীবনীসংগ্রহ করিয়া দিয়াছেন।

বাঙ্গালাভাষায় “বাই” শব্দ হ্রস্বইবর্ণান্ত। কিন্তু মরাঠীভাষায় উহা দীর্ঘঈ-বর্ণান্তরূপে লিখিত হয়। এই ইতিহাসের পূর্ববর্তী খণ্ডে উপস্থিত বিনয়ে হ্রস্ব ই বর্ণের প্রয়োগ করা হইয়াছে। এবার আমার পুস্তোক্ত প্রীতিভাজন বন্ধুর অনুরোধে মহারাষ্ট্রীয় লিপিপ্রণালীর অনুসরণ করিয়াছি। কিন্তু এইরূপ বর্ণবিভ্রাসপ্রণালী অসম্প্রদেশের ভাষায় চলিবে কি না, সন্দেহের বিষয়।

সিপাহীযুদ্ধের ইতিহাসের একটি বর্ণানুক্রমিক সৃষ্টি প্রস্তুত করিবার ইচ্ছা আছে। উহা প্রস্তুত হইলে স্বতন্ত্রভাবে মুদ্রিত ও প্রকাশিত হইবে।

এই ইতিহাসের তৃতীয় ভাগে (২০৬-২০৭ পৃষ্ঠে) কাণপুরের ঘটনায় একটি ফিরিঙ্গী শিশুর প্রাণরক্ষার জন্ত একটি দরিদ্র হিন্দু রমণীর আত্মত্যাগের বিষয় বর্ণিত হইয়াছে। উপস্থিত গ্রন্থের ২১৯-২২০ পৃষ্ঠে ফৈজাবাদের ঘটনায় পলাতক ইউরোপীয় কুলকামিনীদিগের প্রতি এতদেশীয় রমণীদিগের অপরিসীম সদয় ব্যবহারের কথা উল্লেখ করা গিয়াছে। এই দুইটি বিষয় ডাক্তার নাইটন গাহেবের লিখিত “হিন্দু ললনা” প্রবন্ধ (Journal of the National Indian Association, August, 1878) হইতে পরিগৃহীত হইয়াছে। যথাস্থলে ইহা স্বীকার করা হয় নাই।

সিপাহীযুদ্ধের ইতিহাস পরিসমাপ্ত হইল। এত দিন পরে সাহিত্যক্ষেত্রে, সহৃদয় পাঠকের সমক্ষে আমি একটি গুরুতর বন্ধন হইতে নিমুক্ত হইলাম।

কলিকাতা,  
১৫ই জ্যৈষ্ঠ, ১৩০৭ সাল।

শ্রীরজনীকান্ত গুপ্ত।





# সূচী ।

## প্রথম অধ্যায় ।

### উত্তরপশ্চিম প্রদেশ ।

উত্তরপশ্চিমপ্রদেশ—লেফ্টেনেন্ট-গবর্নর কলবিন্ সাহেব—আগরা—আলীগড়—  
ইটোয়া—ভারতবাসীর বিশ্বস্ততা ও কৃষ্ণদক্ষতা—মৈনপুরী—আগরার খ্রীষ্টধর্মাবলম্বীদিগের  
আতঙ্ক—কলবিন্ সাহেবের ঘোষণাপত্র—এ বিষয়ে গবর্নর-জেনেরলের অভিমত—মথুরা—  
আগরার সিপাহীদিগের নিরস্ত্রীকরণ ... .. ১-৪১

## দ্বিতীয় অধ্যায় ।

উত্তরপশ্চিমপ্রদেশের অবস্থা—মীরাট ও রোহিলখণ্ডবিভাগ—মুজফফরনগর ও সাহা-  
রাণপুর—মোরাদাবাদ—বেরিলী—শাহজাহানপুর—বদায়ুন ... .. ৪২-১০৪

## তৃতীয় অধ্যায় ।

### গোয়ালিয়র—ইন্দোর—রাজপুতনা ।

উত্তরপশ্চিমপ্রদেশের লেফ্টেনেন্ট-গবর্নরের দুশ্চিন্তা—মহারাজ জয়াজীরাও শিন্ধে—  
তাঁহার সৈন্য—তাঁহার রাজধানীর ঘটনা—তাঁহার সৈনিকদলের উত্তেজনা ও বিরুদ্ধাচরণ—  
ইংরেজদিগের পলায়ন—মহারাজ তুকারাজীরাও হোলকর—ইন্দোরের ঘটনা—রাজ-  
পুতনা ... .. ১০৫-১৫১

## চতুর্থ অধ্যায় ।

### আগরা ।

আগরা—নীমচের সিপাহী—কলবিন্ সাহেবের অন্তঃস্বতা—শাসনকাষ্যের বন্দো-  
বস্ত—কোটার সিপাহী—আগরার নিকটে যুদ্ধ—ইংরেজসৈন্যের প্রত্যাবর্তন—সৈনিক-  
নিবাসের ধ্বংস—আগরার দুর্গবাসীদিগের অবস্থা—কলবিন্ সাহেবের দেহত্যাগ ১৫২-১৭৯

## পঞ্চম অধ্যায় ।

### লক্ষ্মৌ—অযোধ্যা ।

অযোধ্যার অবস্থা—লোকের দুশ্চিন্তা—ভূস্বামিসম্প্রদায়—নবাববংশীয়দিগের দুর্দশা—  
সৈনিকদল—জনসাধারণের অবস্থা—লক্ষ্মৌরক্ষার বন্দোবস্ত—সৈনিকনিবাসে সিপাহী-  
দিগের বিরুদ্ধাচরণ ... .. ১৮০-২০৪

## ষষ্ঠ অধ্যায় ।

## অযোধ্যা ।

বিপ্লবের প্রকৃতি—সীতাপুর—মূলাওন—মোহমদী—শাহজাহানপুরের পলাতকদিগের  
নিধন—ফৈজাবাদ—সুলতানপুর—বহরইচবিভাগ—সিক্রোরা—মোল্লাপুর—দরীয়াবাদ—  
পলাতকদিগের দুর্দশা—লক্ষৌ—শার্ হেন্‌রি লরেসের স্বাস্থ্যহানি—লক্ষৌরক্ষার  
বন্দোবস্ত—চিনহাটে ইংরেজসৈন্তের পরাজয়—মিচ্ছভবনের কিয়দংশের বিধ্বংস—লক্ষৌর  
অবরোধ—শার্ হেন্‌রি লরেসের দেহত্যাগ—সেনাপতি হাবেলক ও আউট্রামের  
উপস্থিতি ... .. ২০৫-২৫৮

## দ্বিতীয় খণ্ড ।

## প্রথম অধ্যায় ।

## দিল্লী ।

দিল্লীতে ইংরেজপক্ষের সৈন্তের সমাগম—নগর আক্রমণের বন্দোবস্ত—সেনাপতির  
ঘোষণাপত্র—নগর আক্রমণ—সিপাহীদিগের পরাক্রম—ইংরেজসৈন্তের উচ্ছৃঙ্খলভাব—  
রাজপ্রাসাদ অধিকার—মোগল ভূপতির স্থানান্তরে প্রস্থান—তাঁহার অবরোধ—শাহজাদা-  
দিগের নিধন—কাপ্তেন হাড্‌সনের কার্যের সমালোচনা—দিল্লীর অধিবাসীদিগের ফাঁসী—  
নিকল্‌সনের দেহত্যাগ ... .. ২৫৯-২৮৬

## দ্বিতীয় অধ্যায় ।

## ইংরেজসেনাপতির লক্ষৌতে যাত্রা ।

সেনাপতি হাবেলকের কাণপুরে উপস্থিতি—তাঁহার লক্ষৌতে যাত্রার আয়োজন—  
তাঁহার মঙ্গলোয়ারে উপস্থিতি—উনাও এবং বসিরথগঞ্জের যুদ্ধ—হাবেলকের কাণপুরে  
প্রত্যাবর্তনের উদ্‌যোগ—সেনানায়ক নীলের বিরক্তি—হাবেলকের পুনর্বার লক্ষৌর দিকে  
যাত্রা—বসিরথগঞ্জের দ্বিতীয় যুদ্ধ—হাবেলকের আবার কাণপুরে প্রত্যাবর্তনের উদ্‌যোগ—  
তাঁহার মঙ্গলোয়ারে প্রত্যাবর্তন—লক্ষৌর পথে পুনর্বার যাত্রা—বসিরথগঞ্জের তৃতীয়  
যুদ্ধ—হাবেলকের কাণপুরে প্রত্যাবর্তন—বিঠুরের যুদ্ধ—আউট্রামের কাণপুরে উপস্থিতি—  
তাঁহার বিজ্ঞানপত্র—হাবেলক, আউট্রাম এবং নীলের লক্ষৌতে যাত্রা—তাঁহাদের আলম-  
বাগে উপস্থিতি—চারবাগের সেতুপথে যুদ্ধ—ছত্রমঞ্জিল ও ফরিদ বক্স—খাসবাজার—  
নীলের নিধন—হাবেলক ও আউট্রামের রেসিডেন্সিতে উপস্থিতি ... .. ২৮৭-২৯৭

## তৃতীয় অধ্যায় ।

## উত্তরপশ্চিমপ্রদেশ ও অযোধ্যা ।

সেনাপতি গ্রিথেডের দিল্লী হইতে যাত্রা—গাজীউদ্দীন নগর—বুলন্দ সহর—মালঘর—  
খুর্জা—মৌনী সন্ন্যাসী—আলীগড়—আকবরাবাদ—আগরা—মৈনপুরী—সেনাপতি আউ-

ট্রামের পত্র—কালীনদীর তীরে যুদ্ধ—প্রধান সেনাপতি স্মার্ট কোলিন্ কাম্প্বেলের  
যুদ্ধক্ষেত্রে যাত্রা—কাজোয়ার যুদ্ধ—প্রধান সেনাপতির অযোধ্যায় প্রবেশ—জঙ্গ বাহা-  
দুর—প্রধান সেনাপতির লক্ষ্মীতে প্রবেশ—ঠাহার সহিত সেনাপতি হাবেলক ও আউ-  
ট্রামের সন্মিলন—সেনাপতি হাবেলকের দেহত্যাগ—আউট্রামের আলমবাগে অবস্থিতি—  
প্রধান সেনাপতির কাণপুরে যাত্রা ... ২৯৮-৩২৫

## চতুর্থ অধ্যায় ।

### তাত্যা টোপে ।

তাত্যা টোপে—ঠাহার যুদ্ধকোশল—পাণ্ডুনদীর তীরে ঠাহার সহিত ওয়াইওহামের  
যুদ্ধ—ঠাহার জয়লাভ—ঠাহার কাণপুরে অবস্থিতি ও বাহরচনা—স্মার্ট কোলিন্ কাম্প্-  
বেলের কাণপুরে উপস্থিতি—ঠাহার সহিত যুদ্ধে তাত্যা টোপের পরাজয় ... ৩২৬-৩৩৯

## পঞ্চম অধ্যায় ।

### ফতেগড় অধিকার—প্রধান সেনাপতির লক্ষ্মীযাত্রার উদ্‌যোগ ।

ফতেগড় অধিকার—স্মার্ট কোলিন্ কাম্প্বেলের বেরেলীতে যাত্রার ইচ্ছা—  
গবর্নর-জেনেরলের ভিন্নমত—স্মার্ট কোলিনের লক্ষ্মীতে যাত্রার উদ্‌যোগ—ঠাহার  
সৈনিকদলের উনাওতে অবস্থিতি—ইংরেজসৈন্তের শিবিরে চরের উপস্থিতি—তাহার  
অবরোধ—তাহার বিচিত্র আত্মবিবরণ—তাহার ফাঁসী ... ৩৪০-৩৬৩

## ষষ্ঠ অধ্যায় ।

### লক্ষ্মী অধিকার—রোহিলখণ্ড ও অগ্রাণ্ড স্থানে বিপ্লবের শান্তি ।

লক্ষ্মী অধিকার—ফৈজাবাদের মৌলবী—ঠাহার সহিত যুদ্ধ—ঠাহার মৃত্যু—কইয়া  
—রোহিলখণ্ড—সাগর ও নর্মদা প্রদেশ—বোম্বাই প্রেসিডেন্সি—দক্ষিণাপথ ... ৩৬৪-৩৮৪

## তৃতীয় খণ্ড ।

### প্রথম অধ্যায় ।

#### ঝাঁসী—লক্ষ্মী বাঈ ।

সংস্থান—লক্ষ্মী বাঈ—ঠাহার বাল্য-বিবরণ—ঠাহার বিবাহ—ঠাহার  
স্বামীর দেহত্যাগ—ঝাঁসীতে ব্রিটিশ গবর্নমেন্টের অধিকার স্থাপন—ঝাঁসীর বিপ্লব—এ  
সময়ে লক্ষ্মী বাঈর কাষা—ইংরেজ সেনাপতির ঝাঁসীতে যাত্রা—ঠাহার সহিত লক্ষ্মী  
বাঈর যুদ্ধের উদ্‌যোগ—ঝাঁসীর দুর্গ আক্রমণ—লক্ষ্মী বাঈর বীরত্ব ও পরাক্রম—ঠাহার  
ঝাঁসী পরিত্যাগ—ঝাঁসীর দুর্গে ইংরেজ সেনাপতির অধিকারস্থাপন—রাও সাহেব ও  
তাত্যা টোপের সহিত লক্ষ্মী বাঈর সন্মিলন—কুঁচের যুদ্ধ—ইংরেজসৈন্তের কাঙ্গী  
অধিকার—রাও সাহেব প্রভৃতির গোয়ালিয়রে গমন—মহারাজ শিম্ভের পলায়ন—

গোয়ালিয়রের রাও সাহেবের অধিকারস্থাপন—ইংরেজসেনাপতির গোয়ালিয়রে	
যাত্রা—গোয়ালিয়রের যুদ্ধ—লক্ষী বাঈর যুদ্ধস্থলপরিত্যাগ—উহার পশ্চাৎকাখন—	
উহার দেহত্যাগ—গোয়ালিয়রে মহারাজ শিল্পের পুনর্কার অধিকারস্থাপন—	
দামোদর রাও	৩৮৫-৪২৬

## দ্বিতীয় অধ্যায় ।

### ঝাঁসীর পার্শ্ববর্তী স্থান ।

নওগাঁর সিপাহীদিগের উত্তেজনা—তত্রত্য ইউরোপীয়দিগের পলায়ন—উাহাদের সহিত	
বিশ্বস্ত সিপাহীদিগের গমন—পথে উাহাদের দুর্দশা—উাহাদের প্রতি ছত্রপুরের রাণী	
এবং চিরকারির রাজার সন্ধ্যাবহার—বাঁদার ঘটনা—নাগোদের বিশ্বস্ত সিপাহী—	
পলাতকদিগের নাগোদে উপস্থিতি	৪২৭-৪৩০


## তৃতীয় অধ্যায় ।

### তাত্যা টোপে ।

তাত্যা টোপের পশ্চাৎকাখন—উাহার নানাস্থানে গমন—উাহার অবরোধ—উাহার	
কাঁসী	৪৩১-৪৪২

## চতুর্থ অধ্যায় ।

সিপাহীযুদ্ধের শেষভাগের ঘটনা—সম্পূর্ণভাবে যুদ্ধের অবসান—উপসংহার	৪৪৩-৪৫০
পরিশিষ্ট	৪৫১-৪৫৫

 প্রথম খণ্ড, পঞ্চম অধ্যায়, ১৮০ পৃষ্ঠের সূচীতে সীতাপুর, মূলাওন প্রভৃতির বিষয় নির্দিষ্ট হইয়াছে। ঐ বিষয়গুলি উক্ত সূচী হইতে পরিত্যক্ত হইবে। ঐ সকল জনপদের বিপ্লবের বিবরণ পরবর্তী অর্থাৎ ষষ্ঠ অধ্যায়ে বিবৃত হইয়াছে।

# সিপাহীযুদ্ধের ইতিহাস ।

পঞ্চম ভাগ ।

প্রথম অধ্যায় ।

উত্তরপশ্চিম প্রদেশ ।



উত্তরপশ্চিম প্রদেশ—লেফটেনেন্ট গবর্নর কলবিন্ সাহেব—আগরা—আলীগড়—ইটোয়া—ভারতবাসীর বিশ্বস্ততা ও কর্মদক্ষতা—মইমনপুরী—আগরার খ্রীষ্টধর্মাবলম্বীদের আতঙ্ক—কলবিন্ সাহেবের ঘোষণাপত্র—এ বিষয়ে গবর্নর-জেনারেলের অভিমত—মথুরা—আগরার সিপাহীদের নিরস্ত্রীকরণ ।

গঙ্গা ও যমুনার উৎপত্তিস্থান হইতে দক্ষিণে কন্দনাশা পর্যন্ত বিস্তৃত ভূখণ্ড উত্তরপশ্চিম প্রদেশ নামে কথিত হয় । সরকারি কাগজপত্রে উহা এই নামে পরিচিত হইয়া আসিতেছে । ভৌগোলিক বিষয়ের সহিত এই নামের কোন সংশয় নাই । যেহেতু ভারতের সর্বোত্তরবর্তী ও সর্বপশ্চিমবর্তী ইংরেজাধিকৃত ভূভাগ, উত্তরপশ্চিম প্রদেশ নামে কথিত বিস্তৃত জনপদের অন্তর্ভুক্ত নয় । পঞ্জাবে আধিপত্যস্থাপনের পূর্বে ব্রিটিশ গবর্নমেন্ট যে প্রদেশকে উত্তরপশ্চিম প্রদেশ বলিয়া নির্দেশ করেন, তাহাই এখন ঐ নামে অভিহিত হইতেছে । যাহা হউক, এই প্রদেশ যেরূপ বিস্তৃত, সেইরূপ ঘন-সন্নিবিষ্ট লোকালয়ে পরিপূর্ণ । বর্ণনীয় বিপ্লবের সময়ে ইহাতে প্রায় ৩০ লক্ষ লোকের বসতি ছিল ।\* উত্তর ভারতের যে সকল নগর ইতিহাসে সর্বেশেষ

\* Raikes, *Notes on the Revolt in the North-Western Provinces of India*, p. 4. কে সাহেব অধিবাসীর সংখ্যা ৩৩ লক্ষ বলিয়া নির্দেশ করিয়াছেন—Kaye, *Sepoy War*, Vol. III. p. 194.

প্রসিদ্ধিলাভ করিয়াছে, তৎসমুদয়ের অধিকাংশ এই প্রদেশের অন্তর্ভুক্ত। এক সময়ে মহিমাম্বিত মোগল এই প্রদেশে সমৃদ্ধি ও প্রতাপের একশেষ দেখাইয়াছিলেন। পরবর্তী সময়ে ইংরেজ এই প্রদেশে আপনাদের রণকৌশল এবং রাজনীতির পরিচয় দিয়া, আত্মপ্রাধিক্যস্থাপনে কৃতকার্য হইয়াছিলেন। যুদ্ধেই হউক বা রাজনীতির কৌশলেই হউক, ব্রিটিশ কোম্পানি একটীর পর একটা জনপদ অধিকার করিয়াছিলেন, ক্রমে সমগ্র উত্তরপশ্চিম প্রদেশে তাঁহাদের আধিপত্য অব্যাহত হইয়াছিল। সময়ের পরিবর্তনে এবং ঘটনা-পরম্পরার আদিভাবে ও তিরোভাবে এই বিস্তৃত ভূখণ্ডের অধিবাসিগণ পরস্পরবিচ্ছিন্ন হইয়া পড়ে নাই। অধিকাংশ স্থানের অধিবাসিগণ আচারে, ভাষায়, মুখশ্রীতে, পরিচ্ছদে পরস্পর একতাসম্পন্ন ছিল; সকলেই এক ভাষায় আপনাদের মনোগত ভাব ব্যক্ত করিত, সকলেই একরূপ রীতিনীতির অনুবর্তী হইয়া চলিত এবং সকলেই এক উৎসবে আমোদিত বা একবিধ সামাজিক শাসনে পরিচালিত হইত। ইহারা যেরূপ সাহসী ও তেজস্বী, সেইরূপ রণকৌশল-সম্পন্ন ছিল। ইহাদের উন্নত দেহ, বিশাল স্কন্ধ, বিস্তৃত বক্ষঃস্থল, দীর্ঘ বাহু ও দীপ্তিময় মুখমণ্ডল দেখিলে ইহাদিগকে সামরিক কার্যে অভ্যস্ত বলিয়া বোধ হইত। পরস্পর সমবেদনাসূত্রে আবদ্ধ থাকাতে ইহাদের এক শ্রেণীর সহিত আর এক শ্রেণীর সম্ভাব ছিল। এই প্রদেশের ঞ্চায় ভারতবর্ষের আর কোন অংশে যুদ্ধকুশল সৈনিক ও শাস্ত্রপ্রকৃতি কৃষকগণ পরস্পর একতাসম্পন্ন ছিল না; স্মতরাং আর কোন অংশে সৈনিকদিগের উত্তেজনাপ্রযুক্ত কৃষকগণের প্রশান্তভাবে অন্তর্ধানের অধিকতর সম্ভাবনাও ছিল না। অধিকন্তু এই প্রদেশের ঞ্চায় ভারতবর্ষের আর কোন অংশে লোকবসতি অধিকতর ঘন-সন্নিবিষ্ট ছিল না। এইরূপ সমবেদনাপর, এইরূপ ঘনসন্নিবিষ্ট এবং এক ভাষায়, এক পরিচ্ছদে, এক গঠনভঙ্গীতে, এক আচারে পরস্পর একতাসূত্রে আবদ্ধ হইলেও, উত্তরপশ্চিম প্রদেশের অধিবাসিগণ ব্রিটিশ কোম্পানির অধিকারে এ পর্য্যন্ত কোনরূপ উত্তেজনার পরিচয় দেয় নাই। তাহারা শান্তভাবে আপনাদের কার্যে ব্যাপ্ত ছিল এবং আপনাদের জীবন ও সম্পত্তি নিরাপদ দেখিয়া, নিরুদ্ধে কালযাপন করিতেছিল। তাহারা কোম্পানির অধিকারে সর্বতোভাবে সন্তুষ্ট হয় নাই। পুলিশের কার্য প্রণালীতে তাহারা বিরক্ত ছিল।

দেওয়ানি বিভাগের কার্যেও তাহাদের অসন্তোষ জন্মিয়াছিল।\* কিন্তু অসন্তুষ্টি ও বিরক্তিতেও তাহারা প্রশান্তভাবে বিসর্জন দেয় নাই। তাহাদের মধ্যে বাণিজ্যের উন্নতি হইতেছিল, জনসংখ্যা বৃদ্ধি পাইতেছিল, সর্বত্র শৃঙ্খলা ও শান্তি অব্যাহত ছিল।

এই সুবিস্তৃত ও জনবহুল প্রদেশের শাসনের জন্ত এক জন লেফ্টেনেন্ট-গবর্নর ছিলেন। যে সকল এতদেশীয় সৈন্য এই প্রদেশে ছিল, তাহারা সরকারী কাগজপত্রে সাধারণতঃ বাঙ্গালার সিপাহী বলিয়া নির্দিষ্ট হইত। সৈনিক-বিভাগের মধ্যে—মীরট, কাণপুর এবং সাগর বিভাগ এই প্রদেশের অন্তর্ভুক্ত ছিল। মীরটবিভাগে মীরট, দিল্লী, রোহিলখণ্ড এবং আগরায় সৈনিক-নিবাস ছিল। কাণপুরবিভাগে এলাহাবাদ, বারাণসী এবং নবাধিকৃত অযোধ্যায় সৈনিকগণ অবস্থিতি করিত। জব্বলপুর এবং ঝাঁসী সাগরবিভাগের সৈন্যসংক্রান্ত স্টেশন ছিল। এতদ্ব্যতীত বহুসংখ্য স্থানে দেওয়ানি বিভাগের স্টেশন ছিল। কমিশনর, জজ, মাজিস্ট্রেট, কলেक्टर প্রভৃতি রাজপুরুষগণ বিভিন্ন স্থানের কার্যসম্পাদনে নিয়োজিত ছিলেন। দিল্লী, মীরট, রোহিলখণ্ড, আগরা, এলাহাবাদ, জব্বলপুর, ঝাঁসীতে এক এক জন কমিশনর অবস্থিতি করিতেছিলেন। আগরা সদর স্টেশন ছিল। সমগ্র উত্তরপশ্চিম প্রদেশের লেফ্টেনেন্ট-গবর্নর এই স্থানে থাকিয়া, শাসনদণ্ডের পরিচালনা করিতেছিলেন।

এই সময়ে জন কলবিন সাহেব উত্তরপশ্চিম প্রদেশের লেফ্টেনেন্ট-গবর্নর ছিলেন। রাজ্যশাসনবিষয়ে ইঁহার দূরদর্শিতা ও অভিজ্ঞতা ছিল। ইনি যখন গবর্নর-জেনেরল লর্ড অকলণ্ডের খাস মুন্সী ছিলেন, তখন আফগানিস্তানের যুদ্ধে ইংরেজদিগের দুর্গতির একশেষ হয়। কলবিন সাহেব এই দুর্গতিজনক যুদ্ধে গবর্নর-জেনেরলের পক্ষে সমর্থন করাতে সাধারণের বিরাগভাজন হইলেন। এজন্য ইঁহার প্রতিপত্তি কিয়ৎকাল ভস্মাচ্ছাদিত বহির গায় লুক্কায়িতভাবে থাকে। যাহা হউক, অনতিবিলম্বে ইনি রাজ্যশাসনবিভাগে স্বকীয় কর্ম-ক্ষমতা ও অভিজ্ঞতার জন্ত আবার প্রসিদ্ধিলাভ করেন। ১৮৫৩ অব্দে তমাসন

\* Raikes, Notes on the Revolt in the North-Western Provinces of India. p. 7.



সাহেবের স্থলে এই প্রতিপত্তিশালী রাজপুরুষ উত্তরপশ্চিম প্রদেশের লেফটেনেন্ট-গবর্নরের পদে প্রতিষ্ঠিত হইলেন। কলবিন সাহেব উপস্থিত সময়ে বিপদের গুরুত্ব বুঝিতে অসমর্থ ছিলেন না। কিন্তু আপনাদের ক্ষমতার উপর তাঁহার দৃঢ়বিশ্বাস ছিল। এই বিশ্বাস-প্রযুক্ত তিনি কোন বিষয়ে তাদৃশ বিপদের আশঙ্কা করিতেন না। লর্ড ক্যানিংয়ের শ্রায় তিনিও বুঝিয়াছিলেন যে, ভারতের প্রান্ত-ভাগে যে মেঘখণ্ডের আবির্ভাব হইয়াছে, তাহা ক্রমে বর্ধিত হইয়া প্রচণ্ড ঝড়ের উৎপত্তি করিবে। কিন্তু ইহাতে যে, সহসা তাঁহাদের ক্ষমতা অন্তর্হিত হইবে, তাঁহাদের গৌরবস্তু ধূলিসাৎ হইয়া যাইবে, এবং যে যে স্থানে তাঁহাদের প্রাধান্য দীর্ঘকাল অপ্রতিহত ছিল, সেই সেই স্থানেই তাঁহাদের দুর্দশার একশেষ ঘটিবে, ইহা তিনি ভাবেন নাই। সুতরাং মে মাসে যখন মৌরাটের সংবাদ সহসা তাঁহার নিকটে উপস্থিত হইল, তখন তিনি উহার ভাবী ফল কিরূপ বিপদজনক হইবে, তাহা বুঝিতে পারিলেন না। মৌরাটের উত্তেজিত সিপাহীরা দিল্লীতে উপস্থিত হইলে যে, তাহারা দিল্লীর প্রাসাদ অধিকার করিয়া বৃদ্ধ মোগলের নামে একাধিপত্য করিতে থাকিবে এবং সর্বত্র ইংরেজের ক্ষমতা বিলুপ্ত হইল বলিয়া, জনসাধারণকে অধিকৃতর বিচলিত, শৃঙ্খলাশূন্য ও ব্রিটিশ গবর্নমেন্টের ক্ষমতার উপর হতশ্রদ্ধ করিয়া তুলিবে, তিনি ইহার অনুধাবন করিলেন না। কিন্তু তাঁহার এই ধারণা দীর্ঘকাল একভাবে থাকিল না। যখন দিল্লীর সংবাদ তাঁহার নিকটে পহঁছিল, যখন তিনি জানিতে পারিলেন যে, সিপাহীরা বৃদ্ধ বাহাদুর শাহকে সমগ্র হিন্দুস্থানের সম্রাট বলিয়া ঘোষণা করিয়াছে, দিল্লীতে ইংরেজের ক্ষমতা বিলুপ্ত হইয়াছে, দিল্লীস্থিত ইংরেজেরা স্থানান্তরে পলায়ন করিয়াছেন, কেহ কেহ উত্তেজিত সিপাহীদিগের অস্ত্রাঘাতে দেহত্যাগ করিয়াছেন, তখন তিনি বুঝিতে পারিলেন যে, তাঁহাদের সাম্রাজ্য বিপদাক্রান্ত হইয়াছে। তাঁহারা এক শত বৎসর কাল অপ্রতিহতভাবে যে ক্ষমতার পরিচালনা করিতেছিলেন, তাহা সহসা অতর্কিতকারণে অন্তর্হিতপ্রায় হইয়াছে। লেফটেনেন্ট-গবর্নর জন কলবিন এই ঘোরতর বিপদের বিষয় বুঝিতে পারিলেন বটে, কিন্তু ইহাতে তিনি ধৈর্য্যচ্যুত হইলেন না। এখন রক্ষণীয় স্থান নিরাপদ করিবার জন্ত তাঁহার যথোচিত যত্ন ও উদ্যম পরিস্ফুট হইতে লাগিল। গঙ্গার উভয় তীরে যে সকল প্রধান নগর ছিল এবং যে সকল স্থান গঙ্গার তটদেশ হইতে দূরে অবস্থিত

ছিল, তৎসমুদয়ে ইউরোপীয় সৈন্য ছিল না। ইংরেজ রাজপুরুষগণ এই স্থানে থাকিয়া শান্তি রক্ষা করিতেছিলেন। এখন এইরূপ অশান্তির সময়ে ইহাদের কি দশা ঘটিবে, লেফটেনেন্ট-গবর্নর তাহাই ভাবিতে লাগিলেন। তাঁহার বিশ্বাস জন্মিল যে, যে সকল সিপাহী এই সকল স্থান নিরাপদ করিবার জন্ত নিয়োজিত রহিয়াছে, তাহারা ইখন ইংরেজ রাজপুরুষদিগকে বিপন্ন করিবে। বারাণসী ও এলাহাবাদে ইউরোপীয় সৈনিকবল ছিল না; সিপাহীগণই তত্রত্য রাজপুরুষদিগের বিপত্তিনিবারণের প্রধান অবলম্বনরূপ ছিল। কিন্তু বিপত্তিকালে এই অবলম্বন কিরূপ অবস্থাপন্ন হইয়াছিল, তাহা ইতঃপূর্বে বর্ণিত হইয়াছে। বারাণসী ও এলাহাবাদ ব্যতীত উত্তরপশ্চিম প্রদেশের অনেক জনবহুল ও সমৃদ্ধিপূর্ণ নগরে দেওয়ানি ও সৈনিকবিভাগের কর্মচারীগণ অবস্থিতি করিতেছিলেন, শৃঙ্খলা ও শান্তিরক্ষার ভার ইহাদের হস্তে সমর্পিত ছিল। উপস্থিত বিপদের সময়ে ইহারা কিরূপ অবস্থায় পতিত হইয়াছিলেন, ইহাদের রক্ষণীয় স্থানে শৃঙ্খলা ও শান্তি কিরূপ ছিল, তাহা ক্রমে বর্ণিত হইতেছে।

মে মাসে মীরাট ও দিল্লীর সংবাদে আগরার ইউরোপীয়গণ যেরূপ শঙ্কিত হইলেন, আগরার অধিবাসী জনসাধারণও সেইরূপ উত্তেজিত হইয়া উঠে। মোগলের প্রাধান্যকালে আগরা সাতিশয় প্রসিদ্ধ ছিল। উহা সমৃদ্ধিতে দিল্লীর অব্যবহিত নিম্নে স্থান পাইলেও, সৌন্দর্য্যগোরবে এক সময়ে দিল্লী অপেক্ষাও প্রধান ছিল। উহার অতুলনীয় তাজমহল জগতে আজ পর্য্যন্ত আপনার প্রতিপত্তি রক্ষা করিতেছে। সুনীল যমুনা পূর্বের ত্রায় উহার পাদদেশে প্রবাহিত হইতেছে। যখন যমুনা হইতে তাজের অনুপম সৌন্দর্য্য দৃষ্টিগোচর হয়, তখন দর্শক ভাবশ্রোতে অতীতের দিকে নীরমান হইয়া, সেই সমৃদ্ধিময় দৃশ্য মানসপটে চিত্রিত করিতে থাকেন। চিরস্মরণীয় আকবর যেখানে থাকিয়া আপনার তেজোমহিমায় ও গুণগোরবে লোকের মধ্যে দেবভাবে পূজিত হইয়াছিলেন এবং চিরপ্রসিদ্ধ মতিমসজিদ নির্মাণ করাইয়া যে স্থানের সৌন্দর্য্য বৃদ্ধি করিয়াছিলেন, শাহ জাহান যে স্থানে আপনার প্রণয়িনীর অন্তিম বাসনার অনুরূপ কর্ম করিবার জন্ত বহু মুদ্রা ব্যয় করিয়া, শিল্পচাতুরীর একশেষ দেখাইয়াছিলেন, সে স্থান পূর্বতন সময়ের ত্রায় বর্তমান কালেও আপনার প্রতিপত্তি রক্ষা করিতেছিল। তাজের দিকে ইংরেজের সৈনিকনিবাস

অবস্থিত । এই স্থানে ইউরোপীয় সৈন্য ও সিপাহীদিগের আবাসগৃহ রহিয়াছিল ; সৈনিকনিবাসের নিকটে আফিসারদিগের বাগালা, এবং প্রোটেষ্ট্যান্ট ধর্মাবলম্বীদিগের উপাসনামন্দির ছিল । সহরের বহির্ভাগে লেফ্টেনেন্ট-গবর্নরের আবাসগৃহ, গবর্নমেন্টের আফিস, কারাগার, কলেজ, রোমানক্যাথলিকদিগের উপাসনা-মন্দির এবং প্রধান প্রধান সিবিল কর্মচারীর বাসগৃহসমূহ রহিয়াছিল । গবর্নমেন্টের আফিস এক প্রান্তে, সিপাহীদিগের আবাসগৃহ অপর প্রান্তে ছিল । দুর্গ এবং সহরের মধ্যে যমুনার উপর সেতু নির্মিত ছিল । এই সেতু অতিক্রম করিলেই কাণপুর এবং আলীগড়ের পথে উপনীত হওয়া যাইত ।

এই সময়ে আগরার সৈনিকদলে ইউরোপীয় ও এতদেশীয় উভয় শ্রেণীর সৈনিকই ছিল । ইউরোপীয় সৈনিকদিগের মধ্যে ৩ সংখ্যক পদাতি ও এক দল গোলন্দাজ এবং সিপাহীসৈন্যের মধ্যে ৪৪ ও ৬৭ সংখ্যক দল অবস্থিতি করিতেছিল । ব্রিগেডিয়ার পোলহোয়েন্স সমগ্র সৈনিকদলের অধিনায়ক ছিলেন ।

মীরাট এবং দিল্লীর সংবাদ ১২ই ও ১৩ই মে আগরায় উপস্থিত হয় । সংবাদপ্রাপ্তির পূর্বদিন ইউরোপীয়গণ আত্মরক্ষার জন্ত সাবধান হইলেন । এক দল ইউরোপীয় সৈন্য দুর্গে থাকিতে আদিষ্ট হয় । ইংরেজেরাও আপনাদের পিস্তলগুলি কার্যোপযোগী করিয়া রাখেন । আগরায় দুই দল সিপাহী ছিল । পক্ষান্তরে একদল ইউরোপীয় পদাতি এবং গোলন্দাজ সৈন্য অবস্থিতি করিতেছিল । কেবল আগরার সিপাহীরা গবর্নমেন্টের বিরুদ্ধে সম্মুখিত হইলে, ইউরোপীয় সৈনিকগণ তাহাদের ক্ষমতারোধে বোধ হয়, অসমর্থ হইত না । কিন্তু যদি জনসাধারণ উত্তেজিত হইয়া উঠিত, অধিকন্তু আগরার পার্শ্ববর্তী নগরে যে সকল সিপাহী অবস্থিতি করিতেছিল, তাহারা যদি দলে দলে আগরায় উপস্থিত হইত, তাহা হইলে তত্রত্য ইংরেজদিগের বিপদ অনিবার্য হইয়া উঠিবার সম্ভাবনা ছিল ।

যখন মীরাটের সিপাহীগণ উত্তেজিতভাবে দিল্লীতে গমন করিয়াছে, দিল্লী যখন তাহাদের হস্তগত হইয়াছে, তখন ইংরেজের উত্তরপশ্চিম প্রদেশের রাজধানী যে, মীরাট বা অপরূপ স্থানের উত্তেজিত সিপাহীদিগের লক্ষ্যের বিষয়ীভূত হইবে না, তাহা কোন ইংরেজ সে সময়ে ভাবেন নাই ।

যাহার উপর জনবহুল সমগ্র উত্তরপশ্চিম প্রদেশের শাসন ও পালনের ভার ছিল, তিনিও সিপাহীদিগের আক্রমণের আশঙ্কায় বিচলিত হইয়াছিলেন। এ সময় আগরা রক্ষা করা তাঁহার প্রধান কর্তব্যের মধ্যে পরিগণিত হইয়াছিল। এই গুরুতর কর্তব্যসম্পাদনের উপায় নির্ধারণের জন্ত তিনি ১৩ই মে আগরা-বাসী প্রধান প্রধান ইংরেজকে আহ্বান করিলেন।\* দেওয়ানি ও সৈনিক-বিভাগের প্রধান কর্মচারী, খ্রীষ্টধর্ম-প্রচারক এবং অগ্ণাণ্ড ইউরোপীয় এই উদ্দেশ্যে মন্ত্রণাগৃহে সমবেত হইলেন। লেফ্টেনেন্ট-গবর্নর উপস্থিত বিপদের সময়ে সমুদয় খ্রীষ্টানকে দুর্গে লইয়া যাইবার অভিপ্রায় প্রকাশ করিলেন। লেফ্টেনেন্ট-গবর্নরের মন্ত্রণাদাতারা সহসা এইরূপে ভয় প্রকাশ করা সম্ভব বলিয়া মনে করিলেন না। তাঁহারা সাতিশয় বিরোধী হওয়াতে লেফ্টেনেন্ট-গবর্নরের অভিমতানুসারে কার্য হইল না। মন্ত্রণাগৃহে যাহারা সমবেত হইয়াছিলেন, তাঁহারা সকলেই সাতিশয় উত্তেজনার সহিত আপন আপন অস্ত্রিত প্রকাশ করিতে লাগিলেন। যাহারা আহুত হয়েন নাই, তাঁহারাও ঐ স্থানে আসিয়া ঐরূপ উত্তেজনার পরিচয় দিতে লাগিলেন। এক জন কহিলেন যে, এ সময়ে সকলেরই দুর্গে যাওয়া কর্তব্য। অগ্ণ জন কারাগার সম্বন্ধে কি কর্তব্য, জিজ্ঞাসা করিলেন। অপর জন খাণ্ড সামগ্রীর ব্যবস্থা করিতে কহিলেন। আর এক জন সৈনিকনিবাসস্থিত সিপাহীদিগের বিষয়ে সবিশেষ মনোযোগ দিতে কহিলেন। এইরূপে প্রত্যেকেই আপনভাবে আপনার কথা কহিতে লাগিলেন। প্রত্যেকেই আপন মতপ্রকাশের সময়ে আগ্রহ ও উত্তেজনার একশেষ দেখাইতে লাগিলেন। এইরূপে সমাগত লোকের অস্থিরতায় নানা গোলযোগ ঘটিতে লাগিল। বহু গোলযোগের পর সিদ্ধান্ত হইল যে, সমগ্র সৈনিকদল কাওয়াজের ক্ষেত্রে সমবেত হইবে। লেফ্টেনেন্ট-গবর্নর সৈনিকদিগকে সময়োচিত উপদেশ দিবেন। ইউরোপীয় ও ফিরিঙ্গি-দিগকে লইয়া সৈনিকদল সংগঠন করিতে হইবে। শাস্ত্রীগণ নগরের নানা স্থানে যাইয়া, অধিবাসীদিগের উদ্বেগ দূর করিবে, এবং তাহাদিগকে প্রশান্তভাবে থাকিতে কহিবে।

\* Raikes, Notes on the Revolt in the North-Western Provinces of India, p. 9.

মন্ত্রণাসভা ভঙ্গ হইল। এদিকে কাওয়াজের আয়োজন হইতে লাগিল। পরদিন প্রাতঃকালে সমুদয় সৈন্য কাওয়াজের ক্ষেত্রে সমবেত হইল। দেওয়ানি বিভাগের সমুদয় প্রধান কর্মচারী ঐ স্থলে উপস্থিত হইলেন। লেফটেনেন্ট-গবর্নর কলবিন সাহেব শকটারোহণে আগমন করিলেন। তাঁহার উপস্থিতিতে সম্মানসূচক তোপধ্বনি হইতে লাগিল। ইউরোপীয় মহিলাগণ যখন আপনাদের আবাসগৃহে থাকিয়া তোপের শব্দ শুনিতে পাইলেন, তখন তাঁহারা সিপাহী ও ইংরেজদিগের মধ্যে যুদ্ধ হইতেছে আশঙ্কা করিয়া, একান্ত ভীত হইয়া উঠিলেন। লেফটেনেন্ট-গবর্নর শকটে দণ্ডায়মান হইয়া, সর্বপ্রথম ইউরোপীয় সৈনিকদিগকে সম্বোধনপূর্বক কহিলেন যে, তাহারা যেন তাহাদের সহযোগী সিপাহীদিগের প্রতি অবিশ্বাস না করে। কিন্তু যে সকল ছবৃত্ত দিল্লীতে পাদরির কণ্ঠকে নিহত করিয়াছে, যুদ্ধক্ষেত্রে তাহাদের সম্মুখীন হইলে, তাহারা যেন ঐ বিষয় ভুলিয়া না যায়। লেফটেনেন্ট-গবর্নর যখন এইরূপ বলিতেছিলেন, তখন ইউরোপীয় পদাতিগণ উত্তেজনার সহিত দৃঢ়-মুষ্টিতে আপনাদের বন্দুক ধরিতেছিল। তাহাদের তদানীন্তন ভাব দর্শনে বোধ হইয়াছিল যে, লেফটেনেন্ট-গবর্নর তাহাদিগকে তাহাদের বিশ্বাসের পাত্র বলিয়া নির্দেশ করিতেছিলেন, তাহারা সেই বিশ্বাসভাজনদিগকেই গুলি করিতে সচেষ্ট হইয়াছে। অতঃপর কলবিন সাহেব সিপাহীদিগকে সম্বোধন-পূর্বক হিন্দুস্থানী ভাষায় কহিলেন যে, তাহাদের উপর তাঁহার সম্পূর্ণ বিশ্বাস রহিয়াছে। যদি কাহারও কোন বিষয়ে অভিযোগ থাকে, তাহা হইলে তাহারা সে বিষয় প্রকাশ করিতে পারে। অথবা যদি কেহ কোম্পানির প্রদত্ত যুদ্ধভূষণ পরিত্যাগ করিতে ইচ্ছা করে, তাহা হইলে তাহারা অগ্রসর হইয়া, আপনাদের ইচ্ছানুসারে কার্য করিতে পারে। লেফটেনেন্ট-গবর্নরের কথা শেষ হইল। কোন সিপাহী অভিযোগপ্রকাশ বা সাময়িক বৈশপরিত্যাগের অভিপ্রায়ে অগ্রসর হইল না। তাহারা প্রতিমুহূর্তে কর্মনাশের আশঙ্কা করিতেছিল। ব্রিটিশ গবর্নমেন্টের প্রতি বিদ্বেষবহিতে তাহাদের হৃদয় দক্ষীভূত হইতেছিল। তাহারা সে সময়ে আশঙ্কায় অধীর ও বিদ্বেষভাবে উত্তেজিত হইল না বটে, কিন্তু উপস্থিত ইউরোপীয়গণ তাহাদের অগ্রসরতাব্যঞ্জক মুখভঙ্গী দর্শনে পূর্বের স্থায় ছশ্চিন্তাগ্রস্ত হইয়া রহিলেন।

লেফ্‌টেনেন্ট-গবর্নর অতঃপর দিল্লী ও আগরার পথ নিরাপদ রাখিতে উদ্যত হইলেন । এই উদ্দেশ্যে এক জন ইংরেজ কর্মচারী নিয়োজিত হইলেন । কর্মচারীর প্রতি এই আদেশ দেওয়া হইল যে, তিনি পথের পার্শ্ববর্তী স্থানের অধিবাসীদিগের উত্তেজনা দূর করিবেন ; সিপাহীগণ দিল্লী হইতে আগরার অভিমুখে ধাবিত হইলে, আগরার সৈনিকদল তাহাদের গতিরোধের জন্ত বিনা বাধায় অগ্রসর হইতে পারে, তদ্বিষয়ে যথোপযুক্ত উপায় নির্ধারণ করিবেন ; এবং পার্শ্ববর্তী স্থানসমূহে যখন যাহা ঘটবে, তাহা কতৃপক্ষের গোচর করিতে যত্নশীল হইবেন । এইরূপ বন্দোবস্ত করিয়া, কলবিন সাহেব বিষয়ান্তরে মনোনিবেশ করিলেন ।

এই সময়ে ভারতের মিত্ররাজগণের সাহায্য গ্রহণ করা একান্ত আবশ্যক হইয়া উঠিয়াছিল । ইঁহাদের রাজ্যে সমরকুশল লোকের অধিবাস ছিল । ইঁহাদের অধীনে অনেক সাহসী সৈনিক যুদ্ধোপযোগী অস্ত্রাদিতে সজ্জিত থাকিত । ইঁহাদের আদেশে অনেকে অনেকে দুঃসাধ্য কার্যসাধনে উদ্যত হইত । এইরূপ সঙ্গতিপন্ন, এইরূপ সহায়সম্পন্ন, এইরূপ ক্ষমতাপন্ন অধিপতিদিগের সাহায্য ব্যতিরেকে ইংরেজ উপস্থিত বন্ধে কৃতকার্য হইতে পারিতেন না । এই সকল অধিপতি রাজ্যরক্ষার জন্ত যে সকল সৈন্য রাখিতেন, তৎসমুদয়ের উপর প্রধানতঃ এতদেশীয় অধিনায়কগণ কর্তৃত্ব করিতেন । এতদ্ব্যতীত ব্রিটিশ গবর্নমেন্ট কোন কোন ভূপতিকে সন্ধিসূত্রে আবদ্ধ করিয়া, তাঁহাদের রাজ্যে আপনাদের এক এক দল সৈন্য রাখিতেন । অধিপতিদিগকে এই সকল সৈনিকদলের ব্যয়-ভার বহন করিতে হইত । এই সকল সৈন্য ইউরোপীয় সেনানায়কদিগের অধীনে থাকিয়া ইউরোপীয় সামরিক প্রণালী অনুসারে শিক্ষা লাভ করিত । মহারাজ শিন্দের রাজধানীতে এইরূপ সুশিক্ষিত সৈনিকদল ছিল । কোটা রাজ্যেও এই শ্রেণীর একদল সৈন্য অবস্থিতি করিতেছিল । এতদ্ব্যতীত ভরতপুর রাজ্যে তেজস্বী ও দৃঢ়কায় জাঠগণ সৈনিকশ্রেণীতে নিয়োজিত ছিল । ভরতপুর আগরার নিকটবর্তী ছিল । গোবালিয়রের উপরেও আগরার বিষয় অনেকাংশে নির্ভর করিতেছিল । এই দুই রাজ্যের সৈনিকবল আগরার ইংরেজদিগের শক্তিবৃদ্ধি অথবা শক্তিনাশ করিতে পারিত । সুতরাং কলবিন আত্মশক্তিবৃদ্ধির জন্ত ভরতপুরের ভূপতি ও গোবালিয়রের রাজার নিকটে সাহায্য

প্রার্থনা করিলেন । এই প্রার্থনা উভয় ভূপতির নিকটেই গ্রাহ্য হইল । উভয় ভূপতি কালবিলম্ব না করিয়া লেফটেনেন্ট-গবর্নরের সাহায্যের জন্য সৈনিকদল পাঠাইলেন । ভরতপুরের একদল সৈন্য ১৫ই মে কাপ্তেন নিক্সন নামক এক জন ইউরোপীয় সেনানায়কের অধীনে মথুরায় উপনীত হইল । পর দিন গোবালিয়র হইতে অশ্বারোহী ও গোলন্দাজ সৈন্য আগরায় পদার্পণ করিল । মহারাজ শিন্দে আপনার শরীররক্ষক সৈনিকদিগকেও লেফটেনেন্ট-গবর্নরের অধীনে রাখিতে বিমুখ হইলেন না । এই সময়ে অপরের সাহায্যগ্রহণ গবর্ন-মেন্টের শক্তিহীনতার পরিচায়ক হইতে পারে । লোকে ইংরেজের উত্তর-পশ্চিম প্রদেশের রাজধানীতে ভিন্ন ভিন্ন ভূপতির সৈনিকদিগের সমাগম দেখিয়া, গবর্নমেন্টকে ক্ষমতাশূন্য বলিয়া মনে করিতে পারে । কিন্তু লেফটেনেন্ট-গবর্নর লোকের এইরূপ ধারণার পর্যালোচনা করেন নাই । লোকে গবর্নমেন্টকে শক্তি-শালী বা শক্তিহীন ভাবুক, তিনি তদ্বিষয়ে কোনরূপ বিচারবিতর্ক না করিয়া, মিত্ররাজগণের সাহায্যগ্রহণে অগ্রসর হইয়াছিলেন । তাঁহার বিশ্বাস ছিল-যে, যদি ভারতের ভূপতিগণ এ সময়ে তাঁহাদের বিপক্ষ হইতেন, তাহা হইলে কোনরূপ পার্শ্বিক ক্ষমতা তাঁহাদিগকে সর্বধ্বংস হইতে রক্ষা করিতে পারিবে না । সুতরাং এ সময়ে মরাঠা, জাঠ ও রাজপুতদিগের উপর বিশ্বাসস্থাপন এবং তাহাদের ক্ষমতার উপর নির্ভর করাই তাঁহার অবলম্বনীয় নীতি ছিল । উপস্থিত বিপত্তি-কালে তিনি এই নীতি শ্রেয়স্কর বলিয়া মনে করিয়াছিলেন ।

দিনের পর দিন অতিবাহিত হইতে লাগিল, আগরায় আপাততঃ কোনরূপ গোলযোগের চিহ্ন পরিলক্ষিত হইল না । মণ্ডাহ কাল এইরূপ বিনা গোলযোগে অতীত হইল । রাজ্যশাসনের জন্য যে যে কার্য আবশ্যিক, তৎসমুদয়ের সম্পাদনে কোনরূপ শৃঙ্খলাহানি ঘটিল না । সাধারণেও নিত্যকর্তব্যসম্পাদনের সময়ে আপনাদের প্রশান্তভাবে বিসর্জন দিল না । বিচারক যথাসময়ে বিচারগৃহে উপস্থিত হইতে লাগিলেন । রাজস্বসংগ্রাহক রাজস্বকার্য যথাসময়ে সম্পন্ন করিতে লাগিলেন । মাজিষ্ট্রেট নিয়মিতরূপে নিরুদ্বেগে আপনার কর্মে অভিনিবিষ্ট হইতে লাগিলেন । গবর্নমেন্ট ও মিশনারিস্কুলে পূর্বের ত্রায় ছাত্র-সমাগম হইতে লাগিল । অধ্যাপকগণ পূর্বের ত্রায় অধ্যাপনা করিতে লাগিলেন । কোমলমতি শিক্ষার্থীগণও পূর্বের ত্রায় পাঠাভ্যাসে মনোনিবেশ করিতে লাগিল ।

দেওয়ানিবিভাগের কোন কোন কর্মচারী এ সময়ে স্থানান্তরপ্রবাসী আত্মীয়-দিগের বিপদের আশঙ্কা করিয়া বিপক্ষ সিপাহীদিগের প্রতি জাতক্রোধ হইতে-ছিলেন ; কেহ কেহ বিপদ অবশ্যস্তাবী মনে করিয়া একান্ত ভীত হইয়া উঠিতে-ছিলেন । কিন্তু একরূপ ভয় ও দুর্ভাবনার নিদর্শন সৈনিকবিভাগে পরিদৃষ্ট হয় নাই । সৈনিকবিভাগের তরুণবয়স্ক আফিসারগণ পূর্বের ত্রায় আপনাদের কার্য্য করিতে লাগিলেন । তাঁহারা নির্দিষ্ট সময়ে প্রশান্তভাবে অশ্বারোহণে পরিভ্রমণ করিতে লাগিলেন, যথানিয়মে বিলিয়ার্ড খেলিতে লাগিলেন, নদী-সম্মুখে আমোদিত হইতে লাগিলেন, রাত্রিকালে সিপাহীদিগের আবাসগৃহের সম্মুখে স্মৃষ্টিস্মৃথ অনুভব করিতে লাগিলেন । উত্তেজিত সিপাহীগণ যে, এ সময়ে তাঁহাদের ক্ষমতা বিনষ্ট, তাঁহাদের আধিপত্য বিনুশ্ত, তাঁহাদের সমুদয় কার্য্য বিশৃঙ্খল করিতে উদ্যত হইয়াছে, ইহা যেন তাঁহাদের মনেও স্থান পাইতেছিল না । ইউরোপীয়গণ এইরূপ প্রশান্তভাবে থাকিলেও, কর্তৃপক্ষ আকস্মিক বিপ্লবের নিবারণ জন্ত যথোপযুক্ত উপায়ের অবলম্বনে উদাসীন থাকেন নাই । ইউরোপীয় ও ফিরিঙ্গিগণ সখের সৈনিকদলে প্রবেশ করে । বাহাদের স্ত্রীপুত্র নাই, কোনরূপ পার্থিববন্ধনে যাহারা আবদ্ধ নহেন, তাঁহারা সম্ভ্রষ্টচিত্তে অশ্বারোহণ পূর্বক নগরের বহির্ভাগ পর্য্যবেক্ষণ করিতে লাগিলেন । যাহারা পরিবারবদ্ধ হইয়া বাস করেন, তাঁহারা কেবল নগরের পরিদর্শনকার্য্যে নিয়োজিত হইলেন । নগরের ও তৎপার্শ্ববর্তী স্থানের শান্তপ্রকৃতি অধিবাসী-দিগকে অভয়দান করা, এবং উদ্ধতস্বভাব লোকদিগকে ভয় প্রদর্শন করা, ইহাদের প্রধান কর্তব্যের মধ্যে পরিগণিত হইল ।

২১শে মে পর্য্যন্ত উত্তরপশ্চিম প্রদেশের রাজধানীতে ইউরোপীয়দিগের মধ্যে এইরূপ প্রশান্তভাব ছিল । কিন্তু ঐ দিন সহসা নগরে গোলযোগ ঘটিল । আলীগড় হইতে সংবাদ আসিল যে, তত্রত্য সিপাহীগণ ব্রিটিশ গবর্নমেন্টের বিরুদ্ধে সমুখিত হইয়াছে ।

আলীগড় আগরার ৫০ মাইল দূরে যমুনার অপর তটে অবস্থিত । যেখানে আদালত, বাজার, সৈনিকনিবাস প্রভৃতি রহিয়াছে, তাহা কোয়েল নামে প্রসিদ্ধ । যেখানে দুর্গ অবস্থিত, তাহাই আলীগড় নামে অভিহিত হইয়া থাকে । কোয়েল



আলীগড়ের কিছুদূর দক্ষিণে অবস্থিত। উপস্থিত সময়ে কোয়েল সহরের সৈনিক-নিবাসে ৯ সংখ্যক পদাতিদলের কতকগুলি সিপাহী অবস্থিতি করিতেছিল। এই দলের ভিন্ন ভিন্ন অংশ মইনপুরী, ইটোয়া, বুলন্দসহর প্রভৃতি স্থানে ছিল। মে মাসের মধ্যভাগে আলীগড়ে গোলযোগের নিদর্শন লক্ষিত হয়। পার্শ্ববর্তী স্থান হইতে নানারূপ আতঙ্কজনক সংবাদ উপস্থিত হইতে থাকে। এক জন ইংরেজ সেনানায়ক কতিপয় সিপাহীকে সঙ্গে লইয়া, ঐ সংবাদের সত্যতা-নিরূপণ, এবং প্রকৃত প্রস্তাবে উত্তেজনা লক্ষিত হইলে উহার নিবারণের জন্ত গমন করেন। দেওয়ানিবিভাগের এক জন তরুণবয়স্ক কর্মচারী ও কতিপয় সওয়ারী ইহাদের সঙ্গে যায়। ইহাদের নিকটে উপস্থিত সংবাদ অতিরঞ্জিত বলিয়া প্রতিপন্ন হয়। ইহারা যখন সহরের কসাইখানার নিকটে গমন করে, তখন অনেক উত্তেজিত লোক ইহাদের দৃষ্টিপথে নিপতিত হয়। কিন্তু লোকের এই উত্তেজনা হইতে তখন কোনরূপ অনিষ্টের উৎপত্তি হয় নাই। সুতরাং সৈনিকদল কোন বিষয়ে সন্দেহ না করিয়া, যথাস্থানে প্রস্থান করে।

কিন্তু গোলযোগের শান্তি হইল না। নগরে, বাজারে, সৈনিকনিবাসে, লোকালয়ে, গভীর উত্তেজনামূলক অশান্তির আবির্ভাব না ঘটিলেও, স্থানান্তর হইতে একটি ক্ষুলিঙ্গ উঠিত হইল। এই ক্ষুলিঙ্গ হইতে শেষে ভয়ঙ্কর অগ্নিকাণ্ড সংঘটিত হইয়া, জ্বালাময়ী শিখার সমগ্র স্থান পরিব্যাপ্ত করিল। সৈনিকনিবাস বা কসাইখানা হইতে ঐ ক্ষুলিঙ্গের আবির্ভাব হয় নাই। নিকট-বর্তী একটি পল্লী হইতে উহার উদ্ভব হয়। এই পল্লীতে একজন ব্রাহ্মণ বাস করিতেন। আবাসপল্লী ও পার্শ্ববর্তী স্থানে ইহার সম্মান, ক্ষমতা ও প্রতিপত্তি ছিল। কথিত আছে, কারারক্ষকদিগের এক জনের সহিত ব্রাহ্মণের সম্পর্ক ছিল, উক্ত সম্পর্কের অনুরোধে এই ব্যক্তি ব্রাহ্মণের কার্যসাধনে সর্বদা প্রস্তুত থাকে। এই সময় আলীগড়ের ধনাগারে প্রায় ৭ লক্ষ টাকা ছিল। এই টাকার বিষয় লোকের অবিদিত ছিল না। উহা উক্ত পল্লীবাসী ব্রাহ্মণেরও গোচর হইয়াছিল। ব্রাহ্মণ মনে করিলেন যে, সিপাহী ও পল্লীবাসীগণ যদি গবর্ণমেন্টের বিরুদ্ধে সম্মুখিত হয়, তাহা হইলে সিপাহীদিগের ত্রায় পল্লীবাসীদিগেরও কালেক্টরির টাকা লাভ হইবে। এই সঙ্কল্প সিদ্ধির জন্ত তিনি দুই জন সিপাহীর নিকটে প্রস্তাব করিলেন যে, যদি তাহারা আপনদের সিপাহীদিগকে গবর্ণ-

মেণ্টের বিরুদ্ধাচরণে প্রবৃত্তি করে, তাহা হইলে তাঁহার কথায় ২,০০০ হাজার পল্লীবাসী সিপাহীদিগের সহযোগী হইবে । ব্রাহ্মণকে গোপনে সিপাহীদিগের সহিত পরামর্শ করিতে দেখিয়া, এক জন এতদেশীয় আফিসার সন্দেহান হইলেন । ঘটনা জানিয়া, তিনি সবিশেষ কৌশলের সহিত ব্রাহ্মণকে কহেন যে, উপস্থিত বিষয়ের পরামর্শ কোন গোপনীয় স্থানে করা উচিত । ব্রাহ্মণ যদি তাঁহার সহিত ঐ স্থানে উপস্থিত হইলেন, তাহা হইলে প্রস্তাবিত বিষয়ে পরামর্শ গ্রহণ হইতে পারে । ব্রাহ্মণ সন্মত হইলেন । গোপনীয় স্থানে সিপাহীগণ অবস্থিতি করিতে লাগিল । ব্রাহ্মণ উপস্থিত হইয়া তাহাদের নিকটে স্বকীয় প্রস্তাবের উল্লেখ করিলেন । অমনি আফিসারের সঙ্কেতমাত্র সিপাহীগণ তাঁহাকে অবরুদ্ধ করিল ।\* সিপাহীগণ সর্বপ্রথম ব্রাহ্মণের কথা শুনিয়াই ইংরেজ অধিনায়ককে ঐ বিষয় জানাইয়াছিল । অধিনায়ক ব্রাহ্মণকে অবরুদ্ধ করিবার আদেশ দিয়াছিলেন । সিপাহীগণ এইরূপে অধিনায়কের আদেশপালন করিল । সেই দিনই সৈনিকবিচারালয়ে এতদেশীয় আফিসারদিগের নিকটে ব্রাহ্মণের বিচার হইল । বিচারকগণ ফাঁসির আদেশ দিলেন । সেই দিনই গোপনীয় সমবেত সিপাহীদিগের সমক্ষে ব্রাহ্মণ ফাঁসিকাষ্ঠে বিলম্বিত হইলেন । এ পর্য্যন্ত সিপাহীগণ প্রশান্তভাবে ছিল । যাহারা ষড়যন্ত্রের কথা অধিনায়ককে জানাইয়াছিল, অধিনায়কের আদেশানুসারে যাহারা ষড়যন্ত্রকারীকে অবরুদ্ধ করিয়াছিল, তাহারা যে, সহসা উত্তেজনায় অধীর হইবে এবং অধীরতাসহকারে ইংরেজের আধিপত্য বিলুপ্ত করিতে দলবদ্ধ হইয়া উঠিবে, তাহা কর্তৃপক্ষ কখন ভাবেন নাই । কিন্তু তাঁহারা যাহা ভাবিয়াছিলেন, কার্যতঃ তাহা ঘটিল না । ব্রাহ্মণের অপমৃত্যু দেখিয়া, হিন্দু সিপাহীগণ স্তম্ভিত হইল, সহসা তাহাদের এক জন অগ্রসর হইয়া উচ্চৈঃস্বরে কহিল—“দেখ, আমাদের ধর্মের জন্ত এক জন কেমন অম্লানভাবে দেহত্যাগ করিলেন ।” বারুদস্তূপে অগ্নিস্ফুলিঙ্গ পড়িলে যেরূপ কাণ্ড সজ্জ্বলিত হয়, সিপাহীর এই কথায় সেইরূপ ভয়াবহ গোলযোগ ঘটিল । উহাতে সিপাহীদিগের সমস্ত শৃঙ্খলা, সমস্ত আনুগত্য, সমস্ত বিশ্বস্তভাব যেন অনন্ত বায়ুরাশির মধ্যে বিলীন হইল । সিপাহীদিগের আকস্মিক উত্তেজনায়

\* *Chambers, Indian Revolt. p. 112.*

ইউরোপীয়গণ উদ্ভ্রান্ত হইয়া পড়িলেন । আর তাঁহারা আপনাদের স্থানে স্থির-ভাবে থাকিতে পারিলেন না । ইংরেজ সেনানায়কগণ পলায়নে বাধ্য হইলেন । দেওয়ানিবিভাগের কর্মচারিগণ এবং খ্রীষ্টধর্মাবলম্বী অন্যান্য অধিবাসিগণ আত্মরক্ষার জন্ত স্থানান্তরে যাইবার উদ্যোগ করিতে লাগিলেন । এইরূপে সৈনিকবিভাগ ও দেওয়ানিবিভাগের কর্মচারিগণ, এবং স্বাধীন ইউরোপীয় বা ফিরিস্টিগণ সকলেই আলীগড় হইতে তাড়িত হইলেন । ইহাদের কেহ কেহ আগরার অভিমুখে গমন করিলেন । কেহ কেহ মীরাটের দিকে ধাবিত হইলেন । যাহারা আগরার পথ অবলম্বন করিয়াছিলেন, তাঁহারা নিরাপদে নির্দিষ্ট স্থানে উপনীত হইলেন । যাহারা মীরাটের দিকে অগ্রসর হইয়াছিলেন, তাঁহাদিগকে পথে বিপত্তিকর ঘটনাজালে পরিবেষ্টিত হইতে হয় । কিন্তু আলীগড় হইতে যাত্রাকালে কেহই আক্রান্ত বা আহত হইলেন নাই । সিপাহী-গণ তাহাদিগকে সদয়ভাবে বিদায় দিয়াছিল । এতদেশীয় আফিসারগণ রোদন করিতে করিতে তাঁহাদের অনুগমন করিয়াছিলেন ।

ইউরোপীয়গণ আলীগড় হইতে এইরূপে তাড়িত হইলে, সিপাহীগণ ও পল্লীবাসিগণ আপনাদের নির্দিষ্টকার্য সম্পাদনে উদ্বৃত্ত হইল । এখন তাহাদের এই উদ্বৃত্ত কোন অংশে ব্যাহত হইল না । তাহারা বিনা বাধায় কালেক্টরির ৭ লক্ষ টাকা আপনাদের মধ্যে ভাগ করিয়া লইল । কাগাগারের কয়েদীদিগকে ছাড়িয়া দিল । ইউরোপীয়দিগের আবাসগৃহ ভস্মীভূত করিয়া ফেলিল । যাহা কিছু ইউরোপীয়দিগের অধিকৃত, যাহা কিছু ইউরোপীয়দিগের ব্যবহৃত, সংক্ষেপে যাহা কিছু ইউরোপীয়দিগের সহিত সংস্পৃষ্ট, তৎসমুদয়ই বিলুপ্তিত বা বিনষ্ট হইল । আলীগড়ে ইংরেজের প্রাধান্য, ইংরেজের ক্ষমতা বা ইংরেজের আধিপত্যের কোন নিদর্শন রহিল না । সিপাহীগণ টাকা লইয়া দিল্লীর অভিমুখে প্রস্থান করিল । পল্লীবাসিগণ ও নগরের জনসাধারণ অর্থ এবং বিলুপ্তিত দ্রব্যাদি লইয়া, আপনাদের বাসস্থানে অবস্থিতি করিতে লাগিল । উপস্থিত সময়ে ইহাদের মধ্যে শান্তিস্থাপন বা আধিপত্যবিস্তারের জন্ত কোন ব্রিটিশ রাজপুরুষের আবির্ভাব হইল না । যখন এই স্থানে ইংরেজের ক্ষমতা পুনর্ব্বার কিয়দংশে প্রতিষ্ঠিত হয়, তখন উহার অবস্থা দর্শনে ইংরেজগণ নিশ্চিত ও চমকিত হইয়াছিলেন । এই সময়ে এক জন ইংরেজ এই স্থানে পদার্পণ করিয়া

লিখিয়াছিলেন—“আমাদের সমক্ষে আলীগড় বিস্ময়কর দৃশ্যের বিস্তার করিল। বাঙ্গালা, কারাগার প্রভৃতি সমস্তই বিলুপ্তি ও ভস্মীভূত হইয়াছিল। \* \* আমাদের উপস্থিতিতে স্থানীয় লোকে অনুসন্ধানের আশঙ্কায় বিলুপ্তি জব্যাদি এদিকে ওদিকে ফেলিয়া দিয়াছিল। কয়েক মাইল পর্য্যন্ত পথের উভয়পার্শ্বে, জঙ্গলে, কূপে তৈজসপত্রাদি এবং শামপেন্ হইতে হলুয়েলের বটিকা পর্য্যন্ত ও বহুমূল্য কিংখাপ হইতে পুরাতন পরিচ্ছদ পর্য্যন্ত সমস্ত দ্রব্য বিক্ষিপ্তভাবে রহিয়াছিল”।\*

২০শে মে আলীগড়ে এইরূপ আকস্মিক গোলযোগ ঘটে। পূর্বে উক্ত হইয়াছে যে, ৯ সংখ্যক সিপাহীদলের কতক অংশ বুলন্দসহর, ইটোয়া এবং মইনপুরীতে ছিল। আলীগড়ের ঘটনার সংবাদ অবিলম্বে ঐ সকল স্থানে পহুছিল। ঐ সকল স্থানের সিপাহীগণও আপনাদের সহযোগীদিগের উত্তেজনার একান্ত অধীর হইয়া উঠিল। বুলন্দসহরে তাদৃশ গোলযোগ ঘটে নাই। সিপাহীগণ কেবল ধনাগার লুণ্ঠনপূর্ব্বক প্রস্থান করে, কিন্তু ইটোয়া এবং মইনপুরীতে অন্তরূপ ঘটনার আবির্ভাব হয়।

ইটোয়া মীরাতের পথের পার্শ্বে আগরার প্রায় ৭৩ মাইল দক্ষিণপূর্বে অবস্থিত। এই স্থানের অধিবাসিগণ শান্তভাবে ও সন্তুষ্টচিত্তে কালযাপন করিতেছিল। উপস্থিত সময়ে ঐ স্থানে নানারূপ উন্নতির নিদর্শন পরিলক্ষিত হইতেছিল। মে মাসের প্রারম্ভে এই বিভাগের সর্বত্র সুশৃঙ্খলভাবে সমুদয় কার্য্য নিৰ্ব্বাহিত হইতেছিল। চুরি ডাকাতি প্রভৃতি উপদ্রব অনেক পরিমাণে কমিয়া গিয়াছিল। বিনা গোলযোগে রাজস্ব সংগৃহীত হইতেছিল। বহুসংখ্য পাঠাগার ও বিদ্যালয় স্থাপিত হইয়াছিল। বিভিন্ন স্থানে গমনাগমনের অভিনব পথ খোলা হইয়াছিল। খালের জলে বহুবিস্তীর্ণ শস্তক্ষেত্রসমূহের উর্ব্বরতাশক্তি বৃদ্ধি পাইতেছিল। অধিবাসিগণ সাধারণতঃ প্রফুল্ল ও সন্তুষ্ট ছিল। এইরূপ সন্তোষ, এইরূপ প্রফুল্লতার মধ্যে সহসা মহাবিপ্লবের আবির্ভাব হইল। উহার সংঘাতে সমুদয় শৃঙ্খলা, সমুদয় স্ত্রনিয়ম বিনষ্ট হইয়া গেল।

যখন আগরা হইতে মীরটি এবং দিল্লীর সংবাদ ইটোয়াতে উপস্থিত হয়,

\* *Kaye, Sepoy War. Vol. III. p. 217, note.*

তখন মাজিষ্ট্রেট হিউম সাহেব, বিপ্লবকারী সিপাহীদিগের অবরোধে কৃতসঙ্কল্প হইলেন । যেহেতু এই সকল সিপাহী আপনাদের আবাসবাটীতে গিয়াই হউক, অথবা চারি দিকে বেড়াইয়াই হউক, পার্শ্ববর্তী স্থানের অধিবাসীদিগকে সমুদ্রেজিত করিতে পারিত । এই উদ্দেশ্যে শাস্ত্রীগণ সাধারণের গম্ভব্য পথের পর্যবেক্ষণের জন্য প্রেরিত হয় । ১৬ই মে রাত্তিকালে ইহারা মীরাতের ৩ সংখ্যক অশ্বারোহী দলের ৭ জন সওয়ারকে অবরোধ করে । অবরুদ্ধ সওয়ারদিগের পিস্তল ও তরবারি ছিল । ইহারা যখন ইটোরার সৈনিক-নিবাসে উপস্থিত হয়, তখন অবরোধকারীদিগকে বাধা দিয়া, এক জন ইংরেজসেনানায়ককে গুলি করে, এবং আর এক জনের নিধনসাধনে উত্তত হয় । ৯ সংখ্যক দলের এক জন সিপাহী এবং নগরের কোতোয়াল আক্রমণকারী সওয়ারকে নিহত করে । ইহার মধ্যে শাস্ত্রীগণ আক্রমণকারী অপর সওয়ারদিগের সম্মুখীন হয় । এক জন সওয়ার গুলিতে প্রাণ বিসর্জন করে, দুই জন তরবারির আঘাতে গতাস্থ হয় । দুই জন পলায়ন করে । ইহাদের এক জন পুলিশ কর্তৃক অবরুদ্ধ হয় । ইহারা সকলে ফতেহপুরবিভাগের অধিবাসী পাঠান ।

ইহার কয়েক দিন পরে উক্ত ৩ সংখ্যক অশ্বারোহী দলের কয়েক জন পলাতক সওয়ার ইটোরার সদর ষ্টেশনের প্রায় ১০ মাইল দূরবর্তী যশোবন্তনগর-নামক স্থানে উপস্থিত হয় । ইহারাও অস্ত্র-শস্ত্রে সজ্জিত ছিল । ইহারা যে গোকুর গাড়ীতে যাইতেছিল, শাস্ত্রীগণ তাহা অবরুদ্ধ করিয়া, ইহাদিগকে অস্ত্র পরিত্যাগ করিতে কহে । সওয়ারগণ অস্ত্রাদির উন্মোচনের ভাণ করিয়া সহসা অবরোধকারীদিগকে বন্দুকের গুলিতে নিহত করে । অতঃপর তাহারা একটি হিন্দু-দেবালয়ে যাইয়া আশ্রয় প্রাপ্ত হয় । দেবালয়টি যদিও ক্ষুদ্র, তথাপি সুদৃঢ় ছিল । উহার সম্মুখে একটা প্রাচীরবেষ্টিত রক্ষবাটিকা রহিয়াছিল ।

সওয়ারদিগের উক্ত দেবালয়ে গমনের সংবাদ পাইয়া, মাজিষ্ট্রেট সাহেব আপনার বগি প্রস্তুত করিতে আদেশ দিলেন । আদেশানুসারে অবিলম্বে বগি প্রস্তুত হইল । মাজিষ্ট্রেট সাহেব অস্ত্রাদিতে সজ্জিত হইয়া, আপনার সহকারীর সহিত শকটে আরোহণপূর্বক যশোবন্তনগরে বেলা ৯টার সময় যাত্রা করিলেন । তিনি নির্দিষ্ট স্থানে উপস্থিত হইয়া দেখিলেন যে, সওয়ারগণ যে স্থলে অবস্থিতি

করিতেছে, তাহা সহসা হস্তগত করা সুসাধ্য নয়। নিম্নশ্রেণীর মুসলমান অধিবাসিগণ দলবদ্ধ হইয়া চারি দিকে ছিল। কথিত আছে, ইহারা মাজিষ্ট্রেট সাহেবের কোনরূপ সাহায্য করে নাই। যে সকল সিপাহী ইটোয়া হইতে আসিতে আদিষ্ট হইয়াছিল, তাহারা পথ ভুলিয়া যাওয়াতে উপস্থিত হইতে পারে নাই। মাজিষ্ট্রেট সাহেবের সঙ্গে পুলিশের অস্ত্রধারী লোক ছিল। ইহারাও তাদৃশ কার্যপটুতা প্রদর্শন করে নাই। একজন প্রহরী দেবালয়ের দ্বারদেশে উপনীত হয়। কিন্তু হতভাগ্য আপনার বিশ্বস্ততা প্রতিপন্ন করিতে গিয়া, সওয়ারদিগের অস্ত্রাঘাতে দেহত্যাগ করে। মাজিষ্ট্রেট সাহেবের সহকারী আহত হইলেন। সুতরাং মাজিষ্ট্রেট সাহেব অগ্র উপায় না দেখিয়া, আহত বন্ধুকে সঙ্গে লইয়া ইটোয়ার প্রত্যাবর্তন করেন। এদিকে সওয়ারগণ রাত্ৰিকালে প্রচণ্ড ঝটিকার মধ্যে দেবালয় পরিত্যাগপূর্বক স্থানান্তরে পলায়ন করে।

এই ঘটনার পর দিন আলীগড়ের সিপাহীগণ ইংরেজদিগের পক্ষ পরিত্যাগ করে। এই সংবাদ তৃতীয় দিনে ইটোয়াতে পৌঁছাচ্ছে। মাজিষ্ট্রেট সাহেব ইটোয়ার সিপাহীদিগের অধ্যক্ষের সহিত পরামর্শ করেন। আলীগড়ের সৈনিকদলের যে সকল সিপাহী ইটোয়াতে ছিল, তাহারা সহযোগীদিগের বিপক্ষতাচরণের সংবাদ জানিতে না পারে, এজন্য তাহাদিগকে স্থানান্তরিত করা সিদ্ধান্ত হয়। কিন্তু সংবাদ দীর্ঘকাল গোপনে রাখার সম্ভাবনা ছিল না। মাজিষ্ট্রেট সাহেব কর্তৃপক্ষের নিকট সাহায্যকারী সৈন্যের জ্ঞাত প্রার্থনা করিয়াছিলেন। এই সাহায্যকারী সৈনিকের সমাগম সময়সাপেক্ষ ছিল। এই সকল কারণে ইটোয়ার সিপাহীদিগকে বরপুরানামক স্থানের পুলিশ ষ্টেশনে যাইবার আদেশ দেওয়া হয়। সিপাহীগণ প্রথমতঃ প্রফুল্লচিত্তে নির্দিষ্ট স্থানে যাত্রা করিল। কিন্তু দুই মাইল পথ অতিক্রম করিতে না করিতেই তাহাদের অনেকের ভাবান্তর ঘটিল। তাহারা অধিনায়কের আদেশ না মানিয়া, ইটোয়ায় ফিরিয়া গেল। কতিপয় সিপাহী এবং তাহাদের এতদদেশীয় জ্ঞানসম্পন্ন প্রশান্তভাবে রহিলেন। ইহারা ইউরোপীয় কর্মচারীদিগকে তাহাদের বালক বালিকা ও মহিলাদিগের সহিত নিরাপদে বরপুরায় লইয়া গেল। এদিকে উত্তেজিত সিপাহীগণ ইটোয়াতে প্রত্যাবর্তন করিল। উচ্ছৃঙ্খল জনসাধারণ

তাহাদের সহযোগী হইল। ইহারা বিপ্লবের নির্দিষ্ট কার্য্য অসম্পূর্ণ রাখিল না। ধনাগার বিলুপ্ত হইল, কয়েদীগণ মুক্তিলাভ করিল, গবর্ণমেন্টের আফিস এবং ইউরোপীয়দিগের আবাসগৃহ ( মাজিষ্ট্রেটের আবাসবাটী ব্যতীত ) ভস্মীভূত হইয়া গেল। মাজিষ্ট্রেট সাহেব ছদ্মবেশে পলায়ন করিলেন।\* তিন চারি দিনের জন্ত ইটোয়াতে ইংরেজশাসনের সমুদয় চিহ্ন অন্তর্হিত হইল।

ইটোয়ার বিপ্লবপ্রসঙ্গে মহামতি হিউম সাহেব বিশদভাবে ভারতবাসীদিগের মহৎ গুণের বর্ণনা করিয়াছেন। এই বর্ণনা পাঠ করিলে, এক দিকে যেমন ভারতবাসীদিগের প্রগাঢ় বিশ্বস্ততা ও অপরিমিত প্রভুত্বের পরিচয় পাওয়া যায়, অপর দিকে সেইরূপ রাজ্যশাসনোচিত দক্ষতা, বীরোচিত নির্ভীকতা ও আত্মত্যাগের নিদর্শন লক্ষিত হয়। হিউম সাহেব আপনার পলায়নের কথা এই ভাবে লিখিয়াছেন—“আমি রাত্রিতে পলায়ন করি, চারি দিক চক্ৰালোকে উদ্ভাসিত হইয়াছিল। আমার পরিচ্ছদ ও পাগড়ীর উপর এক খানি চাদর ছিল। পেণ্টালুন খুলিয়া ফেলা হইয়াছিল। পায়ে দেশী জুতা ছিল। গয়াদীন নামক এক জন চাপরাসী এবং এক জন নগরবাসী আমার সঙ্গে যাইতেছিল। সিপাহীরা যদি আমাকে কালেক্টর বলিয়া জানিতে পারিত, তাহা হইলে নিঃসন্দেহ আমার প্রাণ যাইত। আমার সঙ্গীদ্বয়ও নিহত হইত। কিন্তু যাইবার সময়ে বিশ্বস্ত চাপরাসী ও নগরবাসী সিপাহীদিগের সহিত নানা কথা বলিতে বলিতে যাইতেছিল। এইরূপ কথাবার্তায় সিপাহীরা আমাকে চিনিবার অবসর পায় নাই। ৯ সংখ্যক পদাতিকদলের অধিকাংশ সিপাহী দিল্লীতে গিয়াছিল। ইহারা বেশী টাকা সঙ্গে লইয়া যাইতে পারে নাই। যেহেতু আমি আমার বন্ধু কুমার লক্ষণ সিংহ এবং কুমার জরসিংহের ( ইহারা প্রতাপনের নামক স্থানের চৌহানবংশীয় রাজপুত। লক্ষণ সিংহ শেষে রাজা হইলেন। ) সাহায্যে অধিকাংশ টাকা পূর্বেই আগরায় পাঠাইয়া দিয়াছিলাম।

\* মার্টিন সাহেব নির্দেশ করিয়াছেন যে, মাজিষ্ট্রেট মহিলার বেশে পলায়ন করেন। কিন্তু হিউম সাহেব স্বয়ং অন্তরূপ নির্দেশ করিয়াছেন।—*Martin, Indian Empire, Vol. II, p. 192.* মাজিষ্ট্রেট হিউম সাহেবের ক্রমে পদোন্নতি হয়। ইনি স্তাসনাল কলেজ বা জাতীয় মহাসমিতির প্রধান পরিপোষক। ইনি যেরূপ সদাশয়, সেইরূপ ভারতহিতৈষী। ভারতবাসীদিগের মঙ্গলসাধনে সর্বদা ইহার একাগ্রতা ও অধ্যবসায় পরিস্ফুট হইয়া থাকে।

কিন্তু ৯ সংখ্যক সিপাহীদলের সকলেই উত্তেজিত হইয়া উঠে নাই। এই দলের কয়েক জন এতদেশীয় আফিসার এবং কুড়ি জন সিপাহী এক জন আহিরীজাতীয় সুবাদারের অধীনে থাকে। ইহাদের বিশ্বস্ততা বিচলিত হয় নাই। ইহারা আমার পলায়নের সময়ে অগ্র যে সকল ইউরোপীয় পলাইতে-ছিলেন, তাহাদিগের সকলকেই রক্ষা করে”।

যখন গোবালিয়রের সৈনিকদল উপস্থিত হয়, তখন যে সকল ভারতবাসী কালেক্টর হিউম সাহেবের পক্ষসমর্থন করিতেছিলেন; তাঁহারা সকলেই বলিয়াছিলেন যে, এই সিপাহীরা নিঃসন্দেহ গবর্ণমেন্টের বিরুদ্ধাচারী হইয়া উঠিবে। এই সঙ্কটকালে ত্রিশটি কুলমহিলা ও বালকবালিকা হিউম সাহেবের নিকটে ছিল। হিউম সাহেব ইহাদিগকে আগরায় পাঠাইতে উদ্যত হইলেন। উত্তেজিত লোকে চারি দিক ঘুরিয়া বেড়াইতেছিল। পল্লীর পর পল্লী বিলুপ্তিত, গৃহের পর গৃহ ভস্মীভূত হইতেছিল। সশস্ত্র সিপাহীগণ ফিরিঙ্গীর প্রাণবিনাশের জন্য একাগ্রতার পরিচয় দিতেছিল। এই সময়ে রাজা লক্ষ্মণসিংহ, তাঁহার ভ্রাতা অনুপসিংহ এবং জরসিংহ, অসহায় ইউরোপীয় মহিলা ও বালকবালিকাদিগকে সঙ্গে লইয়া আগরায় উপনীত হইলেন। ইহা জুন মাসে ঘটে। জুলাই মাসে হিউম সাহেব আপনার বিভাগে ফিঙ্গি-পারেন নাই। এই সময়ে ইটোয়া-বিভাগের শান্তি ও শৃঙ্খলা রক্ষা করিতে অনেকের হিউম সাহেবকে অনুরোধ করে। হিউম সাহেব সমগ্র বিভাগ পাঁচটি বড় তহশীলে বিভক্ত করেন। প্রতি তহশীলে এক এক জন শাসনকর্তা নিয়োজিত হইলেন। ইহারা সকলেই ভারতবর্ষীয়। ইহাদের নাম কুমার জরসিংহ, রাজা বশোবন্ত সিংহ ( ইনি ব্রাহ্মণ ), কায়স্থজাতীয় চৌধুরী গঙ্গাপ্রসাদ, লাল লালক সিংহ এবং মথুরানিবাসী বৈশ্যজাতীয় এক জন প্রাচীন তহশীলদার। এইরূপে সম্রাট ব্রাহ্মণ, ক্ষত্রিয়, বৈশ্য ও কায়স্থের উপর ইটোয়া বিভাগের শাসনভার সমর্পিত হয়। ইহারা যথারীতি আপনাদের কর্তব্যসাধন করিয়াছিলেন। ঘোরতরবিপ্লবের সময়ে ইহাদের সুশাসনশৃঙ্খলা অব্যাহত ছিল। পাঁচ মাস কাল, ইহারা আপনাদের অধীন জনপদ শাসন করেন। প্রতি সপ্তাহে ইহারা আপনাদের কার্যবিবরণ হিউম সাহেবের গোচর করিতেন। ইহাদের শাসন-কার্যের বিরুদ্ধে কেহই কোন কথা বলে নাই। কেহ ইহাদিগকে ক্ষমতার



অপব্যবহার বা ঞায়পরতার অবমাননা করিতে দেখে নাই। ইঁহারা অপর স্থানে কি ঘটতেছে, তাহারও সন্ধান লইতেন। ইঁহাদের নিকট হইতে স্থানান্তরের ইউরোপীয়গণ কাণপুরের সেনাপতি নীলের সংবাদ অবগত হইলেন। ইঁহাদের যত্নে ইংরেজ সৈনিকদিগের জন্ম সাত শত উষ্ট্র সংগৃহীত হয়। এই সকল বাহন পাওয়াতে তাহারা সহজে লক্ষ্মী নগরের অভিমুখে অগ্রসর হয়। এইরূপ বিপত্তিকালে, এইরূপ উত্তেজিত লোকের মধ্যে কোন ইংরেজ রাজপুরুষ ইঁহাদের অপেক্ষা অধিকতর সুশাসনক্ষমতা ও নির্ভীকতার পরিচয় দিতে পারেন কি না, সন্দেহ। হিউম সাহেব স্পষ্ট নির্দেশ করিয়াছেন যে, কোন ইংরেজ ইঁহাদের ঞায় দক্ষতার সহিত জনপদ শাসন করিতে পারেন নাই। অধিকন্তু ওরিয়া তহশীলের বর্ষীয়ান বৈশ্যের ঞায় কেহ নির্ভীকতা ও বিশ্বস্ততার পরিচয় দিতে সমর্থ হইলেন নাই।

এই বর্ষীয়ান বৈশ্যের অপূর্ব বিশ্বস্ততার কথা এস্থলে সংক্ষেপে বর্ণনীয়। ঝাঁসীর উত্তেজিত সিপাহীগণ যখন ইঁহার তহশীলের অভিমুখে অগ্রসর হয়, তখন ইনি প্রয়োজনীয় কাগজপত্র ও টাকা স্থানান্তরে প্রেরণ করেন। ইঁহার দুই একটা বিশ্বস্ত লোক ব্যতীত কেহই এ বিষয় অবগত ছিল না। কিন্তু ঘটনাক্রমে ~~কোন~~ দুরাচার লোক এ বিষয় অবগত হইয়া, উত্তেজিত সিপাহীদিগকে ~~কোন~~ তহশীলদার সমস্ত টাকাকড়ি স্থানান্তরে লুক্কায়িত রাখিয়াছেন। যদি দুরাচারেরা সিপাহীদিগকে না বলিত, তাহা হইলে সিপাহীরা কিছুই করিত না। যেহেতু তাহারা ভাবিয়াছিল যে, অত্যাচার তহশীলের ঞায় এই তহশীলও বিলুপ্ত হইয়াছে। এখন সিপাহীরা সন্ধান পাইয়া বৃদ্ধ তহশীলদারকে ধরিল এবং তাঁহাকে টাকা বাহির করিয়া দিতে বলিল। কিন্তু রাজভক্ত বর্ষীয়ান পুরুষ কিছুতেই গোপনীয় বিষয় প্রকাশ করিলেন না। উত্তেজিত সিপাহীগণ তাঁহাকে ফাঁসি দিবে বলিয়া ভয় দেখাইল। কিন্তু ইঁহাতেও তিনি বিচলিত হইলেন না। অবশেষে তাহারা একটা পিতলের কামানের সহিত তাঁহাকে বাঁধিল। বৃদ্ধ তহশীলদার এই কামানের সহিত আবদ্ধ রহিলেন। তথাপি তিনি রক্ষণীয় অর্থ ও কাগজপত্র কোথায় আছে, বলিলেন না। সিপাহীরা বৃদ্ধকে কামানের সহিত টানিয়া ইটোয়ায় আনিল। বৃদ্ধ এই অবস্থায় অচেতন হইয়া পড়িয়াছিলেন। ইটোয়াবাসিগণ তাঁহার বার্তব্য,

তাঁহার সৌম্যাকৃতি, তাঁহার দুর্দশা দেখিয়া, তাঁহাকে ছাড়িয়া দিতে বলিল । লোকে বর্ষীয়ান্ রাজকর্মচারীকে সিপাহীদিগের হস্ত হইতে মুক্ত করিয়া মথুরায় তাঁহার নিজ বাড়ীতে লইয়া গেল । এইরূপে কঠোর পীড়নে তথায় তিনি দেহত্যাগ করিলেন । ইংরেজ যে বৈশ্ব মহাজনদিগকে কাপুরুষ বলিয়া অবজ্ঞার ভাবে দেখেন, এই বর্ষীয়ান্ বৈশ্ব তাহাদেরই মধ্যে এক জন । বিশ্বস্ততা ও রাজভক্তির সম্মান রক্ষা করিতে গিয়া, কিরূপ নিষ্ঠীকচিত্তে দেহত্যাগ করিতে হয়, তাহা তিনি জানিতেন । পৃথিবীর কোন দৃঢ়ব্রত পুরুষ ইহা অপেক্ষা অধিকতর রাজভক্তি ও বিশ্বস্তভাবের পরিচয় দিয়াছেন কি না, ইতিহাস তাহা আজ পর্য্যন্ত দেখাইতে পারে নাই ।

পূর্বে রাজা লক্ষ্মণ সিংহের পরিচয় প্রদত্ত হইয়াছে । সেপ্টেম্বর ও অক্টোবর মাসে উত্তেজিত সিপাহীগণ আগরা আক্রমণের উত্তোগ করে । ইহারা কিরূপ বলসম্পন্ন ছিল এবং অস্ত্রাদি কি পরিমাণে সঙ্গে আনিয়াছিল, ইংরেজ কর্তৃপক্ষ তাহা জানিবার জন্ত সাতিশয় উৎসুক হইলেন । তাঁহারা এই উদ্দেশ্যে চর প্রেরণ করেন । কিন্তু চরগণ প্রয়োজনীয় সংবাদলাভে কৃতকার্য্য হয় নাই । তাহাদের কেহ কেহ ধৃত ও ফাঁসিকাষ্ঠে বিলম্বিত হয়, কেহ কেহ অকৃতার্থ হইয়া ফিরিয়া আইসে । অভীষ্ট সিদ্ধ হইল না দেখিয়া, কর্তৃপক্ষ দুশ্চিন্তাগ্রস্ত হইলেন । এই সময়ে রাজা লক্ষ্মণ সিংহ সংবাদ আনিবার জন্ত প্রস্তুত হইলেন । এই কার্য্য যেরূপ বিপত্তিজনক, সেইরূপ অসংসাহসিক ছিল । রাজা লক্ষ্মণ সিংহ আগরার অধিবাসী । আগরার লোকে তাঁহাকে চিনিত । আগরার প্রায় ২,০০০ হাজার ছবৃত্ত লোক উত্তেজিত সিপাহীদিগের শিবিরে অবস্থিতি করিতেছিল । যদি কেহ চিনিতে পারে, তাহা হইলে তাঁহার মৃত্যু অনিবার্য্য । কিন্তু লক্ষ্মণ সিংহ কিছুতেই পশ্চাদ্দপদ হইলেন না । তিনি সন্ন্যাসীর বেশে সিপাহীদিগের শিবিরে উপস্থিত হইলেন ; দুই তিন দিন সেখানে থাকিয়া, সমুদয় অবস্থা পর্য্যবেক্ষণপূর্ব্বক আগরার কর্তৃপক্ষের নিকটে ফিরিয়া আসিলেন । কর্তৃপক্ষ এই অসংসাহসিক ক্ষত্রিয়ের নিকটে সমুদয় বিবরণ অবগত হইলেন ।

এই স্থলে অসামান্য বীরত্ব ও সাহসের আর দুইটী দৃষ্টান্ত দেওয়া যাইতেছে । উপস্থিত ইতিহাসে অনেক স্থলে দেওয়ানিবিভাগের ইংরেজ কর্মচারীর সাহসের বিষয় বর্ণিত হইয়াছে । মাজিষ্ট্রেট, কালেক্টর প্রভৃতি কর্মচারিগণ আরার

উদ্ধারে কিরূপ বীরত্বের পরিচয় দিয়াছিলেন, তাহা ইতিহাসপাঠকের অবিদিত নাই। কিন্তু এইরূপ দৃষ্টান্ত কেবল ইংরেজের মধ্যে আবদ্ধ থাকে নাই। দেওয়ানিবিভাগের ভারতবর্ষীয় কর্মচারীও এ বিষয়ে ইংরেজের পার্শ্বে স্থান পরিগ্রহ করিয়াছেন, এমন কি ইংরেজ অপেক্ষা অধিকতর সাহসের পরিচয় দিয়া স্মরণীয় হইয়া রহিয়াছেন। উজীর আলি নামক এক জন সম্ভ্রান্ত মুসলমান দেয়ার দেওয়ানি আদালতের উকীল ছিলেন। শেবে ইনি ওকালতি পরিত্যাগ পূর্বক গবর্ণমেন্টের কর্ম গ্রহণ করেন। মাজিষ্ট্রেট হিউম সাহেব ইঁহাকে ক্রমে রাজস্ববিভাগের সহযোগী সেরেস্টাদার করিয়া দেন। যখন ইটোয়াতে বিপ্লব ঘটে, তখন ছুরাচার গুজরগণ জেলার সকল স্থানে দৌরাওয়া করিতোঁছিল। উজীর আলি এই দস্যাদমনে নিয়োজিত হইলেন। তিনি যে বিভাগের ভার পাইয়াছিলেন, সেই বিভাগে দস্যাদিগের উপদ্রব নিরাকৃত হইয়াছিল। একটা দুর্গ দস্যাদিগের অধিকৃত ছিল। উজীর আলি উহা অধিকার করিতে গেলে, দস্যাদগণ বাধা দেয়। আক্রমণকালে তাঁহার কতিপয় লোক নিহত হয়। কিন্তু উজীর আলি ইহাতে নিরস্ত হইলেন নাই। দস্যাদিগের অস্ত্রাদি উজীর আলির লোকের অস্ত্রশস্ত্র অপেক্ষা উৎকৃষ্ট ছিল। ইহাতেও উজীর আলি হতোঁচুম হইয়া পড়েন নাই। তিনি সর্বপ্রথম মই দ্বারা দুর্গে আরোহণ করেন। তাঁহার উত্থমে, সাহসে, সর্বোপরি অপরিমিত বীরত্বে গুজরগণ পরাজিত ও দুর্গ অধিকৃত হয়।

হিউম সাহেব যখন আলীগড়ের মাজিষ্ট্রেটের কর্ম করিতেন, তখন রামপুর-নিবাসী এক জন পাঠান তত্রত্য কারাগারের অধ্যক্ষ ছিলেন। পালোয়ান বলিয়া ইনি সবিশেষ প্রতিপত্তিশালী ছিলেন। হিউম সাহেব সর্বদা কারাগারে যাইতেন, কয়েদীদিগের কার্যকলাপ পর্যবেক্ষণ করিতেন এবং সমস্ত বিষয়ের সূক্ষ্মতা দেখিয়া সন্তুষ্ট হইতেন। এইরূপে কারাধ্যক্ষ পাঠানের সহিত তাঁহার ঘনিষ্ঠতা ও বন্ধুতা জন্মে। মইনপুরী ও দিল্লীর পথে সর্বদা ডাক চুরি যাওয়াতে হিউম সাহেব ঐ চৌর্যের অনুসন্ধান নিয়োজিত হইলেন। তিনি এই সময়ে কারাধ্যক্ষ পাঠানকে চৌর্যের অনুসন্ধানার্থে প্রেরিত গুপ্তচরদিগের অধিনায়ক করেন। পাঠানের চেষ্টায় অপহারকগণ ধৃত ও দণ্ডিত হয়। এই কার্যের পুরস্কার স্বরূপ উক্ত কর্মচারী মজঃফরনগর জেলার একটা বিভাগের তহশীলদার হইলেন

যখন সিপাহীবিপ্লব ঘটে, তখন হিউম সাহেব তাঁহার নিকটে লিখিয়া পাঠাইয়া-  
 ছিলেন যে, তিনি যেন এ সময়ে গবর্ণমেন্টের প্রতি বিশ্বস্তভাবে থাকেন ।  
 তাঁহার যত্নে যে, তদীয় পদোন্নতি হইয়াছে, ইহা যেন মনে থাকে । এই সময়ে  
 গম্ভূবাপথ অবরুদ্ধ হইয়াছিল । পত্রাদি যথাস্থানে যথাসময়ে উপস্থিত হইত না ।  
 যাহা হউক, ঘটনাক্রমে পাঠান কর্মচারীর এক খানি পত্র হিউম সাহেবের  
 হস্তগত হয় । তাহাতে লেখা ছিল, “আমি কখনও নিমকহারাম হইব না ।  
 আমার চেষ্ঠায়, যতদূর হইতে পারে, তাহা করিব । ইহার পর ভগবানের  
 উপর নির্ভর ।” সাহসী তহশীলদার এই সময়ে আপনার তহশীল সুরক্ষিত  
 করিয়াছিলেন । তদীয় আত্মীয়স্বজন ও অনুচরগণ এই কার্যে তাঁহার প্রধান  
 সহায় ছিল । উত্তেজিত সিপাহীগণ দুই তিন বার তহশীল আক্রমণ করে,  
 সাহসী পাঠান তহশীলদার তাহাদের আক্রমণ নিরস্ত করেন । ইহার পর  
 বহুসংখ্যক সিপাহী সমাগত হইয়া, এই স্থান অবরোধ করে । অবরোধকারী-  
 দিগের মধ্যে ৩ সংখ্যক অশ্বারোহীদের মুসলমান সৈনিকগণ ছিল । পাঠান  
 তহশীলদার ইহাদের অপরিচিত ছিলেন না । ইহারা তাঁহার মল্লযুদ্ধকৌশলের  
 বিষয় অবগত ছিল । এজন্য মুসলমান সৈনিকগণ তাঁহার জীবনরক্ষা করিতে  
 আগ্রহযুক্ত হয় । তাহারা তহশীলদারের নিকটে যাইয়া কহে, কোম্পানির  
 রাজত্বের অবসান হইয়াছে, এখন দিল্লীর সম্রাটের অধীনতা স্বীকার করা  
 তাঁহার পক্ষে শ্রেয়ঃ । তিনি পূর্বে যেমন কোম্পানির নামে আপনার তহশীল  
 রক্ষা করিতেছিলেন, এখন দিল্লীর সম্রাটের নামে সেইরূপ করুন । তিনি যদি  
 ইচ্ছা করেন, তাহা হইলে তাহাদের চেষ্ঠায় দিল্লীর একটা প্রধান রাজকার্য  
 পাইতে পারেন, অথবা তিনি যদি নির্বিকারিত হইতে তাহাদের হস্তে আপন তহশীলের  
 ভার সমর্পণ করেন, তাহা হইলে তাহারা আত্মীয়স্বজন ও সম্পত্তির সহিত  
 তাঁহাকে নিরাপদে রামপুরে লইয়া যাইতে পারে । কিন্তু সাহসী পাঠান  
 তহশীলদার কিছুতেই বিচলিত হইলেন না । সিপাহীদিগের বাক্‌চাতুরী,  
 সিপাহীদিগের প্রতিশ্রুতি, সিপাহীদিগের ক্রোধ সমস্তই তাঁহার নিকটে ব্যর্থ  
 হইল । তিনি ইংরেজের অধীনতাপরিত্যাগে সন্মত হইলেন না, দিল্লীর মোগল  
 ভূপতির অধীনে উচ্চপদ গ্রহণ করিতে ইচ্ছা করিলেন না, বা স্বকীয় সম্পত্তি  
 লইয়া নিরাপদে স্বদেশে যাইতেও উদ্বৃত্ত হইলেন না । তিনি কর্তব্যপালনের জগ্ন

দৃঢ়প্রতিজ্ঞ হইয়াছিলেন। কিছুতেই সেই প্রতিজ্ঞা স্থলিত হইল না। সাহসী পাঠান যখন সিপাহীদিগের প্রস্তাবে কিছুই সম্মত হইলেন না, তখন সিপাহীগণ তাঁহার রক্ষণীয় স্থান আক্রমণ করিল। ক্রমে বহুসংখ্যক সিপাহী আক্রমণকারীদিগের দলে মিশিল। দৃঢ়ব্রত তহশীলদার আক্রান্ত স্থান রক্ষার সুবন্দোবস্ত করিয়াছিলেন। কিন্তু আক্রমণকারীর সংখ্যাধিক্যে তাঁহার অভীষ্ট সিদ্ধ হইল না। কামানের গোলায় তাঁহার প্রবেশদ্বার উড়িয়া গেল। সাহসী পাঠান অসিহস্তে সেই দ্বারদেশে দণ্ডায়মান হইলেন। তাঁহার পশ্চাতে তদীয় আত্মীয় ও অনুচরগণ অস্ত্রশস্ত্রে সজ্জিত হইল। বহুসংখ্যক আক্রমণকারী তাঁহার জীবন-হরণে অগ্রসর হইয়াছে। তাহাতে সাহসী তহশীলদারের ভ্রক্ষেপ নাই। তহশীলদার অসির আক্ষালন করিতে করিতে সেই বিপক্ষদলের গতিরোধে উদ্বৃত হইলেন। কিন্তু তাঁহার প্রয়াস সফল হইল না। তথাপি তিনি পশ্চাদিকে ফিরিলেন না। সেই মুক্তদ্বারপথে সেইরূপ বীরত্ব ও তেজস্বিতা সহকারে অসিহস্তে করিয়া বীরশ্রেষ্ঠ তহশীলদার আপনার আত্মীয়দিগের সহিত দেহত্যাগ করিলেন। চাপরাসী প্রভৃতি অনুচরগণ তাঁহার দৃষ্টান্তের অনুবর্তী হইল। কেবল কয়েক জন মাত্র এই ভয়ঙ্কর আক্রমণ হইতে আত্মরক্ষা করিতে সমর্থ হইল। সাহসী তহশীলদার এইরূপ আপনার অলোকসামাগ্র্য কর্তব্যপরায়ণতার পরিচয় দিলেন। তিনি আপনার রক্ষণীয় স্থান সুরক্ষিত করিয়াছিলেন। তিনি পুনঃ পুনঃ আক্রান্ত হইলেও, আক্রমণকারীদিগকে কয়েক বার তাড়িত করিয়াছিলেন। শেষে আক্রমণকারীদিগের সংখ্যাধিক্যে তাঁহার শক্তি পর্য্যুদস্ত হইল। তথাপি তিনি সন্মুখসংগ্রামে বিমুখ হইলেন না। কিছুতেই তাঁহার অসামাগ্র্য প্রভুভক্তি ও অপূর্ব বিশ্বস্ততা কলঙ্কিত হইল না। তিনি কৰ্ম্মস্থলে আপনার কর্তব্যপালনের জন্ত প্রকৃত বীরপুরুষের গায় প্রশান্তভাবে আত্মত্যাগ করিলেন। তাঁহার দৃষ্টান্তে তদীয় অনুচরগণ এরূপ উত্তেজিত হইয়া উঠিল যে, তাহারা সেই স্থানে তাঁহার গায় প্রশান্তভাবে আত্মোৎসর্গ করিল। বোধ হয়, কোন সাহসী কার্যকুশল ইংরেজ ইহা অপেক্ষা মহত্তর কৰ্ম্ম সম্পাদন করিতে পারেন নাই। এবং এই প্রভুভক্তি ও দৃঢ়ব্রত তহশীলদারের গায় আত্মোৎসর্গ করিয়া কর্তব্যপরায়ণতার পরাকাষ্ঠা দেখাইতে পারেন নাই।

এই অত্যাঙ্গুল স্মৃতিস্তম্ভের পাশ্বে একটি অপকীর্তির ছায়া আছে। যখন

পূর্বে তহশীলের বিধ্বংস এবং তহশীলরক্ষাকারীদিগের নিধনের সংবাদ মজঃফরনগরে উপস্থিত হয়, তখন কালেক্টর সাহেব ভয়ে একরূপ অভিভূত হইলেন যে, তিনি অবিলম্বে গাড়িতে চড়িয়া মীরাটের অভিমুখে পলায়ন করেন। তাঁহার ভৃত্যেরা এই সংবাদ সেরেস্তাদার ও তহশীলদারকে জানায়। সেরেস্তাদার ভাবিলেন যে, কালেক্টর সাহেবের পলায়নের কথা শুনিলেই নগরের ছুর্ভ্র লোকের প্রশয় বৃদ্ধি পাইবে। গৃহাদি বিলুপ্তিত বা ভস্মীভূত হইবে। সমুদয় স্থানে অরাজকতার নিদর্শন দেখা যাইবে। সুতরাং তাঁহারা তাড়াতাড়ি অশ্বারোহণে কালেক্টর সাহেবের পশ্চাদ্ধাবিত হইলেন এবং তাঁহাকে অনেক বুঝাইয়া নগরে লইয়া আইসেন। কালেক্টর সাহেব আবার পলাইতে না পারেন, তাহার বন্দোবস্ত করিয়া, এই রাজভক্ত সাহসী কর্মচারিদের নগরের শান্তিরক্ষার জন্ত কালেক্টর সাহেবের নামে ঘোষণাপত্র প্রচার করেন, এবং অবিলম্বে সমুদয় ঘটনা বিবৃত করিয়া এক জন উপযুক্ত কর্মচারীর জন্ত সাহারাণপুরের কালেক্টরের নিকটে দূত পাঠাইয়া দেন। এই কর্মচারীর উপস্থিত না হওয়া পর্য্যন্ত তাঁহারা যথোচিত দৃঢ়তা ও দক্ষতার সহিত নগরের শান্তিরক্ষা করেন। অত্র ইংরেজ কর্মচারী আসিয়া জেলার ভার লইলে, পূর্বে ভীক কালেক্টর সাহেবকে মীরাটে পাঠাইয়া দেওয়া হয়। কালেক্টর সাহেব নিরাপদে নির্দিষ্ট স্থানে উপস্থিত হইয়া স্বদেশে যাত্রা করেন। ভারতবাসিগণ আর তাঁহার কোনরূপ সংবাদ লইতে উৎসুক হয় নাই। এক সময়ে ভারতবাসিগণ ইংরেজের জন্ত অকাতরভাবে আত্মোৎসর্গ করিয়াছিলেন, আর ইংরেজ তাঁহাদেরই সমক্ষে আপনাদের প্রাধান্য ও ক্ষমতার বিষয় বিস্তৃত হইয়া, কাপুরুষতার একশেষ দেখাইয়াছিলেন।

এই সকল দৃষ্টান্ত দেখাইয়া সদাশয় হিউম সাহেব স্পষ্টাক্ষরে নির্দেশ করিয়াছেন যে, মানবোচিত গুণে ভারতবাসী ও বৃটনদিগের মধ্যে কোনরূপ পার্থক্য নাই। কর্মক্ষেত্রে উভয় জাতিই সমান দক্ষতা ও সমান যোগ্যতার পরিচয় দিয়া থাকে। উভয় জাতিই গুণবাহুল্যে গৌরবের অধিকারী, এবং সুশিক্ষার অভাবে পাপপ্রবৃত্তির বশীভূত হইয়া থাকে। যদি অপক্ষপাতে বিচার করা যায়, তাহা হইলে উভয় জাতিতেই গুণ ও দোষের অস্তিত্ব দেখা গিয়া থাকে। যদি সুশিক্ষিত ও সদৃগুণসম্পন্ন ভারতবাসীর সহিত অশিক্ষিত,

সামান্য ইংরেজের তুলনা করা যায়, তাহা হইলে মহৎ ব্যক্তিগণের মধ্যে শেষোক্তটিকে প্রায় বানর বলিয়া বোধ হইবে। আর যদি কৰ্মক্ষেত্রে দীর্ঘকালব্যাপী পরিশ্রমে দূরদর্শী এবং প্রগাঢ় দায়িত্বজ্ঞানে প্রশাস্তচিত্ত ভারতবাসী ইংরেজের সহিত অদূরদর্শী ভারতবর্ষীয়দিগের তুলনা করা যায়, তাহা হইলে প্রথমোক্তটী সাধারণ মর্ত্যগণের পার্শ্বে দেবতার স্থায় উদ্ভাসিত হইবেন। কিন্তু যদি প্রত্যেক জাতির অত্যাৎকৃষ্ট গুণবিশিষ্ট ব্যক্তিদিগের পরস্পর তুলনা করা যায়, তাহা হইলে উভয়েই অত্যাৎকৃষ্ট বলিয়া প্রতিপন্ন হইবে। \* \* \* ভারত-প্রবাসী ইংরেজেরা সৰ্বদা ভারতবর্ষীয়দিগের দোষভাগই দেখিয়া থাকেন। পক্ষান্তরে সজাতির গুণভাগই তাঁহাদের চক্ষুতে পড়িয়া থাকে। এই জন্ত তাঁহাদের এইরূপ ভ্রান্তিপূর্ণ ধারণা হইয়াছে যে, ভারতবাসী নিরতিশয় নিন্দনীয় চরিত্রের এবং ইংরেজ সতিশয় উৎকৃষ্ট প্রকৃতির আদর্শ। \*

এইরূপ ভ্রান্তিময় ধারণা প্রযুক্ত ইংরেজ উপস্থিত বিপ্লবকালে সমগ্র ভারতবাসীকে নরস্বাপদ ভাবিয়াছিলেন। এই নরস্বাপদদিগের শোণিতপাতে তাঁহাদের আগ্রহ পরিস্ফুট হইয়াছিল। তাঁহারা যদি মহামতি হিউম সাহেবের স্থায় ভারতবাসীদিগের অন্তস্তলদর্শী হইতেন, তাহা হইলে তাঁহাদের স্পষ্ট উদ্বোধ হইত যে, ভারতের বিপত্তিময় কৰ্মক্ষেত্রে তাঁহাদের পার্শ্বে নরদেবগণ রহিয়াছেন। এই নরদেবদিগের গুণে তাঁহাদের জীবন রক্ষিত, প্রাধান্য পুনঃপ্রতিষ্ঠিত এবং সৌভাগ্য পুনরুদিত হইয়াছে।

২৪ মে রাত্রিকালে গোবালিয়র হইতে সাহায্যকারী সৈন্য বরপুরায় উপস্থিত হইল। তত্রত্য ইউরোপীয়গণ এই সৈনিকদলের সমাগমে নিরাপদ হইলেন। পর দিন প্রাতঃকালে এই সৈনিকগণ ইটোয়ায় যাইয়া, ঐ স্থান পুনরধিকার করিল। কিন্তু এই জনপদে বিনা রক্তপাতে ইংরেজের আধিপত্য প্রতিষ্ঠিত হয় নাই। দেওয়ানি আদালতের বিচারে যে সকল প্রাচীন জমীদার স্বত্বভ্রষ্ট হইয়াছিলেন, তাঁহারা এই সময়ে আপনাদের পূর্বতন অধিকাররক্ষায় অগ্রসর হইলেন। একটী পল্লীতে এইরূপ এক জন জমীদার গবর্ণমেণ্টের নির্দিষ্ট

\* A. O. Hume, A good word for the Indian, quoted in the Statesman, June 28, 1891.

অধিকারীকে সম্পত্তিচ্যুত করেন । ইনি সাহসসহকারে গবর্ণমেন্টের বিরুদ্ধাচরণে উত্তত হইলেন । কিন্তু ইঁহার ক্ষুদ্র দুর্গ অধিকৃত ও ভস্মীভূত হয় এবং ইঁহার দল বিশ্বস্ত হইয়া যায় । এইরূপ নরহত্যার পর ইটোয়াবিভাগে ইংরেজের ক্ষমতা পুনঃপ্রতিষ্ঠিত হয় ।

● পূর্বে উক্ত হইয়াছে যে, আলীগড়ের সিপাহীদলের এক অংশ মইনপুরীতে অবস্থিত করিতেছিল । মইনপুরী আগরার ৭১ মাইল পূর্বে অবস্থিত । ২২শে মে সন্ধ্যাকালে আলীগড়ের সংবাদ মইনপুরীতে উপস্থিত হয় । সংবাদপ্রাপ্তি-মাত্র মাজিষ্ট্রেট সাহেব অবিলম্বে কমিশনর সাহেবের সহিত উপস্থিত বিষয়ের পরামর্শ করেন । কুলমহিলা ও বালকবালিকাদিগকে আগরায় পাঠাইবার সিদ্ধান্ত হয় । এদিকে সিপাহীদিগকে ভাওগাঁ নামক স্থানে লইয়া যাইবার বন্দোবস্ত হইতে থাকে । ইউরোপীয় মহিলা ও বালকবালিকাগণ সহকারী মাজিষ্ট্রেট সাহেবের তত্ত্বাবধানে আগরায় যাত্রা করে । সহকারী মাজিষ্ট্রেট কিয়দূর গিয়া, এক জন বিশ্বস্ত মুসলমানের উপর ইহাদের রক্ষার ভার সমর্পণ করেন । মুসলমান রক্ষক ইহাদিগকে নিরাপদে আগরায় লইয়া যায় । এদিকে সহকারী মাজিষ্ট্রেট মইনপুরীতে প্রত্যাবর্তন করেন ।

লেফ্টেনেন্ট ক্রফোর্ড এবং ডি কান্টজ মইনপুরীস্থিত সিপাহীদিগের অধিনায়ক ছিলেন । ইঁহারা সিপাহীদিগকে পূর্বনির্দিষ্ট স্থানে যাত্রা করিতে সর্বেশেষ অনুরোধ করাতে সিপাহীগণ ঐ স্থানের অভিমুখে অগ্রসর হয়, কিন্তু তাহারা আপনাদের কাওয়াজের ক্ষেত্রের সীমায় উপস্থিত হইয়াই যাইতে অসম্মতি প্রকাশ করে, এবং সর্বেশেষ উত্তেজনার সহিত অধিনায়কদিগকে পলাইতে কহে । সিপাহীদিগের এইরূপ আকস্মিক উত্তেজনায় গোলযোগ ঘটে । এই সময়ে ডি কান্টজ অশ্ব হইতে অবতরণ করেন । লেফ্টেনেন্ট ক্রফোর্ড তাঁহাকে দেখিতে না পাইয়া ভাবিলেন যে, তিনি নিহত হইয়াছেন । ক্রফোর্ড আর কালবিলম্ব করিলেন না । তিনি তাড়াতাড়ি মাজিষ্ট্রেটকে সংবাদ দিবার জন্ত যাত্রা করিলেন । ক্রফোর্ড উপস্থিত হইয়া দেখিলেন যে, মাজিষ্ট্রেট কমিশনর প্রভৃতি একত্র রহিয়াছেন । ইংরেজ সেনানায়ক তাঁহাদিগকে সিপাহীদিগের উত্তেজনার বিষয় জানাইলেন এবং আপনার সহযোগীর পরিণামসম্বন্ধে যাহা ভাবিয়াছিলেন, তাহা বিবৃত করিয়া স্বয়ং অস্বারোহণে তাড়াতাড়ি আগরায়



যাইতে চাহিলেন। কমিশনর সাহেবও মইনপুরীতে থাকিতে চাহিলেন না। তিনি এইরূপ বিপদের সময় এস্থানে থাকা অসম্ভব মনে করিয়া, এক জন পাদরীর সহিত শকটারোহণে আগরায় যাত্রা করিলেন। কিন্তু মাজিষ্ট্রেট সাহেব তাঁহার অনুগমন করিলেন না। তিনি উপস্থিত সঙ্কটকালে আপনার গুরুতর কর্তব্যসম্পাদনের জন্ত মইনপুরীতে রহিলেন। তাঁহার এইরূপ সাহসী উপস্থিত সময়ে অকার্যকর হইল না। তদীয় কনিষ্ঠ ভ্রাতা তাঁহার সহকারী ছিলেন। এখন কনিষ্ঠ জ্যেষ্ঠের সাহায্যার্থে মইনপুরীতে থাকিলেন। আরও তিন জন ইউরোপীয় এই ভ্রাতৃদ্বয়ের পার্শ্বে দণ্ডায়মান রহিলেন। এতদ্ব্যতীত এই বিপদসঙ্কুল কৰ্মক্ষেত্রে আর এক জন সাহসী পুরুষের আবির্ভাব হইল। ইনি স্বদেশের শান্তি ও শৃঙ্খলাস্থাপনের জন্ত ইংরেজের সহকারী হইলেন।

মইনপুরীরাজের আত্মীয় রাও ভবানী সিংহ কতিপয় অশ্বারোহী ও পদাতি সৈনিক লইয়া উপস্থিত হওয়াতে মাজিষ্ট্রেট সাহেবের বল বৃদ্ধি হইল। এদিকে অগ্নতর সেনানায়কের কি দশা ঘটিল, মাজিষ্ট্রেট তাঁহার কোন সংবাদ না পাইয়া চিন্তিত হইলেন। উক্ত সেনানায়ক নিরতিশয় সঙ্কটাপন্ন অবস্থায় পতিত হইয়াছিলেন। তিনি অধিষ্ঠিত অশ্ব হইতে নামিলে উত্তেজিত সিপাহীগণ তাঁহাকে পরিবেষ্টন করে। ইহার পর যখন তাহারা নগরাভিমুখে ধাবিত হয়, তখন সেনানায়ক কিছুতেই তাহাদিগকে শান্তভাবে রাখিতে পারেন নাই। সিপাহীগণ উচ্ছৃঙ্খলভাবে নগরে উপস্থিত হয়, অস্ত্রাগার লুণ্ঠন করে, এবং কাহারও নিষেধ না মানিয়া চারি দিকে গুলিবৃষ্টি করিতে থাকে। সেনানায়ক তাহাদিগকে বারণ করেন, তাহাদিগকে তিরস্কার করিয়া, যথোচিত সাহসের পরিচয় দেন, শেষে তাহাদের যথোচিত অনুন্নয় করিতে থাকেন। কিন্তু কিছুতেই তাহাদের চৈতন্য হয় নাই। তিনি তাহাদিগকে কহেন যে, তাহারা তাঁহার প্রাণনাশ করিতে পারে। কিন্তু তাহাদিগকে কখন পরাজিত করিতে পারিবেন না। কিন্তু সিপাহীগণ সেনানায়কের প্রাণনাশ করিল না। তাহারা আপনাদের অধিনায়কের অনুন্নে কৰ্ণপাত না করিয়া, সাহস ও দৃঢ়তার পরিচয়সূচক নিষেধবাক্যে বশীভূত না হইয়া, কারাগারের নিকটে উপস্থিত হইল। সেনানায়ক তাহাদের সঙ্গে ছিলেন। তিনি তিন ঘণ্টা কাল, সিপাহীদিগের মধ্যে থাকিয়া, তাহাদিগকে শান্তভাবে রাখিবার চেষ্টা করিতেছিলেন, তিন ঘণ্টা কাল

এইরূপ বিপদে দৃকপাত না করিয়া, আপনার অবিচলিত সাহস ও দৃঢ়তার পরিচয় দিতেছিলেন। মাজিষ্ট্রেট সাহেব তাঁহার বিপদের সংবাদ পাইয়া, স্বয়ং ঘটনাস্থলে উপস্থিত হইতে চাহিয়াছিলেন। কিন্তু তিনি উপস্থিত হইলে, সিপাহীগণ তাঁহার প্রাণনাশ করিতে পারে, এইরূপ আশঙ্কা করিয়া উক্ত সেনানায়ক তাঁহাকে আসিতে দেন নাই। তিনি তিন ঘণ্টা কাল, সিপাহীদিগের মধ্যে থাকিয়া, কেবল আপনার জীবনই সঙ্কটাপন্ন করিয়া তুলিয়াছিলেন। উত্তেজিত সিপাহীগণ তাঁহাকে লইয়া কোম্পানির অর্থ লুণ্ঠনের মানসে ধনাগারে উপস্থিত হইল। ধনাগারের রক্ষকগণ তাহাদিগকে গুলি করিতে উদ্বৃত্ত হইয়াছিল, কিন্তু সেনানায়ক তাহাদিগকে এ বিষয়ে নিষেধ করিলেন। সেনানায়কের এইরূপ ধীরতা উপস্থিত সময়ে সবিশেষ কার্যকর হইল। ধন-রক্ষকগণ সিপাহীদিগকে দেখিয়া অধিকতর উত্তেজিত হইয়া উঠিলে, হয় ত ঐ সিপাহীদিগের অস্ত্রাঘাতে সেনানায়কের প্রাণবিয়োগ হইত। সেনানায়কের আদেশে ধনাগারের রক্ষকগণ যখন সিপাহীদিগের প্রতি অস্ত্রসঞ্চালনে নিরস্ত থাকিল, তখন সিপাহীরা অস্ত্রচালনায় উদ্বৃত্ত হইল না। কিন্তু তাহারা এইরূপ উদ্বৃত্ত প্রকাশ না করিলেও, গবর্নমেন্টের অর্থরাশি আত্মসাৎ করিবার জন্ত সাতিশয় আগ্রহ প্রকাশ করিতে লাগিল। এই সঙ্কটকালে উক্ত সেনানায়ক পূর্বের গায় অটলতা ও নির্ভীকতা দেখাইতে লাগিলেন, পূর্বের গায় সিপাহীদিগকে এইরূপ অগায় কার্যে ক্ষান্ত থাকিতে অনুরোধ করিতে লাগিলেন, এবং পূর্বের গায় ধীরতা ও কার্যতৎপরতার সহিত গবর্নমেন্টের অর্থরক্ষা করিতে লাগিলেন। কিন্তু তাঁহার পুনঃ পুনঃ নিষেধবাক্যে সিপাহীরা শান্ত হইল না দেখিয়া, তিনি প্রায় হতোৎসাহ হইয়া পড়িলেন। এই সময়ে রাও ভবানী সিংহ ঘটনাস্থলে উপস্থিত হইলেন। তিনি সিপাহীদিগকে শান্তভাবে রাখিবার জন্ত সবিশেষ চেষ্টা করিতে লাগিলেন। তাঁহার চেষ্টা ফলবতী হইল। সিপাহীগণ তাঁহার সৌম্য আকৃতি, প্রশান্ত প্রকৃতি ও বাক্‌চাতুরীতে মুগ্ধ হইল। তাহারা কহিল যে, রাও ভবানী সিংহ তাহাদের সঙ্গে থাকিলে, তাহারা ফিল্মিয়া যাইতে সন্মত আছে। রাও ভবানী সিংহ সিপাহীদিগের কথায় সন্মত হইলেন। সিপাহীগণ তাঁহার সঙ্গে স্থানান্তরে চলিয়া গেল। স্মরণ্য ধনাগারের কোনরূপ ক্ষতি হইল না। সিপাহীগণ মইনপুরী হইতে প্রস্থান করিল। ধনাগার পূর্ববৎ

অবস্থায় রহিল। তরুণবয়স্ক সেনানায়ক পূর্ববৎ অক্ষতশরীরে থাকিলেন। রাও ভবানী সিংহের সাহসে ও কৰ্মদক্ষতায় মইনপুরীতে শান্তি স্থাপিত হইল। পূর্কোক্ত তরুণবয়স্ক সেনানায়ক আপনার জীবন, সঙ্কটাপন্ন করিয়াও, সিপাহীদিগের উত্তেজনার নিবারণে চেষ্টা করিয়াছিলেন। এজন্য গবর্নর-জেনেরল তাঁহার নিকটে পত্র লিখিয়া তদীয় সাহস ও অধ্যবসায়ের যথোচিত প্রশংসা করিলেন।

পূর্কোক্ত ঘটনাবলীর সংবাদ আগরায় পহঁছিলে, তত্রত্য খৃষ্টধর্মাবলম্বীগণ সান্তিশয় শঙ্কিত হইয়া উঠিলেন। \* যে সকল গৃহ তাঁহাদের নিকটে আত্মরক্ষার উপযুক্ত বলিয়া বোধ হইল, তাঁহারা ব্যাকুলভাবে সেই সকল গৃহের অভিমুখে ধাবিত হইতে লাগিলেন। এই সময়ে এক জন ইংরেজ তদীয় ভ্রাতার নিকটে যে পত্র লিখেন, তাহাতে আগরাবাসী খৃষ্টধর্মাবলম্বীদিগের ব্যাকুলতার এই ভাবে বর্ণনা ছিল—“সম্রাসের মাত্রা একরূপ বৃদ্ধি পাইয়াছে যে, একরূপ কখন আমার দৃষ্টিগোচর হয় নাই। ঘরের আসবাব, বিছানা, তৈজসপত্র, মুরগীপূর্ণ বাজরা বোঝাই গাড়ি, একা, বগিতে চড়িয়া মহিলাগণ ও বালকবালিকারা নগরের সমুদয় ভাগ হইতে দুর্গের অভিমুখে যাইতেছিল। ইউরোপীয়গণ আলীগড় হইতে পলায়ন করিয়াছিলেন। সেনাপতি আউট্রামের সহধর্মিণী কতক পথ অশ্বারোহণে, এবং কতক পথ পদব্রজে অতিবাহন করিয়া এখানে উপস্থিত হইয়াছেন। \* \* \* দুই এক জন সিবিলিয়ান নিরতিশয় লজ্জাজনক কার্য করিয়াছেন। ইহাদের মধ্যে এক জন মলিনবদনে আপনার কার্যালয়ে উপস্থিত হইয়া, সমুদয় কেরণীকে বলিয়াছেন যে, যে উপায় তাহাদের নিকটে সমীচীন বোধ হয়, তাহারা সেই উপায়েই যেন আপনাদের জীবনরক্ষা করে।”\*

অন্য এক জন ইংরেজও এইরূপ সর্বব্যাপী সম্রাসের বর্ণনা করিতে বিমুখ হইয়া নাই। ইনি এইরূপে আগরার তদানীন্তন অবস্থার বর্ণনা করিয়াছেন—“প্রত্যেক ইংরেজই তরবারি বা পিস্তল হস্তে করিয়াছিলেন; পথ গাড়িতে সমাবৃত হইয়াছিল। লোকে কান্দাহারীবাগে তাড়াতাড়ি যাইতেছিল। সহরের

\* *Kaye, Sepoy War. Vol. III, p. 227-228.*

ইতর শ্রেণী লোকে বিদ্রোহীরা আলীগড় হইতে নদী পার হইয়া আসিতেছে, এই কথা উচ্চৈঃস্বরে বলিতে বলিতে প্রাণরক্ষার জন্ত দৌড়িতেছিল। বদমায়েসেরা গোঁফে তা দিতে দিতে আপনাদের গর্হিতকার্যের দিকে দৃষ্টিপাত করিতেছিল। মিশনারীদিগের কলেজের বহির্ভাগে সর্বব্যাপী সন্ত্রাসজনিত গোলযোগ হইতেছিল। অন্তর্ভাগে মিশনারীগণ প্রশান্তভাবে বসিয়া এতদেশীয় শত শত ছাত্রদিগকে শিক্ষা দিতেছিলেন \* \* \* যে সকল এতদেশীয় কর্মচারী অধিকতর বেতনভোগী, গবর্নমেন্টের অধিকতর বিশ্বাসের পাত্র, তাঁহারা এ সময়ে আমাদিগকে পরিত্যাগ করিয়া আমাদের শত্রুদলে মিশিয়াছিল, কিন্তু গবর্নমেন্ট স্কুলের অধিকন্তু মিশনারী বিদ্যালয়ের ছাত্রগণ আপনাদের শ্রেণীতে ধীরভাবে বসিয়া উপদেশ শুনিতেন। যখন অপরে উপস্থিত বিপ্লবে নানা-রূপে সন্দিক্ত হইতেছিল, এবং পলায়ন করিতেছিল, তখন ইহারা তাহাদের শিক্ষকদিগের প্রতি বিশ্বস্ত ছিল, এবং প্রকাশ্যভাবে খৃষ্টানদিগের পক্ষসমর্থন করিতেছিল।”\*

এইরূপ সন্ত্রাস, এইরূপ গোলযোগ, এইরূপ আশঙ্কার সময়ে উত্তরপশ্চিম-প্রদেশের রাজধানী সুরক্ষিত করা, নিরতিশয় আবশ্যক হইয়া উঠিয়াছিল। লেফটেনেন্ট-গবর্নর এই আবশ্যক বিষয়ে অমনোযোগী হইলেন নাই। পূর্বে উক্ত হইয়াছে যে, নগরবাসীদিগের আশঙ্কানিবারণ এবং নগরের চারি দিক পর্য্যবেক্ষণের জন্ত যথোপযুক্ত লোক নিয়োজিত হইয়াছিল। এখন অত্যাচার বিষয়েরও বন্দোবস্ত হইতে লাগিল। আগরার দুর্গরক্ষার জন্ত ইউরোপীয়গণ নিয়োজিত হইয়াছিল। ছয় মাস কাল চলিতে পারে, এরূপ খাণ্ডব্যাধি উহাতে সংগ্রহ করিয়া রাখিবার বন্দোবস্ত হইতেছিল। কর্তৃপক্ষের আশঙ্কা হইয়াছিল যে, যদি সিপাহীরা যুদ্ধের উদ্যোগ করে, তাহা হইলে, সহরের ও পার্শ্ববর্তী স্থানের ইতর লোকে তাহাদের সহযোগী হইতে পারে। অপরাপর স্থানের উত্তেজিত লোকে যাহা করিয়াছে, এ স্থানেও সেই সকল কার্য— ধনাগারবিলুপ্তন, কয়েদীদিগের বিমুক্তিসাধন, ইউরোপীয়দিগের সুস্পৃহিত হরণ প্রভৃতি—অমুষ্ঠিত হইতে পারে। ইউরোপীয়দিগের বাসগৃহ প্রভৃতি পরম্পর

\* Raikes, Notes on the revolt in the North-Western provinces of India. p. 14-15.

বিচ্ছিন্নভাবে ছিল। এই বিচ্ছিন্ন গৃহগুলি সহজে রক্ষা করা যাইতে পারিত না। এদিকে মিশনারীদিগের স্কুলে ও খৃষ্টানদিগের আশ্রমে, বিবাহিত সিবিলিয়ানদিগের বাসগৃহে কুলমহিলাগণ ও বালকবালিকারা অবস্থিতি করিতেছিল। ইহাদিগের রক্ষার উপায় করা, কর্তৃপক্ষের প্রধান চিন্তনীয় বিষয় ছিল। লেফটেনেন্ট-গবর্নর বহিরাক্রমণের নিবারণ জন্ত যথোচিত বন্দোবস্ত করিতে উদ্যত হইলেন। এক জন কর্মদক্ষ কর্মচারীর উপর এ বিষয়ের ভার সমর্পিত হইল।

নিয়োজিত কর্মচারী অবিলম্বে নির্দিষ্ট কার্যসম্পাদনের এইরূপ প্রণালী নির্ধারণ করিলেন। নগরের অন্তর্ভাগে, আশ্রমের স্থান নিরূপণ এবং বহির্ভাগে ঘাঁটা স্থাপন করিতে হইবে, এতদ্বারা স্থানান্তর হইতে আগত সিপাহীদিগের আক্রমণের সংবাদ পূর্বে জানা যাইবে। সংবাদপ্রাপ্তি মাত্র যুদ্ধকার্যে অনভ্যস্ত লোকে আশ্রমের স্থলে সহজে উপস্থিত হইতে পারিবে। লেফটেনেন্ট-গবর্নরের বাসগৃহ, ডাকঘর, আগরা ব্যাঙ্ক, মেডিকেল কলেজ, কান্দাহারীবাগ (এই ইষ্টকনির্মিত বৃহৎ বাটা, ভারতপুরের রাজার সম্পত্তি। উপস্থিত সময়ে এই বাটাতে এক জন ইংরেজ সিবিল কর্মচারী বাস করিতেন।) প্রভৃতি বৃহৎ গৃহগুলি আশ্রয়স্থান রূপে নির্দিষ্ট হইবে। এক দিকে তাজ, অপর দিকে গবর্নমেন্টের কাছারি, এই সীমার মধ্যে এই সকল গৃহ রহিয়াছে। এজন্ত উক্ত গৃহ রক্ষা করার সুবন্দোবস্ত করিতে হইবে। রাজকর্মচারী এইরূপে আশ্রমের উপায় নির্ধারণ করিলেন। কিন্তু তাঁহার অবলম্বিত প্রণালী সর্বাংশে পরিগৃহীত হইল না। বিপদের সময়ে সকলেই আপন আপন ইচ্ছায় কর্তৃপক্ষের নিকটে আপনাদিগকে রক্ষা করিবার উপায় নির্দেশ করিতে আগ্রহযুক্ত হইয়া থাকে। সুতরাং মন্ত্রণাকারীদিগের সংখ্যাধিক্যে উদ্ভাবিত উপায়ও নানাবিধ হয়। উপস্থিত সময়ে আগরাতে ইউরোপীয়দিগের আশ্রমের নানা উপায় উদ্ভাবিত হইতেছিল। এইরূপ নানা প্রণালীর সংঘর্ষে নিয়োজিত কর্মচারীর পূর্বনির্দিষ্ট প্রণালী অংশতঃ পরিগৃহীত এবং অংশতঃ পরিত্যক্ত হইল। এদিকে আগরার মাজিষ্ট্রেট সাহেব পুলিশের প্রহরীদিগকে সৈনিকশ্রেণীতে নিবেশিত করিলেন। ইহাদের একাংশ অস্বারোহী এবং অপরংশ পদাতি হইল। এইরূপে পুলিশের লোকেও প্রয়োজনানুরূপ অস্ত্রশস্ত্রে সজ্জিত হইয়া ইউরোপীয়দিগের রক্ষায় ব্যাপৃত রহিল।

যখন আগরার ইউরোপীয়গণ শঙ্কিত হইয়া, আত্মরক্ষার উপায়নির্ধারণ করিতেছিলেন, তখন লেফটেনেন্ট-গবর্নর আপনাদিগকে অধিকতর নিরাপদ করিবার মানসে আর এক উপায়ের অবলম্বনে কৃতনিশ্চয় হইলেন । এই সময়ে সিপাহীদলের এক জন প্রাচীন ও দূরদর্শী অধিনায়ক তাঁহার নিকটে লিখিলেন যে, তিনি ৩৬ বৎসরকাল গবর্নমেন্টের কার্য্য করিয়াছেন । এই দীর্ঘকাল সিপাহীদিগের সংস্রবে থাকাতে তাহাদের প্রকৃতি, তাহাদের আচার-ব্যবহার প্রভৃতি তাঁহার বিদিত হইয়াছে । তাঁহার দৃঢ়বিশ্বাস যে, সিপাহীরা কেবল আশঙ্কাপ্রযুক্ত উপস্থিত সময়ে এইরূপ উত্তেজনার পরিচয় দিতেছে । যদি আপনি এই ভাবে ঘোষণাপ্রচার করেন যে, সিপাহীদিগের অতীত অপরাধ মার্জনা করা যাইবে, এখন যাহারা গবর্নমেন্টের প্রতি বিশ্বস্তভাব দেখাইয়াছে, গবর্নমেন্ট তাহাদের সেই বিশ্বস্ততার বিষয় কখনও ভুলিবেন না, একটী বিচারকসমিতি দ্বারা সিপাহীদিগের অভাব ও অভিযোগের কারণ নির্ণয় করা যাইবে, ইংরেজ ও ভারতবর্ষীয়, এই উভয় শ্রেণীর আফিসারগণ উক্ত সমিতিতে থাকিবেন, এবং ভবিষ্যতে তাহাদের অধিকার ও স্বত্বের উপর অনিষ্টকারী ব্যক্তিদিগকে হস্তক্ষেপ করিতে দেওয়া হইবে না, তাহা হইলে এই ঘোষণাপত্র দশ সহস্র ইউরোপীয় সৈনিক অপেক্ষা অধিকতর কার্য্যকর হইতে পারে । কিন্তু যদি সাক্ষাৎসম্বন্ধে আপনার নামে এইরূপ ঘোষণা প্রচারিত না হয়, তাহা হইলে তদ্বারা ফললাভ হইবার সম্ভাবনা অল্প । দূরদর্শী সেনানায়ক কলিন্ট্রুপের এই কথা লেফটেনেন্ট-গবর্নরের সান্তিশয় মনঃপূত হইল । তাঁহার স্পষ্ট ধারণা হইল যে, প্রাচীন সেনানায়ক যথার্থ কথাই বলিয়াছেন । প্রতিহিংসা অপেক্ষা ধর্ম্মনাশ ও জাতিনাশের আশঙ্কাতে সিপাহীগণ গবর্নমেন্টের বিরোধী হইয়া উঠিয়াছে । যাহারা ভয়ে উদ্ভ্রান্ত হইয়া, ঘেষপালের ঞ্চায় দলে দলে আপনাদের সর্ব্বনাশের স্থলে একত্র হইতেছে, যে কোনরূপে হউক, তাহাদিগকে নিরুদ্ধেগ ও নিঃশঙ্ক করা গবর্নমেন্টের পক্ষে উদারনীতিসম্মত কার্য্য । কলবিন সাহেব এইরূপ ধারণার বশবর্ত্তী হইয়া, প্রস্তাবিত বিষয় কার্য্যে পরিণত করিতে উদ্বৃত্ত হইলেন । তিনি আপনার মন্ত্রিগণের সহিত পরামর্শ না করিয়া, ২৫শে মে নিম্নলিখিতভাবে ঘোষণাপত্র প্রচার করিলেন :—

“যে সকল সিপাহী গত হাঙ্গামায় লিপ্ত ছিল। তাহারা যদি আপনাদের বাড়ী বাইতে চাহে এবং গবর্ণমেন্টের নিকটবর্তী দেওয়ানি বা সৈনিক ষ্টেশনে অস্ত্রাদি সমর্পণ করে, তাহা হইলে নিরুপদ্রবে ও অক্ষতশরীরে আপনাদের ইচ্ছানুসারে কার্য্য করিতে পারিবে।

“অনেক বিশ্বস্ত সৈনিক গবর্ণমেন্টের বিপক্ষতাচরণে বাধ্য হইয়াছে। কারণ তাহারা আপন দলের লোকের হাত এড়াইতে পারে নাই। অধিকন্তু গবর্ণমেন্ট তাহাদের ধর্ম্মনাশ ও জাতিগত সম্মানের বিলোপসাধন করিতেছেন, এই দৃঢ় বিশ্বাস তাহাদের মন হইতে অপসারিত হয় নাই। তাহাদের এইরূপ ধারণা নিরতিশয় ভ্রান্তিপূর্ণ হইলেও উহা তাহাদের মনে বদ্ধমূল হইয়াছে। সম্প্রতি গবর্ণর-জেনেরল যে ঘোষণা-পত্র প্রচার করিয়াছেন, তাহাতে এই সন্দেহ দূরীভূত হইবে। ছুষ্ঠবুদ্ধি চক্রান্তকারিগণ এবং লোকের বিপক্ষে গুরুতর পাপকার্য্যের অনুষ্ঠান করিয়াছে, এরূপ অপকারকগণ শাস্তিভোগ করিবে। এই ঘোষণা-পত্রপ্রচারের পর তাহারা গবর্ণমেন্টের বিপক্ষে অস্ত্র ধারণ করিবে, শত্রুর সহিত যেরূপ ব্যবহার করা উচিত, তাহাদের সহিতও সেইরূপ ব্যবহার করা যাইবে”।

কিন্তু এই ঘোষণা-পত্র ভারতবর্ষীয় গবর্ণমেন্টের অনুমোদিত হইল না। লর্ড কানিংয়ের স্পষ্ট বোধ হইল যে, এইরূপ ঘোষণা প্রচারিত হইলে, অনেক দণ্ডার্থ ব্যক্তি অব্যাহতি পাইবে। সুতরাং লর্ড কানিং এইভাবে আর এক-খানি ঘোষণাপত্র প্রস্তুত করিলেন—“কোন রেজিমেন্টের যে কোন সৈনিক যদি গুরুতর অপরাধ না করিয়া থাকে, তাহা হইলে সে আপনার কর্ম্মস্থল পরিত্যাগ করিলেও, অব্যাহতি পাইবে, এবং সেই ব্যক্তি যদি দেওয়ানি বা সৈনিক বিভাগের কর্তৃপক্ষের নিকটে অস্ত্রাদি সমর্পণ করে, তাহা হইলে আপনার বাড়ীতে যাইবার অনুমতি পাইবে। কিন্তু যে সকল সৈনিক আপনাদের আফিসার বা অধ্যক্ষ ব্যক্তিকে নিহত বা আহত করিয়াছে, অথবা অন্তরূপ নৃশংসভাজনক অত্যাচারে লিপ্ত হইয়াছে, তাহাদিগকে এইরূপে বিমুক্তি দেওয়া হইবে না। এইরূপ লোক গবর্ণমেন্টের বশ্যতা স্বীকার করিবে। কিন্তু গবর্ণমেন্ট ইহাদের বিষয়ে কোনরূপ নিয়মে আবদ্ধ থাকিবেন না।”

গবর্ণর-জেনেরল যে ভাবে ঘোষণাপত্র প্রণয়ন করিয়াছিলেন, তাহার

সহিত লেফ্টেনেন্ট-গবর্নরের প্রণীত ঘোষণাপত্রের মূলতঃ কোন প্রভেদ নাই । লেফ্টেনেন্ট-গবর্নরের মতে বিশেষ বিশেষ ব্যক্তি দণ্ডের যোগ্য বলিয়া বিবেচিত হইয়াছিল । গবর্নর-জেনেরলের মতে সমগ্র সৈনিকদলই দণ্ডার্থ হইয়াছিল । যাহারা স্বকীয় দলের আফিসারদিগকে বা অপরাপর খ্রীষ্টধর্মাবলম্বীকে নিহত করিয়াছে, তাহারা কোনরূপে নিষ্কৃতিলাভ করিতে না পারে, ইহাই গবর্নমেন্টের উদ্দেশ্য ছিল । গবর্নর-জেনেরল এই উদ্দেশ্য কার্যে পরিণত করিবার জন্ত উত্তরপশ্চিমপ্রদেশের লেফ্টেনেন্ট-গবর্নরের লিখিত ঘোষণাপত্রের পরিবর্তন করিয়াছিলেন । যাহা হউক, ভারতবর্ষীয় গবর্নমেন্ট যে ঘোষণাপত্র প্রস্তুত করিলেন, তাহাতে সবিশেষ কঠোরভাবে অভিযুক্ত হইল না । লর্ড কানিঙ এ স্থলে কলবিন সাহেবের সম্মান রক্ষা করিয়াই কার্য্য করিলেন । কিন্তু কলিকাতার গবর্নর-জেনেরল প্রাসাদে এবং অত্রাণ্ড স্থানে লেফ্টেনেন্ট-গবর্নরের ঘোষণাপত্রের বিরুদ্ধে নানারূপ বিতর্ক হইতে লাগিল । উচ্চ শ্রেণী হইতে নিম্নশ্রেণীর ইউরোপীয় পর্য্যন্ত এজন্ড কলবিন সাহেবের উপর দোষারোপ করিতে লাগিল । কলবিন সাহেব এই সকল বিরুদ্ধ মতবাদে নিরতিশয় বিরক্ত হইলেন । সুস্থ ও সবল ব্যক্তি যখন শাসনাধীন জনপদ নিরাপদ করিতে সবিশেষ পরিশ্রম স্বীকার করেন, তখন যদি তিনি ঘোরতর সঙ্কট-কালে স্বদেশীয়দিগের নিন্দার পাত্র হইয়েন, তাহা হইলে তাঁহার বিরক্তির এক-শেষ ঘটে । অসুস্থতা প্রযুক্ত দেহ অবসন্ন হইলে, এরূপ অবস্থায় মানুষের যেরূপ মনোযাতনা উপস্থিত হয়, তাহা বলিবার নহে । লেফ্টেনেন্ট-গবর্নর কলবিন সাহেব এ সময়ে অসুস্থ হইয়া পড়িয়াছিলেন, স্বাস্থ্যভঙ্গ হওয়াতে তাঁহার শারীরিক ক্ষুর্তি অস্তুর্হিত হইয়াছিল ; তাঁহার দেহ অবসন্ন হইয়া পড়িয়াছিল, তাঁহার শ্রমাসক্তি, উৎসাহ, উদ্যমও কিয়দংশে শিথিল হইয়া পড়িয়াছিল । এই সময়ে তৎপ্রকাশিত ঘোষণাপত্রের বিরুদ্ধে তাঁহার স্বদেশীয়গণ চীৎকার আরম্ভ করাতে তিনি সাতিশয় বিরক্ত হইলেন । এ দিকে তিনি যে বিস্মৃত জনপদের শাসন ও পালনকার্য্যে নিয়োজিত হইয়াছিলেন, তাহার প্রায় সকল স্থানেই অশান্তির আবির্ভাব হইয়াছিল । প্রতিদিনই নানা স্থান হইতে নানারূপ গোলযোগ ও দুর্ঘটনার সংবাদ উপস্থিত হইয়া লেফ্টেনেন্ট-গবর্নরকে অধিকতর বিরক্ত, অধিকতর অবসন্ন ও অধিকতর উদ্বিগ্ন করিয়া তুলিয়াছিল । তিনি



যে সকল মন্ত্রীতে পরিবেষ্টিত ছিলেন, তাঁহাদের অনেকের সহিত তদীয় মতের একতা ছিল না। মতবৈপরীত্য প্রযুক্ত তাঁহার মানসিক অশান্তির একশেষ ঘটিয়াছিল। এইরূপ নানা বিপত্তিজালে পরিবেষ্টিত হইলে, মানুষের কিরূপ অবস্থা ঘটে, তাহা সহজে বোধগম্য হইতে পারে। ফলতঃ কলবিন সাহেবের এ সময়ে যেরূপ অবস্থা ঘটিয়াছিল, তাহা বর্ণনীয় নহে। তাঁহার দেহ ও মন, উভয়ই নিস্তেজ হইয়া পড়িয়াছিল। এখন তাঁহার সামর্থ্যের তুলনায় তদীয় কার্যের ভার অধিকতর হইল। তিনি এই গুরুতর ভার বহন করিতে অসমর্থ হইয়া পড়িলেন। তাঁহার দূরদর্শিতা ও বুদ্ধির তীক্ষ্ণতা ছিল। কিন্তু তাঁহার দায়িত্বের অনুরূপ উৎসাহ বা উদ্যম ছিল না। অসুস্থ অবস্থায় কার্যভারে প্রপীড়িত হওয়াতে তাঁহার মস্তিষ্ক একান্ত দুর্বল হইয়া পড়িয়াছিল। এই সময়ে বাঁহারা তাঁহাকে দেখিতে লাগিলেন তাঁহাদের বোধ হইল যে, তদীয় কর্মক্ষেত্রে বিঘ্নবিপত্তিনিবারণের ও অধীন কর্মচারীদের পরিচালনের জন্ত তিনি দীর্ঘকাল জীবিত থাকিবেন না।

ক্রমে প্রায় তিন সপ্তাহ অতীত হইল। উত্তরপশ্চিম প্রদেশের রাজধানীতে আপাততঃ কোনরূপ বিপদ রহিল না। সিপাহীগণ অধিনায়কদিগের আদেশানুসারে প্রশান্তভাবে কার্য করিতে লাগিল। বাহিরে তাহাদের কোনরূপ উদ্ধতভাব বা বিরুদ্ধাচরণের নিদর্শন লক্ষিত হইল না। সেনানায়কগণ প্রফুল্লচিত্তে কালযাপন করিতে লাগিলেন। দেওয়ানি বিভাগের কর্মচারীগণ প্রশান্তভাবে আপনাদের কর্তব্য কর্মে ব্যাপৃত রহিলেন। লেফটেনেন্ট-গবর্নর সিপাহীদিগের শান্ত্যাব দর্শনে আশ্বস্ত হইলেন। আগরা পূর্বের ঞায় শৃঙ্খলাসম্পন্ন এবং পূর্বের ঞায় নিশ্চিন্ত ও নিরুদ্বেগ অধিবাসীদিগের প্রমোদক্ষেত্র হইল।

কিন্তু এ সময়ে সমস্ত বিষয়ই যেন মায়াখেলা বলিয়া বোধ হইতেছিল। এক সময়ে যে স্থান সর্বপ্রকার বিপত্তির বহির্ভূত বলিয়া প্রতীত হইতেছিল, অল্প সময়ে সেই স্থান ঘোরতর বিপদের রঙ্গক্ষেত্র হইয়া উঠিতেছিল। মে মাস অতীত হইতে না হইতেই আগরায় আবার গোলযোগের সূত্রপাত হইল। আগরার ৩৫ মাইল দূরে মথুরা অবস্থিত। হিন্দুরাজগণের অধিকারকালে

মথুরার অসামান্য সৌন্দর্য্য ও সমৃদ্ধি ছিল। উহার সুদৃশ্য অট্টালিকা, উহার সুশোভন দেবমন্দির, উহার সুসজ্জিত রাজপথ দর্শকদিগের হৃদয়ে অপূর্ব্ব বিশ্বয়ের সহিত অপারিসীম প্রীতির উৎপত্তি করিত। মথুরার এইরূপ শোভা-সমৃদ্ধিই অর্থলোলুপ আক্রমণকারীদিগের উদ্দাম ভোগাভিলাষ বৃদ্ধি করিয়া দিয়াছিল। সুলতান মাহমুদ উহার শোভার বিমুগ্ধ হইয়াছিলেন, এবং উহার সম্পত্তিতে আপনি সম্পত্তিশালী হইবার জন্ত উহাকে একবারে শ্রীভ্রষ্ট করিয়া ফেলিয়াছিলেন। এক সময়ে উহার হর্ম্ম্যরাজির আদর্শে তাঁহার রাজধানীর প্রাসাদ বিনির্ম্মিত হইয়াছিল, এবং উহার বহুমূল্য মণিমাণিক্যে তাঁহার রাজধানী সমৃদ্ধিময়ী বলিয়া সাধারণের নিকটে প্রতিপত্তি লাভ করিয়াছিল। অতি প্রাচীনকাল হইতে মথুরায় হিন্দুধর্ম্মের প্রাধান্য ছিল। অতি প্রাচীনকাল হইতে হিন্দুগণ উহার বিভিন্ন দেবমন্দিরে সমবেত হইয়া, আরাধ্য দেবের উপাসনায় ব্যাপৃত থাকিত। বর্ত্তমান সময়ে মথুরার এই প্রাধান্য বিলুপ্ত হয় নাই। আক্রমণকারীদিগের বিলুপ্তনপ্রবৃত্তিতে শ্রীভ্রষ্ট হইলেও উহা হিন্দুদিগের মধ্যে আপনার গৌরব রক্ষা করিতেছিল।

মে মাস শেষ হইতে না হইতেই মথুরায় গোলযোগ ঘটিল। আগরার ৪৪ সংখ্যক দলের কতকগুলি সিপাহী মথুরায় অবস্থিতি করিতেছিল। ঐ দলের আরও কতকগুলি সিপাহীকে মথুরায় পাঠাইবার বন্দোবস্ত হয়। উহাদের সঙ্গে ৬৭ সংখ্যক দলের কতকগুলি সিপাহীকেও পাঠাইবার আয়োজন হয়। মথুরায় যে সৈনিকদল ছিল, তাহাদের পরিবর্ত্তে কার্য্য করিবার, এবং মথুরার ধনাগারের অর্থ আগরায় আনিবার জন্ত ইহাদিগকে পাঠাইবার প্রয়োজন হইয়াছিল। এই সময়ে মথুরার ধনাগারে ৬ লক্ষেরও অধিক টাকা ছিল। রাজকীয় কর্ম্মচারিগণ লেফ্টেনেন্ট-গবর্নরকে আলীগড় ও মথুরায় যাবতীয় অর্থ আগরায় আনিবার জন্ত আগ্রহসহকারে অনুরোধ করিতেছিলেন। কিন্তু এ সময়ে গবর্নমেন্টকে সকল বিষয়েই সাবধান হইয়া কার্য্য করিতে হইতে ছিল। যাহাতে সিপাহীদিগের মনে কোনরূপে সন্দেহের সঞ্চার বা উত্তেজনার আবির্ভাব হইতে পারে, গবর্নমেন্টকে তদ্বিষয়ে নিরস্ত থাকিতে হইয়াছিল। সহসা ধনাগারের অর্থ স্থানান্তরিত হইলে, সাধারণে সন্দিগ্ধ হইতে পারে। যাহাদের উপর অর্থরক্ষার ভার রহিয়াছে, তাহারা, কোম্পানি বাহাদুর অবিশ্বাস

করিতেছেন মনে করিয়া, বিচলিত হইয়া উঠিতে পারে। এইরূপ আশঙ্কা করিয়া গবর্নমেন্ট সে সময়ে সবিশেষ সতর্কভাবে কার্য্য করিতেছিলেন। কিন্তু এ সময়ে মথুরাস্থিত সিপাহীদিগের ভাবান্তর ঘটিয়াছিল। সাধারণও ক্রমে উত্তেজিত হইয়া উঠিতেছিল। দিল্লী ও অন্যান্য স্থানের সিপাহীগণ কোম্পানি বাহাদুরের বিরুদ্ধ পক্ষ অবলম্বন করিয়া, আগরার অভিমুখে ধাবিত হইয়াছে, ইহারা শীঘ্রই মথুরা দিয়া যাইবে, এইরূপ সংবাদ মথুরায় প্রচারিত হইয়াছিল। মথুরার ইউরোপীয়গণ এজন্য মহিলা ও বালকবালিকাদিগকে আগরায় পাঠাইয়া দিয়াছিলেন। মে মাসের মধ্যভাগে কাপ্তেন নিক্সন ভরতপুরের সৈনিকদল লইয়া মথুরায় উপস্থিত হওয়াতে, ইউরোপীয়গণ কিছু আশ্বস্ত হইলেন। সিপাহীগণও কিছু ভীত হইয়া উঠে।

কিন্তু কর্তৃপক্ষ মথুরার ধনাগারের অর্থরাশি আগরায় লইয়া যাইতে উদাসীন রহিলেন না। ৩০শে মে যখন দুই দল সৈন্য মথুরা হইতে আগরায় যাত্রা করে, তখন তথাকার সিপাহীদিগের সংখ্যা এরূপ ছিল যে, তাহারা সহজে ধনাগার বিলুপ্ত করিতে পারিত। বাহা হউক, মথুরার কর্তৃপক্ষ মথুরারক্ষার বন্দোবস্ত করিয়া ধনাগারের অর্থ স্থানান্তরিত করিতে উদ্যত হইলেন। এই উদ্দেশ্যে গোরুর গাড়ী সকল সজ্জিত হইল। সমুদয় টাকা গাড়ীগুলিতে রাখা হইল। লেফটেনেন্ট বোর্টন নামক এক জন অধিনায়ক অশ্বে আরোহণপূর্বক গাড়ী চালাইবার আদেশ দিলেন। এক জন এতদেশীয় আফিসার এই সময়ে অগ্রসর হইয়া জিজ্ঞাসা করিল, “কোথায় যাইতে হইবে?” বোর্টন কহিলেন—“অবশ্য আগরায়”। আফিসার এই কথা শুনিয়া বলিল—“না না দিল্লীতে”। আফিসারের কথা শুনিবামাত্র বোর্টন উত্তেজিতভাবে বলিলেন—“তুমি বিশ্বাসঘাতক।” এই কথা মুখ হইতে বাহির হইবামাত্র বোর্টন অশ্ব হইতে ভূপতিত ও গতাস্থ হইলেন। এক জন সিপাহী তাঁহার পশ্চাত্তাগে ছিল, সে বোর্টনের শেষ কথা শুনিয়াই গুলির আঘাতে তাঁহার বক্ষঃস্থল ভেদ করিয়া দিল।\*

সিপাহীরা অতঃপর প্রকাশ্যভাবে গবর্নমেন্টের বিরোধী হইয়া উঠিল।

\* *Thornhill, Indian Mutiny, p. 83.*

দেওয়ানি বিভাগের কর্মচারীগণ আর কোন উপায় না দেখিয়া আত্মরক্ষার্থে পলায়ন করিলেন। উত্তেজিত সিপাহীরা টাকার থলিয়া সকল হস্তগত করিল এবং ইউরোপীয়দিগের অধ্যুষিত গৃহ সকল দগ্ধ করিতে অগ্রসর হইল। মথুরার সম্ভ্রান্ত অধিবাসীগণ আবাসগৃহ পরিত্যাগপূর্বক স্থানান্তরে আত্মগোপন করিলেন। এদিকে উন্মত্ত সিপাহীরা সরকারি কার্যালয়ের টেবিল চেয়ার প্রভৃতি একত্র করিল এবং উহার উপর খড়ের গাদা রাখিয়া আগুন দিল। যখন অগ্নি প্রবলবেগে প্রজ্বলিত হইয়া উঠিল, তখন তাহারা টাকার থলিয়া লইয়া, দিল্লীর অভিমুখে প্রস্থান করিল। বাইবার সময়, তাহারা নিম্নশ্রেণীর দলবদ্ধ লোকের মধ্যে পয়সা ছড়াইয়া দিল। মথুরার জেলখানা সুদৃঢ় ও অংশতঃ প্রাচীরে পরিবেষ্টিত ছিল। প্রহরীগণও বন্দুক লইয়া পাহারা দিতে-ছিল। তাহারা ইচ্ছা করিলে উত্তেজিত সিপাহীদিগের সম্মুখে কারাগার রক্ষা করিতে পারিত। কিন্তু এই আবশ্যক কর্তব্যসম্পাদনে তাহাদের অভিরুচি হইল না। সিপাহীগণ উপস্থিত হইলে তাহারা কারাগারের দ্বার খুলিয়া দিল। সিপাহীরা বিনা বাধায় প্রবেশ করিল। বিনা গোলযোগে অপরূদ্ধ ব্যক্তিগণ বিমুক্ত হইল।

এই সময়ে ভরতপুরের সৈনিকদল ছতুল নামক স্থানে অবস্থিতি করিতেছিল। প্রথমে ইহাদের উপর কর্তৃপক্ষের সন্দেহ হয় নাই। ভরতপুররাজ মিত্রতার সম্মানরক্ষার্থে ইহাদিগকে ব্রিটিশ গবর্নমেন্টের নিকটে পাঠাইয়াছিলেন। কমিশনের হার্বি সাহেব ইহাদের সঙ্গে ছিলেন। ৩১শে মে প্রাতঃকালে তিনি সংবাদ পাইলেন যে, মথুরার সিপাহীগণ গবর্নমেন্টের বিরোধী হইয়া, দিল্লীর অভিমুখে অগ্রসর হইতেছে। সংবাদপ্রাপ্তিমাত্র তিনি উহাদের গতিরোধে কৃত-সঙ্কল্প হইলেন। ভরতপুরের সৈনিকদিগের সঙ্গে যে সকল কামান ছিল, তৎসমুদয় দিল্লীর পথের পার্শ্বে স্থাপিত হইল। কিন্তু কমিশনের আশা ফলবতী হইল না। কামানপরিচালকদলে যে সকল পুরুবিয়া সিপাহী ছিল, তাহারা এক সময়ে গবর্নমেন্টের পদাতি সৈনিকদলে কার্য্য করিত। এক্ষণে তাহারা স্বশ্রেণীর বিরুদ্ধভাব দেখিয়া কর্তব্যসম্পাদনে উদাসীন হইল। তাহাদের পরিচালকগণ ইংরেজ আফিসারদিগকে কহিলেন যে, এই সময়ে এই সকল সৈন্য তাদৃশ বিশ্বাসের পাত্র নহে। ভরতপুরের সৈনিকদিগের শিবিরও ইউরোপীয়দিগের

পক্ষে তাদৃশ নিরাপদ নহে। এজন্য ইউরোপীয়গণ স্থানান্তরে প্রস্থান করা সঙ্গত মনে করিলেন। কিন্তু তাঁহারা মহা শিবির পরিত্যাগ না করিয়া ভরতপুরের সিপাহীদিগকে কর্তব্যাক্ষেপে অভিনিবিষ্ট করিবার জন্য সবিশেষ প্রয়াস পাইতে লাগিলেন। তাঁহারা ব্রিটিশ গবর্ণমেন্টের পক্ষ হইতে যথোপযুক্ত পারিতোষিক দিবার অঙ্গীকার করিতে বিমুখ হইলেন না। আফিসারেরা স্পষ্টাক্ষরে কহিতে লাগিলেন যে, ভরতপুররাজ এই সঙ্কটকালে ইংরেজদিগের সাহায্যার্থে তাহাদিগকে পঠাইয়া দিয়াছেন। মহারাজ ইংরেজদিগের সহিত বন্ধুত্বপাশে আবদ্ধ। তাহারা যদি এইরূপ বিপত্তিকালে কর্তব্যসম্পাদনে উদাসীন হয়, তাহা হইলে মহারাজের অখ্যাতি হইবে। মহারাজকে অনর্থ কলঙ্কভাজন করা তাহাদের কখনও কর্তব্য নহে। তাহারা মহারাজের নিমক খাইয়াছে, এখন নিমকহারাম হইলে তাহাদের হৃদশার একশেষ হইবে। কিন্তু এইরূপ পুরস্কারদানপ্রতিশ্রুতি, এইরূপ উপদেশবাক্য, এইরূপ যুক্তিবিগ্রাম কোন কার্যকর হইল না। ভরতপুরের কামানপরিচালক সৈন্য ইংরেজের বিরুদ্ধে আপনাদের কামান সজ্জিত করিল। আফিসারগণ আপনাদের উপদেশবাক্যের এইরূপ ফল দেখিয়া অবাক হইলেন। এখন ইংরেজদিগকে শীঘ্র শীঘ্র ভরতপুরের শিবির পরিত্যাগ করিতে হইল। ৩০ জন কালবিলম্ব না করিয়া, অশ্বারোহণে প্রস্থান করিলেন। অস্ত্র ও পরিধেয় ব্যতীত তাঁহারা আর কোন দ্রব্য লইয়া যাইতে পারিলেন না। ইউরোপীয়েরা প্রস্থান করিবামাত্র ভরতপুরের সৈন্য প্রকাশ্যভাবে বিরোধী হইয়া উঠিল। দেখিতে দেখিতে ইংরেজদিগের তাম্বু প্রজ্বলিত অনলশিখায় পরিব্যাপ্ত হইল। গবর্ণমেন্টের কর্মচারীদিগের বাঙ্গালার দিকে গুলি নিক্ষিপ্ত হইতে লাগিল। গবর্ণমেন্টের কর্মচারীগণ যে সকল দ্রব্য ফেলিয়া পলায়ন করিয়াছিলেন, মিত্র রাজার উত্তেজিত সৈনিকেরা তৎসমুদয় লুণ্ঠিয়া লইল। ভরতপুরের সৈনিকগণ এইরূপে আপনাদের কর্তব্যপথ হইতে বিচ্যুত হইল। আগরার কমিশনার হার্বি সাহেবের চেষ্টা এইরূপে ব্যর্থ হইয়া গেল।

ভরতপুরের সিপাহীরা এক সময়ে আগরার সিপাহীদের অন্তর্ভুক্ত ছিল। পাছে আগরার সিপাহীগণ ইহাদের ঞ্চার গবর্ণমেন্টের বিরোধী হইয়া উঠে, এই আশঙ্কায় কর্তৃপক্ষ নিরতিশয় বিচলিত হইয়া উঠিলেন। তাঁহারা ভাবিলেন,

ভরতপুরের সৈনিকদিগের অভ্যুত্থানসংবাদে আগরার গোলযোগ ঘটবে । সম্ভবতঃ আগরার সিপাহীগণ তাহাদের অগ্রবর্তী সতীর্থদিগের পথানুসরণ করিবে । নিশীথকালে উটের ডাকে ভরতপুরের সিপাহীদিগের সংবাদ আগরার মাজিষ্ট্রেটের নিকটে পৌঁছিল । লেফটেনেন্ট-গবর্নর এই সময়ে মাজিষ্ট্রেটের গৃহে নিদ্রিত ছিলেন । মাজিষ্ট্রেট তাঁহাকে জাগাইয়া, দুর্ঘটনার বিষয় বলিলেন, এবং প্রত্যুষে আগরার সিপাহীদিগকে নিরস্ত করিবার অনুমতি প্রার্থনা করিলেন । কলবিন সাহেব মহসা ড্রুমণ্ড সাহেবের এই প্রস্তাব শুনিয়া, দোলায়মানচিত্ত হইলেন । কিন্তু এখন ভাবিবার সময় ছিল না । লেফটেনেন্ট-গবর্নর মাজিষ্ট্রেটের আগ্রহ দর্শনে তদীয় প্রস্তাব অনুসারে কার্য করিতে সম্মত হইলেন । অবিলম্বে আদেশ যথাস্থানে উপস্থিত হইল । ৩১শে মে উষাকালে ৩ সংখ্যক ইউরোপীয় সৈনিকদল কাওয়াজের বিস্তৃত ক্ষেত্রে শ্রেণীবদ্ধ হইল । গোলন্দাজ সৈন্য যথাস্থানে কামান সকল স্থাপন পূর্বক অধিনায়কের আদেশ প্রতীক্ষা করিতে লাগিল । সিপাহীগণ যখন আপনাদের সম্মুখে কামান সজ্জীকৃত এবং সশস্ত্র ইউরোপীয় পদাতিগণকে শ্রেণীবদ্ধ দেখিল, তখন তাহারা কোনরূপ আপত্তিপ্রকাশে সাহসী হইল না । ব্রিগেডিয়ার অশ্বারোহণে ঘটনাস্থলে উপস্থিত হইলে, সিপাহীরা ধীরভাবে অস্ত্রাদি পরিত্যাগ পূর্বক সৈনিকনিবাসের অভিমুখে প্রস্থান করিল । কেহ কেহ বিদায় গ্রহণ পূর্বক আপনাদের বাটীতে গেল, কেহ কেহ বিদায় না লইয়াই, দিল্লীর অভিমুখে যাত্রা করিল । এইরূপ ব্রিটিশ কোম্পানির আরও দুই দল সিপাহী নিরস্ত্রীকৃত ও দূরীভূত হইল ।

## দ্বিতীয় অধ্যায় ।

উত্তরপশ্চিম প্রদেশের অবস্থা—মীরাট ও রোহিলখণ্ড বিভাগ—মুজফফরনগর ও সাহারাণ-  
পুর—মোরাদাবাদ—বেরিলী—শাহজাহানপুর—বদায়ুন ।

মে মাস অতীত হইল । জুন মাসের প্রচণ্ড আতপতাপের সহিত উত্তর-  
পশ্চিম প্রদেশের জনসাধারণের প্রচণ্ড প্রকৃতি ও গভীর গ্ৰশাস্ত্যভাব পরিস্ফুট  
হইতে লাগিল । যে সকল সিপাহী নিরস্ত্রীকৃত হইয়াছিল, তাহাদের অনেকে  
দিল্লীতে না গিয়া, আপনাদের বাসগ্রামে যাত্রা করিয়াছিল । কিন্তু তাহারা  
যাইবার সময়ে নানারূপ অনিষ্টজনক ও অপ্রকৃত গল্পে পার্শ্ববর্তী পল্লীবাসী-  
দিগের হৃদয় উত্তেজিত করিতে ক্রটি করে নাই । তাহাদের কল্পনাবলে  
ইংরেজদিগের কু অভিসন্ধি অথবা তাহাদের রাজত্বের অবসানসম্বন্ধে নানা  
অদ্ভুত গল্পের সৃষ্টি হওয়াতে বিলুপ্তনপ্রিয় দুঃসাহসী লোকে সর্বত্র আত্মক্ষমতা-  
বিস্তারে কৃতসঙ্কল্প হইতেছিল ।

উক্ত লোকের এইরূপ গভীর উত্তেজনা এবং তন্মূলক অশৃঙ্খলা ও  
অরাজকতার বিষয় কর্তৃপক্ষের অবিদিত ছিল না । মে মাস শেষ হইবার  
পূর্বেই উত্তরপশ্চিম প্রদেশের লেফটেনেন্ট-গবর্নর মহোদয় গবর্নর-জেনেরল  
বাহাদুরের নিকটে এই ভাবে লিখিয়াছিলেন,—“সমগ্র জনপদ বিশৃঙ্খলভাবে  
পরিপূর্ণ হইয়াছে । উত্তেজিত লোকে নানা স্থান অশান্তিময় করিয়া তুলিবার  
চেষ্টা করিতেছে । লোকের বিশ্বাস জন্মিয়াছে যে, আমাদের রাজত্ব দীর্ঘকাল  
স্থায়ী হইবে না । এই বিশ্বাস প্রযুক্ত তাহারা আমাদের কৰ্ম ছাড়িয়া  
অপরের অর্থ বিলুপ্তন পূর্বক আপনাদিগকে সমৃদ্ধ করিতে উদ্যত হইয়াছে ।  
মীরাটের উত্তর দিকের জনপদ নিতান্ত দুঃসাহসী ও দুর্দর্ষ লোকের পদানত  
হইয়া উঠিয়াছে । ঐ সকল স্থানে অনেক নিরীহপ্রকৃতি ভাল মানুষ আমাদের  
পক্ষে থাকিলেও, কুচরিত্র ও অসংসাহসী লোকের জঘ্ন শান্তি স্থাপিত হইতেছে  
না । আলীগড় এবং ইটৌয়া নানা অত্যাচারে বিশৃঙ্খল হইয়া পড়িয়াছে ।  
আমাদের অধ্যুষিত স্থানের ৩০।৪০ মাইলের মধ্যে নিরীহ প্রজালোকে  
উৎপীড়িত হইয়াছে । তাহাদের মঙ্গলের জঘ্ন আমরা সুাতিশয় পরিশ্রম

করিয়াছি, এবং অনেক সময়ে যাহাদের জ্ঞা ভাবিয়াছি, তাহাদের এইরূপ ছরবস্থা, নিরতিশয় শোচনীয় সন্দেহ নাই। তিন মাস পূর্বে, যে সকল জনবহুল ভূখণ্ডের উন্নতি করিয়াছি বলিয়া, আমি গর্ব প্রকাশ করিয়াছি, তৎসমুদয়েরই এই দশা ঘটিয়াছে।” কলবিন্ সাহেবের এই নির্বেদকর কথা পরবর্তী বিবরণে অধিকতর পরিষ্কৃত হইবে।

উত্তরপশ্চিম প্রদেশের যে সকল স্থান দিল্লীর নিকটবর্তী, সেই সকল স্থানে অগ্নাগ্ন স্থান অপেক্ষা অধিকতর উত্তেজনার নিদর্শন পরিলক্ষিত হইয়াছিল। সমগ্র প্রধান ষ্টেশনে গবর্ণমেন্টের ধনাগার ও অগ্নাগ্ন সম্পত্তি-রক্ষার জ্ঞা এতদেশীয় পদাতি সৈন্য নিয়োজিত ছিল। এই সময়ে নানা স্থান হইতে রাজস্ব সংগৃহীত হইয়াছিল। প্রত্যেক ধনাগারের সিন্দুকগুলি মুদ্রায় পরিপূর্ণ ছিল। এই অর্থ যে, শেষে অনর্থের মূল হইয়া উঠিবে, ইহা মে মাসের পূর্বে কোন ইংরেজেরই মনে হয় নাই। তাঁহারা স্বদেশীয় ধনাগারের অর্থের গ্নায় এই সকল ধনাগারের অর্থও সুরক্ষিত বলিয়া মনে করিতেছিলেন। কিন্তু মে মাস অতীত হইতে না হইতেই তাঁহাদের ধারণা অমূলক বলিয়া প্রতিপন্ন লইল। সিপাহীগণ যখন কোম্পানির বিরুদ্ধে সমুথিত হইল, কোম্পানির শক্তিনাশ হইয়াছে বলিয়া সাধারণে যখন সিদ্ধান্ত করিল, তখন ইংরেজ স্বকীয় সম্পত্তি রক্ষা করা দূরে থাকুক, আত্মরক্ষার জ্ঞা বিব্রত হইয়া পড়িলেন। যাহারা বিশ্বস্তভাবে ধনাগার ও গবর্ণমেন্টের অগ্নাগ্ন সম্পত্তি রক্ষা করিতেছিল, তাহারাই এখন অবিশ্বস্ত হইয়া উহার হরণে বা অপচয়সাধনে রুতসঙ্কল্প হইল। উক্তপ্রকৃতি লোকে তাহাদের অনুবর্তী হইতে বিমুখ হইল না। উত্তেজিত সিপাহীগণ যেমন সংহারকার্যে ব্যাপ্ত হইল, উক্ত লোকেও সেইরূপ শাস্তি ও শৃঙ্খলার মঙ্গলময় বিধি বিপর্যাস্ত করিয়া সমগ্র জনপদ অরাজকভাবে পরিপূর্ণ করিল। মুজঃফরনগর, সাহারাণপুর, মোরাদাবাদ প্রভৃতি স্থানে এইরূপ ভয়ঙ্কর বিপ্লবের বিকাশ হইল।

মুজঃফরনগর, মীরাটের উত্তরে অবস্থিত। মীরাটের যে ২০ সংখ্যক সিপাহী-দল গবর্ণমেন্টের বিরোধী হইয়া উঠিয়াছিল, সেই দলেরই কতিপয় সিপাহী মুজঃফরনগরের ধনাগাররক্ষায় নিয়োজিত ছিল। মীরাটের সংবাদে ইহারা



যে, নিশ্চেষ্টভাবে থাকিবে, তদ্বিষয়ে অনেকেই সন্দেহান হইয়াছিলেন । কিন্তু সহসা ইহাদের মধ্যে শৃঙ্খলার বিপর্যয় ঘটিল না । মীরাতের সংবাদ মুজঃফর-নগরে প্রচারিত হইল । ধনাগাররক্ষকেরা আপনাদের দলভুক্ত সৈনিকদিগের সমুখানবার্তা শুনিল । কিন্তু সংবাদপ্রাপ্তিমাত্র তাহারা সহযোগীদিগের প্রবর্তিত দৃষ্টান্তের অনুবর্তী হইল না । তাহারা তিন দিন পর্য্যন্ত প্রশান্তভাবে রহিল । কিন্তু তাহাদের এইরূপ প্রশান্তভাবেও শান্তি অব্যাহত হইল না । এই সময়ে যাহার প্রতি শান্তিরক্ষার ভার ছিল, তিনি কর্তব্য-সম্পাদনে সাহস ও একাগ্রতার পরিচয় দিতে পারেন নাই । মুজঃফরনগরের ইংরেজ মাজিষ্ট্রেট সজাতির অভ্যস্ত গুণের অধিকারী ছিলেন না । মীরাতের সংবাদ শুনিয়াই, তিনি যাবতীয় কার্যালয় বন্ধ করিয়া নগরের প্রান্তভাগে আত্মগোপন করিলেন । যাহারা ধনাগার রক্ষা করিতেছিল, তাহারা মাজিষ্ট্রেটের দেহরক্ষার নিয়োজিত হইল । বর্ফোর্ড সাহেব এইরূপে আপনাকে নিরাপদ করিবার ব্যবস্থা করিয়া নিশ্চিত হইলেন । এদিকে শান্তিরক্ষকের আত্মগোপনের সহিত সমগ্র স্থানে অশান্তির আধিভাব হইল । যাহারা কোন কারণে গবর্নমেন্টের প্রতি অসন্তুষ্ট হইয়াছিল, কোন বিষয়ে হতাশ হইয়া পড়িয়াছিল, অল্পশিক্ষায়, অসংসংসর্গে, কোন অংশে ছুরাচারের প্রশ্রয় দিয়াছিল, তাহাদের সম্মুখে এখন আত্মপ্রকৃতির অনুরূপ কার্যসাধনের সুযোগ উপস্থিত হইল । তাহারা যখন কোম্পানির আফিসগুলি অপরূক ও মাজিষ্ট্রেট সাহেবকে নির্জন জঙ্গলে লুকায়িত দেখিল, তখন তাহাদের দৃঢ় বিশ্বাস জন্মিল যে, ইংরেজেরা নিস্তেজ হইয়া পড়িয়াছে, কোম্পানির রাজত্বের অবসান হইয়াছে । তাহারা এই বিশ্বাসে সাহসী হইয়া, অতীষ্ট কার্যসাধনে অগ্রসর হইল । ধনাগাররক্ষক সিপাহীরা যখন প্রশান্তভাবে ছিল, তখন এই সকল অসুখধারী উদ্ধত লোকে প্রকাশভাবে গবর্নমেন্টের বিরুদ্ধে সমুথিত হইল । এদিকে মাজিষ্ট্রেট সাহেব নগরের প্রান্তবর্তী জঙ্গলে রক্ষকগণে পরিবৃত হইয়াও, ভয়শূন্য হইতে পারিলেন না । তিনি আপনাকে অধিকতর নিরাপদ করিবার জন্ত কারাগাররক্ষকদিগকে আহ্বান করিলেন । সুতরাং কারাগার রক্ষকশূন্য হইল । কয়েদীগণ মুক্তিলাভ করিল । শান্তিরক্ষক ইংরেজ রাজপুরুষের কর্তব্যসম্পাদনের চূড়ান্ত হইল । প্রধান রাজপুরুষ যখন নগরের কোলাহলে শশব্যস্ত হইয়া, নগরের প্রান্তবর্তী স্থানে লুকায়িত ছিলেন, সশস্ত্র

রক্ষকগণ যখন তাহার আবাসগৃহের চারি দিকে অবস্থিতি করিতেছিল, এইরূপে তিনি যখন সর্কাপেক্ষা অভীষ্ট বিষয়—জীবনের মমতায় আকৃষ্ট হইয়াছিলেন, তখন গবর্ণমেন্টের কার্যালয়, গবর্ণমেন্টের কর্মচারীগণের আবাসগৃহ ভস্মীভূত হইল ; গবর্ণমেন্টের কাগজপত্র বিনষ্ট হইয়া গেল ; কারাগার কয়েদীশূন্য হইয়া পড়িল । উক্তলোকে উহার দ্বারজানালা ভাঙ্গিয়া ফেলিল । জেলার এক প্রান্ত হইতে অপর প্রান্ত পর্য্যন্ত এই সংবাদ প্রচারিত হইল যে, কোম্পানির আধিপত্য বিলুপ্ত হইয়াছে । ফিরিঙ্গীরা প্রাণের দায়ে পলায়ন করিয়াছে । এখন যাহার ক্ষমতা আছে, সে-ই যাহা ইচ্ছা হয়, করিতে পারে । প্রত্যেকেই কর্তা হইয়া উঠিয়াছে, সুতরাং প্রত্যেকেরই ইচ্ছানুসারে কর্মসাধনে ও অভীষ্ট দ্রব্যগ্রহণে অধিকার জন্মিয়াছে । উদ্ভেজিত লোকে যখন এইরূপে স্বপ্রধান হইয়া উঠিল, তখন ধনরক্ষক সিপাহীরা নিশ্চেষ্ট থাকিল না । ১৪ই মে ধনাগারের অর্থ অধিকতর নিরাগদ হলে লইয়া যাইবার প্রস্তাব হয় । কিন্তু সিপাহীরা এই প্রস্তাবে সন্মত হইল না । তাহারা টাকার বাক্স স্থানান্তরিত করিতে না দিয়া আপনাই উহা ভাঙ্গিয়া ফেলিল, এবং ঐ অর্থরাশির মধ্যে যে যত পারিল, লইয়া, মোরাদাবাদের অভিমুখে প্রস্থান করিল । এইরূপে কোম্পানির ৮৫,০০০ হাজার টাকার প্রায় এক তৃতীয়াংশ সিপাহীদিগের হস্তগত হইল । অবশিষ্ট অংশ উদ্ভেজিত নগরবাসী ও মাজিষ্ট্রেটের ভৃত্যবর্গ অধিকার করিল । কেহই এই অরাজকতার নিবারণে অগ্রসর হইল না । কেহই ৩৫ জন মাত্র সিপাহীর ক্ষমতারোধে ও উচ্ছৃঙ্খল লোকের দুরীকরণে চেষ্টা করিল না । প্রত্যেকেই হতবুদ্ধি হইল । প্রত্যেকেই সর্ববিষয়ে শান্তি ও সর্বপ্রকার শৃঙ্খলা বিনষ্ট হইল দেখিয়া, ভয়ে ব্যাকুল হইয়া পড়িল ।

মুজঃফরনগরের অধিবাসীদিগের মধ্যে যেরূপ বিশ্বাস জন্মিয়াছিল, সাহারাণপুরের অধিবাসীদিগেরও সেইরূপ বিশ্বাস জন্মিল । কিন্তু মুজঃফরনগরে যে দৃশ্যের আবির্ভাব হইয়াছিল, সাহারাণপুরে তাহার আবির্ভাব হইল না । এই স্থানের ইংরেজ মাজিষ্ট্রেটের প্রকৃতি মুজঃফরনগরের মাজিষ্ট্রেটের প্রকৃতির অনুরূপ ছিল না । মাজিষ্ট্রেট স্পাঙ্কি সাহেব সজাতির স্বভাবসিদ্ধ গুণগ্রামে বিসর্জন দেন নাই । বর্ফোর্ড সাহেব মীরাটের সংবাদে ভীত হইয়া নগর পরিত্যাগ পূর্বক স্থানান্তরে লুক্কায়িত হইয়াছিলেন । স্পাঙ্কি সাহেব মুজঃফর-

নগরের সংবাদ পাইয়াই রক্ষণীয় স্থান হুর্দাস্ত পরস্বলোলুপ অধিবাসীদিগের আক্রমণ হইতে বিমুক্ত করিতে যত্নশীল হইলেন ।

সাহারাণপুর মুজঃফরনগরের উত্তরে এবং মীরাটের ৭০।৮০ মাইল অন্তরে অবস্থিত । গঙ্গা ও যমুনার জলপ্রবাহে এই বিভাগের পূর্ব ও পশ্চিম দিক বিধৌত হইতেছে । উত্তরে জনবসতিশূন্য পর্বতশ্রেণী থাকতে, উহা যেমন শৈত্যগুণসম্পন্ন, সেইরূপ প্রাকৃতিক সৌন্দর্য্যে বিভূষিত । উত্তরপূর্বে শিবালিক পর্বতমালা হিমালয় হইতে জাহ্নবীর নির্গমনস্থল হিন্দুর পুণ্যক্ষেত্র হরিদ্বার পর্য্যন্ত বিস্তৃত রহিয়াছে । সাহারাণপুর সহর একটা ক্ষুদ্র স্রোতস্বতীর তটে অবস্থিত । বর্ষায় সময়ে উহার অধিবাসীর সংখ্যা ৩৫,০০০ হাজার হইতে ৪০,০০০ হাজার পর্য্যন্ত ছিল । অধিবাসীদিগের অধিকাংশ মুসলমান ।\* বহু পূর্বে সাহারাণপুর ইংরেজাধিকৃত রাজ্যের সীমান্তবিভাগের একটা প্রধান ষ্টেশন ছিল । এজন্ত উহার উত্তরাংশে একটা দুর্গ নির্মিত হইয়াছিল । কালক্রমে ইংরেজাধিকারের সীমা প্রসারিত হইলে, ঐ দুর্গকে জেলখানা করা হয় । ক্রমে উহার পরিখা শুষ্ক ও প্রাচীর ভগ্ন হইয়া যায় । যখন মীরাটে বিপ্লব সজ্জাটিত হয়, তখন সাহারাণপুরের ৬৭ জনের অধিক ইউরোপীয় ছিলেন না । ফিরিঙ্গীর সংখ্যা অপেক্ষাকৃত অধিক ছিল । মোরাদাবাদের ২৯ সংখ্যক এতদেশীয় পদাতিকদলের ৭০।৮০ জন সিপাহী ধনাগার রক্ষা করিতেছিল । এক জন এতদেশীয় আফিসার ইহাদের উপর কর্তৃত্ব করিতেছিলেন । প্রায় ১০০ জন অস্ত্রধারী রক্ষক জেলখানা ও ইউরোপীয় কর্মচারীদিগের গৃহে প্রহরীর কর্ম করিতেছিল । এতদ্ব্যতীত সমগ্র বিভাগে যথোপযুক্ত পুলিশ সাধারণের মধ্যে শান্তিরক্ষার ব্যাপৃত ছিল । †

মুজঃফরনগরের গ্রাম সাহারাণপুরে উত্তেজনার নিদর্শন লক্ষিত হইয়াছিল । ধনাগাররক্ষক সিপাহীরা প্রশান্তভাবে আপনাদের কর্তব্য কর্মে ব্যাপৃত ছিল। বটে, কিন্তু অধিবাসীদিগের মধ্যে শান্তি দেখা যায় নাই । এক শ্রেণীর লোকে আর এক শ্রেণীর বিরুদ্ধে সমুথিত হইয়াছিল । সবল ও সহায়সম্পন্ন লোকে দুর্বল ও অসহায়ের নিপীড়নে দলবদ্ধ হইয়া উঠিয়াছিল । অধমর্ণ উত্তমর্ণকে

\* Robertson, District Duties during the revolt in India, p. 11.

† Ibid, p.14.

প্রতারণিত করিবার চেষ্টা করিতেছিল। সংক্ষেপে সকলেই সর্বপ্রকার বিধি-ব্যবস্থা পদদলিত করিয়া, স্বার্থসিদ্ধির জন্ত আপনাই কর্তৃত্ব গ্রহণ করিয়াছিল।

এইরূপ অশৃঙ্খলা, এইরূপ অশান্তি, এইরূপ স্বেচ্ছাচারের মধ্যে আর একটা বিষয়ে উদ্ধত লোকের উৎসাহ বৃদ্ধি পাইয়াছিল। ইহাদের ধারণা হইয়াছিল যে, কোম্পানির রাজত্বের অবসান হইয়াছে। সুতরাং এখন সাহেবদিগের কোন ক্ষমতা নাই। যেখানে স্বেতকারদিগকে পাওয়া যাইবে, সেই খানেই তাহাদিগকে আক্রমণ করিলে, আপনাদের স্বার্থসিদ্ধির পথ অধিকতর প্রশস্ত হইবে। এইরূপ আত্মপ্রত্যয়ের বশবর্তী হইয়া, ইহারা ইউরোপীয়দিগের বিরুদ্ধে অস্ত্রধারণে বিমুখ হয় নাই। সাহারাণপুরের জয়েন্ট মাজিষ্ট্রেট রবার্টসন্ সাহেব লিখিয়া গিয়াছেন যে, সিপাহীরা গবর্ণমেন্টের বিরোধী হইতে পারে, কিন্তু শাস্ত্র-প্রকৃতি পল্লীবাসীদিগের প্রকৃতির যে পরিবর্তন ঘটিবে, তাহা ভাবা যায় নাই। ২০শে মের কয়েক দিন পূর্বে জানা গিয়াছিল যে, কতিপয় বৃহৎ পল্লীর অধিবাসিগণ তাঁহাদিগকে আক্রমণ করিবার জন্ত দলবদ্ধ হইয়াছে।\* রবার্টসন্ যে বিষয়ের উল্লেখ করিয়া গিয়াছেন, সাহারাণপুরের নিরীহ অধিবাসীদিগের কার্যে তদ্বিষয় অধিকতর প্রকাশিত হইয়াছিল। নগরের দোকানদারেরা আপনাদের দোকান সকল বন্ধ করিয়াছিল, এবং অপরের অজ্ঞাতসারে অর্থাৎ মূল্যবান পদার্থ মাটিতে পুতিয়া রাখিয়াছিল। যে সকল রাজপথে প্রতিদিন অবিচ্ছেদে জনস্রোত প্রবাহিত হইত, তৎসমুদয় জনসমাগমশূন্য হইয়াছিল। বিপুল বাণিজ্যের ক্রমে বিলোপদশা ঘটয়াছিল। লোকে আপনাদের জীবন ও সম্পত্তিরক্ষায় ব্যাকুল হইয়াছিল। বিচারকের বিধিব্যবস্থা, শাস্তিরক্ষকের ক্ষমতা, সমস্তই যেন অন্তর্দান করিয়াছিল। কিন্তু এই সময়েও সিপাহীদিগের স্বভাবের কোনরূপ পরিবর্তন ঘটে নাই। ধনাগাররক্ষক সিপাহীরা পূর্বের ন্যায় বিশ্বস্তভাবে ধনরক্ষা করিতেছিল। ইহাদের অধিনায়কও পূর্বের ন্যায় প্রশান্তভাবে আপনায় কর্তব্য কর্মে অভিনিবিষ্ট ছিলেন। কারাগাররক্ষকেরাও পূর্বের ন্যায় ধীরতাসহকারে আপনাদের কর্ম সম্পাদন করিতেছিল।

কিন্তু এইরূপ অশান্তির সময়ে রাজপুরুষগণ আপনাদের দৃঢ়তা ও কর্তব্য-

\* Robertson, District duties during the revolt in India, p. 32.

নিষ্ঠার সবিশেষ পরিচয় দিয়াছিলেন। ১৪ই মে মীরাটের সংবাদ সাহারাণপুরে উপস্থিত হয়। তাহার পর দিন দিল্লীর সংবাদ পঁহুছে। সংবাদ পাইয়া, মাজিষ্ট্রেট স্পাক্সি সাহেব সহযোগিবর্গের সহিত কর্তব্যনির্ধারণ সম্বন্ধে পরামর্শ করেন। এই পরামর্শ অনুসারে মহিলা ও বালকবালিকাদিগকে মৌসুরীতে পাঠাইয়া দেওয়া হয়। অতঃপর আশ্রয়বলবৃদ্ধি ও নগররক্ষার জন্ত গবর্ণ-মেন্টের কর্মচারীদিগকে এক গৃহে সমবেত করিবার প্রস্তাব হয়। কেরাণী ও ফিরিঙ্গিগণ প্রথমে এই প্রস্তাবে সম্মত হয় নাই। শেষে ইহাদের মত পরিবর্তিত হয়। এদিকে রবার্টসন্ সাহেব নিশ্চেষ্ট থাকেন নাই। যে সকল পল্লীতে অধিকতর অশান্ত ও উদ্ধত লোকের বাস ছিল, তিনি সেই সকল পল্লীতে যাইতে ইচ্ছা করেন। এজন্ত ২৯ সংখ্যক দলের সিপাহীদিগের সুবাদারের নিকটে কতিপয় সৈনিক পুরুষ প্রার্থনা করা হয়। সুবাদার সামান্য আপত্তি করিয়া শেষে রবার্টসনের সাহায্যার্থে ২০ জন লোক দেন। রবার্টসন্ এই সিপাহী ও পুলিশের লোক লইয়া, উদ্ধত পল্লীবাসীদিগকে স্মৃচিত শাস্তি দিবার জন্য যাত্রা করেন। তাঁহার উপস্থিতিতে অধিকাংশ পল্লীবাসী ইতস্ততঃ পলায়ন করে। এদিকে এক জন ক্ষমতামালী জমাদার তাঁহার সাহায্যার্থে অগ্রসর হইলেন। রবার্টসনের উত্তম বিফল হয় নাই। তাঁহার সঙ্গে ৫ সংখ্যক ও ২৯ সংখ্যক দলের সিপাহীরা ছিল। ইহারা শেষে গবর্ণ-মেন্টের বিরুদ্ধ পক্ষ অবলম্বন করিলেও, \* রবার্টসন্ উদ্ধত লোকদিগের শাসনে যথোচিত চেষ্টা করেন।

এদিকে রোহিলখণ্ডবিভাগে উত্তেজনার নিদর্শন লক্ষিত হইতে লাগিল। অত্যাচার স্থানের অধিবাসিগণ যেরূপ অশান্ত হইয়াছিল, ব্রিটিশ গবর্ণমেন্টকে আপনাদের অনিষ্টকারী বলিয়া যেরূপ উদ্ধতভাবে পরিচয় দিয়াছিল, এবং আপনাদের প্রাধান্যরক্ষা বা সমৃদ্ধিবৃদ্ধির জন্ত যেরূপ দলবদ্ধ হইয়া উঠিয়াছিল, রোহিলখণ্ডেও তাহার সূচনা দেখা যাইতেছিল। এই সময়ে উত্তর-পশ্চিম প্রদেশ অপেক্ষা অন্য কোন প্রদেশ কর্তৃপক্ষের অধিকতর চিন্তার

\* Malleon, Indian Mutiny. Vol. I. p. 300.

বিষয়ীভূত হইয়া উঠে নাই । উত্তরপশ্চিম প্রদেশের মধ্যে রোহিলখণ্ড বিভাগে তেজস্বিতাসম্পন্ন ও স্বাধীনতাপ্রিয় মুসলমানের বসতি । রোহিলা পাঠানেরা এক সময়ে বীরত্বে যেরূপ প্রসিদ্ধি লাভ করিয়াছিল, সেইরূপ স্বাধীনভাবে উত্তেজিত হইয়া, সমরক্ষেত্রে বিপক্ষের সমক্ষে আত্মত্যাগের পরাকাষ্ঠা দেখাইয়াছিল । পূর্বতন গৌরবের কথা এখনও ইহাদের স্মৃতিপটে জাগরুক ছিল । ইহাদের পূর্বপুরুষগণ কৰ্মক্ষেত্রে যে সাহস, একাগ্রতা ও উত্তমের পরিচয় দিয়াছিলেন, তাহার উদ্দীপনাময়ী কথা এখনও ইহাদিগকে অসংসাহসিক কার্যসাধনে উৎসাহসম্পন্ন করিয়া তুলিতেছিল । ইহারা বিলুপ্তন বা বিধ্বংস-ব্যাপারে অগ্রসর না হইলেও, সিপাহীদিগকে আপনাদের পক্ষে আনিয়া মোগল-সাম্রাজ্যের পুনঃস্থাপনের জন্য চেষ্টা করিতে পারিত ।

রোহিলখণ্ডের মধ্যে বেরেলী একটা প্রধান স্থান । বেরেলীর ৪৮ মাইল উত্তরপশ্চিমে মোরাদাবাদ অবস্থিত । এই স্থানে ২৯ সংখ্যক এতদেশীয় পদাতি-দল এবং এতদেশীয় গোলন্দাজ দলের কতিপয় সৈনিক অবস্থিতি করিতেছিল । অন্যান্য জেলার ন্যায় মোরাদাবাদে জজ, মাজিস্ট্রেট এবং সিভিল সার্জন ছিলেন । জজ ক্রাকফোর্ট উইলসন্ সাহেব দীর্ঘকাল মোরাদাবাদে অবস্থিতি করিতেছিলেন । মোরাদাবাদের সমুদয় শ্রেণীর লোকের বিষয় তাঁহার পরিজ্ঞাত ছিল । মোরাদাবাদের অধিবাসিগণ তাঁহার প্রতি শ্রদ্ধা ও সম্মানপ্রদর্শনে বিমুখ ছিল না । এই শ্রদ্ধাস্পদ প্রবীণ কৰ্মচারী কেবল বিচারকার্যে নিয়োজিত ছিলেন । শান্তিস্থাপন ও বিপ্লবনিবারণ প্রভৃতি অগ্ৰাণ্য কার্যের সহিত ইঁহার সংশ্রব ছিল না । উপস্থিত সময়ে তিনি আপনার ক্ষমতাবৃদ্ধির জন্ত লেফটেনেন্ট-গবর্নরের নিকটে প্রার্থনা করিলেন । তাঁহার প্রার্থনা অবিলম্বে গ্রাহ্য হইল । ক্রাকফোর্ট উইলসন্ এই রূপে বিচারসংক্রান্ত বিষয় ব্যতীত শান্তি-স্থাপন প্রভৃতি অগ্ৰাণ্য বিষয়ে ক্ষমতালাভ করিয়া, একাগ্রতা ও ধীরতার সহিত অভীষ্ট কার্যসাধনে উত্তম হইলেন । মীরাতের শোচনীয় সংবাদ ১৬ই মে মোরাদাবাদে পহুছিল । সংবাদ পাইয়াই, উইলসন্ সাহেব সৈনিককর্তৃপক্ষের অনুমতি অনুসারে সিপাহীদিগের বাসস্থানে গমন করিলেন, এবং তত্রত্য এতদেশীয় আফিসারদিগের সহিত আলাপ করিয়া কহিলেন যে, তাঁহাদের সহযোগিগণ অযথা কারণে অযথাপথে পদার্পণ করিয়াছে । ঐ সহযোগীদিগের

পথ অবলম্বন করিলে তাঁহাদের সর্বনাশ ঘটবে, তাঁহারা যেন পূর্বেই এ বিষয়ে সাবধান হইলেন। উইলসনের কথায় সিপাহীগণ প্রশান্তভাবে আপনাদের কর্তব্যসাধনে যত্ন করিতে লাগিল। নগরের বিরুদ্ধে উত্তেজিত মুসলমানদিগের চেষ্টাতেও আপাততঃ তাহাদের এইরূপ প্রশান্তভাবের ব্যত্যয় দেখা গেল না। গবর্ণমেন্টের একজন কর্মচারী (ইনি হিন্দু; মোকদ্দমার কাগজপত্রের অনুবাদ করা ইঁহার কার্য ছিল) উপস্থিত বিষয় প্রসঙ্গে এই ঘটনার উল্লেখ করিয়াছেন—নবাব নিমতুল্লা খাঁ পূর্বে গবর্ণমেন্টের কর্মচারী ছিলেন। মুস্লেফী কর্ম করিয়া, উপস্থিত সময়ে ইনি পেনসন্ পাইতেছিলেন। এই শুরুকেশ, বর্ষীয়ান পুরুষ মোরাদাবাদের সিপাহীদিগকে গবর্ণমেন্টের বিরুদ্ধে উত্তেজিত করিতে চেষ্টা করেন। বিশ্বাসঘাতক নবাব নগরবাসীদিগের সমক্ষে বলেন যে, তিনি পূর্বেই নবাববংশীয়ের লোক। এখন দিল্লীর সম্রাটের নামে মোরাদাবাদের শাসনকার্যে ব্রতী হইয়াছেন। তাঁহার শাসনে মোরাদাবাদে কোনরূপ অত্যাচার বা অশান্ত্যাব ঘটবে না। এইরূপ ঘোষণা করিয়া, তিনি সিপাহীদিগকে আপনার পক্ষে আনিবার জন্য তাহাদের মধ্যে রুটী ও অত্যাচার খাদ্যদ্রব্য বিতরণ করেন। সিপাহীরা ধন্যবাদ দিয়া ঐ দ্রব্য গ্রহণপূর্বক তাঁহাকে আপনাদেও আবাসস্থল হইতে যাইতে কহে, নচেৎ তাঁহার যে, মৃত্যুদণ্ড হইবে তাহাও নির্দেশ করে। বিশ্বাসঘাতক নবাব এইরূপে নিমকের সম্মান রক্ষা করিতে গিয়া সমুচিত পুরস্কার লাভ পূর্বক স্বকীয় আবাসে প্রত্যাবৃত্ত হইলেন। গভীর নৈরাশ্রে তাঁহার এরূপ বিরক্তি ও মনঃকষ্ট হয় যে, তিনি প্রকাশ্যভাবে গাজী হইয়া দিল্লীতে গমন করেন। এই স্থানে প্রতিপক্ষের গুলির আঘাতে তাঁহার যাবতীয় মনঃকষ্টের অবসান হয়।\*

মে মাসের প্রথমার্দ্ধ পর্যন্ত মোরাদাবাদের সিপাহীগণ বিশ্বস্ত, রাজভক্ত ভৃত্যের আশ্রয় প্রশান্তভাবে আপনাদের কর্তব্য সম্পাদন করিয়াছিল। এই সময়ে রোহিলখণ্ড বিভাগের অনেক পথ বিলুপ্তপ্রিয় গুজরগণকর্তৃক অবরুদ্ধ হইয়াছিল। স্থানে স্থানে গবর্ণমেন্টের বিরুদ্ধে উত্তেজিত সিপাহীগণ ঘুরিয়া বেড়াইতেছিল। মোরাদাবাদের ২৯ সংখ্যক সিপাহীদল এই সকল উপদ্রব-

\* Kaye, Sepoy War Vol. III., p. 253, note.

নিবারণে অমনোযোগী হয় নাই । পরিশেষে তাহাদের সমক্ষে উৎকট পরীক্ষার সময় উপস্থিত হইল । এই পরীক্ষায় তাহারা আপনাদের বিশ্বস্ততা ও রাজভক্তির অস্তিত্ব সম্বন্ধে কিরূপ প্রমাণ দিয়াছিল, তাহা ক্রমে লিখিত হইতেছে ।

১৮ই মে সন্ধ্যাকালে মোরাদাবাদের কর্তৃপক্ষ সংবাদ পাইলেন যে, ২০ সংখ্যক দলের সিপাহীরা বিলুপ্তি অর্থাৎ লইয়া নগরের পাঁচ মাইল দূরে গঙ্গাতটে উপস্থিত হইয়াছে । এই দল মীরাটে গবর্ণমেন্টের বিরুদ্ধে সমুথিত হইয়াছিল । মুজঃফরনগরে এই দলের সৈনিকেরা কর্তৃপক্ষের বিরুদ্ধাচরণ করিয়াছিল । এই বিপক্ষ সৈনিকদিগের উপস্থিতিসংবাদে মোরাদাবাদের কর্তৃপক্ষ নিশ্চেষ্ট রহিলেন না । দুই জন সাহসী কর্তব্যনিষ্ঠ আফিসার ৩০ জন অশ্বারোহী এবং কতিপয় পদাতি লইয়া, রাত্রি ১১টার সময় পূর্বোক্ত সিপাহীদিগের আশ্রয়স্থলের অভিমুখে যাত্রা করিলেন । উইলসন্ প্রভৃতি রাজপুরুষেরা ইহাদের সঙ্গী হইলেন । চারি দিক ঘোর অন্ধকারে সমাচ্ছন্ন ছিল । এই অন্ধকারময় নিশীথে আফিসারদ্বয় নির্দিষ্ট স্থলে উপস্থিত হইয়া, সওয়ারদিগকে বিপক্ষদিগের গতিরোধের জন্ত যথাস্থলে সন্নিবেশিত করিলেন । অনন্তর তাঁহারা পদাতিদিগকে লইয়া, বিপক্ষের শিবিরের দিকে অগ্রসর হইলেন । বিপক্ষ সিপাহীগণ গাঢ়নিদ্রায় অভিভূত ছিল । ইংরেজপক্ষের সৈনিকেরা শিবিরের শান্দ্রীদিগকে হস্তগত করিল । এদিকে গোলযোগে সিপাহীদিগের নিদ্রাভঙ্গ হইল । সিপাহীগণ অসময়ে অতর্কিতভাবে আপনাদিগকে আক্রান্ত দেখিয়া, উদ্ভ্রান্ত হইয়া পড়িল । এরূপ ঘোর অন্ধকার হইয়াছিল যে, আশ্রয় অস্ত্রের অগ্নিস্ফুরণে কোনরূপে আত্মপর নির্ধারণ করা যায় নাই । অন্ধকারের সাহায্যে বিপক্ষ সিপাহীদিগের অধিকাংশ আত্মগোপনে সমর্থ হইল বটে, কিন্তু তাহাদের সমস্ত অস্ত্র, বাহন ইংরেজদিগের হস্তগত হইল । এক জন সওয়ারের গুলিতে বিপক্ষদলের একটা সৈনিক দেহত্যাগ করিল । এদিকে বিপক্ষদিগের ৮,০০০ হাজার টাকা অধিকৃত এবং ৮১০ জন সৈনিকপুরুষ বন্দী হইল ।

এই অভিযানের সময়ে ২৯ সংখ্যক দলের সিপাহীরা কর্তব্যবিমূখ হয় নাই । তাহারা এ পর্যন্ত বিশ্বস্তভাবে আপনাদের কার্য করিতেছিল । কেহ কেহ নির্দেশ করিয়াছেন যে, এ সময়ে তাহাদের বিশ্বস্তা সম্পূর্ণরূপে পরিত্যক্ত



হয় নাই । তাহারা হৃদয়ের সহিত আপনাদের কর্তব্যপালন করে নাই । কিন্তু এ সময়ে যে সকল আফিসার উপস্থিত ছিলেন, তাহারা এই মতের সমর্থন করেন নাই । ঘোরতর অন্ধকারপ্রযুক্ত সিপাহীগণ বিপক্ষদিগের গতিবিধি পর্যবেক্ষণ করিতে পারে নাই । বিপক্ষেরা এই অন্ধকারের সাহায্যে অনায়াসে পলায়ন করিয়াছিল ।

২৯ সংখ্যক দলের সিপাহীদিগকে এইরূপে গবর্ণমেন্টের প্রতি বিশ্বস্ততা প্রদর্শন করিতে দেখিলেও ২০ সংখ্যক দলের সিপাহীগণ তাহাদিগকে আপনাদের প্রতি অবিশ্বস্ত ভাবে নাই । তাহাদের দৃঢ়বিশ্বাস জন্মিয়াছিল যে, ২৯ সংখ্যক দলের লোক তাহাদের গায় আত্মপ্রাধাণস্থাপনে কৃতসঙ্কল্প হইয়াছে ; এই বিশ্বাসের বশবর্তী হইয়া, তাহাদের কেহ কেহ পর দিন প্রাতঃকালে সহসা মোরাদাবাদের সৈনিকনিবাসে উপস্থিত হয় । কিন্তু এই সময়েও ২৯ সংখ্যক দলের সৈনিকগণ নিমকের সম্মান রক্ষা করিতে পরাভুত হয় নাই । এই দলের এক জন শিখ সিপাহীর নিক্ষিপ্ত গুলিতে আগলুক সৈনিকদিগের এক জন হত ও অবশিষ্ট বন্দী হয় । বন্দিগণ কারাগারে অবরুদ্ধ থাকে । কিন্তু অবশ্যস্তাবী বিপদের শাস্তি হইল না । এইরূপ সাবধানতাতেও উহা নিরাকৃত না হইয়া কর্তৃপক্ষকে অধিকতর বিত্রত করিয়া তুলিল । নিহত ব্যক্তির এক জন নিকট আত্মীয় ২৯ সংখ্যক দলে ছিল । দলের মধ্যে এই ব্যক্তির কিয়দংশে ক্ষমতা ও প্রতিপত্তি ছিল । এই ব্যক্তি যখন জানিতে পারিল যে, তাহার আত্মীয় নিহত হইয়াছে ; তখনই সে আপন দলের অপেক্ষাকৃত উদ্ধত ও অশাস্ত-প্রকৃতি লোকদিগকে গবর্ণমেন্টের বিপক্ষে উত্তেজিত করিয়া তুলে, এবং তাহাদিগকে সঙ্গে লইয়া কারাগারের অভিমুখে গমন করে । ২০ সংখ্যক দলের কতিপয় বন্দীর সহিত ৬০০ শত কয়েদী মুক্তিলাভ করে ।

বিচারপতি উইলসন্ এই সংবাদ পাইয়াই অস্বারোহণে কারাগারের অভিমুখে অগ্রসর হইলেন । বিমুক্ত কয়েদিগণ উল্লাসে উৎফুল্ল এবং উত্তেজনায় উন্মত্ত হইয়া চীৎকার করিতে করিতে চারি দিকে ধাবমান হইয়াছিল । এইরূপ ছরস্তু ও উত্তেজিত লোকের সম্মুখে উপস্থিত হওয়া তাদৃশ নিরাপদ বোধ হয় নাই । মোরাদাবাদের ১৮ মাইল পূর্বে রামপুররাজ্য অবস্থিত । রামপুরের নবাবের কতকগুলি সওয়ার এই সময়ে মোরাদাবাদের নিকটে অবস্থিতি

করিতেছিল। উইল্‌সন্ সাহেব কালবিলম্ব না করিয়া, ইহাদের সাহায্য প্রার্থনা করিলেন। কিন্তু সওয়ারেরা তাঁহার প্রার্থনানুসারে কার্য্য করিতে সম্মত হইল না। যাহা হউক, ২৯ সংখ্যক দলের কেহ কেহ প্রকাশ্যভাবে বিপক্ষতা-চরণ করিলেও এ পর্য্যন্ত সমগ্র দল তাহাদের অনুবর্তী হয় নাই। ইহারা এখনও কর্তৃপক্ষের আদেশ পালন করিতেছিল, এখনও ইহাদের বিশ্বস্তভাবে কর্তৃপক্ষ আপনাদিগকে সহায়সম্পন্ন ও নিরাপদ বলিয়া মনে করিতেছিলেন। ইহাদের কয়েক জনকে সঙ্গে লইয়া, এক জন ইউরোপীয় অধিনায়ক পলাতক কয়েদীদিগের অনুসরণ করিলেন। এদিকে উইল্‌সন্ সাহেবও নিশ্চেষ্ট ছিলেন না। তিনি আর এক দল লইয়া ঐ কার্য্যসাধনে উত্তম হইলেন। ইহাদের উত্তম অনেকাংশে সফল হইল। দেড় শত কয়েদী অবরুদ্ধ হইয়া পুনর্বার কারাগারে পূর্ব্ববৎ অবস্থায় স্থাপিত হইল। বিচারপতি উইল্‌সন্ এক ঘণ্টা পরে নগরে প্রত্যাবৃত্ত হইলেন। এই সময়ে নগর নিস্তর্রভাব ধারণ করিয়াছিল। প্রবল ঝটিকার পর প্রকৃতি যেমন স্তব্ধ হইয়া, মোরাদাবাদও যেন সেইরূপ নিশ্চল ও নিশ্চেষ্ট হইয়া পড়িয়াছিল। উহার দোকান সকল অবরুদ্ধ, পথসমূহ জনশূন্য, এবং পল্লী সমুদয় যেন লোকসম্পর্কশূন্য হইয়াছিল। অধিবাসিগণ নানা প্রকার আশঙ্কায় বিচলিত হইয়া উঠিয়াছিল। অতঃপর কি ঘটবে কেবল ইহাই লোকে ভাবিতেছিল। যাহারা শান্তির প্রত্যাশী ছিল, তাহারা যেমন ভবিষ্যতের বিভীষিকার কল্পনা করিয়া বিচলিত হইয়াছিল, যাহারা অশান্তির উৎপাদন করিয়া, আপনাদের অসংযত ভোগলালসার তৃপ্তিসাধনের জন্ত অপরের সম্পত্তিহরণের চেষ্টা করিতেছিল, তাহারাও সেইরূপ উচ্ছৃঙ্খলভাবের নিমিত্ত ভবিষ্যতের বিপদের আশঙ্কায় তুচ্ছিস্তাগ্রস্ত হইয়া উঠিয়াছিল। অগ্ন্যাগ্ন স্থানের গ্নায় সৈনিকনিবাসে গভীর আশঙ্কার নিদর্শন পরিদৃষ্ট হইতেছিল। কেহই সেদিন খাদ্য সামগ্রীর আহরণ বা রন্ধনের আয়োজন করে নাই এবং কেহই এক মুহূর্ত্তের জন্ত নিশ্চিন্তভাবে থাকে নাই। গভীর বিষাদ ও সন্ত্রাসের চিহ্ন যেন সকলের মুখেই পরিগন্ধিত হইতেছিল। উইল্‌সন্ সাহেব এই অশান্তি-ময়—এই সন্ত্রাসজনিত নিস্তর্রতা ভঙ্গ করিতে উদাসীন রহিলেন না। তিনি প্রথমে প্রধান প্রধান নগরবাসীকে শান্তিরক্ষার জন্ত সবিশেষ চেষ্টা করিতে কহিলেন। অনন্তর ২৯ সংখ্যক দলের সিপাহীগণ তাঁহার লক্ষ্য হইল। তিনি

অস্বারোহণে সৈনিকনিবাসে গমন করিলেন। সিপাহীদিগকে শাস্তভাবে সহপদে দিলেন। গোলন্দাজ সৈন্যের সম্মুখীন হইলেন। তাহাদের সমক্ষেও আপনার দৃঢ়তা ও নির্ভীকতার পরিচয় দিলেন। এই সৈনিকেরাই অধিকতর উত্তেজিত হইয়াছিল। মারাত্মক কার্যসাধনের জন্ত ইহারা আপনাদের কামান যথাস্থানে সন্নিবেশিত করিতেও সঙ্কুচিত হয় নাই। কিন্তু উইলসনের নির্ভীকতায় ইহারা আপনাদের অনিষ্টকর উত্তেজনা নিশ্চেষ্ট হইল। উইলসন্ অতঃপর সিপাহীদিগের অমূলক আশঙ্কার নিরাকরণ এবং তাহাদের প্রতি গবর্ণমেন্টের বিশ্বস্ততা প্রদর্শনের জন্ত টোটা বিতরণ করিলেন এবং তাহাদিগকে অস্ত্রাদিতে সজ্জিত হইয়া আসিতে আদেশ দিলেন। তাহারা এই আদেশানুসারে অস্ত্রশস্ত্রে বিভূষিত হইয়া মণ্ডলাকারে দণ্ডায়মান হইল। উইলসন্ তাহাদের মধ্যবর্তী হইয়া যথোচিত ধীরতা ও গাম্ভীর্যের সহিত তাহাদিগকে প্রশান্তভাবে থাকিতে কহিলেন। যাহারা দীর্ঘকাল কোম্পানি বাহাদুরের কার্যসাধনে বিশ্বস্ততা দেখাইয়াছে, কতিপয় উদ্ধত ও উচ্ছৃঙ্খল বালকের ব্যবহারে তাহাদের যেন সেই বিশ্বস্ততা কলঙ্কিত, সেই সদাচার ও প্রভুতন্ত্রি দূরীভূত এবং তাহাদের পলিত কেশ ও শ্বেত শ্মশ্রুর সম্মান যেন সেই সকল অজাতশ্মশ্রুর সমক্ষে অধঃকৃত না হয়, তদ্বিষয়ে উপদেশ দিলেন। তাহারা যদি ভবিষ্যতের জন্ত রাজতন্ত্রি ও বিশ্বস্ততা দেখাইতে প্রতিজ্ঞাবদ্ধ হয়, তাহা হইলে তাহাদের যাবতীয় অপরাধের মার্জনা করিতে গবর্ণর-জেনারেল বাহাদুরকে অনুৰোধ করা হইবে, তদ্বিষয়েও প্রতিশ্রুত হইলেন। উইলসন্ সাহেবের কথায় এতদেশীয় আফিসারগণ জিজ্ঞাসা করিলেন যে, তিনি তাহাদের ধর্মপুস্তক স্পর্শ করিয়া প্রতিশ্রুতিপালনের জন্ত শপথ করিতে প্রস্তুত আছেন কি না। উইলসন্ সাহেব তৎক্ষণাৎ এবিষয়ে সন্মত হইলেন। আফিসারগণ আর কোন বিষয়ে সন্দিহান হইলেন না। উভয় পক্ষই উভয়ের প্রতি বিশ্বস্ততা দেখাইবার নিমিত্ত শপথ করিলেন। কিয়ৎকালের জন্ত পরস্পরের মধ্যে আবার সদ্ভাব স্থাপিত হইল। মোরাদাবাদে আবার প্রশান্ত্যাব পরিষ্কৃত, সন্ত্রাস দূরীকৃত এবং বিশৃঙ্খলতা নিরাকৃত হইল। দোকানের দ্বার উন্মুক্ত হইল। রাজপথ জনকোলাহলময় হইয়া উঠিল। অধিবাসিগণ প্রফুল্লভাবে ইতস্ততঃ বিচরণ করিতে লাগিল। ইউরোপীয় কুলাঙ্গনাগণ আপনাদের নির্জন আশ্রয়স্থল হইতে বহির্গত হইলেন।

প্রত্যেকের মন হইতে যেন কোন একটা দুর্কহ ভার অপসারিত হইল, এবং প্রত্যেকেই যেন উহাতে অনির্কচনীয় সুখ উপভোগ করিতে লাগিল । এদিকে মোরাদাবাদ বিভাগে গোলযোগের সূত্রপাত হইল । তুঘানল এক দিকে আবির্ভূত হইলে, ক্রমে অলক্ষ্যভাবে সমস্ত দিকে উহা পরিব্যাপ্ত হয়, এক এক সময়ে জালাময়ী শিখায় উহার সংহারিণী শক্তিরও পরিচয় পাওয়া গিয়া থাকে । লোকসমাজের এক দিকে কোন বিষয়ে কার্যতৎপরতার শক্তি সঞ্চারিত হইলে, উহার সংঘাতে ক্রমে সমগ্র সমাজ আলোড়িত হইয়া উঠে । এই সময়ে একে অপরের দৃষ্টান্তের অনুবর্তী হয় । এক জনের কার্যপ্রণালী অন্য জনের কার্যপ্রণালীর সহিত একসূত্রে গ্রথিত হয় । ইহাতে উৎকৃষ্ট বিষয় যেমন সমাজের উৎকর্ষসাধক হয়, অপকৃষ্ট বিষয়ও সেইরূপ সমাজের অশৃঙ্খলাঘাতক ও অপকর্ষসাধক হইয়া উঠে । উপস্থিত সময়ে নিত্যসন্ধিগ্ন ও কোতূহলপরতন্ত্র সিপাহীগণ যে কার্যসাধনে অগ্রসর হইয়াছিল, তাহাতে লোকসমাজ যেরূপ অশান্তিময়, রাজ্যশাসনতন্ত্রও সেইরূপ বিশৃঙ্খল হয় । এই অশান্তি ও শৃঙ্খলাহানি, সমাজের অন্য শ্রেণীর চিরপোষিত বাসনাসিদ্ধির সহায় হইয়া উঠে । যাহারা পরস্বলোলুপ ছিল, আত্মপ্রাধান্ত স্থাপনের ইচ্ছা যাহাদের হৃদয়ে বলবতী হইয়া উঠিয়াছিল এবং যাহারা স্বপ্রধানভাবে আত্মপ্রাধান্তের বিস্তারে উদ্যোগী ছিল, তাহারা এই সুযোগ সহজে পরিত্যাগ করে নাই । এক দলকে চিরন্তন শৃঙ্খলার মূলদেশ বিনষ্ট করিতে দেখিয়া, তাহারা আপনাদের অভীষ্টসাধনে অগ্রসর হয়, এবং আপনাদের অভ্যস্ত, মারাত্মক কার্যে সমগ্র প্রদেশে সর্বপ্রকার শৃঙ্খলার চিহ্ন বিনষ্ট করিয়া ফেলে ।

মোরাদাবাদ বিভাগে এইরূপ দৃশ্য অপ্রকাশিত থাকে নাই । বিলুপ্ত-প্রিয় গুজরের দল চারি দিকে উৎপাত করিয়া বেড়াইতেছিল । ২০শে মে ৮০ জন গুজর অবরুদ্ধ হয় । ইহার পর দিন উইলসন্ সাহেব সংবাদ পাইলেন যে, একজন মৌলবী রামপুরের কতকগুলি উচ্ছৃঙ্খল মুসলমানকে দলবদ্ধ করিয়াছে । ইহারা নীলবর্ণের পতাকা উড়াইয়া নগরলুণ্ঠনের জন্ত আসিতেছে । সংবাদপ্রাপ্তিমাত্র উইলসন্ সাহেব কতিপয় সিপাহী সওয়ারকে সঙ্গে লইয়া ইহাদের গতিরোধ করিবার জন্ত যাত্রা করিলেন । তিনি সৈনিকদিগের সহিত বেরিলীর ঘাটে রামগঙ্গা উত্তীর্ণ হইয়া, মুসলমানদিগের গতিরোধ করিলেন ।

এক জন দারোগার অসির আঘাতে মুসলমানদলের অধিনায়ক মৌলবী দেহ-  
ত্যাগ করিল। তাহার কতিপয় প্রধান অনুচর অপরূহ হইল। অপর সকলে  
পলায়নপূর্বক আত্মরক্ষা করিল। এই কার্যেও ২৯ সংখ্যক সিপাহীগণ  
বিশ্বস্তভাব হইতে বিচ্যুত হয় নাই। তাহারা পূর্বের ঞায় কার্যতৎপরতা এবং  
পূর্বের ঞায় উত্তম ও মনোযোগের সহিত অধিনায়কের আদেশ পালন করে।

ইহার দুই দিন পরে ২৯ সংখ্যক দলের সিপাহীগণের সমক্ষে আর একটা  
গুরুতর বিষয় উপস্থিত হয়। এই বিষয়ে ইহাদের রাজভক্তি এবং বিশ্বস্ততা  
প্রমাণ করিবার সুযোগ ঘটে। যে সকল সৈনিক অভিযানের পথ প্রস্তুত করে,  
ভূগর্ভনির্মাণ বা শিবিরসন্নিবেশ কার্যে নিয়োজিত থাকে। তাহাদের দুই দল  
মীরাটের সংবাদে গবর্ণমেন্টের বিরুদ্ধে সমুথিত হয়। ইহারা রুড়কী পরিত্যাগ  
পূর্বক বিলুপ্ত সামগ্রী লইয়া মোরাদাবাদের অভিমুখে অগ্রসর হয়। এই  
সংবাদ ২৩শে মে মোরাদাবাদে পৌঁছে। অবিলম্বে দুই দল সিপাহী এবং ৬০  
জন সওয়ার প্রস্তুত হইতে আদিষ্ট হয়। কাপ্তেন হুইন্স ইহাদের পরিচালক  
হুয়েন। তিনি ঐ সৈনিকদল ও দুইটা কামান লইয়া, বিপক্ষদিগের অভিমুখে  
যাত্রা করেন। কিন্তু তিনি নিদ্দিষ্ট স্থলে উপস্থিত হইতে না হইতে তদীয় অভি-  
যানের সংবাদ বিপক্ষদিগের মধ্যে প্রচারিত হয়। বিপক্ষগণ সংবাদ প্রাপ্তি মাত্র  
তেরাই অভিমুখে প্রস্থান করে। কিন্তু এদিকে স্থানীয় রাজপুরুষ কতিপয়  
সওয়ার লইয়া, ইহাদের গতিরোধ করেন। ইহার মধ্যে কাপ্তেন হুইন্সের সৈনিক-  
দল উপস্থিত হয়। বিপক্ষগণ নিরস্ত্রীকৃত হয়। তাহারা যাবতীয় দ্রব্যাদি হইতে  
বিচ্যুত হইয়া পথের ভিখারী হয়। অনেকে বেরিলীর দিকে পলায়ন করে।

এই ঘটনার পর মোরাদাবাদের সৈনিকনিবাসে আপাততঃ কোনরূপ  
গোলযোগের চিহ্ন দৃষ্ট হইল না। কর্তৃপক্ষ ভাবিলেন যে, ২৯ সংখ্যক দলের  
সিপাহীগণের রাজভক্তি ও বিশ্বস্ততা অক্ষুণ্ণ থাকিবে। কিন্তু তাহাদের এই  
বিশ্বাস দীর্ঘকাল স্থায়ী হইল না। কালক্রমে ঘটনাচক্র অত্যাধিক আবর্তিত হইল।  
মোরাদাবাদবিভাগে উদ্ধতপ্রকৃতি লোকের বসতি ছিল। ইহারা সুযোগ  
বুঝিয়া পরস্পরহরণের জন্ত চারি দিকে ঘুরিয়া বেড়াইতেছিল। মোরাদাবাদের  
সিপাহীগণ ইহাদের দৌরাঅনিবারণে উদাসীন থাকে নাই। কিন্তু যখন  
কোন গুরুতর অনিষ্টকর সংবাদ প্রচারিত হয়, তখন অদূরদর্শী, কৌতূহলপর,

লোকের মধ্যে তুমুল আন্দোলন উপস্থিত হয়। যাহারা অধিকতর কল্পনাশ্রিয়, তাহারা উহা রঞ্জিত করিয়া, অপরকে অধিকতর ব্যাকুল করিয়া তুলে। দূরদর্শিতা ও অভিজ্ঞতার অভাবে ইহারা আপনাদের মানসপটে সর্বনাশের ভীষণ দৃশ্য অঙ্কিত করিতে থাকে। ধর্ম, জাতি ও সম্মাননাশের আশঙ্কা অপেক্ষা ভারতবর্ষীয় লোকের অধিকতর উদ্বেগের বিষয় আর কিছুই নাই। ইহারা আপনাদের ধর্ম, এবং আপনাদের জাতি ও সম্মান রক্ষা করিতে স্বেচ্ছাবিসর্জনেও বিমুখ হয় না। মোরাদাবাদে যখন ধর্ম ও জাতিনাশের জনরব উঠিল, তখন লোকে স্থির থাকিতে পারিল না। প্রত্যেকেই আপনাদের ধর্মসম্বন্ধীয় এবং জাতিগত মন্বানের বিলোপ হইবে ভাবিয়া, একান্ত অস্থির হইয়া উঠিল। প্রত্যেকে আপনার আত্মীয় বা পরিচিত ব্যক্তির সমক্ষে এই সর্বনাশের কথা অতিরঞ্জিতভাবে প্রকাশ করিতে লাগিল। কোম্পানির মূল্যে চিরাচরিত ধর্ম ও চিরন্তন জাতীয় গৌরব বিলুপ্ত হইবে, ইহা যেন লোকের হৃদয়ে তাড়িতবেগে প্রবেশ করিল। যাহারা অপেক্ষাকৃত সঙ্গতিপন্ন ও সন্দিক্ত ছিল, তাহারা এই কথায় মোরাদাবাদের সিপাহীদিগকে উত্তেজিত করিতে বিমুখ হইল না। ২৯সংখ্যক দলের সিপাহীগণ এই আতঙ্কজনক কথায় বিচলিত হইয়া উঠিল এবং পরস্পর পরস্পরকে অধীরভাবে জিজ্ঞাসা করিতে লাগিল, বেরেলীর সংবাদ কি ?

ক্রমে বৈশাখ মাস সমাগত হইল। বৈশাখের আতপতাপের সহিত মোরাদাবাদের ইয়ুরোপীয়দিগের উৎকর্ষা ও আতঙ্ক বৃদ্ধি পাইতে লাগিল। বেরেলী রোহিলখণ্ডবিভাগের সদর স্থান; সুতরাং উহার উপর অত্যাচর স্থানের শান্তি নির্ভর করিতেছিল। মোরাদাবাদের কর্তৃপক্ষ বেরেলীর সংবাদ জানিতে নিরতিশয় উৎসুক হইয়া উঠিয়াছিলেন। তাঁহাদের দৃঢ় বিশ্বাস ছিল যে, বেরেলী যদি শান্তিপূর্ণ থাকে, তাহা হইলে তাঁহারা মোরাদাবাদে শান্তিসুখ ভোগ করিতে পারিবেন, কিন্তু বেরেলীতে যদি উত্তেজনার বৃদ্ধি হয়, তত্রত্য লোকে যদি উন্মত্তভাবে গবর্ণমেন্টের বিরুদ্ধে অস্ত্রপরিগ্রহ করে, তাহা হইলে মোরাদাবাদও শান্তি ও শৃঙ্খলা হইতে বিচ্যুত হইয়া, সেই ঘোরতর তরঙ্গাবর্তে বিঘূর্ণিত হইতে থাকিবে। এইরূপ বিশ্বাস প্রযুক্ত তাঁহারা বেরেলীর জন্ত উদ্বিগ্ন হইয়াছিলেন, তাঁহাদের উদ্বেগ দূরীভূত হইল না; প্রশান্তভাব স্থায়ী হইল

না; আশঙ্কা ও আতঙ্ক অপসারিত হইল না। ১লা জুন সহসা বেরেলীর ডাক বন্ধ হইল। সেই দিন প্রাতঃকালে বেরেলী হইতে কোন চিঠি পত্র মোরাদাবাদে পৌঁছিল না। মোরাদাবাদের সৈনিকনিবাসে এবং গবর্ণমেন্টের কার্যালয়ে জনরব উঠিল যে, বেরেলীর সিপাহীগণ কোম্পানির বিরুদ্ধে সমুথিত হইয়াছে। রাত্রি দ্বিপ্রহরের পর রামপুরের নবাবের প্রেরিত এক জন দূত বেরেলীর সংবাদ লইয়া মোরাদাবাদে উপস্থিত হইল। এই দূতের আগমনে উইলসন্ সাহেব জাগরিত হইলেন। দূত স্মৃষ্টোথিত বিচারককে কহিল যে, বেরেলীর সিপাহীগণ কোম্পানির বিরুদ্ধে অস্ত্র ধারণ করিয়াছে। ইয়ুরোপীয়দিগের অনেকে নিহত হইয়াছে। এরূপ অবস্থায় আপনাদিগের এরূপ স্থান হইতে পলায়ন করাই শ্রেয়ঃ। উইলসন্ গম্ভীরভাবে দূতের কথা শুনিলেন। নিদ্রা আর তাঁহার শান্তিসুখবিধানে সমর্থ হইল না। তিনি উদ্বিগ্ন ও শঙ্কিত হইলেও প্রশান্তভাবে গাত্রোত্থান করিলেন এবং অবিলম্বে মোরাদাবাদের সৈনিকদলের অধিনায়কের সমক্ষে উপস্থিত হইলেন। ২রা জুন উষাকালে ইয়ুরোপীয় এবং এতদেশীয় আফিসারগণ সমবেত হইলেন। উইলসন্ সাহেব বেরেলীর যে সংবাদ পাইয়াছিলেন, তাহা সরলভাবে তাঁহাদের সমক্ষে প্রকাশ করিয়া কহিলেন, এখন পতাকা, কামান ও ধনাগারের অর্থ লইয়া মীরাটে যাওয়াই শ্রেয়ঃ। এতদেশীয় আফিসারেরা এই প্রস্তাবে সন্মত হইলেন। কিন্তু সৈনিকনিবাসের সিপাহীরা ইহার বিরোধী হইয়া উঠিল। তাহারা ভাবিল যে, মীরাটে গেলেই তাহাদের সৰ্বনাশ হইবে। তাহাদিগকে হয় ত ফাঁসিকাষ্ঠে আত্মবিসর্জন করিতে হইবে, অথবা কারাগারে শৃঙ্খলাবদ্ধ হইয়া থাকিতে হইবে। স্মতরাং মোরাদাবাদ পরিত্যাগ করিতে তাহাদের প্রবৃত্তি হইল না।

পর দিন প্রাতঃকালে সিপাহীরা অধিকতর উত্তেজিত হইয়া উঠিল। তাহারা সৰ্ব্বপ্রথম ধনাগার হাতে রাখিতে চেষ্টা করিল। কর্তৃপক্ষ উপায়ান্তর না দেখিয়া, টাকার থলিয়া, গোলাগুলি লইয়া যাইবার গাড়িতে উঠাইয়া, উহা ধনাগাররক্ষকদিগের হস্তে সমর্পণ করিতে উদ্বৃত হইলেন। উইলসন্ সাহেব যখন ধনাগারে গিয়া টাকার থলিয়া বাহির করিতে লাগিলেন, তখন মাজিষ্ট্রেট ও কালেক্টর সগুর্স সাহেব গোপনে ষ্ট্যাম্প কাগজগুলি নষ্ট করিয়া ফেলিলেন। সৰ্ব্বসমেত পঁচাত্তর হাজার টাকা ধনাগার হইতে বাহির করিয়া

সিপাহীদিগকে দেওয়া হইল । সংখ্যার এইরূপ অল্পতায় সিপাহীদিগের মধ্যে গভীর নৈরাশ্রের সহিত নিরতিশয় উত্তেজনা ও বিরক্তির সঞ্চার হইল । উত্তেজনা ও বিরক্তির আবেগে তাহারা খাজাঞ্চিকে ধরিয়া কামানের নিকটে লইয়া গিয়া কহিল যে, যদি অবশিষ্ট অর্থ কোথায় আছে, বলিয়া না দেওয়া হয়, তাহা হইলে তাঁহাকে অবিলম্বে কামানে উড়াইয়া দেওয়া হইবে । কাপ্তেন ফাডিনামক একজন সৈনিক পুরুষ এই বিপত্তিকালে অগ্রসর হইয়া খাজাঞ্চির উদ্ধার করিলেন । জজ ও মাজিষ্ট্রেট সাহেব এই সময়ে অশ্বে আরোহণ করিয়াছিলেন, চারি জন অল্পবয়স্ক সিপাহী ইহার মধ্যে তাঁহাদিগকে গুলি করিতে উদ্বৃত হইল । কিন্তু সুবাদার ভবানীসিংহ এবং হাবিলদার বলদেব সিংহ এই সময়ে তাহাদিগকে কঠোর ভাষায় কহিলেন যে, তাহারা ধর্মতঃ প্রতিজ্ঞা করিয়াছে, ইংরেজদিগের কেশাগ্রও স্পর্শ করিবে না, এখন সেই প্রতিজ্ঞার বিষয় ভুলিয়া ইংরেজদিগকে গুলি করিতে উদ্বৃত হইতেছে । এই কথায় সিপাহীরা আপনাদের বন্দুক নামাইল । উইল্‌সন্ ও সগুাস্ সাহেব অক্ষতশরীরে প্রস্থান করিলেন ।

এইরূপে ইউরোপীয় সিবিল কর্মচারিগণ মোরাদাবাদ পরিত্যাগ পূর্বক মীরাটে যাত্রা করিলেন । সৈনিকদলের আফিসারগণ সপরিবারে নৈনীতালে গেলেন, যেহেতু নৈনীতাল মীরাট অপেক্ষা নিকটবর্তী এবং উহার পথও অধিকতর নিরাপদ ছিল । দেওয়ানি ও সৈনিক বিভাগের প্রধান কর্মচারিগণ স্থানান্তরে গিয়া আশ্রয়স্থান উপায় করিলেন বটে, কিন্তু ফিরিঙ্গী কর্মচারিগণ এই ব্যবস্থার অনুবর্তী হইল না । ইহারা ভাবিয়াছিল যে, খাস ইউরোপীয়গণ যেরূপ উত্তেজিত সিপাহীদিগের আক্রমণের বিষয়ীভূত হইবে, তাহারা সেরূপ হইবে না । সিপাহীগণ ফিরিঙ্গীবোধে তাহাদের বিষয়ে নিশ্চেষ্ট থাকিতে পারে । কিন্তু তাহাদের এই ধারণা শেষে অলীক বলিয়া প্রতিপন্ন হইয়াছিল । তাহারা অত্যাগ ইউরোপীয়দিগের আশ্রয় পলায়ন করিলে ভাল হইত । কিন্তু ইহা না করিয়া, তাহারা আপনাদের সর্বনাশের পথ করিয়া দিল । কেহ কেহ উত্তেজিত সিপাহীদিগের অস্ত্রাঘাতে দেহত্যাগ করিল ; কেহ কেহ মুসলমান ধর্মপরিগ্রহ করিয়া বন্দিভাবে দিল্লীতে প্রেরিত হইল । বোধ হয়, ইহারা দিল্লীতে এই অবস্থায় নিহত হইয়াছিল ।



পূর্বে উক্ত হইয়াছে যে, বেরেলী রোহিলখণ্ডের প্রধান সহর। উহা

যেমন দেওয়ানিবিভাগের সদর স্থান, সেইরূপ সৈনিকবিভাগেরও বেরেলী।

সদর স্থান। বাণিজ্য ও অপরাপর বৈষয়িক ব্যাপারের জন্ত, এই স্থানে বিভিন্ন শ্রেণীর বহুসংখ্যক লোক অবস্থিতি করে। রোহিলখণ্ডের পূর্বতন ঘটনাবলীর বিষয় ভাবিলে, উহার রাজধানীর অধিবাসীদের প্রকৃতি হৃদয়ঙ্গম হয়। মোগল-রাজত্বের অধঃপতনকালে রোহিলখণ্ড যুদ্ধপ্রিয় আফগানদিগের অধিকৃত ছিল। অষ্টাদশ শতাব্দীর শেষার্ধ্বে হাফেজ রহমতের অধীনে পাঠান রোহিলারা আপনাদের স্বাধীনতা রক্ষা করিতে থাকে। অযোধ্যার নবাবের চক্রান্তে এবং ইংরেজদিগের সৈনিকবলে কিরূপে এই সুগঠিত, সুশ্রী, স্বাধীনতাপ্রিয় আফগানদিগের অধঃপতন হয়, তাহা ইতিহাসপাঠকের অবিদিত নাই। ১৭৭৪ অব্দের এপ্রেল মাসে কাত্রার যুদ্ধে হাফেজ রহমত নিহত হইলেন। ইহার পর লর্ড লেকের সহিত যুদ্ধে রোহিলখণ্ড ইংরেজের পদানত হয়, এবং উহা ইংরেজাধিকৃত উত্তরপশ্চিম বিভাগের অন্তর্ভুক্ত হইয়া উঠে। রোহিলা আফগানদিগের এই বীরোচিত ভাব এখনও বেরেলীর অধিবাসিগণের মধ্যে পরিষ্কৃত হইতেছিল। ১৮১৬ অব্দে যখন রোহিলারা করভারে নিপীড়িত হইয়া গবর্ণমেন্টের বিরোধী হয়, তখন ইহাদিগকে দমন করিতে গবর্ণমেন্টকে সবিশেষ প্রয়াস স্বীকার করিতে হইয়াছিল। বেরেলীর অধিবাসীদিগের অধিকাংশ এইরূপ বীরোচিত ভাবের পরিচয়স্থল ছিল। বেরেলীর ব্যবসায়িগণ প্রধানতঃ হিন্দু হইলেও মুসলমান অধিবাসীর সংখ্যা অল্প ছিল না। ইহাদের সুলোভিত কলেবর দেখিলে, ইহাদিগকে পূর্বতন সমরকুশল বীরবংশীয়দিগের অনুরূপ মস্তান বলিয়া স্পষ্ট প্রতীত হইত।

উপস্থিত সময়ে বেরেলীতে কোন ইউরোপীয় সৈনিকদল ছিল না। এতদেশীয় সৈনিকদলের মধ্যে ১৮ ও ৬৮ সংখ্যক পদাতিকদল, ৮ সংখ্যক অনিয়মিত অশ্বারোহিদল এবং এক দল গোলন্দাজ সৈন্ত বেরেলীতে ছিল। ব্রিগেডিয়ার সিবল্ড্ সমগ্র সৈনিকদলের অধ্যক্ষ ছিলেন। কমিশনর, জজ, মাজিষ্ট্রেট প্রভৃতি রাজকর্মচারিগণ স্ব স্ব কার্যবিভাগে কর্তৃত্ব করিতেছিলেন। এতদ্ব্যতীত অনেক ইউরোপীয়, ফিরঙ্গী বাণিজ্য বা অন্তবিধ কার্যপ্রসঙ্গে অবস্থিতি করিতেছিল। সর্বসমেত প্রায় ১০০ শত খৃষ্টান বেরেলীর বিদেশীয়

প্রবাসীদিগের অন্তর্নিবিষ্ট ছিল । এতদ্ব্যতীত ইউরোপীয় কুলমহিলা এবং বালক-বালিকা তাহাদের অভিভাবকবর্গের সহিত বেরেলীতে ছিল ।

মে মাসে যখন মীরট ও দিল্লীর সংবাদ প্রথমে বেরেলীতে উপস্থিত হয়, তখন তদ্রূপ সৈনিকদলের ব্যবহার তাদৃশ অসন্তোষজনক বোধ হয় নাই । অস্বারোহিণী বিশ্বস্ততা ও প্রভুভক্তির একশেষ দেখাইতেছিল । কর্তৃপক্ষ ভাবিয়াছিলেন যে, ইহাদের করণ্যত তরবারির স্থায় ইহাদের প্রভুভক্তিও দৃঢ়তর রহিয়াছে । এই দলের মধ্যে রোহিলখণ্ড ও দিল্লীর পাঠানেরাই অধিক ছিল । তথাপি মে মাসে ইহাদের প্রশান্তভাবের কোনরূপ ব্যত্যয় ঘটে নাই । ক্রমে সময় অতিবাহিত হইতে লাগিল । নানারূপ বাজারগল্প ক্রমে চারি দিকে প্রচারিত হইতে লাগিল । অশিক্ষিত ও অদূরদর্শী লোকের কল্পনার বাহার উৎপত্তি হইতে পারে, তাহা এ সময়ে প্রকাশিত হইয়া, সন্দিগ্ধ লোকের হৃদয় নানারূপ বিভীষিকায় অস্থির করিয়া তুলিতে লাগিল । সিপাহীদিগের এইরূপ অস্থিরতা দর্শনে ইংরেজ সেনাপতিও অস্থির হইয়া উঠিলেন । ২১শে মে সিপাহী-গণ কাওয়ারাজের ক্ষেত্রে সমবেত হইল । সেনাপতি তাহাদিগকে শান্তভাবে থাকিবার জন্য নানা উপদেশ দিলেন । সেনাপতির উপদেশে সিপাহীগণ সন্তুষ্ট হইল, এবং সেনাপতিকে প্রকাশ্যভাবে কহিল যে, অস্ত্র হইতে তাহারা যেন নবজীবন লাভ করিল । ৮ সংখ্যক অনিয়মিত অস্বারোহিদলই এই ভাব প্রকাশ করে । এজন্য গবর্ণমেন্ট ইহাদের সংখ্যা দ্বিগুণ করিবার আদেশ দেন । সেই দিন হইতে প্রত্যহ ২০১২৫ জন নূতন লোক এই দলে প্রবিষ্ট হয় । কর্তৃপক্ষ ইহাদের সাজসজ্জা এবং ঘোড়ার জন্য টাকা দেন । সেনাপতি সিপাহীদিগের এইরূপ সন্তোষ ও প্রশান্তভাব দেখিয়া আশ্বস্ত হইলেন । তিনি লেফ্‌টেনেন্ট-গবর্ণরকে প্রকাশ্যভাবে সিপাহীদিগের প্রতি বিশ্বস্তভাব প্রদর্শন করিবার জন্য অনুরোধ করিয়া পাঠাইলেন । তাঁহার অনুরোধ রক্ষিত হইল । লেফ্‌টেনেন্ট-গবর্ণর বিগেডিয়ারের নিকটে লিখিলেন—লোকের হৃদয় উত্তেজিত হওয়া অবধি এমন কিছুই ঘটে নাই, যাহাতে সিপাহীদিগের বিশ্বস্ততা ও সধ্যবহার সহক্রে লেফ্‌টেনেন্ট-গবর্ণরের পূর্বতন বিশ্বাস বিচলিত হইতে পারে । এই লিপি ৩০শে মে লিখিত হয় । কিন্তু ইহা বেরেলীতে পঁহুঁছবার পূর্বে তদ্রূপ সৈনিকদল গবর্ণ-মেন্টের বিরোধী হইয়া উঠে, এবং ইউরোপীয়দিগের অস্তিত্ব বিলুপ্ত হইয়া যায় ।

যে দিন সিপাহীদল কাওয়ারাজের ক্ষেত্রে সমবেত হয়, সৈন্যধাক্ষ যে দিন সিপাহীদিগকে অমূলক আশঙ্কার অধীর হইতে নিষেধ করেন, তাহার পর কয়েক দিন পর্য্যন্ত সৈনিকনিবাসে কোনরূপ গোলযোগের নিদর্শন লক্ষিত হইল না । সিপাহীগণ প্রশান্তভাবে আপনাদের কার্য্য করিতে লাগিল । সৈনিকনিবাসে, বাজারে, লোকালয়ে প্রশান্তভাব বিরাজ করিতে লাগিল । কিন্তু এইরূপ শান্তি দীর্ঘকাল থাকিল না । তুষানল অপরের অলক্ষ্যভাবে ধীরে ধীরে গতি বিস্তার করিতেছিল । কিছুতেই উহার গতি অবরুদ্ধ হইল না । ২৯শে মে এতদের্শীম সৈনিকদলের আফিমারেরা বেরেলীর অগ্রতম সেনানায়ক কর্নেল ট্রুপ্কে জানাইলেন যে, তাহারা যখন নদীতে স্নান করিতেছিলেন, তখন ১৮ ও ৬৮ সংখ্যক পদাতিদলের লোককে শপথ করিয়া, বলিতে শুনিয়াছেন যে, তাহারা অগ্র বিপ্রহরের সময়ে কোম্পানির বিরুদ্ধে সমুথিত হইয়া, ইউরোপীয়দিগকে সমূলে বিনষ্ট করিবে । কর্নেল ট্রুপ্ এই কথা শুনিবামাত্র কাপ্তেন মেকেঞ্জির নিকটে সংবাদ পাঠাইলেন । অবিলম্বে তাহার অধীনে অঝারোহিদল সজ্জিত ও সুব্যবস্থিত হইয়া, ঘোরতর বিপত্তির সময়ে ইউরোপীয়দিগের পার্শ্বে দণ্ডায়মান থাকিতে কৃতনিশ্চয় হইল ।\*

ক্রমে বেলা বাড়িতে লাগিল । জ্যৈষ্ঠের মার্ভুও গগনের মধ্যস্থল আশ্রয় করিয়া অধিকতর প্রচণ্ডভাবের পরিচয় দিতে লাগিল । আতপতাপের সহিত ইউরোপীয়দিগের আশঙ্কাও বলবতী হইয়া উঠিল । কিন্তু সেদিন কোন গোলযোগ ঘটিল না । মার্ভুও ক্রমে আপনার প্রথর রশ্মিজাল সংযত করিল । ইউরোপীয়দিগের মানসপট হইতে বিভীষিকার করাল দৃশ্যও ক্রমে অপসারিত হইতে লাগিল । কিন্তু বেরেলীর সিপাহীগণ ইউরোপীয়দিগের বিরুদ্ধে সমুথিত না হইলেও ঘটনান্তরে অশান্তির নিদর্শন লক্ষিত হইতে লাগিল । ফিরোজপুরের উত্তেজিত সিপাহীরা দলে দলে বেরেলীতে উপস্থিত হইয়া, নানারূপ কথায় লোকের হৃদয় অধিকতর আতঙ্কগ্রস্ত করিয়া তুলিল । বেরেলীর সিপাহীগণ যখন ইহাদের মুখে শুনিল যে, অঝারোহী, পদাতি, গোলন্দাজে বহুসংখ্যক

\* কেহ কেহ নির্দেশ করিয়াছেন যে, ৩১শে মে বেলা ১১টার সময় এই ঘটনা হয় । অঝারোহিদলের এক জন হিন্দু রেসেলাদার এই বিষয় উক্ত দলের অধিনায়ক কাপ্তেন মেকেঞ্জির গোচর করেন ।—*Malleson, Indian Mutiny Vol. I. p. 311.*

ইউরোপীয় সৈন্ত, সিপাহীদিগকে বিনষ্ট করিবার জন্ত অদূরে সজ্জিত রহিয়াছে, তখন তাহারা স্থির থাকিতে পারিল না। এই জনরবে বেরেলীর সৈনিকনিবাস যেন কোন অপরিদৃষ্ট আকস্মিক শক্তিতে আন্দোলিত হইয়া উঠিল। সকলেই শশব্যস্ত হইয়া মনঃক্লান্ত দশাবিপর্ষায় হইতে আপনাদের উদ্ধারসাধনের উপায় চিন্তা করিতে লাগিল। সকলেই ইউরোপীয়দিগকে আপনাদের পরম অনিষ্টকারী মনে করিয়া, তাহাদের শোণিতপাতে কৃতসঙ্কল্প হইল। সিপাহী-দলের এইরূপ অস্থিরতায় ইউরোপীয়দিগের বাঙ্গালাতে গভীর হুশ্চিন্তার চিহ্ন লক্ষিত হইতে লাগিল। অখারোহিগণ ইউরোপীয়দিগের বিশ্বাসের পাত্র ছিল। বেরেলীর সেনানায়ক ভাবিয়াছিলেন যে, বিপদ উপস্থিত হইলে, তাঁহারা অখারোহীদিগের সাহায্যে আত্মরক্ষা করিতে সমর্থ হইবেন। কিন্তু ক্রমে আশা অন্তর্হিতপ্রায় হইল। একটা মুসলমান ভদ্রলোক এই সময়ে কমিশনার আলেক্জাণ্ডার সাভেবকে কহিলেন যে, সিপাহীরা ব্রিটিশ কোম্পানির বিরুদ্ধাচরণে কৃতসঙ্কল্প হইয়াছে। অতএব এখন তাঁহাদের প্রাণরক্ষার উপায়নির্ধারণ করাই সঙ্গত। ইউরোপীয় অধিনায়কগণ ভাবিয়াছিলেন যে, অখারোহিগণ পদাতিদিগের বিরুদ্ধে দণ্ডায়মান না হইলেও, উদাসীনভাবে থাকিবে। ইহা ভাবিয়া তাঁহারা স্থির করিয়াছিলেন, যখন পদাতিগণ তাঁহাদের বিরুদ্ধে অস্ত্রধারণ করিবে, তখন তাঁহারা অখারোহীদিগের আবাসস্থলে উপস্থিত হইবেন।

৩০শে মে বিনা গোলযোগে অতিবাহিত হইল। ৩১শে মে রবিবার প্রশান্তভাবে সমাগত হইল। উপস্থিত সিপাহীযুদ্ধের অবসানে অনেকের বিশ্বাস জন্মিয়াছিল যে, এই তারিখে ভিন্ন ভিন্ন স্থানের সমগ্র সিপাহীদল এক সময়ে গবুর্গমেণ্টের বিরুদ্ধে সমুথিত হইবার সঙ্কল্প করিয়াছিল। এইরূপ সর্কবিধ্বংসের সাক্ষীভূত দিনের প্রাতঃকালে কোনরূপ অশান্তির নিদর্শন লক্ষিত হইল না। প্রধান অধিনায়কদিগের মধ্যে কেহ কেহ ভাবিয়াছিলেন, তাঁহাদের সৈনিকগণ কোম্পানির প্রবর্তিত শাসনশৃঙ্খলার বিপর্যয়সাধনে বা কোম্পানির অধিকারস্থ ঋষ্টধর্মাবলম্বীদিগের জীবননাশে উত্তত হইবে না। এইরূপ আত্মপ্রত্যয়প্রযুক্ত তাঁহারা অপেক্ষাকৃত শান্তভাবে অবস্থিতি করিতে লাগিলেন। ৩১শে মে বেলা ১০টা পর্য্যন্ত তাঁহাদের এইরূপ বিশ্বাস অবিচলিতভাবে রহিল বটে, কিন্তু তাঁহাদের ভয় একবারে দূর হইল না। বেলা ১১টার সময়ে সহসা

গোলন্দাজ সৈনিকনিবাসের দিকে কামানের শব্দ হইল । ইউরোপীয়গণ এইরূপ আকস্মিক শব্দে চমকিত হইলেন । এই শব্দ দ্বারা যে, সিপাহীদিগকে ইউরোপীয়দিগের বিরুদ্ধে বলবদ্ধ হইবার জন্ত ইঙ্গিত করা হইয়াছে, তাহা বুঝিতে কাহারও বিলম্ব হইল না । ইউরোপীয়দিগের অনেকে আশঙ্কায় আত্ম-হারা হইলেন । যাহারা আত্মপ্রত্যয়প্রযুক্ত মানসপটে প্রশান্তভাবে সম্মোহন দৃশ্য অঙ্কিত করিতেছিলেন, তাঁহারা সহসা এইরূপ বিসদৃশ ঘটনার আবির্ভাবে যেরূপ বিস্মিত ও স্তম্ভিত, সেইরূপ শঙ্কিত ও চমকিত হইয়া উঠিলেন । তোপ হইবার পূর্বে অনেক সাহেব উপস্থিত বিপদ বৃক্ষিয়া অশ্বারোহীদিগের ছাউনির পশ্চাৎ কোন এক আত্রবাগানে গিয়া সমবেত হন । অশ্বারোহিদল ইহাদের নিকটেই থাকে । এদিকে দেখিতে দেখিতে ভয়াবহ কার্যের অনুষ্ঠান হইল । ৬৮ সংখ্যক দলের কতকগুলি সিপাহী ইউরোপীয়দিগের অধুষিত বাঙ্গালার দিকে গুলি চালাইবার জন্য ছুটিয়া গেল । নিদাঘের প্রচণ্ড তাপে বাঙ্গালার চালগুলি নিরতিশয় শুষ্ক হইয়া গিয়াছিল । সুতরাং অগ্নিসংযোগ হইবামাত্র উহা মুহূর্তমধ্যে জলিয়া উঠিল । এদিকে প্রচণ্ড বায়ু প্রজ্জ্বলিত পাবকের গতিবিস্তারের সহায় হইল । ধূমস্তূপের সঙ্গে সঙ্গে করাল অনলশিখার প্রভাবে গৃহগুলি ভস্মসাৎ হইয়া গেল । উত্তেজিত সিপাহীরা অতঃপর ইউরোপীয়দিগের জীবন-নাশে অগ্রসর হইল । যে সকল শ্বেতকার তাহাদের দৃষ্টিপথবর্তী হইল, তাহারা বিচারবিতর্ক না করিয়াই, তাহাদের প্রতি গুলি নিক্ষেপ করিতে লাগিল । ব্রিগেডিয়ার সিবল্ড্ সিপাহীদিগের সমুখানস্থচক তোপধ্বনি শুনিয়াই, অশ্বে আরোহণ পূর্বক অশ্বারোহী সৈনিকদিগের আবাসগৃহের অভিমুখে ঘাইতে-ছিলেন । হুই জন অশ্বারুঢ় আরদালি তাঁহার অনুগমন করিতেছিল । ইহার মধ্যে কতিপয় সিপাহী তাঁহাকে দেখিয়া তদীয় বক্ষঃস্থলে গুলি নিক্ষেপ করিল । ব্রিগেডিয়ার আহত হইয়াও অশ্বারোহী সৈনিকদিগের আবাসস্থলে উপস্থিত না হওয়া পর্য্যন্ত স্বকীয় অশ্বপৃষ্ঠে অধিষ্ঠিত ছিলেন । নির্দিষ্ট স্থলে উপস্থিত হইবা মাত্র বর্ষীয়ান সেনাপতি গতাস্থ ও অশ্ব হইতে ভূপাতত হইলেন ।

ব্রিগেডিয়ার দেহ ত্যাগ করিলে, কর্নেল ট্রুপ সেনাপতির কার্যভার গ্রহণ করিলেন । এ পর্য্যন্ত কেবল ৬৮ সংখ্যক পদাতিকদল এবং গোলন্দাজ সৈনিকেরা প্রকাশ্যভাবে বিরুদ্ধাচরণে প্রবৃত্ত হইয়াছিল । অপরায়িত সৈনিকদল, কি করিতে

হইবে, কিছুই ঠিক করিতে পারে নাই । তাহারা যখন দেখিল যে, তাহাদের সতীর্থগণ ইউরোপীয়দিগের জীবননাশে উদ্বৃত্ত হইয়াছে, ইউরোপীয়দিগের অধ্যুষিত গৃহ ভস্মীভূত এবং ইউরোপীয়দিগের ব্যবহৃত দ্রব্যাদি বিনষ্ট করিতে আগ্রহান্বিত হইয়া উঠিয়াছে, তখন তাহারা উদাসীনভাবে পরিচয় দিতেছিল । তাহারা সহযোগীদিগের আকস্মিক সমুখানে চমকিত ও কর্তব্যবিমূঢ় হইয়া পড়িয়াছিল । যাহাদের প্রদত্ত রণশিক্ষায় তাহারা বীরেন্দ্রসমাজের বরণীয় হইয়াছিল, যাহাদের অর্থে তাহারা পরিবারবর্গের ভরণপোষণ নির্বাহ করিতেছিল, যাহাদের শাসনে তাহাদের আত্মীয়স্বজন আবাসপল্লীতে শান্তিসুখে পরিতৃপ্ত হইতেছিল, সহসা তাহাদের বিরুদ্ধে দণ্ডায়মান হইতে এবং তাহাদের শোণিতে আপনাদের হস্ত কলঙ্কিত করিতে তাহাদের প্রবৃত্তি হয় নাই । পক্ষান্তরে যাহাদের সহিত তাহারা একত্র অবস্থান করিতেছিল, যাহাদের সহিত এক অধিনায়কের উপদেশে শিক্ষিত এবং এক অধিনায়কের আদেশে পরিচালিত হইতেছিল, সম্পদে বিপদে, সুখে দুঃখে যাহারা তাহাদের সহায় ও সহচরের মধ্যে পরিগণিত ছিল, তাহাদিগকে ভিন্ন পথ অবলম্বন করিতে দেখিয়া, তাহারা কর্তব্যনির্ণয়ে একান্ত অসমর্থ হইয়া পড়িল । এক দিকে প্রভুভক্তি যেমন তাহাদিগকে প্রভুর দিকে আকর্ষণ করিতে লাগিল ; অপর দিকে বন্ধুপ্রীতি, সজাতিম্নেহ ও স্বজনমমত্ব তাহাদিগকে উত্তেজিত সিপাহীদিগের সহিত এক সূত্রে সম্বন্ধ করিবার কারণ হইয়া উঠিল । এই সঙ্কটকালে তাহারা প্রভুভক্তির পরিচয় দিতে ইচ্ছা করিলেও, সজাতিপ্রীতি ও বন্ধুম্নেহের আতিশয্য প্রযুক্ত অধিনায়কের আদেশপালনে দোলায়মানচিত্ত হইতে লাগিল । এদিকে কর্তৃপক্ষ অশ্বারোহীদিগের বিশ্বস্তভাবের পরীক্ষা করিতে উদ্বৃত্ত হইলেন । এই অশ্বারোহিদল সাহসে, বীরত্বে এবং অপরিসীম প্রভুভক্তিতে সাতিশয় প্রসিদ্ধ ছিল । ১৮৫২ অব্দে ব্রহ্মদেশের যুদ্ধের সময়ে ৩৮ সংখ্যক দলের পদাতিগণ যখন জাতিনাশের ভয়ে সমুদ্রপথে যাইতে অসম্মত হয়, তখন এই দলের অশ্বারোহিগণ প্রফুল্লচিত্তে প্রভুর কার্যসাধনে অগ্রসর হইয়াছিল । ব্রহ্মদেশের যুদ্ধে ইহারা যেরূপ বীরত্বের পরিচয় দিয়াছিল, তাহা ইতিহাসপাঠকের অবিদিত নাই । এই সাহসী, বীরত্বসম্পন্ন, প্রভুভক্তিপরায়ণ সৈনিকদিগের প্রতি অধিনায়কগণের প্রভূত বিশ্বাস ছিল । উপস্থিত বিপ্লবের সময়ে আফি-

সারেরা নৈনীতালে পলায়ন করিতে ইচ্ছা করিয়া, পূর্বেকৃত আশ্রয়ভাগান হইতে নৈনীতালের অভিমুখে ঘোড়া ছুটাইলেন। অশ্বারোহিদল কিছুক্ষণ তাঁহাদের সঙ্গে সঙ্গে চলিল। পরে মহম্মদ সফি বলিলেন, সাহেবদিগের সঙ্গে পাহাড়ে কোথায় যাইবে। ইহাতে আমাদের কাজ নাই, আমরা সজাতির সঙ্গে যাইয়া মিশি; তাঁহার কথামত অনেকেই ফিরিল। কেবল ২২।২৩ জন আফিসারদিগের সঙ্গে গেল। আফিসারেরা সর্বপ্রথম ভাবিয়াছিলেন যে, অশ্বারোহীগণ তাঁহাদের অনুবর্তী হইবে। বস্তুতঃ অশ্বারোহীদিগের প্রশান্তভাব ও প্রভুর কার্যসাধনে অভিনিবেশ স্থায়ী হইল না। তাহারা যখন ৬৮সংখ্যক পদাতিদলের সম্মুখে উপস্থিত হইয়া মুসলমানদিগের সবুজ পতাকা উড্ডীন দেখিল, তখন তাহাদের প্রশান্তভাব অন্তর্হিত এবং প্রভুভক্তি বিলুপ্ত হইল। তাহারা আপনাদের অধিনায়কদিগের অনুবর্তী না হইয়া উত্তেজিত সিপাহীদিগের পার্শ্বে দণ্ডায়মান হইতে আগ্রহান্বিত হইয়া উঠিল। অধিনায়কগণ তাহাদিগকে আপনাদের পক্ষে রাখিতে সমর্থ হইলেন না। আপনাদের জাতীয় প্রাধাত্যের নিদর্শনজ্ঞাপক পতাকা পরিদৃষ্ট হওয়াতে তাহারা উত্তেজিত সিপাহীদলের সহিত মিশিল; কিন্তু তাহাদের স্বদেশীয় আফিসারগণ বিচলিত হইলেন না। তাঁহারা পলায়নে উত্তম ইংরেজদিগের সঙ্গে যাইতে প্রস্তুত হইলেন। উপস্থিত সঙ্কটকালে তাঁহাদের এইরূপ কার্য কত দূর প্রশংসনীয়, তাহা বলিয়া শেষ করা যায় না। এইরূপ সদাশয়তা, এইরূপ প্রভুভক্তি, এবং এইরূপ বিশ্বস্ততার জগৎ তাঁহারা সহৃদয় ঐতিহাসিকবর্গের নিকটে যথোচিত সম্মান লাভ করিয়াছেন। এই ভয়ঙ্কর সময়ে এইরূপ আত্মত্যাগের পরিচয় দিয়া, ভিন্নদেশীয় ভিন্নজাতীয়দিগের শ্রদ্ধা ও ভক্তির পাত্র হওয়া অল্প গৌরবের বিষয় নহে। সিপাহীদলের মধ্যে ২৩টা সৈনিক পুরুষ ইংরেজদিগের পক্ষে ছিল। ইহাদের মধ্যে ১২ জন আফিসার। রিসেলাদার মহম্মদ নিজাম খাঁ আপনার সমুদয় সম্পত্তি ও ৩টা সন্তান ছাড়িয়া, পলায়নপর ইংরেজদিগের সহিত গমন করেন। কাপ্তেন মেকেঞ্জি সাহেবের আঁরদালি অশ্বারোহী হইয়া ৬ মাইল তাঁহার প্রতিপালক প্রভুর অনুগমন করে। যখন মেকেঞ্জি সাহেবের অধিষ্ঠিত অশ্ব গতাস্থ হয়, তখন বিশ্বস্ত আঁরদালি আপনার অশ্ব মেকেঞ্জি সাহেবকে দিয়া পদব্রজে যাইতে থাকে। মুসলমান সৈনিকগণ গবর্ণমেন্টের বিরুদ্ধাচারী হইলেও এই সকল প্রভুভক্তিপরায়ণ মুসল-

মান তাহাদের সজাতির অনুবর্তী না হইয়া, বিশ্বস্তভাবে একশেষ প্রদর্শন করে ।

ইংরেজেরা আত্মরক্ষার জন্ত নৈনীতালে পলায়ন করিলেন । এদিকে উত্তেজিত সিপাহীরা সমবেত হইয়া আপনাদের অভিলষিত কার্য্যসম্পাদনের জন্ত যত্নপর হইয়া উঠিল । তাহারা ইহার জন্ত সমুদয় সিপাহীকে আপনাদের দলভুক্ত করিবার চেষ্টা করিতে লাগিল । ১৮সংখ্যক সিপাহীদল এ পর্য্যন্ত প্রশান্তভাবে ছিল । উত্তেজিত সিপাহীগণ তাহাদের দিকে কামান স্থাপন পূর্ব্বক তীব্রভাবে কহিল যে, যদি তাহারা স্বধর্ম্মরক্ষার জন্ত ইংরেজের বিরুদ্ধ পক্ষ অবলম্বন না করে, তাহা হইলে কামানের গোলায় তাহাদের ~~হে~~ ছিন্নবিচ্ছিন্ন করা হইবে । উত্তেজিত সিপাহীদিগের এই উত্তেজনাময় বাক্য যেন তাড়িত বেগে ১৮সংখ্যক সিপাহীদিগের হৃদয়ে আঘাত করিল । এ বিষয়ে আর কোনরূপ যুক্তির প্রয়োজন হইল না । কোনরূপ বিতর্কের আবশ্যকতা দেখা গেল না । সমগ্র সিপাহীদল যেন অপূর্ব্ব মন্ত্রশক্তিতে পরিচালিত হইয়া তাহাদের জাতীয় পতাকার আশ্রয়ে দলবদ্ধ হইতে লাগিল । সুতরাং আফিসারদিগের সমস্ত আশা বিলুপ্ত হইল । তাহারা এতক্ষণ ১৮সংখ্যক সিপাহীদলের উপর নির্ভর করিতেছিলেন । এখন তাহাদের এই শেষ অবলম্বন বিচ্ছিন্ন হইয়া গেল । তাহাদের সৈনিকদল যদি ইহার পূর্ব্বক বিরোধী হইয়া উঠিতেন, তাহা হইলে তাহারা অপরাপর ইংরেজের স্থায় নৈনীতালে গিয়া আত্মরক্ষা করিতে পারিতেন । কিন্তু এখন আর সে সুযোগ ঘটিল না । আফিসারেরা এখন প্রাণের ভয়ে উদ্ভ্রান্ত হইয়া বেরেলী পরিত্যাগ করিলেন বটে, কিন্তু সকলের অদৃষ্ট সমান হইল না । কেহ কেহ উত্তেজিত পল্লীবাসিগণকর্তৃক নিহত হইলেন, কেহ কেহ বহু বিঘ্নবিপত্তি ও দুঃসহ কষ্টভোগের পর মোরাদাবাদের জজ উইলসন সাহেবের চেষ্টায় প্রাণরক্ষা করিলেন ।

বেরিলীর অপরাপর ইউরোপীয় অতঃপর ভীষণ বিপ্লবসাগরে নিমজ্জিত হইলেন । ইহাদের অদৃষ্টফলও সমান হইল না । কেহ কেহ অনেক কষ্টে আত্মরক্ষা করিলেন, কেহ কেহ বিপ্লবকারীদিগের হস্তে নিহত হইলেন । বিপ্লবের অগ্ৰাণ্ণ অঙ্গ অসম্পূর্ণ রহিল না । ইউরোপীয়দিগের বাসগৃহ ভস্মীভূত ও ধনাগার বিলুপ্ত হইল । কারাগাররক্ষকেরা আপনাদের কর্তব্যপালনে যথোচিত



পরিচয় দিয়া অবশেষে বিপ্লবকারীদিগের নিকটে পরাজয় স্বীকার করিল। কয়েদীগণ অবরোধগৃহ পরিত্যাগ পূর্বক স্বাধীনভাবে কার্য্য করিতে প্রবৃত্ত হইল। বেরেলীর উত্তেজিত ও উচ্ছৃঙ্খল অধিবাসিগণ সিপাহীদিগের অনুবর্তী হইতে বিমুখ হইল না। ইহাদের হস্তে অনেক ইউরোপীয় নিহত হইল। ইংরেজের প্রাধান্য ও ক্ষমতার নিদর্শন বেরেলী হইতে অন্তর্হিত হইয়া গেল।

এখন মুসলমান রোহিলখণ্ডে প্রাধান্যস্থাপনে অগ্রসর হইলেন। রোহিলখণ্ডের শাসনদণ্ড কাহার হস্তগত হইবে, তৎসম্বন্ধে বিচারবিতর্ক হইতে লাগিল। দুই ব্যক্তি এই পদ পাইবার জন্য কৰ্ম্মক্ষেত্রে প্রবিষ্ট হইলেন। দুই জনই রোহিলখণ্ডের প্রাচীনপাঠানবংশসম্ভূত। অযোধ্যার নবাব এক সময়ে যাহাদের চিরসমৃদ্ধ ভূখণ্ডে আধিপত্য করিতে উদ্যত হইয়াছিলেন; ভারতের প্রথম গবর্নর-জেনারেল ওয়ারেন হেস্টিংস নবাবের পরিতোষ ও আপনাদের অর্থলাভস্বরূপে পরিতৃপ্তির জন্য যাহাদের সর্বনাশসাধনের ব্যবস্থা করিয়াছিলেন, তাহাদের বংশমর্যাদা ও বীরোচিত গৌরবে দুই জনই আপনাদের জনপদে প্রসিদ্ধ ছিলেন। ইহাদের এক জনের নাম খাঁ বাহাদুর খাঁ, অপরের নাম মোবারিক শাহ। শেষোক্ত প্রতিদ্বন্দ্বী বংশগৌরবে অপেক্ষাকৃত উন্নত এবং কার্য্যকুশলতার ও চরিত্রগৌরবে সজাতির মধ্যে অপেক্ষাকৃত বিখ্যাত ছিলেন। বার্মাক্যজনিত অবসাদে প্রথম প্রতিদ্বন্দ্বী তাদৃশ কার্য্যকুশল না হইলেও অন্য বিষয়ে সজাতির মধ্যে তাঁহার প্রাধান্য ছিল। খাঁ বাহাদুর খাঁ রোহিলখণ্ডের প্রথম ও প্রধান শাসনকর্ত্তা হাফেজ রহমৎ খাঁর বংশসম্ভূত ছিলেন। কাত্তার যুদ্ধক্ষেত্রে সুশিক্ষিত ইংরেজ সৈনিকগণের সমক্ষে হাফেজ রহমৎ কিরূপ বীরত্বের পরিচয় দিয়াছিলেন, কিরূপ সাহসের সহিত পুনঃ পুনঃ হস্তসঞ্চালন দ্বারা সহযোগীদিগকে আপনার অনুবর্তী হইবার জন্য ইঙ্গিত করিয়াছিলেন, শেষে আপনার অনুরোধ, আপনার আগ্রহ এবং আপনার তেজস্বিতার পরিচয়সূচক অপূর্ব উৎসাহ সমস্তই বৃথা হইল দেখিয়া, কিরূপ নির্ভীকভাবে সুত্রী ও সুগঠিত অশ্বে অধিষ্ঠিত হইয়া একাকী ইংরেজের সঙ্গিনের দিকে গমনপূর্বক গুলির আঘাতে অনন্ত নিদ্রায় অভিভূত হইয়াছিলেন, তাহা রোহিলখণ্ডের অধিবাসীদিগের স্মৃতিপটে জাগরুক ছিল। বহু বৎসর অতীত হইলেও, এবং বহুবিধ ঘটনার আবির্ভাব ও তিরোভাব ঘটিলেও, হাফেজের এই স্বদেশপ্রেম ও স্বার্থ-

ত্যাগের কথা যেন রোহিলখণ্ডে সর্বক্ষণ নবীনভাবে বিরাজ করিতেছিল। এক বংশের পর আর এক বংশের অভ্যুদয় হইলেও ঈদৃশ বিবরণ কখন পুরাতনভাবে জড়িত ও অন্তর্হিত হয় নাই। সুতরাং রোহিলারা খাঁ বাহাদুর খাঁর প্রাধাণ্যস্বীকারে বিমুখ হইল না। বেরেলীর অধিকাংশ মুসলমান হাফেজ রহমতের বংশধরের সম্মানরক্ষায় উদ্বৃত্ত হইল। মোবারিক শাহ সিপাহীদিগের সমুখানবার্তা শুনিয়া ভাবিয়াছিলেন যে, বেরেলীর লোকে তাঁহাকে সুবাদার করিবে। কিন্তু শেষে খাঁ বাহাদুর খাঁর প্রাধাণ্য ও প্রতিপত্তি দেখিয়া বন্ধুভাবে তাঁহার সহিত সন্মিলিত হইলেন। কিন্তু অভীষ্ট বিষয়লাভে হতাশ হওয়াতে তাঁহার হৃদয় খাঁ বাহাদুর খাঁর প্রতি বিদ্বেষভাবে পূর্ণ ছিল। সুতরাং এইরূপ বন্ধুতা তদীয় সরলভাবে নিদর্শনজ্ঞাপক হয় নাই।

পূর্বে উক্ত হইয়াছে যে, নবীন সুবাদার খাঁ বাহাদুর খাঁ যেরূপ সাধারণের সম্মানিত ছিলেন, বয়সের আধিক্যে তাঁহার দেহ যেমন গাঙীর্ষ্যের পরিচায়ক, সেইরূপ শ্রদ্ধার উদ্দীপক ছিল। তিনি ইউরোপীয় ও এতদেশীয় উভয় জাতিরই সম্মানান্বিত ছিলেন। খাঁ বাহাদুর খাঁ রোহিলখণ্ডের প্রথম ও প্রধান শাসন-কর্তার বংশসম্বৃত বলিয়া নির্দিষ্ট বৃত্তি গ্রহণপূর্বক নিরবচ্ছিন্ন আলস্যে কালযাপন করেন নাই। তিনি সদর আমিনের কার্য গ্রহণ করিয়াছিলেন, এই কার্য যথারীতি সম্পাদনপূর্বক অবশেষে পেন্সন লইয়াছিলেন। সুতরাং হাফেজ রহমতের বংশীয় বলিয়া তিনি যেমন বৃত্তিভোগ করিতেছিলেন, সেই রূপ সদর আমিনের কার্য করিয়া নির্দিষ্ট বৃত্তির অধিকারী হইয়াছিলেন। খাঁ বাহাদুর খাঁ এইরূপে বৃত্তিলাভ পূর্বক সকল বিষয়েই গবর্ণমেন্টের পক্ষসমর্থন করিয়া আসিতে-ছিলেন। তিনি প্রত্যহ কমিশনার, মাজিষ্ট্রেট প্রভৃতি উচ্চপদস্থ রাজকর্মচারি-গণের সহিত সন্মিলিত হইয়া সর্বত্র শান্তিরক্ষার উপায় নির্ধারণ করিতেন। গবর্ণমেন্টের এই বৃত্তিভোগী দীর্ঘকাল গবর্ণমেন্টের পক্ষে থাকিয়া, জীবনের শেষদশায় যে, উত্তেজিত সিপাহীদিগের উৎসাহদাতা হইবেন, তাহা রাজ-কর্মচারিগণের কেহই ভাবেন নাই। মাজিষ্ট্রেট সাহেব যখন তাঁহার সমক্ষে কহিতেন যে, দিল্লী এক সপ্তাহের মধ্যে তাঁহাদের হস্তগত হইবে, লোকে কোনরূপ উত্তেজনার পরিচয় না দিয়া, তাঁহাদের পক্ষসমর্থন করিবে, অশ্বারোহী সৈনিকদল তাঁহাদের প্রতি বিশ্বস্ত থাকিবে, তখন বৃদ্ধ খাঁ বাহাদুর সহাস্র-

বদনে তাঁহার কথা শুনিতেন ।\* ইহাতে বোধ হয়, উপস্থিত বিপ্লবের সময়ে এই বর্ষীয়ান পুরুষ গবর্ণমেন্টের বিরুদ্ধাচরণে কৃতসঙ্কল্প হইয়াছিলেন । কথিত আছে, খাঁ বাহাদুর মহম্মদ খাঁ নামক এক জন রেসেলাদারের সাহায্যে অশ্বারোহী সৈনিকগণকে আপনার পক্ষে আনিতে চেষ্টা করিয়াছিলেন । †

গবর্ণমেন্টের বৃত্তিভোগী বৃদ্ধ মুসলমান, সুবাদারের পদ পাইয়াই, খ্রীষ্টধর্মাবলম্বীদিগের নিধনে উদ্বৃত্ত হইলেন । খাঁহারা নির্জন স্থানে আত্মগোপন করিয়াছিলেন, তাঁহারা নবনিয়োজিত শাসনকর্তার সমক্ষে আনীত হইলেন । ইংরেজের প্রবর্তিত রীতি অনুসারে তাঁহাদের বিচারের কোনরূপ অঙ্গহানি হইল না । খাঁ বাহাদুর খাঁ স্বয়ং বিচারকের পদ গ্রহণ করিলেন । হতভাগ্য পলায়িতগণ কারাগারের সমক্ষে ফাঁসিকাঠে বিলম্বিত হইল । খাঁ বাহাদুর খাঁ কাহারও প্রতি দয়াপ্রদর্শনে উন্মুখ হইলেন না । যে সকল ইউরোপীয় তাঁহার সমক্ষে আনীত হইল, তাহাদের সকলেরই অদৃষ্টে এক দশা ঘটিল ।

এইরূপে ইউরোপীয়দিগের অস্তিত্ববিলোপের পর খাঁ বাহাদুর খাঁ রাজকীয় কার্যে মনোনিবেশ করিলেন । তিনি ঘোষণাপত্র দ্বারা আপনার আধিপত্য-প্রতিষ্ঠার সংবাদ সাধারণকে জানাইলেন, এবং স্বয়ং সুসজ্জিত হস্তীতে আরোহণপূর্বক বেরেলীর রাজপথে পরিভ্রমণ করিলেন । এই সময়ে অমুচরেরা ছত্র, দণ্ড, চামর প্রভৃতি বিবিধ রাজলক্ষণ লইয়া, তাঁহার অনুগমন করিতে লাগিল । সুবার প্রত্যেক ভাগে কর্মচারিগণ নিয়োজিত হইলেন । দিল্লীর মোগল সম্রাটের নামে রাজস্ব সংগৃহীত হইতে লাগিল । কিন্তু নবান সুবাদারের শাসনে কোথাও শান্তি বা শৃঙ্খলা রহিল না । দুর্কলের উপর নিপীড়ন হইতে লাগিল, প্রবলেরা যে কোনরূপে হউক, আপনাদের ভোগবিলাসের তৃপ্তিসাধনের উপায় দেখিতে লাগিল । শান্তিপ্রিয় লোকে ইংরেজের শাসনশৃঙ্খলার জঘ্ন দীর্ঘনিশ্বাস পরিত্যাগ করিতে লাগিল ।

খাঁ বাহাদুর খাঁ উত্তেজিত ও উচ্ছৃঙ্খল লোকের অত্যাচারনিবারণে সমর্থ হইলেন না । সুতরাং রোহিলখণ্ডে ভয়াবহ অত্যাচারের নিদর্শন পূর্ণমাত্রায়

\* *The Mutiny of the Bengal Army, p. 98.*

† *The Mutiny of the Bengal Army, p. 108.*

লক্ষিত হইতে লাগিল। ভীষণ বিপ্লবের সংঘাতে শান্তি ও শৃঙ্খলার সমস্ত বন্ধন বিচ্ছিন্ন হইয়া গেল। ইংরেজের দেওয়ানি আদালতের ক্ষমতার অপব্যবহারে অনেকের সর্বস্বাস্ত্য ঘটয়াছিল। দেনার দায়ে অনেকে পূর্বপুরুষানুগত সম্পত্তি হইতে বিচ্যুত হইয়াছিল। যাঁহারা ভূস্বামী বলিয়া এক দিন সাধারণের মধ্যে সম্মানিত ছিলেন, তাঁহারা আদালতের ডিক্রীতে সামান্য লোকের অবস্থায় পাতিত হইয়া, অসহনীয় মনঃকষ্টে কালযাপন করিতেছিলেন। আদালতের বিচারে তাঁহাদের এইরূপ দশান্তর ঘটিলেও পূর্বতন অধিকার ও সম্মানের বিষয় তাঁহাদের স্মৃতিপট হইতে অন্তহিত হয় নাই। এই সকল সম্পত্তিচ্যুত ও অধিকারভ্রষ্ট লোক এখন সুরোগ বুঝিয়া, গবর্ণমেন্টের বিরোধীদের দল পরিপুষ্ট করিতে লাগিল। উপস্থিত সিপাহীযুদ্ধের এক বৎসর পূর্বে এক জন উচ্চপদস্থ ইংরেজ-রাজকর্মচারী প্রকাশভাবে দেওয়ানি আদালতের ক্ষমতার এইরূপ অপব্যবহার এবং তৎপ্রযুক্ত ভাবী অনিষ্টের বিষয় প্রকাশ করিয়াছিলেন। কিন্তু তাঁহাকে তখন কেবল আশঙ্কারী বলিয়াই তৎপ্রচারিত মতের প্রতি উপেক্ষা প্রদর্শন করা হইয়াছিল।\*

যাহা হউক, এক দল সিপাহী বেয়েলীতে থাকিতে খাঁ বাহাদুর খাঁ নিরতিশয় চিন্তিত হইলেন। এই সিপাহীদল তাঁহার আধিপত্য অব্যাহত রাখিতে তাদৃশ যত্নশীল হয় নাই। সুতরাং তাঁহারা বেয়েলীতে থাকিলে, খাঁ বাহাদুর খাঁর অনিষ্টের সম্ভাবনা ছিল। এদিকে ত্রিগেডিয়ান বখত খাঁ বাহাদুর খাঁর প্রতিদ্বন্দ্বী মোবারিক শাহের পক্ষপাতী ছিলেন। মোবারিক শাহ বখত খাঁকে সৈনিকদল লইয়া দিল্লীতে যাইবার পরামর্শ দিলেন, এবং সম্রাটের সমক্ষে আপনাকে রোহিলখণ্ডের সুবাদার করিবার প্রার্থনা করিয়া একখানি আবেদনপত্র একজন বন্ধু দ্বারা পাঠাইয়া আপনি বেয়েলীতে অবস্থিতি করিতে লাগিলেন।

রবিবার প্রাতঃকালে বেয়েলীতে যখন এইরূপ ভয়াবহ কাণ্ডের অনুষ্ঠান হইতেছিল, তখন শাজাহানপুরেও ঐরূপ মারাত্মক শোচনীয় ঘটনার আবির্ভাব হয়। শাজাহানপুর বেয়েলীর ৪৭ মাইল

\* *Edward's, Personal adventures during the Indian rebellion, p. 14.*

† বখত খাঁ গোলন্দাজদলের সুবাদার ছিলেন। এই সময়ে ইংরেজের পক্ষ পরিত্যাগ পূর্বক বিপ্লবকারীদের সহিত মিশিয়া ত্রিগেডিয়ানের পদগ্রহণ করেন।

দূরে অবস্থিত । এই স্থানে ২৮ সংখ্যক সিপাহীদল অবস্থিতি করিতেছিল । কাপ্তেন জেমস্ এই দলের অধিনায়ক ছিলেন । মাজিষ্ট্রেট, কালেক্টর, সহকারী মাজিষ্ট্রেট প্রভৃতি দেওয়ানি বিভাগের কর্মচারিগণ রাজকীয় কার্য্য নিৰ্ব্বাহ করিতেছিলেন । এতদ্ব্যতীত কতিপয় ইউরোপীয় ও ইউরেশীয় বাণিজ্য-ব্যবসায় ব্যাপ্ত ছিলেন । মীরাতের সংবাদ ১৫ই মে শাজাহানপুরে উপস্থিত হয় । ঐ সংবাদে শাজাহানপুরের অধিবাসীদিগের মধ্যে সাতিশয় উত্তেজনার নিদর্শন লক্ষিত হইতে থাকে । কিন্তু কর্তৃপক্ষ এইরূপ আকস্মিক পরিবর্তন দর্শনে সৰ্ব্বপ্রথম বিচলিত হইয়েন নাই । সিপাহীদিগের উপর তাঁহাদের বিশ্বাস ছিল । তাঁহারা ভাবিয়াছিলেন যে, নগরের উত্তেজিত ও উচ্ছৃঙ্খল লোকে বিরোধী হইয়া উঠিলে, সিপাহীগণ তাঁহাদের পক্ষে থাকিবে । এই বিশ্বাসপ্রযুক্ত তাঁহারা অপেক্ষাকৃত নিরুদ্বেগে ছিলেন । ৩১শে মে রবিবার শাজাহানপুরের অধিকাংশ ইউরোপীয় কর্মচারী ও আফিসার আপনাদের উপাসনা-মন্দিরে গমন করেন । তাঁহারা যখন উপাসনায় নিবিষ্ট ছিলেন, তখন সিপাহীগণ তাঁহাদের বিরুদ্ধে সমুথিত হয় । উপস্থিত বিপ্লবে অত্যাগ্র স্থানে যাহা ঘটয়াছিল, শাজাহানপুরেও তাহাই ঘটে । সেই পুরাতন কথার পুনরুক্তি নিশ্চয়জন এবং বৈচিত্র্যের অভাবে বিশদভাবে বর্ণনার অযোগ্য হইলেও সংক্ষেপে উল্লেখ করা কর্তব্য । ইউরোপীয়দিগের বাঙ্গালা বিলুপ্তি ও ভস্মীভূত হয়, ধনাগার আক্রান্ত ও উহার অর্থরাশি উত্তেজিত লোকের হস্তগত হয় । কারাগারের দ্বার উদঘাটিত হয়, কারারুদ্ধগণ মুক্তিলাভ করে, নগরের লোকে উত্তেজিত সিপাহীদিগের সহিত সন্মিলিত হয় । পার্শ্ববর্তী পল্লীর অধিবাসিগণ প্রকাশ্যভাবে গবর্ণমেন্টের বিরুদ্ধাচরণে প্রবৃত্ত হয় । একজন ইংরেজের চিনি পরিষ্কার করিবার কারখানা এবং রম নামক মদের ভাঁটি উত্তেজিত পল্লীবাসিগণ কর্তৃক বিলুপ্তি হয় । রাত্রিসমাগমের পূর্বেই শাজাহানপুরে অভিনব শাসনকর্তা, শাসনসংক্রান্ত পদে প্রতিষ্ঠিত হইয়েন, এবং শ্বেতকায়ের প্রাধান্য বিলুপ্ত হইয়া যায় ।

শাজাহানপুরের ইংরেজেরা এই বিপ্লব হইতে নিষ্কৃতিলাভ করিতে পারিলেন না । অত্যাগ্র স্থানে তাঁহাদের স্বদেশবাসিগণের অদৃষ্টে যাহা ঘটয়াছিল, তাঁহাদের অদৃষ্টেও তাহাই ঘটিল । অশিক্ষিত অদূরদর্শী ও হৃদ্বর্ষ লোকে যখন আপনাদের চিরন্তন ধর্ম ও চিরাগত রীতিনীতির বিলোপের আশঙ্কায় একান্ত

উত্তেজিত হয়, তখন তাহাদের কিছুমাত্র জ্ঞান থাকে না। তাহারা স্বধর্মনাশক ও স্বদেশীয় রীতিনীতির বিলোপকারী বলিয়া, যাহাদের প্রতি সন্দেহ করে, উন্নতভাবে তাহাদের শোণিতপাতে অগ্রসর হয়। ভারতবর্ষীয়গণ আপনাদের ধর্ম ও চিরপ্রচলিত আচারব্যবহারের একান্ত পক্ষপাতী। তাহারা ইহার জন্ত আত্মপ্রাণের উৎসর্গ করিতেও কাতর হয় না এবং অপরের প্রাণনাশেও সঙ্কোচ প্রকাশ করে না। অধিকন্তু পরস্বাপহারক ছর্বৃত্তগণ এই সময়ে অপরের ধনে আপনাদিগের দুর্নিবার ভোগলালসা চরিতার্থ করিবার জন্ত একান্ত আগ্রহ-যুক্ত হয়। তাহারা এই সূত্রে ভীষণ বিপ্লবের বিস্তার করিতে কিছুমাত্র পরাধুখ হয় না। প্রধানতঃ এই সকল কারণে ইউরোপীয়দিগের জীবন সঙ্কটাপন্ন হইয়া উঠিয়াছিল। যেখানে বিপ্লব ঘটিয়াছিল, সেই খানে ইউরোপীয়গণ উত্তে-জিত সিপাহীদিগের ও বিলুপ্তপ্রিয় ছর্বৃত্ত লোকের অস্ত্রপ্রয়োগের বিষয়ীভূত হইয়াছিল। বিপ্লবের প্রারম্ভে যাহা ঘটিয়াছিল, তাহার মধ্যে কোন বৈচিত্র্য নাই। এক স্থানের উত্তেজিত লোকে সর্বপ্রথম যাহা করিয়াছে, স্থানান্তরের উত্তেজিত লোকে সর্বপ্রথম তাহারই সম্পাদনে আগ্রহযুক্ত হইয়াছে। সকল স্থানের অনুষ্ঠিত ঘটনা যেন এক সূত্রে গ্রথিত হইয়া, এক উদ্দেশ্যের অবতারণা করিয়াছে। ধনাগারবিলুপ্তন, কারাগারের কয়েদীদিগের বিমুক্তিসাধন, ইউ-রোপীয়দিগের অধ্যুষিত গৃহদাহন এবং ইউরোপীয়দিগের নিধন, উত্তেজিত লোকের প্রথম অনুষ্ঠিত কর্মের মধ্যে পরিগণিত ছিল। সুতরাং যেখানে সিপাহীগণ উত্তেজিত ও গবর্ণমেন্টের প্রাধান্যনাশের জন্ত দলবদ্ধ হইয়াছে, সেইখানে সর্বপ্রথম এই সকল ভয়ঙ্কর দৃশ্যের আবির্ভাব ঘটিয়াছে। শাজাহান-পুরের উত্তেজিত সিপাহীগণও ধনাগার বিলুপ্তন করিয়াছিল, কারারুদ্ধদিগের অবরোধমোচন করিয়াছিল, ইউরোপীয়দিগের বাসগৃহ ভস্মীভূত করিয়া কেলিয়া-ছিল, এখন ইউরোপীয়দিগের শোণিতপাতে অগ্রসর হইল। ইউরোপীয়গণ যখন উপাসনামন্দিরে আরাধনার নিবিষ্টচিত্ত ছিলেন, তখন কতিপয় উত্তেজিত সিপাহী তাহাদিগকে আক্রমণ করিল। উপাসকগণ এইরূপ আকস্মিক আক্রমণে উদ্ভ্রান্ত হইয়া পড়িলেন। কেহ কেহ উত্তেজিত লোকের হস্তে নিহত হইলেন, কেহ কেহ উপাসনাগৃহের দ্বার রুদ্ধ করিয়া শক্তিতভাবে অবস্থিত করিতে লাগিলেন। মহিলারাও ভয়বিহ্বলচিত্তে ঐ স্থানে রহিলেন।

এই সময়ে সৈনিকনিবাসে সাতিশয় গোলযোগ ঘটিল। কাপ্তেন জোন্স আপন দলের সিপাহীদিগকে শান্ত করিতে গিয়া নিহত হইলেন। এক জন ইংরেজ ডাক্তার হাস্পাতাল হইতে আবাসগৃহে প্রত্যাবর্তন হইতেছিলেন, এমন সময়ে উত্তেজিত সিপাহীগণ ইউরোপীয়দিগের বিরুদ্ধে অস্ত্রধারণ করিল। ডাক্তার আপনার স্ত্রী, একটি শিশু সন্তান ও একটি ইউরোপীয় পরিচারিকাকে গাড়িতে তুলিয়া আপনি কোচবাক্সে বসিলেন, এবং তাড়াতাড়ি আপনাদের উপাসনাগৃহের দিকে যাইতে লাগিলেন। কতিপয় সিপাহী তাঁহাদিগকে লক্ষ্য করিয়া গুলি ছুড়িতে লাগিল। ডাক্তার সাহেব গুলির আঘাতে কোচবাক্স হইতে ভূপতিত ও গতাস্থ হইলেন। তাঁহার স্ত্রী আহত হইলেও, উপাসনাগৃহে গিয়া আশ্রয়লাভ করিলেন। এই সঙ্কটকালে ইউরোপীয়দিগের এতদেশীয় ভৃত্যগণ প্রভুভক্তি ও বিশ্বস্ততার পরিচয় দিতে পরাস্থ হইল না। তাহারা বন্দুক পিস্তল প্রভৃতি অস্ত্র আনিয়া আপনাদের প্রভুদিগকে দিল। এই সময়ে যদি সিপাহীদিগের মধ্যে ঐক্য থাকিত, তাহা হইলে ইউরোপীয়দিগের কেহই তাহাদের আক্রমণ হইতে পরিত্রাণ পাইতেন না। কিন্তু সৌভাগ্যক্রমে সিপাহীগণ এ সময়ে এক উদ্দেশ্যসাধনের জন্ত পরস্পর দলবদ্ধ হয় নাই। ঘটনাচক্রে ইহাদের মতিভ্রম হইয়াছিল। ইহারা অতীত বিষয়ের পর্যালোচনা না করিয়া এবং ভবিষ্যতের দিকে দৃষ্টি না রাখিয়া, গবর্নমেন্টের বিরুদ্ধাচরণে প্রবৃত্ত হইয়াছিল বটে, কিন্তু সকলে তাহাদের অবলম্বিত পথের অনুসরণ করে নাই। যখন সিপাহীগণ উত্তেজিত হইয়া ফিরিঙ্গির শোণিতে আপনাদের বলবতী হিংসার তৃপ্তিসাধনে উত্তম হইয়াছিল, তখন তাহাদের দলের কেহ কেহ সেই বিপন্ন ও তাহাদের সজাতিগণ কর্তৃক আক্রান্ত ফিরিঙ্গির জীবনরক্ষায় অগ্রসর হইয়াছিল। শাজাহানপুরেও এইরূপ প্রায় ১০০ প্রভুভক্ত সিপাহী তাহাদের আফিসরদিগের পার্শ্বে দণ্ডায়মান হয়। এইরূপে হতাবশিষ্ট ইউরোপীয়দিগের জীবন নিরাপদ হইয়া উঠে। এখন ইউরোপীয়গণ সহায়সম্পন্ন হইয়া আপনাদের পলায়নের উপায় নির্ধারণ করিতে লাগিলেন। অয়োধ্যার প্রান্তবর্তী পৌহারিন নামক স্থানে যাইবার প্রস্তাব হইল। প্রস্তাবকারীর বিশ্বাস ছিল যে, পৌহারিনের রাজা তাঁহাদিগকে উপস্থিত বিপদ হইতে রক্ষা করিবার বন্দোবস্ত করিবেন। এই সময়ে কয়েকটি অশ্ব এবং দুই এক খানি গাড়ি সংগৃহীত

ও উপাসনামন্দিরের প্রাঙ্গণে আনীত হইল। ইউরোপীয়গণ কালবিলম্ব না করিয়া পৌহায়িনে যাত্রা করিলেন। কিন্তু তথাকার লোক পলায়িত-দিগকে রক্ষা করিতে পারিবে না বলিয়া, আপনাদের অসামর্থ্য জানাইল। সুতরাং পলায়িতগণ অযোধ্যার প্রান্তবর্তী মোহমুদী নামক স্থানে যাত্রা করিলেন। ইঁহাদের অদৃষ্টে কি ঘটিয়াছিল, তাহা স্থানান্তরে বিবৃত হইবে।

বেরেলীর ৩০ মাইল দূরে বদায়ুন অবস্থিত। এডওয়ার্ডস্ সাহেব এই

স্থানের মাজিষ্ট্রেট ও কালেক্টার ছিলেন। তিনি গবর্ণর-জেনেরল বদায়ুন।

লর্ড এলেনবরা এবং লর্ড হার্ডিঞ্জের সময়ে পররাষ্ট্রবিভাগের কার্য্য করিয়াছিলেন। দেওয়ানি আদালতের ব্যবস্থায় অভদ্রেশীয়গণ কিরূপ শোচনীয় অবস্থায় পাতিত হইয়াছিল, তাহা ইঁহার অবিদিত ছিল না। এসম্বন্ধে ইঁহার মত পূর্বে উদ্ধৃত হইয়াছে। ফলতঃ ইনি স্পষ্ট বুদ্ধিতে পারিয়াছিলেন যে, দেশের লোকে গবর্ণমেন্টের প্রতি একান্ত অসন্তুষ্ট হইয়াছে, সুযোগ পাইলেই ইঁহার গবর্ণমেন্টের বিরোধী হইয়া উঠিবে। মিরাতের সংবাদ পাইয়াই ইনি আপনার স্ত্রী ও সন্তানকে নৈনীতালে পাঠাইয়া দেন। এডওয়ার্ডস্ এইরূপে একটি গুরুতর দায় হইতে মুক্ত হইয়া, আপনার কর্তব্যপালনে দৃঢ়প্রতিজ্ঞ হইয়া রহিলেন। স্বদেশের কোন ব্যক্তি এসময়ে তাঁহার নিকটে ছিলেন না। তিনি একাকী অসন্তুষ্ট, সন্ধিগ্লোকের মধ্যে অবস্থিত করিতে লাগিলেন।

২৫ মে মাজিষ্ট্রেট সাহেব সংবাদ পাইলেন যে, ঐ দিন কোন নির্দিষ্ট সময়ে মুসলমানগণ গবর্ণমেন্টের বিরুদ্ধাচরণে উদ্যত হইবে। এই সময়ে মুসলমানগণ আপনাদের প্রধান পক্ষ ইঁদের আয়োজনে প্রমত্ত ছিল। মাজিষ্ট্রেট সংবাদ পাইয়া, প্রধান প্রধান মুসলমানদিগকে ডাকাইয়া আনিলেন। যে পর্য্যন্ত নির্দিষ্ট সময় অতীত না হইল, সে পর্য্যন্ত তিনি আমন্ত্রিত মুসলমানদিগকে আপনার নিকটে রাখিয়া, শান্তিরক্ষার জন্ত পরামর্শ করিতে লাগিলেন। আমন্ত্রিত মুসলমানদিগের অনেকে সান্ত্বনয় উদ্ভেজিত হইয়া উঠিয়াছিল, অনেকে উদ্ধত-ভাব ও উগ্রপ্রকৃতির পরিচয় দিয়াছিল। মন্ত্রণাসভায় এইরূপ উদ্ভেজনা প্রযুক্ত কোলাহলে পূর্ণ হইয়াছিল। বাহাহউক, নির্দিষ্ট সময় অতীত হইল। ঐ দিনে কোনরূপ বিপ্লবের সূচনা দেখা গেল না। মুসলমানদিগের এইরূপ



উদ্বেজনা, এইরূপ উগ্রভাব, এইরূপ ঔদ্ধত্যের মধ্যে কেবল এক জন সমবেদনা-পর, সমদর্শী, সৌম্যপ্রকৃতি, শ্বেতবায় পুরুষ গুরুতর কর্তব্যপালনের জন্য দৃঢ়তা ও নির্ভীকতার পরিচয় দিতে লাগিলেন । তিনি জানিতেন যে, লোকে তাঁহাদের রাজনীতির দোষে নিরতিশয় অসন্তুষ্ট হইয়াছে । উপস্থিত সময়ে তাঁহাদের অসন্তোষ নিবারণ করা সহজ নহে । যখন ধুমায়মান বহি প্রজ্জলিত হইয়া উঠিয়াছে, তখন উহা চারি দিকেই আপনার গতি বিস্তার করিবে । এই বিপত্তির সময়ে তিনি যে, স্থানান্তর হইতে সাহায্য পাইবেন, এরূপ সম্ভাবনাও অল্প । মাজিষ্ট্রেট সাহেবের মনে এইরূপ নানা চিন্তার উদয় হইলেও, তিনি একাকী সেই বিপত্তির সময়ে কর্মক্ষেত্রে সাহসের উপর নির্ভর করিয়া রহিলেন । দুই দিন নিরাপদে অতিবাহিত হইল । দুই দিন এই সাহসী, কর্তব্যনিষ্ঠ ইংরেজ কর্মচারী উদ্বেজিত মুসলমানদিগের মধ্যে একাকী রহিলেন । তাঁহার সম-দর্শিতা ও সৎ স্বভাবের উত্তম উদ্যোগ, বা এক জন নিঃসহায় ও ত্রায়নিষ্ঠ ব্যক্তির শোণিতপাত করিলে আপনাদের বীরত্বগৌরব বিলুপ্ত হইবে বলিয়াই হউক, মুসলমানগণ তদীয় অনিষ্টসাধনে অগ্রসর হইল না । যাহা হউক, মাজিষ্ট্রেট সাহেব বিদেশে বিধর্মী ও বিদ্বিষ্ট লোকের মধ্যে পূর্ববৎ একাকী রহিলেন । বেরেলীর ৬৮ গণিত দলের কতিপয় সিপাহী তাঁহার নিকটে ছিল । কিন্তু ইহাদের উপর তাঁহার বিশ্বাস ছিল না । পুলিশের নজীবদিগের উপরেও তিনি সর্বাংশে বিশ্বাস স্থাপন করিতে পারেন নাই । তিনি ভাবিয়াছিলেন যে, বেরেলী হইতে ইঙ্গিত পাইবামাত্র তাঁহার রক্ষণীয় স্থানের লোকেও বিপ্লব ঘটাইবে ।

এইরূপ ভাবনাগ্রস্ত হইয়া, বদায়ুনের মাজিষ্ট্রেট আপনার কর্মস্থলে অবস্থিতি করিতে লাগিলেন । তৃতীয় দিনে তিনি যখন আত্মীয় স্বজনশূন্য স্থলে একাকী ভোজন করিতেছিলেন, তখন দেখিলেন, তাঁহার কোন স্বদেশীয় ব্যক্তি কতিপয় সওয়ারের সহিত তদীয় গৃহের অভিমুখে আসিতেছেন । আগন্তুক ক্রমে মাজিষ্ট্রেটের সমীপবর্তী হইলেন । মাজিষ্ট্রেট ইহাকে দেখিয়াই ছুট হইলেন । ইনি এডওয়ার্ডস্ সাহেবের আত্মীয় এবং আগরাবিভাগের অন্তর্গত ইটার মাজিষ্ট্রেট ফিলিপস্ সাহেব । ইটা বিপ্লবের হইয়াছিল । নরহত্যা, গৃহদাহ, সম্পত্তিবিলুপ্তন প্রভৃতি বিপ্লবের প্রত্যেক কাণ্ড অস্বীকৃত

হইয়াছিল। ফিলিপস্ সাহেব এই বিপ্লবে একান্ত বিব্রত হইয়া, তাঁহার আত্মীয়ের নিকটে সাহায্যের আশায় আসিয়াছিলেন। তাঁহাকে পথে ঘাটে অনেক বিপদে পড়িতে হইয়াছিল। ভিন্ন ভিন্ন স্থানের সিপাহীগণ গবর্ণমেন্টের বিরুদ্ধাচরণে সমুখিত হইয়াছিল। ইটার মাজিষ্ট্রেট এইরূপে অবলম্বনশূন্য হইয়া পড়িয়াছিলেন। কেবল কতিপয় সওয়ার তাঁহার পক্ষ সমর্থনের জন্ত প্রস্তুত ছিল। তিনি এই অবস্থায় তদীয় আত্মীয়ের সমক্ষে সমাগত হইলেন।\* এডওয়ার্ডস্ এইরূপ বিপত্তিকালে আপনার স্বদেশীয় অধিকস্ত ঘনিষ্ঠ আত্মীয়ের সমাগমে সন্তুষ্ট হইলেন বটে, কিন্তু তাঁহার অভীষ্টসিদ্ধির কোনরূপ উপায় করিতে পারিলেন না। যেখানে সিপাহীগণ গবর্ণমেন্টের বিরুদ্ধে সমুখিত হইয়াছিল, উক্ত লোকে আপনাদের জিঘাংসা ও বিলুপ্তপ্রবৃত্তির পরিচয় দিয়াছিল, সেইখানে ইউরোপীয়গণ আত্মরক্ষার জন্ত উদ্ভ্রান্ত হইয়া পড়িয়াছিলেন। স্থানান্তরে শান্তিস্থাপনের দিকে তাঁহাদের লক্ষ্য ছিল না। তাঁহারা আপনারাই আপনাদের জন্ত বিব্রত হইয়া, অপর স্থান হইতে সাহায্যপ্রাপ্তির আশা করিতেছিলেন। এসময়ে অপর স্থান হইতে সাহায্যপ্রাপ্তির তাদৃশ সম্ভাবনা ছিল না। এডওয়ার্ডস্ তাঁহার আত্মীয়কে কহিলেন যে, বেরেলী হইতে সাহায্য পাওয়ার আশা অতি অল্প। কিন্তু তিনি যখন শুনিতে পাইলেন যে, উত্তেজিত লোকে ভিল্সা নামক একটি প্রধান বাণিজ্যস্থান আক্রমণ করিবার উদ্যোগ করিতেছে, তখন সর্বিশেষ আগ্রহের সহিত বেরেলীর কমিশনারের নিকটে সাহায্য প্রার্থনা করিলেন। ৩১শে মে রাত্রি ৯টার সময় কমিশনারের নিকট হইতে উত্তর আসিল যে, একদল সিপাহী এক জন ইউরোপীয় আফিসরের তত্ত্বাবধানে মাজিষ্ট্রেটের সাহায্যের জন্ত বেরেলী হইতে যাত্রা করিতেছে। এই উত্তর পাইয়া বদায়ুন ও ইটার মাজিষ্ট্রেটদ্বয় উৎফুল্ল হইলেন।

\* পথে ফিলিপস্ সাহেবকে বিপদে পড়িতে হইয়াছিল। খাসগঞ্জ নামক স্থানে কতকগুলি উদ্ধত ও বিলুপ্তপ্রিয় লোক, কেহ কেহ বন্দুক, কেহ কেহ বা কেবল লাঠী লইয়া তাঁহাকে আক্রমণ করে। তাঁহার সমস্তিব্যাহারী সওয়ারগণের জমাদার এই সময়ে সর্বিশেষ সাহসের পরিচয় দেন। আক্রমণকারীদের মধ্যে কতিপয় ব্যক্তি নিহত হয়। কথিত আছে, ফিলিপস্ সাহেবের হস্তে তিন ব্যক্তি দেহত্যাগ করে। এইরূপে ফিলিপস্ সাহেব ঐ সকল লোককে ভাড়িত করিয়া বদায়ুনে উপস্থিত করেন।—*William Edwards, Personal adventures. p. 7.*

এডওয়ার্ডস্ সাহেব সাহায্যকারী সৈনিকদিগের অধিনায়ককে শীঘ্র আনিবার জন্ত এক জন সওয়ার পাঠাইয়াছিলেন। এদিকে রাত্রি তিনটার সময় ফিলিপস্ সাহেব ইটায় ঘাইবার সঙ্কল্প করিলেন। সুসংবাদে আশ্বস্ত হওয়াতে সেই রাত্রি তাঁহারা প্রশান্তভাবে সুশুপ্তস্থ উপভোগ করিতে লাগিলেন। কিন্তু নিশীথ কালের অব্যবহিত পরে তাঁহাদের এই শান্তিস্থলের ব্যাঘাত হইল। রাত্রি ২১টার সময়ে বদায়ুনের মাজিষ্ট্রেট সাহেব শয্যা হইতে উঠিয়া ফিলিপস্ সাহেবকে জাগাইবার জন্ত আপনার শয়নগৃহ হইতে বহির্গত হইতেছিলেন, এই সময়ে এক জন চাপরাশি সাতিশয় ব্যাকুলভাবে তাঁহার নিকটে উপস্থিত হইয়া কহিল যে, তিনি যে সওয়ারকে পাঠাইয়া দিয়াছিলেন, সে ফিরিয়া আসিয়াছে। তাঁহার নিকটে সংবাদ পাওয়া গেল যে, বেরেলীর সিপাহীরা গবর্ণমেন্টের বিরোধী হইয়া উঠিয়াছে। তদ্রত্য ইউরোপীয়গণ নিহত হইয়াছেন। কারাগারের প্রায় চারি হাজার কয়েদী মুক্তিলাভ করিয়াছে। বেরেলী হইতে বদায়ুনের দিকে প্রায় ৮ মাইল পর্য্যন্ত পথ এই সকল বিমুক্ত কয়েদীতে পরিব্যাপ্ত হইয়াছে। বেরেলীর উত্তেজিত সিপাহীদিগের একদল ধনাগার বিলুপ্তন, কারারুদ্ধদিগের বিমুক্তিসাধন এবং ইউরোপীয়দিগের নিধনের জন্ত বদায়ুনের অভিমুখে আসিতেছে।

সংবাদ পাইয়াই এডওয়ার্ডস্ সাহেব চিন্তিত হইলেন। তিনি ফিলিপস্ সাহেবকে জাগাইয়া এই নিদারুণ সমাচার জানাইলেন। ফিলিপস্ সাহেব কালবিলম্ব করিলেন না। উত্তেজিত সিপাহী ও উদ্ধতপ্রকৃতি লোককর্তৃক গম্ভব্য পথ অবরুদ্ধ হওয়ার পূর্বেই তিনি আপনার কর্মস্থলে উপনীত হইবার জন্ত অশ্বারোহণে ত্বরিতগতিতে গঙ্গার তটভিমুখে প্রস্থান করিলেন। এডওয়ার্ডস্ সাহেব গুরুতর কর্তব্যস্থলে আবদ্ধ হইয়া কর্মস্থলে রহিলেন। ফিলিপস্ সাহেব চলিয়া গেলে, দুই জন ইংরেজ নীলকর এবং অন্য এক জন ইউরোপীয় কর্মচারী এডওয়ার্ডস্ সাহেবের সহিত সম্মিলিত হইলেন। এ সময়েও এডওয়ার্ডস্ সাহেব স্থানান্তরে যাইতে ইচ্ছা করেন নাই, যেহেতু এ সময়ে তাঁহার রক্ষণীয় স্থানে বিপ্লবের কোনরূপ লক্ষণ পরিলক্ষিত হয় নাই। বদায়ুনের সৈনিকদলের এতদেশীয় অধিনায়ক তাঁহাকে এ সময়ে কহিয়াছিলেন যে, তাঁহার সৈনিকগণ শেষ সময় পর্য্যন্ত ধনাগার রক্ষা করিবে। তাহারা কখনও বেরেলীর সিপাহীদিগের

কথায় পরিচালিত হইবে না, বা তাহাদের পথানুসরণ করিয়া কোনরূপ শাস্তিভঙ্গ করিবে না। কিন্তু তাঁহার এই কথা শেষে অমূলক বলিয়া প্রতিপন্ন হইল। যে দিন এই অধিনায়ক আপনাদের কর্তব্যপরায়ণতা ও বিশ্বস্ততার পরিচয় দিতে আগ্রহ প্রকাশ করিলেন, সেই দিন সন্ধ্যাকালে ঘটনাচক্র অন্তর্দিকে আবর্তিত হইল। বেরেলীর উত্তেজিত সিপাহীগণ তাহাদের বদায়ুনস্থিত সহযোগীদিগকে ফিরিঙ্গির বিরুদ্ধে সমুথিত হইবার জন্য অনুরোধ করিয়া পাঠাইল। সুতরাং অবিলম্বে মারাত্মক কার্য্য অনুষ্ঠিত হইল। উক্ত লোকে দলবদ্ধ হইয়া, পরস্পর লুণ্ঠন করিতে লাগিল। প্রায় ৩০০ শত বিমুক্ত কয়েদী মাজিষ্ট্রেটের গৃহের চারি দিকে বিকটভাবে চীৎকার করিয়া বেড়াইতে লাগিল। বেরেলীর উত্তেজিত সিপাহীদিগের কেহ কেহ বদায়ুনে উপস্থিত হইয়া তত্রত্য সিপাহীদিগকে বিপ্লবের কার্য্যসাধনে উৎসাহিত করিতে লাগিল। সুতরাং মাজিষ্ট্রেট সাহেব উপায়ান্তর না দেখিয়া, পলায়নে উদ্বৃত্ত হইলেন। তিনি কালবিলম্ব না করিয়া, তিন জন ইউরোপীয় সঙ্গীর সহিত অশ্বারোহণে আপনার গৃহ হইতে বহির্গত হইলেন। প্রথমে মোরাদাবাদের পথে তাঁহাদের যাইবার ইচ্ছা ছিল। তাঁহারা এই উদ্দেশ্যে কিছুদূর অগ্রসর হইয়াছেন, এমন সময়ে একটি মুসলমান ভদ্রলোক কতিপয় অনুচরের সহিত তাঁহাদের নিকটে উপস্থিত হইয়া কহিলেন যে, গন্তব্য পথ উত্তেজিত সিপাহী ও কারাগারমুক্ত কয়েদীগণে পরিব্যাপ্ত হইয়াছে, অতএব এ সময়ে কোথাও না গিয়া, তাঁহার গৃহে আশ্রয়গোপন করা সঙ্গত। এই মুসলমান সর্দারের বাটী বদায়ুনের প্রায় তিন মাইল দূরবর্তী শেখপুরা নামক স্থানে ছিল। মাজিষ্ট্রেট সাহেব তাঁহার বাটীতে যাইতে সন্মত হইলেন। তিনি স্বয়ং লিখিয়া গিয়াছেন যে, তাঁহারা যখন শেখপুরার অভিমুখে প্রস্থান করেন, তখন উচ্ছৃঙ্খল লোকে বিলুণ্ঠনে প্রবৃত্ত হইয়াছিল। তাঁহার চাপরাশিরা পর্য্যন্ত তদীয় সম্পত্তি আশ্রসাৎ করিতেছিল। এডওয়ার্ডস্ সাহেব চারি দিকে এইরূপ লুণ্ঠন-তরাজ দেখিয়া স্তব্ধ হইলেন। বিশেষতঃ তদীয় অনুগত লোকের ব্যবহারদর্শনে তাঁহার সাতিশয় ক্রোধ হইল। কিন্তু এখন ক্রোধপ্রকাশের সময় ছিল না, অপরাধীদিগের শাস্তিবিধানেরও সুযোগ ছিল না। মাজিষ্ট্রেট সাহেব আপনার প্রাণের দায়ে ব্যাকুল হইয়া পড়িয়াছিলেন। সুতরাং তিনি কোন দিকে দৃকপাত না করিয়া প্রাণরক্ষার জন্য শেখপুরার অভিমুখে অগ্রসর হইতে লাগিলেন; সকলে

নির্দিষ্ট স্থলে উপস্থিত হইয়া অশ্ব হইতে নামিয়াছেন, এমন সময়ে পূর্বোক্ত শেখের ভ্রাতা আসিয়া তাঁহাদিগকে বিনয়ের সহিত কহিলেন যে, এত লোকে এই স্থানে অবস্থিতি করিলে, উত্তেজিত সিপাহীরা নিঃসন্দেহ তাঁহাদের সন্ধান পাইবে। অতএব গঙ্গার বামতটে—এই স্থান হইতে প্রায় ১৮ মাইল দূরে অগ্ৰ একটি পল্লীতে তাঁহাদের অবস্থিতি করাই শ্রেয়ঃ। বলা বাহুল্য যে, এই পল্লীও শেখদিগের অধিকারের মধ্যে ছিল। এডওয়ার্ডস সাহেব প্রথমে এই প্রস্তাবে অসম্মত হইলেন, এবং এইরূপ অনাতিথেয়তার জন্ত উপস্থিতি প্রস্তাবের বিরুদ্ধে শেখপুরার সর্দারকে অনেক বলিলেন। কিন্তু শেখপ্রধান তাঁহার কথায় বিচলিত হইলেন না। তিনি কেবল মাজিষ্ট্রেটকে আশ্রয় দিতে প্রস্তুত ছিলেন; উত্তেজিত সিপাহীদিগের ভয়ে মাজিষ্ট্রেটের সঙ্গীদিগকে আশ্রয় দিতে সন্মত হইলেন না। এদিকে সঙ্গীরা মাজিষ্ট্রেটকে ছাড়িতে একান্ত অসম্মত ছিলেন। পক্ষান্তরে তাঁহাদিগকে ছাড়িয়া দিতে মাজিষ্ট্রেটেরও ইচ্ছা ছিল না। সুতরাং মাজিষ্ট্রেট বাধ্য হইয়া সঙ্গীদিগের সহিত আবার ১৮ মাইল দূরবর্তী পূর্বোক্ত পল্লীর অভিমুখে প্রস্থান করিলেন। এখন তাঁহাকে অদৃষ্টের নিকটে মস্তক অবনত করিতে হইল। তিনি আপনার ক্ষমতা, আপনার প্রাধান্য, আপনার পদগৌরব, আপনার সম্পত্তি—সমস্ত বিষয়েই বিসর্জন দিয়া, আপনার জীবন—কেবল জীবনরক্ষার জন্ত জাতীয় পরিচ্ছদ পরিত্যাগপূর্বক হিন্দুস্থানী পরিচ্ছদ পরিয়া আত্মগোপন করিলেন। তাঁহার পরবর্তী অবস্থার বিষয় স্থানান্তরে বর্ণিত হইবে।

মাজিষ্ট্রেটের পলায়নের পর বদায়ুনে যাহা ঘটয়াছিল, তাহা সংক্ষেপে বর্ণনীয়। পূর্বেই উক্ত হইয়াছে যে, উত্তেজিত সিপাহীগণ কয়েদীদিগের অবরোধমোচন করিয়াছিল। বিমুক্ত কয়েদীগণ অপরের সম্পত্তিলুণ্ঠন ও ইউরোপীয়দিগের নিধনের আশায় চারি দিকে ঘুরিয়া বেড়াইতেছিল। উচ্ছৃঙ্খল লোকে দলবদ্ধ হইয়া, লুণ্ঠনরাজ্যে ব্যাপ্ত ছিল। গবর্ণমেন্টের ধনাগার সর্বপ্রথম ইহাদের লক্ষ্য হইয়াছিল। কিন্তু মাজিষ্ট্রেট সাহেব পূর্বেই এ বিষয়ে সাবধান হইয়াছিলেন। ভারী বিপদ বৃদ্ধিতে পারিয়া, তিনি জমীদারদিগের নিকট হইতে কিস্তির খাজানা গ্রহণ করেন নাই। সুতরাং বিলুণ্ঠনপ্রিয় লোকে এখন ধনাগারে অর্থের অল্পতা দেখিয়া, একান্ত হতাশাস হইল। কিন্তু তাহার

নানা স্থানে উৎপাত করিয়া, বেড়াইতে পরাধুখ হইল না। সমগ্র জেলা শৃঙ্খলা-শূন্য, অশান্তিময় ও ঘোরতর বিপ্লবে অরাজক হইয়া পড়িল। নিম্নশ্রেণীর প্রায় সমস্ত লোকে স্বপ্রধান হইয়া, আপনাদের ক্ষমতাবিস্তারে উচ্ছত হইল। সিপাহীরা দিল্লীতে প্রস্থান করিলেও জনসাধারণের উচ্ছৃঙ্খলভাবে ঘোরতর বিপ্লবের ভয়ঙ্কর দৃশ্য তিরোহিত হইল না। খাঁ বাহাদুরের আধিপত্য প্রকাশ-রূপে ঘোষণা করা হইল। নূতন রাজকীয় কার্যের জন্য কর্মচারীগণ নিয়োজিত হইতে লাগিল। অভিনব অধিপতির নামে রাজস্ব সংগ্রহের ব্যবস্থা হইল। সমগ্র বিভাগ মহসা যেন এক অচিন্ত্যপূর্ব শক্তিতে ইংরেজের অধিকারভ্রষ্ট হইয়া ভিন্নরূপ পরিগ্রহ করিল।

এই অবসরে খাঁ বাহাদুর খাঁ আপনার প্রাধান্য বৃদ্ধমূল করিতে লচেষ্ট হইলেন। রোহিলখণ্ডে মুসলমান অপেক্ষা হিন্দুর সংখ্যা অধিক ছিল। খাঁ বাহাদুর খাঁ সর্বপ্রথম হিন্দুদিগকে যেকোন আশ্রয়, সেইরূপ ব্রিটিশ পবর্গমেন্টের উপর বিদ্বেষ করিবার চেষ্টা করিতে লাগিলেন। তিনি এই বলিয়া ঘোষণা প্রচার করিলেন যে, যদি হিন্দুগণ এই সকল বিধর্মী কিরিস্টিয়ানগকে মিহত বা দেশ হইতে তাড়িত করে, তাহা হইলে তাহাদের দেশহিতৈষিতার পুরস্কার স্বরূপ গোহত্যার প্রথা নিবারণ করা হইবে। যদি কোন হিন্দু উপস্থিত বিষয়ে নিশ্চেষ্ট হয়, তাহা হইলে উক্ত প্রথা পুনঃপ্রবর্তিত হইবে; এবং যদি কোন হিন্দু এই ঘোষণাপত্রের বিরুদ্ধে কার্য্য করে, তাহা হইলে তাহার ছয় মাস কারাবাস ও জরিমানা হইবে। রোহিলখণ্ডের হিন্দুগণ সংখ্যায় অধিক হইলেও, মুসলমানেরা স্থায় বুদ্ধপ্রিয় বা উদ্ধতপ্রকৃতি ছিল না। ইহাদের অনেকে প্রশান্তভাবে কৃষিকার্য্যে, শিল্পকর্মে বা বাণিজ্যে লিপ্ত থাকিত। ইহাদের আচারব্যবহারে কৃষাণজনোচিত নিরীহভাবে নিদর্শন লক্ষিত হইত। কিন্তু মুসলমানগণ ইহার বিপরীত লক্ষণাক্রান্ত ছিল। ইহারা যেকোন উদ্ধত ও ভয়ঙ্করস্বভাব সেইরূপ অস্ত্রপ্রয়োগে সুদক্ষ ছিল। সুতরাং মুসলমানগণ তাদৃশ বিঘ্নবিপত্তির আশঙ্কা না করিয়া সর্বত্র আপনাদের ঘোষণাপত্র প্রচার করিল।

কিন্তু খাঁ বাহাদুর খাঁ কেবল আপনার ক্ষমতার উপর নির্ভর করিলেন না। তিনি শাসনদণ্ড গ্রহণ করিয়া, কুট রাজনীতিক ব্যক্তির স্থায় কর্মক্ষেত্রে চাতুরীর পরিচয় দিতে প্রবৃত্ত হইলেন। এ সম্বন্ধে কে সাহেব স্বপ্রণীত ইতিহাসে এই

ভাবে লিখিয়াছেন যে, তাহাদের উদ্বোধ হইয়াছিল যে, খৃষ্টানেরা হিন্দুদিগের নিকটে পূর্বোক্তরূপ প্রতিশ্রুতি করিয়া মুসলমানদিগের ক্ষমতা পর্য্যদন্ত করিবার চেষ্টা করিতে পারে, সুতরাং তাহারা হিন্দুদিগকে আপনাদের পক্ষে রাখিবার জন্ত পুনর্বার এইভাবে ঘোষণাপত্র প্রচার করিল, “যদি ইংরেজেরা হিন্দুদিগের সমক্ষে আমাদের ঞায় অঙ্গীকার করিয়া, তাহাদিগকে মুসলমানগণের বিরুদ্ধাচরণে প্রবর্তিত করিবার জন্ত উত্তেজিত করে, তাহা হইলে অভিজ্ঞ হিন্দুগণ বিবেচনা করিবেন যে, ইংরেজেরা ঐরূপ করিলে হিন্দুগণ নিঃসন্দেহে প্রতারণিত হইবে। ইংরেজেরা কখন আপনাদের প্রতিশ্রুতি রক্ষা করিবে না। তাহারা প্রতারণক ও ভণ্ড। এই সকল প্রতারণক ইংরেজগণ আমাদের স্বদেশীয়গণ দ্বারা সর্বদাই আপনাদের অভীষ্ট সাধন করিয়া লইতেছে। আপনাদের মধ্যে কাহারও উপস্থিত সুযোগ পরিত্যাগ করা উচিত নয়। এই সুযোগে আমাদের অভীষ্টকর্ম সম্পাদন করা কর্তব্য”। কে সাহেব স্বপ্রণীত ইতিহাসে এ বিষয়ে এইভাবে উল্লেখ করিয়াছেন যে, “আমাদের ইংরেজী প্রথানুসারে যে সকল ঘোষণাপত্র প্রচারিত হয়, তৎসমুদয়ের ভাব নিঃসন্দেহ এই সকল ঘোষণাপত্রে পরিগৃহীত হইয়াছে। সাধারণতঃ ইংরেজদিগের বিশ্বাস যে, ভারতবর্ষীয়গণ মিথ্যাবাদী। ভারতবর্ষীয়গণ যে, এই মিথ্যাপবাদের বিনিময়ে আমাদিগকে ঐরূপ অপবাদে দূষিত করিয়াছে, তাহাতে আমাদের অভিযোগ করিবার কোন কারণ নাই। অধিকন্তু ভারতবর্ষীয়গণ মুসলমানদিগের আধিপত্যকালে যে, কেবল কষ্ট সহ করিয়াছে, তাহা আমরা সর্বদাই তাহাদের মনে করিয়া দিয়া থাকি, এবং নির্ব্বকসহকারে বলিয়া থাকি যে, কেবল ইংরেজ গবর্ণমেন্টের স্থায়িত্বের উপরই তাহাদের যাবতীয় আশা ও সুখ নির্ভর করিতেছে। মুসলমানগণ যে, এবিষয়ে আমাদের পথানুসরণ করিয়া, হিন্দুদিগকে বলিবে যে ইংরেজদিগের নিষ্কাশন ও মুসলমানদিগের আধিপত্যরক্ষণের উপরই তাহাদের প্রকৃত মঙ্গল নির্ভর করিতেছে, তাহা স্বাভাবিক ও মার্জনীয়। আমাদিগকে বিবিধ বিষয়ে অপরাধী করা হইয়াছে। এই ভাবে ঘোষণা করা হইয়াছে যে ইংরেজেরা অগ্রাণু জাতির চিরস্থান রীতিনীতির বিলোপ করে। অনন্তর হিন্দুদিগকে বলিয়া দেওয়া হইয়াছে যে, আমরা হিন্দুবিধবার বিবাহের অনুমোদন করিয়াছি, জোর করিয়া সতীদাহপ্রথা তুলিয়া দিয়াছি; হিন্দুদিগকে উন্নতির

আশায় প্রলুব্ধ করিয়া আমাদের ধর্মে দীক্ষিত করিয়াছি ; অধিকন্তু আমরা এই নিয়ম করিয়াছি যে, যখন কোন রাজার অপুত্রকাবস্থায় দেহত্যাগ হইবে, তখন তাহার বিধবা পত্নী দত্তকপুত্র গ্রহণ করিতে পারিবে না। তদীয় যাবতীয় সম্পত্তি ব্রিটিশ গবর্ণমেন্টের অধীন হইবে। ইহাতে স্পষ্ট বোধ হইতেছে যে, রাজাদিগকে তাহাদের সম্পত্তি ও রাজ্যে বঞ্চিত করিবার জন্তই ইংরেজদিগের এই নিয়ম প্রণীত হইয়াছে। এইরূপে ইংরেজেরা নাগপুর এবং লক্ষ্মী অধিকার করিয়াছে। রাজগণ ! আপনাদের ধর্মনাশ করিবার জন্ত তাহাদের অভিসন্ধি স্পষ্ট বুঝা যাইতেছে। আপনাদের সকলেরই জানা উচিত যে, যদি এই সকল ইংরেজকে ভারতবর্ষে থাকিতে দেওয়া হয়, তাহা হইলে তাহারা আপনাদের সকলকেই নিহত করিবে। এবং আপনাদের ধর্ম নষ্ট করিয়া ফেলিবে।\* মুসলমানগণ এই ভাবে ঘোষণা করিয়া সজাতির লোককে যেমন উত্তেজিত করিয়াছিল, সেইরূপ হিন্দুদিগকে আপনাদের দলভুক্ত করিবার জন্ত যত্নশীল হইয়াছিল। অধিকন্তু তাহারা এই উদ্দেশ্যসাধনের জন্ত সকলকে এই কথা বলিয়া আশ্বাস দিয়াছিল যে, যাহারা এই কার্যে ইচ্ছাপূর্বক একটি পয়সা দিবে, তাহারা শেষ বিচারের দিন ঈশ্বরের নিকট হইতে ৭০ শত পয়সা পাইবে, এবং যাহারা এই উদ্দেশ্যে এক টাকা দিবে, তাহারা ঈশ্বরের নিকট হইতে ৭০০ সাত শত টাকা লাভ করিবে।† পূর্বোক্ত ইংরেজ ঐতিহাসিক এই ঘোষণাপত্রসম্বন্ধে উল্লেখ করিয়াছেন যে, অভিনব শাসনকর্তার আধিপত্যকালে অর্থাভাব ঘটয়াছিল, ধনাগারে টাকা মৌজুদ ছিল না, সুতরাং এ জন্ত ঈশ্বরের হস্ত হইতে শেষ পুরস্কারপ্রাপ্তির আশা দিয়া সাধারণকে অর্থদানের জন্ত উৎসাহিত করা হইয়াছিল। কিন্তু ইহাতে অভীষ্ট ফললাভ হইয়াছিল কি না, তদ্বিষয়ে সন্দেহ আছে। যে হেতু, সাধারণে ইহাতে সবিশেষ উৎসাহিত হইয়া উঠে নাই। ধনাগারে আশামুরূপ অর্থ সংগৃহীত হয় নাই। বাহা হউক, প্রতিদিন, প্রতিসপ্তাহ, প্রতিমাস, রোহিলখণ্ডে অভিনব শাসনপ্রণালীর অনুসারে কার্যনির্বাহ হইতে লাগিল। ইংরেজদের মধ্যে যাহারা জীবিত ছিলেন,

\* Kaye, Sepoy War, Vol. III. p. 289-91.

† Ibid, p. 291. কথিত আছে, এই ঘোষণাপত্র খাঁ বাহাদুর খাঁর দ্বারা পাওয়া যায়। মোরাদাবাদের জজ উইলসন সাহেব উহার অনুবাদ করেন।



তাহারা ছদ্মবেশে এখানে ওখানে লুকায়িতভাবে থাকিয়া, এতদেশীয়দিগের অসীম করুণার আশ্রয়লাভ করিতে লাগিলেন ।

ইহার মধ্যে ফরকাবাদে ভয়ঙ্কর কাণ্ড ঘটিল । ফরকাবাদ আগরাবিভাগের

অন্তর্গত । জাহ্নবীর জলপ্রবাহ এই জনপদকে রোহিলখণ্ড হইতে ফরকাবাদ ।

বিযুক্ত করিতেছে । কিন্তু ভৌগোলিক সীমা অনুসারে ইহা রোহিলখণ্ডের অন্তর্ভুক্ত এবং রাজ্যশাসনসংক্রান্ত বিভাগ অনুসারে ইহা রোহিলখণ্ডের অধীন না হইলেও, সামাজিক বিষয়ে ইহা রোহিলখণ্ডেরই অনুরূপ ছিল । রোহিলখণ্ডের গ্রাম ফরকাবাদ মুসলমানপ্রধান স্থান বলিয়া পরিগণিত হইত, রোহিলখণ্ডের মুসলমানদিগের গ্রাম ফরকাবাদের মুসলমানদিগের ক্রমতাও অধিকতর ছিল, এবং রোহিলখণ্ডের গ্রাম ফরকাবাদেও মুসলমানগণ সর্বদা আপনাদের উদ্ধতভাবে পরিচয় দিত । যখন ইংরেজের আধিপত্যের স্বত্রপাত হয়, তখন এই জনপদ সাতিশয় উচ্ছৃঙ্খল ও গোলযোগপূর্ণ ছিল । চুরি, ডাকাতি ও সময়ে সময়ে নরহত্যাও হইত । ইংরেজের আধিপত্য বন্ধমূল হইলে, এই সকল উপদ্রব নিরাকৃত হয় । কিন্তু অধিবাসীদিগের প্রকৃতি পরিবর্তিত হয় নাই । উক্ত মুসলমানগণ স্বপ্রধানভাবে কার্য করিতে ভালবাসিত । সুতরাং তাহারা খেতকারের প্রতি সম্বন্ধ ছিল না । স্বদেশ হইতে খেতকারদিগকে নিষ্কাশিত করিতে তাহাদের আগ্রহ পরিস্ফুট হইত । তাহারা আপনাদের অভীষ্টসাধনের জন্য সুসময়ের প্রতীক্ষায় ছিল । এখন সেই সুসময় উপস্থিত হইল । যে মাস শেষ হইবার পূর্বেই সমগ্র বিভাগ ভয়ঙ্কর বিপ্লবে বিশৃঙ্খল হইয়া পড়িল । ফরকাবাদে প্রাচীন নবাববংশের অনেক লোক ছিল । সময়ের পরিবর্তনে ইঁহাদের দুরবস্থা ঘটয়াছিল । কিন্তু দুরবস্থায় পতিত হইলেও, বিগত সম্মান, সমৃদ্ধি ও বংশগৌরবের বিষয় ইঁহাদের স্মৃতিপট হইতে অপসারিত হয় নাই । ইঁহারা কুলমর্যাদায় একরূপ আত্মহারা ছিলেন যে, কোন কর্মে নিয়োজিত হইয়া পরিশ্রম করিতে ইচ্ছা করিতেন না, এবং একরূপ দরিদ্র ছিলেন যে, কিছুতেই ইঁহাদের সম্ভ্রামলাভ হইত না । এই সকল নিশ্চেষ্ট, নিরবলম্ব ও সর্বাংশে নিষ্কর্ম্য লোক আপনাদের অভীষ্টসিদ্ধির আশায় শাস্তি ও শৃঙ্খলা নষ্ট করিতে উদ্যত হয় । ফরকাবাদে ১০ সংখ্যক সিপাহীদল অবস্থিতি করিতেছিল । ইঁহারা সর্বপ্রথম সর্গমেণ্টের বিরুদ্ধে সমুখিত হয়

নাই। জুন মাসের প্রথম সপ্তাহে যখন উক্ত পরস্বাপহারিগণ পল্লী সকল দখল করিতেছিল, এবং সর্বত্র লুণ্ঠরাজে ব্যাপ্ত ছিল, তখন সিপাহীরা ইংরেজের বিরুদ্ধে অস্ত্রধারণ করে নাই। সিপাহীদিগের বিরুদ্ধাচরণের এক মাস পূর্বে উক্ত ও অশান্তপ্রকৃতি লোকে বিপ্লব ঘটাইয়াছিল।

যেখানে বহুসংখ্যক অসংসাহসী ও ছবৃত্ত লোকের অধিবাস, সেখানে সামান্ত সূত্রেই সাতিশর গোলযোগ ঘটে। গোলযোগের সূত্রপাত হইলেই দৌরাখ্যগ্রিয় লোকে আপনাদের করনাবলে নানাবিধ অলীক বিষয়ের প্রচার পূর্বক পার্শ্ববর্তী অধিবাসীদিগকে উত্তেজিত করিতে থাকে। যাহারা অপরের অর্থে আপনাদের উদ্ধাম ভোগলালসার তৃপ্তিসাধনে ইচ্ছা করে, পূর্বতন বিবেচনাব বশতঃই হউক, জিঘাংসার পরিতৃপ্তির জন্তই হউক, বা আপনাদের স্বার্থসিদ্ধির জন্তই হউক, সমস্ত বিষয় উচ্ছৃঙ্খল ও সমগ্র জনপদ উপভ্রময় করে, নানারূপ অলীক ও অদ্ভুত কথায় লোকের মন বিচলিত করাই তাহাদের প্রথম ও প্রধান কর্তব্যের মধ্যে পরিগণিত হয়। করকাবাদ এইরূপ ছন্দ্রিত্র ও ছন্দ্রস্বসাধনে কৃতহস্ত লোকের করনার লীলাক্ষেত্র হইয়াছিল। ১৮৫৭ অব্দের প্রারম্ভে এই বিভাগের অধিবাসীদিগের মধ্যে সাতিশর উত্তেজনার সঞ্চার হয়, এবং এই বিভাগে নিরতিশর অদ্ভুত জনরব প্রচারিত হইতে থাকে। অশিক্ষিত, অদূরদর্শী ও সর্বদা কোতূহলপর মানব সাধারণকে আতঙ্ক-গ্রস্ত করিবার জন্ত আপনাদের করনায় যতদূর বিশ্বয়কর বিষয়ের অবতারণা করিতে পারে, করকাবাদে ততদূর বিশ্বয়জনক কিংবদন্তীর প্রচার হইয়াছিল। সিপাহীবৃদ্ধের প্রারম্ভে বাজারে, পল্লীতে, সাধারণের সম্মিলনস্থানে প্রথমেই গুজব উঠিয়াছিল যে, কিরিজিগণ সাধারণের জাতিনাশ ও ধর্মনাশ করিবার জন্ত লোকের প্রধান খাদ্য ময়দার সহিত অস্থিচূর্ণ মিশাইয়া দিয়াছে, এবং প্রধান পানীয় কুপোদক গোরু ও শূকরের মাংসে অপবিত্র করিয়াছে। এই অপবিত্র খাদ্য ও পানীয়ের কথা করকাবাদের ছন্দ্রাচার লোকের অভীষ্টসিদ্ধির পক্ষে যেরূপ কার্যকর হইয়াছিল, সমগ্র দেশের অত্র কোন স্থানে সেইরূপ হয় নাই। অধিকন্তু করকাবাদে ইহার উপর আর একটি অদ্ভুত জনরবের প্রচার হইয়াছিল। সাধারণের বিশ্বাস জন্মিয়াছিল যে, ইংরেজ গবর্ণমেন্ট রূপায় হলকরা চন্দ্রাচার টাকা বাহির করিয়াছেন। ওয়েলার-

নামক এক জন ইঞ্জিনিয়ার মার্চ মাসে ফতেগড়ে ছিলেন । এক জন মহাজন অস্থিচূর্ণমিশ্রিত ময়দা এবং ভারতবর্ষীয়দিগের জাতিনাশ সম্বন্ধে ইংরেজদিগের অগ্ন্যাগ্ন কুঅভিসন্ধির বিষয় জানিবার জন্ত তাঁহার নিকটে গমন করেন । ইঞ্জিনিয়ার সাহেব তাঁহাকে স্পষ্টাক্ষরে কহেন যে, এই সকল জনরব নিতান্ত অমূলক । কিন্তু ইহাতে মহাজনের বিশ্বাস হয় নাই । তিনি ইঞ্জিনিয়ার সাহেবকে দৃঢ়তার সহিত কহেন—“আপনি জানেন যে, গবর্ণমেন্ট চামড়ার টাকা বাহির করিয়াছেন এবং দেশের সমস্ত রূপা সংগ্রহ করিয়া লইবার সঙ্কল্প করিতেছেন” । ওয়েলার সাহেব এই কথায় উচ্ছ্বাস করিয়া উঠেন, কিন্তু মহাজন ঘাড় নাড়িয়া কহেন যে, তিনি এই টাকা নিজে দেখিয়াছেন, এবং এইরূপ কতকগুলি টাকা তাঁহার নিকটেও আছে । মহাজনের এই কথা শুনিয়া ইঞ্জিনিয়ার সাহেব কহেন—“আপনি উহা যত পারেন আনিয়া দিন । উহার প্রত্যেকটির জন্ত আমি আপনাকে চৌদ্দ আনা করিয়া দিব ।” মহাজন বিদায় লইয়া চলিয়া গেলেন । কিন্তু আর ফিরিয়া আসিলেন না । চামড়ার টাকা ইঞ্জিনিয়ার সাহেবের দৃষ্টিগোচর হইল না\* । এই জনরবের মূল নির্ণীত হয় নাই । ইহা যে বিপ্লবপ্রয়াসী লোকের অপূর্ব কল্পনায় উৎপন্ন হইয়াছিল, তদ্বিষয়ে সন্দেহ নাই । জনরবের মূল যাহাই হউক না কেন, কিন্তু ইহাতে উদ্ভাবনাকারীর কল্পনাচাতুরীর প্রশংসা করিতে হয় । লোকে এইরূপ জনরব প্রচার করিয়া বাণিজ্যসংক্রান্ত বিষয়ে ব্যাঘাত জন্মাইবার চেষ্টা করিয়াছিল । ইহাতে মহাজনগণ ঘেঁরুপ ভীত হইয়াছিল, সাধারণ লোকেও সেইরূপ অপবিত্র দ্রব্যের ব্যবহারের আশঙ্কায় নিতান্ত অস্থির হইয়া উঠিয়াছিল ।

আগরা বিভাগের অন্তর্গত আর একটি প্রধান নগরে এই সময় মহাবিপ্লবের পূর্ণ বিকাশ হয় । এই নগর শাজাহানপুরের ২৫ মাইল দূরে গঙ্গার দক্ষিণ-তটে অবস্থিত । ইহার ৬ মাইল দূরে পাঠাননবাবদিগের বাসস্থান ফরক্কাবাদ রহিয়াছে । পূর্বে উক্ত হইয়াছে যে, ফরক্কাবাদের পাঠানগণ সাতিশয় উদ্ধত ও অশান্ত ছিল । ইহাদের উদ্ধততা ও অশান্ত্য প্রবল হওয়াতে পার্শ্ববর্তী নগরে ভয়াবহ কাণ্ড সজ্জাটিত হয় ।

\* *Kaye, Sepoy War, Vol. III. p. 293.*

ফতেগড় জেলায় দশ লক্ষের অধিক লোকের অধিবাস ছিল। ইহার

দশ ভাগের এক ভাগ মুসলমান। এই মুসলমানগণই প্রধানতঃ  
ফতেগড় ।

ব্রিটিশ গবর্ণমেন্টের বিপত্তির কারণ হয়। এই নগর কামানের  
গাড়ীর কারখানার জন্ম প্রসিদ্ধ। গোলন্দাজ দলের এক জন ইংরেজ সৈনিক  
পুরুষ উপস্থিত সময়ে এই কারখানার তত্ত্বাবধায়ক ছিলেন। ১০ সংখ্যক  
সিপাহীদল এবং একদল গোলন্দাজ সৈন্য ফতেগড়ে অবস্থিতি করিতেছিল।  
কর্ণেল স্মিথ পদাতিকদলের অধিনায়ক ছিলেন। কর্ণেল স্মিথের বিশ্বাস ছিল যে,  
তাঁহার সৈনিকদল জাতিভ্রষ্ট হইয়া অপরাপর সিপাহীদলের নিকটে অবজ্ঞাত  
রহিয়াছে। যেহেতু তাহারা ব্রহ্মদেশের যুদ্ধে যাইবার জন্ম “কালাপানি” পার  
হইয়াছিল। আপনাদের সমাজের রীতিবিরুদ্ধ কার্য্য করাতে ইহারা সকল  
বিষয়ই অপরাপর সিপাহীগণ হইতে বিচ্ছিন্ন থাকিবে। কিন্তু অধিনায়কের  
এইরূপ বিশ্বাস শেষে অমূলক বলিয়া প্রতিপন্ন হয়। এ সময়ে আচারগত  
কোনরূপ পার্থক্য, কোনরূপ বৈষম্য, কোন মতভেদ, পরস্পরকে বিচ্ছিন্ন-  
ভাবে রাখিতে পারে নাই। কোন অচিন্ত্যপূর্ব হেতু যেন সমস্ত পার্থক্য-  
বন্ধনের উচ্ছেদ করিয়া সকলকে এক উদ্দেশ্য সাধনের জন্ম এক মহাক্ষেত্রে  
সন্নিবেশিত করিয়াছিল। তাহারা জাতিগত, আচারগত ও ধর্ম্মানুশাসনগত  
বৈষম্য দেখিয়া সিপাহীদিগকে পরস্পর বিচ্ছিন্ন ভাবিয়াছিলেন, তাহারা এই  
বিচ্ছিন্ন সম্প্রদায়কে এক মহাক্ষেত্রে এক মহাদলে পরিণত দেখিয়া বিস্মিত  
হয়েন, এবং যে বিচ্ছিন্নভাবের উপর নির্ভর করিয়া তাহারা আশঙ্কিত হইয়া  
ছিলেন, তাহা এই অভাবনীয় কারণে পরস্পর সংযোজিত হইয়া, তাহাদিগকে  
গভীর বিপত্তিসাগরে নিমজ্জিত করে।

১০ই মে মিরাতের ঘটনা ফতেগড়ের সিপাহীদিগের গোচর হয়। এই  
সংবাদ যেন ভাঙিতবেগে তাহাদের হৃদয়ে প্রবেশ করে। তাহারা সে সময়ে  
উত্তেজিত হইয়া উঠিলেও বাহিরে উত্তেজনার কোনরূপ নিদর্শন দেখায় নাই।  
সে মাস এইরূপে অতিবাহিত হয়, ৩রা জুন তাহারা বেরেলী ও শাজাহানপুরের  
সংবাদ অবগত হয়। এই সংবাদে তাহাদের হৃদয় ক্রমে অস্থির হইতে থাকে।  
এদিকে তাহাদের অধিনায়ক দেখিলেন যে, সমগ্র অযোধ্যা বিপ্লবে বিশৃঙ্খল  
হইয়াছে। রোহিলখণ্ড বিপ্লবের রঙ্গভূমি হইয়া উঠিয়াছে, সুতরাং করকা-

বাদের আশা কোথায় ? এ সময়ে নিশ্চেষ্টভাবে থাকা কোনরূপে বিধেয় নহে । এইরূপ জাবিয়া কর্ণেল স্মিথ মহিলা, বালকবালিকা এবং যুদ্ধে অসমর্থ লোকদিগকে নৌকায় করিয়া, কানপুরের প্রধান সৈনিকনিবাসে পাঠাইবার ইচ্ছা করিলেন । জানা গিয়াছিল যে, কানপুরের সৈনিকনিবাস নিরাপদ রহিয়াছে । ঐ স্থানে ইউরোপীয় সৈনিকগণ উপস্থিত হইয়াছে এবং আরও অধিকসংখ্যক ইউরোপীয় সৈনিকপুরুষ ঐ স্থলে আনীতেছে । সুতরাং কর্ণেল স্মিথ অবিলম্বে আপনার সঙ্কল্প কার্যে পরিণত করিতে উদ্যত হইলেন । ছোট বড় বিভিন্ন রকমের বার তের খানি নৌকা প্রস্তুত হইল । অধিনায়ক রক্ষণীয় লোকদিগকে ঐ সকল নৌকা দ্বারা স্থানান্তরিত করিবার বন্দোবস্ত করিলেন । ৪ঠা জুন রাত্রি ১টার সময় ১৭০ জন নৌকায় আরোহণ করিলেন । গভীর নিশীথে—গাঢ় অন্ধকারের মধ্যে বালকবালিকা ও যুদ্ধানভিজ্ঞ নিরীহ জীব আপনাদের জীবনের জন্ত নিরাপদ স্থানে আশ্রয়লাভের আশায় বিপত্তিময় ফতেগড় পরিত্যাগ করিল ।

এদিকে ফতেগড়ের সিপাহীগণ আপাততঃ নীরবে ও নিশ্চেষ্টভাবে রহিল । কিন্তু সকল দিক দেখিয়া, তাহাদের অধিনায়ক এইরূপ নিশ্চেষ্টভাবে অসাবধান বা যথোচিত কর্তব্যসাধনে উদাসীন রহিলেন না । তিনি বুঝিয়াছিলেন যে, মুহূর্তমধ্যেই সৈনিকদিগের প্রশান্তভাব অন্তর্হিত হইতে পারে । মুহূর্তমধ্যেই তাহারা ঔদাস্ত পরিত্যাগ করিয়া, সংহারিণীশক্তির পরিচয় দিতে পারে । যে দিন নৌকাগুলি পলাতকদিগকে লইয়া ফতেপুর পরিত্যাগ করে, সেই দিন কর্ণেল স্মিথ গবর্ণমেন্টের টাকা ছুর্গে লইয়া যাইবার চেষ্টা করেন । কিন্তু সিপাহীগণ বাধা দেওয়াতে এই কার্য সম্পন্ন হয় নাই । পক্ষান্তরে এই সকল সিপাহী বাহিরে আপনাদের সৌজন্ত ও বিশ্বস্তভাব প্রকাশ করে । ১৬ই জুন তাহারা আপনাদের অধিনায়কের হস্তে একখানি পত্র সমর্পণ করে । এই পত্র অযোধ্যার অন্তর্গত সীতাপুর নামক স্থানের ৪১ সংখ্যক সিপাহীদলের সুবাদার তাহাদিগের নিকটে পাঠাইয়াছিলেন । সুবাদার এই পত্রে উল্লেখ করিয়াছিলেন যে, তিনি এবং তাহার সৈনিকদল কোম্পানির অধীনতার উচ্ছেদ করিয়া, ফতেগড়ের কয়েক মাইল দূরে আসিয়াছেন । এখন ১০সংখ্যক সিপাহীদল ঘেন আফিসরদিগকে নিহত ও ধনাগারের অর্থ হস্তগত করিয়া,

তাহাদের সহিত সন্মিলিত হয় । ১০ সংখ্যক সিপাহীদলের যে অফিসার এই পত্রের বিষয় কর্ণেল স্মিথের গোচর করেন, তিনি উক্ত ইংরেজ অধিনায়ককে স্পষ্টভাবে কহেন, উপস্থিত পত্রের উত্তর এই ভাবে দেওয়া হইয়াছে যে, তাহারা বহু বৎসর কোম্পানির কার্য্য করিয়াছে, এখন বিশ্বাসঘাতক হইতে পারে না । ৪১ সংখ্যক সিপাহীরা যদি অগ্রসর হয়, তাহা হইলে তাহারা সদলে তাহাদের বিরুদ্ধে দণ্ডায়মান হইবে । ইহার পরক্ষণে কর্ণেল স্মিথ গঙ্গার নৌসেতু ভাঙ্গিয়া ফেলিতে উত্তত হইলেন, এই সেতু দ্বারা অযোধ্যার সহিত ফতেগড়ের সংযোগ ছিল । অযোধ্যা উত্তেজিত সিপাহীদলে পরিপূর্ণ ছিল । সুতরাং ঐ প্রদেশ হইতে ফতেগড়ের গন্তব্য পথ অবরুদ্ধ করাই সম্ভব বোধ হইয়াছিল । কর্ণেল স্মিথ যখন অযোধ্যার সহিত ফতেগড়ের সংযোগের প্রধান অবলম্বন নৌসেতুর ধ্বংসসাধনে উত্তত হইলেন, তখন তদীয় সিপাহীদল তাঁহার যথোচিত সাহায্য করে । কিন্তু জুন মাসের দ্বিতীয় সপ্তাহ অতীত হইলেই সমস্ত আশা অন্তর্হিত হয় । মহাবিপ্লবসাগরের প্রবল তরঙ্গ ক্রমে ফতেগড়ের নিকটবর্তী হইতে থাকে । ১০ সংখ্যক সিপাহীদল এই তরঙ্গের গতিরোধ করা অসম্ভব মনে করিয়া উহার সহিত মিশিয়া যায় । নৌসেতুর ধ্বংস হইলেই উক্ত সিপাহীদলের এতদেশীয় অফিসারগণ কর্ণেল স্মিথকে কহেন যে, সময় অতীত হইয়াছে, এখন তাঁহার এবং তদীয় অধীন লোকের ছুর্গে আশ্রয় গ্রহণ করাই শ্রেয়ঃ ।

সিপাহীগণ যখন স্পষ্টভাবে আপনাদের মনোগত কথা বলিল, তখন কর্ণেল স্মিথ আর কোন দিকে দৃকপাত না করিয়া, আপনার অধীন লোকের সহিত ছুর্গে আশ্রয় গ্রহণ করিলেন । তিনি ভাবিলেন যে, তাঁহাকে এই ছুর্গে থাকিয়াই বহুসংখ্যক লোকের আক্রমণ হইতে আত্মরক্ষা করিতে হইবে ; কিন্তু ছুর্গ দৃঢ় ছিল না । যথোপযুক্ত অস্ত্রাদি যথাস্থানে সন্নিবেশিত ছিল না । খাণ্ডসামগ্রীও পর্যাপ্তপরিমাণে সংগৃহীত ছিল না । বহুকষ্টে ১১ সংখ্যক দলের এক জন সিপাহীর সাহায্যে চল্লিশ, পঞ্চাশটি মেঘ ছুর্গপ্রাচীরের অভ্যন্তরে লইয়া যাওয়া হইল । এক শত কুড়ি জন খ্রীষ্টান ছুর্গে আশ্রয় গ্রহণ করিয়াছিল । ইহাদের মধ্যে এক চতুর্থাংশ অস্ত্রধারণে সমর্থ ছিল । অবশিষ্ট প্রধানতঃ মহিলা ও বালকবালিকা । কর্ণেল স্মিথ অস্ত্রধারণে সমর্থ লোকদিগকে যথাস্থানে সন্নিবেশিত করিয়া, আত্মরক্ষায় উত্তত হইলেন ।

ছুর্গস্থিত ইংরেজ অধিনায়ক যখন এইরূপে লোকের সম্মিলন, খাণ্ডের আয়োজন ও অস্ত্রাদির সংগ্রহে ব্যাপৃত ছিলেন, তখন ১০ সংখ্যক সিপাহীদল প্রকাশ্যভাবে গবর্নমেন্টের বিরোধী হইয়া উঠিল। ফরক্বাদের নবাব তফুজুল হোসেন খাঁ পূর্বেই গবর্নমেন্টের বিরুদ্ধপক্ষ অবলম্বন করিয়াছিলেন, এখন ১০ সংখ্যক দলের সিপাহীগণ তাঁহার অনুবর্তী হইল। তাহারা সম্মানসূচক তোপধ্বনি করিয়া নবাবকে সিংহাসনে প্রতিষ্ঠিত করিল। তাহারা আপনাদের দল পরিপুষ্টির জন্ত কারাগারের কয়েদীদিগকে ছাড়িয়া দিল। তাহারা উদ্দাম লালসার তৃপ্তির জন্ত ধনাগারের অর্থরাশি আপনাদের অধিকারে রাখিল। পঞ্জাবকেশরী মহারাজ রণজিৎ সিংহের পুত্র মহারাজ দলীপ সিংহের মণিমুক্তা ও অন্যান্য বহুমূল্য দ্রব্য এই স্থানে ছিল। উহাও তাহাদের অধিকৃত হইল। এইরূপে তাহাদের অভীষ্ট সিদ্ধ হইল। তাহারা নবাবের প্রাধান্য ঘোষণা করিল বটে, কিন্তু ধনাগারের একটি টাকাও নবাবকে দিতে সম্মত হইল না। এদিকে সীতাপুরের ৪১ সংখ্যক সিপাহীদল নৌকায় গঙ্গা পার হইয়া, ফরক্বাদের উপস্থিত হইল। ১০ সংখ্যক দলের সিপাহীগণ ইহাদিগকে আপনাদের অধিকৃত অর্থের অংশ দিতে সম্মত হইল না। ৪১ সংখ্যক দলের সিপাহীরা এজন্ত ক্রুদ্ধ হইয়া উঠিল, এবং ইউরোপীয় অফিসারদিগকে অক্ষতশরীরে ছাড়িয়া দিয়াছে বলিয়া, তাহাদিগকে যথোচিত ভৎসনা করিল। কিন্তু ১০ সংখ্যক দলের সিপাহীগণ এই তিরস্কারবাক্যে কর্ণপাত করিল না। তাহারা অর্থের লালসায় অধিনায়কদিগের বিরুদ্ধাচরণে প্রবৃত্ত হইয়াছিল। এখন অর্থলাভের সহিত তাহাদের আকাঙ্ক্ষার পরিতৃপ্তি হইয়াছিল। তাহারা ইউরোপীয়দিগের শোণিতপাতে আগ্রহ প্রকাশ করিল না, অধিনায়কদিগকে আক্রমণ করিতেও তাহাদের প্রবৃত্তি হইল না। ইউরোপীয়দিগের দ্রব্যাদি লুণ্ঠন বা ইউরোপীয়দিগের গৃহসমূহের ভস্মীকরণেও তাহারা দলবদ্ধ হইয়া উঠিল না। তাহারা টাকার জন্ত ধনাগার আপনাদের অধিকারে রাখিয়াছিল, এখন টাকা পাইয়া অনেকে সন্তুষ্টচিত্তে আপনাদের গৃহাভিমুখে প্রস্থান করিল। তাহারা রছিল, তাহাদের সহিত ঘটনাক্রমে কাওয়ারাজের ক্ষেত্রে ৪১ সংখ্যক দলের সিপাহীদিগের যুদ্ধ ঘটিল। এই যুদ্ধে উভয়পক্ষের কতিপয় ব্যক্তি নিহত হইল। ১০ সংখ্যক দলের হতাবশিষ্ট সিপাহীগণ অতঃপর উপায়ান্তর না দেখিয়া,

৪১ সংখ্যক দলের মতানুবর্তী হইল। এইরূপে উভয় দলের সিপাহীরা সম্মিলিত হইয়া, ইংরেজদিগের আশ্রয়ভূগ আক্রমণের জন্য শুভকর দিন নির্ধারণ করিতে লাগিল। তাহাদের মতে ২৫শে জুন সর্বাংশে শুভজনক দিন বলিয়া নির্ধারিত হইল। তাহারা ঐ দিনে ইংরেজদিগের ভূগ আক্রমণে কৃতসঙ্কল্প হইল।

ফরক্বাদে এখন ৪১ সংখ্যক দলেরই প্রাধান্য হইল। নবাব ইহাদের পরিপোষক হইলেন। তিনি ইহাদের বলবৃদ্ধির জন্য খাণ্ডসামগ্রীর আয়োজন করিয়া দিতে লাগিলেন, ইহাদের উৎসাহবৃদ্ধির জন্য অস্ত্রশস্ত্রসংগ্রহে ব্যাপৃত হইলেন, ইহাদের শৃঙ্খলারক্ষার জন্য যথোপযুক্ত আদেশ প্রচার করিতে লাগিলেন। এইরূপে নবাবের ক্ষমতায় যাহা হইতে পারে, তৎসমুদয়ই সম্পন্ন হইল। কিন্তু সিপাহীরা ভূগ আক্রমণে উত্তত হইল না। তাহারা নির্দিষ্ট শুভকর দিনের প্রতীক্ষায় রহিল। এইরূপ বিলম্ব ভূগস্থিত ইংরেজদিগের স্বকার্যসাধনের অনুকূল হইল। ইংরেজেরা এই সুযোগে আত্মরক্ষার জন্য যাহা কিছু হইতে পারে, তাহা সম্পন্ন করিলেন।

ক্রমে নির্দিষ্ট দিন সমাগত হইল। সিপাহীরা আপনাদের এই শুভকর দিনে, যে সব ল কুলি ভূগের সংস্কারকার্যে নিয়োজিত ছিল, তাহাদের উপর গুলিবৃষ্টি করিল। পরদিন প্রত্যুষে সিপাহীদিগের দুইটি কামান হইতে গোলা-বর্ষণ হইতে লাগিল। কিন্তু ইহাতে কোন ফল না হওয়াতে কামানের গোলা-বৃষ্টি বন্ধ করা হইল। পর দিন প্রাতঃকালে আক্রমণকারিগণ মই দ্বারা ভূগে উঠিবার চেষ্টা করিল। কিন্তু তাহারা মই ভূগপ্রাচীরের যথাস্থানে সন্নিবেশিত করিতে সমর্থ হইল না। তৎপরদিনেও তাহারা এইরূপ চেষ্টা করিল। কিন্তু কিছুতেই তাহাদের চেষ্টা ফলবতী হইল না। এদিকে ভূগস্থিত ইউরোপীয়-দিগের কামান ও বন্দুকে তাহারা যার পর নাই ক্ষতিগ্রস্ত হইল। পঞ্চম দিনে তাহারা আপনাদের কার্যপ্রণালীর পরিবর্তন করিল। ভিন্ন ভিন্ন উপায় ব্যর্থ হইল দেখিয়া, তাহারা অভিনব উপায়ের উদ্ভাবন করিল। ভূগের সন্নিকটে হোসেনপুর নামক একটি পল্লী ছিল। এই পল্লীস্থিত গৃহের ছাদের উপর উঠিলে ভূগের অভ্যন্তরভাগের একাংশ ভালরূপে দেখা যাইত। সিপাহীগণ পঞ্চম দিনে এই সকল গৃহের ছাদের উপর উঠিয়া লক্ষ্য নির্দেশপূর্বক গুলি চালাইতে লাগিল। ইহাতে তাহাদের নিকৃষ্ট গুলি সর্বেশ কার্যকর হইয়া



উঠিল। এই সময়ে তাহাদের দলের কতকগুলি লোক দুর্গের প্রায় ৭ গজ দূরবর্তী একটি ক্ষুদ্র গৃহ অধিকার করিল। এই স্থান হইতে তাহারা দুর্গ-প্রাচীরের সম্মুখে আসিল এবং উক্ত প্রাচীরে ছিদ্র করিয়া দুর্গস্থিত গোলন্দাজ-দিগের উপর গুলি চালাইতে লাগাইল। গোলন্দাজগণ তাহাদের গুলিবৃষ্টিতে একান্ত বিব্রত ও বিশৃঙ্খল হইয়া পড়িল। তাহাদের কামান অকর্মণ্য হইয়া গেল। পরে আক্রমণকারিগণ কুল্যাখননে প্রবৃত্ত হইল। কুল্যা ফুটিয়া উঠাতে সমগ্র দুর্গ কম্পিত হইল এবং উহার বহিঃপ্রাচীরের ৫৬ গজপরিমিত অংশ উড়িয়া গেল। সিপাহীরা অতঃপর দলবদ্ধ হইয়া দুই বার দুর্গ আক্রমণ ও অধিকার করিবার চেষ্টা করিল, কিন্তু কৃতকার্য হইতে পারিল না। দুর্গস্থিত ইংরেজদিগের মধ্যে তাহারা আক্রমণকারীদিগের কার্যপর্যবেক্ষণে নিয়োজিত ছিলেন, তাহাদের এক জন সিপাহীদিগকে দুর্গের ভগ্নস্থানের নিম্নে সমবেত দেখিয়া গুলি চালাইতে থাকেন। এই সময়ে দুর্গস্থিত এক জন ইংরেজ যাজকের নিক্ষিপ্ত গুলির আঘাতে দুর্গাক্রমণকারীদিগের অধিনায়ক নিহত হয়। ইহার নাম মুলতান খাঁ। এই ব্যক্তি প্রথমে বদায়ুনের মাজিষ্ট্রেট এডওয়ার্ডস্ সাহেবের পলায়নসময়ে তাঁহার সহচর ছিল। কিন্তু ইহাতেও আক্রমণকারিগণ ভগ্নোৎসাহ হয় নাই। তাহারা পুনর্বার গুলিবৃষ্টি করিতে প্রবৃত্ত হয়, এবং পুনর্বার কুল্যাখননের আয়োজন করে।

এদিকে দুর্গস্থিত ইউরোপীয়গণ বিশিষ্ট সাহস ও পরাক্রমের সহিত আত্ম-রক্ষা করিতে থাকেন। তাঁহারা সংখ্যায় কম হইলেও হতাশাস হইয়েন নাই, অস্ত্রাদি পর্যাপ্তপরিমাণে না থাকিলেও আত্মসমর্পণের ইচ্ছা করেন নাই। বালকবালিকা, কুলমহিলাগণ নিকটে থাকিলেও অর্ধৈর্ষ্য হইয়া সাহসিক কার্য-সাধনে উদাসীন থাকেন নাই। দিনের পর রাত্রি আসিয়াছে। প্রতিদিন প্রতি রাত্রিতেই তাহারা সমান উত্তম, সমান উৎসাহ, সমান পরিশ্রমের সহিত কামানের পার্শ্বে থাকিয়া, সিপাহীদিগের আক্রমণ নিরস্ত করিয়াছেন। তাঁহারা কিছুতেই পশ্চাৎপদ হইয়েন নাই। জীবন যখন সঙ্কটাপন্ন হয়, প্রতি-মুহূর্ত্তে যখন নানা বিঘ্ন ঘটিতে থাকে, বিপদ যখন দুর্নিবার্য হইয়া উঠে, চারি দিক যখন অন্ধকারময় হইয়া বিভীষিকা দেখাইতে থাকে, তখন ইংরেজ যেমন নির্ভীকতার সহিত বিপত্তিময় কর্মক্ষেত্রে অবতীর্ণ হইয়েন, যেমন সাহসের

সহিত আত্মরক্ষার আয়োজন করিতে থাকেন, যেমন তৎপরতার সহিত সমস্ত বিষয় সুশৃঙ্খল করিয়া তুলেন, জগতে তাহার দৃশ্য যেমন প্রশংসনীয়, সেইরূপ মানবের মহৎগুণের পরিচায়ক । উপস্থিত সময়ে ইংরেজ যেখানে বিপদাপন্ন হইয়াছেন, সেইখানে তাঁহার উৎসাহ ও উত্তম পূর্ণমাত্রায় পরিস্ফুট হইয়াছে । ফতেগড়ের দুর্গে ইংরেজ ঘোরতর বিপত্তিতে পরিবেষ্টিত হইয়াছিলেন । তাঁহারা সংখ্যায় অল্প ছিলেন । তাঁহাদের রক্ষণীয় বালকবালিকা ও কুলকামিনীগণ তাঁহাদেরই সমক্ষে কাতরভাব দেখাইতেছিল । তাঁহাদের গোলাগুলি নিঃশেষপ্রায় হইয়াছিল । তাঁহাদের দুর্গ স্থানে স্থানে ভগ্ন, তাঁহাদের দুর্গদ্বার নানাস্থানে ছিদ্রযুক্ত হইয়াছিল । তাঁহাদের দুইটি কামান অকর্মণ্য হইয়া পড়িয়াছিল । তথাপি তাঁহারা হতোদ্বম হয়েন নাই । তাঁহাদের গুলি নিঃশেষিত হইল । তাঁহারা হাতুড়ি, ফ্রুপ, চাকা, লোহা প্রভৃতি কামানের কারখানার যন্ত্রাদি গনি ব্যাগের মধ্যে সেলাই করিয়া গুলির কার্য চালাইতে লাগিলেন । তাঁহাদের মধ্যে যুদ্ধকার্যে অভ্যস্ত সৈনিকপুরুষের সংখ্যা অল্প ছিল । কিন্তু ইহাতেও তাঁহাদের উত্তম ভঙ্গ হইল না । শান্তির সময়ে তাঁহারা সংসারের অল্প কার্যে ব্যাপৃত থাকিতেন, তাঁহারা এখন সৈনিকব্রত অবলম্বন করিলেন । দেওয়ানি বিভাগের কর্মচারী অস্ত্রশস্ত্রে সজ্জিত হইয়া, বিপক্ষের আক্রমণ নিরস্ত করিতে লাগিলেন, ধর্মযাজক আপনার ধর্মপুস্তক ও ধর্মোপদেশ ছাড়িয়া, বন্দুক গ্রহণ করিলেন । অধিক কি, কুলমহিলা আপনার স্বাভাবিক কোমলতায় বিসর্জন দিয়া, অস্ত্রপরিগ্রহপূর্বক বিপক্ষদিগকে নিহত করিতে লাগিলেন ।\* এইরূপে আক্রমণকারীদিগের সমক্ষে আক্রান্তগণ সাহস ও উত্তমের একশেষ দেখাইতে লাগিলেন । কিন্তু এইরূপ অসামান্য উত্তম ও সাহস দেখাইয়াও, তাঁহারা দীর্ঘকাল দুর্গে থাকিতে পারিলেন না । তাঁহাদের আত্মরক্ষার সম্বল নিঃশেষিত হইল । কামানের কারখানার যন্ত্রাদিও ক্রমে গোলাগুলির কার্যে নিঃশেষিত

\* সৈনিকদিগের কাপড়ের কারখানার এক ব্যক্তি নিহত হয় । ইহার স্ত্রী স্বামিবিয়োগে অর্ধেক না হইয়া যুদ্ধকার্যে মনোনিবেশ করেন । ইহার গুলিতে অনেক সিপাহী নিহত হয় । কেহ কেহ নির্দেশ করিয়াছেন যে, এই বিধবা নারী সিপাহীদিগের গুলিতে দেহত্যাগ করেন । অপরে কহিয়াছেন যে, ইনি কাপড়ের নিহত হয়েন । ইহার নাম বিবি অহারণ ।—*Kaye, Sepoy War. Vol III. p. 298, note.*

হইয়া গেল । এদিকে তাহাদের সাহসী সৈনিকগণ বিপক্ষদিগের গুলির আঘাতে দুর্গপ্রাচীরে দেহত্যাগ করিতে লাগিল । কর্ণেল স্মিথ সাহায্যপ্রাপ্তির জন্য ফরাসি ভাষায় পত্র লিখিয়া আগ্রায় পাঠাইলেন । তাঁহার পত্র যথাস্থানে পঁছছিল । আগ্রার সিপাহীগণ নিরস্ত্রীকৃত হইয়াছিল । সুতরাং কতিপয় ইউরোপীয় সৈনিকপুরুষ পাঠাইবার প্রস্তাব হইল । মেজর্ ওয়েলার এই সৈনিকদলের পরিচালনের ভারগ্রহণে সম্মত হইলেন । কিন্তু প্রস্তাব কার্যে পরিণত হইল না । কর্ণেল স্মিথ আশান্বিতহৃদয়ে আগ্রার পথ চাহিয়া রহিলেন । কিন্তু কোন সাহায্যকারী সৈনিক উপস্থিত হইয়া তাঁহাকে আশ্বাস দিল না । কর্ণেল অতঃপর দুর্গরক্ষায় হতাশাস হইয়া পড়িলেন । তিনি ঐ স্থানে আশ্রয়ক্ষার কোন অবলম্বন না পাইয়া, পলায়নের উপায় দেখিতে লাগিলেন ।

সৌভাগ্যক্রমে এই সময়ে পলায়নের সুযোগ ঘটিয়াছিল । বর্ষার আবির্ভাবে গঙ্গার জলবৃদ্ধি হইয়াছিল । সুতরাং কর্ণেল স্মিথ জলপথে কাণপুরে যাইবার ইচ্ছা করিলেন । তিন খানি বড় বড় নৌকা সংগৃহীত হইল । ৩রা জুলাই নিশীথকালের গভীর অন্ধকারে আত্মগোপন করিয়া বালকবালিকাসমেত ১০০ জন খ্রীষ্টাধর্মাবলম্বী নৌকায় আরোহণ করিল । এইরূপে ফতেগড় হইতে পলাতকদিগের দ্বিতীয় দল যাত্রা করিল । প্রথম দলের অদৃষ্টে কি ঘটিয়াছিল তাহা জানা যায় নাই । অনেকে মনে করেন যে, কাণপুরের লোমহর্ষণকাণ্ডে ইহাদের প্রাণান্ত ঘটিয়াছিল । দ্বিতীয় দল ইহাদের অপেক্ষা সৌভাগ্যশালী হয় নাই । এই দলের অদৃষ্টে যাহা ঘটে, তাহা যেরূপ গভীর মর্শবেদনার উদ্দীপক, সেইরূপ উপস্থিত ভয়ঙ্কর সময়ের ভয়ঙ্কর ভাবের উত্তেজক । রাত্রি ২টার সময়ে সকলে নৌকায় উঠিলে উহা ছাড়িয়া দেওয়া হয় । কর্ণেল স্মিথ, কর্ণেল গোল্ডি এবং মেজর্ রবার্টসন্ এক এক খানি নৌকার অধ্যক্ষ হইলেন । পলাতকদলে পরিপূর্ণ তিন খানি নৌকা তিন জন ইংরেজ সৈনিকপুরুষের তত্ত্বাবধানে ফতেগড় হইতে যাত্রা করে । কিন্তু কিছু দূর যাওয়ার পর কর্ণেল গোল্ডির নৌকা চড়ায় আবদ্ধ হইয়া যায় এবং উহার হাল নষ্ট হয় । আরোহীগণ নৌকার উদ্ধারে বৃথা চেষ্টা করে । এই সময়ে সুন্দরপুরনামক পল্লীর অধিবাসিগণ দলবদ্ধ হইয়া আরোহীদিগকে আক্রমণ করে । কতিপয় ইউরোপীয়

নৌকা হইতে নামিয়া ইহাদিগকে তাড়াইয়া দেয় । কর্ণেল গোল্ডির নৌকার লোকে উপায়ান্তর না দেখিয়া কর্ণেল স্মিথের নৌকায় আশ্রয় গ্রহণ করে । ভয়াতুর ও নির্ঝাক্ জীবে বোঝাই দুই খানি নৌকা ভাগীরথীর প্রবাহবেগে অগ্রসর হইতে থাকে ।

কিন্তু অদৃষ্টদোষে আরোহিগণ শান্তিস্থলের অধিকারী হইতে পারিল না । তাহারা জীবনরক্ষার জন্য ফতেগড়ের দুর্গ পরিত্যাগ করিয়াছিল । কিন্তু তাহাদের সম্মুখে সহসা কালের করাল মূর্তি আবির্ভূত হইল । সিপাহীরা যখন জানিত পারিল যে, ফিরিঙ্গিগণ নৌকায় চড়িয়া ফতেগড় হইতে প্রস্থান করিয়াছে, তখন তাহারা তাড়াতাড়ি খেয়াঘাটের নৌকা সংগ্রহ করিয়া পলাতকদিগের অনুসরণ করিল । এদিকে একটি কামান গঙ্গার দক্ষিণতটে স্থাপিত হইল । নদীর উভয়তীরস্থিত পল্লীর অধিবাসিগণ নিরতিশয় উত্তেজিত-ভাবে পলাতকদিগকে আক্রমণ করিল । মুসলমান পল্লীর লোকই এবিষয়ে অধিকতর উত্তেজনার পরিচয় দিতে লাগিল । এই সকল আক্রমণকারীর সমক্ষে পলাতকদিগের নিষ্কৃতিলাভ দুর্ঘট হইয়া উঠিল । ইহার মধ্যে মেজর রবার্টসনের নৌকা সিংহরামপুর পল্লীর নিকটে চড়ায় আবদ্ধ হইয়া গেল । ইহার মধ্যে অনুসরণকারী সিপাহীগণ উপস্থিত হইয়া আরোহীদিগকে আক্রমণ করিল । কাণপুরের প্রান্তবাহিনী জাহুবীর ঘাটে যাহা ঘটয়াছিল, সিংহরামপুরের সমীপবর্তিনী জাহুবীর জলপ্রবাহের মধ্যে তাহাই ঘটিল । কুলমহিলাগণ অল্প কোন উপায় না দেখিয়া, শিশুসন্তানদিগকে লইয়া ভাগীরথীর জলে ঝাঁপ দিয়া পড়িল । ইহাদের কেহ কেহ জলমগ্ন হইল, কেহ কেহ বিপক্ষদিগের গুলিতে দেহত্যাগ করিল, কেহ কেহ অসির আঘাতে মৃত্যুর ক্রোড়ে চিরনিদ্রিত হইল । রবার্টসন্ প্রভৃতি তিন ব্যক্তি কোনরূপে আত্মরক্ষা করিলেন । ধর্ম্মযাজক ফিসার সাহেব ফতেগড়ের দুর্গে স বিশেষ সাহসের পরিচয় দিয়াছিলেন, তিনি গুরুতররূপে আহত হওয়াতে আপনার স্ত্রী ও শিশুসন্তানকে বাহুতে লইয়া গঙ্গার ঝাঁপ দেন, এবং ঐ অবস্থায় জলমগ্ন হইলেন । তাহার বাহুদেশে তদীয় স্ত্রী ও শিশুসন্তানের মৃত্যু হয় । তিনি কোনরূপে প্রাণ রক্ষা করিয়া, রাত্ৰিকালে লুকায়িতভাবে থাকেন, এবং প্রত্যুষে কর্ণেল স্মিথের নৌকায় উঠেন । নৌকায় উঠিয়াই তিনি প্রবলবেগে অশ্রুপাত করিতে

করিতে কহিয়াছিলেন যে, “আমার স্ত্রী ও শিশুসন্তান আমার বাহুদেশেই দেহত্যাগ করিয়াছে”। জীবনরক্ষা হইলেও রবার্টসন সাহেবের অবস্থা নিরতিশয় শোচনীয় হইয়া উঠিল। তাঁহার স্ত্রী ও শিশুসন্তান তাঁহা হইতে বিচ্ছিন্ন হইয়া জলমগ্ন হইল। রবার্টসন স্বয়ং আহত হইয়াছিলেন। এক জন ইউরোপীয় নীলকর তাঁহার সঙ্গে ছিলেন। তিনি আহত সহযোগীকে একটি দাঁড়ের উপর তুলিয়া ভাসিতে ভাসিতে চলিলেন। নিশীথকালে তাঁহারা তীরে উঠিয়া কোলহর নামক পল্লীতে লুকান্নিতভাবে রহিলেন। এই স্থানের সরল-প্রকৃতি কৃষাগণ তাঁহাদের শোচনীয় অবস্থা দর্শনে নিরতিশয় দয়াজ্ঞ হইয়া, তাঁহাদিগকে আশ্রয় দিল। পলাতকগণ আশ্রয়দাতাদিগের প্রদত্ত খাণ্ডসামগ্রীতে তৃপ্তিলাভ করিলেন। রবার্টসন সাহেব সাংঘাতিকরূপে আহত হইয়াছিলেন, সুতরাং তাঁহার সঙ্গী নীলকর সাহেব তাঁহাকে একাকী ফেলিয়া যাইতে পারিলেন না। দুই মাস পরে সমুদয় শেষ হইল। রবার্টসন সাহেব গুরুতর আঘাতে দেহত্যাগ করিলেন। তাঁহার সহযোগী নীলকর সাহেব তদীয় সমাধিক্রিয়া সম্পন্ন করিয়া কাণপুরে উপনীত হইলেন। এদিকে যে সকল আরোহী উত্তেজিত সিপাহীদিগের বন্দী হইয়াছিল, তাহাদিগকে নবাবের আদেশে কামানে উড়াইয়া দেওয়া হইল। ইহার মধ্যে কর্ণেল স্মিথের নৌকা, অবশিষ্ট শোচনীয় দশাগ্রস্ত জীবদিগকে লইয়া, কাণপুরের অভিমুখে অগ্রসর হইতে থাকে। পথে দয়াজ্ঞ পল্লীবাসিগণ ইহাদের যথোচিত সাহায্য করে। পলাতকগণ পল্লীবাসীদিগের সদয়ভাবে আশ্রয়লাভ হইয়া, তাহাদের গৃহে আশ্রয়গ্রহণ পূর্বক তাহাদের প্রদত্ত খাণ্ড ভোজন করিয়া পরিতৃপ্ত হয়। এই সকল জীবের অদৃষ্টে কি ঘটিয়াছিল, ইতিহাস স্মরণরূপে তাহার নির্দেশ করিতে সমর্থ হয় নাই। অনেকে অনুমান করেন যে, ইহারা কাণপুরে অস্তিত্ব ইউরোপীয়দিগের সহিত বিনষ্ট হয়। কথিত আছে, পুরুষ, স্ত্রীলোক, বালকবালিকাতে দুই শতেরও অধিক ক্রীষ্টধর্মাবলম্বী জুন মাসের প্রারম্ভে ফতেগড় ও উহার পার্শ্ববর্তী স্থানে ছিল। ইহাদের প্রায় সকলেই জলপথে বা যে স্থানে নিরাপদ হইবে ভাবিয়া যাইতেছিল, সেই স্থানে নিহত হয়।

এইরূপে ইংরেজেরা ফরকাবাদ হইতে তাড়িত হইলেন। ফরকাবাদে তাঁহাদের আধিপত্য, তাঁহাদের প্রাধান্য, তাঁহাদের ক্রমতার সমস্ত চিহ্ন বিলুপ্ত

হইয়া গেল । পলায়নসময়ে তাঁহাদের অনেকের প্রাণান্ত ঘটিল, অনেকে ছদ্ম-বেশে ভারতবাসীর অসামান্য দয়াশীলতায় নির্জন স্থানে লুকায়িতভাবে রহিলেন । নবাব তফজুলহোসেন খাঁ ফরক্কাবাদের গদিতে প্রতিষ্ঠিত হইয়া শাসনদণ্ডের পরিচালনায় প্রবৃত্ত হইলেন । কিন্তু তাঁহার তাদৃশ গুণ বা ক্ষমতা ছিল না । অমিতাচার ও অতিব্যয় প্রযুক্ত তাঁহার বৈষয়িক কার্য বিশৃঙ্খল হইয়া পড়িয়াছিল । ব্রিটিশ গবর্ণমেন্টের যত্নে উহা স্মৃঙ্খল হয় । নবাব তখন নিশ্চিন্তমনে আপনার ভোগবাসনার তৃপ্তিসাধন করিতে থাকেন । ফরক্কাবাদের লোকে যাহাকে এক সময়ে ব্রিটিশ গবর্ণমেন্টের অনুগ্রহপ্রার্থী ও ব্রিটিশ গবর্ণমেন্টের পেন্সনগ্রাহী ভিন্ন আর কিছুই ভাবিত না, তিনি এখন স্বাধীন নবাব হইলেন । যাহাদের অনুগ্রহে ও যত্নে তাঁহার সম্পত্তিরক্ষা হইয়াছিল, তিনিই শেষে তাহাদিগকে নির্জিত, নিষ্কাশিত ও নিহত করিলেন । এইরূপে ক্রতজ্ঞতার পরিচয় দিয়া, তিনি এখন ফরক্কাবাদের গদিতে প্রতিষ্ঠিত হইলেন । এখন তাঁহার নামে আদেশপত্র প্রচারিত, তাঁহার নামে রাজস্ব সংগৃহীত এবং তাঁহার নামে শাসনকার্য্য নির্বাহিত হইতে লাগিল । জমাদার, রেসেলাদার প্রভৃতি উচ্চপদস্থ সৈনিক পুরুষেরা অধিকতর ক্ষমতাপ্রাপ্তির আশাতেই হুক, বা অর্থলোভেই হুক, তাঁহার অধীনতা স্বীকার করিলেন । যাহারা দেওয়ানি-বিভাগের কার্য্যে নিয়োজিত ছিলেন, তাঁহাদেরও অনেকে নবাবের কার্য্য করিতে অসম্মতি প্রকাশ করেন নাই । কথিত আছে, ছয় জন তহশীলদারের মধ্যে তিন জন এবং এগার জন প্রধান পুলিশ কর্মচারীর মধ্যে ছয় জন নবাবের কর্ম গ্রহণ করেন । নয় জন পেঞ্চারের মধ্যে পাঁচ জন এবং এক জন ব্যতীত সমুদয় কাননগু নবাবের সরকারে নিয়োজিত হইলেন । এতদ্ব্যতীত মোহরের, নাজীর, বরকন্দাজ প্রভৃতিও অভিনব শাসনকর্তার অধীনতা স্বীকার করে । কিন্তু ফৌজদারী ও রাজস্ববিভাগের সেরেস্তাদারগণ এবং ফৌজদারীর নাজীর নবাবের সরকারে কর্ম গ্রহণ করেন নাই । এই শেষোক্ত কর্মচারী এজ্ঞ নিপীড়িত হইলেন । তাঁহার সম্পত্তির কিয়দংশ বিলুপ্ত হইল । তিনি নিজে জরিমানা দিতে বাধ্য হইলেন ।\* যাহা হুক, ইংরেজেরা তাড়িত হইলেও এবং

\* *Kaye, Sepoy War Vol. III. p. 305, note.*

আপাততঃ তাঁহাদের ক্ষমতা ও প্রাধান্যের কোন নিদর্শন না থাকিলেও, কোনও স্থানে দীর্ঘকাল শৃঙ্খলার সহিত শাসনকার্য্য সম্পন্ন হয় নাই। তাঁহারা পূর্বতন বংশ-গৌরব বা পূর্বপুরুষের প্রাধান্য ও ক্ষমতার বলে স্বপ্রধানভাবে শাসনকার্য্য-নির্বাহে অগ্রসর হইয়াছিলেন, তাঁহাদের বাসনা সিদ্ধ হয় নাই। তাঁহারা সকলকে জাতীয়ভাবে সম্বন্ধ করিতে পারেন নাই, সুতরাং সকলের মধ্যে একপ্রাণতা ও সমবেদনার সঞ্চার হয় নাই। অনেকে কেবল ছর্নিবার ভোগলালসার পরিতৃপ্তির জন্ত অভিনব শাসনকর্তার নাম মাত্র অধীনতা স্বীকার করিয়াছিল। কিন্তু কার্য্যতঃ ইহারা স্বপ্রধান হইয়া, আপনাদের আকাজ্জক তৃপ্তি করিয়াছিল। সংযতচিত্ত, দূরদর্শী লোকে ইহাদের অনুবর্তী হয় নাই। তাহারা কেবল ভয়প্রযুক্ত অভিনব শাসনকর্তাদিগের অধীন হইয়াছিল। কিন্তু এই শাসনকর্তাদিগের উপর তাহাদের কিছুমাত্র শ্রদ্ধা ছিল না। তাহারা ব্রিটিশ গবর্ণমেন্টের প্রাধান্যপ্রাপ্তির প্রতীকায় ছিল। \* ইংরেজ ইহাদেরই সদাশয়তায় আশ্রয়লাভ করেন এবং প্রধানতঃ ইহাদেরই সাহায্যে আপনাদের বিলুপ্তপ্রায় ক্ষমতার পুনরুদ্ধারে উদ্বৃত্ত হইয়েন।

ফতেপুরের কথা শেষ করিবার পূর্বে বদায়ুনের মাজিষ্ট্রেট এডওয়ার্ডস সাহেবের অদৃষ্টে কি ঘটিয়াছিল, তাহার উল্লেখ করা আবশ্যিক। পূর্বে উক্ত হইয়াছে যে, এডওয়ার্ডস সাহেব উপায়ান্তর না দেখিয়া বদায়ুন হইতে পলায়ন করিয়াছিলেন। তাঁহার স্ত্রী ও শিশুসন্তান নৈনিতালে প্রেরিত হইয়াছিল। মাজিষ্ট্রেট সাহেবকে ছদ্মবেশ পরিগ্রহ করিতে হইয়াছিল। তিনি হিন্দুস্থানীর বেশে এক পল্লী হইতে অগ্র পল্লীতে গিয়া, আত্মগোপন করিয়াছিলেন। পথে সদাশয় ভারতবর্ষীয়গণ তাঁহার যথোচিত সাহায্য করে। এক দিন তিনি প্রচণ্ড আতপতাপে ও ও পথের ধূলিতে একান্ত অবসন্ন হইয়া একটি পল্লীতে উপস্থিত হইয়েন। এই স্থানে গবর্ণমেন্টের পেস্‌সনপ্রাপ্ত একজন বৃদ্ধ সিপাহী বাস করিতেছিল। এই ব্যক্তি কালেক্টর সাহেবের ছরবস্থা দেখিয়া চুঃখিত হয়। কালেক্টর সাহেব জল চাহিলেন, বৃদ্ধ সিপাহী দুগ্ধ ও চাপাটী দিয়া তাঁহার তৃপ্তিসাধন করিল। পলাতকগণ আতিথ্যের সিপাহীর পরিচর্য্যায় পরিতুষ্ট হইয়া, এক ঘণ্টার পর সেই

\* Syed Ahmed Khan, Causes of the Indian revolt, p. 48.

স্থান হইতে যাত্রা করেন । যাইবার সময়ে কালেক্টর সাহেব সিপাহীকে কিছু টাকা দিতে চাহিয়াছিলেন, কিন্তু সিপাহী উহা গ্রহণ না করিয়া, হুঃখিতভাবে বলিয়াছিল—“এখন আমার অভাব অপেক্ষা আপনাদের অভাব বেশী । আমি বাড়ীতে বাস করিতেছি, আপনারা জঙ্গলে জঙ্গলে বেড়াইতেছেন । যদি আপনাদের আধিপত্য পুনঃপ্রতিষ্ঠিত হয়, তাহা হইলে আমাকে এবং আমার এই সামান্ত কার্যের বিষয় মনে রাখিবেন ।” \* এইরূপে নানা স্থানে নানা লোকের নিকটে সাহায্য পাইয়া, তিনি অযোধ্যার অন্তর্গত ধরমপুরনামক স্থানে উপনীত হইলেন । এই স্থানে হরদেব বক্স নামক এক জন সম্ভ্রান্ত ভূস্বামী ছিলেন । তিনি বিপন্ন পলাতকদিগকে সবিশেষ আদর ও যত্নের সহিত আশ্রয় দেন । এডওয়ার্ডস সাহেব ও তাঁহার সহযোগীগণ হরদেব বক্সের আশ্রয়ে কিছুকাল অবস্থিত করেন । সদাশয় ভূস্বামী আশ্রিতদিগের তৃপ্তিসাধনে ও শান্তিবিধানে কিছুমাত্র অমনোযোগী হইলেন নাই । ধরমপুরের অন্যান্য সম্ভ্রান্ত হিন্দুগণ ইঁহাদের সুখশান্তির জন্ত সবিশেষ প্রয়াস স্বীকার করেন । যখন ফতেগড়ের সিপাহীরা প্রবল হইয়া হইয়া উঠে ; ইংরেজেরা যখন আত্মরক্ষায় অসমর্থ হইয়া দুর্গ পরিত্যাগপূর্বক জলপথে আশ্রয়স্থানের প্রত্যাশায় যাত্রা করেন ; ফরক্বাদের নবাব যখন ইউরোপীয়দিগকে ভাঙিত বা বিনষ্ট করিবার জন্ত উত্তেজিত সিপাহীদিগকে উৎসাহিত করিতে থাকেন ; তখন হরদেব বক্স ইউরোপীয়দিগকে আশ্রয় দিয়াছেন ভাবিয়া, সাতিশয় উদ্ভিগ্ন হইয়াছিলেন বটে, কিন্তু বিপন্ন আশ্রিতদিগকে বিপন্নদিগের হস্তে সমর্পণপূর্বক আত্মমর্যাদার সহিত দয়া ও হিতৈষিতার সম্মান বিনষ্ট করেন নাই । পলাতকগণ ধরমপুর হইতে প্রতিদিন কামানের গভীর শব্দ শুনিতেছিলেন, প্রতিদিন এই গভীর শব্দে তাঁহাদের হৃদয়ে গভীর আশঙ্কা বা আশ্বাসের সঞ্চার হইতেছিল । ক্রমে কামানের ধ্বনির নিবৃত্তি হইল । পলাতকদিগের হৃদয় ক্রমে গভীর নৈরাশ্রে অভিভূত হইতে লাগিল । এই সময়ে হরদেব বক্স বিপদের আশঙ্কায় তাঁহাদিগকে অদূরবর্তী কোন নির্জন স্থানে পাঠাইয়া দেন । যেহেতু, ফরক্বাদের নবাব শুনিয়াছিলেন যে, তাঁহার আশ্রয়ে কতিপয় ইউরোপীয় অবস্থিত করিতেছে । নবাব এই

\* *Edwards, Personal Adventures, p. 37.*



সংবাদ শুনিয়াই হরদেব বক্সকে বলিয়া পাঠাইয়াছিলেন যে, ইউরোপীয়দিগকে যেন অবিলম্বে তাঁহার নিকটে পাঠান হয়। অত্যাচার হরদেব বক্সের জীবন ও সম্পত্তি কখন নিরাপদ হইবে না। কিন্তু তেজস্বী হরদেব বক্স এই কথায় কর্ণপাত করেন নাই। তিনি আশ্রিতদিগের রক্ষায় দৃঢ়প্রতিজ্ঞ হইয়াছিলেন। এই প্রতিজ্ঞাপালনের জন্ত এখন আপনার লোকদিগকে অস্ত্রাদিতে সজ্জিত করিয়া রাখিলেন। যে কয়েক দিন নবাবের প্রাধান্য ছিল, পলাতকগণ সেই কয়েক দিন পূর্বোক্ত দুর্গম স্থানে দুর্গতির একশেষ ভোগ করেন। তাঁহাদের বাসস্থান নিরতিশয় অপরিষ্কৃত ছিল। কুটীর প্রায়ই গোরু ও মহিষের মলে পরিপূর্ণ থাকিত। ইউরোপীয়গণ এই সকল বাক্শক্তিশূন্য জীবের সহিত নির্দাক ও নিস্তব্ধভাবে অবস্থিতি করেন। এই সময়ে হরদেব বক্স বা তাঁহার প্রতিবাসী হিন্দুগণ নানারূপ আশঙ্কা করিয়া, ইহাদের সহিত সাক্ষাৎ করিতে যাইতেন না। যাহা হউক, তিনি কাহারও নিকটে পলাতকদিগের সন্ধান বলিয়া দেন নাই। শেষে ফরক্কাবাদের সংবাদ পাইয়া, এই দয়ালু ভূস্বামী পলাতকদিগকে পুনর্বার ধরমপুরে আনয়ন করেন। এইরূপে ভারতবাসীর অসীম করুণায় ও সদাশয়তায় বিপন্নদিগের জীবনরক্ষা হয়।

ফতেগড়ের বিপ্লবে গঙ্গা ও যমুনার মধ্যবর্তী বিস্তৃত ভূখণ্ডে ইংরেজের আধিপত্য বিলুপ্ত হইল। ইংরেজ এক সময়ে অপূর্ব বীরত্বপ্রকাশপূর্বক যে প্রদেশে আধিপত্য স্থাপন করিয়াছিলেন, এবং গভীর রাজনীতির পরিচয় দিয়া, যে প্রদেশে শাসনশৃঙ্খলা অব্যাহত রাখিয়াছিলেন, অকস্মাৎ অভাবনীয় শক্তিতে সেই প্রদেশে তাঁহারা ক্ষমতালুপ্ত হইলেন। যাহারা এক সময়ে ইংরেজের পদানত ছিল, ইংরেজের সন্তুষ্টিসাধনে যত্ন প্রকাশ করিত, এবং ইংরেজের দেহরক্ষার জন্ত সর্বদা সতর্ক থাকিত, তাহারাই এক্ষণে ইংরেজের বিরোধী হইয়া উঠিল, এবং অস্ত্রপরিগ্রহপূর্বক ইংরেজের শোণিতপাতের জন্ত আগ্রহ প্রকাশ করিতে লাগিল। রোহিলখণ্ড এবং গঙ্গাযমুনার দোয়াবের বিপ্লব, কেবল শোচনীয় নরহত্যার বা জনসাধারণের অচিন্তনীয় শক্তির জন্ত ইতিহাসে প্রসিদ্ধি লাভ করে নাই। উহা অভাবনীয় ব্যাপকতার জন্তও ঐতিহাসিকের গভীর বিস্ময়ের উদ্দীপক হয়। ঐতিহাসিক যদি উহার উৎপত্তি, বিস্তৃতি ও স্থিতির বিষয় ভাবিয়া দেখেন, তাহা হইলে তাঁহার উদ্বোধ হইবে যে, এই মহা-

বিপ্লব কেবল সৈনিকনিবাসে আবদ্ধ থাকে নাই, যাহারা ইংরেজ সৈনিক-প্রধানের নিকটে ইংরেজী প্রণালী অনুসারে সামরিক কৌশলে অভ্যস্ত হইয়াছিল, ইংরেজের প্রদত্ত সামরিক ভূষণে ও অস্ত্রশস্ত্রে সজ্জিত হইয়া, ইংরেজের ইঙ্গিতমাত্রে যুদ্ধস্থলে শূরত্ব প্রকাশ করিত, তাহারা কেবল সহসা ইংরেজকে বিপত্তিজালে পরিবেষ্টিত করিতে অগ্রসর হয় নাই। সিপাহীগণ মারাত্মক কার্যসাধনে উত্তম হইয়াছিল বটে, কিন্তু তাহাদের উত্তম দীর্ঘস্থায়ী হয় নাই এবং উহা ইংরেজের প্রাধান্য ও আধিপত্যের মূলদেশও ক্ষয় করিতে পারে নাই। ইতিহাস দেখাইয়া দিতেছে যে, সিপাহীগণ যেখানে উত্তেজনার পরিচয় দিয়াছে, সেইখানেই তাহারা ধনাগার লুণ্ঠন করিয়াছে, কয়েদীদিগকে ছাড়িয়া দিয়াছে, এবং সম্মুখে যে সকল ইউরোপীয়কে পাইয়াছে, ঠাছাদিগকে নিহত ও তাহাদের অধ্যুষিত গৃহ ভস্মীভূত করিয়া, অশীষ্ট অর্থ সংগ্রহপূর্বক আপনাদের গৃহাভিমুখে প্রস্থান করিয়াছে, অথবা দিল্লীতে গিয়া, অপরাপর সিপাহীর সহিত সম্মিলিত হইয়াছে। তাহারা ভিন্ন ভিন্ন স্থানে থাকিয়া ইংরেজের প্রাধান্যনাশ এবং আপনাদের আধিপত্যরক্ষার চেষ্টা করে নাই, এবং ইংরেজকে স্বদেশ হইতে দূরীভূত করিবার জন্ত একটি নির্দিষ্ট প্রণালী অনুসারে কৰ্মক্ষেত্রে অবতীর্ণ হয় নাই। তাহাদের অনেকে এই বিপ্লবের সময়েও ধীরতার পরিচয় দিয়াছে। বেরেলীর অনিয়মিত সৈনিকগণ সহসা তাহাদের উত্তেজিত স্বদেশবাসীর সহিত সম্মিলিত হয় নাই। একদল যখন ইংরেজের বিরুদ্ধাচরণে সমুথিত হইয়াছে, অত্র দল তখন গভীর আশঙ্কায় বিচলিত হইয়া, তাহাদের পথানুসরণ করিয়াছে। তাহারা ভাবিয়াছে যে, ইংরেজের ক্রোধে সকলেই সমভাবে বিনষ্ট হইবে। এক দলের অদৃষ্টে যাহা ঘটিয়াছে, অত্র দলের অদৃষ্টে তাহাই ঘটবে। তাহারা হয় নিরস্ত্রীকৃত ও ঘোরতর দুর্দশাগ্রস্ত হইবে, না হয়, তাহাদের দেহ কামানে বিচ্ছিন্ন বা ইতস্ততঃ বিক্ষিপ্ত হইয়া যাইবে। এইরূপ গভীর আশঙ্কায় তাহারা সন্তপ্তহৃদয়ে ইংরেজের বিপক্ষে অস্ত্রপরিগ্রহ করিয়াছিল। মীরাটের ঘটনার পর সিপাহীদিগের হৃদয় এইরূপে বিচলিত হইয়াছিল। এইরূপ মনোবেদনায় অধীর হইয়া, তাহারা ইংরেজের প্রদত্ত অস্ত্রই ইংরেজের বিরুদ্ধে প্রয়োগ করিয়াছিল, কিন্তু অস্ত্রপরিগ্রহ করিলেও তাহারা আপনাদের মনোবেদনা গোপনে রাখে নাই। ইংরেজ যখন দিল্লী

আক্রমণ করেন, দিল্লীর ছরারোহ প্রাচীর ও সিপাহীদিগের ব্যূহ যখন ইংরেজের হুশিয়ার বিষয়ীভূত হয়, তখন যে সকল সিপাহী ইংরেজের বিরুদ্ধে অস্ত্রধারণ করিয়াছিল, তাহারা কহিয়াছিল যে, অদৃষ্টক্রমে তাহারা এই কার্যে প্রবৃত্ত হইয়াছিল। ইংরেজের বিরুদ্ধাচারী হওয়া ব্যতীত তাহাদের গত্যস্তর ছিল না। গবর্ণমেন্ট যখন তাহাদের প্রতি অশ্রদ্ধা হইয়াছেন, তখন তাহাদিগকে যে, কিরূপ শাস্তিভোগ করিতে হইবে, তাহা তাহারা জানে না।\* উত্তরপশ্চিম-প্রদেশের লেফটেনেন্ট-গবর্ণর যাহাকে “দৌরাখ্য ও দাঙ্গাহাঙ্গামা পরিপূর্ণ” বলিয়াছিলেন, এবং গবর্ণর-জেনেরল যাহা “তাঁহাদের অধিকারভ্রষ্ট” বলিয়া নির্দেশ করিয়াছিলেন, সেই বিস্তৃত প্রদেশ কেবল সিপাহীদিগের উত্তেজনার জন্ত তাদৃশ অবস্থাপন্ন হয় নাই। কিন্তু গবর্ণমেন্টের দূরদর্শিতার অভাবেই হউক, ভ্রান্তিতেই হউক, বা অনভিজ্ঞাতেই হউক, আর একশ্রেণীর লোক সাতিশর অসম্বল হইয়া উঠিয়াছিল। ইহারা কয়েদীদিগের শৃঙ্খলমোচনের বিষয় ভাবে নাই, ধনাগারের লৌহ-সিন্দুক ভাঙ্গিবার বিষয় চিন্তা করে নাই, বা ইউরোপীয়দিগের গৃহ ও স্রব্যাদিনাশের বিষয়ও মনে স্থান দেয় নাই। ইহারা কেবল ভাবিয়াছিল যে, ইংরেজ ক্রমে ইহাদিগকে সামান্ত লোকের মত করিয়া তুলিয়াছেন, ইহাদের বংশের গৌরব ও সন্মান বিলুপ্ত করিয়া ফেলিয়াছেন, ইহাদের চিরন্তন রীতি-নীতির, আচারব্যবহারের অবমাননা করিয়াছেন। ইংরেজের সম্মুখে ভারত-বাসিগণ অপমানিত হইতেছে।† তাঁহাদের রাজনীতির কৌশলে পররাজ্য গৃহীত ও পরস্বত্ব বিনষ্ট হইতেছে। তাঁহাদের আধিপত্যপ্রিয়তার উচ্চশ্রেণী নিম্নশ্রেণীর অবস্থায় পাতিত হইয়াছে এবং তাঁহাদের দুর্নিবার ভোগাকাজ্জ্বল কমতাপন্ন ও বহুগুণবিশিষ্ট ভারতবাসী উচ্চতর রাজকীয় পদে বঞ্চিত রহিয়াছে। কোন দূরদর্শী ভারতবর্ষীয় এ সময়ে ভারতবর্ষীয় ব্যবস্থাপকসভায় সদস্যরূপে বসিয়া, ভারতবর্ষের প্রকৃত অবস্থা ও ভারতবাসীদিগের এইরূপ মনোগততাব

\* *Syed Ahmed Khan, Causes of the Indian Revolt, p, 53.*

† *Ibid, p. 43,* স্থার সৈয়দ আহম্মদ খাঁ লিখিয়াছেন, উচ্চপদস্থ সাহেব কর্মচারিগণ কাছারির আমলাদিগকে আদালতের কাগজপত্র পড়িবার সময় যে, কটু কথা কহেন, তাহা অনেকেই জানেন। এ সকল আমলাদিগের অনেকে সম্ভ্রান্ত, তাঁহারা মনে মনে কহিয়া থাকেন যে, ইহা অপেক্ষা রাস্তার ধারে ঘাস কাটিয়া ধাওয়া ইহাদের পক্ষে ভাল।

গবর্নর-জেনেরল বা তাঁহার সহযোগিবর্গের গোচর করেন নাই । সুতরাং যাহার উপর সমগ্র রাজ্যের শাসন ও পালনভার সমর্পিত রহিয়াছিল, তিনি প্রজালোকের মনের কথা জানিতে পারেন নাই । শাসকের সমক্ষে শাসিতগণ অপরিচিতভাবেই ছিল ।\* বন্ধমূল বৃদ্ধ যেমন সহজে উৎপাদিত হয় না, জনসাধারণের এই দৃঢ়বন্ধ ধারণাও সেইরূপ সহজে বিলুপ্ত হয় নাই । ইহা হইতে যে বিষময় ফলের উৎপত্তি হইয়াছে, তাহা নগরের পর নগরে, পল্লীর পর পল্লীতে আপনার অভাবনীয় শক্তির পরিচয় দিয়াছে । যাহারা বংশগোরবে সম্মানিত, যাহাদের পূর্বপুরুষ-গণের ক্ষমতা ও প্রাধান্যের বিষয় সাধারণের মধ্যে প্রচারিত রহিয়াছে, ভারত-বাসিগণ বিচারবিতর্ক না করিয়া ছুর্ঘটনার সময়ে নামেই হউক, বা কার্যেই হউক, তাঁহাদের অধীনতা স্বীকার করিয়া থাকে । তাহারা জানে যে, এইরূপ বংশ-গোরব এবং এইরূপ প্রাধান্য অসময়ে শত শত ব্যক্তিকে এক উদ্দেশ্যের সাধনে প্রবর্তিত করিতে পারে । উপস্থিত সময়ে ভারতবাসীদিগের এইরূপ প্রকৃতির পরিচয় পাওয়া গিয়াছিল । বংশগোরবে প্রসিদ্ধ এবং পূর্বতন আধিপত্যের মহিমায় গৌরবান্বিত ব্যক্তিগণ যখন এই সময়ে কার্যক্ষেত্রে দণ্ডায়মান হইলেন, তখন উত্তেজিত লোকে দলে দলে তাঁহাদের অনুবর্তী হইতে লাগিল । কেহ কেহ তাঁহাদের আদেশ কার্যে পরিণত করিতে সচেষ্ট হইল, কেহ কেহ তাঁহাদের নামমাত্র অধীনতা স্বীকার করিয়া, অত্যাচারের পরাকাষ্ঠা দেখাইতে লাগিল । কারাগারবিমুক্ত করেদীগণে সমগ্র স্থান পরিব্যাপ্ত হইল । পরস্বাপহারক গুজরগণ আপনাদের অভীষ্টসাধনে দলবদ্ধ হইয়া উঠিল । শৃঙ্খলা ও শাস্তির সুখময় বন্ধন বিচ্ছিন্ন হইয়া গেল । বিধেয়ী বিবিধ ব্যক্তির সর্বস্বহরণে বা জীবনগ্রহণে উদ্বৃত হইল । অর্থলোলুপ ছুর্ভৃত লোকের হস্তে নিরীহ ব্যক্তির সর্বস্বান্ত ঘটিতে লাগিল । উত্তমর্গের আক্রমণে অধমর্গের জীবন ও সম্পত্তি বিঘ্নসঙ্কুল হইয়া উঠিল । অত্যাচারপরায়ণ লোকে এইরূপে নানা দৌরাণ্ড্য করিতে লাগিল । ইংরেজের ক্ষমতাত্যয়ে অনেক স্থানে সম্ভ্রান্ত ব্যক্তিগণ

\* স্যার সৈয়দ আহম্মদ খাঁ নির্দেশ করিয়াছেন যে, ব্যবস্থাপক সভায় ভারতবাসীদিগকে সদস্যরূপে গ্রহণ না করাই উপস্থিত বিপদের মূল কারণ ।—*Causes of the Indian Revolt, p. 11.*

আপনাদের বংশগৌরবের বলে অধিপতির সম্মানিত পদে প্রতিষ্ঠিত হইয়াছেন, অনেক স্থানে তাঁহাদের আদেশে ইংরেজের সর্বনাশ ঘটয়াছে, অনেক স্থানে দুর্বৃত্ত লোকের হস্তে নিরীহ লোকে নিপীড়িত ও নিগৃহীত হইয়াছে । বেবিলীয় খাঁ বাহাদুর খাঁ, ফরক্কাবাদের তফজুজলহোসেন খাঁর বিবরণে এ বিষয়ের যথার্থ্য পরিস্ফুট হইবে ।

পক্ষান্তরে অনেক ভারতবাসী এই দুঃসময়েও ইংরেজের পার্শ্বে দণ্ডায়মান রহিয়াছিল । ইংরেজ কোন স্থান হইতে তাড়িত হইলেও, ইহারা সেই স্থানে ইংরেজের শাসনগৌরব অব্যাহত রাখিয়াছিল । ইহারা অর্থের বিনিময়ে যে প্রভুত্বের পরিচয় দিয়াছিল, তাহা কখনও বিচলিত হয় নাই । অধিকন্তু পূর্বে উক্ত হইয়াছে যে, অনেকে কেবল ভয়প্রযুক্ত উত্তেজিত লোকের পক্ষে ছিল । ইংরেজের বিরুদ্ধাচরণে ইহাদের প্রবৃত্তি হয় নাই । ইংরেজের সর্বনাশসাধনে ইহাদের উদ্যম দেখা যায় নাই । স্বদেশকে ইংরেজের শাসন হইতে বিমুক্ত করিতেও ইহাদের অধ্যবসায় পরিস্ফুট হইয়া উঠে নাই । ইহারা ইংরেজের প্রাধাত্য পুনঃপ্রতিষ্ঠার প্রতীক্ষায় ছিল । যাহা হউক, ঘটনাচক্রে উপস্থিত সময়ে ইংরেজদিগের দুর্গতির একশেষ ঘটয়াছিল । তাঁহারা যখন আপনাদের প্রাধাত্য পুনঃস্থাপন করেন, তখন যে সকল ভারতবাসী এক সময়ে বিরুদ্ধাচারীর দলে মিশিয়াছিল, তাহারা উৎফুল্লভাবে সর্বসাক্ষী ভগবানের নিকটে তাঁহাদের কুশলকামনা করিয়াছিল । ইংরেজ আপনার অনভিজ্ঞতা ও অদূরদর্শিতার ফল ভোগ করিয়াছেন । নিরক্ষর ভারতবাসীও আপনাদের অনভিজ্ঞতা ও অদূরদর্শিতা প্রযুক্ত ইংরেজের বিরুদ্ধাচারী হওয়াতে যথোচিত প্রতিফল পাইয়াছে ।

## তৃতীয় অধ্যায় ।

### গোবালিয়র—ইন্দোর—রাজপুতনা ।

উত্তরপশ্চিমপ্রদেশের লেফটেনেন্ট-গবর্নরের হুশিয়ারী—মহারাজ জয়াজী রাও শিন্দে—  
তাঁহার সৈন্য—তাঁহার রাজধানীর ঘটনা—তাঁহার সৈনিকদের উত্তেজনা ও বিরুদ্ধাচরণ—  
ইংরেজদিগের পলায়ন—মহারাজ তুকাজী রাও হোলকর—ইন্দোরের ঘটনা—রাজপুতনা ।

উত্তরপশ্চিমপ্রদেশের ঘটনায় মহামতি কল্বিন্ সাহেবের হৃদয় ব্যথিত  
হইয়াছিল । কিছুকাল পূর্বে ইংরেজ যে প্রদেশে অপ্রতিহতভাবে শাসনদণ্ডের  
পরিচালনা করিয়াছিলেন, এবং ইংলণ্ড বা স্কটলণ্ডের স্থায় বাহা সর্বাংশে  
আপনাদের আয়ত্ত ও সর্ববিষয়ে আপনাদের পদানত রাখিয়াছিলেন, সহসা  
তাহা অতর্কিতকারণে বিপ্লবময় ও বিপত্তিপূর্ণ হইয়া উঠিল, সহসা তাহাতে  
ইংরেজের আধিপত্য বিলুপ্ত হইল, মহামতি কল্বিন্ সাহেব এই অভাবনীয়  
ঘটনা দেখিয়া স্তম্ভিত হইলেন । যাহারা এক সময়ে তাঁহার ইঙ্গিত মার্গে  
পরিচালিত হইত, তাঁহার আদেশ শিরোধার্য করিয়া লইত, তাঁহার নিয়মানুসারে  
নিরীহভাবে সমুদয় কর্ম সম্পন্ন করিত, তাহারা হঠাৎ উত্তেজিত হইয়া যখন  
সমুদয় শৃঙ্খলার বন্ধন বিচ্ছিন্ন করিল, এবং সমুদয় স্থান অশান্তিময় করিয়া তুলিল,  
তখন সহায়সম্পন্ন ও অর্থশালী ভূপতিগণ বিরোধী হইলে কিরূপ বিপত্তি  
ঘটিবে, তাহা লেফটেনেন্ট-গবর্নর মহোদয়ের চিন্তনীয় বিষয় হইয়াছিল ।

এই সময়ে মহারাষ্ট্রীয় ভূপতিদিগের মধ্যে মহারাজ জয়াজী রাও শিন্দে উত্তর-  
পশ্চিমপ্রদেশের রাজধানীর ৩৫ মাইল মাত্র দূরবর্তী গোবা-  
গোবালিয়র ।  
লিয়রে আধিপত্য করিতেছিলেন । ভারতের বিভিন্ন স্থানে  
যখন ভিন্ন ভিন্ন ভূপতিগণ স্বতন্ত্রতা রক্ষা করিতেছিলেন, ইংরেজের প্রাধান্য  
যখন সর্বাঙ্গ সীমার মধ্যে আবদ্ধ ছিল, তখন একজন দৃঢ়প্রতিজ্ঞ, রাজনীতিজ্ঞ  
যুবক গবর্নর-জেনারেলের পদে নিয়োজিত হইয়া আইসেন । ভারতের সমগ্র-  
স্থানে ইংরেজের প্রাধান্য অপ্রতিহতভাবে রাখাই তাঁহার প্রধান উদ্দেশ্য ছিল ।

এই উদ্দেশ্যসাধনে তিনি যৌবনোচিত উত্তম ও সাহসের পরিচয় দেন। লর্ড মর্নিংটনের চেষ্টায় ইংরেজের অধিকার সম্প্রসারিত হয়। ভিন্ন ভিন্ন ভূপতিগণ ইংরেজের ক্ষমতার সমক্ষে মস্তক অবনত করেন, এবং ইংরেজের সাহায্যের জন্য আপনাদের ব্যয়ে স্বরাজ্যে ইংরেজ সেনানায়কদিগের তত্ত্বাবধানে এক এক দল সৈন্য রাখিতে প্রতিশ্রুত হইলেন। ১৮৪৩ অব্দে মহারাজ শিন্দের রাজ্যে নানা গোলযোগ ঘটে। এই সময়ে জয়াজী রাও অপ্রাপ্তবয়স্ক ছিলেন। সূতরাং চক্রান্তকারিগণ সুযোগ বুঝিয়া রাজ্যের অবস্থা বিশৃঙ্খল করিয়া তুলিয়াছিল। লর্ড এলেনবরা এই সময়ে গবর্নর জেনারেলের পদে প্রতিষ্ঠিত ছিলেন। তিনি মহারাজ শিন্দের রাজ্যে ইংরেজ আফিসারদিগের তত্ত্বাবধানে একদল সৈন্য রাখেন। ঐ সৈনিকদলের ব্যয়ভার মহারাজের উপর সমর্পিত হয়।

মহারাজ শিন্দের রাজ্যে ৮,০০০ হাজারেরও অধিক সৈনিকপুরুষ এবং ২৬টি কামান ইংরেজ আফিসারদিগের তত্ত্বাবধানে পরিচালিত হইত। এতদ্ব্যতীত কেবল ভারতবর্ষীয় আফিসারদিগের অধ্যক্ষতায় ১০ হাজার সৈনিকপুরুষ ছিল। এই সকল সৈন্য যে, অপরাপর উত্তেজিত সৈনিকদলের পথানুসরণ করিবে না, তদ্বিষয়ে কল্বিন্ সাহেব উপস্থিত সময়ে নিঃসন্দেহ হইতে পারিলেন না। মহারাজ জয়াজী রাও আপন সৈনিকদলের সাহায্যে স্বপ্রধান হইতে সম্মত, স্বাধিকার প্রসারিত করিতে পারেন, স্বকীয় বংশের পূর্বতন গৌরবের পুনঃপ্রতিষ্ঠার জন্য ইংরেজের অধীনতাপাশের উচ্ছেদে কৃতসঙ্কল্প হইয়া উঠিতে পারেন এবং মহারাজপুর ও পনিয়ারের যুদ্ধে পরাজয়ের প্রতিশোধ দিবার জন্য আপনার সৈন্যসংখ্যা বৃদ্ধি করিতে পারেন। এইরূপে চারি দিকেই তাঁহার প্রলোভনের বিষয় ছিল। সূতরাং মহারাজ শিন্দের বিষয় ভাবিয়া, আগরার কর্তৃপক্ষ যেরূপ চিন্তিত হইলেন, লোকেও সেইরূপ সন্দেহসমাকুল হইয়া উঠিল। “মহারাজ শিন্দে এখন কি করিবেন?” ইহাই সকল স্থানে সকলে ওৎসুক্যসহকারে জিজ্ঞাসা করিতে লাগিল।

উপস্থিত সময়ে মহারাজ জয়াজী রাও শিন্দের বয়স ২৩ বৎসর হইয়াছিল। যাঁহাদিগের বংশ বীরত্বগৌরবে চিরপ্রসিদ্ধ, যাঁহাদের পূর্বপুরুষগণ বীরোচিত গুণগ্রামের জন্য বীরেন্দ্রসমাজের বরণীয়, এই তরুণ বয়সে তাঁহাদের সমরানুরাগ বর্দ্ধিত হয় এবং তাঁহারা বীরত্বের পরিচয় দিতে আগ্রহযুক্ত হইয়া থাকেন।

প্রাকৃতিক নিয়মানুসারে মহারাজ শিন্দের বয়োবৃদ্ধির সহিত এই অনুরাগ বৃদ্ধিত এবং তাঁহার শক্তিবিকাশের সহিত এই আগ্রহ বদ্ধমূল হইতে পারে। কিন্তু তিনি যে সময়ে সংসারক্ষেত্রে প্রাদুর্ভূত হইয়াছিলেন, সেই সময় তাঁহার উক্তরূপ আগ্রহপ্রকাশের অনুকূল ছিল না। উপস্থিত সময়ের ভারতবর্ষ পঞ্চাশ বৎসর পূর্বের ভারতবর্ষ অপেক্ষা সর্বাংশে ভিন্নরূপ ছিল। মহারাজ শিন্দে যদি পঞ্চাশৎ বৎসর পূর্বে কর্মক্ষেত্রে অবতীর্ণ হইতেন, তাহা হইলে তাঁহার চরিত ঘটনাবৈচিত্র্যে পরিপূর্ণ হইত। কিন্তু উপস্থিত সময়ে ইংরেজের প্রাধাণ্যে ভারতীয় ভূপতিবর্গের ক্ষমতা সঙ্কুচিত হইয়াছিল। তাঁহাদের যাবতীয় রাজকার্যের পরিদর্শনের জন্ত ইংরেজ রেসিডেন্ট ছিলেন। তাঁহাদের সৈনিকদলের পরিচালনার জন্ত ইংরেজ সেনানায়কগণ নিয়োজিত হইতেন। সর্বোপরি ভারতের ইংরেজ গবর্নর-জেনারেল তাঁহাদের সর্বপ্রকার কার্যের প্রতি সর্বদা দৃষ্টি রাখিতেন। এ সময়ে কেবল ইংরেজই অপ্রতিহতভাবে রাজকীয় শক্তির বিনিয়োগ করিতেন। কেবল ইংরেজ সৈনিকপুরুষগণই যাবতীয় যুদ্ধসংক্রান্ত ক্ষমতার পরিচালক ছিলেন। রাজপুত, মহারাষ্ট্রীয়, শিখ, পাঠান অথবা ভারতের অণু কোন জাতি স্বাধিকার বৃদ্ধির জন্তই হউক, স্বকীয় ক্ষমতা বদ্ধমূল করিবার নিমিত্তই হউক, পরস্পরের প্রতিদ্বন্দ্বী হইয়া যুদ্ধক্ষেত্রে অবতীর্ণ হইতে পারিতেন না। ইংরেজ ইহাদের ক্ষমতা সঙ্কুচিতভাবে রাখিয়া আপনাই সমগ্র সাম্রাজ্যের রক্ষার ভার গ্রহণ করিয়াছিলেন। সুতরাং সামরিক গুণে অনঙ্কত ও সামরিক কার্যে অনুরক্ত হইলেও, মহারাজ শিন্দে সমরসজ্জার আয়োজন ও সমরক্ষেত্রে গমনের সুযোগ প্রাপ্ত হইয়েন নাই। তিনি পুস্তক অধ্যয়নে, পরিচ্ছদপরিপাট্যে, বন্ধুগণের সহিত নানা আমোদে, এবং সৈনিকবর্গের সহিত সামরিক ক্রীড়াকৌশলে পরিতৃপ্ত থাকিতেন।

কিন্তু সামরিক ব্যাপারে অনুরাগ থাকিলেও, মহারাজ জয়াজী রাও গবর্ন-মেন্টের বিরুদ্ধে সমরসজ্জার আয়োজন করেন নাই। পূর্বপুরুষের বীরত্বগৌরব তাঁহার সাহসের উদ্দীপক ছিল। মহারাজপুর যুদ্ধক্ষেত্রের কথা তাঁহার স্মৃতিপটে অঙ্কিত রহিয়াছিল। তাঁহার স্বদেশীয় বীরপুরুষগণ এক সময়ে যুদ্ধক্ষেত্রে অবতীর্ণ হইয়া, “বীরভোগ্যা বসুন্ধরা” এই বাক্য সার্থক করিয়া তুলিয়াছিলেন। এ বিষয় তাঁহার কল্পনার উত্তেজক হইয়াছিল। কিন্তু এইরূপ উদ্দীপনা,



এইরূপ উদ্বেজনা এবং এইরূপ পূর্বস্বতির কারণ বর্তমান থাকিলেও, উপস্থিত সময়ে তরুণবয়স্ক মহারাজ শিন্দের হৃদয় বিচলিত হয় নাই। যদি তিনি উদ্ধত, অদূরদর্শী ও চঞ্চলপ্রকৃতি লোকের পরামর্শে পরিচালিত হইতেন, তাহা হইলে তাঁহার নিজের ও তদীয় প্রজাবর্গের অনিষ্ট ঘটবার সম্ভাবনা ছিল। কিন্তু সৌভাগ্যক্রমে এ সময়ে এক জন দূরদর্শী, প্রশান্তপ্রকৃতি রাজনীতিজ্ঞ তাঁহার পরিচালক হইয়াছিলেন। সম্রাট আকবর তরুণবয়সে বিস্তৃত রাজ্যের শাসনভার গ্রহণ করেন। আবুলফজল তাঁহার প্রধান মন্ত্রণাদাতা হওয়াতে তদীয় সাম্রাজ্যের বলবৃদ্ধি হয়, শাসনশৃঙ্খলায় সমগ্রজনপদ সুব্যবস্থিত হইয়া উঠে। ভারতবর্ষে ঊনবিংশ শতাব্দীর ঘোরতর বিপত্তিময় সময়ে আবুলফজলের অভাব ছিল না। মধ্যভারতবর্ষে দিনকর রাও যেমন মহারাজ শিন্দের পরিচালক ছিলেন, দক্ষিণাপথে সলারজঙ্গ সেইরূপ নিজামের রাজ্য সুশৃঙ্খলভাবে রাখিয়াছিলেন। রাজ্যশাসনে দিনকর রাওয়ের যেরূপ অভিজ্ঞতা, যেরূপ দূরদর্শিতা, সেইরূপ ক্ষমতা ছিল। কয়েক বৎসরের মধ্যে তাঁহার যত্নে প্রজাবর্গের সবিশেষ উন্নতি সাধিত হয়। তিনি প্রজালোকের দারিদ্র্যদশামোচন করেন, এবং মহারাজ শিন্দের রাজ্য এরূপ সুশৃঙ্খল করিয়া তুলেন যে, ব্রিটিশশাসিত সর্কাপেক্ষা ক্রীসম্পন্ন জনপদ অপেক্ষা উক্ত রাজ্য কোন অংশে নিকৃষ্ট বলিয়া পরিগণিত হয় নাই। পলিটিকাল এজেন্ট সাহেব তাঁহাকে ভারতবাসীদিগের মধ্যে সর্কাপেক্ষা ক্ষমতাপন্ন ও সর্কাপেক্ষা যোগ্যপুরুষ বলিয়া নির্দেশ করেন। মহারাজ শিন্দের রাজ্যে সর্বপ্রথম এই ক্ষমতাপন্ন কর্মচারীর কার্যকাল দীর্ঘস্থায়ী হয় নাই। মহারাজের দরবারে যে সকল কর্মচারী স্থায়মার্গ হইতে পরিত্রষ্ট ছিলেন, তাঁহারা মন্ত্রিপ্রবর দিনকর রাওকে দেখিতে পারিতেন না। যেহেতু দিনকর রাও তাঁহাদের অবৈধ উপায়ে আয়ের পথ অবরুদ্ধ করিয়া দিয়াছিলেন। এইরূপ অপকর্মের প্রশ্রয়দাতাদিগের কুমন্ত্রণায় পরমবিখ্যাত মন্ত্রী ইন্দোরের দরবার হইতে অপসারিত হইলেন। কিন্তু তাঁহার অপসারণে রাজ্যের শৃঙ্খলা রক্ষিত হয় নাই। দিনকর রাও দুই বৎসরের মধ্যে রাজ্যে যে সকল সুনিয়ম স্থাপন করিয়াছিলেন, তৎসমুদয় অন্তর্হিত হয়। রাজ্যের যাবতীয় কর্ম দাতিশয় বিশৃঙ্খল হইয়া উঠে। মহারাজ শিন্দে নানারূপ গোলযোগে বিভ্রান্ত হইয়া পড়েন। তখন তিনি আপনার ভ্রম বুঝিতে পারেন। তাঁহার উদ্বোধ হয় যে, বিখ্যাত

মন্ত্রীকে পদচ্যুত করাতে রাজ্যের এইরূপ শৃঙ্খলাহানি ঘটয়াছে । দিনকর রাও অবিলম্বে প্রধান মন্ত্রীর পদে পুনঃপ্রতিষ্ঠিত হইলেন । এ দিকে মেজর ম্যাকফারসন্ সাহেব ইন্দোরের দরবারের পলিটিকাল এজেন্টের কার্যভার গ্রহণ করেন । মেজর ম্যাকফারসন্ খন্দদিগের মধ্যে অবস্থিতি করিয়া, তাহাদের নরবলিপ্রথা তুলিয়া দিতে মনোযোগী হইয়াছিলেন । তাঁহার যত্নে এই ভয়ঙ্কর প্রথা তিরোহিত হয় । তিনি এইরূপে মানবকুলের হিতসাধন করিয়া একটি প্রধান প্রদেশীয় ভূপতির শাসনশৃঙ্খলা পরিদর্শনার্থে নিয়োজিত হইলেন । তাঁহার সহিত তরুণ-বয়স্ক মহারাজ ও তদীয় অভিজ্ঞ প্রধান মন্ত্রীর সন্ডাব বর্দ্ধিত হয় । তিনি দিনকর রাওকে বিপদকালে প্রধান সহায় ও সম্পদের সময়ে প্রধান আত্মীয় ভাবিয়া কৰ্মক্ষেত্রে স্বকীয় অভ্যস্ত কৰ্মপটুতার পরিচয় দিতে উত্তত হইলেন ।

এই সময়ে মহারাজ শিন্দে ব্রিটিশাধিকৃত ভারতের রাজধানীতে উপস্থিত হইয়া গবর্নর-জেনেরল লর্ড ক্যানিংয়ের সহিত সাক্ষাৎ করেন । তিনি কলিকাতায় ইংরেজের আধিপত্য ও ক্ষমতার পরিচয় প্রাপ্ত হইলেন, এবং ভারতের সর্বপ্রধান রাজপুরুষের বিনয়সৌজন্ত ও আতিথেয়তায় পদম পরিতোষ লাভ করেন । সুতরাং ইংরেজের উপর মহারাজ শিন্দের কোনরূপ বিরাগের কারণ ঘটে নাই । পূর্বে উক্ত হইয়াছে যে, সিপাহীদিগের মধ্যে সর্বপ্রথম উদ্ভেজনা পরিস্ফুট হইলে মহারাজ শিন্দে, গোবালিয়রের সৈন্ত উত্তরপশ্চিম-প্রদেশের লেফটেনেন্ট-গবর্নরের সাহায্যার্থ প্রস্তুত রাখেন । কিন্তু এই সৈন্তের উপর রেসিডেন্ট ম্যাকফারসন্ সাহেবের সন্দেহ জন্মিয়াছিল । যেহেতু ইহারা কোম্পানির পদাতি সিপাহীদিগের সহিত এক শ্রেণীতে সমাবেশিত ও একবিধ উপকরণে সজ্জিত ছিল । এজন্য রেসিডেন্ট সাহেব মহারাজ শিন্দের নিকটে তাঁহার নিজের শরীররক্ষক সৈনিকদল পাঠাইবার প্রার্থনা করেন । মহারাজ জয়াজী রাও এই প্রার্থনাপূরণে কিছুমাত্র ওদাস্ত প্রকাশ করেন নাই । তাঁহার সজাতীয়গণ তদীয় শরীররক্ষার ভার গ্রহণ করিয়াছিল । তিনি ইহাদের সামরিক কৌশলে আমোদিত হইতেন, ইহাদের অঙ্গচালনার চাতুরী দর্শনে পরিতোষ প্রকাশ করিতেন, ইহাদিগকে সুসজ্জিত করিতে মুক্তহস্ত হইতেন, এবং ইহাদের গৌরবে আপনাকে গৌরবান্বিত বোধ করিতেন । তাঁহার এইরূপ আদর ও প্রীতির পাত্রগণ যখন তদীয় রাজধানী হইতে যাত্রা করে,

তখন তিনি আত্মগোরবে আমোদিত হইয়া, কিয়দূর পর্য্যন্ত ইহাদের অনুগমন করেন । গোবালিয়রে ইংরেজের যে সৈন্য ছিল, তাহাদের উপর মহারাজ বা রেসিডেন্টের বিশ্বাস ছিল না । কোম্পানির সিপাহীদিগের প্রতি তাহাদের সমবেদনা ছিল । তাহারা ঔষুক্যসহকারে ঐ সকল সিপাহীর সংবাদ লইত । কথিত আছে, উপস্থিত সময়ে তাহারা রাত্ৰিকালে পরস্পর সমবেত হইত, পবিত্র গঙ্গাজল হস্তে লইয়া, ইংরেজের বিরুদ্ধে সমুখিত হইবার জন্য শপথ করিত, দিল্লী বা কলিকাতা হইতে আগত চরদিগকে আদরসহকারে গ্রহণপূর্ব্বক তাহাদের সহিত নানারূপ পরামর্শে ব্যাপ্ত থাকিত । তাহারা আপনাদের সনাতন ধর্ম্মের বিলোপের আশঙ্কায় বিচলিত হইয়াছিল, সমভাবে প্রতিজ্ঞাপাশে আবদ্ধ হইয়া ইংরেজের নিধন বা নিষ্কাশনের উপায় দেখিতেছিল । মহারাজ জয়াজী রাও তাহাদের চরিত্রে সন্দেহান হইয়াছিলেন । রেসিডেন্ট ম্যাকফারসন্ সাহেব তাহাদের উপর বিশ্বাসস্থাপনে অমত প্রকাশ করিয়াছিলেন । তথাপি তাহাদের পরিচালক ব্রিগেডিয়ার রামজে এবং তদীয় আফিসারগণ এইরূপ সন্দেহ বা অবিশ্বাসের বশবর্তী হইয়েন নাই । কিন্তু রেসিডেন্ট স্থির থাকিতে না পারিয়া, আপনাদের কুলমহিলা ও বালকবালিকাদিগকে কোন নিরাপদ স্থানে রাখিতে ইচ্ছা করিলেন । রেসিডেন্টের আবাসগৃহ এই উদ্দেশ্যে নির্দিষ্ট হইল । গোবালিয়রস্থিত কোম্পানির সৈনিকগণ উক্ত স্থানের রক্ষক ছিল । তাহাদের পরিবর্তে দরবারের খাস সৈনিকদিগকে রাখিবার প্রস্তাব হইল । রেসিডেন্ট যখন এই বিষয় ব্রিগেডিয়ার রামজেকে জানাইলেন, তখন ব্রিগেডিয়ার এতদ্বারা সিপাহীদিগের উপর বিশ্বাসের হানি হইবে, সিপাহীগণ ইহাতে উত্তেজিত হইয়া উঠিবে বলিয়া, উক্ত প্রস্তাবে আপত্তি প্রকাশ করিলেন ।

মহারাজের প্রাসাদ লঙ্করে অবস্থিত । মোরারে সৈনিকনিবাস । লঙ্কর হইতে মোরার প্রায় ছয় মাইল দূরবর্তী । মহারাজ এই দূরবর্তী সৈনিকনিবাসের ইউরোপীয়দিগকে নিরাপদ করিতে সর্বদা সচেষ্ট থাকিতেন । ২০শে মে সৈনিকনিবাসে সহসা গোলযোগ ঘটিল । লোকে আতঙ্কগ্রস্ত হইয়া উঠিল । ইউরোপীয় বালকবালিকা ও কুলমহিলারা সতয়ে আপনাদের জীবন-রক্ষার জন্য রেসিডেন্সির অভিমুখে ধাবিত হইল । ইউরোপীয়গণ ভাবিয়া-

ছিলেন যে, গোবালিয়রের সৈন্য ঐ রাত্রিতে তাহাদের বিরুদ্ধে সমুথিত হইবে। কিন্তু এইরূপ ধারণা শেষে অলীক বলিয়া প্রতিপন্ন হইল। সিপাহীগণ ঐ সময়ে ইউরোপীয়দিগের বিরুদ্ধে অস্ত্রধারণ করিল না। সৈনিকনিবাস যুদ্ধোন্মুখ সৈনিকদিগের সমুখানে বিশৃঙ্খল হইল না। ইংরেজেরা আপনাদের অলীক আতঙ্কে আপনাই লজ্জিত হইলেন। যাহা হউক, যখন এই ঘটনার সংবাদ মহারাজ শিন্দের গোচর হইল, তখন তিনি অবিলম্বে কতিপয় সৈনিকে পরিবেষ্টিত হইয়া অশ্বারোহণে রেসিডেন্টের আবাসগৃহে উপস্থিত হইলেন, এবং ঐ স্থান রক্ষার জন্ত উহার চারি দিকে সৈনিকদিগকে সন্নিবেশিত করিয়া, রেসিডেন্টকে আপনার প্রাসাদসংলগ্ন সুবিস্তৃত গৃহে বালকবালিকা ও কুলমহিলাদিগকে পাঠাইতে অনুরোধ করিলেন। পরদিন মহিলাগণ আপনাদের সন্তানদিগকে লইয়া মহারাজের নির্দিষ্ট প্রাসাদে উপস্থিত হইলেন। কিন্তু সিপাহীগণ ইহাতে সাতিশয় আপত্তি করিতে লাগিল। তাহারা কহিতে লাগিল যে, কুলমহিলাদিগকে এইরূপে স্থানান্তরিত করাতে তাহাদের বিশ্বস্ততার উপর সন্দেহ করা হইয়াছে। তাহাদের নির্বন্ধাতিশয়ে আফিসারদিগের মতপরিবর্তন হইল। আফিসারগণ আপনাদের পরিবারবর্গকে পুনর্বার সৈনিকনিবাসে আনয়ন করিলেন। তরুণবয়স্ক মহারাজ আপনার রাজধানীস্থিত অসহায় ইংরেজগণ ও তাঁহাদের পরিবারবর্গের রক্ষার জন্ত সর্বিশেষ যত্নশীল ছিলেন। তিনি তাঁহাদের অবস্থিতির জন্ত আপনার প্রশস্ত প্রাসাদ ছাড়িয়া দিয়াছিলেন। তাঁহাদের রক্ষার জন্ত আপনার বিশ্বস্ত লোকদিগকে নিযুক্ত করিয়াছিলেন। তাঁহাদের সর্বপ্রকার সুবিধা ও সন্তোষের জন্ত আবশ্যিক দ্রব্যাদি সংগ্রহ করিয়া রাখিয়াছিলেন। এইরূপে তাঁহার যত্নে ও আগ্রহে যাহা হইতে পারে, তিনি তৎসমুদয়েরই অনুষ্ঠান করিয়াছিলেন। কিন্তু ইউরোপীয়দিগের মধ্যে কেহ কেহ এই সদাশয় হিতৈষী ভূপতির প্রতিও সন্তোষ প্রকাশ করেন নাই। কুপলাণ্ডনামক এক জন খৃষ্ট-ধর্ম-প্রচারক এবং তাঁহার সহধর্মিণী এই সময়ে মহারাজ শিন্দের রাজধানীতে অবস্থিতি করিতেছিলেন। কুপলাণ্ডপত্নী এইরূপ স্পষ্ট ভাষায় মহারাজের প্রতি অসন্তোষের কারণ নির্দেশ করিয়াছেন—

“হর্ভাগ্যক্রমে মহারাজ হিন্দু, এজন্ত গোক তাঁহার নিকটে পবিত্র বলিয়া পরিগণিত। আমরা তাঁহার রাজ্যে গোমাংস খাইতে পারি না। উহা কখন

কখন কেবল আগরা হইতে আমাদের জন্ত আইসে। এইরূপ বিরক্তিজনক কুসংস্কারের জন্ত মহারাজের উপর আমার যে, কিরূপ আক্রোশ জন্মিয়াছে, তাহা তাঁহার জানা উচিত।” পত্নী চিরপ্রিয় গোমাংস না পাওয়াতে মহারাজের উপর এইরূপ জাতক্রোধ হইয়াছিল। পতি ভারতবাসীদিগের উপর অত্যাচারে ক্রোধপ্রকাশ করিয়াছিলেন। তিনি ১৭ই মে গোবালিয়র হইতে এই ভাবে লিখিয়াছিলেন—“মিরাট এবং দিল্লীর সিপাহীদিগের সমুখানে পরমেশ্বর নির্জীব পৌত্তলিক এবং অতি নিকৃষ্ট কুসংস্কারে আচ্ছন্ন (দৃষ্টান্তস্বরূপ বলা যাইতে পারে যে, হিন্দুরাজ্যে গোবধ নিষিদ্ধ) লোকদিগকে ঘোরতর শাস্তি দিবেন।” \* যিনি খৃষ্ট-ধর্ম-প্রচারে ব্রতী হইয়াছিলেন, তিনি এইরূপে সেই ধর্মের মাহাত্ম্য-রক্ষার চেষ্টা করিয়াছিলেন। সমদর্শিতা, উদারতা ও সার্বজনীন দয়া যে ধর্মের ভিত্তি, সেই ধর্মের প্রচারভার এইরূপ ব্যক্তির হস্তে ব্রহ্ম হইয়াছিল, এবং এইরূপ ব্যক্তিই আপনাদের ভোগাভিলাষসিদ্ধির জন্ত ভারতবাসীদিগকে সমূলে বিনষ্ট করিবার ব্যবস্থা করিয়া, স্বকীয় ধর্মের গৌরব দেখাইতে প্রবৃত্ত হইয়াছিলেন।

পূর্বে উক্ত হইয়াছে যে, ব্রিগেডিয়ার রামজে উপস্থিত সময়ে আত্মরক্ষা-সম্বন্ধে কোনরূপ কার্য করা আবশ্যিক বোধ করেন নাই। গোবালিয়রের সৈনিকদলের উপর তাঁহার প্রগাঢ় বিশ্বাস ছিল। রেসিডেন্ট সাহেব মহারাজ শিন্দের শরীররক্ষক সৈনিকদিগকে কিরাইয়া পাঠাইতে লেফটেনেন্ট-গবর্নর কল্বিন্ সাহেবের নিকটে টেলিগ্রাম করেন। এই টেলিগ্রামের বিষয় ব্রিগেডিয়ারের গোচর করা হয়। কিন্তু ব্রিগেডিয়ার ইহাতে লেফটেনেন্ট-গবর্নরের নিকট লিখিয়া পাঠান যে, এখানে কোন গোলযোগ নাই। সৈনিকদিগের উপর বিশ্বাস ক্রমে বাড়িতেছে। শিন্দে বোধ হয়, সিপাহীদিগকে দূর করিয়া, আপনার বলবৃদ্ধি করিবার চেষ্টা করিতেছেন। এই পত্রানুসারে লেফটেনেন্ট-গবর্নর গোবালিয়রে এই মর্মে টেলিগ্রাম পাঠাইলেন যে, সিপাহীগণ প্রকাশ-ভাবে গবর্নমেন্টের বিরুদ্ধে সমুখিত না হইলে কুলমহিলা ও বালকবালিকাদিগকে যেন আগরায় পাঠান না হয়।

\* *Martin, Indian Empire, Vol. II. p. 335, note.*

এইরূপে গোবালিয়রস্থিত ইউরোপীয়দিগের অদৃষ্টচক্র আবর্তিত হইল। ব্রিগেডিয়ার যাহাদের উপর বিশ্বাসস্থাপন করিয়াছিলেন এবং যাহাদের ব্যবহারে আত্মবিশ্বাস বৃদ্ধি পাইতেছে বলিয়া, লেফটেনেন্ট-গবর্নর মহোদয়ের নিকটে লিখিয়াছিলেন, এখন তাঁহার সেই বিশ্বাসের পাত্র ও বিশ্বাসবৃদ্ধিকারিগণই বিরক্তি ও বিদ্বেষবুদ্ধির পরিচয় দিতে উদ্বৃত হইল। প্রদেশীয় রাজাদিগের অধিকারে ব্রিটিশ গবর্নমেন্টের যে সকল সৈনিকদল থাকিত, জুন মাসের প্রথমাৰ্দ্ধে তাহাদের অনেকেই শত্রুতাচরণে উদ্বৃত হয়। ৪ঠা জুন নীমচে একদল সৈন্ত উদ্ভেজিত হইয়া উঠে। ৭ই একদল ঝাঁসিতে ইংরেজের বিরুদ্ধে অস্ত্র ধারণ করে। সিপ্রি এবং জব্বলপুরের দলের মধ্যেও শত্রুতাচরণের নিদর্শন লক্ষিত হয়। এতদ্ব্যতীত ব্রিটিশাধিকৃত জনপদ হইতে প্রত্যহ ভয়ঙ্কর সংবাদ লেফটেনেন্ট-গবর্নরের নিকটে উপস্থিত হইতে থাকে। অনেক স্থানেই ইংরেজদিগের কেহ কেহ নিহত হইয়েন, কেহ কেহ বা প্রাণভয়ে পলায়ন করেন। তাঁহাদের ক্ষমতা ও আধিপত্য অনেক স্থানেই বিলুপ্ত হইয়া যায়। বিলুপ্তপ্রিয় লোকের আক্রমণে অনেক স্থানই বিশৃঙ্খল হইয়া উঠে।

এই সময়ে অদূরদর্শী জনসাধারণের বিশ্বাস জন্মিয়াছিল যে, ভারতবর্ষে ইংরেজের ক্ষমতা ও আধিপত্য অন্তর্হিতপ্রায় হইয়াছে। গোবালিয়রে অনেকের মনে এইরূপ বিশ্বাস বদ্ধমূল হইয়াছিল। ইহারা এজন্ত উৎসাহিত হইয়া মহারাজ শিন্দেকে আপনাদের পক্ষে আনিতে চেষ্টা করে। কিন্তু দূরদর্শী দিনকর রাও এই সময়ে রাজ্যরক্ষার প্রধান অবলম্বন ছিলেন। গবর্নমেন্টের বিপক্ষগণ ইঁহার অভ্যুদয়ে চিন্তিত হইয়াছিল। ইঁহার প্রাধান্যদর্শনে বিরক্ত হইয়া উঠিয়াছিল। ইঁহাকে ব্রিটিশ গবর্নমেন্টের একান্ত অনুরক্ত ও ব্রিটিশ গবর্নমেন্টের পক্ষসমর্থনকারী জানিয়া, ইঁহার প্রতি নিরতিশয় ক্রোধ প্রকাশ করিতেছিল। ইহারা এইরূপে চিন্তিত, বিরক্ত ও ক্রুদ্ধ হইয়া উঠিয়াছিল। কিন্তু দিনকর রাও কিছুমাত্র বিচলিত হইলেন না। বিপক্ষগণ মনে করিয়াছিল যে, ইহারা মহারাজকে এই বলিয়া বুঝাইবে যে, ইংরেজদিগের নিষ্কাশনে তাঁহার ক্ষমতা ও প্রাধান্য যখন বৃদ্ধিত হইবে, তখন বিজয়ী সিপাহীদিগের সহিত সন্মিলিত না হওয়া তাঁহার পক্ষে একান্ত নিবুদ্ধিতার কার্য। তাহারা তরুণবয়স্ক মহারাজকে এইরূপ নানা প্রলোভন দেখাইতে লাগিল। মহারাজ তাহাদের কথা

শুনিলেন । তাহাদের কথার যথাযোগ্য উত্তর দিলেন । তাহাদিগকে স্থিরভাবে থাকিতে কহিলেন । কিন্তু কোমরুপে তাহাদের পক্ষসমর্থন বা উৎসাহবর্ধন করিলেন না । মহারাজের এইরূপ প্রশান্তভাবে দরবারের সৈনিকগণ সহসা কোনরূপ গোলযোগ ঘটাইল না । কিন্তু সৈনিকনিবাসে যে সকল সিপাহী ইংরেজ সৈন্যধাক্কের অধীন ছিল, মহারাজ এবং রেসিডেন্ট সাহেব তাহাদের উপর সন্দেহ প্রকাশ করিয়াছিলেন, তাহারা দীর্ঘকাল স্থিরভাবে থাকিল না । তাহারা জাতীয় ধর্মনাশের আশঙ্কায় উত্তেজিত হইয়া উঠিয়াছিল, এখন এই উত্তেজনার পরিচয় দিবার প্রতীক্ষা করিতে লাগিল ।

১৪ই জুন রবিবার—এই রবিবার ধর্মনিষ্ঠ ইংরেজের নিকটে চিরপবিত্র বলিয়া পরিগণিত । উপস্থিত সময়ে এই পবিত্র দিনে নানা স্থানে ইংরেজদিগের দুর্গতির একশেষ হয় । ইংরেজেরা যখন উপাসনাগৃহে সমবেত হইয়া, ঈশ্বরের আরাধনায় নিবিষ্টচিত্ত হইলেন, তখন উত্তেজিত সিপাহীগণ স্মরণ বুঝিয়া, তাহাদিগকে আক্রমণ করে । ১৪ই জুন রবিবার গোবালিয়রেও এই ভয়ঙ্কর দৃশ্যের আবির্ভাব হয় । ঐ দিন গোবালিয়রের খৃষ্টধর্মাবলম্বীরা উপাসনামন্দিরে গমনপূর্বক আপনাদের পবিত্র কর্তব্য সম্পাদন করেন । প্রাতঃকালে এক জন ইংরেজ সেনানায়কের একটি শিশুপুত্রের সমাধি হয় । গোবালিয়রের অনেক ইউরোপীয় সমাধিস্থানে গমন করেন । সৈনিকনিবাসের সিপাহীগণ প্রশান্তভাবে ইহাদিগকে সমাধিক্ষেত্রে বাইতে দেখে এবং প্রশান্তভাবে ইহাদের শোচনীয় ঘটনার সমবেদনার চিহ্ন প্রকাশ করে । কিন্তু তাহাদের এই প্রশান্ততাব শীঘ্র অন্তর্হিত হয়, সমবেদনার চিহ্নও শীঘ্র বিলুপ্ত হইয়া যায় । বিনা গোলযোগে দিন অতিবাহিত হয় । কিন্তু সায়ংকালে সমগ্র সৈনিকনিবাস বিশৃঙ্খল ও গোলযোগে পূর্ণ হইয়া উঠে । ইউরোপীয়গণ তাহাদিগকে আক্রমণ করিতে আসিতেছে, এইরূপ জনরবে একান্ত অধীর হইয়া, তাহারা বিকট চীৎকার করিতে করিতে চারি দিকে ধাবিত হয় । গোবালিয়রেরা সমস্তই আপনাদের কামান সজ্জিত করিতে থাকে । পদাতিগণ আপনাদের বন্দুক গ্রহণ করে । চারি দিকের ভয়াবহ কোলাহল, বন্দুকের শব্দ, ধুমোদগম সারস্তন শাস্তি দূরীভূত করিয়া, ইউরোপীয়দিগকে যার পর নাই আতঙ্কগ্রস্ত করে । আফিসারগণ এই সময়ে বিশ্রামস্থল উপভোগ করিতেছিলেন । তাহারা সহসা

কলরবে ও অস্ত্রাদির শব্দে সন্ত্রস্ত হইয়া, সামরিক পরিচ্ছদ পরিধানপূর্বক সৈনিকনিবাসের অভিমুখে ধাবিত হইলেন। ইহাদের কেহ কেহ আবাসগৃহে প্রত্যাবর্তিত বা স্বদেশীয়গণের দৃষ্টিপথবর্তী হইলেন না। অধিনায়কদিগের মধ্যে অনেকেই নিহত হইলেন। মহিলা ও বালকবালিকারা নিরাপদ স্থান প্রাপ্তির আশায় তাড়াতাড়ি গৃহ হইতে বাহির হইল। কিন্তু সিপাহীরা এই গভীর উত্তেজনার সময়ে হৃদয়ের সদ্গুণে এক বারে বিসর্জন দেয় নাই। মেজর ব্লেকনামক এক জন অধিনায়ক দ্বিতীয় পদাতিদলের পরিচালক ছিলেন। এই দলের সিপাহীগণ তাঁহার প্রতি সাতিশয় অনুরক্ত ছিল। তিনি অপর দলের সৈনিকগণকর্তৃক নিহত হইলেন। ইহাতে তাঁহার দলের সৈনিকগণ একরূপ ক্ষুব্ধ হয় যে, তাহারা স্বতঃপ্রবৃত্ত হইয়া তদীয় অন্ত্যেষ্টিক্রিয়ার সুবন্দোবস্ত করিয়া দেয়। ইহাদের অদৃষ্ট অপেক্ষাকৃত প্রসন্ন ছিল, তাঁহারা রেসিডেন্সিতে বা মহারাজ শিল্পের প্রাসাদে গিয়া আশ্রয়লাভ করেন। এ সময়ে কোন কোন সিপাহী দম্মা ও সৌজন্তের পরিচয় দিতে বিমুগ্ধ হয় নাই। কতিপয় সিপাহী মৃত ও মূম্বু অধিনায়কদিগকে হাসপাতালে লইয়া যাইবার চেষ্টা করে। ইহাদের পরামর্শে তিন জন ইউরোপীয় পলায়নে উদ্বৃত্ত হইলেন। এক জন ইংরেজ অধিনায়ক পদব্রজে যাইতেছিলেন, সুতরাং তিনি তাড়াতাড়ি অগ্রসর হইতে পারিলেন না। তিন জন সিপাহী তাঁহার এই সঙ্কটাপন্ন অবস্থা দেখিল এবং মুহূর্ত্ত মাত্র বিলম্ব না করিয়া পলাতককে কহিল যে, তাহারা তদীয় জীবনরক্ষার জন্য সবিশেষ চেষ্টা করিবে। ইহা কহিয়াই, তাহারা বিপন্ন ইউরোপীয়ের টুপি ফেলিয়া দিল, পেশ্টুলুন ছিঁড়িয়া ফেলিল, জুতা দূরে নিক্ষেপ করিল, এবং তাহাকে ঘোড়ার পৃষ্ঠদেশের কাপড়ে সম্পূর্ণরূপে আচ্ছাদিত করিয়া দুই জনে কাঁধে লইয়া চলিল। তৃতীয় ব্যক্তি তাহাদের অগ্রে যাইতে লাগিল। যে সকল উত্তেজিত সিপাহীদিগের সহিত ইহাদের সাক্ষাৎ হইল, তাহাদিগকে কহিল যে, ইহারা আপনাদের এক জনের স্ত্রীকে লইয়া যাইতেছে। এইরূপে ইহারা যুদ্ধোন্মুখ সিপাহীদিগকে ছাড়াইয়া একটি নদী অতিক্রম পূর্বক নিরাপদে আপনাদের বহনীয় পদার্থ আনিল। অতঃপর তাহারা বিপন্ন পলাতককে আগ-রায় যাইতে কহিল। কিন্তু পলাতক আপনার সহধর্ম্মিনীকে পরিত্যাগ করিয়া কোথাও যাইতে স্বীকৃত হইলেন না। সিপাহীগণ এই বিপত্তিকালে তাঁহাকে



কাহারও জন্ত কোথাও প্রতীক্ষা না করিয়া সত্বর যাইতে কহিল। কিন্তু পলাতক কিছুতেই বিচলিত হইলেন না। তিনি পত্নীকে পরিত্যাগ করিয়া একপদও অগ্রসর হইতে সন্মত হইলেন না। তিন জন সিপাহী তাঁহার আগ্রহাতিশয় দেখিয়া, নদীর যে তটে উত্তেজিত সিপাহীগণ পলাতক ইউরোপীয়দিগকে ধরিবার জন্ত অবস্থিতি করিতেছিল, তাহার অপর তটে উক্ত ইউরোপীয়কে লইয়া গেল। অনন্তর এক জন সিপাহী তাহাকে কহিল, “যদি আপনার স্ত্রী জীবিত থাকেন, তাহা হইলে আমি এখনই তাঁহাকে আপনার নিকটে আনিয়া দিতেছি।” এই বলিয়া সিপাহী চলিয়া গেল। কুড়ি মিনিটের মধ্যে উক্ত ইউরোপীয়ের পত্নী স্বামীর সহিত সন্মিলিত হইলেন। তাঁহাদের গৃহ বিনুষ্টিত হইয়াছিল; টাকাকড়ি যাহা কিছু এক জন বিশ্বস্ত ভৃত্যের নিকটে ছিল, উত্তেজিত লোকে উক্ত ভৃত্যের নিকট হইতে তাহা কাড়িয়া লইয়াছিল। বিলুপ্তনপ্রিয় সিপাহীগণ উক্ত পলাতক ইউরোপীয়ের পত্নীর ঘড়ি ও চেন ছিনাইয়া লইয়াছিল। কিন্তু তাহাদের সমক্ষে তদীয় দেহ অক্ষতভাবে ছিল। উক্ত তিন জন সিপাহী এই দুর্দশাগ্রস্ত দম্পতির প্রতি দয়া ও সৌজন্তের একশেষ দেখায়। তাহারা পূর্বে ঘোড়ায় যে চাদরে পলাতককে আচ্ছাদিত করিয়াছিল, এখন সেই চাদর ব্যাগের মত করিয়া বন্দুকের সহিত বাঁধিল, এবং উহার মধ্যে পলাতকের পত্নীকে স্থাপন পূর্বক দুই জনে কাঁধে করিয়া লইয়া চলিল। বিপন্ন ইউরোপীয় নগ্নপদে এই অপূর্ব ডুলির পার্শ্বে পার্শ্বে যাইতে লাগিলেন। সিপাহীগণ এইরূপে ৭ মাইল পথ অতিক্রম পূর্বক রেসিডেন্সিতে উপস্থিত হইল। এই সময়ে আর তিন জন ইউরোপীয় পলাতক তাঁহাদের সহিত সন্মিলিত হইলেন। সৌভাগ্যক্রমে এই সময়ে একটি হাতী পাওয়া গেল। সকলে সেই হাতীতে চড়িয়া আশ্রয়লাভের উদ্দেশ্যে মহারাজের বাসস্থান লঙ্করের অভিমুখে যাত্রা করিলেন। তাঁহারা অর্ধক্রোশ পথ অতিক্রম করিয়াছেন, এমন সময়ে ছয় খানি ঘোড়ার গাড়ি তীরবেগে তাঁহাদের নিকটে উপস্থিত হইল। মহারাজের কতিপয় শরীররক্ষক সৈনিকপুরুষ এই সকল গাড়ির সঙ্গে ছিল। পলাতকগণ নিরাপদ হইলেন। উৎকৃষ্ট যান ও দেহরক্ষক উৎকৃষ্ট সৈনিকপুরুষ পাইয়া, তাঁহারা নিরুদ্বেগে আশ্রয়স্থানে উপনীত হইলেন। আরও অনেকগুলি ইউরোপীয়, কুলমহিলা ও বালকবালিকাদিগকে

লইয়া, ইঁহাদের সহিত সহিত মিলিত হইয়াছিলেন ।\* এইরূপে বিশ্বস্ত সিপাহী-দিগের সাহসে ও সৌজন্তে বিপন্ন বিদেশীয়দিগের জীবনরক্ষা হইল ।

এই ঘটনায় মহারাজ শিন্দে যেমন উদ্বিগ্ন, সেইরূপ ছঃখিত হইলেন । উপস্থিত সময়ে কি করিতে হইবে, তিনি সহসা তাহা নির্দ্ধারণ করিতে পারিলেন না । রেসিডেন্ট মাক্ফারসন্ সাহেব তাড়াতাড়ি মহারাজ শিন্দের প্রাসাদে উপনীত হইলেন । পথে কতিপয় গাজী তাঁহাকে আক্রমণ করিতে উদ্বৃত হইয়াছিল । কিন্তু এই সময়ে এক জন মহারাষ্ট্রীয়ের প্রত্যাৎপন্নমতিতে তিনি রক্ষা পাইলেন । উক্ত মহারাষ্ট্রীয়, আক্রমণকারীদিগকে কহিলেন যে, রেসিডেন্ট সাহেবকে বন্দী করিয়া মহারাজের নিকটে লইয়া যাওয়া হইতেছে । গাজীগণ এই কথায় নিরস্ত হইল । মাক্ফারসন্ সাহেব প্রাসাদে উপনীত হইয়া দেখিলেন যে, মহারাজ ও তাঁহার মন্ত্রী এক স্থানে উপবিষ্ট রহিয়াছেন । দরবারের সৈনিকগণ অস্ত্রশস্ত্রে সজ্জিত হইয়া, তাঁহাদের চারি দিকে দণ্ডায়মান রহিয়াছে । মহারাজ ও তদীয় মন্ত্রী উভয়েই চিন্তাকুল হইয়াছেন । রেসিডেন্ট সাহেব ইঁহাদের সহিত পরামর্শ করিতে লাগিলেন । পরামর্শে স্থির হইল যে, পলাতকদিগকে চম্বলের দিকে অথবা যদি সম্ভব হয়, আগরায় পাঠাইয়া দিবার জন্ত যথোপযুক্ত যান সংগ্রহ করা হইবে । মাক্ফারসন্ সাহেব একাকী মহারাজের নিকটে থাকিতে চাহিলেন, কিন্তু মহারাজ শিন্দে এই প্রস্তাবের বিরুদ্ধে আপত্তি করিতে লাগিলেন । মহারাজ ভাবিলেন যে, রেসিডেন্ট সাহেব তাঁহার নিকটে থাকিলে, উত্তেজিত সিপাহীগণ অধিকতর উত্তেজনার পরিচয় দিবে । তাহারা প্রাসাদ আক্রমণ করিবে এবং রেসিডেন্ট সাহেবের নিধনের জন্ত নানারূপ উপায় অবলম্বন করিতে থাকিবে । সুতরাং মহারাজ মাক্ফারসন্ সাহেবকে তাঁহার বহুমূল্য জীবন রক্ষার জন্ত পলায়ন করিতে পরামর্শ দিলেন । ইংরেজের পরিচালিত সিপাহীগণ ইংরেজের বিরুদ্ধে অস্ত্রধারণ করিয়াছিল । দরবারের সৈনিকগণ সম্বন্ধেও সন্দেহ করা হইয়াছিল । জনসাধারণ ইংরেজের আধিপত্য বিলুপ্ত হইল ভাবিয়া, অসংসাহসিক কার্যসাধনে অভিনিবিষ্ট হইয়াছিল । এসময়ে ইংরেজদিগের গোবালিয়রে থাকা সত্ত্বেও বোধ হইল না ।

\* *Martin, Indian Empire, Vol II. p. 338-339.*

সুতরাং রেসিডেন্ট সাহেব মহারাজের নিকট বিদায় লইলেন । মহারাজ যথোচিত অর্থ দ্বারা সিপাহীদিগকে সন্তোষিত করিয়া আপন আপন বাড়ীতে পাঠাইয়া দিবার প্রস্তাব করিলেন । কিন্তু রেসিডেন্ট সাহেব এই প্রস্তাবে সন্মত হইলেন না । তিনি সমগ্র সৈনিকদলকে গোবালিয়রে একত্র রাখিতে ইচ্ছা করিয়া কহিলেন যে, যাবৎ সৈনিকগণ আপনাদের কর্মস্থলে থাকিবে, তাবৎ তাহাদিগকে কর্মে বহাল রাখা যাইবে । এইরূপ আশ্বাস দিয়া, মহারাজ সিপাহীদিগকে গোবালিয়রে রাখিবেন । মহারাজ শিন্দে রেসিডেন্ট সাহেবের পরামর্শ অনুসারে কার্য্য করিতে প্রতিশ্রুত হইলেন । সুতরাং ইংরেজদিগের নিষ্কাশনের পর দরবারের ও সৈনিকনিবাসের সিপাহীগণ কিছু কাল গোবালিয়রে থাকিল । সিপাহীগণ অর্থ পাইয়া গোবালিয়র পরিত্যাগ করিলে নানারূপ আশঙ্কার কারণ বর্তমান থাকিবে । তাহারা হয় ত হানাস্তরে গিয়া, অপরাপর সিপাহীর দল পরিপুষ্ট করিবে । যে পর্য্যন্ত আগরা সুরক্ষিত, অথবা দিল্লী অধিকৃত না হয়, সে পর্য্যন্ত মাক্ফারসন্ সাহেব ঐ সকল সিপাহীকে কোনরূপে গোবালিয়রে রাখা সঙ্গত মনে করিয়াছিলেন । তাঁহার প্রস্তাবানুসারে এইরূপ কার্য্যপ্রণালী অবলম্বিত হইয়াছিল ।

পলাতকগণ গোবালিয়র হইতে চম্বলের অভিমুখে যাত্রা করিয়াছিলেন । ইঁহাদের চূর্দশার একশেষ হইয়াছিল । পতিপ্রাণা কামিনী পতি হইতে অনেক মত বিচ্ছিন্ন হইয়াছিলেন । সুখোচিত ও সৌভাগ্যে বর্দ্ধিত বালক-বালিকাগণ অনাথ হইয়াছিল । সৈনিকনিবাস পরিত্যাগকালে অনেকে নিহত হইয়াছিলেন । কিন্তু সিপাহীগণ গভীর উত্তেজনার আবেগে দয়াধর্ম্মে বিসর্জন দিলেও মহিলা বা বালকবালিকাদিগের প্রতি অস্ত্র প্রয়োগ করে নাই । ধর্ম্মপ্রচারক কুপলাও, এবং ও ডাক্তার কার্ক সাহেব সিপাহীদিগের অস্ত্রাঘাতে দেহত্যাগ করিয়াছিলেন, কিন্তু তাঁহাদের বনিভারা অক্ষত-শরীরে ছিলেন । স্ত্রীর সমক্ষে ডাক্তার সাহেব গুলির আঘাতে মৃত্যুমুখে পতিত হইলেন । তাঁহার পত্নী স্বামীর এইরূপ শোচনীয় পরিণাম দেখিয়া, উচ্চৈঃস্বরে বলিলেন, “আমাকেও মার” । সিপাহীগণ কহিল, “না” । ডাক্তার সাহেবের চারি বৎসর বয়সের পুত্র মাতার নিকটে ছিল । এক জন উত্তেজিত সিপাহী সহযোগীদিগকে কহিল, “বোঁচাকে ( শিশুকে ) মারিও না” । ডাক্তার সাহেব

প্রাণবিসর্জন করিলেন, তাঁহার পত্নী ও শিশুপুত্রের প্রাণ রক্ষা পাইল। কয়েকটি কুলমহিলা সিপাহীদিগকে আসিতে দেখিয়া তাহাদিগকে যোড়হস্তে কহিলেন, “মাৎ মারো, মাৎ মারো” (আমাদিগকে মারিও না)। সিপাহীগণ কহিল, ‘না, আমরা মেমসাহেবদিগকে মারিব না। কেবল সাহেবদিগকে মারিব’। কথিত আছে, সিপাহীগণ কুলমহিলাদিগের প্রতি অস্ত্রচালনা না করিলেও, তাহাদের টাকা বা অলঙ্কারাদি লইতে সঙ্কুচিত হয় নাই। কাহা হউক, পলাতকগণ শোচনীয় দশাগ্রস্ত হইয়া ভীতচিত্তে আপনাদের অভাবনীয় ছুরদৃষ্টের স্থান পরিত্যাগ করিলেন। পথেও তাঁহাদিগকে নানারূপ বিপন্ন হইতে হইল। চম্বলের দুই মাইল দূরবর্তী একটি পল্লীতে উপস্থিত হইলে, দুই শত গাজী পলাতকদিগকে আক্রমণ করিতে উদ্যত হয়। জাহাঙ্গীর খাঁ নামক এক জন হাবিলদার ইহাদের অধ্যক্ষতা গ্রহণ করে। এই ব্যক্তি পূর্বে গবর্ণমেন্টের সৈনিকবিভাগে নিয়োজিত ছিল। পরে মহারাজ শিন্দের দরবারে কর্ম গ্রহণ করে। জাহাঙ্গীর খাঁ সবুজ বর্ণের পরিচ্ছদ পরিয়া মাক্ফারসন্ সাহেবের নিকটে উপস্থিত হয়। এই ব্যক্তি প্রথমতঃ ইউরোপীয়দিগের কোনরূপ আঁনষ্ট করিবে না বলিয়া ভাণ করে, কিন্তু পলাতকগণ ইহাতে নিশ্চিত হইলেন নাই। সৌভাগ্যক্রমে দিনকর রাওর আদেশে ঠাকুর বলদেব সিংহ নামক এক জন বলিষ্ঠ বুদ্ধকুশল ব্রাহ্মণ আপনায় সশস্ত্র অমুচরদিগকে সঙ্গে লইয়া নিশীথকালে পলাতকদিগের নিকটে উপস্থিত হইলেন। ইঁহার আগমনে ইউরোপীয়গণ অনেকাংশে নিরুদ্ধেয় ও নিশ্চিত হইলেন। ঠাকুর বলদেব সিংহ কতিপয় অমুচরকে জাহাঙ্গীর খাঁর গতিবিধি পর্যবেক্ষণে নিয়োজিত করিলেন, এবং স্বয়ং অবশিষ্ট অমুচরদিগকে লইয়া ইউরোপীয়দিগের সঙ্গে চলিলেন। ইঁহার সাহায্যে ইউরোপীয়েরা চম্বলনদ পার হইলেন। মাক্ফারসনের প্রার্থনা অনুসারে ঢোলপুরের অধিপতি হস্তী ও শরীররক্ষক মৈত্র পাঠাইয়া দিয়াছিলেন। চম্বলের অপর তটে এই সকল হস্তী ও মৈত্র সজ্জিত ছিল। পলাতকগণ হস্তীতে আরোহণপূর্বক অগ্রসর হইলেন, শরীররক্ষক সৈনিকেরা ইঁহাদের সঙ্গে বাইতে লাগিল। ঢোলপুররাজ ইঁহাদের প্রতি দয়া ও সৌজন্দের একশেষ প্রদর্শন করিলেন। তাঁহার প্রেরিত বাহনে পরিশ্রান্ত ও সর্বাধিকার বিপন্ন পলাতকদিগের পথপ্রাপ্তি দূর হইল, তাঁহার সৈনিকগণের উপস্থিতিতে পলাতকদিগের সাহস বৃদ্ধি পাইল, তাঁহার যত্নে ও আগ্রহে

পলাতকগণের নিকটে গোবালিয়রের প্রকৃত সংবাদ উপস্থিত হইতে লাগিল। ১৫ই জুন আগরার কর্তৃপক্ষ উপস্থিত বিপ্লবের সংবাদ অবগত হইলেন। পলাতকগণ এইরূপে নানা বিঘ্নবিপত্তি অতিক্রমপূর্বক ১৭ই জুন আগরায় উপনীত হইলেন। ইহাদের অল্প ছুইদল যথাক্রমে ১৯শে ও ২২শে জুন নিরতিশয় শোচনীয় অবস্থায় আপনাদের নির্দিষ্ট স্থানে পদার্পণ করেন।

গোবালিয়রে সর্বসমেত ২০ জন ইউরোপীয় নিহত হয়। ইহাদের কাহারও দেহ কোনরূপে ছিন্নবিচ্ছিন্ন হয় নাই। মহারাজ শিন্দের আদেশে যথানিয়মে ইহাদের সমাধি হয়। পূর্বে উক্ত হইয়াছে যে, উত্তেজিত সিপাহীগণ আপনাদের এক জন অধিনায়ককে সমাধিস্থ করে। এই অধিনায়কের নাম মেজর ব্লেক। সিপাহীগণ ব্লেকের পত্নীর প্রতি সদ্যবহার করিতে বিমুখ হয় নাই। মেজর ব্লেকের মীর্জা নামক খিদ্মতগার এই সময়ে তদীয় বিধবা পত্নীর সহায় হয়। এইরূপ বিশ্বস্ততার জন্য গবর্ণমেন্ট অতঃপর ইহাকে পুরস্কৃত করেন।

পূর্বে উক্ত হইয়াছে যে, রেসিডেন্ট সাহেবের পরামর্শ অনুসারে মহারাজ শিন্দে উত্তেজিত সৈনিকদলকে কোনরূপে গোবালিয়রে রাখিতে সম্মত হইয়াছিলেন। সুতরাং গোবালিয়রের সিপাহীগণ কর্তৃক আপাততঃ আগরা আক্রান্ত হইবার আশঙ্কা না থাকিলেও, স্থানান্তরের ঘটনায় লেফটেনেন্ট-গবর্ণর কলবিন সাহেব শঙ্কিত হইয়াছিলেন। তাঁহার নিকটে সংবাদ আসিয়াছিল যে, নীমচের সৈনিকদল গবর্ণমেন্টের বিরুদ্ধে সমুথিত হইয়া আগরার দিকে আসিতেছে। নীমচ মহারাজ শিন্দের রাজ্যের প্রান্তভাগে অবস্থিত। উহা পূর্বে শিন্দের অধিকৃত ছিল। পরে উহাতে গবর্ণমেন্টের প্রধান সৈনিকনিবাস প্রতিষ্ঠিত হয়। ঐ স্থান ঘেরূপ মনোরমা, সেইরূপ স্বাস্থ্যকর। এই স্বাস্থ্যকর ও রমণীয় স্থানে ব্রিটিশ গবর্ণমেন্টের বহুসংখ্যক সৈনিকপুরুষ অবস্থিত করিতেছিল। উত্তর-পশ্চিমপ্রদেশের লেফটেনেন্ট-গবর্ণরের শাসনাধীন জনপদের পশ্চিম সীমান্তে অবস্থিত হওয়াতে বোম্বাই প্রেসিডেন্সির সৈনিকদলও বাঙ্গালার সিপাহীদিগের সহিত এই স্থানরক্ষায় নিয়োজিত থাকিত। ১৮৫৭ অব্দের প্রারম্ভে বোম্বাই প্রেসিডেন্সির পদাতিদলের স্থলে বাঙ্গালার সিপাহীগণ অবস্থিত করিতে থাকে। উপস্থিত সময়ে নীমচে ছুই দল পদাতি এবং প্রথম অশ্বারোহিদলের কতকগুলি

সৈনিক ছিল । নীমচের ১৫০ শত মাইল উত্তরদিকবর্তী নসীরাবাদে দুই দল পদাতি, এক দল:গোলন্দাজ এবং বোম্বাইয়ের এক দল সৈন্ত অবস্থিতি করিতেছিল । ইহাদের মধ্যে পদাতি ও গোলন্দাজদিগের তাদৃশ প্রশান্ত্যাব পরিলক্ষিত হয় নাই । তাহারা কিছু দিনের মধ্যে উত্তেজনার পরিচয় দিতেছিল । ২৮শে মে অপরাহ্নকালে তাহাদের মধ্যে কেহ কেহ সহসা কামানের পার্শ্বে গম্বিন করে, বন্দুক পুরিতে থাকে এবং গবর্ণমেন্টের বিরুদ্ধে সমরবেশে সজ্জিত হইয়া উঠে । পদাতি ও গোলন্দাজ সৈন্ত এইরূপে পূর্বতন প্রশান্ত্যাব ও বিশ্বস্ততা হইতে স্থলিত হয় । কিন্তু বোম্বাইয়ের সৈনিকদল সহসা ইহাদের অনুবর্তী হয় নাই । যখন ইহাদের প্রতি, উত্তেজিত সিপাহীদিগকে আক্রমণ ও কামান অধিকার করিতে আদেশ দেওয়া হয়, তখন এই আদেশপালনে তাহারা ঔদাস্ত দেখায় । সুতরাং পদাতি ও গোলন্দাজগণ উৎসাহসম্পন্ন হইয়া আফিসারদিগকে আক্রমণ করে । দুই জন আফিসার নিহত এবং দুই জন আহত হইলেন । ব্রিটিশ কোম্পানির সৈনিকদলের রীতিপদ্ধতি একরূপ ছিল না । উপস্থিত সময়ে এই পার্থক্য ও তৎপ্রযুক্ত অনিষ্টজনক ফল সম্পূর্ণরূপে পরিস্ফুট হয় । বাঙ্গালার সিপাহীগণ আপনাদের পরিবারবর্গ হইতে বিচ্ছিন্ন হইয়া কর্মস্থলে অবস্থিতি করিত, পক্ষান্তরে বোম্বাইয়ের সৈনিকদিগের পরিবারবর্গ তাহাদের সঙ্গে থাকিত । বোম্বাইয়ের যে সৈনিকদল নসীরাবাদে অবস্থিতি করিতেছিল, তাহাদের স্ত্রীপুত্রাদিও ঐ স্থানে ছিল । সুতরাং এই সময়ে আপনাদের স্ত্রীপুত্রাদি তাহাদের প্রধান চিন্তনীয় বিষয় হইয়াছিল । বাঙ্গালার সৈনিকদলের বিরুদ্ধে অগ্রসর হইলে পাছে তাহাদের প্রীতিভাজন পরিজনগণ আক্রান্ত হয়, এই আশঙ্কায় তাহারা নিশ্চেষ্টভাবে থাকে । ইউরোপীয়গণ নিঃসহায় ও নিরবলম্ব হইয়া পড়েন । তাহারা উপায়ান্তর না দেখিয়া, আপনাদের সমস্ত বিষয় পরিত্যাগপূর্বক স্ত্রীপুত্রাদির সহিত ৩০ মাইল দূরবর্তী বেওয়ারে পলায়ন করেন । উত্তেজিত সিপাহীগণ তাহাদের অপরাপর উত্তেজিত স্বদেশীয়ের অনুষ্ঠিত কর্ম—গৃহদাহ, সম্পত্তিলুণ্ঠন প্রভৃতি সম্পাদন পূর্বক দিল্লীর অভিমুখে প্রস্থান করে ।

নসীরাবাদের সৈনিকগণ যখন এইরূপে গবর্ণমেন্টের বিরোধী হয়, তখন নীমচের সিপাহীরা যে, স্থিরভাবে থাকিবে, তাহার সম্ভাবনা ছিল না । ইহাদের

উপর পূর্বেই সন্দেহ করা হইয়াছিল । ৩রা জুন ইহারা প্রকাশ্যভাবে গবর্ন-মেন্টের বিরুদ্ধে সমুথিত হয়, এবং বিলুপ্ত, ভস্মীকরণ প্রভৃতি অমুঠেয় কর্ম সম্পাদনপূর্বক দিল্লীতে যাত্রা করে । ইহারা আফিসার ও তাঁহাদের পরিবার-বর্গের জীবনহানি করে নাই । ইহাদের অত্যধিক উত্তেজনার আবেগে কেবল এক জন ইউরোপীয় গোলন্দাজের স্ত্রী নিহত হয় । এই সময়ে মোগলের চিরপ্রসিদ্ধ রাজধানী উত্তেজিত সিপাহীদিগের প্রধান লক্ষ্য ছিল । তাহারা সুদূরবর্তী স্থান হইতে দিল্লীর অভিমুখে অগ্রসর হইতেছিল । উত্তরপশ্চিম প্রদেশের রাজধানী আগরা দিল্লীর পথে । সুতরাং আগরার কর্তৃপক্ষ, নীমচের উত্তেজিত সিপাহীগণের দিল্লীতে অভিযানবার্তা শুনিয়া, নিরতিশয় শঙ্কিত হইলেন । কিন্তু সিপাহীগণ এক পরামর্শে পরিচালিত হইত না । এক সময়ে তাহাদের যে কার্যপ্রণালী নির্দ্ধারিত হইত, অল্প সময়ে তাহা বিপর্যস্ত হইয়া যাইত । এইরূপ অব্যবস্থিত সমরব্যবসায়িগণ যে, সহসা দিল্লীতে যাইবার সময়ে আগরা আক্রমণ করিবে, তাহার সম্ভাবনা কম ছিল । নীমচ হইতে আগরা ৩০০ শত মাইলের অধিক দূরে অবস্থিত । এজন্য উত্তরপশ্চিমপ্রদেশের লেফটেনেন্ট-গবর্নরের তাদৃশ আশঙ্কার কারণ বর্তমান ছিল না । এই সময়ে মহারাজ শিন্দের গায় আর এক জন মহারাষ্ট্রীয় অধিরাজের উপর সাধারণের দৃষ্টি ছিল । মহারাজ শিন্দের গায় ইঁহার রাজ্যের সহিতও উত্তেজিত সিপাহীদিগের উত্তেজনামূলক কর্মের সংস্রব ছিল । আগরা অপেক্ষা ইঁহার অধিকৃত স্থান উক্ত উত্তেজিত সিপাহীদলের নিকটবর্তী ছিল । এই মহারাষ্ট্রীয় ভূপতির রাজ্য উপস্থিত সময়ে কি ঘটিয়াছিল, তাহা এখন বর্ণিত হইতেছে ।

ইন্দোর মহারাজ হোলকরের রাজধানী । ১৭৬৭ খ্রীষ্টাব্দে প্রাতঃস্মরণীয়া

ইন্দোর অহল্যাবাই কর্তৃক এই রাজধানী প্রতিষ্ঠিত হয় । অহল্যাবাইয়ের

সংস্রবে এবং প্রসিদ্ধ মহারাষ্ট্রীয় অধিরাজের প্রাধাত্তে এই রাজধানী

ভারতে চিরপ্রসিদ্ধ হইয়া উঠে । ইন্দোর মহারাজ হোলকরের রাজ্যের পশ্চিমাংশে ও আগরার চারি শত মাইল অন্তরে অবস্থিত । এই স্থান হইতে বোম্বাই ৩০ মাইল দূরবর্তী । রাজনৈতিক বিষয়ে ইন্দোর মধ্যভারতবর্ষের প্রধান স্থান । এই

স্থানে রেসিডেন্সি অবস্থিত । রেসিডেন্সিতে ব্রিটিশ গবর্নমেন্টের প্রতিনিধি বৎসরের অধিকাংশ সময় যাপন করেন । রাজধানীর ১৩ মাইল দূরে মো- নামক স্থানে সৈনিকনিবাস । ১৮৫৭ অব্দের গ্রীষ্মকালে সৈনিকনিবাসে ৩৩ সংখ্যক এতদেশীয় পদাতি, প্রথম সংখ্যক এতদেশীয় অশ্বারোহিদলের একাংশ, এবং একদল গোলন্দাজ সৈন্য ছিল । পদাতিদলে ১৬ জন ইউরোপীয়, ১,১৭৯ এতদেশীয় ; অশ্বারোহিদলে ১৩ জন ইউরোপীয়, ২৮২ জন এতদেশীয় ; গোলন্দাজদলে ৯১ জন ইউরোপীয়, ৯৮ জন এতদেশীয় সৈনিক পুরুষ অবস্থিত করিতেছিল । বিপত্রিকালে ইউরোপীয়দিগকে স্বদেশীয় গোলন্দাজদিগের উপরে সর্বাংশে নির্ভর করিতে হইত । ২৩ সংখ্যক পদাতিদলের অধিনায়ক কর্ণেল প্লাটের উপর সৈনিকনিবাসের কর্তৃত্ব ছিল ।

রেসিডেন্সি ইন্দোরের ছয় মাইল দূরে অবস্থিত । রেসিডেন্টের আবাসগৃহ দ্বিতল, প্রস্তরে নির্মিত এবং বৃক্ষবাটিকায় পরিবেষ্টিত । বাজার ও সহকারী রেসিডেন্টের আবাসগৃহ রেসিডেন্সির সুবিস্তৃত অঙ্গনের মধ্যে অবস্থিত । উহার পশ্চিমদিকে মোতে যাইবার পথ । পথের দক্ষিণপূর্ব দিক উদ্যান ও বৃক্ষশ্রেণীতে সুশোভিত । উহার ঠিক পশ্চিমে বাজার এবং বিভিন্ন প্রকারের অনেক গুলি গৃহ । এই দিকে রেসিডেন্সিরক্ষার জন্ত মহারাজ হোলকরের সৈন্য অবস্থিত করিতেছিল । উত্তর দিকে ডাকঘর, টেলিগ্রাফ আফিস এবং ধনাগার । এই দিকে ভূপালের অশ্বারোহী সৈন্য ছিল । স্যার রবার্ট হামিল্টন ইন্দোরের রেসিডেন্ট ছিলেন । কিন্তু তিনি অসুস্থতাপ্রযুক্ত স্বদেশে গমন করেন । তৎপদে কর্ণেল হেনরি ডুরাণ্ড প্রতিনিধিস্বরূপ নিয়োজিত হইলেন । সামরিক কর্মে কর্ণেল ডুরাণ্ডের নৈপুণ্য ছিল । প্রথম আফগানযুদ্ধে গজনির প্রবেশদ্বার ভগ্ন করিয়া, তিনি সৈনিকসমাজের প্রশংসনীয় হইলেন । ইহার পর তিনি স্বদেশে গমন করেন । লর্ড এলেনবরা গবর্নর-জেনেরলের পদে প্রতিষ্ঠিত হইলে, কর্ণেল ডুরাণ্ড তাঁহার খামুঙ্গী হইলেন । ডুরাণ্ড অভিনব গবর্নর-জেনেরলের সহিত ভারতবর্ষে প্রত্যাগত হইয়া, অভিনব কর্ম সম্পাদন করিতে থাকেন । ক্রমে তিনি রাজনৈতিক ও দেওয়ানি বিভাগের অগ্রাগ্র কর্মের ভার গ্রহণ করেন । ১৮৫৭ অব্দে তিনি মধ্যভারতবর্ষে গবর্নর-জেনেরলের এজেন্ট হইলেন । স্যার রবার্ট হামিল্টন এবং কর্ণেল ডুরাণ্ড বিভিন্ন প্রকৃতির লোক



ছিলেন। একের অভিমতের সহিত অপরের অভিমতের সামঞ্জস্য ছিল না। যে সকল ভূপতি এক সময়ে ক্ষমতায় ও প্রাধাত্যে অপ্রতিহতভাবে শাসনদণ্ডের পরিচালনা করিয়া, শেষে আপনাদের অদৃষ্টের নিকটে মস্তক অবনত করিয়াছেন, সেই পরানুগত ও পরানুগ্রহপ্রার্থী ভূপতিদিগের প্রতি স্যার রবার্ট হামিল্টনের যথোচিত সমবেদনা ছিল। দীর্ঘকালের অভিজ্ঞতায় হামিল্টন বুঝিয়াছিলেন যে, সহিষ্ণু না হইলে সিদ্ধির পথ সুগম হয় না। বিশেষতঃ যাহাদের সহিত ভাষা, ধর্ম, রীতিনীতি, দেশাচার প্রভৃতি বিষয়ে একতা নাই, তাহাদের মধ্যে কার্য্য করিতে হইলে সর্ব্বক্ষণ সহিষ্ণুতার পরিচয় দেওয়া আবশ্যিক। স্যার রবার্ট হামিল্টন এইরূপ ধারণার বশবর্তী হইয়া, ধীরভাবে মহারাজ হোলকরের দরবারের কর্ম্ম পরিদর্শন করিতেন, এবং কোনরূপ অসঙ্গত বিষয় লক্ষিত হইলে, ধীরতা ও সহিষ্ণুতার সহিত উহার প্রতীকারে উদ্বৃত্ত হইতেন। কিন্তু তাঁহার প্রতিনিধি কর্ণেল ডুরাণ্ড এইরূপ প্রকৃতির লোক ছিলেন না। তাঁহার বিশ্বাস ছিল যে, কর্তব্যসম্পাদনে কঠোরতা না দেখিলে কোন কর্তব্যই সম্পন্ন হয় না। তাঁহার নিকটে কোন বিষয় অনিষ্টজনক বলিয়া প্রতিপন্ন হইলে, তিনি কঠোরভাবে উহার প্রতীকার করিতেন। তাঁহার সহিষ্ণুতা ছিল না, অগ্র পশ্চাৎ দেখিয়া, ধীরভাবে কার্য্য করিতেও তাঁহার অভ্যাস ছিল না। তিনি কল্পনাপ্রিয় ছিলেন, নিজের কল্পনায় প্রমত্ত হইয়া, উদ্ধতভাবে কার্য্য করিতেই ভালবাসিতেন। তিনি যে কার্য্যে অভ্যস্ত ছিলেন, যদি সেই কার্য্যে নিয়োজিত থাকিতেন, তাহাঁ হইলে তাঁহার গুণগৌরব অধিকতর প্রকাশিত হইত, এবং তিনি এক জন প্রধান ও সাহসী যোদ্ধা বলিয়া প্রসিদ্ধিলাভ করিতেন। কিন্তু রাজনৈতিক বিষয়সম্পাদনের জন্য তাঁহার তাদৃশ গুণ ছিল না। যে হেতু এতদেশীয় অধিরাজবর্গের প্রতি তাঁহার সমবেদনা ছিল না, এতদেশীয়দিগের সহিত ব্যবহারে তাঁহার সহিষ্ণুতা পরিলক্ষিত হইত না। যে ভূপতির দরবারে তিনি ব্রিটিশ গবর্নমেন্টের প্রতিনিধিরূপে নিয়োজিত ছিলেন, সেই ভূপতিকে তিনি মোগলদরবারের সৈন্যদ্রাবীড়ের অপেক্ষা অধিকতর রাজভক্ত বলিয়া মনে করিতেন না। এই ধারণা তাঁহাকে উপস্থিত সময়ে হঠকারিতাপ্রদর্শনে প্রবর্তিত করিয়াছিল। এখন যে ঘটনা বর্ণিত হইতেছে, তাহাতে এই বিষয় পরিষ্কৃত হইবে।

উপস্থিত সময়ে মহারাজ তুকাজী রাও হোলকর একবিংশ বর্ষে উপনীত হইয়াছিলেন। তিনি ধীরপ্রকৃতি, সুশিক্ষিত ও বুদ্ধিমান ছিলেন। রেসিডেন্ট স্যার রবার্ট হামিল্টন তাঁহার শিক্ষার সুবন্দোবস্ত করিয়া দিয়াছিলেন। উমেদ সিংহ নামক একজন অভিজ্ঞ ও দূরদর্শী ব্রাহ্মণ তাঁহার শিক্ষক হইলেন। মরাঠা প্রভৃতি অনেকগুলি ভারতবর্ষীয় ভাষায় উমেদ সিংহের অধিকার ছিল। এতদ্ব্যতীত উমেদ সিংহ ইংরেজী ভাষা বিশুদ্ধরূপে বলিতে ও লিখিতে পারিতেন। এই বহুদর্শী ব্রাহ্মণ আপনার প্রসিদ্ধ ছাত্রকে সুশিক্ষিত করিতে যথোচিত যত্ন করেন। তাঁহার যত্ন কোন অংশে নিষ্ফল হয় নাই। মহারাজ তুকাজী রাও ব্রাহ্মণ অধ্যাপকের শিক্ষার গুণে সুশীল, শাস্ত্রানুরাগী এবং বিনয়ী হইয়া উঠেন। ইন্দোরের সর্দারদিগের পুত্রগণও মহারাজ তুকাজী রাওয়ের সহিত শিক্ষালাভ করিতেন। এই সকল সমবয়স্ক সহাধ্যায়ীর সহিত একত্র থাকিতে তুকাজী রাওর শিক্ষানুরাগের সহিত প্রীতি, স্নেহ ও সমবেদনা বর্দ্ধিত হইয়াছিল।

স্যার রবার্ট হামিল্টন যত দিন ইন্দোরের দরবারে ছিলেন, তত দিন মহারাজের কোন বিষয়ে কোন অসুবিধা ঘটে নাই। কোন বিষয়ে অভিযোগ উপস্থিত হইলে, রেসিডেন্ট সাহেব ধীরভাবে উহা গুনিতেন, এবং সঙ্গত বোধ হইলে, উহার প্রতীকার করিতেন। হামিল্টনের প্রতিনিধি যখন কার্যভার গ্রহণ করেন, তখনও এইরূপ অভিযোগ উপস্থিত হইত। কিন্তু পূর্বে উক্ত হইয়াছে যে, কর্ণেল ডুরাও ভিন্ন প্রকৃতির লোক ছিলেন। সমবেদনার অভাবপ্রযুক্ত তিনি ভারতবর্ষীয়দিগকে প্রীতির চক্ষে দেখিতেন না। এক জন মরাঠা ভূপতি যে, ব্রিটিশ গবর্নমেন্টের প্রতিনিধির সন্মুখে আপনার অভিমত প্রকাশ বা কোন অভিনব প্রস্তাবের উত্থাপন করিবেন, তাহা তিনি সহিতে পারিতেন না। সুতরাং মহারাজ হোলকরের ব্যবহারে তিনি বিরক্ত হইলেন। তাঁহার ধারণা ছিল যে, ব্রিটিশ গবর্নমেন্টের প্রতিনিধি সর্বশক্তিমান এবং সকলের প্রভুর প্রভু। এই সর্বশক্তির কেন্দ্রস্থল প্রভুর প্রভুর সম্মুখীন হওয়া কাহারও উচিত নহে। মহারাজ হোলকর যত বড় লোকই হউন না কেন, অহংজ্ঞানী ব্রিটিশ রেসিডেন্ট তাঁহাকে সামান্ত বলিয়াই মনে করিতেন। সুতরাং তরুণবয়স্ক মহারাজের প্রতি তাঁহার সমবেদনা রহিল না। মহারাজ তুকাজী রাও এই কঠোরপ্রকৃতি রেসিডেন্টের ব্যবহারে চূর্ণিত হইলেন।

উপস্থিত সময়ে চারি দিকে বিপদের সূচনা হইতেছিল। গোবালিয়রের সৈনিক-নিবাসে বিপ্লবের বিকাশ হইয়াছিল। নসীরাবাদ ও নীমচের সিপাহীগণ আপনাদের প্রতিপালক গবর্ণমেন্টের বিরুদ্ধে অস্ত্র ধারণ করিয়াছিল। দিল্লী ইংরেজের হস্ত হইতে স্থানান্তরিত হইয়া পড়িয়াছিল। ইংরেজসৈন্য দিল্লীর পুরোভাগে দুর্দ্বর্ষ সিপাহীগণ-কর্তৃক অপরূপভাবে অবস্থিতি করিতেছিল। সমগ্র উত্তরপশ্চিম প্রদেশে ইংরেজের প্রাধান্য বিলুপ্তপ্রায় হইয়াছিল। ইন্দোরের চারি দিকেই করাল বহ্নিশিখার বিস্তার হইতেছিল। উক্ত লোকে ইংরেজের নিষ্কাশনে এবং ইংরেজের সাম্রাজ্যের বিশ্বংসসাধনে বন্ধপরিকর হইয়া উঠিয়াছিল। মহারাজ তুর্কাজী রাও চতুর্দিকে ভয়ঙ্কর বিপ্লবের সূচনা দেখিয়া যেরূপ দুঃখিত, সেইরূপ চিন্তিত হইয়াছিলেন। রেসিডেন্টের ব্যবহারে তাঁহার অধিকতর বিরক্তি ও দুঃশিস্তা জন্মিয়াছিল। কিন্তু রেসিডেন্টের প্রতি বিরক্ত হইলেও, তিনি সমগ্র ইংরেজের প্রতি বিরক্তি প্রকাশ করেন নাই। বয়সের অল্পতায় তাঁহার ধীরতা ও অভিজ্ঞতা বিপর্যাস্ত হয় নাই। ইংরেজের ক্ষমতার উপর তাঁহার অটল বিশ্বাস ছিল। তিনি সিদ্ধান্ত করিয়াছিলেন যে, ইংরেজ এই বিপত্তিকালে আপনার ক্ষমতা অব্যাহত রাখিতে পারিবেন। ইংরেজের দৃঢ়তা, ইংরেজের চরিত্রবল, ইংরেজের সাহস ও সহায়সম্পত্তি কিরূপ, তাহা তিনি জানিতেন। সুতরাং কর্ণেল ডুরাণ্ডের চরিত্রের অনুপাতে তিনি সমগ্র ইংরেজের চরিত্রের পরিমাণ করেন নাই। তিনি ডুরাণ্ডকে ভাল না বাসিলেও, ইংরেজজাতির প্রতি তাঁহার ভালবাসা ও শ্রদ্ধা ছিল। তিনি ইংরেজের বিরোধী হইতে চাহেন নাই বা ইংরেজের সমক্ষে আপনাকে কলঙ্কিত করিতেও ইচ্ছা করেন নাই।

মহারাজ তুর্কাজী রাও আর এক বিষয়ে নিরতিশয় চিন্তিত হইয়াছিলেন। তাঁহার অস্ত্রাগার প্রায় শূন্য ছিল। উত্তেজিত সিপাহীদিগকে বাধা দিবার জন্ত যথোপযুক্ত অস্ত্রশস্ত্র সংগৃহীত ছিল না। ইন্দোরের দরবার, রেসিডেন্ট দ্বারা বোম্বাই গবর্ণর লর্ড এলিফিন্‌ষ্টোনের নিকটে দুই হাজার বন্দুক, তিনশত জোড়া পিস্তল এবং চারি লক্ষ ক্যাপের জন্ত প্রার্থনা করেন। বোম্বাই গবর্ণর ইহার উত্তরে কর্ণেল ডুরাণ্ডের নিকট লিখিয়া পাঠান যে, প্রার্থিত বিষয়ের অর্দ্ধাংশ দিলেই বোধ হয়, মহারাজের সন্তোষ জন্মিতে পারে। কর্ণেল ডুরাণ্ড যখন মহারাজ হোলকরের প্রার্থনা বোম্বাইয়ের গবর্ণরের গোচর করেন, তখন তিনি হোলকরের

বিশ্বস্ততা সম্বন্ধে সন্দেহান হইল না। ইন্দোরের দরবার যে, গবর্ণমেন্টের বিরোধী হইয়া উঠিবেন, তাঁহার মনে এইরূপ ধারণার আবির্ভাব হয় নাই। তিনি মহারাজ হোলকরকে বিশ্বস্ত বলিয়া মনে করিতেন, সুতরাং গবর্ণমেন্টের শত্রুগণের সমক্ষে তাঁহার বলবৃদ্ধির জন্ত তদীয় অস্ত্রাগারে পর্যাপ্তপরিমাণে যুদ্ধোপকরণ রাখা আবশ্যিক মনে করিয়াছিলেন।

এ পর্য্যন্ত পার্শ্ববর্তী স্থানের সিপাহীদিগের উত্তেজনা ও তৎপ্রযুক্ত গবর্ণমেন্টের প্রতি তাহাদের শত্রুতা পরিলক্ষিত হয় নাই। নসীরাবাদ ও নীমচে কোনরূপ গোলযোগ ঘটে নাই। ডুরাও পার্শ্ববর্তী স্থানের প্রশান্ত্যভাব দেখিয়া আশ্বস্ত হইয়াছিলেন। কিন্তু জুন মাস শেষ হইতে না হইতেই দুশ্চিন্তার গভীর আবেগে তাঁহার হৃদয় বিচলিত হয়। আশ্বস্ত্যভাবের স্থলে ঘোরতর অশান্তিতে তিনি অভিভূত হইয়া পড়েন। নসীরাবাদ ও নীমচের সিপাহীগণ প্রকাশ্যভাবে শত্রুতা প্রকাশ করে, এবং আপনাদের অবস্থিত স্থলে ভয়াবহ বিপ্লবের নিদর্শন রাখিয়া মেংগলের রাজধানীর অভিমুখে ধাবিত হয়। কিন্তু এ সময়ে মোতে সিপাহীদিগের উত্তেজনা ঘটে নাই। কর্ণেল প্লাট সমস্ত বিষয় সূক্ষ্মভাবে রাখিতে যথোচিত চেষ্টা করিয়াছিলেন। তিনি ১০ বৎসর কাল আপনার ২৩ সংখ্যক সৈনিকদলে ছিলেন। দীর্ঘকালের অভিজ্ঞতা তাঁহাকে সহসা কোনরূপ আশঙ্কাপ্রদর্শনে নিরস্ত রাখিয়াছিল। জুন মাসের মধ্যভাগে আফিসারগণ সিপাহীদিগের প্রতি বিশ্বস্ততাপ্রদর্শন ও অমূলক আশঙ্কার নিবারণের জন্ত রাত্ৰিকালে সৈনিকনিবাসে শয়ন করিয়া থাকিতেন। জুন মাস এইরূপে বিনা গোলযোগে অতিবাহিত হইল। কিন্তু জুন মাসের সহিত শান্তি ও আশ্বস্ত্যভাবের তিরোধান ঘটিল। ১লা জুলাই বেলা পূর্বাহ্ন ৮টার পর কর্ণেল ডুরাও প্লাটের নিকটে লিখিয়া পাঠাইলেন—“যত শীঘ্র পারেন, ইউরোপীয় গোলন্দাজদিগকে প্রেরণ করুন ; আমরা হোলকরকর্তৃক আক্রান্ত হইয়াছি”।

সিপাহীদিগের এই আকস্মিক সমুখানসম্বন্ধে মতভেদ আছে। ভিন্ন ভিন্ন ব্যক্তি ভিন্ন ভিন্ন মত প্রকাশ করাতে এ পর্য্যন্ত ইতিহাসে এই বিপ্লবের সূক্ষ্ম বিবরণ প্রকাশিত হয় নাই। যাহা হউক, এ সম্বন্ধে সুলতঃ এইরূপ জানা গিয়াছে যে, ১লা জুলাই প্রাতঃকালে সিপাহীগণ এবং তাহাদের আফিসারবর্গের মধ্যে কোনরূপ গোলযোগ ঘটে নাই। সে সময়ে সকলেই নিশ্চিন্তভাবে ছিল।

সিপাহীরা সামরিক পরিচ্ছদ ছাড়িয়া, ইতস্ততঃ বিচ্ছিন্নভাবে ছিল। কেহ কেহ স্নান করিতেছিল, কেহ কেহ রন্ধনে ব্যাপৃত ছিল। "এতদেশীয় আফিসারগণ প্রাতঃকালের কার্যনির্বাহের জন্ত নিশ্চিন্তচিত্তে ও প্রশান্তভাবে পরস্পর সমবেত হইয়াছিলেন। কর্ণেল ট্রাবার্স নামক এক জন সেনানায়ক তাহাদের কাহারও কাহারও সঙ্গে কথোপকথন করিতেছিলেন। এমন সময়ে সহসা কামানের ধ্বনিতে সকলে চমকিত হইলেন। হোলকরের অশ্বারোহীদের সাদত খাঁ নামক একজন সৈনিক এবং আট জন সওয়ার সাতিশয় উত্তেজিতভাবে চীৎকার করিয়া কহিতে লাগিল—“সকলে প্রস্তুত হও, সাহেবদিগকে মার, মহারাজের এইরূপ আদেশ।” দেখিতে দেখিতে তাহার পশ্চাতে বহুসংখ্যক উচ্ছৃঙ্খল লোক সমবেত হইল। দরবারের সৈনিকদল সাদত খাঁর কথায় উত্তেজিত হইয়া উঠিল। তাহাদের অধিনায়ক বংশগোপাল তাহাদিগকে সুশৃঙ্খলভাবে রাখিতে পারিলেন না। তাহারা কাহারও নিষেধ না মানিয়া, ইংরেজদিগের বিরুদ্ধে অগ্রসর হইতে লাগিল। গোলন্দাজেরাও আপনাদের কামানগুলি সজ্জিত করিয়া গোলাবর্ষণে প্রবৃত্ত হইল। ১লা জুলাই প্রাতঃকালে কর্ণেল ডুরাণ্ড বোম্বাইয়ের গবর্নরের নিকটে তারযোগে পাঠাইবার জন্ত কোন সংবাদ লিখিতেছিলেন। এমন সময়ে তিনি এই কামানের ধ্বনি শুনিয়াই, চমকিত হইয়া উঠিলেন। কর্ণেল ডুরাণ্ড রেসিডেন্সি ও ধনাগার রক্ষার জন্ত মহারাজ হোলকরের নিকট হইতে যে সকল কামান আনাইয়াছিলেন, সেই সকল কামান হইতে গোলাবৃষ্টি হইতেছে শুনিয়া, তিনি গভীর বিষ্ময়ে একান্ত অভিভূত হইয়া পড়িলেন। বেলা পূর্বাহ্ন ৮টার সময়ে হোলকরের দুই শত পদাতি গবর্নমেন্টের বিরোধী হইয়া উঠিল। হোলকরের ৩টি কামান হইতে সর্বপ্রথম ভূপালের অশ্বারোহী ও পদাতিদলের শিবিরে গোলাবৃষ্টির আরম্ভ হইল। কর্ণেল ট্রাবার্স ভূপালের সৈনিকদলের অধ্যক্ষ ছিলেন। কামানের ধ্বনি শুনিবামাত্র তিনি সামরিকবেশে সজ্জিত ও স্বকীয় অশ্বে অধিষ্ঠিত হইয়া, বিপক্ষদিগের বিরুদ্ধে অগ্রসর হইলেন। কিন্তু ছয় জন অশ্বারোহী ব্যতীত কেহই তাহার অনুবর্তী হইল না। বিপক্ষগণ অনবরত গুলিবৃষ্টি করিতেছিল। এই গুলিবৃষ্টির মধ্যে ভূপালের পদাতি সৈন্য নিঃশ্বাস হইয়া রহিল। তাহারা তাহাদের উপর গুলি চালাইতেছিল, তাহারা তাহাদিগকে

প্রতিপ্রহার করিতে অসম্মত হইল। কর্ণেল ট্রাবার্স এই বিসদৃশ ঘটনা দেখিয়া, বিস্মিত হইলেন। তাঁহার অধিষ্ঠিত অশ্ব আহত হইল। তাঁহার হস্তস্থিত তরবারির বাঁটের ছিলা বিচ্ছিন্ন হইয়া গেল। বিপক্ষদিগের নিক্কিশু গুলি এবং নিক্ষেপিত তরবারির মধ্যে অতি আশ্চর্য্যরূপে তাঁহার প্রাণরক্ষা হইল। ভূপালের অধিকাংশ অশ্বারোহী ও সমগ্র পদাতিদল কর্ণেল ট্রাবার্সের আদেশ পালন না করিলেও, ভূপালের দুইটি কামান হইতে বিপক্ষদিগের প্রতি গোলাবৃষ্টি হইতে লাগিল। কিন্তু এইরূপ গোলাবর্ষণ তাদৃশ কার্য্যকর হইল না। সুতরাং এই সময়ে প্রায় সমুদয় বিষয়ই ইউরোপীয়দিগের প্রতিকূল হইয়া উঠিল।

উপস্থিত ঘটনা সম্ভবপর হইলেও সহসা যে, উহার সূত্রপাত হইবে, তাহা কি ইউরোপীয়, কি এতদেশীয় প্রধান কর্মচারী, কাহারও উদ্বোধ হয় নাই। উত্তেজিত সিপাহীগণ যখন কামান সজ্জিত করিয়া, গোলাবর্ষণে প্রবৃত্ত হইল, তখন কেহ কেহ অতিমাত্র বিষয়ে, কেহ কেহ বা অতিশয় ভয়ে অভিভূত হইলেন। অনিয়মিত সৈনিকদল সম্ভ্রান্ত ও কিংকর্তব্যবিমূঢ় হইয়া পড়িল। উত্তেজিত সিপাহীদিগের উপর ইউরোপীয় বা এতদেশীয় আফিসারদিগের কোনরূপ ক্ষমতা রহিল না। সকলেই আকস্মিক গোলযোগে উদ্ভ্রান্ত হইয়া পড়িল। সিপাহীগণ রেসিডেন্সিতে গোলাবর্ষণের নিমিত্ত যখন ঐদিকে কামান স্থাপন করিল, তখন শিবলাল নামক এক জন সুবাদার তাহাদের আক্রমণ নিরস্ত করিতে উদ্যত হইলেন। তিনি আপনাদের কামান হইতে এমন তীব্রবেগে গোলা চালাইতে লাগিলেন যে, আক্রমণকারিগণ দূরীভূত হইল। তাহাদের একটি কামান অকর্মণ্য হইয়া গেল।

কর্ণেল ডুরাও এখন ঘোরতর মানসিক যাতনায় একান্ত অবসন্ন হইলেন। যেন শত শত কালভূজঙ্গ তাঁহাকে তীব্রভাবে দংশন করিতে লাগিল, অথবা যেন নিদারুণ তুষানল তাঁহার শরীরের প্রতিস্থানে প্রসারিত হইল। তিনি যাহাদের উপর সন্দিক্ত ছিলেন, যাহাদের প্রতি বিদ্বেষভাব প্রকাশ করিতেন, যাহাদিগকে সর্ব্বক্ষণ পদানত করিয়া রাখিতে ভালবাসিতেন, তাহাদের এই রূপ অভাবনীয় ক্ষমতা দর্শনে তাঁহার মনস্তাপের অবধি রহিল না। তিনি পলায়নে কৃতসঙ্কল্প হইলেন, আপনাদের রক্ষণীয় লোকদিগকে একত্র করিলেন এবং যানবাহনাদি যাহা পাওয়া গেল, তৎসমুদয় এক স্থানে আনিলেন।

এই কার্যে ডুরাণের দুঃসহ মনোযাতনার একশেষ ঘটিল। তিনি উপস্থিত ঘটনা প্রসঙ্গে এই ভাবে নিজের মানসিক অবস্থার বিষয় লিখিয়া গিয়াছেন—

“জীবিতকালের মধ্যে আমার যতরূপ বিরক্তি ঘটিয়াছে, তাহার মধ্যে এই ঘটনাই সর্বাপেক্ষা বিরক্তিজনক। যেহেতু, আমি কখনও রক্ষণীয় স্থান ত্যাগ করিতাম না। স্থানত্যাগ করাত দূরের কথা, নিজে স্থান ত্যাগ করিতেও আদেশ দিতাম না। এ সময়ে যদি স্বস্থানে থাকিতাম, তাহা হইলে যাহাদিগকে এইরূপ দশাগ্রস্ত করিতে আমার কোন অধিকার নাই, তাহারা নিঃসংশয়ে নিহত হইত। তথাপি আমি সৈনিক পুরুষ বলিয়া যে, গর্ভ করি, ইহাতে যে সেই গর্ভ কতদূর খর্ব হইয়াছে, বলিতে পারি না। যদি কেহ এই সময় গুলি করিয়া আমার প্রাণ নাশ করিত, তাহা হইলে আমি তাহাকে ধন্যবাদ দিতাম।” এইরূপ মস্তপ্ৰহৃদয়ে, এইরূপ বিরক্তিসহকারে কর্ণেল ডুরাণ পলায়নে উদ্বৃত্ত হইলেন। কুলমহিলা ও বালকবালিকাগণকে কামানের গাড়িতে তুলিয়া দেওয়া হইল। পুরুষেরা হস্তী ও অশ্বে আরোহণ করিলেন। ৫০০ শত ভীল সৈন্য, ভূপালের কতিপয় পদাতি এবং প্রায় ২০০ শত অশ্বারোহী পলাতকদিগের রক্ষক হইয়া চলিল। কর্ণেল ট্রাবার্স এই সৈনিকদলের অধিনায়ক হইয়া ইহাদের পার্শ্ব-ভাগে যাইতে লাগিলেন। পলাতকগণ রেসিডেন্সি পরিত্যাগপূর্বক নিরাপদে অগ্রসর হইলেন। পশ্চাৎপ্রান্তে প্রজ্বলিত রুহিণীখা ও নিবিড় ধূমস্তূপ, তাঁহাদের সম্পত্তি ও অধ্যুষিত গৃহ ভস্মীভূত হওয়ার নিদর্শন সুস্পষ্ট প্রকাশ করিয়া দিতে লাগিল। পলাতকগণ ভূপালে উপনীত হইয়া দয়াশীলা বেগমের আশ্রয়ে তদীয় দুর্গে অবস্থিতি করিতে লাগিলেন। কিন্তু বেগম পলাতকদিগকে কহিলেন যে, তাঁহারা দীর্ঘকাল ঐ স্থানে থাকিলে তদীয় রাজ্যের অনিষ্ট হইবে। সুতরাং পলাতকগণ ভূপাল পরিত্যাগপূর্বক আবার আশ্রয়স্থান পাইবার জন্ত পরিভ্রমণ করিতে লাগিলেন। কিন্তু জুন মাস শেষ হইবার পূর্বে অগ্রগামী ব্রিটিশ সৈন্যের আগমনে এবং দরবারের দৃঢ়তায় তাঁহারা ইন্দোরে প্রত্যাবৃত্ত হইতে সমর্থ হইলেন।

ইহার মধ্যে মোর ব্রিটিশ সৈনিকনিবাসের সিপাহীদিগের ভাবান্তর ঘটিতে লাগিল। ইহারা কর্ণেল প্লাটের একান্ত বিশ্বাসের পাত্র ছিল। কর্ণেল এই

বিশ্বস্তদিগের বিরুদ্ধে কোন কার্য্য করিতে প্রস্তুত ছিলেন না। গোলন্দাজ সৈনিকদলের অধ্যক্ষ কাপ্তেন হাঙ্গারফোর্ড সিপাহীদিগের উপর সর্বাংশে বিশ্বাস স্থাপন না করিয়া, আপনার কামানগুলি খোলা জায়গায় সাজাইয়া রাখিবার জন্ত প্রার্থনা করিলেন। কর্ণেল প্লাট তাঁহাকে প্রার্থনারূপ কার্য্য করিতে অনুমতি দিলেন। হাঙ্গারফোর্ড অতঃপর আপনাদের কুল-মহিলা ও বালকবালিকাদিগকে রক্ষা করিবার জন্ত আর একটি কামান যথাস্থানে সন্নিবেশিত করিয়া রাখিতে চাহিলেন। কিন্তু কর্ণেল প্লাট সেই পুরাতন হেতুবাদ—বিশ্বাসের পাত্রদিগের প্রতি অবিশ্বস্তভাব প্রদর্শনের নিদর্শন দেখাইয়া তাঁহাকে নিরস্ত করিলেন। সৈনিক-নিবাসের পুরোভাগে কামান সকল সজ্জিত হইল, কিন্তু ইউরোপীয়দিগের রক্ষার জন্ত কিছুই করা হইল না। বিশ্বাসপ্রদর্শনের যুক্তি এ স্থলে প্রবল হইল। হোলকরের সৈনিকদল প্রকাশভাবে যুদ্ধোন্মুখ হইয়াছে শুনিয়া, কাপ্তেন হাঙ্গারফোর্ড ১লা জুলাই আপনার কামান লইয়া ইন্দোরে যাত্রা করেন। কিন্তু অর্দ্ধ-পথ অতিক্রম করিতে না করিতে ভূপালের অশ্বারোহীদের এক জন সওয়ারের সহিত তাঁহার সাক্ষাৎ হয়। সওয়ার কর্ণেল ট্রাবার্সের নিকট হইতে এই সংবাদ আনিয়াছিল যে, কর্ণেল ডুরাণ্ড এবং অন্যান্য ইউরো-পীয় রেসিডেন্সি পরিত্যাগ পূর্বক শীহোরের অভিমুখে পলায়ন করিয়াছেন। হাঙ্গারফোর্ড এই সংবাদ পাইয়া ইন্দোরে গেলেন না ; আপনার কামান লইয়া সৈনিকনিবাসে প্রত্যাবৃত্ত হইলেন।

হাঙ্গারফোর্ড একবারে সেনাপতির নিকটে গিয়া রেসিডেন্সির সংবাদ জানাইলেন। তিনি দুর্গে কামান সাজাইয়া রাখিবার বন্দোবস্ত করিতে চাহিলেন। কিন্তু তাঁহার প্রার্থনা গ্রাহ্য হইল না। কর্ণেল প্লাট আবার সেই পুরাতন যুক্তির প্রাধান্য কীর্তন করিলেন। ক্রমে দিন অতিবাহিত হইতে লাগিল, কিন্তু হাঙ্গারফোর্ড অভীষ্ট বিষয়সম্পাদনে অনুমতি পাইলেন না। তিনি পুনঃ পুনঃ বাধা প্রাপ্ত হইলেও নিরস্ত না হইয়া, আগ্রহসহকারে সেনাপতির নিকটে আপনার প্রস্তাবানুসারে কার্য্য করিবার জন্ত পুনর্বার প্রার্থনা করিলেন। হাঙ্গারফোর্ডের আগ্রহাতিশয় দর্শনে সেনাপতির হৃদয় বিচলিত হইল। সায়ংকালে তিনি অনিচ্ছার সহিত অনুমতি দিলেন। হাঙ্গারফোর্ড আপনার কামান দুর্গে লইয়া



গেলেন । এ সময়ে অশান্তি ও আশঙ্কিত বিপদের সূচনা দেখা যাইতে লাগিল । ২৩ সংখ্যক দলের সৈনিক পুরুষদিগের সাধারণ ভোজনগৃহ অকস্মাৎ দগ্ধীভূত হইল । সৈনিক-নিবাসের অন্যান্য গৃহ অগ্নিসংযুক্ত হইয়া রাত্রির গভীর অন্ধকারের মধ্যে চারি দিক আলোকিত করিয়া তুলিল । পূর্বে অন্যান্য স্থানে বিপ্লবের প্রাক্কালে গৃহদাহ হইয়াছিল, এ স্থলেও সেইরূপ গৃহদাহ দেখিয়া, ইউরোপীয়গণ চমকিত হইলেন । রাত্রি ৯টার সময়ে কর্ণেল প্লাট ডুরাণ্ডের নিকটে লিখিলেন—“সমস্ত মঙ্গল ; পদাতি এবং অশ্বারোহী, উভয় দলেই সন্তুষ্টচিত্ত ও আজ্ঞাবহ রহিয়াছে ।” ১ ঘণ্টার মধ্যেই এই সন্তোষময় ও শান্তিময় দৃশ্যের পরিবর্তন ঘটিল । রাত্রি ১০টার সময়ে সন্তুষ্টচিত্ত ও আজ্ঞাবহ সৈনিকগণ উচ্ছৃঙ্খল, স্বপ্রধান ও ইউরোপীয়দিগের শোণিতপাতে দৃঢ়প্রতিজ্ঞ হইয়া উঠিল । অধিনায়কের বিশ্বাস দূরীভূত হইল । আশ্বাসময়ী কল্পনার বিলয় ঘটিল । অধিনায়ক এখন কালবিলম্ব না করিয়া, অশ্ব আরোহণ করিলেন, দুর্গাভিমুখে ধাবিত হইলেন, হান্সারফোর্ডকে কামান সকল সজ্জিত করিয়া রাখিতে আদেশ দিলেন । নিমিষের মধ্যে এই কার্য সম্পন্ন হইল । অতঃপর তিনি অত্র এক জন সৈনিকপ্রধানের সহিত সৈনিকদিগের আবাসস্থানের অভিমুখে প্রধাবিত হইলেন । রসদখানার নিকটে তিনি অশ্বের রশ্মি সংযত করিয়া আপনার লোকদিগকে বুঝাইতে লাগিলেন । কিন্তু তাঁহার বিশ্বস্ত সৈনিকদলের নিক্রিষ্ট গুলিতে তদীয় বস্তৃত্য সংক্রিপ্ত হইয়া আসিল । কর্ণেল প্লাট এবং তাঁহার সহচর, উভয়েই গুলিতে আহত ও ভূপতিত হইলেন । আর তাঁহাদের চেতনার সঞ্চার হইল না । প্রথম অশ্বারোহিদলের এক জন অধিনায়কের প্রতি ঠিক ঐ সময়ে গুলি নিক্রিষ্ট হইল । প্রথম গুলিতে তাঁহার অধিষ্ঠিত অশ্বের দেহপাত হইল । তিনি উঠিয়া অন্ধকারের মধ্যে আত্মগোপনের চেষ্টা করিলেন । কিন্তু তাঁহার চেষ্টা বিফল হইল । তিনি গুলিতে আহত হইয়া পড়িয়া গেলেন । অতঃপর তৎপরিচালিত দলের লোকের তরবারির আঘাতে তাঁহার প্রাণবিয়োগ হইল । সেই রাত্রিতে এই কয়েক জন অধিনায়ক নিহত হইলেন । অপরাপর আফিসারের আশ্চর্য্যরূপে প্রাণরক্ষা হইল ।

এদিকে কাপ্টেন হান্সারফোর্ড নিরক্ষা ছিলেন না । তিনি আপনার কামান-

গুলি সজ্জিত করিয়া রাখিয়াছিলেন। কিন্তু প্রথমতঃ উত্তেজিত সিপাহীগণ তাঁহার দৃষ্টিপথবর্তী হইল না। তিনি দুর্গের অর্ধ মাইল দূরবর্তী সৈনিকনিবাসের দিকে অগ্রসর হইলেন। অন্ধকারের মধ্যে তাঁহার দিকে গুলি নিক্ষিপ্ত হইতে লাগিল। কিন্তু সিপাহীগণ তাঁহাকে লক্ষ্য করিতে পারিল না। এদিকে ইংরেজ আফিসারদিগের অধ্যুষিত বাংলা ভঙ্গীভূত হইতে লাগিল। কিন্তু সৈনিক-নিবাস অনলের ক্রীড়া-ক্ষেত্র হইল না। যাহা হউক, হাজারফোর্ড সৈনিক-নিবাসের দিকে কামানের গোলা চালাইতে লাগিলেন। সিপাহীগণ কামানের বিকট শব্দে সন্ত্রস্ত হইয়া, দলে দলে ইন্দোরের পথে অগ্রসর হইল। ইন্দোরের উত্তেজিত সিপাহীগণ ইহাদের কার্যে আছলাদ প্রকাশ করিতে লাগিল। এইরূপে ব্রিটিশ গবর্নমেন্টের সিপাহীদল আপনাদের কাপড়, তৈজসপত্র, বন্দুক প্রভৃতি ফেলিয়া মৌর সৈনিক-নিবাস পরিত্যাগ করিল। কাপ্তেন হাজারফোর্ড এখন স্বকীয় কর্মক্ষেত্রের সর্বময় কর্তা হইলেন। তিনি সৈনিকদলের অধাক্ষতা গ্রহণপূর্বক নিহত আফিসারদিগের যথাবিধানে সমাধির বন্দোবস্ত করিলেন, সামরিক আইনের প্রচারে মনোযোগী হইলেন, এবং আশঙ্কিত বিপদের প্রতীকারের জন্ত যাহা করা আবশ্যিক, তৎসমুদয় সম্পন্ন করিয়া, মহারাজ হোলকরের দিকে মনোনিবেশ করিলেন। প্রথমে তাঁহার ধারণা হইয়াছিল যে, মহারাজ উত্তেজিত সিপাহীদিগের সহযোগী হইতে পারেন। এ সম্বন্ধে অনেক বেনামী পত্র তাঁহার হস্তগত হইয়াছিল। কিন্তু তিনি সবিশেষ পর্যালোচনা না করিয়া, তৎসমুদয়ের প্রতি আস্থা প্রকাশ করেন নাই। যাহা হউক, তিনি মহারাজ হোলকরের নিকটে এই ভাবে পত্র লিখিলেন—“আমি আপনার দেশীয় অনেক ব্যক্তির নিকটে শুনিলাম যে, আপনি ব্রিটিশ গবর্নমেন্টের বিরোধী সিপাহীদিগকে খাচু দ্রব্য দিয়াছেন। ইহাও আমার গোচর হইয়াছে যে, আপনি তাহাদিগকে কামান দিয়াছেন এবং আপনার অনিয়মিত অশ্বারোহী সৈনিক দিয়া তাহাদের সাহায্য করিয়াছেন। সম্ভবতঃ এই সংবাদ অতিরঞ্জিত হইতে পারে। আমি ইহাতে বিশ্বাস স্থাপন করিব কি না, বুঝিতে পারিতেছি না। অতিরঞ্জিত সংবাদ আমার বিশ্বাসযোগ্য নহে। আপনি ব্রিটিশ গবর্নমেন্টের নিকটে অনেক বিষয়ে ঋণী। ব্রিটিশ গবর্নমেন্টের বিরুদ্ধ পক্ষ অবলম্বন করিলে, আপনার সর্বনাশ ঘটতে পারে। আপনি যে, ব্রিটিশ

গবর্নমেন্টের শত্রুদিগের সাহায্য করিয়া এবং তাহাদের প্রতি মিত্রতা দেখাইয়া, আপনার স্বার্থহানি করিবেন, তাহাতে আমি বিশ্বাস করিতে পারি না।” হান্সারফোর্ডের পত্র প্রাপ্তিমাত্র তরুণবয়স্ক মহারাজ এই ভাবে উহার উত্তর দিলেন,—“আপনি যে সংবাদ পাইয়াছেন তাহা কেবল অতিরঞ্জিত নয়—সম্পূর্ণ মিথ্যা। ইন্দোর এবং মোতে যাহা ঘটিয়াছে, তাহার জ্ঞান আমি যেরূপ ব্যথিত হইয়াছি, বোধ হয়, আর কেহ সেরূপ হয়েন নাই। ব্রিটিশ গবর্নমেন্টের সহিত বন্ধুত্বমূলক হইতে আমি বিচ্ছিন্ন হইব, ইহা কখন স্বপ্নেও ভাবি না। আমি তাঁহাদের ঞায়পরতার বিষয় অবগত আছি। যে বন্ধু অধিপতি তাঁহাদের সহিত কৃতজ্ঞতাপাশে আবদ্ধ এবং তাঁহাদের নিকটে সেই কৃতজ্ঞতার পরিচয় দিতে সর্বদা উদ্যত, সেই ভূপতির প্রতি সন্দেহপ্রকাশের পূর্বে তাঁহাদের আত্ম-সম্মানই তাঁহাদিগকে নিরস্ত রাখিবে।” এই ভাবে পত্র লিখিয়া, মহারাজ হোলকর কাপ্তেন হান্সারফোর্ডকে ১ জুলাইয়ে সমস্ত ঘটনা জানাইবার জ্ঞান দুই জন বিশ্বস্ত কর্মচারীকে মোতে পাঠাইয়া দিলেন। হান্সারফোর্ড তাঁহাদের নিকটে সমস্ত গুনিয়া সন্তুষ্ট ও নিঃসন্দেহ হইলেন।

এইরূপে ইন্দোরে রাজকীয় প্রাধান্য বিলুপ্তপ্রায় হইল। গোলন্দাজদের সাহসী সৈনিকপুরুষ এখন আপনার গুরুতর দায়িত্ব বুঝিয়া সকল বিষয়ে সূবন্দোবস্ত করিতে লাগিলেন। তিনি দুর্গরক্ষার জ্ঞান যথোপযুক্ত লোক-নিয়োগ ও খাদ্যদ্রব্যসংগ্রহ করিলেন। তিনি সৈনিক-নিবাসের অস্ত্রাগার উড়াইয়া দিলেন। তিনি দুর্গপ্রাচীরে কামান সকল স্থাপিত করিলেন। তিনি এক মাস কালের উপযোগী যুদ্ধোপকরণ প্রভৃতির সংগ্রহ করিয়া রাখিলেন। এখন তিনি উর্দ্ধতন কর্মচারীর অনুমতির প্রতীক্ষায় রহিলেন; কিন্তু বৃথা প্রতীক্ষা করিতে লাগিলেন। কোন আদেশলিপি তাঁহার নিকটে উপস্থিত হইল না। তিনি কর্ণেল ডুরাণ্ডের নিকটে পত্র লিখিলেন, কিন্তু তাঁহার পত্রের কোন উত্তর আসিল না। অগত্যা তিনি গবর্নর-জেনেরলের প্রতিনিধিরূপে বোধাই গবর্নর লর্ড এল্‌ফিন্‌ষ্টোনের সহিত পত্র লেখালেখি করিতে লাগিলেন। এইরূপে কাপ্তেন হান্সারফোর্ড সাহসসহকারে সমগ্র বিষয়ের কর্তৃত্বগ্রহণপূর্বক গুরুতর কর্তব্যপালনে প্রস্তুত হইলেন। যে কার্যে তাঁহার কোন অধিকার নাই, তিনি সেই কার্য সম্পাদন করিলেন। কর্ণেল ডুরাণ্ড “অনধিকার-চর্চার”

দোহাই দিয়া তাঁহাকে তিরস্কার করেন। কিন্তু এ সময়ে যঁাহারা এইরূপে “অনধিকার-চর্চা” করিয়াছিলেন, তাঁহারাি ভারতবর্ষে ইংরেজের প্রাধাণ্যরক্ষায় সমর্থ হইয়াছিলেন। ইতিহাস এ বিষয়ের যথার্থ্য প্রতিপন্ন করিতে বিমুখ হইবে না।\*

এই সঙ্কটকালে মহারাজ তুকারীরাও হোলকরের মানসিক শাস্তি তিরো-  
হিত হইয়াছিল। অকস্মাৎ কামানের গভীর শব্দে কর্ণেল ডুরাণ্ডের শ্রায়  
মহারাজও চমকিত এবং বিস্মিত হইয়াছিলেন। তিনি বুঝিয়াছিলেন যে, তাঁহার  
সৈনিকেরাই কামান দাগিতেছে, কিন্তু কি উদ্দেশ্যে তাহারা এই কার্যে প্রবৃত্ত  
হইয়াছে, ইংরেজের কি তাঁহার নিজের বিরুদ্ধে এইরূপ কার্যের অনুষ্ঠান  
হইতেছে, ইহা তাঁহার উদ্বোধ হয় নাই। তাঁহার প্রাসাদে নিরতিশয় গোল-  
যোগ ঘটয়াছিল। তাঁহার অনুচরবর্গ সম্রাসের আতিশয্যে ইতস্ততঃ প্রধাবিত  
হইতেছিল। তাঁহার সংবাদবাহকেরা ভিন্ন ভিন্ন সময়ে ভিন্ন ভিন্ন সংবাদ দিয়া,  
তাঁহাকে অধিকতর উদ্ভ্রান্ত করিয়া তুলিতেছিল। স্মৃতরাং উপস্থিত সময়ে  
কি কর্তব্য, কোন্ পথ অবলম্বনীয়, কাহার পরামর্শের অনুবর্তী হওয়া আবশ্যিক,  
তাহা তিনি ঠিক করিতে পারেন নাই। এক বার এক রূপ সংবাদ তাঁহার  
গোচর হইল; পরক্ষণেই আর এক রূপ সংবাদ উপস্থিত হইয়া, পূর্বতন সংবাদ  
বিপর্যাস্ত করিয়া ফেলিল। এইরূপে কোন বিষয়েরই স্থিরতা রহিল না।  
কিয়ৎক্ষণ পরে তরুণবয়স্ক মহারাজ যখন কিয়দংশে প্রকৃতিস্থ হইলেন, তখন  
আর একটি বিষয় তাঁহাকে নিরতিশয় অস্থির করিয়া তুলিল। তিনি শুনিলেন  
যে, গবর্ণর-জেনেরলের প্রতিনিধি—বীরত্বসম্পন্ন ব্রিটিশ সৈনিকপুরুষ রেসিডেন্সি  
পরিত্যাগপূর্বক পলায়নপর হইয়াছেন। কিন্তু তিনি কোন্ স্থানের অভিমুখে  
গিয়াছেন, তাহা প্রাসাদের কেহই বলিতে পারিল না। এক জন রাজনীতিজ্ঞ  
ও সাহসী ব্রিটিশ কর্মচারী যে, বিপত্তির সূত্রপাতমাত্রেই স্বকীয় কর্মস্থল পরি-  
ত্যাগপূর্বক আত্মগোপনে উদ্যত হইবেন, ইহা তিনি স্বপ্নেও ভাবেন নাই।  
এখন এইরূপ অচিন্ত্যপূর্ব ব্যাপারে তাঁহার যেরূপ বিশ্বয়ের পরিসীমা রহিল না,

\* *Kaye, Sepoy War. Vol. III. p. 338.*

সেইরূপ ছশ্চিন্তারও অবসান হইল না। তরুণবয়স্ক মহারাজ এখন আপনার চারি দিকে ঘোরতর বিপদ দেখিতে লাগিলেন।

কিন্তু ঘোরতর বিপন্ন, গভীর ছশ্চিন্তাগ্রস্ত ও বিষাদে একান্ত অভিভূত হইলেও, মহারাজ হোলকর নৈরাশ্রে অবসন্ন হইয়া পড়িলেন না। তিনি বুঝিয়াছিলেন যে, ব্রিটিশ রেসিডেন্ট যখন পলায়ন করিয়াছেন, অধিকন্তু তাঁহার সৈন্য যখন রেসিডেন্সি আক্রমণ করিয়াছেন, তখন তাঁহার মুখে কলঙ্কের চিহ্ন পড়িয়াছে। ব্রিটিশ গবর্ণমেন্টের সমক্ষে এই কলঙ্ক ক্ষালন করা, তিনি সর্বতোভাবে কর্তব্য বলিয়া স্থির করিয়াছেন। বেলা ৮টার মধ্যে সিপাহীরা উত্তেজিত হইয়া রেসিডেন্সি আক্রমণ করে। ১০।।টার সময়ে ব্রিটিশ রেসিডেন্ট প্রভৃতি রেসিডেন্সি পরিত্যাগ করেন। এই দুই ঘণ্টার মধ্যে মহারাজ হোলকরের সমক্ষে নানারূপ সংবাদ উপস্থিত হয়। পরক্ষণে তরুণবয়স্ক মহারাজ কিয়দংশে সুস্থির হইয়া, আপনার কর্তব্যসাধনে উত্তত হইলেন। ইন্দোরে যে কয়েকটি ইউরোপীয় এখন পর্য্যন্ত অবস্থিতি করিতেছিলেন, মহারাজ তাঁহাদিগকে আপনার প্রাসাদে লুকাইয়া রাখিলেন। বেলা ৯টার পূর্বে সাদত খাঁ আহত ও রুধিরে রঞ্জিত হইয়া অশ্বারোহণে মহারাজের সমক্ষে উপস্থিত হইল, এবং মহারাজকে কহিল যে, সে রেসিডেন্সি আক্রমণপূর্বক একজন সাহেবকে আহত করিয়াছে। মহারাজ অবিলম্বে তাঁহাকে অবরুদ্ধ করিয়া রাখিতে আদেশ দিলেন। ১লা জুলাই এইরূপে অতিবাহিত হইল। ইহার পর দুই দিন ইন্দোরে নানারূপ গোলযোগ ঘটিতে লাগিল। সিপাহীদিগের ঞ্চায় সাধারণ লোকেও আতশয় উত্তেজিত হইয়া উঠিল। শান্তি ও শৃঙ্খলার মঙ্গলময় নিয়ম সর্বাংশে অন্তর্হিত হইল। উত্তেজিত লোকে নানা স্থানে দৌরাণ্ড্য করিতে লাগিল। নানা স্থানে সম্পত্তি বিলুপ্ত হইল। মহারাজের প্রভুত্ব ও ক্রমতা যেন কোন অচিন্তনীয় শক্তিতে বিলুপ্ত হইয়া গেল। মহারাজ দুই দিন প্রতীক্ষা করিলেন। এই দুই দিনের মধ্যে ব্রিটিশ সৈন্য তাঁহার সাহায্যার্থে উপস্থিত হইল না। উত্তেজিত লোকে অধিকতর উত্তেজনার পরিচয় দিতে লাগিল। তাহারা মহারাজের নিকটে আশ্রিত খৃষ্টানদিগকে চাহিল। মহারাজের শিরক উমেদ সিংহকেও তাঁহার নিকটে পাঠাইতে কহিল। এইরূপে প্রতি কার্যে তাঁহাদের বলবত্তী জিঘাংসার

পরিচয় পাওয়া যাইতে লাগিল। চারি দিকে ভয়ঙ্কর কাণ্ড দেখিয়া, মহারাজ আর স্থির থাকিতে পারিলেন না। তিনি ৪ঠা জুলাই কতিপয় বিশ্বস্ত অমুচর সমভিব্যাহারে অখারোহণপূর্বক এক হস্তে শাণিত বড়শা ধরিয়া, উত্তেজিত সিপাহীদিগের শিবিরে উপস্থিত হইলেন। তাঁহার উপস্থিতিতে জনকোলাহলময় শিবিরে অপূর্ব দৃশ্যের আবির্ভাব হইল। যাহারা মুহূর্তকাল পূর্বে উচ্ছ্বলভাবের একশেষ দেখাইতেছিল, তাহারা সহসা প্রশান্তভাবে অবলম্বন করিল, এবং গভীরভাবে গভীর ঔৎসুক্যসহকারে মহারাজের দিকে দৃষ্টিযোজনা করিয়া রহিল। মহারাজের নবকিশলয়দলের আয় সুগঠিত সুন্দর দেহ, দীপ্তিময় লোচনযুগল এবং অসামান্য দৃঢ়তার পরিচয়সূচক মুখমণ্ডল দর্শনে তাহাদের বলবতী জিহ্বাংসা ও বিলুণ্ঠনপ্রবৃত্তি তিরোহিত হইল। মহারাজ ধীরভাবে, যথোচিত গাভীর্য্যসহকারে, সুস্পষ্টস্বরে তাহাদিগকে কহিলেন—“প্রাসাদে যে সকল ইউরোপীয় আশ্রয় গ্রহণ করিয়াছে, তাহারা যত দিন জীবিত থাকিবে, ততদিন আমি তাহাদিগকে রক্ষা করিব। তাহারা লোকান্তরিত হইলেও তাহাদের দেহ কাহাকেও দেওয়া হইবে না। আমি নিজের জীবন দিব, তথাপি আশ্রিতদিগকে তোমাদের হস্তে সমর্পণ করিব না। তোমরা ইংরেজদিগকে আক্রমণ করিয়া, আমার আদেশের প্রতি উপেক্ষা দেখাইয়াছ। ধর্ম্মের নামে কাহাকেও আক্রমণ করা কোন শাস্ত্রের অনুমোদিত নহে। প্রকৃত ধর্ম্ম এক জনকে অপরের প্রতি অস্ত্র প্রয়োগ করিতে উপদেশ দেয় না। এখন তোমরা ধর্ম্মের নামে বিলুণ্ঠনে নিরস্ত হও, নচেৎ আমি রাজার কর্তব্যপালনের জন্ত তোমাদের বিরুদ্ধে অস্ত্রধারণ করিব”। উত্তেজিত সিপাহীগণ আপনাদের সঙ্কল্প পরিত্যাগ করিল না। তাহারা এই ভাবে মহারাজের কথার উত্তর দিল—“আপনি আপনার পূর্বতন মহারাজ যশোবন্ত রাও হোলকরের বীরত্বের কথা মনে করিয়া দেখুন, অধিক গর্ব ও কৃতঘ্নতা প্রযুক্ত ভারতবর্ষে ইংরেজদিগের সৌভাগ্যতারকা অন্তমিত হইয়াছে। এখন আপনি হস্তধৃত বড়শা কাঁধে লইয়া, আমাদিগকে দিল্লীর অভিমুখে পরিচালিত করুন। আপনি এ বিষয়ে বিমুখ হইয়া, স্বকীয় কাপুরুষত্বের পরিচয় দিবেন না।” কিন্তু মহারাজ হোলকর এই কথার যথোচিত উত্তর দিতে বিমুখ হইলেন না। তিনি পূর্বের আয় প্রশান্তভাবে এবং গভীর ও উন্নত স্বরে কহিলেন যে, তিনি পূর্ব-

পুরুষদিগের জায় সাহসী ও ক্রমতাশালী নহেন, অধিকন্তু তিনি মহিলা ও বালক-বালিকাদিগকে বধ করা ধর্মের অঙ্গ বলিয়া স্বীকার করেন না। যাহারা ইহা করে, তিনি তাহাদের উপযুক্ত সহচর নহেন। মহারাজের এই কথায় উত্তেজিত হিন্দু সিপাহীগণের অনেকে বুঝিল যে, এই সকল নৃশংসজনক কর্ম হিন্দুশাস্ত্রের অমুমোদিত নহে। মহারাষ্ট্রসাম্রাজ্যের স্থাপয়িতা শিবাজী ব্যবস্থা করিয়া গিয়াছেন যে, যুদ্ধের সময়ে গাভী, কৃষক এবং স্ত্রীলোকের অনিষ্ট করা কোনক্রমে বিধেয় নহে।

মহারাজ হোলকর অতঃপর প্রাসাদে প্রত্যাবৃত্ত হইলেন। উত্তেজিত সিপাহীগণ কিয়দংশে প্রশান্ত্যাব অবলম্বন করিল। জনসাধারণ নগরবিলুপ্তনে নিবৃত্ত হইল। সিপাহীরা সংগৃহীত কামান ও অর্থাদি লইয়া, দিল্লীর অভিমুখে প্রস্থান করিল। মহারাজ ব্রিটিশ কোম্পানির যত টাকা রক্ষা করিতে পারিয়াছিলেন, তৎসমুদয়ের সহিত আশ্রিত ইউরোপীয়দিগকে বিশ্বস্ত অমুচরগণ দিয়া, মৌর হুর্গে কাপ্তেন হান্সারফোর্ডের নিকটে পাঠাইয়া দিলেন। এতদ্ব্যতীত তাঁহার মণিমুক্তা ও কোম্পানির কাগজ প্রভৃতি নিরাপদে রাখার জন্ত ঐস্থানে প্রেরিত হইল। যে দিন সিপাহীরা উত্তেজিত হইয়া রেসিডেন্সি আক্রমণ করে, সেই দিনেই মহারাজ, বলবন্ত রাও নামক এক জন বিশ্বস্ত কর্মচারীর হাত দিয়া রেসিডেন্সিতে কর্নেল প্লাটের নিকটে এক খানি পত্র পাঠাইয়া দেন। এই পত্রে তিনি স্পষ্ট উল্লেখ করিয়াছিলেন যে, তাঁহার সৈনিকদল এখন তদীয় আদেশ অতিক্রম করিয়া চলিতেছে। ইহাদের উপর এখন তাঁহার কোন কর্তৃত্ব নাই। ইহারা গবর্নমেন্টের বিরোধী সৈনিকদিগের বিপক্ষে দণ্ডায়মান হইতে অসম্মত হইয়াছে। ঐ দিন তিনি বোম্বাইয়ের গবর্নর লর্ড এল্‌ফিনষ্টোনের নিকটেও এক খানি পত্র প্রেরণ করেন। এই পত্রেও তিনি ঘটনার আত্মপূর্বিক বিবরণ দিয়া, আপনার বিশ্বস্ততা প্রতিপন্ন করেন, এবং সেনাপতি উদ্ভবরণকে যত শীঘ্র সম্ভব, ঘটনাস্থলে পাঠাইয়া দিবার জন্ত লিখেন। কর্নেল ডুরাণ্ডের নিকটেও তিনি এই ভাবে পত্র পাঠাইতে বিমুখ হইয়া নাই। এইরূপে তিনি সকল বিষয়েই ব্রিটিশ গবর্নমেন্টের প্রতি সৌহৃদ্য ও বিশ্বস্ততাবের পরিচয় দেন।

ইহার মধ্যে মহারাজ এক বিষয়ে নিরতিশয় উদ্বিগ্ন হইয়া উঠিলেন। তিনি শুনিতে পাইলেন যে, কাপ্তেন হাচিন্সন মালবের অন্তর্গত আমলীরার

অধিকতর কর্তৃক তদীর দুর্গে অবরুদ্ধ হইয়াছেন। আমজীরা মহারাজ শিবের একটি করদ জনপদ। কাণ্ডেন হাচিন্সন্ ইন্দোরের রেসিডেন্টের অধীনে ভীলদিগের মধ্যে গবর্ণমেন্টের এজেন্টের কর্ত্রে নিয়োজিত ছিলেন। তিনি শ্যার রবার্ট হামিণ্টনের একটি ছুহিতার পাণিগ্রহণ করেন। মহারাজ হোলকর হামিণ্টনের পরিবারবর্গকে ঘনিষ্ঠ আত্মীয় বলিয়াই মনে করিতেন। সুতরাং তিনি কাণ্ডেন হাচিন্সনের বিপদে স্থির থাকিতে পারিষেন না। কিন্তু কাণ্ডেন এবং তাঁহার সহচরগণ বন্দীভাবে ছিলেন না। তাঁহারা ভূপাবরনামক স্থানে ভীল সৈনিকদিগের সহিত অবস্থিত করিতেছিলেন। ভূপাবর আমজীরার একটি নগর। এই স্থানের রাজপুত রাজার এক হাজার পদাতি ছিল। ইনি মালবের ভীল সৈন্তের ব্যয় নিরূপ্যার্থে প্রতিবর্ষে নির্দিষ্ট টাকা দিতেন। ২রা জুলাই ভূপাবরে এই সংবাদ পহঁছে যে, মহারাজ হোলকরের সৈন্ত ইন্দোরের রেসিডেন্সি আক্রমণ করিয়াছে এবং মহারাজ স্বয়ং আক্রমণকারী সৈনিকদিগের সহিত সম্মিলিত হইয়াছেন। এই সংবাদে মালবের ক্ষুদ্র ক্ষুদ্র জনপদের অধিপতিগণ সাতিশর চঞ্চল হইয়া উঠেন। কাণ্ডেন হাচিন্সন্ ভূপাবরে ছিলেন; তিনি শুনিতে পাইলেন যে, আমজীরার সৈনিকগণ তাঁহাদিগকে আক্রমণ করিতে উদ্বৃত হইয়াছে। ভূপাবরে দুই শত ভীল সৈন্ত ছিল। হাচিন্সন্ এই সৈনিকদল লইয়া, আপনাদের অধ্যুষিত স্থানরক্ষায় কৃতসঙ্কল্প হইলেন। ২রা জুলাই নিশীথকালে তাঁহাদের নিকটে আমজীরার নিকটবর্তী ধারনামক এক ক্ষুদ্র জনপদ হইতে এই সংবাদ উপস্থিত হয় যে, কতকগুলি মুসলমান সৈনিক উদ্ভেদিত হইয়া ভূপাবরের অতিমুখে অগ্রসর হইতেছে। এই সময়ে কেবল ৩০ জন ভীল সৈনিক মাত্র হাচিন্সনের নিকটে ছিল। অবশিষ্ট ভীলগণ সঙ্কত হইয়া পলায়ন করিয়াছিল। এক্ষণে কাণ্ডেন হাচিন্সন্ এক তাঁহার এক জন ইউরোপীয় সহচর রক্ষীয় মহিলা ও বালক-বালিকাদিগকে লইয়া ছদ্মবেশে পলায়নের সঙ্কল্প করিলেন। তাঁহারা বিশ্বস্ত ভৃত্যদিগকে বলিয়া দিলেন যে, কেহ জিজ্ঞাসা করিলেই যেন, তাহারা বরদাগামী পারস্যীক বণিক বলিয়া আপনাদের পরিচয় দেয়। কাণ্ডেন হাচিন্সন্ প্রভৃতি এইরূপ বণিকের বেশে জব্বানামক স্থানের অতিমুখে প্রস্থান করেন। জব্বানামক ইন্দোর এবং আমজীরার মধ্যবর্তী একটি ক্ষুদ্র করদরাজ্য। এই



জনপদের অধিপতি যোধপুরের রাঠোর ভূপতিদিগের বংশসম্ভূত। জবুয়া রাজ্যে প্রধানতঃ অপেক্ষাকৃত সভ্যতাসম্পন্ন ভীলের অধিবাস। পলাতকগণ জবুয়ার সমীপবর্তী হইয়া, আপনাদের রক্ষার্থে কতিপয় সৈনিককে পাঠাইয়া দিবার জন্য তত্রত্য তরুণবয়স্ক ভূপতির নিকটে এক জন সওয়ার প্রেরণ করেন। পলাতকেরা জবুয়াতে পদার্পণ করিতে না করিতেই শুনিতে পাইলেন যে, আমজীরার একদল সৈন্য তাঁহাদের অনুসরণ করিতেছে। যাহা হউক, যথাসময়ে জবুয়া হইতে এক শত ভীল সৈন্য উপস্থিত হওয়াতে তাঁহাদের আশঙ্কা দূর হইল। তাঁহারা নিরাপদে একটি গ্রামে উপনীত হইলেন। গ্রামাধ্যক্ষ আপনার আহারীয় দিয়া তাঁহাদিগকে পরিতোষিত করিলেন। তাঁহারা রাত্রিকালে এক জন মত্তব্যবসায়ীর বাড়ীতে অবস্থিতি করিয়া পরদিন জবুয়ার অভিমুখে চলিতে লাগিলেন। ৫ই জুলাই প্রাতঃকালে তাঁহারা অক্ষতশরীরে নির্দিষ্ট স্থলে উপনীত হইলেন।

জবুয়ার অধিপতি ষোড়শবর্ষীয় বালক। অপ্রাপ্তবয়স্ক হওয়াতে ইহার পিতামহী রাজ্যশাসন করিতেন। ইনি আশ্রিত পলাতকদিগকে রক্ষা করিবার সুবন্দোবস্ত করিলেন। কতিপয় বিশ্বস্ত রাজপুত্র এই উদ্দেশ্যে নিয়োজিত হইল। রাজসরকারে কতকগুলি আরব ছিল। ইহারা কাফেরের আগমনে উত্তেজিত হইয়া উঠিল। কিন্তু রক্ষক রাজপুত্রগণ ইহাদিগকে পলাতকদিগের আশ্রয়স্থানের নিকটে আসিতে দিল না। পলাতকগণ এইরূপে রাজপিতামহীর অসামান্য দয়ায় ও সৌজন্তে নিরাপদে রহিলেন। জবুয়ার অধিপতি পলাতকদিগকে বলপূর্বক আবদ্ধ করিয়া রাখিয়াছেন শুনিয়া, মহারাজ হোলকর তাঁহাদের উদ্ধারার্থে এক দল সৈন্য পাঠাইলেন। কিন্তু যখন প্রকৃত সংবাদ তাঁহার গোচর হইল, তখন তিনি প্রেরিত সৈনিকদিগকে প্রত্যাবৃত্ত হইতে আদেশ দিয়া, পলাতকদিগকে আনিবার জন্য কতিপয় রক্ষক পাঠাইলেন। রক্ষকগণ ১০ই জুলাই জবুয়ার উপস্থিত হইল। পলাতকগণ ১২ই আপনাদের আশ্রয়দাতী সদাশয়্য রাজপিতামহীর নিকটে বিদায় লইলেন। মহারাজ হোলকর লেফটেনেন্ট হাচিন্সনকে ইন্দোরে আসিতে লিখিয়াছিলেন। হাচিন্সন এ সম্বন্ধে উল্লেখ করিয়াছেন যে, মহারাজ হোলকরের বন্ধুত্বের উপর তাঁহার দৃঢ়বিশ্বাস ছিল। তিনি তদীয় সৈনিকদিগের হস্তে আপনার পরিবার-

বর্গের রক্ষার ভার দিতে সঙ্কুচিত হয়েন নাই। কিন্তু মোতে যে সকল ইউরোপীয় ছিল, তাঁহারা উপস্থিত সময়ে এতদেশীয় সৈনিকদলের মধ্যে উত্তেজনার নিদর্শন দেখিয়া, লেফটেনেন্ট হাচিন্সনকে ইন্দোরে থাকিতে পরামর্শ দিলেন না। যাহা হউক, হাচিন্সন উপস্থিত বিপত্তিকালে মহারাজকে সুপরামর্শ দিবার জন্য রেসিডেন্সির কার্যভার গ্রহণ করিলেন। কাপ্তেন হান্সারফোর্ড সবিশেষ ক্ষিপ্ৰকারিতার সহিত যে কার্যের ভার গ্রহণ করিয়াছিলেন এবং সাতিশয় দক্ষতার সহিত যাহা সম্পন্ন করিয়া তুলিয়াছিলেন, এইরূপে তাহা কাপ্তেন হাচিন্সনের উপর সমর্পিত হইল।

উপস্থিত সময়ে ব্রিটিশ রেসিডেন্ট কর্ণেল ডুরাণ্ড যে ভাবে মহারাজ হোলকরকে দেখিয়াছিলেন এবং মহারাজ স্বয়ং যে ভাবে কার্য করিয়া, রেসিডেন্টের নিকটে আপনার প্রতি আরোপিত কলঙ্কের ক্ষালন করিয়াছিলেন, তদ্বিষয়ে মতভেদ আছে। এক পক্ষ ডুরাণ্ডের অনুষ্ঠিত কার্যের সমর্থন করিয়াছেন; অপর পক্ষ সমুদয় বিষয়ের আলোচনা পূর্বক মহারাজকে সর্ব্বাংশে নির্দোষ ও রেসিডেন্সি আক্রমণসংক্রান্ত ব্যাপারে নির্লিপ্ত বলিয়া নির্দেশ করিয়াছেন। এখন মহারাজ ও রেসিডেন্ট, উভয়েই কালের পরাক্রমে সংসারক্ষেত্র হইতে অপসারিত হইয়াছেন। উভয়েই এখন নিন্দা বা প্রশংসার অতীত হইয়া পড়িয়াছেন। উভয়ের কার্যই এখন বহু বৎসরের অতীত ঘটনার মধ্যে পরিগণিত হইয়াছে। এখন অপক্ষপাতে উভয়ের কার্যের আলোচনা করিলে উদ্বোধ হইবে যে, কর্ণেল ডুরাণ্ড সবিশেষ বিচারবিতর্ক না করিয়া, মহারাজকে মিথ্যাপবাদে দূষিত করিয়াছেন। মহারাজ স্পষ্ট নির্দেশ করিয়াছিলেন যে, তাঁহার দরবারের যে সকল সৈন্য রেসিডেন্সি আক্রমণ করিয়াছে, তাহারা স্বপ্রধান হইয়া উঠিয়াছে। এই সকল উচ্ছৃঙ্খল সৈনিকদিগের উপর এখন তাঁহার কোনরূপ কর্তৃত্ব নাই। তিনি কর্ণেল ডুরাণ্ডকে সাবধান করিয়া দিয়াছিলেন। তিনি ধনাগারের অর্থ এবং আপনার রক্ষাদি নিরাপদে রাখিবার জন্য মোতে ব্রিটিশ রেসিডেন্টের নিকটে পাঠাইয়াছিলেন। তিনি উত্তেজিত সিপাহীদিগের পরাক্রম পর্য্যবেক্ষণ করিবার জন্য সেনাপতি উদ্ভবরণকে যত শীঘ্র সম্ভব, পাঠাইয়া দিতে বোম্বাই গবর্নর লর্ড এল্ফিন্‌ষ্টোনের নিকটে প্রার্থনা করিয়াছিলেন। তিনি ইহা অপেক্ষাও বিশ্বস্ততার পরিচয় দিয়াছিলেন। তিনি উত্তেজিত সিপাহীদিগের

সমক্ষে স্বয়ং উপস্থিত হইয়া, নির্ভয়ে কহিয়াছিলেন যে, তাঁহার দৃঢ় প্রতিজ্ঞা যে, তিনি আত্মসমর্পণ করিবেন, তথাপি আশ্রিত ইউরোপীয়দিগকে উত্তেজিত সিপাহীদিগের হস্তে সমর্পণ করিবেন না। তাঁহার এই সকল কার্য্য ব্রিটিশ গবর্ণ-মেন্টের প্রাতি তদীয় অপরিসীম অনুরাগের পরিচয় দিতেছে। তদীয় পদাতি-দলের অধ্যক্ষ বংশগোপালকে তিনি কোনরূপে উৎসাহ দেন নাই। সাদত খাঁকেও তিনি কোনরূপ প্রশ্রয় দিতে উদ্বৃত্ত হইয়াছেন নাই। তাঁহার আদেশে সাদত খাঁ অবরুদ্ধভাবে ছিল। সে ১৮৭৪ অব্দের সেপ্টেম্বর মাসে ধৃত হইলে বিচারের পর তাহার ফাঁসি হয়। বিচারকালে সাদত খাঁ স্বীকার করিয়াছিল যে, হোলকরের দরবারের কাহারও নিকট হইতে সে রেসিডেন্সি আক্রমণ করিবার আদেশ প্রাপ্ত হয় নাই। তাহার সহযোগীদিগের মধ্যে সকলেই মুসলমান ছিল। পদাতিদিগের অধ্যক্ষ বংশগোপাল ইহার মধ্যে ছিলেন না।\* পাছে তাঁহার উপস্থিতিতে উত্তেজিত সিপাহীগণ উৎসাহিত হইয়া উঠে, এই আশঙ্কায় মহারাজ হোলকর ১লা জুলাই আক্রমণের সংবাদ শুনিয়াই, ঘটনাস্থলে উপস্থিত হইয়াছেন নাই। ইহার পর তিনি যখন দেখিলেন যে, দুই দিন অতীত হইল, ব্রিটিশ সৈন্য তাঁহার সাহায্যার্থে উপস্থিত হইল না, এদিকে লোকে যখন অধিকতর অত্যাচারপরায়ণ হইয়া উঠিল, তখন তিনি স্থির থাকিতে না পারিয়া, সিপাহীদিগকে শান্তভাবে রাখিবার জন্ত তাহাদের নিকটে উপস্থিত হইলেন। এই সময়ের মধ্যে তিনি বিপন্ন ইউরোপীয়দিগের উপকারসাধনে কখনও বিমুখ হইয়াছেন নাই। ইহাতে তাঁহার ধীরতা ও বুদ্ধিমত্তার পরিচয় পাওয়া যাইতেছে। ফলতঃ যঁাহারা ধীরভাবে ও সূক্ষ্মরূপে উপস্থিত বিষয়ের আলোচনা করিয়াছেন, তাঁহারা মহারাজ হোলকরের কোন দোষ দেখিতে পান নাই। বোম্বাইয়ের গবর্ণর মহারাজকে নির্দোষ বলিয়া নির্দেশ করিয়াছেন। কাপ্তেন হাঙ্গারফোর্ড মহারাজের বিশ্বস্ততাসম্বন্ধে নিঃসন্দেহ হইয়াছেন। ঐতিহাসিকগণ আফ্লাদ ও প্রীতির সহিত মহারাজের বিশ্বস্ত-ভাবের প্রশংসা করিয়া গিয়াছেন।†

\* *John Dickinson, Last Counsels of an Unknown Counsellor, pp. 72, 162.*

† *Kaye, Sepoy War, Vol. III, pp. 337, 345-346.*

আর কর্ণেল ডুরাও ? ডুরাও অগ্রপশ্চাৎ না ভাবিয়া, মহা আতঙ্কগ্রস্ত হইয়া, রেসিডেন্সি পরিত্যাগ করিয়াছিলেন। তাঁহার পক্ষে হেতুবাদ এই যে, আক্রমণকারী সৈনিকগণ অস্ত্রশস্ত্রে সুসজ্জিত ছিল; তাঁহার বাসগৃহ আশ্রয়-রক্ষার উপযোগী ছিল না; মোতে গবর্ণমেন্টের যে সৈন্ত ছিল, তাহারা আক্রমণকারীদের বিরুদ্ধে যুদ্ধ করিতে সম্মত ছিল না; যাহারা এই সময়ে বিশ্বস্তভাবে ছিল, তাহাদের সংখ্যা নিতান্ত অল্প ছিল; মহারাজ হোলকর ইচ্ছা করিয়াই হউক, বা ক্ষমতা না থাকাতেই হউক, আক্রমণকারী সৈনিকদিগকে শাসনে রাখিতে সমর্থ ছিলেন না। এই সকলে কারণে ডুরাও পলায়ন করেন। কিন্তু পূর্বোক্ত ঘটনায় প্রতিপন্ন হইতেছে যে, মোতে সাহসী ও সাহায্যকারী সৈনিকের অভাব ছিল না। কাপ্তেন হাঙ্গারফোর্ড আপনার কামান ও গোল-দাজ সৈন্তের সহিত সুসজ্জিত ছিলেন। তিনি কাহারও দিকে দৃকপাত না করিয়া, একাকী যেক্রমে শৃঙ্খলা রক্ষা করেন, তাহাতে তাঁহার সাহস ও ক্ষিপ্ৰকারিতার যথোচিত প্রশংসা করিতে হয়। কর্ণেল ডুরাও স্বয়ং সৈনিক-পুরুষ; তিনি যুদ্ধকার্যে অভ্যস্ত; যুদ্ধস্থলে কর্মপটুতার পরিচয় দিতে কৃতহস্ত। কাপ্তেন হাঙ্গারফোর্ডের সহিত সম্মিলিত হইলে, তিনি অনায়াসে গোলযোগ নিবারণ করিতে পারিতেন, কিন্তু ইহা না করিয়া, তিনি তাড়াতাড়ি রেসিডেন্সি পরিত্যাগপূর্বক মহারাজ হোলকরের উপর অযথাক্রমে কলঙ্কের আরোপ করিয়াছেন, ইহাতে তিনি যে সহৃদয়গণের নিকটে নিজেই কলঙ্কিত হইয়াছেন, তাহা তাঁহার উদ্বোধ হয় নাই। বোধ্যই গবর্ণমেন্ট তাঁহার আকস্মিক পলায়ন-সম্বন্ধে নির্দেশ করিয়াছেন যে, এই প্রসঙ্গে দুইটি বিষয় বিচার্য্য হইয়া উঠে,— হয়, মহারাজ বিশ্বাসঘাতক, না হয়, ব্রিটিশ রেসিডেন্ট বিনা কারণে ইন্দোর হইতে পলায়নে তৎপর। গবর্ণমেন্ট এতৎসম্বন্ধে সমুদয় বিষয়ের আলোচনা করিয়া, শেষোক্ত সিদ্ধান্ত অর্থাৎ গবর্ণর-জেনারলের এজেন্ট বিনা কারণে ইন্দোর হইতে পলাইয়াছিলেন, এই বিষয় স্থির করিয়াছিলেন।\* কর্ণেল ডুরাও কেবল মহারাজ হোলকরের উপর কলঙ্ক আরোপ করিয়াই নিরস্ত হইয়া নাই। এই প্রসঙ্গে ধার নামক একটি ক্ষুদ্র রাজ্য অধিকার করিবারও প্রস্তাব করিয়াছিলেন। যেহেতু ধারের রাজা যখন অপ্রাপ্তবয়স্ক, তখন তাঁহার বেতনভোগী

\* *Kaye, Sepoy War, Vol. III. p. 346.*

সৈনিকগণ গবর্ণমেন্টের বিরুদ্ধ পক্ষ অবলম্বন করিয়াছিল ; কিন্তু কোম্পানির ডিরেক্টরগণ বিরোধী হওয়াতে প্রস্তাব কার্যে পরিণত হয় নাই । ডিরেক্টরগণ ভারত-গবর্ণমেন্টের নিকটে এ সম্বন্ধে লিখিয়াছিলেন—“আমরা এ বিষয়ে শাস্তি-বিধান করিতে পারি না । যখন সমগ্র জগতের বিদিত হইয়াছে যে, গোবালিয়র ও ইন্দোরের ঞায় পরাক্রান্ত রাজ্য, অধিক কি, ব্রিটিশ গবর্ণমেন্টও আপনাদের সৈন্যশাসনে সমর্থ হইয়েন নাই, তখন ধার অথবা অন্য কোন ক্ষুদ্র, দুর্বল রাজ্য আপনার সৈনিকদিগকে শাসনে রাখিতে পারে নাই বলিয়া, আমরা কোনরূপ শাস্তিবিধান করিতে পারি না । আপনার ঘরে আপনি আগুন দিবার পর, যখন অনলশিখা প্রজ্বলিত হইয়া উঠে, এবং যখন উহা পার্শ্ববর্তী প্রতিবাসীদিগের গৃহে পর্য্যন্ত বিস্তৃত হয়, তখন ঐ সকল প্রতিবাসীকে অপরাধী স্থির করা যেরূপ ঞায়সঙ্গত, কর্ণেল ডুরাণ্ডের উপস্থিত কার্য্যও সেইরূপ ঞায়সঙ্গত বলিয়া বোধ হইবে ।” ফলতঃ কর্ণেল ডুরাণ্ডের অবৈধ কার্য্যের অনুমোদনপ্রযুক্ত যে, মহারাজ হোলকরের বৈধকার্য্যের অবমাননা এবং তজ্জন্ত তাঁহার স্বার্থহানি হইয়াছে, তদ্বিষয়ে সন্দেহ নাই । \*

ডুরাণ্ড মহারাজকে যে জালে আবদ্ধ করিয়াছিলেন, মহারাজ দীর্ঘকাল পর্য্যন্ত তাহা বিচ্ছিন্ন করিতে পারেন নাই । উর্দ্ধতন কর্তৃপক্ষ তাঁহার সম্মান-রক্ষার জন্ত সচেষ্ট হইয়াছিলেন, কিন্তু ভারত-গবর্ণমেন্টের পররাষ্ট্রবিভাগের কর্মচারী এই কাষে বাধা দিতে বিমুখ হইয়েন নাই । বোর্ড অব্ কন্ট্রোলের সভাপতি লর্ড ষ্টানলি ( পরে লর্ড ডার্কি ) ১৮৫৮ অব্দের ৮ই জুলাই গবর্ণর-জেনেরলের নিকটে এই ভাবে লিখিয়াছিলেন—“যে সকল ভূপতি ও সর্দার প্রভৃতি ব্রিটিশ গবর্ণমেন্টের প্রতি বিশ্বস্তভাব দেখাইয়াছেন, তাঁহাদিগকে, ভূসম্পত্তি দান করিয়াই হউক, বা অন্য কোনরূপেই হউক, সম্মানিত করিবার জন্ত যেরূপ অভিপ্রায় প্রকাশ করেন, তাহা ঐ সকল বিশ্বস্ত ভূপতিদিগের নামের তালিকার সহিত অবিলম্বে আমাদিগকে জানাইবেন । আমাদের বিশ্বাস যে, আপনি এই তালিকায় সর্ব্বাগ্রে মহারাজ শিন্দে, হোলকর এবং নেপালরাজের নাম স্থাপন করিবেন । কিন্তু গবর্ণর-জেনেরল লর্ড কানিং মহারাজ হোলকরকে পুরস্কৃত

\* *Kave, Sepoy War. Vol. III. p. 346.*

করিতে সম্মত হইলেন নাই । তিনি ইন্দোরের ঘটনার উল্লেখপূর্বক বোর্ডের সভাপতির নিকটে মহারাজকে পুরস্কার দানের অযোগ্য বলিয়া নির্দেশ করেন । ১৮৬৪ অব্দের ৪ঠা জুলাই ভারতবর্ষের ষ্টেট সেক্রেটারী শ্রী চার্লস্ উড্ ( পরে লর্ড হালিফাক্‌স্ ), মহারাজ হোলকর কি জ্ঞাত অজ্ঞাত ভূপতিদিগের সমক্ষে সম্মানের অযোগ্য হইলেন, তাহা তদানীন্তন গবর্নর-জেনেরল শ্রী জন্ লরেন্সের ( পরে লর্ড লরেন্স্ ) নিকটে জানিতে চাহেন । এই সময়ে কর্নেল ডুরাণ্ড পররাষ্ট্রবিভাগের সেক্রেটারী ছিলেন । তিনি কারণ নির্দেশস্থলে সেই পুরাতন কথার পুনরুল্লেখ করেন । লর্ড মেয়ো গবর্নর-জেনেরলের পদে প্রতিষ্ঠিত হইয়া, মহারাজের এইরূপ অসম্মানের কারণ জিজ্ঞাসা করেন । কিন্তু এ সময়েও পররাষ্ট্রবিভাগে পর্ষতের শ্রায় অটল ছিলেন । ঐ বিভাগের তদানীন্তন সেক্রেটারী এচিসন্ সাহেব ( পরে শ্রী চার্লস্ এচিসন্ ) আবার সেই ১৮৫৭ অব্দের ১লা জুলাইয়ের ঘটনার উল্লেখ পূর্বক নির্দেশ করেন যে, মহারাজ এই জুলাই পর্যন্ত এ বিষয়ে সর্বতোভাবে ওদাস্তের পরিচয় দিয়াছিলেন ।\* এইরূপে এক ষ্টেট সেক্রেটারীর পর অত্র এক ষ্টেট সেক্রেটারী, এক গবর্নর-জেনেরলের পর অত্র এক গবর্নর-জেনেরল মহারাজ হোলকরের বিষয় অনুসন্ধান করেন । কর্নেল ডুরাণ্ডের নির্দিষ্ট এক পুরাতন ও যুক্তিবহিত কথাতে সকলকে নিরস্ত হইতে হয় । কিন্তু ইতিহাস এই আরোপিত কলঙ্কের প্রক্ষালনে উদাসীন থাকে নাই । কে, মালিসন্ প্রভৃতি ঐতিহাসিকগণ মহারাজ হোলকরের সম্মান রক্ষা করিয়াছেন । মহারাজও গবর্নমেন্টের নিকট হইতে “ভারতনকত্র” উপাধি প্রাপ্ত হইলেন । এদিকে কর্নেল ডুরাণ্ডও উচ্চ হইতে উচ্চতর পদে নিয়োজিত হইতে থাকেন । তিনি পররাষ্ট্র-বিভাগের সেক্রেটারী, গবর্নর-জেনেরলের কোমিসলের সদস্য এবং শেষে পঞ্জাবের লেক্টেনেন্ট-গবর্নর হইলেন । কিন্তু নিতান্ত দুঃখের বিষয় যে, তিনি দীর্ঘকাল আপনার প্রাধান্য ও উচ্চ আশার ফল ভোগ করিতে পারেন নাই । নিরতি এ বিষয়ের বিরোধী হইয়া উঠে । রাজকীয় সম্মান ও উচ্চপদের মধ্যে শ্রী হেনরি ডুরাণ্ড দেহত্যাগ করেন ।

\* *Evans Bell, A letter to H. M. Durand, Notice, p. VI-VII.*

উত্তরপশ্চিমের লেফটেনেন্ট-গবর্নর কল্‌বিন্ সাহেব মধ্যপ্রদেশের মহারাষ্ট্র ভূপতিদিগের শাসিত জনপদসম্বন্ধে যেরূপ চিন্তিত হইয়াছিলেন, সেইরূপ আর একটি বিস্তৃত জনপদও তাঁহার চিন্তার বিষয়ীভূত হইয়াছিল। রাজপুতনা-প্রদেশের রাজপুত ভূপতিগণ আপনাদের অধিকৃত ভূখণ্ডে শাসনদণ্ডের পরিচালনা করিতেছিলেন। ইঁহাদের পরস্পরের মধ্যে তাদৃশ ঐক্য বা সমবেদনা ছিল না। সুতরাং উপস্থিত সময়ে পরস্পর-বিচ্ছিন্ন জনপদগুলি একসূত্রে গ্রথিত হইবার সম্ভাবনা ছিল না। রাজপুত ভূপতিগণ সুখে ও শান্তিতে কাণ্যাপন করিতে-ছিলেন। ব্রিটিশ গবর্নমেন্টের উপর তাঁহাদের কোন বিষয়ে বিরক্তি জন্মে নাই। তাঁহাদের পূর্বপুরুষগণ মুসলমান, মরাঠা ও পিণ্ডারীদিগের হস্তে কিরূপ নিগৃহীত হইয়াছিলেন, তাহা তাঁহারা বিস্মৃত হয়েন নাই। ইংরেজের অধিকারে এই উপদ্রব নিরাকৃত হইয়াছিল। সিপাহী-বিপ্লবের পূর্বে এক বার জনরব উঠিয়াছিল যে, গবর্নমেন্ট রাজপুতরাজ্য আপনাদের অধিকারভুক্ত করিবেন। এই জনরব যে, সর্বাংশে অলাক, তাহা বিলাতের ডিরেক্টর-সভা স্পষ্টাক্ষরে নির্দেশ করেন। কিন্তু অত্র একটি বিষয়ে রাজপুতনার অধিবাসীদিগের হৃদয় নিরতিশয় চঞ্চল হইয়া উঠিয়াছিল। সিপাহী-যুদ্ধের প্রারম্ভে অত্রাণ্ড স্থলে যেরূপ হইয়াছিল, সেইরূপ রাজপুতনাতেও লোকের বিশ্বাস জন্মিয়াছিল যে, গবর্নমেন্ট তাহাদের ধর্মনাশ ও জাতিনাশে কৃতসঙ্কল্প হইয়াছে। কেহ কেহ দিল্লীর বাদশাহের আধিপত্যের পুনঃপ্রতিষ্ঠা সম্বন্ধে নানা কথা বলিতেছিল। এইরূপ বিশ্বাস, এইরূপ ধারণা লোকের অজ্ঞতা হইতে উৎপন্ন হইয়াছিল। ইহা হইতে সহসা যে, কোনরূপ অনিষ্ট ঘটবে, তাহা বোধ হয় নাই। কিন্তু আগরার কর্তৃপক্ষ বীরত্ব প্রসিদ্ধ রাজপুতদিগের বিষয় ভাবিতেছিলেন। আশঙ্কিত বিপদের ভয়ঙ্কর দৃশ্য ও অমূলক গভীর দুশ্চিন্তা তাঁহাদের হৃদয় হইতে অপ-সারিত হয় নাই।

রাজপুতনা মিবার, জয়পুর, মাড়বার প্রভৃতি ১৮টি রাজ্যে বিভক্ত। ইহার মধ্যে ১৭টি রাজ্যে রাজপুত হিন্দু নৃপতিগণ শাসনদণ্ডের পরিচালনা করিয়া থাকেন। অষ্টাদশ রাজ্যটি মুসলমান নৃপতির শাসনাধীন। বিখ্যাত পিণ্ডারী সর্দার আমীর খাঁর বংশধরেরা এই রাজ্যে আধিপত্য করিয়া থাকেন। ব্রিটিশ-গবর্নমেন্টের অনুগ্রহে রাজপুতনার অন্তর্ভুক্ত উক্ত অষ্টাদশ রাজ্য—টঙ্কের কর্তৃত্ব

পাইয়া ইঁহারা টঙ্কের নগর বলিয়া পরিচিত হইতেছেন। যাহা হউক, এই আঠারটি রাজ্যের মধ্যে ছয়টি রাজ্যের শাসনকার্য্য ব্রিটিশ গবর্ণমেন্টের নিয়োজিত এজেন্ট কর্তৃক পরিলক্ষিত হইয়া থাকে। রাজপুতনার অনেক স্থান বৃক্ষলতাপরিশূন্য মরুভূমিতে সমাবৃত। কোন কোন স্থান উন্নত পর্বতমালায় ও হরিদ্রণ বৃক্ষরাজিতে সুশোভিত, দূর হইতে দেখিলে উহা সুচিত্রিত আলেখ্যের ন্যায় রমণীয়ভাবে দর্শকের হৃদয় উৎফুল্ল করিতে থাকে। এই সকল উন্নত শৈলশিখরে রাজপুতদিগের অসামান্য গৌরবের সাক্ষী, অপূর্ব মহত্বের পরিচয়-স্থল, অনন্যসাধারণ বীরত্বের বিস্কুরণক্ষেত্র দুর্গ সকল নির্মিত। পূর্বে উক্ত হইয়াছে যে, রাজপুত ভূপতিগণ ব্রিটিশ-গবর্ণমেন্টের প্রতি কোন বিষয়ে অসন্তোষ প্রকাশ করেন নাই। কিন্তু রাজপুতনার ঠাকুরগণ গবর্ণমেন্টের আধিপত্যে সন্তুষ্ট ছিলেন না। যেহেতু ইহাতে তাঁহাদের অভীষ্টসিদ্ধির পথ অবরুদ্ধ হইয়াছিল। গবর্ণমেন্ট মধ্যবর্তী থাকাতে তাঁহারা সম্পত্তিসংগ্রহের জন্য রাজপুত রাজাদিগের সহিত বিবাদ করিতে অসমর্থ ছিলেন।

পূর্বে উক্ত হইয়াছে যে, রাজপুতনার খণ্ড রাজ্যগুলিতে গবর্ণমেন্টের এজেন্ট থাকিতেন। সকলের উপর কর্তৃত্ব করিবার জন্য গবর্ণর-জেনারেলের এক জন রেসিডেন্ট অবস্থিতি করিতেন। উপস্থিত সময়ে স্যার হেনরি লরেন্সের অন্যতম ভ্রাতা কর্নেল জর্জ্ লরেন্স্ রাজপুতনার এজেন্টের পদে নিয়োজিত ছিলেন। স্যার হেনরি লরেন্সের ন্যায় জর্জ্ লরেন্স্ ও সাহসী, নির্ভীক ও কর্তব্যপরায়ণ ছিলেন। যখন মিরাতের গোলযোগের সংবাদ তাঁহার নিকটে উপস্থিত হয়, তখন তিনি আবু পর্বতে অবস্থিতি করিতেছিলেন। এই সংবাদ পাইয়াই, তিনি আপনার গুরুতর দায়িত্ব বৃদ্ধিতে পারিলেন। এক লক্ষ ত্রিশ হাজারেরও অধিক পরিমাণের বিসৃত ভূখণ্ড এখন তাঁহার রক্ষণীয় হইল। তিনি এই সুবিসৃত জনপদের শান্তিবিধানে অমনোযোগী হইলেন না। মিরাতের সংবাদ-প্রাপ্তির চারি দিবস পরে তৎকর্তৃক ঘোষণা-পত্র প্রচারিত হইল। তিনি এই ঘোষণা-পত্রে সমগ্র ভূপতিকে আপনাদের সৈন্য সজ্জিত করিয়া রাখিতে, এবং সাধারণের মধ্যে শান্তি রক্ষা করিতে অনুরোধ করিলেন। এদিকে তাঁহার সহযোগীরাও আগ্রহসহকারে তদীয় পক্ষসমর্থনে উত্তত হইলেন। উত্তরপশ্চিমপ্রদেশের লেফ্টেনেন্ট-গবর্ণর কল্বিন্ সাহেব, কর্নেল লরেন্স্কে



যাবতীয় ইউরোপীয় সৈন্য ও আফিসার এবং কোম্পানির টাকা লইয়া আগরা-রক্ষার জন্ত আসিতে অনুরোধ করিলেন। কর্ণেল লরেন্স্ এই অনুরোধে বিস্মিত ও চমকিত হইয়া উঠিলেন। রক্ষণীয় স্থান পরিত্যাগ করিলে রাজপুতনার সাত্তিশয় বিপদ ঘটবার সম্ভাবনা ছিল। রাজপুতনার কেন্দ্রস্থলে ব্রিটিশ-গবর্নমেন্টের অধিকৃত আজমীর অবস্থিত। উত্তরপশ্চিমপ্রদেশের মধ্যে যেরূপ দিল্লী, রাজপুতনার মধ্যেও সেইরূপ আজমীর। এই স্থানে বিবিধ যুদ্ধোপকরণে পরিপূর্ণ অস্ত্রাগার ছিল। এই স্থানের ধনাগারে বহু অর্থ রক্ষিত হইতেছিল। হিন্দু ও মুসলমানদিগের মধ্যে এই স্থান পুণ্যতীর্থ বলিয়া পরিগণিত ছিল। রাজপুতনার মহাজন ও কুঠীওয়ালাদিগের সঞ্চিত অর্থ এই স্থানে রাশীকৃত রহিয়াছিল। কর্ণেল লরেন্স্ বুঝিয়াছিলেন যে, যদি এই লোভজনক স্থান উত্তেজিত সিপাহীদিগের হস্তগত হয়, তাহা হইলে সমগ্র রাজপুতনার করাল বিপ্লববহির বিকাশ হইবে। সুতরাং তিনি আপনার ভ্রাতৃঘয়ের ঞ্চায় দৃঢ়তাসহকারে স্বকীয় দায়িত্ব বুঝিয়া, কর্তব্যসম্পাদনে অগ্রসর হইলেন। এদিকে কল্বিন্ সাহেবও আপনার অনুরোধের অযৌক্তিকতা বুঝিয়া, কর্ণেল লরেন্স্কে আর কোন কথা বলিলেন না। বরং তিনি কর্ণেল লরেন্সের হস্তে অধিকতর ক্ষমতা সমর্পণ করিবার জন্ত তাঁহাকে ব্রিগেডিয়ার-জেনেরলের পদ দিয়া, রাজপুতনার সমগ্র সৈনিকদলের অধ্যক্ষ করিলেন। এদিকে ব্রিগেডিয়ার লরেন্স্ সর্বাগ্রে আজমীররক্ষায় কৃতসঙ্কল্প হইলেন। আজমীরে এক দল সিপাহী এবং এক দল মাহীর নামক নিম্নশ্রেণীর সৈনিক ছিল। মাহীরগণ পূর্বে তাদৃশ সভ্যতাসম্পন্ন ছিল না। আজমীরের কমিশনার লেফ্টেনেন্ট-কর্ণেল ডিক্সনের যত্নে ইহাদের অবস্থা উন্নত হয়। মাহীরগণ গবর্নমেন্টের সৈনিকশ্রেণীতে প্রবেশ করে। দেওয়ার নামক স্থানে ইহাদের প্রধান আড্ডা ছিল। কর্ণেল ডিক্সন উপস্থিত সময়ে দেওয়ারে মৃত্যুশয্যা শয়ান ছিলেন। নিয়তির পরাক্রমে তাঁহার দেহত্যাগ হইল। কিন্তু তৎপ্রদত্ত শিক্ষায় উন্নত মাহীরদিগের কর্তব্যকর্ম্য অসম্পন্ন রহিল না। সিপাহীদিগের উপর মাহীরদিগের তাদৃশ সমবেদনা ছিল না। এই জন্ত ব্রিগেডিয়ার লরেন্স্ কোন-রূপ অনিঃসংঘটনের পূর্বেই সিপাহীদিগকে আজমীর হইতে সরাইয়া তৎস্থলে মাহীর সৈন্য রাখিতে ইচ্ছা করিলেন। তদীয় সঙ্কল্প কার্যে পরিণত হইল।

তঁাহার আদেশে লেফটেনেন্ট কার্ণেল নামক এক জন সৈনিকপুরুষ মাহীর সৈনিকদল লইয়া দেওয়ার হইতে আজমীরে উপস্থিত হইলেন। আজমীর রক্ষা পাইল। সেই সঙ্গে সমগ্র রাজপুতনাও উপস্থিত ভীষণ বিপ্লবের সম্মুখে রক্ষিত হইল।

রাজপুত ভূপতিদিগের মধ্যে উদয়পুরের মহারাণাগণ সর্বপ্রধান। ইঁহারা অসামান্য বংশগৌরবে যেরূপ সর্বশ্রেষ্ঠ, সেইরূপ অপরিমিত বীরত্ব-কীর্তি ও অতুল্য স্বার্থত্যাগে সকলের বরণীয়। যখন অগ্রাগ্র রাজপুত ভূপতি মোগলের সহিত বৈবাহিক সম্বন্ধ স্থাপন পূর্বক আপনাদিগকে কৃতকর্ম্ম বলিয়া মনে করিয়াছিলেন, তখন উদয়পুরের মহারাণা তঁাহাদের পক্ষসমর্থন করেন নাই। তিনি মোগলের সহিত এইরূপ সম্বন্ধস্থাপনে ঘৃণা প্রকাশ করিয়াছিলেন। ঠাহারা এইরূপ সম্বন্ধ আপনাদের গৌরবজনক মনে করিয়া, আহ্লাদে উৎফুল্ল হইয়াছিলেন, তঁাহাদের সহিত সমুদয় সামাজিক সংস্রব উঠাইয়া দিয়াছিলেন। এই আভিজাত্যগৌরব এবং জাতীয়ভাবে সম্মানরক্ষার জন্ত তিনি কোনরূপ কষ্টকে কষ্ট বলিয়া মনে করেন নাই। ভীষণ সংগ্রামে তঁাহার সহস্র সহস্র সৈন্য দেহত্যাগ করিয়াছে, তিনি স্বয়ং পর্বতে পর্বতে, অরণ্যে অরণ্যে বেড়াইয়া, কষ্টের একশেষ ভোগ করিয়াছেন, তথাপি আভিজাত্যগৌরবে ও জাতীয়-ভাবে বিসর্জন দেন নাই। এইরূপ স্বার্থত্যাগ সমগ্র রাজস্থানের অনন্ত গৌরবের পরিচয় দিতেছে। রাজপুত এক মুহূর্তের জন্ত এই গৌরবের কথা বিস্মৃত হয় নাই এবং এক মুহূর্তের জন্ত দেবতুল্য প্রতাপসিংহের মহত্বঘোষণায় বিরত থাকে নাই।

উপস্থিত সময়ে এইরূপ সর্বপ্রধান ও সর্বমান্য রাজপুত ভূপতির প্রতি ইংরেজ কর্তৃপক্ষের তীক্ষ্ণ দৃষ্টি ছিল। কাপ্তেন সাওয়ার্স এই রাজদরবারে ব্রিটিশ-গবর্নমেন্টের পক্ষে এজেন্ট ছিলেন। ১৮৫৫ অব্দে মিবারের কতিপয় সর্দারের কার্যে স্মার্ট হেনরি এবং তৎসহোদর কর্ণেল লরেন্সের অসন্তোষ জন্মে। ইঁহারা উভয়েই এই সকল অবাধ্য সর্দারের দমনের জন্ত ইংরেজ-সৈন্য পাঠাইবার প্রস্তাব করেন। মিবারের মহারাণার প্রাধাত্যরক্ষার জন্তই ইঁহাদিগকে ঐরূপ কার্য্য করিতে হইয়াছিল। ১৮৫৭ অব্দে যখন চারি দিকে ভয়ঙ্কর বিপ্লব ঘটে, তখন মিবারের মহারাণার সহিত ব্রিগেডিয়ার লরেন্সের সত্তাব বা সম্প্রীতির

কোনরূপ ব্যত্যয় হয় নাই।\* যাহা হউক, এই সময়ে মহারাণা একটি সুদৃশ্য হ্রদের তীরে তাঁহার গ্রীষ্মাবাসের জন্ত মন্দির প্রস্তুতনির্মিত রমণীয় প্রাসাদে কাপ্তেন সাওয়ার্সের সহিত সাক্ষাৎ করেন। তিনি এই সঙ্কটকালে আপনার বিশ্বস্ত সৈনিক-পুরুষ দিয়া গবর্ণমেন্টের সাহায্য করিতে প্রতিশ্রুত হইলেন। দরবারের প্রধান কর্মচারীদিগকে এই উদ্দেশ্যে কাপ্তেন সাওয়ার্সের নিকটে পাঠাইবার বন্দোবস্ত করেন এবং এই উদ্দেশ্যসাধনের জন্ত অধীন সর্দারদিগের মধ্যে আদেশপত্র পাঠাইয়া দেন। এইরূপে তিনি সকল বিষয়েই গবর্ণমেন্টের পক্ষনমর্থনে প্রস্তুত হইলেন।

ইহার মধ্যে কাপ্তেন সাওয়ার্সের নিকটে সংবাদ পল্ছে যে, নীমচের এবং নসীরাবাদের সিপাহীগণ গবর্ণমেন্টের বিরুদ্ধে সমুথিত হইরাছে। ৪০টি পলাতক ইউরোপীয় কুলমহিলা, বালকবালিকা প্রভৃতি নিরতিশয় শোচনীয় অবস্থায় পঞ্চাশ মাইল দূরে অবস্থিত করিতেছে। সংবাদপ্রাপ্তিমাত্র কাপ্তেন সাওয়ার্স দুই জন সহযোগীর সহিত মিবারের কাতিপর সওয়ার লইয়া ঐ শোচনীয় দশাগ্রস্ত জীবদিগের উদ্ধারের জন্ত যাত্রা করেন। মহারাণা এ বিষয়ে যথোচিত সাহায্য করিতে বিমুখ হইলেন নাই। তিনি বেদলা নামক জনপদের সর্দারকে পলাতকদিগকে আনিবার জন্ত পাঠাইয়া দেন। সাওয়ার্স তাহাদিগকে এই সর্দারের তত্ত্বাবধানে রাখিতে বিমুখ হইলেন নাই। সাহসী রাজপুতবীর নিরাপদে একটি রমণীয় ঘাঁপের মধ্যবর্তী সুরমা প্রাসাদে পলাতকদিগকে আনয়ন করেন।

এদিকে জয়পুররাজও গবর্ণমেন্টের সাহায্য করিতে প্রস্তুত হইলেন। তাঁহার সৈনিকদল আগরার সীমান্তভাগরক্ষায় নিয়োজিত হয়। মাড়বারের অধিপতিও এ সময়ে আপনার বিশ্বস্ততা প্রদর্শনে বিমুখ হইলেন নাই। সাহসে ও বীরত্বে মাড়বার চিরপ্রসিদ্ধ। মরুস্থলীর বীরপুরুষগণের বীরত্বে এক সময়ে দিল্লীর ভূপতি-

\* কে সাহেব লিখিয়াছেন যে, মিবারের দরবারের সহিত জর্জ্ লরেন্সের বিবাদ ছিল। লরেন্স মিবারে ইংরেজ সৈন্য স্থাপিত, মহারাণাকে গদীচ্যুত এবং তাঁহার কাতিপর প্রধান সর্দারকে নির্যাসিত করিবার প্রস্তাব করিয়াছিলেন।—*Kaye, Sepoy War, Vol. III. p. 355.* কিন্তু জর্জ্ লরেন্স ইহা পড়িয়া কে সাহেবের নিকটে লিখিয়া পাঠাইয়াছিলেন যে, তিনি কখনও মহারাণাকে পদচ্যুত করিবার প্রস্তাব করেন নাই। মহারাণার সহিত তাঁহার সদ্ভাব ছিল। তিনি এবং তদীয় ভ্রাতা স্মার্ক হেনরি লরেন্স কেবল মিবারের কাতিপর সর্দারের ক্ষমতারোধের জন্ত ব্রিটিশ সৈন্য রাখিবার এবং আবশ্যক হইলে এক জন প্রধান সর্দারকে পদচ্যুত করিবার প্রস্তাব করিয়াছিলেন। মহারাণার প্রাধিকারক্ষার জন্তই এইরূপ করিতে হইয়াছিল।—*Kaye, Sepoy War, Vol. III. Appendix p. 683.*

গণও বিস্মিত হইয়াছিলেন। এই স্থানের এক জন সেনানায়কের অপূর্ব বিশ্ব-স্ততাসহকৃত অসামান্য বীরত্বের পরিচয় পাইয়া, মাড়বারের অনুরক্ততার নির্দেশ-পূর্বক তেজস্বী শের শাহ এক সময়ে কহিয়াছিলেন—“আমি একমুষ্টি ভূটার জন্ত এখনি ভারতসাম্রাজ্য হারাইতেছিলাম।” কিন্তু উপস্থিত সময়ে অন্তর্বিদ্রোহে যোধপুররাজ হীনবল হইয়া পড়িয়াছিলেন। কতিপয় প্রধান ঠাকুর তাঁহার বিরুদ্ধাচরণ করিতেছিলেন। তথাপি তিনি গবর্নমেন্টকে অশ্বারোহী ও পদাতিতে দুই হাজার সৈন্য এবং ৬টি কামান দিয়া বিশ্বস্ততা প্রদর্শন করেন। এইরূপে জুন মাসের মধ্যে রাজপুতনার সমুদয় কার্য্য সুশৃঙ্খল হয়। কণেল জর্জ লরেন্স এ সম্বন্ধে লিখিয়া গিয়াছেন,—“এইরূপে জুন মাসে—বিপ্লবের সংবাদপ্রাপ্তির ১৫ দিনের মধ্যে ভরতপুর, জয়পুর, যোধপুর এবং উলবারের সৈন্য আমাদের সহিত বুদ্ধক্ষেত্রে একত্র কার্য্য করিবার জন্ত প্রস্তুত থাকে।” \* রাজপুতনায় আপাততঃ কোন গোলযোগ না ঘটিলেও, এবং রাজপুত ভূপতিগণ দিল্লীর বৃদ্ধ মোগলের সহিত কোনরূপ সংস্রব না রাখিলেও, কল্বিন্ সাহেব একবারে নিশ্চিত হইলেন নাই। সিপাহীযুদ্ধের ইতিহাসলেখক কে সাহেব এই প্রসঙ্গে নির্দেশ করিয়াছেন যে, যাহারা এক সময়ে মোগলের সহিত বৈবাহিক সম্বন্ধ স্থাপন করিয়াছিলেন, মোগলের কার্য্যসাধনে উৎসাহ দেখাইয়াছিলেন, মোগলের নাম মুদ্রায় অঙ্কিত করিয়া দিয়াছিলেন, তাঁহাদের বিষয় উত্তরপশ্চিমপ্রদেশের সূক্ষ্মদর্শী লেফ্‌টেনেন্ট-গবর্নরের স্মৃতিপটে জাগরুক ছিল। উপস্থিত সময়ে এই ইতিহাসপ্রসিদ্ধ ঘটনা হইতে কিরূপ ফলের উৎপত্তি হইয়াছিল, তাহা পরে বিবৃত হইতেছে।

\* এস্থলে জর্জ লরেন্স্ মিবারের মহারাণা এবং তাঁহার দরবারের এজেন্ট কাপ্তেন সাওয়ার্সের নাম উল্লেখ করেন নাই বলিয়া, কে সাহেব প্রতিবাদ করিয়াছেন। জর্জ লরেন্স্ তাঁহার উত্তরে নির্দেশ করিয়াছেন যে, তিনি উক্তস্থলে মিবারের মহারাণার নাম নির্দেশ করেন নাই বটে, কিন্তু স্বকীয় বিজ্ঞাপনীর স্থানান্তরে মহারাণার বিশ্বস্ততা এবং নীমচের ইউরোপীয় পলাতকদিগের প্রতি তাঁহার সৌজন্যপ্রকাশের কথা উল্লেখ করিয়াছেন, এবং এই জন্ত যে, ব্রিটিশ-গবর্নমেন্ট তাঁহাকে ধন্যবাদ দিয়াছেন, তাহাও নির্দেশ করিয়াছেন। কাপ্তেন সাওয়ার্সের সম্বন্ধে তিনি লিখিয়াছেন যে, কাপ্তেন তাঁহার আদেশপালন করেন নাই বলিয়া, গবর্নর-জেনারেল কর্তৃক ভৎসিত হইয়াছিলেন।—*Kaye, Sepoy War, Vol. III. Appendix pp. 683, 684.* যাহা হউক, জর্জ লরেন্স্ অশ্রান্ত রাজপুত ভূপতিদিগের নামের সহিত মিবারের মহারাণার নাম নির্দেশ করিলে বোধ হয়, সমীচীন হইত।

## চতুর্থ অধ্যায় ।

### আগরা ।

আগরা—নীমচের সিপাহী—কলবিন্ সাহেবের অসুস্থতা—শাসনকার্যের বন্দোবস্ত—  
কোটার সিপাহী—আগরার নিকটে যুদ্ধ—ইংরেজসৈন্যের প্রত্যাভর্তন—সৈনিকনিবাসের  
ধ্বংস—আগরার দুর্গবাসীদিগের অবস্থা—কলবিন্ সাহেবের দেহত্যাগ ।

আগরার সিপাহীগণ নিরস্ত্রীকৃত হইয়াছিল । তাহারা টাকার থলিয়া কোমরে  
বাঁধিয়া, নিত্যব্যবহার্য্য দ্রব্যাদি কাঁধে লইয়া, প্রশান্তভাবে গৃহাভিমুখে প্রস্থান  
করিয়াছিল । কেহ কেহ বাড়ীতে না গিয়া, দিল্লীর অভিমুখে অগ্রসর হইয়া-  
ছিল, এবং তত্রত্য সিপাহীদিগের সহিত মিশিয়া, বাদশাহের প্রাধাণ্যরক্ষার  
জন্তু অভিনব অস্ত্রশস্ত্রে সজ্জিত হইয়াছিল । এই সকল নিরস্ত্রীকৃত সিপাহীর  
মধ্যে কেহই আগরায় প্রত্যাভৃত হয় নাই । কলবিন্ সাহেব ইহাদের বিষয়  
ভাবিয়া উদ্বিগ্ন হইয়েন নাই । কিন্তু ইহাতেও উত্তরপশ্চিমপ্রদেশের রাজধানী  
শান্তিপূর্ণ হয় নাই, বিপদের চিহ্ন সর্বাংশে দূরীভূত হইয়া যায় নাই, ইউরোপীয়-  
দিগেরও অদৃষ্ট সুপ্রসন্ন হইয়া উঠে নাই । আগরা যমুনার দক্ষিণ তীরে অব-  
স্থিত । জুন মাসের মধ্যে এই তীরস্থিত প্রায় সমগ্র জনপদ ব্রিটিশ-গবর্ণমেন্টের  
প্রাধাণ্য হইতে স্থলিত হইয়াছিল । বামতীরস্থিত জনপদের অবস্থাও তাদৃশ  
আশাজনক ছিল না । জুন মাসের শেষে অনেকে আগরা পরিত্যাগ করিয়া  
গিয়াছিল । ঝটিকার প্রাক্কালে প্রকৃতি যেমন প্রশান্তভাবে থাকে, আগরাও  
সেইরূপ প্রশান্ত ও নিস্তর্রভাবে ছিল । কিন্তু এই প্রশান্তভাবের স্থলে তুমুল  
ঝটিকার সূত্রপাত হইল । তৎপ্রযুক্ত শান্তি ও শৃঙ্খলা বিপর্য্যস্ত হইয়া গেল ।

পূর্বে উক্ত হইয়াছে যে, নীমচের সিপাহীগণ সাতিশয় উত্তেজিত হইয়া,  
গবর্ণমেন্টের বিরুদ্ধ পক্ষ অবলম্বন করিয়াছিল । জুলাই মাসে এই উত্তেজিত  
সৈনিকদল আগরার অভিমুখে অগ্রসর হয় । এদিকে গোবালিয়র হইতে পলা-  
তক ইউরোপীয়গণ আসিয়া আগরার দুর্গে আশ্রয়গ্রহণ করে । যাহার উপর

যাবতীয় কর্মের কর্তৃত্ব সমর্পিত হইয়াছিল, যিনি এই সুবিস্তৃত জনপদে শান্তিস্থাপন, বিপন্ন ইউরোপীয়দিগের বিপত্তিনিবারণ এবং উচ্ছৃঙ্খল লোকের নিকাশনে ব্রতী হইয়াছিলেন, এই সঙ্কটকালে তাঁহার স্বাস্থ্যভঙ্গ হইয়াছিল। কলবিন্ সাহেব সুগঠিত ও সবলদেহ ছিলেন বটে, কিন্তু উশ্চিন্তা, অনিদ্রা ও অতিশ্রমে তাঁহার শক্তির অপচয় ঘটিল। ইহার উপর পরকীয় বিরুদ্ধভাব ব্যতীত আয়কলহেও তাঁহার মানসিক শান্তি তিরোহিত হইল। অধীন লোকের উত্তেজনা ও বিরুদ্ধাচরণে তিনি যখন বিব্রত হইয়া পড়িয়াছিলেন, তখন তাঁহার সহযোগীগণ তাঁহার প্রতিকূলতাসাধনে উদ্বৃত হইলেন। কেহ কেহ তাঁহার সহিত একরূপ ব্যবহার করিতে লাগিলেন যে, উহাতে সহজেই লোকের মনে ঘণার উদ্রেক হইতে পারে। তাঁহারা আপনাদের অধ্যক্ষ ও পরিচালকের উপর নানা দোষের আরোপ করিয়া, পত্র লিখিতে লাগিলেন। এই সকল পত্রে তাঁহাদের অপরিসীম বিদ্বেষভাব পরিস্ফুট হইতে লাগিল। কেহ কেহ অকথা ভাষায় তাঁহার নিন্দা করিয়া, গবর্নর-জেনেরলের নিকটেও পত্র লিখিতে লাগিলেন। এমন কি ঐ সকল পত্রে তাঁহাকে পদচ্যুত করিবার প্রার্থনাও হইতে লাগিল। কেহ কেহ পার্লেমেন্ট মহাসভায় এ বিষয়ের উত্থাপনের জন্ত পরামর্শ করিতে লাগিলেন। লর্ড কানিং অপবাদকারীদিগের এইরূপ অপবাদটনাকে “আগরার বিকট পেচকরব” বলিয়া নির্দেশ করেন। এইরূপ কতকগুলি পত্র দিল্লীতে প্রেরিত হয়। তত্রত্য ইউরোপীয়গণ এই সকল পত্র পাইয়া বলিতেন যে, আগরাওয়ালারা পুনর্বার চীৎকার আরম্ভ করিয়াছে। অতিশ্রম, অনিদ্রা প্রভৃতিতে কলবিন্ সাহেবের যেরূপ স্বাস্থ্যভঙ্গ হইল, এই বিকটরবে সেইরূপ তাঁহার মানসিক শান্তিও তিরোহিত হইয়া গেল। কিন্তু তিনি ইহাতেও ধীর-তায় বিসর্জন দিলেন না। এইরূপ শোচনীয় অবস্থাতেও তিনি ধীরভাবে আপনার কর্তব্য সম্পাদন করিতে লাগিলেন।

জুন মাসের তৃতীয় সপ্তাহের শেষে জনরব উঠিল যে, নীমচ এবং নসীরাবাদের উত্তেজিত সিপাহীগণ চারি দিকের উচ্ছৃঙ্খল লোকের সম্বারে বহুলসংখ্যক ও শক্তিসম্পন্ন হইয়া আগরার অভিমুখে আসিতেছে। এই জনরবের সত্যতা সম্বন্ধে সন্দেহ রহিল না। আগন্তুক সৈনিকদলের সংখ্যা তখন দুই হাজার ছয় শত এবং তাহাদের কামানের সংখ্যা ১২ বলিয়া নির্দ্ধারিত হইয়াছিল।

জনরব যখন সত্য হইল, তখন কলবিন্ সাহেব স্থির থাকিতে পারিলেন না । তিনি জুন মাসের শেষে নিরস্ত্র ও যুদ্ধানভিজ্ঞ খৃষ্টানদিগকে ছুর্গে যাইতে আদেশ দিলেন । কেবল নির্দিষ্ট দ্রব্য বাতীত অন্যান্য দ্রব্যাদি সঙ্গে লইয়া যাওয়া নিষিদ্ধ হইল । এই আদেশে শেষে যাবতীয় পুস্তক, তৈজসপত্র, নথী কাগজপত্রাদি বিনষ্ট হইয়া গিয়াছিল । \* ২রা জুলাই নীমচের সিপাহীগণ আগরার ২৩ মাইল দূরবর্তী ফতেপুরসিক্রীতে উপস্থিত হইল । কর্তৃপক্ষ এখন আগরারক্ষার সুবন্দোবস্ত করিতে উত্তত হইলেন । কোটারাজ্যে ব্রিটিশ গবর্নমেন্টের যে সৈনিকদল ছিল, তাহা আগরায় উপস্থিত হইলেন । এতদ্ব্যতীত নবাব সৈয়ফ-উল্লা খাঁ নামক এক জন উচ্চপদস্থ রাজপুরুষের অধীনে কেরোলীর ছয় শত পদাতি, ভরতপুরের তিন শত অশ্বারোহী এবং দুইটি কামান ছিল । এক জন ইংরেজ সৈনিকপুরুষ লেফ্টেনেন্ট্ গবর্নরের এজেন্ট স্বরূপ এই সৈন্তের সহিত অবস্থিতি করিতেছিলেন ।

যখন জানা গেল যে, বিপক্ষগণ ফতেপুরসিক্রীতে উপস্থিত হইয়াছে, তখন উক্ত দুইদল সৈন্তকে ভিন্ন ভিন্ন স্থানে রাখা হইল । কোটার সৈন্ত আগরার সৈনিকনিবাসরক্ষার জন্য সন্নিবেশিত হইল । সৈয়ফ-উল্লা খাঁর সৈন্ত আগরার ৪ মাইল দূরে ফতেপুরসিক্রীর পথের পার্শ্বে শাহগঞ্জ নামক পল্লীর নিকটে রহিল । এইরূপে ২রা জুলাই আগন্তুক বিপক্ষদিগকে বাধা দিবার জন্য বিভিন্ন স্থানে ব্যবস্থা হইল ।

পর দিন কলবিন্ সাহেব সাতিশয় অশুস্থ হইয়া পড়িলেন । তাঁহার দেহে পক্ষাঘাতের লক্ষণ প্রকাশ পাইল । তিনি অগত্যা একটি সমিতির উপর চব্বিশ ঘণ্টার জন্য আবশ্যক কার্যনির্বাহের ভার সমর্পণ করিলেন । রেবিনিউ বোর্ডের প্রাচীন কর্মচারী রিড্ সাহেব, ব্রিগেডিয়ার পলহোয়েল এবং লেফ্টেনেন্ট-গবর্নরের সেক্রেটারী কাপ্তেন মাকলিয়ড্ এই সমিতির সদস্য হইলেন । তৎপর-দিন ( ৪ঠা জুলাই ) ব্রিগেডিয়ারের গৃহে এই সমিতির অধিবেশন হইল । লেফ্টেনেন্ট-গবর্নর তাঁহার চিকিৎসককে নিকটে রাখিয়া, পার্শ্ববর্তী কুঠরীতে অবস্থিতি করিতে লাগিলেন । সমিতি নগররক্ষা ও আগন্তুক বিপক্ষদিগের

\* *Raikes, Notes on the Revolt &c. p. 54.*

গতিরোধের উপায় নির্ধারণে প্রবৃত্ত হইলেন । কারাগারে বহুসংখ্যক কয়েদী ছিল, ইহারা বন্দি হইতে বিমুক্ত হইলে, বিপক্ষদিগের দল পরিপুষ্ট ও শক্তি বর্দ্ধিত হইবার সম্ভাবনা ছিল । এজন্য সমিতি, কয়েদীদিগের মধ্যে যাহারা দৃঢ়কার ও বলিষ্ঠ, তাহাদিগকে নদীর অপর পারে লইয়া গিয়া, ছাড়িয়া দিবার প্রস্তাব করিলেন । দুর্গের নিকটে যমুনার উপর যে সেতু ছিল, সমিতি উহা ভাঙ্গিতে ইচ্ছা করিলেন । খৃষ্টধর্ম্মাবলম্বীগণকে দুর্গে আনিবার এবং নবাব সৈয়ফ্-উল্লা খাঁর দুইটি কামান অস্ত্রাগারে স্থানান্তরিত করিবার প্রস্তাব হইল । এতদ্ব্যতীত কোটার সৈনিকদলের অধ্যক্ষকে অগ্রসর হইয়া আগন্তুক বিপক্ষদিগকে আক্রমণ করিতে আদেশ দেওয়ার বিষয় ধার্য্য হইল ।

প্রথম তিনটি প্রস্তাব বিনা বাধায় ও বিনাবিপত্তিতে কার্য্যে পরিণত হইল । শেষ দুইটি প্রস্তাব অনুসারে কার্য্য করিবার সময়ে ঘোরতর বিঘ্নবিপত্তি ঘটিল । কোটার সৈনিকদলের বিশ্বস্ততা সম্বন্ধে সন্দেহ হইয়াছিল । কেহ কেহ ইহাদিগকে নিরস্ত করিবার প্রস্তাব করিয়াছিলেন । কিন্তু ব্রিগেডিয়ার উক্তরূপ কঠোর কার্য্যসাধনে ইচ্ছা করেন নাই, শেষে যখন বুঝা গেল যে, ইহারা নিকটে থাকিলে সবিশেষ অসুবিধা ঘটিবার সম্ভাবনা আছে, তখন বিপক্ষদিগের গতিরোধের জন্য ইহাদিগকে ৪ঠা জুলাই ফতেপুরসিক্রীর পথে পাঠাইয়া দেওয়ার আদেশ হইল । কিন্তু ইহারা বিপক্ষদিগের বিরুদ্ধে না গিয়া ব্রিটিশ গবর্ণমেন্টের বিরুদ্ধেই দণ্ডায়মান হইল । এক জন ইউরোপীয় সৈনিকপ্রধান ইহাদের গুলিতে ভূপতিত হইলেন । ইংরেজ আফিসারদিগের উপরেও ইহাদের গুলিবৃষ্টি হইতে লাগিল । ইহারা নীমচের সৈনিকদলের সহিত সম্মিলিত হইবার জন্য যাত্রা করিল । কিন্তু এই সময়ে ইংরেজ সেনানায়কেরা নিশ্চেষ্ট থাকেন নাই । এক জন সেনানায়ক কতিপয় স্বেচ্ছাপ্রবৃত্ত অশ্বারোহী সৈনিক লইয়া ইহাদিগকে আক্রমণ করেন । এই আক্রমণে ইহাদের কতকগুলি লোক নিহত এবং যুদ্ধের দ্রব্যাদি বোঝাই কতকগুলি উট অবরুদ্ধ হয় । এই দিন সন্ধ্যাকালে নবাব সৈয়ফ্-উল্লা খাঁ প্রকাশ করেন যে, তাহার অধীন সৈনিকগণ বিশ্বস্ত নয়, তিনি ইহাদের উপর নির্ভর করিতে পারেন না । ভরতপুরের অশ্বারোহিগণ তাহার পক্ষ পরিত্যাগ করিয়াছে, তাহার দলের কামান অপসারিত হওয়াতে কেরোলীর সৈনিকেরা নিরুৎসাহ হইয়াছে । ইহাতে অবিলম্বে সৈয়ফ্-উল্লা খাঁর



সৈনিকগণ শাহগঞ্জ পরিত্যাগপূর্বক কেরোলীতে যাইতে আদিষ্ট হইল। ঐ রাত্রিতেই সৈয়ফ উল্লা খাঁ এই আদেশ অনুসারে সৈনিকদল লইয়া কেরোলীতে যাত্রা করিলেন।

কোটার সৈনিকদল গবর্ণমেন্টের বিরুদ্ধ পক্ষ অবলম্বন করিলে, পীড়িত লেফটেনেন্ট-গবর্ণরকে অপেক্ষাকৃত নিরাপদস্থল—হুর্গে লইয়া যাওয়া আবশ্যিক হয়। ব্রিগেডিয়ারের গৃহ তাদৃশ নিরাপদ ছিল না। বিপক্ষগণ কর্তৃক উহা আক্রান্ত হইবার আশঙ্কা ছিল। এ জন্ত কতিপয় স্বেচ্ছাপ্রবৃত্ত সৈনিকপুরুষ গৃহরক্ষার জন্ত উহার পুরোভাগে সন্নিবেশিত ছিল। লেফটেনেন্ট গবর্ণর অনিচ্চার সহিত হুর্গে যাইবার জন্ত প্রস্তুত হইলেন। রক্ষিগণে পরিবেষ্টিত হইয়া, তিনি যথাস্থানে উপনীত হইলেন। কিন্তু পরে যখন শুনিলেন যে, কোটার সৈনিকেরা পরস্পরবিচ্ছিন্ন হইয়া চারি দিকে ধাবিত হইয়াছে, তখন তিনি আবার ব্রিগেডিয়ারের গৃহে যাইতে ইচ্ছা করিলেন। কিন্তু ব্রিগেডিয়ার ইহাতে সম্মত হইলেন না। তৎপরদিন কলবিন্ সাহেবের অবস্থা এরূপ মন্দ হইল যে, তাঁহার বন্ধু ও সহযোগীগণ উহাতে নিরতিশয় চিন্তিত হইলেন। যাহা হউক, তিনি এ অবস্থাতেও স্বকীয় কর্তব্যে শৈথিল্য প্রকাশ করিলেন না। তাঁহার আগ্রহ দেখিয়া চিকিৎসকগণ নিতান্ত অনিচ্চার সহিত তাঁহাকে কক্ষ করিতে কহিলেন।

এই দিন ( ৫ই জুলাই ) প্রাতঃকালে সংবাদ আসিল যে, বিপক্ষগণ আগরার অভিমুখে অগ্রসর হইতেছে। এক জন ইংরেজ অধিনায়ক ব্রিগেডিয়ারকে, আগন্তুক বিপক্ষদিগকে আক্রমণ করিবার জন্ত অগ্রসর হইতে অনুরোধ করিয়াছিলেন, কিন্তু ব্রিগেডিয়ার প্রথমতঃ এই প্রস্তাবে সম্মত হইলেন নাই। শেষে যখন বিপক্ষদিগের উপস্থিতিসংবাদ তাহার নিকটে পৌঁছিল, তখন তিনি ভাবিলেন যে, এই সময়ে দুইটি উপায় অবলম্বনীয় হইতে পারে। এক উপায় হুর্গে থাকিয়া আত্মরক্ষা করা, অন্য উপায় অগ্রসর হইয়া বিপক্ষদিগকে পরাজিত করা। সাহসী সেনানায়কদিগের পক্ষে শেষোক্ত উপায়ই প্রশস্ততর বলিয়া পরিগণিত হইয়া থাকে। সাহসী ব্রিগেডিয়ারের নিকটেও এই শেষোক্ত উপায়ই প্রশস্ততর বোধ হইল। সুতরাং তিনি অবিলম্বে বিপক্ষদিগের বিরুদ্ধে যাত্রা করিবার আদেশ প্রচার করিলেন।

ত্রিগেডিয়ারের আদেশে বেলা এক টার সময়ে ইংরেজসৈনিকেরা কাওয়াজের বিস্তৃত ক্ষেত্র পরিত্যাগ করিল। বিপক্ষদলে দুই হাজারের অধিক সৈন্য ছিল। ইংরেজ অধিনায়কগণ যাহাদিগকে ইউরোপীয় প্রণালী অনুসারে যুদ্ধবিদ্যায় সুশিক্ষিত করিয়াছিলেন, তাহাদের অনেকে এই দলভুক্ত ছিল। কোটার সৈনিকদলও ইহাদের সহিত সম্মিলিত হইয়াছিল। ইংরেজের পক্ষে ৮০০ শত সৈনিক পুরুষ সম্বিষ্ট ছিল। বৃদ্ধ ত্রিগেডিয়ার পল্‌হোয়েন্‌ ইহাদের অধ্যক্ষতা গ্রহণ করিয়াছিলেন।

ইংরেজ সৈনিকদল শাহগঞ্জ নামক পল্লীতে উপস্থিত হইলে, ত্রিগেডিয়ার তথায় কিয়ৎক্ষণ অবস্থিতির জন্ত আদেশ দিয়া, বিপক্ষদিগের গতিবিধিপর্যবেক্ষণ করিতে লাগিলেন। প্রায় ১ মাইল দূরবর্তী শানিয়া নামক পল্লীর নিকটে বিপক্ষদল তাহার দৃষ্টিপথবর্তী হইল। বিপক্ষদিগের পদাতিকগণ পল্লীর পশ্চাত্তাগে সন্নিবেশিত ছিল। গোলন্দাজ সৈন্য আপনাদের কামান লইয়া পল্লীর উভয় পার্শ্বে অবস্থিতি করিতেছিল। ইহাদের পুরোভাগে উন্নত ভূখণ্ড ও ঘনসন্নিবিষ্ট বৃক্ষশ্রেণী ছিল। ইংরেজসৈন্য সম্মুখীন হইলে, সিপাহীদিগের বামপার্শ্বস্থ কামান হইতে গোলাবৃষ্টির আরম্ভ হইল। ইংরেজসৈন্যাধ্যক্ষ তৎক্ষণাৎ পদাতিকদিগকে শয়ানভাবে থাকিতে আদেশ দিয়া, কামানগুলি বিপক্ষদিগের কামানের গুণ্য দুই ভাগে স্থাপন করিলেন এবং বিপক্ষদিগের গুণ্য আপনাদের কামান হইতে গোলাবৃষ্টি করিতে কহিলেন। কিন্তু বিপক্ষদলের গোলন্দাজগণ প্রাকৃতিক পদার্থে সুরক্ষিত ছিল। ইংরেজপক্ষের কামানের গোলায় তাহাদের তাদৃশ ক্ষতি হইল না। সিপাহীদলের গোলন্দাজেরা বৃক্ষশ্রেণী ও উন্নত ভূখণ্ডের অন্তরালে থাকিয়া, গোলাবর্ষণপূর্বক প্রতিপক্ষের বিস্তর ক্ষতি করিতে লাগিল। তাহাদের দুইখানি কামানের গাড়ী পুড়িয়া গেল। বাম ভাগেরও একটি কামান অকর্মণ্য হইল। অবশেষে আপনাদের গোলা বারুদ ইত্যাদি নিঃশেষপ্রায় দেখিয়া, ইংরেজ অধিনায়কগণ অগ্রসর হইয়া বিপক্ষদিগকে আক্রমণ করিতে চাহিলেন। যে সকল পদাতি শয়ানভাবে ছিল, তাহারাও উঠিয়া বিপক্ষদিগকে আক্রমণ করিবার জন্ত উৎসুক্য প্রকাশ করিতে লাগিল। কিন্তু সৈন্যাধ্যক্ষ আগরার এই অল্পমাত্র রক্ষকদিগের ক্ষয় হইবার আশঙ্কা করিয়া, এ বিষয়ে সন্মত হইলেন না। এ দিকে ইংরেজ অধিনায়কগণ প্রকৃত বীর-

পুরুষের ঞায় বিপক্ষের সমক্ষে পরাক্রম প্রকাশ করিতে লাগিলেন । তাঁহাদের যুদ্ধোপকরণ প্রায় নিঃশেষিত হইয়াছিল, তাঁহাদের সৈন্য বিপক্ষের সংখ্যাধিক্যে ক্রমে অল্প হইয়া পড়িতেছিল, তাঁহাদের জয়াশা, প্রবলপরাক্রান্ত, যথোচিত-যুদ্ধোপকরণসম্পন্ন ও বলবত্বল শত্রুর রণকৌশলে ক্রমে অন্তর্হিতপ্রায় হইতেছিল । তথাপি তাঁহারা সাহসে বিসর্জন দিলেন না, আপনাদের শৃঙ্খলারক্ষায় ঔদাস্ত প্রকাশ করিলেন না, বা বীরত্বের পরিচয় দিতে বিমুখ হইলেন না । গোলন্দাজ সেনানায়ক কাপ্তেন ডয়লি অস্বাক্রুট হইয়া অধীন সৈনিকদিগকে পরিচালিত করিতেছিলেন । তাঁহার অধিষ্ঠিত অশ্ব বিপক্ষের গুলির আঘাতে তাঁহাকে লইয়া ভূপতিত হইল । বাহন নিহত হওয়াতে কাপ্তেন যুদ্ধস্থলে দাঁড়াইয়া সময়ো-পযোগী আদেশ দিতে লাগিলেন । কিন্তু তাঁহার এইরূপ অবস্থা দীর্ঘকাল থাকিল না । বিপক্ষের নিক্ষিপ্ত গুলিতে তিনি পার্শ্বদেশে সাংঘাতিকরূপে আহত হইলেন । কাপ্তেন ডয়লি কামানের গাড়িতে স্থাপিত হইলেন । সেই গাড়িতে শয়ান থাকিয়া, কামানপরিচালকদলের শৃঙ্খলারক্ষার জ্ঞে পূর্বের ঞায় ধীরতাসহকারে, পূর্বের ঞায় প্রশান্তভাবে আদেশ দিতে লাগিলেন । ক্রমে তাঁহার যাতনা এরূপ প্রবল হইয়া উঠিল যে, তিনি দীর্ঘকাল ঐ অবস্থায় থাকিতে পারিলেন না । গুরুতর আঘাতে তাহার তেজস্বিতার অপচয় ঘটিল । মৃত্যুকাল আসন্ন জানিয়া তিনি কহিলেন—“আমার কর্ম সম্পন্ন হইয়াছে, আমার সমাধির উপর এক খণ্ড প্রস্তর স্থাপন পূর্বক তাহাতে ক্ষোদিত করিবে যে, আমি আমার কামানের পার্শ্বে থাকিয়াই দেহত্যাগ করিয়াছি” । সাহসী কাপ্তেন যুদ্ধস্থল হইতে দুর্গে নীত হইলেন এবং তাহার পরদিন পুনর্বার ঐ কথাই বলিতে বলিতে দেহত্যাগ করিলেন । আর এক জন যুদ্ধকুশল অধিনায়কও আপনার অধীন সৈন্যের পরিচালনাকালে গুরুতর আঘাত প্রাপ্ত হইলেন । ক্রমে রণক্ষেত্রে ইংরেজপক্ষের বহু অশ্ব নিহত এবং বহু সৈন্য দেহত্যাগ করিল । যে দুই ভাগে কামানগুলি সজ্জিত হইয়াছিল, তাহার এক ভাগের কামান অকর্মণ্য হইয়া গেল । এই সকল বিপত্তি দেখিয়া, ব্রিগেডিয়ার পদাতিদিগকে শত্রুদল আক্রমণ করিতে আদেশ দিলেন, কিন্তু এ সময়ে কেবল পদাতির সাহায্যে আত্মপক্ষ রক্ষা করা অসম্ভব হইয়া উঠিল । যেহেতু কামানগুলি অকর্মণ্য হওয়াতে তৎসমুদয় দ্বারা পদাতিদিগের পক্ষ

প্রবল করার সুবিধা হইল না। এ দিকে অশ্বারোহী সৈনিকদল তাদৃশ পটু ছিল না। বিভিন্ন শ্রেণীর বিভিন্ন ব্যবসায়ী লোকে এই দল গঠিত হইয়াছিল। উহাতে সিবিলিয়ান কর্মচারী ছিলেন। বেতনভোগী কেরণী উহার পরিপুষ্টির জন্ত নিয়োজিত হইয়াছিলেন। ইউরোপীয় এবং এতদেশীয় সৈনিকদলের খৃষ্টধর্মাবলম্বী বাণকর ও গায়কেরা উহাতে স্থান পরিগ্রহ করিয়াছিল। অধিকতর আশ্চর্যের বিষয় এই যে, এই সময় ফরাসী দেশ হইতে কতকগুলি দড়িবাজীকর আপনাদের ক্রীড়াকৌশল দেখাইতে আসিয়াছিল। তাহাদের কেহ কেহ উক্ত দলে সৈনিকরূপে গ্রহণ করিয়াছিল। এই দড়িবাজীকরদিগের সাত জন যুদ্ধক্ষেত্রে দেহত্যাগ করে। ঈদৃশ বিচিত্র অশ্বারোহিদলকর্তৃক আশানুরূপ কর্ম সম্পন্ন হইল না। বিপক্ষ অশ্বারোহীদিগের আক্রমণে এই অল্প সংখ্যক অশ্বারোহীদিগের পরাক্রম পর্যুদস্ত হইয়া গেল। বিপক্ষগণ শাহগঞ্জ পল্লীর পার্শ্ববর্তী স্থানে সমাগত হইয়া, তাহাদের নিকটে রণকৌশলে অভ্যস্ত ও অভিনব অস্ত্রাদিতে সুসজ্জিত হইয়াছিল, তাহাদেরই ক্ষমতানাশে উত্তমের একশেষ দেখাইতে লাগিল। বর্ষীয়ান ইংরেজ সেনাপতির সমক্ষে বিপক্ষের বলহ্রাসের জন্ত আর কোন উপায় রহিল না। তাঁহার গোলন্দাজদলের গোলাবারুদ প্রভৃতি নিঃশেষিত হইয়াছিল, তাঁহার অশ্বারোহীদিগের বলহ্রাস হইয়া গিয়াছিল, তাঁহার কামানগুলি অকর্মণ্য হইয়া পড়িয়াছিল, শেষে কেবল পদাতি দ্বারা আত্মপক্ষসমর্থনের সুবিধা ঘটিল না। বৃদ্ধ সেনাপতি হতাশাস হইয়া, নিতান্ত অনিচ্ছা ও ক্ষোভের সহিত পশ্চাৎ হটিয়া যাইবার আদেশ দিলেন।

সেনাপতির আদেশে হতাবশিষ্ট সৈন্য দুর্গে ফিরিয়া যাইতে উদ্যত হইল। প্রত্যাবর্তনকালে তাহাদের মধ্যে কোন রূপ শৃঙ্খলাহানি ঘটিল না। এক জন ইংরেজ ঐতিহাসিক এ সম্বন্ধে এই ভাবে লিখিয়াছেন—“যদিও সৈনিকেরা শৃঙ্খলার সহিত প্রত্যাবর্তিত হইয়াছিল, তথাপি এইরূপ প্রত্যাবর্তন যেরূপ ক্ষতিজনক, সেইরূপ অবমাননাকর। অশ্বারোহী সৈনিকের অভাবই এইরূপ ছরদৃষ্টের কারণ। আমরা আপনাদের ভ্রান্তির জন্তই উৎসন্ন হইয়াছি। গোলাগুলি বারুদ প্রভৃতি যাহা বান্ধিয়া রাখা হইয়াছিল, তাহা আমাদের সৈনিকদলের সহিত বা সৈনিকদলের গমনের পরে প্রেরিত হয় নাই এবং যাবৎ আমাদের কামানগুলি অকর্মণ্য হইয়া না পড়িয়াছে, তাবৎ আমাদের পদাতিদিগকেও যুদ্ধ করিতে

দেওয়া হয় নাই । ইহা নিরতিশয় বাতুলতার কাব্য । এই বাতুলতার জগুই ডয়েলি আপনার জীবন সমর্পণ করিয়াছেন এবং পল্‌হোয়েল্ আপনার অবলম্বিতব্রতোচিত সম্মান হারাইয়াছেন ।”\*

যাহারা দুর্গে অবস্থিতি করিতেছিল, তাহারা ঔৎসুক্যের সহিত যুদ্ধক্ষেত্রের দিকে দৃষ্টিযোজনা করিয়া রহিয়াছিল । কামানের ধ্বনিতে প্রতিমুহূর্তে তাহাদের হৃদয়ে যুগপৎ আশঙ্কা ও আশা, হর্ষ ও বিষাদের আবির্ভাব হইতেছিল । দুর্গস্থিত কুলমহিলাগণ অধিকতর উদ্বিগ্ন হইয়া উঠিয়াছিলেন । এই যুদ্ধের উপর তাঁহাদের বিপদ ও সম্পদ নির্ভর করিতেছিল । যাহাদের স্বামিগণ যুদ্ধক্ষেত্রে গিয়াছিলেন, তাঁহাদের মুখমণ্ডলে অধিকতর অশান্তির অভিব্যক্তি হইতেছিল । তাঁহারা তিন ঘণ্টা কাল সমান ব্যাকুলতা ও সমান উদ্বেগের সহিত কামানের গভীর গর্জন শুনিলেন, তিন ঘণ্টা কাল, সমান ঔৎসুক্যের সহিত ধূমাচ্ছাদিত রণস্থলের দিকে দৃষ্টিপাত করিয়া রহিলেন । কেহ কেহ ঔৎসুক্যের আবেগে দুর্গের উচ্চ চূড়ায় গিয়া, উভয় সৈনিকদলের গতিবিধি পর্য্যবেক্ষণ করিতে লাগিলেন । কিন্তু শেষে তাহাদের আশা নিস্মূল হইল, ভয় শতশুণে বৃদ্ধি পাইল, গভীর নৈরাশ্রে দেহ যেন ভাঙ্গিয়া পড়িল । তাঁহারা দূর হইতে আপনাদের সাহসের অবলম্বন, আশার আশ্রয়স্থল সৈনিকদলকে বিপক্ষগণের তাড়নায় নিরতিশয় শোচনীয়ভাবে দুর্গে ফিরিয়া আসিতে দেখিলেন । যাহারা প্রত্যাবৃত্ত সৈনিকদলের অবস্থা দেখিয়াছেন, তাঁহারা নিঃসন্দেহ ঈশ্বরের নিকটে প্রার্থনা করিয়াছেন যে, একরূপ শোচনীয়, একরূপ ভীতিপ্রদ, একরূপ মনঃকষ্টের উদ্দীপক দৃশ্য যেন আর কখনও তাঁহাদের সমক্ষে উপস্থিত না হয় । সিপাহীগণ তীরবেগে ইংরেজ সৈনিকদিগের অনুসরণ করিয়াছিল । এই সকল সৈনিকের মুখ ধূলিতে সমাবৃত ও ধূমে বিবর্ণ হইয়াছিল । যাহারা আহত হইয়াছিল, তাহাদের দেহনিঃসৃত রুধিরস্রোতে ধূলিপটল পরিলিপ্ত হইয়া গিয়াছিল । সকলেই পিপাসায় কাতর, সকলেই পানীয়ের জগু ব্যাকুল, সকলেই যাতনায় অবসন্ন । ইহাদের হ্রবস্থার একশেষ হইয়াছিল । ইহাদের কামান সকল যুদ্ধক্ষেত্রে হইতে আনিবার সুবিধা হয় নাই ইহাদের সহযোগীদিগের গতাসু দেহও সঙ্গে আনিবার সুযোগ

\* *Kaye, Sepoy War, Vol. III. p. 391.*

ঘটে নাই। দুইটি হস্তী আগরা হইতে প্রেরিত হইয়াছিল, কিন্তু উহা দ্বারা কেবল আহত সৈনিকগণই যুদ্ধক্ষেত্র হইতে আসিতে পারিয়াছিল। যুদ্ধান্ত, নিহত সৈনিকগণের দেহ, রণক্ষেত্রে অরক্ষিত অবস্থাতেই পড়িয়া রহিয়াছিল। প্রত্যাবৃত্ত সৈনিকেরা, দুর্গে প্রবেশ করিয়াই, শশব্যস্তে পানীয়ের আধারের দিকে ধাবিত হইল। মহিলাগণ আপনাদের যাবতীয় দুঃখ বিস্মৃত হইয়া, এই শোচনীয় দংশাগ্রস্ত জীবদিগের পরিচর্যায় প্রবৃত্ত হইলেন। তাঁহারা অবিলম্বে চা ও সুরা দিয়া, ইহাদের পিপাসাশান্তি করিলেন। ইহাদের যাতনা দূর করিতে ইহাদিগকে সুখে ও শান্তিতে রাখিতে, তাঁহাদের কোনরূপ ঔদাস্ত বা যত্নের ক্রটি লক্ষিত হইল না। স্নেহময়ী জননীর গায়, প্রীতিময়ী কণ্ঠার গায়, শান্তিময়ী ধাত্রীর গায়, ইহারা আহতদিগের শুশ্রুসা করিতে লাগিলেন। এইরূপ অসামান্য স্নিগ্ধভাব দেখিয়া, এক জন পরিদর্শক ক্রিমিয়ায়ুদে আহতদিগের শুশ্রুসাকারিণী জগদ্বিখ্যাত ফ্রোরেস নাটটিঙ্গেলের শ্রেণীতে ইহাদিগকে স্থান দিয়াছেন। সৈনিকেরা এইরূপ পরিচর্যায় পরিতোষিত হইল বটে, কিন্তু যাহাদের সহিত ইহারা এক গুরুর নিকটে শিক্ষিত হইত, এক স্থানে অবস্থিতি করিত, একবিধ ক্রীড়াকৌতুকে উৎফুল্লভাবে থাকিত, তাহারা যুদ্ধক্ষেত্রে দেহত্যাগ করাতে ইহাদের যাতনার অধি রহিল না। ইহারা নিহত বন্ধুদিগের নাম করিয়া, দুঃসহ শোকে হাহাকার করিতে লাগিল।\* এদিকে উদ্ধত লোকে একান্ত উত্তেজিত হইয়া উঠিল। ইহারা এই সময়ে আপনাদের উদ্ধাম প্রকৃতির পরিচয় দিতে বিমুখ হইল না। ফিরিঙ্গী ও পর্তুগীজেরা দুর্গে আশ্রয় গ্রহণ করে নাই। আপনাদের বাসস্থানের প্রতি মমতা প্রযুক্তই হউক, বা নগরবাসীদিগের প্রতি বিশ্বাসবশতঃই হউক, ইহারা আবাসগৃহে থাকিয়াই, আপনাদিগকে নিরাপদ মনে করিয়াছিল। কিন্তু হতভাগাদিগের বিঘ্নবিপত্তির শাস্তি হইল না। যে বাসগৃহে থাকিলে তাহারা নিরাপদ হইবে বলিয়া ভাবিয়াছিল এবং যে গৃহকে তাহারা সর্বপ্রকার সুখশান্তির আশ্রয়স্থল মনে করিয়াছিল, সেই গৃহেই তাহাদের অনেকের শোণিতস্রোত প্রবাহিত হইল। কুড়িটির অধিক অসহায় জীব উত্তেজিত লোকের অস্ত্রঘাতে দেহত্যাগ করিল। ইউরোপীয়গণ

\* Raikes, Notes on the Revolt &c. p. 62.

দুর্গে গমন করিয়াছিলেন, তাহাদের গৃহ সকল পরিত্যক্তভাবে ছিল। এখন ঐ সকল গৃহ সর্বভুক্ত অনলের একান্ত আয়ত্ত হইল। ইউরোপীয়গণ দুর্গ হইতে আপনাদের অধ্যাসিত গৃহ, আপনাদের ব্যবহৃত দ্রব্যসমূহ, আপনাদের আমোদজনক ও তৃপ্তিকর গৃহসজ্জাদি ভস্মীভূত হইতে দেখিলেন। জগতে অতুলনীয় কীর্তি—সুনীল যমুনাতীরবর্তী তাজের তুষারবর্ণ প্রদীপ্ত পাবকশিখার সহিত সম্মিলিত হওয়াতে অপূর্ব দৃশ্যের বিস্তার করিল। সরকারি কাগজপত্রের অধিকাংশ পুড়িয়া গেল। প্রায় ছয় মাইল বিস্তীর্ণ ভূখণ্ডের সমুদয় গৃহ করাল-ছত্যাশনে পরিব্যাপ্ত হইল। এই দৃশ্য যেরূপ ভয়ঙ্কর, সেইরূপ শোচনীয়, যেরূপ গভীর ভাবের উদ্দীপক, সেইরূপ বিশ্বয়জনক। ইউরোপীয়গণ এই বিচিত্র দৃশ্যে ঋণকালের জন্ত একান্ত বিশ্বয়রসে পরিপ্লুত ও উদ্বেলভাবসাগরে নিমজ্জিত হইলেন।

সাশিয়ার যুদ্ধের পর সিপাহীগণ ইংরেজ সৈন্যের পশ্চাদ্ধাবিত হইয়াছিল বটে, কিন্তু তাহারা আগরার দুর্গ আক্রমণ করে নাই। গোলা, গুলি, বারুদ প্রভৃতি অল্প হওয়াতে তাহাদিগকে শাহগঞ্জে ফিরিয়া যাইতে হয়। ৫ই জুলাই রাত্রিতে তাহারা দিল্লীতে প্রস্থান করে এবং ৮ই জুলাই তথায় উপনীত হয়। সাশিয়ার যুদ্ধে জয়শ্রীলাভ হওয়াতে দিল্লীস্থিত সিপাহীগণ মহোল্লাসে কামানধ্বনি করিয়া, তাহাদের প্রতি সম্মান প্রদর্শন করে। \*

কথিত আছে, যুদ্ধের পর দিন প্রাতঃকালে কোতয়াল মোরাদআলির অনুমতিক্রমে, সমগ্রনগরে দিল্লীর বৃদ্ধ মোগলভূপতির আধিপত্য ঘোষণা করা হয়। এই উদ্দেশ্যে সশস্ত্র লোকে দলবদ্ধ হইয়া, রাজপথে পরিভ্রমণ করে। দলের মধ্যে পুলিশের অধিকাংশ মুসলমান কর্মচারী ছিল। কোতয়াল স্বয়ং দলপতি হইয়াছিলেন। নিম্নশ্রেণীর উচ্ছৃঙ্খল লোকও এই দলে মিশিয়াছিল। † সিপাহীরা দিল্লীর অভিমুখে প্রস্থান করিলেও নগর শান্তিপূর্ণ হয় নাই; দুর্গস্থিত ইউরোপীয়গণও আপনাদিগকে নিরাপদ মনে করেন নাই। নগরে এবং উহার পার্শ্ববর্তী পল্লীসমূহে যে সকল বদমায়েস অবস্থিতি করিতেছিল,

\* *Malleon, Indian Mutiny, Vol. I. p. 276-277.*

† *Ibid, p. 277, note.*

তাহারা সৰ্ব্বত্র অশান্তি ও উচ্ছৃঙ্খলভাব অব্যাহত রাখে। সম্পত্তিলুণ্ঠন, গৃহদাহ প্রভৃতি ভয়াবহ কৰ্ম দুই দিন পর্যন্ত তাহাদের কৃতকার্যতার পরিচয় দিতে থাকে।

কিন্তু এই দুঃসময়ে আগরার অধিবাসীদিগের মধ্যে ইংরেজের সাহায্যকারী ও ইংরেজের হিতৈষী লোকের অভাব হয় নাই। পুনঃ পুনঃ উক্ত হইয়াছে যে, ভারতের সম্ভ্রান্ত লোক হইতে নিরক্ষর কৃষকগণ পর্যন্ত উপস্থিত সঙ্কটকালে ইংরেজের উপকারসাধনে অগ্রসর হইয়াছিল। আগরার বিপত্তিময় কৰ্মক্ষেত্রেও এইরূপ লোকের অভাব লক্ষিত হয় নাই। ইংরেজ যখন আগরার দুর্গে অপরূপভাবে ছিলেন, দুর্গের বহিঃস্থ ভূখণ্ডে যখন তাঁহাদের প্রাধান্য অন্তর্হিত-প্রায় হইয়াছিল, মহাবিপ্লবের ভয়ঙ্কর দৃশ্য যখন প্রতিমূহূর্তে তাঁহাদিগকে গভীর আতঙ্কগ্রস্ত করিয়া তুলিতেছিল, যথোচিত অবলম্বন ও সাহায্যের অভাবে যখন তাঁহারা চারি দিক্ অন্ধকারময় দেখিতেছিলেন, তখন আগরার লোকে তাঁহাদের উপকারসাধনে নিশ্চেষ্ট থাকে নাই। ৭ই জুলাই, রাজারাম নামক এক ব্যক্তি অতিকৌশলে দুর্গে মাজিষ্ট্রেট সাহেবের নিকটে এই সংবাদ প্রেরণ করেন যে, আগরায় গবর্ণমেন্টের বিপক্ষ সিপাহীসৈন্য নাই। দুর্গের বহির্ভাগে কেবল উচ্ছৃঙ্খল ও উদ্ধত লোক দ্বারা নানা গোলযোগ ঘটতেছে। মাজিষ্ট্রেট যদি যথোপযুক্ত সৈন্য লইয়া, দুর্গের বাহিরে আইসেন, তাহা হইলে শৃঙ্খলা ও শান্তি পুনঃস্থাপিত হইতে পারে। মাজিষ্ট্রেট এই সংবাদ পাইয়া, আশ্বস্ত হইলেন। তিনি যে বিষয়ের প্রত্যাশা করেন নাই, এখন সেই বিষয় তাঁহার সমক্ষে উপস্থিত হওয়াতে তদীয় অন্তঃকরণে যুগপৎ বিপুল উৎসাহ ও গভীর আশার সঞ্চার হইল। পর দিন প্রাতঃকালে মাজিষ্ট্রেট সাহেব কতিপয় ইউরোপীয় সৈনিক ও কামান লইয়া, দুর্গ হইতে বহির্গত হইলেন এবং প্রধান প্রধান পথে পরিভ্রমণ পূর্বক ব্রিটিশ গবর্ণমেন্টের আধিপত্য প্রতিষ্ঠিত ও শান্তি স্থাপিত হইল বলিয়া, সাধারণের মধ্যে ঘোষণা প্রচার করিলেন। \*

কিন্তু ইহাতেও ইংরেজেরা দুর্গের বহির্ভাগে বাস করিতে সাহসী হইলেন না। তাঁহারা উত্তেজিত সিপাহীদিগের ভয়ে দুর্গে অপরূপ হইয়াছিলেন।

\* Malleon, Indian Mutiny. Vol. I. p. 278.



এ সময়ে ঐ সকল সিপাহীকে আক্রমণ করিতে তাঁহাদের সামর্থ্য ছিল না। নানা বর্ণের, নানা শ্রেণীর প্রায় ছয় হাজার লোক দুর্গে স্থান পরিগ্রহ করিয়া ছিল। ইহাদের অধিকাংশ ইউরোপীয় ও ইউরেশীয় ছিল। বালকবালিকা, যুবকযুবতী, বর্ষীয়ান্ বর্ষীয়সী, সকলেই একবিধ অদৃষ্টের ভাগী হইয়া, এক স্থানে রহিয়াছিল। দুর্গে হিন্দু ও মুসলমানেরও অভাব ছিল না। ২৭শে জুলাই যে লোকগণনা হয়, তাহাতে হিন্দু ও মুসলমানের সংখ্যা প্রায় ১৫০০ পনের শত স্থির হইয়াছিল। প্রথমে ইহাদের সংখ্যা অল্প ছিল। ইউরোপীয়গণ কৃষ্ণবর্ণ ও এতদেশীয়পরিচ্ছদধারী লোক দেখিলেই সন্দিহান হইতেন। এ সময়ে কৃষ্ণবর্ণ তাঁহাদের অভূতপূর্ব বিভীষিকার উদ্দীপক ছিল। এইরূপ সন্নিগ্ধ এবং এইরূপ বিভীষিকায় বিচলিত হইলেও, শেষে তাঁহাদিগকে কৃষ্ণবর্ণ লোকের উপর নির্ভর করিতে হইয়াছিল। প্রথমতঃ ইউরোপীয়গণ মনে করিয়াছিলেন যে, তাঁহারা আপনাদের প্রয়োজনীয় কর্ম্ম আপনারাই সম্পন্ন করিবেন, অথবা এতদেশীয় খ্রীষ্টানদিগের দ্বারা তৎসমুদয় সম্পাদন করাইয়া লইবেন। কিন্তু এক পক্ষের বিরক্তি ও অপর পক্ষের অযোগ্যতা এইরূপ সঙ্কল্পসিদ্ধির অন্তরায় হইয়াছিল। স্বাবলম্বন একটি প্রধান গুণ। বিশেষতঃ বিপত্তিকালে এই গুণ স্বকীয় প্রয়োজনসাধনের পক্ষে নিরতিশয় আবশ্যক হইয়া থাকে। ইউরোপীয়গণ স্বাবলম্বনে অনভ্যস্ত নহেন। কিন্তু স্থানভেদে তাঁহাদের প্রকৃতিভেদ ঘটিয়াছিল। তাঁহারা ভারতবর্ষীয়দিগের মধ্যে আত্মপ্রাধাণ্য দেখাইতে ভারতবর্ষে সমাগত হইয়াছিলেন। সহসা তাঁহাদের অবস্থাবিপর্যায় ঘটিলেও তাঁহারা ভারতবাসীর করণীয় কর্ম্ম সম্পাদনে বিরক্তি বোধ করিয়াছিলেন। অধিকন্তু বিদেশের লবায়ু এ বিষয়ে তাঁহাদের বিরোধী হইয়া উঠিয়াছিল। আঘাতশ্রাবণের ধারাসম্পাত ও গ্রীষ্মাতিশয্যের মধ্যে উষ্ণপ্রধান দুর্গে অবরুদ্ধভাবে থাকিয়া, তাঁহারা গৃহকর্ম্মসম্পাদন সাতিশয় কষ্টকর বলিয়া বোধ করিয়াছিলেন। পক্ষান্তরে ভারতবর্ষীয় খ্রীষ্টানদিগের সংখ্যা একে অল্প, তাহার উপর, তাহারা উপস্থিত কর্ম্মের একান্ত অযোগ্য ছিল। রন্ধন, পরিবেশন ও গৃহমার্জন করিতে পারে, পাখা টানিতে পারে, স্নানের আয়োজন, খাণ্ড দ্রব্যাদির সংগ্রহ এবং বস্ত্রাদি পরিষ্কার করিতে পারে, ইউরোপীয়দিগের মধ্যে এরূপ লোকের একান্ত অভাব হইয়াছিল। সুতরাং ইউরোপীয়গণ বাধ্য হইয়া, আপনাদের নিত্যপ্রয়ো-

জনীয় কর্মসম্পাদনার্থ অশ্বদেশীয়দিগের প্রবেশের জন্য দুর্গদ্বার উদ্বাটিত করিয়া-  
ছিলেন। মাজিষ্ট্রেট সাহেবের নগরপরিভ্রমণের পর উচ্ছৃঙ্খল লোকের দৌরাহ্মা  
তিরোহিত হইলে ইহাদের সংখ্যা ক্রমে বৃদ্ধি পাইয়া, প্রায় পনের শত পর্য্যন্ত  
হইয়াছিল। কিন্তু ইহারা পরিচর্যায় ব্যাপৃত থাকিলেও আপনাদের প্রভু-  
দিগের তাদৃশ বিশ্বাসভাজন হইতে পারে নাই। অবলম্বিত কর্মসম্পাদনে ইহাদের  
ক্রটি ছিল না। ইহারা ইউরোপীয়দিগের ক্ষুধার সময়ে আহাৰ্য্য আনিত, তৃষ্ণার  
সময়ে পানীয়ের আহরণ করিত, গ্রীষ্মজনিত অবসাদের সময়ে পাখা টানিত,  
বাসস্থানের আবর্জনা ফেলিয়া দিত, পরিধের বস্ত্রাদি পরিচ্ছন্নভাবে রাখিত।  
এইরূপে প্রতিক্ষণেই এই পরিচারকগণ দ্বারা ইউরোপীয়দিগের নানা অভাবের  
মোচন হইত। তথাপি ইউরোপীয়গণ সন্ধিগুচিতে ইহাদের কার্যকলাপ পরিদর্শন  
করিতেন। এই সকল কর্মনিষ্ঠ ভৃত্য ব্যতীত সর্বসমেত আট শত আটাল্ল জন  
এতদেশীয় খ্রীষ্টান ছিল। ইহাদের মধ্যে কেবল দুই শত সাতষষ্টি জন প্রাপ্তবয়স্ক  
পুরুষ। জুলাই মাসে দুর্গস্থিত ইউরোপীয়ের সংখ্যা এক হাজার নয় শত উন-  
নব্বই ষ্টর হইয়াছিল। প্রাপ্তবয়স্ক মহিলার সংখ্যা ছয় শত কুড়ি। ইহাদের  
সহিত প্রায় পনের শত বালকবালিকা অবস্থিতি করিতেছিল।

কিন্তু কেবল ইউরোপীয়, এতদেশীয় বা ইউরেশীয়গণে দুর্গ পরিপূর্ণ হয়  
নাই। সুদূর নূতন মহাদ্বীপের লোকও ঘটনাচক্রে পড়িয়া, দুর্গে উপস্থিত  
হইয়াছিল। ইংরেজ সিবিলিয়ান, ইংরেজ সৈনিক, ইংরেজ বণিক প্রভৃতির  
সহিত লয়ার নদীর তীরবর্তী স্থলের চিরকুমারী তপস্বিনীগণ, সিসিলি ও রোমের  
পুরোহিতগণ, ওহিয়োর ধর্মপ্রচারকগণ, পারী নগরীর দড়িবাজীকরগণ,  
আর্মেনিয়ার ব্যবসায়ীগণ এক কেন্দ্রে আবদ্ধ রহিয়াছিল। এতদ্ব্যতীত কলিকাতা-  
বাসী বাঙ্গালী ও পারসীক বণিকগণও ইহাদের মধ্যে ছিল।\* এইরূপে  
ভীষণ বিপ্লবের প্রবল তরঙ্গ পৃথিবীর বিভিন্ন জনপদের লোককে বিভিন্ন দিক্  
হইতে ঠেলিয়া এক স্থানে রাশীকৃত করিয়াছিল।

সদর কাছারি প্রভৃতি হইতে তিন মাইল এবং সৈনিকনিবাস হইতে এক  
মাইল দূরে, সুনীল যমুনার দক্ষিণ তটে আগরার দুর্গ অবস্থিত। উহা রক্তবর্ণ

\* Raikes, Notes on the Revolt &c. p. 66.

প্রস্তরে নির্মিত এবং গভীর পরিখায় পরিবেষ্টিত। ১৫৭০ অব্দে সম্রাট আকবর শাহ কর্তৃক এই দুর্গ পুনর্নির্মিত ও সংস্কৃত হয়। আকবর দুর্গের সৌন্দর্য-সাধনে ও পরিপাট্যবিধানে উদাসীন থাকেন নাই। তিনি উহা যেমন ছরাক্রম্য ও দুর্জেয় করেন, সেইরূপ বহুমূল্য উপাদানে উহার শ্রীসম্পাদন করিয়া তুলেন। দুর্গপ্রাচীরের অন্তর্ভাগে স্বর্ণখচিত, সুদৃশ্য প্রাসাদ নির্মিত হয়। শ্বেত প্রস্তরের সুপ্রসিদ্ধ মতিমসজিদ তাজের গৌরবস্পর্শী হইয়া উঠে। অস্তাগার এবং অন্যান্য গৃহও স্থানে স্থানে আপনাদের সৌন্দর্য্যগৌরবের পরিচয় দিতে থাকে। সৌভাগ্যের সময়ে ইংরেজ এই সুদৃশ্য দুর্গে থাকিয়া, যমুনার সুখস্পর্শ সমীর সেবন পূর্বক পুলকিত হইতেন, প্রাসাদাবলীর রমণীয়তায় তৃপ্তিলাভ করিতেন, মতিমসজিদের সৌন্দর্য্যদর্শনে ভারতের পূর্বতন মহিমময় সম্রাটের বৈভব মনে করিয়া, বিস্মিত হইয়া উঠিতেন। অপরের অধিকৃত বিষয় যে, তাঁহাদের অধিকারে আসিয়া, ভোগাভিলাষ পূর্ণ করিয়া তুলিতেছে, ইহা ভাবিয়াও তাঁহারা গর্ষিত হইতেন। কিন্তু এই দুর্গেই যে, এক দিন তাঁহাদের স্বদেশেরও সজাতির ব্যক্তিগণ স্তূপীকৃতভাবে অবস্থিতি করিবেন, ইহা তাঁহারা স্বপ্নেও ভাবেন নাই। এখন অদৃষ্টচক্রের আবর্তনে তাঁহাদের এইরূপ দশা ঘটয়াছিল। যে স্থানে থাকিয়া, তাঁহারা এক সময়ে বিলাসতরঙ্গে আন্দোলিত হইতেন, এখন সেই স্থানই তাঁহাদের বিপত্তিকালের—তাঁহাদের জীবনরক্ষার—তাঁহাদের আধিপত্য পুনঃপ্রতিষ্ঠার অদ্বিতীয় অবলম্বনস্বরূপ হইয়াছিল।

কেবল আগরার নিরাশ্রয় ও বিপন্ন প্রবাসিগণ দুর্গে অবস্থিতি করে নাই। স্থানান্তর হইতে অনেক পলাতকগণও দুর্গে আশ্রয় গ্রহণ করিয়াছিল। ইহারা নিঃসম্বল অবস্থায় উপনীত হইয়াছিল। ইহাদের ব্যবহার্য্য দ্রব্যাদি বিনষ্ট বা বিলুপ্ত হইয়া গিয়াছিল। পরিহিত বস্ত্রমাত্র লইয়া, ইহারা নানাকষ্ট নানা বিঘ্নবিপত্তির মধ্যে আপনাদের অমূল্য জীবন—কেবল জীবন রক্ষার জন্ত সাতিশয় কাতরভাবে দুর্গপ্রাচীরের মধ্যে প্রবেশ করিয়াছিল। আগরার অধিবাসীদিগের সম্পত্তি বিলুপ্তপ্রিয় লোকের হস্তগত বা ভস্মীভূত হইয়াছিল। গৃহস্বামীর গৃহ গিয়াছিল, বণিকের অর্থ অপহৃত হইয়াছিল, দোকানদারের বাণিজ্যদ্রব্য অগ্নিতে নিক্ষিপ্ত, বিচূর্ণিত বা অপরের উদ্যমভোগাভিলাষ-সিদ্ধির জন্ত স্থানান্তরিত হইয়াছিল। ইউরোপীয়দিগের মধ্যে অনেকে

কেবল পরিধেয় বস্ত্র ও এক একটি ব্যাগমাত্র লইয়া দুর্গে গিয়াছিল। সর্ক-প্রথম ইহাদের বাসস্থাননির্দেশ ও নিত্যপ্রয়োজনীয় দ্রব্যাদির সংস্থানের জন্ত সাতিশয় গোলযোগ ঘটয়াছিল। ক্রমে নগরের উপদ্রবের অন্তর্দ্বানের সহিত সকল বিষয়ের শৃঙ্খলা হইতে থাকে। দুর্গের সকলকে সমভাবে উৎকৃষ্ট স্থান দেওয়ার সম্ভাবনা ছিল না। এইরূপ দুঃসময়েও ইউরোপীয়দিগের কেহ কেহ আপনাদের স্বার্থপরতা ও আত্মস্তুরিতা পরিত্যাগ করিতে পারেন নাই। নির্দিষ্ট স্থানের অপকর্ষ দেখিয়া, অনেকে অসন্তোষ প্রকাশ করেন। প্রবল বিপক্ষের পরাক্রমে যে সময়ে জীবন সংশয়দোলায় অধিক্রুত হয়, সকলের অদৃষ্ট-চক্র যে সময়ে সমানভাবে নিম্নাভিমুখে যাইতে থাকে, সে সময়ে বিলাসিতা ও আত্মসুখেচ্ছা পরিত্যাগ করাই শ্রেয়ঃ। কিন্তু এইরূপ সঙ্কটকালেও উদ্ধত ইউরোপীয়ের বলবতী আত্মস্তুরিতা শ্রেয়ঃপথের কণ্টকস্বরূপ হইয়াছিল। যাহা হটক, ক্রমে এই গোলযোগ দূরীভূত হইল। উপস্থিত ক্ষেত্রে একের স্বার্থপরতার পার্শ্বে অপরের নিঃস্বার্থভাবও পরিষ্ফুট হইয়া, সকলকে সহৃদয়তার উপদেশ দিতে লাগিল। রেবিনিউ বোর্ডের প্রধান কর্মচারী রীড সাহেব পদগৌরবে লেফ্ টেনেন্ট-গবর্নরের অব্যবহিত পরেই গণ্য হইতেন। স্মৃতরাং তাঁহার জন্ত উৎকৃষ্টতর স্থান নিরূপিত হইয়াছিল। কিন্তু তাঁহার পরিবার-বর্গ ইংলণ্ডে থাকাতে তিনি ঐ সুখজনক স্থান গ্রহণ করেন নাই। তাঁহার স্থান কতিপয় আহত আফিসরকে দেওয়া হয়। তিনি স্বয়ং দুর্গস্থিত প্রাসাদের মার্সলহলের মেজেতে বেহালার এক খানি পুরাতন আচ্ছাদন এবং দরমা বা খড়ের শয্যাতেই পরিতৃপ্ত হইলেন।

যাহারা পীড়িত এবং যুদ্ধে আহত হইয়াছিল, সুরমা মতিমস্জিদ তাঁহাদের আরামস্থান হয়। সম্রাট আকবর যাহার নিৰ্ম্মাণে বহু অর্থব্যয় করিয়াছিলেন, এক সময়ে ধর্মনিষ্ঠ পীর ও ফকীরগণ যাহাতে অবস্থিতি করিতেন, তাহা এখন রোগার্ভ ও আহতদিগের বাসস্থল হয়। এতদ্ব্যতীত দুর্গের অভ্যন্তরে যতগুলি গৃহ ছিল, তৎসমুদয় ভিন্ন ভিন্ন খণ্ডে বিভক্ত এবং ভিন্ন ভিন্ন শ্রেণীর জন্ত বর্ণানুক্রমে সজ্জিত হয়। সিবিলিয়ানগণ এক খণ্ডে বাস করিতে থাকেন। সৈনিক-পুরুষদিগের জন্ত অল্প খণ্ড নির্দিষ্ট হয়। যে সকল সৈনিক কর্মচারী বিবাহিত ও পরিবারপরিবৃত ছিলেন, তাঁহারা খণ্ডান্তরে অবস্থিতি করেন। দুর্গে যে সকল

গৃহ ছিল, কেবল তৎসমুদয়ই ষাবতীয় লোকের পক্ষে পর্যাপ্ত হয় নাই। দুর্গস্থিত প্রাসাদের বহির্ভাগে তাড়াতাড়ি খড়ের ঘর প্রস্তুত করা হয়। সম্রাট আকবরের সময়ে প্রাসাদের মার্বেলের বারেন্দায় পারশ্বদেশীয় রেসমী এবং বারাণসীর স্বর্ণখচিত কাপড়ের পর্দা থাকিত, এখন সেই সকল স্থানে মাদুরের পর্দা করিয়া দেওয়া হয়। ভিন্ন ভিন্ন শ্রেণীর লোকে এই ভিন্ন ভিন্ন স্থানে আতপতাপ বা বৃষ্টিপাত হইতে আপনাদিগকে রক্ষা করিতে থাকে। পাদরিদিগের জন্ম অপেক্ষাকৃত উৎকৃষ্ট স্থান নিরূপিত হইয়াছিল। কিন্তু ইউরোপীয় বণিক ও দোকানদারগণ এক্ষণে সৌভাগ্যবান্ হইতে পারেন নাই। তাঁহাদের বাসের জন্ম ছাদের উপর তৃণাচ্ছাদিত গৃহ নির্মিত হয়। ফিরিঙ্গীদিগের অদৃষ্টে কোন নির্দিষ্ট স্থান ঘটিয়া উঠে নাই। তাহারা ইউরোপীয় সমাজ হইতে যেমন চিরকাল বিচ্ছিন্নভাবে রহিয়াছে, উপস্থিত ক্ষেত্রেও গৃহের কোণে, বারেন্দার নীচে, যেখানে যে সুবিধা পাইয়াছে, সেইখানে সে সেইরূপ বিচ্ছিন্নভাবে অবস্থিতি করিতে থাকে। ইহারা কোন কালে গর্ভিত ইউরোপীয়দিগের নিকটে আদৃত হয় নাই, হিন্দু বা মুসলমান প্রভৃতির সহিতও মিশিতে পারে নাই। ইহাদের প্রকৃতিসিদ্ধ গুণ যাহাই থাকুক না কেন, ইহাদের গুণাংশ কোন কালে ইহাদিগকে সমাজের উচ্চ স্তরে স্থাপন করিতে পারে নাই। ইহারা সাধারণতঃ দোষাংশেরই ফলভোগী হইয়াছে। উপস্থিত সঙ্কটকালেও ইহাদের এইরূপ অদৃষ্ট-ফল—এইরূপ পার্থক্য সুস্পষ্ট পরিলক্ষিত হইয়াছিল।

পূর্বে উক্ত হইয়াছে যে, মতিমসজিদ হাসপাতালে পরিণত হইয়াছিল। যাহারা অতিশ্রম বা অনিয়মে অথবা অনভ্যস্ত জলবায়ুর পরাক্রমে রোগগ্রস্ত হইয়াছিল, যুদ্ধে যাহাদের দেহাংশ বিক্ষত, বিচূর্ণিত বা নিষ্পেষিত হইয়া গিয়াছিল, তাহাদিগকে হাসপাতালে স্থান দেওয়া হয়। তাহাদের গুণায় কোনরূপ ঔদাস্য বা ক্রটি লক্ষিত হয় নাই। এক দিকে ইউরোপীয়দিগের আত্মসুরিতা বা আত্মসুখবাসনা যেরূপ অপ্রীতিকর দৃশ্যের বিস্তার করিয়াছিল, অপর দিকে নারীর কোমলতা, পরার্থপরতা ও বলবতী দয়া সেইরূপ দুর্গবাসীদিগকে বিমুগ্ধ করিয়া তুলিয়াছিল। ইংরেজ মহিলাগণ যেরূপ যত্ন ও আগ্রহের সহিত যুদ্ধাহত-দিগের পরিচর্যার ভার গ্রহণ করেন, তাহা পূর্বে উল্লিখিত হইয়াছে। ইহারা রোগীদিগের জন্ম লেপ, বালিশ, তোষক প্রভৃতি প্রস্তুত করেন। এদিকে

তাড়াতাড়ি খাট নিশ্চিত হইতে থাকে । মহিলারা ভিন্ন ভিন্ন দলে বিভক্ত হইলেন । প্রত্যেক দল নির্দিষ্ট সময়ের জন্ত রোগীদিগের শুশ্রূষা করিতে থাকেন । ইঁহারা চিকিৎসকের নিদেশানুসারে রোগীদিগের আহত স্থান পরিষ্কার এবং উহাতে ঔষধলেপন ও পটিবন্ধন করিতেন, তাহাদের সেবনের জন্ত ঔষধ আনিয়া দিতেন, যথানিয়মে পথ্য দিয়া, তাহাদিগকে অপেক্ষাকৃত সুখে ও শান্তিতে রাখিতেন । এইরূপে প্রতি কার্যেই ইঁহাদের অপরিমিত কোমলভাবের নিদর্শন পরিস্ফুট হইত । রুগ্ন ও আহত সৈনিকগণও তাহাদের শুশ্রূষাকারিণী মহিলাদিগের সমক্ষে কোমলভাবের পরিচয় দিত । বাহাতে হৃদয়ে আঘাত লাগিতে পারে, এরূপ কোন শ্রুতিকঠোর কথা তাহাদের মুখ হইতে বহির্গত হইত না । গোলযোগ নিরাকৃত এবং আপনারা নীরোগ হইলে তাহারা শুশ্রূষাকারিণীদিগের প্রতি কৃতজ্ঞতা জানাইতে ঔদাস্য প্রকাশ করে নাই । তাহাজের মনোহর উদ্যানে তাহারা শুশ্রূষাকারিণী মহিলাদিগের সহিত নগরের সম্ভ্রান্ত ব্যক্তিদিগকে আমন্ত্রণ করে । এই মনোরম্য স্থানে তাহাদের উৎসবের অনুষ্ঠান হয় । তাহারা অতুলনীর ধ্বংস হইবার পার্শ্বে—উদ্যানের প্রস্ফুটিত পুষ্পরাজির মধ্যে গানবাচ্য প্রভৃতিতে নানারূপ আমোদ করিয়া, যাহারা, পাড়ার সময়ে, তাহাদিগকে পরিবারের জন্ত বস্ত্র আনিয়া দিয়াছিলেন, রোগশান্তির জন্ত যথানিয়মে ঔষধ সেবন করাইয়াছিলেন, আহারের জন্ত পথ্যাদি প্রস্তুত করিয়া দিয়াছিলেন, শান্তিসুখে রাখিবার জন্ত সর্বদা পর্যবেক্ষণ করিয়াছিলেন, তাহাদিগকে ধন্যবাদ দিয়া, আপনাদের কৃতজ্ঞতা প্রকাশ করে ।

এ দিকে সৈনিকদিগের মধ্যে বস্ত্রাদি যোগাইবার বন্দোবস্ত হয় । দরজীগণ ক্রমে দুর্গে প্রবেশ করিবার অনুমতি পাইয়া, জামা ইত্যাদি প্রস্তুত করিতে থাকে । এক জন ভারতবাসীর ক্ষমতায় ইংরেজের যাবতীয় প্রয়োজনীয় বিষয়ের সংগ্রহচিন্তা দূরীভূত হয় । লালা জ্যোতিঃপ্রসাদ আকগানিস্তান, পঞ্জাব এবং গোবালিয়রের যুদ্ধে কমিশনিয়েটবিভাগে কন্ট্রাক্টরের কার্যে সাতিশয় প্রসিদ্ধি লাভ করিয়াছিলেন । এ সময়ে তিনি ঐ কার্যের ভার গ্রহণ করেন । দুর্গরক্ষক সৈনিকদল—তিন হাজার ইউরোপীয় এবং পনের শত এতদ্দেশীয়ের ছয় মাসের উপযোগী খাদ্যদ্রব্যসংগ্রহের জন্ত কর্তৃপক্ষ জুন মাসের শেষে আদেশ প্রচার করেন । এই অত্যাবশ্যক কার্যের তত্ত্বাবধানের ভার

রেবিনিউ বোর্ডের রীড সাহেবের উপর সমর্পিত হয়। কমিশরিয়েটের এক জন কর্মচারী দ্রব্যাদির আয়োজনে ব্যাপৃত হয়েন। লাল জ্যোতিঃপ্রসাদ ইঁহাদের সাহায্য না করিলে ইঁহারা কখনও এই গুরুতর কর্ম সম্পন্ন করিয়া তুলিতে পারিতেন না। জ্যোতিঃপ্রসাদের কার্যপ্রণালীর গুণে প্রয়োজনের অতিরিক্ত রসদ সংগৃহীত হয়। দুর্গপ্রাচীরের বাহিরে খোলা জায়গা ছিল। উহা পরিষ্কৃত হইলে ইংরেজদিগের পক্ষে সাতিশর কার্যকর হইয়া উঠে। সৈনিকনিবাস ভস্মীভূত ও বিধ্বস্ত হইবার সময়ে যে সকল গাড়ি ইত্যাদি রক্ষা পাইয়াছিল, তৎসমুদয় ঐ স্থানে রাখা হয়। ক্রমে উহাতে লোকে নিত্যব্যবহার্য দ্রব্যাদির বিক্রয় আরম্ভ করে। এইরূপে ক্রমশঃ উহা একটি উৎকৃষ্ট বাজারে পরিণত হয়। দুর্গস্থিত লোকের প্রয়োজনীয় দ্রব্যাদির প্রায় সমস্তই ঐ বাজারে পাওয়া যাইতে থাকে।

যখন ভিন্ন ভিন্ন লোকের জন্ম ভিন্ন ভিন্ন বসতিস্থান নির্দিষ্ট হয়, খাণ্ড ও পরিধেয় সংগৃহীত এবং রোগীর পরিচর্যার সুবন্দোবস্ত হয়, গোলযোগ দূরীভূত ও সমগ্রবিষয়ের শৃঙ্খলা স্থাপিত হয়, তখন কর্তৃপক্ষ আপনাদের অস্থিতীয় আশ্রয়স্থান—সুস্থিত দুর্গের রক্ষায় উদাসীন থাকেন নাই। শাসিয়ার যুদ্ধে পরাজয়ের পর ব্রিগেডিয়ার পল্‌হোয়েন্‌ গবর্নর্-জেনেরলের আদেশ অনুসারে সৈনিকদলের অধ্যক্ষতা হইতে অপসারিত হইয়াছিলেন। কর্নেল কটন তাঁহার স্থান পরিগ্রহ করিয়াছিলেন। এই নবনিয়োজিত অধ্যক্ষ আপনার গুরুতর কর্মসম্পাদনে কিছুমাত্র উদাস্ত প্রকাশ করেন নাই। তাঁহাদের আশ্রয়স্থল বহু লোকে পরিপূর্ণ হইয়াছিল। তাঁহারা অনেক অসহায় ও অসমর্থ জীবের রক্ষার ভার গ্রহণ করিয়াছিলেন। এ সময়ে বিপক্ষদিগকে আক্রমণ করিতে তাঁহাদের সাহস বা সামর্থ্য ছিল না। তাঁহারা, সুশিক্ষিত সৈন্য ও যুদ্ধোপকরণ, উভয়েই ক্ষীণবল ছিলেন। সুতরাং দুর্গের বহির্ভাগে যাইতে তাঁহাদের প্রবৃত্তি হয় নাই। তাঁহারা দুর্গে থাকিয়াই যে কোনরূপে হুক, আত্মরক্ষার আয়োজনে তৎপর হয়েন। এই সময়ে সকল বিষয়ে লেফটেনেন্ট-গবর্নরের কর্তৃত্ব থাকিলেও দুর্গ রক্ষা এবং খাণ্ড ও পানীয় প্রভৃতির সংগ্রহ সম্বন্ধীয় যাবতীয় কর্ম সৈনিকবিভাগের কর্মচারিগণের হস্তে গুস্ত ছিল। এখন এই সৈনিকপ্রধানগণ আশ্রয়দুর্গ সুরক্ষিত করিতে লাগিলেন। দুর্গ-

প্রাচীরে বহুসংখ্যক কামান সন্নিবেশিত হইল। গোলন্দাজদিগের সংখ্যা অল্প ছিল। সবলকার ফিরিঙ্গীদিগকে এই দলে গ্রহণ করা হইল। এই শ্রেণীর লোকে স্বেচ্ছাপ্রবৃত্ত সৈনিকদলে প্রবেশপূর্বক কামানপরিচালকের কার্যভার গ্রহণ করিল। দুর্গের চারি পার্শ্বে যে সকল উন্নত ভূখণ্ড ছিল, বিপক্ষগণ তৎসমুদয়ের অন্তরালে থাকিয়া, দুর্গ আক্রমণ করিতে পারে, এই আশঙ্কায় উহা পরিকৃত ও সমভূমিতে পরিণত হইল। গোলাগুলি প্রভৃতি পর্যাপ্তপরিমাণে সংগৃহীত হইতে লাগিল। কর্তৃপক্ষ বারুদখানারক্ষার জন্তু সর্বিশেষ মনোযোগী হইলেন। তাঁহাদের বিশ্বাস ছিল যে, দুর্গ-প্রাচীরের অন্তর্ভাগে তাঁহাদের শত্রুগণ অলক্ষ্যভাবে বিচরণ করিতেছে। ফকীরের বেশেই হউক, ভ্রমণকারী পথিকের ভাবেই হউক, ইহারা দুর্গস্থিত ভারতবর্ষীয়দিগের হৃদয় উত্তেজিত এবং দুর্গের বাবতীয় গোপনীয় বিষয় জানিতে চেষ্টা করিতে পারে। দুর্গে ছয় সাতটি অস্ত্রাগার ছিল। এগুলি মৃৎপ্রাচীরে পরিবেষ্টিত হইল। গৃহের ছাদ পুরু এবং মৃত্তিকায় আচ্ছাদিত করিয়া দেওয়া গেল। ইউরোপীয় রক্ষকের সংখ্যা দ্বিগুণ হইল। যে সকল আফিসর অস্ত্রাগারগুলির রক্ষার ভার গ্রহণ করিয়াছিলেন, তাঁহারা সর্বদা তৎসমুদয় পর্যবেক্ষণ করিতে লাগিলেন এবং যে সকল লোকের উপর সন্দেহ হইতে লাগিল, তাহাদিগকে অস্ত্রাগারের সমীপবর্তী দেখিলে নিষ্কাশিত করিয়া দিতে লাগিলেন।

ইংরেজেরা যখন এইরূপ আয়োজন করিতেছিলেন, এইরূপ সতর্কভাবে সমস্ত বিষয়ের পর্যবেক্ষণে ব্যাপৃত হইতেছিলেন, এইরূপ শ্রমশীলতা ও যত্নপরতার পরিচয় দিতেছিলেন, তখন গোবালিয়রের উত্তেজিত সিপাহীদল বহুসংখ্যক ছোট ও বড় কামান লইয়া, আগরার সত্তর মাইল অন্তরে অবস্থিতি করিতেছিল। ইংরেজের সমক্ষে ইহাদের প্রাধাত্যস্থাপন-বাসনা অন্তর্হিত হয় নাই, বরং উহা বলবতী হইয়া ইহাদিগকে কঠোর কার্যসাধনে প্রবর্তিত করিয়াছিল। ইহাদের অধিনায়কগণ আগরা আক্রমণ করিবে বলিয়া, অভিমত প্রকাশ করিতেছিল। মহারাজ শিন্দে অনেক কষ্টে ইহাদের প্রবল জিগীষা কিয়দংশে সংযতভাবে রাখিয়াছিলেন বটে, কিন্তু তাঁহার চেষ্টা যে দীর্ঘকাল পর্য্যন্ত ফলজনক হইবে, ইংরেজেরা এরূপ আশা করেন নাই। গোবালিয়রের সিপাহীদল সাতিশয় পরাক্রান্ত ছিল। সংখ্যাধিক্য তাহাদের বলবৃদ্ধি করিয়াছিল, উৎকৃষ্ট যুদ্ধোপকরণ



তাহাদের সাহসিক কার্যসাধনের সহায় হইয়াছিল, ইহার উপর ইংরেজের প্রদত্ত সামরিক শিক্ষা তাহাদিগকে যুদ্ধক্ষেত্রে বীরত্বের পরিচয় দিতে সর্বদা উৎসাহ-যুক্ত করিয়া তুলিতেছিল। এইরূপ পরাক্রমশালী, এইরূপ সহায়সম্পন্ন, এইরূপ ভয়ঙ্কর শত্রুর আক্রমণের আশঙ্কায় আগরার দুর্গস্থিত ইংরেজেরা বিচলিত হইয়াছিলেন। তাঁহারা যত শীঘ্র সম্ভব, দুর্গ সুরক্ষিত করিবার বন্দোবস্ত করিয়াছিলেন।

যাঁহারা এক সময়ে গঙ্গাযমুনার তীরবর্তী শশুশ্রামল ও সম্পতিসম্পন্ন সুবিস্তৃত ভূখণ্ডে আধিপত্য করিতেছিলেন, লোকে যাঁহাদিগকে দেখিলে সম্মান-প্রদর্শনে অগ্রসর হইত, যাঁহাদের কথায় মস্তক অবনত করিত, যাঁহাদের সম্ভৃতি-সাধনে সর্বদা উত্তত থাকিত, তাঁহারা এইরূপে আপনাদের অধীন ব্যক্তিদিগেরই আক্রমণভয়ে আগরার দুর্গে অবস্থিত করিতে লাগিলেন। দুর্গে তাঁহাদের যে নানারূপ অসুবিধা ঘটিয়াছিল, তাহা পূর্বে বর্ণিত হইয়াছে। ক্রমে অনেক বিষয়ের শৃঙ্খলা হইয়াছিল বটে, কিন্তু অত্যধিক লোকসংখ্যার জন্ত গোলযোগ একবারে দূর হয় নাই। এক দিকে মলমূত্র পরিত্যাগের স্থান, অপর দিকে বিশুদ্ধ বায়ুর গমনাগমনের জন্ত বিমুক্ত স্থল, এই উভয় বিষয়ের নিমিত্তই নানা অসুবিধা হইয়াছিল। প্রথমটির অভাবপূরণের জন্ত চেষ্টা করিলে দ্বিতীয়টির অভাবের জন্ত কষ্টানুভব হইত। সমভাবে দুই দিক রক্ষা করা একরূপ অসাধ্য হইয়া উঠিয়াছিল। অনেক স্থান মশামাছিতে পরিপূর্ণ ছিল। দেওয়ানি ও সৈনিকবিভাগের কর্মচারীরা বিশেষতঃ ইঞ্জিনিয়ারগণ সূর্যোদয় হইতে সূর্যাস্ত পর্যন্ত দুর্গস্থিত লোকসমষ্টির নানা অভাবমোচন এবং অন্তঃশত্রু ও বহিঃশত্রুর আক্রমণনিবারণের জন্ত কার্যে ব্যাপৃত থাকিতেন। কিন্তু যাঁহাদের কর্মক্ষেত্র তাদৃশ বিস্তৃত ছিল না,—যাঁহারা কেবল জীবনের জন্ত স্থানান্তর হইতে দুর্গে আশ্রয় লইয়াছিলেন, সেই সকল সুখোচিত নরনারীদিগকে কষ্টে কালযাপন করিতে হইত। শান্তির সময়ে তাঁহাদের আমোদে কোনরূপ অন্তরায় ঘটত না। তাঁহারা সূর্যোদয়ের প্রাক্কালে শকটে বা অশ্বে আরোহণপূর্বক প্রভাত-বায়ু সেবনে বহির্গত হইতেন, সূর্যাস্তসময়ে সায়ন্তন সমীরে পুলকিত হইতেন। দুর্গে তাঁহাদের একরূপ সুযোগ ছিল না। কিন্তু এ বিষয়ে অগ্ররূপ সুবিধা ছিল। দুর্গপ্রাচীর উন্নত। উত্তর পাদদেশ দিয়া যমুনা তরঙ্গরঙ্গে বহিয়া যাইতেছে। ইউরোপীয়গণ এই উন্নত দুর্গপ্রাচীরে পরিভ্রমণ করিতেন। বিশুদ্ধ বায়ু যমুনা-

প্রবাহে পরিষিক্ত হইয়া, স্পর্শে স্পর্শে তাঁহাদিগকে পুলকিত করিত। এইরূপ ভ্রমণ ব্যতীত তাঁহারা পুস্তকাদি পাঠে আমোদিত হইতেন। সন্ধ্যার পর তাঁহারা ভিন্ন ভিন্ন ভোজনস্থলে সমবেত হইয়া, বিবিধ আলাপে সুখানুভব করিতেন। কখন কখন আতঙ্কজনক বাজারগুজব প্রচারিত হইলে তাঁহাদের মধ্যে উহার আন্দোলন হইত। কেহ কেহ কল্পনাবলে উহা অতিরঞ্জিত করিয়া তুলিতেন, কেহ কেহ উহার সত্যতা সম্বন্ধে সংশয় প্রকাশ করিতেন, কেহ কেহ বা দৃঢ়তাসহকারে নানা বুক্তি দেখাইয়া, উহার অলীকত্ব প্রতিপন্ন করিতে অগ্রসর হইতেন। জনরব প্রায়ই অলীক হইত। তখন যাহারা শঙ্কিত হইয়াছিলেন, যাহারা সংশয় প্রকাশ করিয়াছিলেন, যাহারা দৃঢ়তাসহকারে কল্পনার লীলা বলিয়াছিলেন, তাঁহাদের মধ্যে কোতূকের সহিত হাস্যরসের অপূর্ব উচ্ছ্বাস দেখা যাইত। আশঙ্কাকারিগণ আপনাদের ভীকৃতায় লজ্জিত হইয়া, বিষয়ান্তরের আলাপে প্রতিপক্ষদিগকে ব্যাপৃত রাখিতে চেষ্টা করিতেন। পূর্বে উক্ত হইয়াছে যে, আততায়ীর সমক্ষে আত্মরক্ষার জন্ত অনেকে সৈনিক-ব্রত অবলম্বন করিয়াছিল। সেনাবিভাগের প্রধান ব্যক্তিগণ ইহাদিগকে রণ-কৌশল শিক্ষা দিতেন। বিপদ যখন অনিবার্য হইত, তখন সকল দিকেই উত্তমশীল ব্যক্তিদিগের যত্ন ও অধ্যবসায়ের নিদর্শন পরিলক্ষিত হইয়া থাকে। উপস্থিত স্থলেও এইরূপ নিদর্শন অপরিষ্কৃতভাবে থাকে নাই। "এ সময়ে সমগ্র দুর্গ যেন অদৃষ্টের সজীবভাবে স্বকীয় অভূতপূর্ব শক্তির পরিচয় দিয়াছিল।

এইরূপে জুলাই মাস অতিবাহিত হইল। আগষ্ট মাসও ক্রমে অতীতের সহিত মিশিয়া গেল। কিন্তু লেফটেনেন্ট-গবর্নর আশ্বস্ত হইলেন না। তিনি যে ঘোর অন্ধকারে পরিবেষ্টিত ছিলেন, তাহা অপসারিত হইল না; সমুজ্জ্বল আলোকের আবির্ভাবে তাঁহার চারি দিক প্রসন্ন হইয়া উঠিল না। তিনি দিল্লীর সংবাদ জানিবার জন্ত সর্বদা উক্ত স্থানের কমিশনর গ্রিথেড্ সাহেবের সহিত পত্র লেখালেখি করিতেছিলেন। কিন্তু কমিশনর এরূপ কোন সংবাদ পাঠাইতে পারিলেন না যে, যাহাতে লেফটেনেন্ট-গবর্নরের হৃদয় উৎফুল্ল হইতে পারে। মোগলের চিরপ্রসিদ্ধ রাজধানী উত্তেজিত সিপাহীদিগের হস্তে ছিল। নবাব ওয়াজিদ আলির প্রিয় বাসভূমিতে সিপাহীগণ আত্মপ্রাধাণ্য রক্ষা করিতে-ছিল। সুতরাং এই দুই প্রধান স্থান হইতে কলবিন্ সাহেবের কোনরূপ সাহায্য-

প্রাপ্তির সম্ভাবনা ছিল না। যদি দিল্লী অধিকৃত এবং লক্ষ্যের সিপাহীগণ পরাজিত ও দূরীভূত হইত, তাহা হইলে সমগ্র উত্তরপশ্চিম প্রদেশে ইংরেজের প্রাধান্যরক্ষার সুবন্দোবস্ত ঘটত। কিন্তু ইংরেজ যাহা ভাবিয়াছিলেন, অদৃষ্ট তাহার বিরোধী হইয়া উঠিয়াছিল। দুর্গে সমরে সময়ে নানাবিধ জনরব উঠিত; নানা প্রকারের বহুসংখ্য অধিবাসী থাকাতে ঐ জনরব ক্রমে পল্লবিত এবং লোকের মুখে মুখে নানাভাবে পরিকীর্ণিত হইত। ইহাতে আশঙ্কাবৃদ্ধি ও মনের অস্থিরতা বাতীত আর কোন ফল হইত না। কর্তৃপক্ষ এ বিষয়ে নীরবে থাকিতেন। তাহারা এ বিষয়ের আন্দোলনে ব্যাপৃত হইতেন না বা অপরকে এ বিষয় বলিয়াও তাহার আশঙ্কা ও উদ্বেগ বৃদ্ধি করিতেন না।

সমগ্র উত্তরপশ্চিম প্রদেশ বিপ্লবপূর্ণ হইয়াছিল। আগরার পার্শ্ববর্তী স্থানে ক্ষমতাশালী লোকে স্বপ্রধান হইয়া, দিল্লীর বৃদ্ধ মোগলের নামে শাসনদণ্ডের পরিচালনা করিতেছিল। আলীগড়ে ঘাউস্ খাঁ নামক এক ব্যক্তি আপনাকে দিল্লীর বাদশাহের সুবাদার বলিয়া ঘোষণাপূর্বক জনপদশাসনে প্রবৃত্ত হইয়াছিল। কর্ণেল কটন ইহার বিরুদ্ধে সৈন্য প্রেরণ করিলেন। যাহারা ইচ্ছা করিয়া, অশ্বারোহী সৈনিকের কার্যে প্রবৃত্ত হইয়াছিল, তাহাদের কতিপয় ব্যক্তি এই অভিযানে নিয়োজিত হইল। মৈনপুরীর প্রসিদ্ধ সাহসী অধিনায়ক ডি কাণ্টজো এই সৈনিকদিগের পরিচালনভার গ্রহণ করিলেন। সমগ্র সৈনিকদলের কর্তৃত্ব মেজর মণ্টগোমরির উপর সমর্পিত হইল। বিপক্ষদিগের দমন বাতীত হাত্রাস্নগর রক্ষা করা এবং স্থানীয় তালুকদারদিগকে আশ্বাস দেওয়া, এই সৈন্যপ্রেরণের উদ্দেশ্য ছিল। মেজর মণ্টগোমরি সৈন্য লইয়া, ২০শে আগষ্ট আগরা হইতে যাত্রাপূর্বক ২৪শে তারিখ আলীগড়ে উপনীত হইলেন। ঠাকুর গোবিন্দ সিংহ কতিপয় অশ্বারোহী দিয়া, ইহার সাহায্য করেন। ঘাউস্ খাঁর মুসলমান সৈন্য ধর্মভাবে উত্তেজিত হইয়া, এমন বেগে ইংরেজের পদাতি সৈন্যকে আক্রমণ করে যে, ইংরেজ অধিনায়ককে তাহাদের সম্মুখে কামান সন্নিবেশ করিতে হয়। গাজীগণ তরবারি হস্তে করিয়া, “দীন দীন” রবে অগ্রসর হইয়াছিল। তাহারা প্রথমতঃ বিচলিত হইল না। কয়েক ঘণ্টা কাল উভয় পক্ষে ঘোরতর যুদ্ধ হইল। ইংরেজসৈন্য সর্বপ্রকার যুদ্ধাস্ত্র লইয়া, সাহসের সহিত যুদ্ধ করিতে লাগিল। এ দিকে ধর্মোন্মত্ত গাজীগণও সাহস ও

পরাক্রমের পরিচয় দিতে বিমুখ হইল না। তাহারা কাফেরের শোণিতপাত করা আপনাদের ধর্মের অঙ্গ বলিয়া মনে করিয়াছিল, এই ধর্ম রক্ষার জন্ত তাহাদের উৎসাহ শতগুণে বৃদ্ধি পাইল। তাহারা কামানের মখে বুক পাতিয়া, নিভীকচিত্তে অস্ত্র চালাইতে লাগিল। শেষে তাহাদের বলক্ষয় হইল। তাহারা ইংরেজের অসীম শক্তিসম্পন্ন আগ্নেয়াস্ত্রের সম্মুখে স্থির থাকিতে না পারিয়া, আলীগড় পরিত্যাগ করিল। টেলিগ্রাফবিভাগে যে সকল ইউরোপীয় বালক কর্ম করিত, তাহারা এই যুদ্ধের সময়ে সবিশেষ সাহস ও কর্মপটুতার পরিচয় দিয়াছিল। এই বালকদিগের চেষ্টায় আলীগড় ও আগরার মধ্যে টেলিগ্রাফের তার ঠিক ছিল। একটি বালক পাল্কীগাড়িতে বসিয়া, যুদ্ধের সমস্ত বিবরণ আগরার দুর্গে পাঠাইয়াছিল।

আগরার কর্তৃপক্ষ দুর্গে অবস্থিতি করিয়া পার্শ্ববর্তী স্থানে আত্মপ্রাধান্য-স্থাপন ও গোলযোগনিবারণের জন্ত এইরূপ চেষ্টা করিয়াছিলেন। আলীগড়ের অভিযান তাঁহাদের সর্বপ্রধান ও সর্বশেষ চেষ্টা। তাঁহারা দুর্গের বহির্ভাগে থাকিতে সাহসী না হইলেও আপনাদের বসতিস্থানের চারি দিকে তীক্ষ্ণদৃষ্টি রাখিয়াছিলেন। যাহা হউক, অযোধ্যা এবং দিল্লীর বিষয় তাঁহাদের চিন্তনীয় হইয়াছিল। তাঁহারা বৃদ্ধ মোগল এবং নবাব ওয়াজিদ আলির রাজধানীতে কি ঘটতেছে, জানিবার জন্ত সাতিশয় উৎসুক হইয়াছিলেন। কিরূপে তাঁহাদের প্রগাঢ় উৎসুক্যের পরিতৃপ্তি হইয়াছিল, তাহা পরবর্তী বিবরণে পরিস্ফুট হইবে।

এই সময়ের মধ্যে লেফ্টেনেন্ট-গবর্নর কলবিন্ সাহেবের শারীরিক শক্তির সহিত মানসিক শক্তির ক্রমেই হীনতা ঘটতেছিল। এই জুলাই শাসিয়ার যুদ্ধে আপনাদের সৈনিকদলের পরাজয় এবং আগরার দুর্গে গমনের পর তিনি যেরূপ ভগ্নহৃদয়, সেইরূপ হতাশ্বাস হইয়া পড়িয়াছিলেন। গভীর দুশ্চিন্তা তাঁহার রোগজীর্ণ দেহের উপর সমধিক পরাক্রম প্রকাশ করিতেছিল। তিনি আগরার দুর্গে অপরূপভাবে ছিলেন। তাঁহার সম্মুখে দিল্লী উত্তেজিত সিপাহীদিগের অধিকারে ছিল, তাঁহার পার্শ্বভাগে লক্ষী তাঁহাদের প্রাধান্য হইতে পরিভ্রষ্ট হইয়াছিল, তাঁহার চারি দিকে প্রবল বিপক্ষগণ সংখ্যাধিক্যে ও যুদ্ধোপকরণে বল-সম্পন্ন হইয়া ইংরেজের শোণিতপাতের সুযোগ প্রতীক্ষা করিতেছিল। এইরূপে লেফ্টেনেন্ট-গবর্নরের দক্ষিণে ও বামে, অগ্রে ও পশ্চাতে বিপক্ষতার নিদর্শন

পরিচালিত হইতেছিল। লেফটেনেন্ট-গবর্নর ইহাতে ক্রমেই নিস্তেজ হইয়া পড়িতেছিলেন। কিন্তু তিনি যে সকল সহযোগীতে পরিবেষ্টিত ছিলেন, যে সকল বন্ধুর সহিত পরামর্শ করিয়া, বিপত্তিময় কর্মক্ষেত্রে অগ্রসর হইতেছিলেন, তাঁহাদের সমক্ষে আপনার কোনরূপ অবসন্নতা, কোনরূপ দুশ্চিন্তা বা কোনরূপ ঔদাস্য দেখাইতে ইচ্ছা করেন নাই। তাঁহার শাসনাধীন প্রদেশে প্রচণ্ড বিপ্লবের অভিঘাতে তদীয় সজাতিদিগের জীবন যেরূপ সংশয়াপন্ন হইয়া পড়িয়াছিল, দুশ্চিকিৎস রোগের আক্রমণে তাঁহার নিজের জীবনও সেইরূপ সংশয়দোলায় অধিক্রুত হইয়াছিল। ইহাতেও তাঁহার উদ্যমভঙ্গ হয় নাই, উৎসাহ বিলুপ্ত হইয়া যায় নাই বা শ্রমশীলতা অতুর্দ্বান করে নাই। তিনি প্রতিদিন শয্যা হইতে উঠিয়া, কর্তব্য কর্মে অভিনিবিষ্ট হইতেন। কর্তব্যসম্পাদনে তাঁহার কখনও আলস্য দেখা যায় নাই। কোনরূপ অনুরোধ, কোনরূপ প্রার্থনা, কোনরূপ হেতুবাদ, তাঁহার অমূল্য জীবন রক্ষার জন্ত, তাঁহাকে এইরূপ পরিশ্রম হইতে নিরস্ত করিতে পারে নাই। তাঁহার সহযোগীগণ যেরূপ কর্মপটু যেরূপ দূরদর্শী, সেইরূপ বিশ্বস্ত ছিলেন, তথাপি তিনি কর্ম হইতে বিরত হইতেন না। অতি সামান্য বিষয়েও তাঁহাকে সমান উদ্যমের সহিত পরিশ্রম করিতে দেখা যাইত। আগরার জজ রেইক্‌স সাহেব জুলাই মাসে লিখিয়াছিলেন যে, যদি তিনি অস্কাগার হইতে একখানি তরবারি বা একটি পিস্তল আনিতে চাহিতেন, তাহা হইলেও অনুমতিপত্রে লেফটেনেন্ট-গবর্নরের স্বাক্ষরের প্রয়োজন হইত। এইরূপ সকল বিষয়েই কল্বিন্ সাহেবের তীক্ষ্ণদৃষ্টি ছিল। কোন বিষয় তাঁহার নিকটে অপরিজ্ঞাতভাবে থাকিত না বা কোন বিষয় তাঁহার বিনা অনুমতিতে সম্পন্ন হইত না। তিনি কোন বিষয়ের সম্পাদনভার অপরের হস্তে দিতেন না এবং স্বয়ং কোন বিষয় সম্পাদনে কিছুমাত্র শৈথিল্য দেখাইতেন না। দিনের পর দিন অতিবাহিত হইত। প্রতিদিন তাঁহার রক্ষণীয় সুবিস্তৃত প্রদেশের কর্মচারীদিগের নিকট হইতে কখনও ফরাসী, কখনও বা গ্রীক ভাষায় লিখিত সাহায্যপ্রার্থনার পত্র আসিত। এই সকল অস্পষ্টলিপির উদ্ধার করিতে অনেক কষ্ট হইত। কিন্তু লেফটেনেন্ট-গবর্নর কষ্টস্বীকারে পরাঙ্গুথ ছিলেন না। তিনি যত্ন ও ধীরতার সহিত উক্ত লিপিগুলির পাঠোদ্ধার করিতেন এবং যত্ন ও ধীরতার সহিত সমুদয় বিষয় অবগত হইয়া যথাযোগ্য আদেশ দিতেন।

রোগজনিত অবসাদের সহিত এইরূপ গুরুতর পরিশ্রম এবং এইরূপ গভীর দুশ্চিন্তায় কল্বিন্ সাহেব ক্রমে জীবনের শেষ সীমায় উপস্থিত হইলেন। যাঁহারা এই বিপ্লবের সময়ে প্রধান রাজকীয় কর্মে নিয়োজিত ছিলেন, সুবিভূত জনপদ, বহুসংখ্য প্রজা, যাঁহাদের শাসন ও পালনের বিষয়ীভূত ছিল, তাঁহাদের কেহই উত্তরপশ্চিমপ্রদেশের লেফ্টেনেন্ট-গবর্নরের ঞায় হরদৃষ্টচক্রের আবর্তনে নিষ্পেষিত হয়েন নাই। লেফ্টেনেন্ট-গবর্নর একে রোগজীর্ণ হইয়াছিলেন, ইহার উপর তাঁহার শাসনাধীন প্রদেশে বিপ্লবের পূর্ণবিকাশ ঘটিয়াছিল। তিনি এক বিভাগের পর অত্র বিভাগ আপনার হস্ত হইতে স্থলিত হইতে দেখিতেছিলেন, তিনি সজাতির ও স্বধর্মের শত শত স্ত্রী, পুরুষ, বালক, বালিকার নিধনের বিষয় অবগত হইতেছিলেন, তিনি প্রতিমুহূর্ত্তে অধীন লোককে অসংসাহসিক কার্য্যসাধনে ব্যাপ্ত হইতে দেখিয়াছিলেন, কিন্তু তিনি ইহার কোনরূপ প্রতীকারের সমর্থ হয়েন নাই। তাঁহার অধিকৃত জনপদ বিপক্ষের আক্রমণ হইতে বিমুক্ত হয় নাই। তাঁহার সজাতির বা স্বধর্মের লোকেও বিপক্ষের হস্ত হইতে পরিত্রাণ পায় নাই। ভিন্ন ভিন্ন স্থান হইতে অনেকে জীবনরক্ষার জন্ত নিরতিশয় শোচনীয় ভাবে তাঁহার সমক্ষে উপস্থিত হইয়াছিল। তিনি ইহাদিগকে অপেক্ষাকৃত সুখে ও শান্তিতে রাখিবার জন্ত চিন্তাশ্রিত হইয়াছিলেন। এইরূপে সকল বিষয়ই তাঁহার অনন্ত দুর্ভাগ্যের পরিচয় দিতেছিল। তিনি ছই এক বার আফিসরদিগের সমাধির সময়ে উপস্থিত হইয়াছিলেন। তিনি চিকিৎসালয় দেখিতে যাইতেন, দুর্গপ্রাচীরে পরিভ্রমণ করিতেন, সকলের প্রতি সদয়ভাব প্রদর্শন এবং সকলের সহিত শিষ্টতাসহকারে আলাপ করিতেন, কিন্তু এইরূপ পরিদর্শন, পরিভ্রমণ ও কথোপকথনকালে তিনি যথোচিত আদরলাভ করিতেন না। অনেকে তাঁহার প্রতি অসম্মান প্রকাশ না করিলেও, অসৌজন্ত প্রদর্শন করিত, অনেকে নানারূপ ভৎসনা করিয়া তাঁহার নিকটে পত্র লিখিত। তাঁহার বাক্স এইরূপ কুৎসাপূর্ণ পত্রসমূহে প্রায়ই পরিপূর্ণ থাকিত। তিনি যাঁহাদিগের উপর কর্তৃত্ব করিতেন, যাঁহারা তাঁহার আদেশে পরিচালিত হইতেন, তাঁহার ইচ্ছায় পদচ্যুত হইতেন বা পদলাভ করিতেন, তাঁহারাই এইরূপ অসৌজন্ত প্রকাশ ও ভৎসনা করিয়া, এই দুঃসময়ে তদীয় মানসিক শান্তি বিনষ্ট করিতে অগ্রসর হইয়াছিলেন। কিন্তু তাঁহাদের চেষ্টা ফলবতী হয় নাই। লেফ্টেনেন্ট-গবর্নর আপনার অধীন

কর্মচারীদিগের কঠোর ভৎসনায় স্বকীয় প্রশান্তভাবে বিসর্জন দেন নাই। তিনি অসামান্য শক্তিসম্পন্ন পুরুষ ছিলেন। শারীরিক শক্তির সহিত মানসিক শক্তি সম্মিলিত হওয়াতে তিনি কোন বিষয়েই অবনত, কোন বিষয়েই পরাভুখ এবং কোন বিষয়েই অস্থির হইতেন না। এখন নিয়তির অপরিবর্তনীয় বিধানে এই শক্তিসম্পন্ন পুরুষের শক্তিহাস হইল। তিনি আগরার প্রান্তভাগে দুর্গাভ্যন্তরে বাস করিতে বাধ্য হইলেন। স্থানান্তর হইতে তাঁহার সাহায্যপ্রাপ্তির কোন আশা রহিল না। অধীন কর্মচারিগণ তৎপ্রতি অসন্তোষ ও বিরক্তির একশেষ দেখাইতে লাগিলেন। তাঁহার চারি দিকে যে করালকাদম্বিনী বিভীষিকাময়ী ছায়া বিস্তার করিতেছিল, তাহা ক্রমে গাঢ়তর হইয়া উঠিল। তিনি সন্তুষ্ট সন্তানের গায় একান্ত নিঃসহায় ও নিরবলম্ব হইয়া সেই সর্বলোক-পালক ভগবানে আত্মসমর্পণ করিলেন। চিকিৎসকগণ তাঁহার শারীরিক অবস্থা নিতান্ত মন্দ দেখিয়া, তাঁহাকে সর্বপ্রকার পরিশ্রমে বিরত থাকিতে অনুরোধ করিলেন। কিন্তু এই অনুরোধ রক্ষিত হইল না। লেফটেনেন্ট-গবর্নর পরিশ্রমে বিরত হইলেন না। তাঁহাকে কয়েককালের জন্ত দুর্গ হইতে সৈনিকনিবাসে লইয়া যাওয়া হইল, এইরূপ পরিবর্তনে কিয়দংশে উপকার হইল বটে, কিন্তু লেফটেনেন্ট-গবর্নর পুনর্কার কার্যে প্রবৃত্ত হইলেন। তিনি জানিতেন, তাঁহার অন্তিম কাল আসন্ন হইয়াছে। তিনি যে দেশে জন্ম গ্রহণ করিয়াছিলেন, মানসপটে যে দেশের মনোমোহন দৃশ্য অঙ্কিত করিয়া পুলকিত হইতেন, সেই প্রিয়তম স্বদেশের সন্দর্শনলাভ তাঁহার অদৃষ্টে ঘটবে না। তিনি ইহা জানিয়াই স্বকীয় কর্মক্ষেত্রে কর্মশীল পুরুষশ্রেষ্ঠের গায় দেহত্যাগে কৃতসঙ্কল্প হইলেন। সেপ্টেম্বর মাসের প্রারম্ভে তিনি রেইকস্ সাহেবকে উত্তরপশ্চিম-প্রদেশের পুলিশের সংস্কার সম্বন্ধে নিয়ম নির্দেশ করিতে আদেশ দেন। ৭ই তারিখ রেইকস্ সাহেব এ বিষয়ে আলাপ করিবার জন্ত তাঁহার গৃহে উপস্থিত হইলেন। কিন্তু তিনি যাইয়া দেখেন যে, লেফটেনেন্ট-গবর্নর সাতিশয় পীড়িত হইয়া পড়িয়াছেন। কল্বিন্ সাহেব রোগের এই আক্রমণ হইতে মুক্তিলাভ করিতে পারেন নাই। ৯ই সেপ্টেম্বর তিনি সর্বদর্শী ভগবানের নাম উচ্চারণ করিতে করিতে প্রশান্তভাবে দেহত্যাগ করেন। যিনি গঙ্গাযমুনার তীরবর্তী সুবিস্তৃত জনপদের শাসন ও পালনে নিয়োজিত হইয়াছিলেন, অন্তিমশয়্যায় থাকিবার

জগ্নু দুর্গের বহির্ভাগে একটুকু স্থানলাভ তাঁহার অদৃষ্টে ঘটে নাই । ১০ই সেপ্টেম্বর দুর্গপ্রাচীরের অভ্যন্তরে তাঁহার সমাধি হয় । লর্ড কানিং তাঁহার মৃত্যুতে গভীর শোক প্রকাশপূর্বক বিজ্ঞাপন প্রচার করেন । কলিকাতা, মাদ্রাজ, বোম্বাই প্রভৃতি স্থানে তাঁহার প্রতি সম্মান প্রদর্শনের জগ্নু নির্দিষ্ট দিনে ব্রিটিশ জাতির চিরজয়ী পতাকা অবনত এবং সতর বার তোপধ্বনি করিতে আদেশ দেওয়া হয়\* । এইরূপে ইংলণ্ডের এক জন প্রধান কর্ম্মবীরের দেহত্যাগ হয় । ইতিহাস তাঁহার সম্মানরক্ষায় উদাসীন থাকে নাই । যিনি অন্তিমকালে সজাতির অনেকের নিকটে ধিকৃত ও তিরস্কৃত হইয়াছিলেন, ইতিহাস তাঁহাকে বীরেন্দ্র-সমাজের বরণীয় রণবিজয়ী বীরপুরুষ অপেক্ষাও উচ্চাসনে স্থাপিত করিয়া, তদীয় গৌরবঘোষণায় প্রবৃত্ত হয় ।

\* Calcutta Gazette, Extraordinary. Notification, September 19, 1857.



## পঞ্চম অধ্যায় ।

### লক্ষ্মী—অযোধ্যা ।

অযোধ্যার অবস্থা—লোকের দুশ্চিন্তা—ভূস্বামিসম্প্রদায়—নবাববংশীয়দিগের দুর্দশা—  
সৈনিকদল—জনসাধারণের অবস্থা—লক্ষ্মী রক্ষার বন্দোবস্ত—সৈনিকনিবাসে সিপাহীদিগের  
বিক্রমচারণ—অযোধ্যার ভিন্ন ভিন্ন বিভাগে গোলযোগ—সীতাপুর—মুলাওন—মোহমদী—  
শাহজাহানপুরের পলাতকদিগের নিধন—ফৈজাবাদ—সুলতানপুর—বহরইচ্—সিক্রোরা—  
গণ্ডা—মোজাপুর—দরৌয়াবাদ—কাচানীর পলাতকদিগের অবস্থা ।

উপস্থিত সময়ে ভারতের এক প্রান্ত হইতে অপর প্রান্ত পর্য্যন্ত সমগ্র  
প্রদেশের মধ্যে বহুবিস্তৃত ও বহুসমৃদ্ধিপন্ন অযোধ্যা ব্যতীত আর কোন প্রদেশ  
ব্রিটিশরাজপুরুষদিগের অধিকতর দুশ্চিন্তা বা অধিকতর আশঙ্কার উৎপত্তি করে  
নাই । অযোধ্যা বাঙ্গালার সিপাহীদিগের বসতিস্থল । সিপাহীগণ ইংরেজ  
বীরপুরুষদিগের নিকটে শিক্ষিত হইয়া, ইংরেজের কার্যসাধনে রণক্ষেত্রে অসঙ্কু-  
চিতচিত্তে আত্মোৎসর্গ করিয়া থাকে । তাহারা যখন দেশান্তরে অবস্থিতি  
করে, ইংরেজের বিপক্ষদিগের সহিত যুদ্ধ করিতে যখন প্রস্তুত হইতে থাকে,  
ইংরেজ অধিনায়কের আদেশ অনুসারে যখন দুর্গম অরণ্য, ছুরারোহ পর্বত,  
দুস্তর তরঙ্গিনী অতিক্রম করে, তখন গরীয়সী জন্মভূমির বিষয় তাহাদের মানস-  
পট হইতে অন্তর্হিত হয় না । তাহারা স্বদেশের কথায় পুলকিত হয়, আত্মীয়  
স্বজন স্বদেশে নিরাপদে সুখশান্তিতে অবস্থিতি করিতেছে শুনিয়া, নিশ্চিন্ত হয়,  
এবং আপনাদের বহুপরিশ্রমলব্ধ যৎসামান্য সম্পত্তি স্বদেশে সুরক্ষিত রহিয়াছে  
জানিয়া, বিদেশী প্রভুর আদেশপালনে অধিকতর উৎসাহসম্পন্ন হইয়া উঠে ।

বাঙ্গালার সিপাহীদিগের এই প্রিয়তম বাসভূমি—ধনধাত্তে পরিপূর্ণ এই  
সুবিস্তৃত প্রদেশ কিরূপে ইংরেজের হস্তগত হইয়াছে, ইহার অধিপতি নবাব  
ওয়াজিদ আলি কিরূপে আপনার দুর্দৃষ্টের নিকটে মস্তক অবনত করিয়াছেন,  
তাহা উপস্থিত গ্রন্থের প্রথম ভাগে বিবৃত হইয়াছে । ইংরেজ, অযোধ্যা অধিকার  
করিবার যে কোন হেতু প্রদর্শন করুন না কেন, তাহাদের শাসনে অযোধ্যার

সুখশান্তি ও সমৃদ্ধির যতই বৃদ্ধি হউক না কেন, অযোধ্যা পূর্বতন অধিপতি-দিগের আধিপত্য হইতে পরিভ্রষ্ট হওয়াতে ভারতের ভিন্ন ভিন্ন শ্রেণীর লোকের হৃদয় বিচলিত হইয়াছিল। এই ঘটনায় হিন্দু ও মুসলমান, সমভাবে শঙ্কিত হইয়া উঠিয়াছিল। ইহাতে ভারতের অধিপতিগণ বিরক্ত হইয়াছিলেন, যেহেতু তাঁহারা দেখিয়াছিলেন যে, গবর্ণমেন্টের প্রতি যতই অনুরাগ প্রকাশ করা যাউক না কেন—ঋণস্বরূপ অর্থ দিয়াই হউক, যুদ্ধের সময়ে সৈন্ত দিয়াই হউক, অথবা অন্য কোন রূপেই হউক, যে ভাবেই গবর্ণমেন্টের সাহায্য করা হউক না কেন, গবর্ণমেন্ট আপনাদের সুবিধা বুঝিয়া, অপরকে চিরন্তন সম্পত্তি হইতে বিচ্যুত করিতে বা অপরের অধিকৃত জনপদ স্বকীয় অধিকারে আনিতে কিছু মাত্র কুণ্ঠিত হইবেন না। ইহা ভূসম্পত্তিশালীদিগের বিরাগের কারণ হইয়াছিল, যেহেতু তাঁহারা বুঝিয়াছিলেন যে, গবর্ণমেন্টের অভিনব বিধান অনুসারে তাঁহারা সম্পত্তির অর্দ্ধাংশ বা উহা অপেক্ষা অধিক ভাগ হইতে সহসা পরিভ্রষ্ট হইতে পারেন। ইহা সম্ভ্রান্ত মুসলমানদিগের বিরাগের হেতু হইয়াছিল, যেহেতু তাঁহারা ভাবিয়াছিলেন যে, গবর্ণমেন্টের আদেশে তাঁহাদের সজাতির ও স্বদেশের ভূপতিগণ এইরূপে পদভ্রষ্ট হইলে, ঐ সকল ভূপতির আধিপত্যকালে তাঁহাদের যে সকল অধিকার ছিল, তৎসমুদয় বিলুপ্ত হইয়া যাইবে। ইহা নবাবের সৈনিক-দিগকে ব্রিটিশ গবর্ণমেন্টের উপর বিরক্ত করিয়া তুলিয়াছিল, যে হেতু তাহারা দেখিয়াছিল যে, তাহাদের পরিবারবর্গ নবাবের সরকার হইতে যে সাহায্য পাইত, তাহা বন্ধ হইয়া গেল। ইহাতে ব্রিটিশ গবর্ণমেন্টের অযোধ্যাবাসী সিপাহীগণ একান্ত বিরক্ত হইয়া উঠিয়াছিল, যেহেতু তাহারা দেখিয়াছিল যে, এত দিন নবাব বহুসহকারে তাহাদের পরিবারবর্গের রক্ষণাবেক্ষণ করিতেন, তাহারা বিদেশে থাকিলেও অস্বীয়স্বজনের ভাবনায় ব্যাকুল হইত না, কোনরূপ অনিষ্টের প্রতীকার করিতে হইলে তাহারা ব্রিটিশ রেসিডেন্ট দ্বারা আপনাদের আবেদনপত্র লক্ষ্মীর দরবারে পাঠাইত; গবর্ণমেন্টের সহিত মিত্রতাহেতু নবাব, গবর্ণমেন্টের সিপাহীদিগের প্রার্থনাপূরণে অধিকতর মনোযোগী হইতেন; এখন তাহাদের এইরূপ সুবিধা অন্তর্হিত হইল। ইহা অযোধ্যার কৃষকসম্প্রদায় ও শ্রমজীবীগণের অসন্তোষের কারণ হইয়াছিল, যেহেতু তাহারা ভাবিয়াছিল যে, নবাবের শাসনপ্রণালী যেরূপই হউক না কেন, এত দিন তাহারা করভারে নিপীড়িত

হয় নাই, এখন ইংরেজের অধিকারে তাহাদিগকে নানারূপ কর দিতে হইবে । সংক্ষেপে অযোধ্যাধিকারে উচ্চ হইতে নিম্নশ্রেণীর লোক পর্য্যন্ত, সকলেই একরূপ অসন্তোষ ও অশান্তির তীর জ্বালায় দগ্ন হইতেছিল\* ।

ইংরেজ বিনা বাধায় একটি বহুবিস্তৃত ও বহুসম্পত্তিপূর্ণ প্রদেশের অধিপতিকে যখন আপনাদের ভারতসাম্রাজ্যের রাজধানীর প্রান্তভাগে নির্বাসিত করিলেন, তখন অযোধ্যাবাসাদিগের বিশ্বয়ের অবধি রহিল না । তাহারা ব্রিটিশসিংহের অসীম প্রতাপ ও অনন্ত প্রাধান্য মনে করিয়া স্তম্ভিত হইয়া রহিল । পক্ষান্তরে নবাবের পদচ্যুতিতে তাহাদের ক্ষোভের সীমা রহিল না । নবাব অযোধ্যাবাসীদিগের প্রিয় ছিলেন । তাঁহার দুর্বলতা, তাঁহার স্বার্থপরতা, তাঁহার অমিতাচার যাহাই হউক না কেন, প্রজাবর্গ রাজা বলিয়া, তৎপ্রতি ভক্তিসহকৃত অনুরাগের পরিচয় দিত । নবাবের শাসনপ্রণালী যথেষ্টচারমূলক হইলে ও তাহারা অসন্তোষ প্রকাশ করে নাই এবং উহাতে তাহাদের কোনরূপ অসুবিধাও ঘটে নাই । তাহারা এইরূপ শাসনপ্রণালীর বিষয়ে অভ্যস্ত ছিল, এবং অভ্যাস অনুসারে উহাতে সন্তুষ্ট থাকিয়া, সংসারযাত্রা নির্বাহ করিত । অধিকন্তু নবাবের আধিপত্যকালে অনেকের গ্রামাচ্ছাদনের কোনরূপ কষ্ট ছিল না । যাহারা নবাবের আশ্রিত অনুগত বা নবাবের সহিত কোনরূপ অশ্রীয়তাসূত্রে সম্বন্ধ ছিলেন, তাঁহারা লক্ষ্যের দরবার হইতে নিয়মিতরূপে অর্থ পাইতেন । নবাবের পদচ্যুতির সহিত এই সকল লোকের অদৃষ্টচক্র পরিবর্তিত হইল । ইহাদের কোনরূপ সাহায্যদাতা রহিল না । ইহাদের কষ্টমোচনে কেহই চেষ্টা করিল না । সহসা ছরবস্থার ভয়ঙ্কর আবর্তে নিপতিত ও ঘূর্ণ্যমান হওয়াতে, ইহাদের শোচনীয়ভাবে অবধি থাকিল না । ইহারা নিদারুণ দারিদ্র্যে নিপীড়িত, দুঃসহ কষ্টে মর্মান্বিত, শোচনীয় মলিনভাবে একান্ত অবসন্ন হইয়া, আপনাদের অমূল্য জীবনরক্ষার অধিতীয় অবলম্বন—অন্ন—কেবল একমুষ্টি অন্নের জগ্ন কাতরভাবে নয়নজলে বক্ষঃস্থল প্লাবিত করিতে লাগিলেন । যে সকল স্ত্রীপুরুষ বংশমর্যাদার সম্মানিত ছিলেন, সুখসৌভাগ্যে কালযাপন করিতেন,

\* সিপাহীযুদ্ধের ইতিহাসলেখক কর্নেল মালিসন্ এ সম্বন্ধে এই ভাবে অভিমত প্রকাশ করিয়াছেন ।—*Malleson, Indian Mutiny. Vol. I. p. 348-349.*

সর্বদা নানারূপ বিলাসদ্রব্যে পরিব্রত থাকিতেন, তাঁহারা সহস্র দারিদ্র্যতরঙ্গ-সঙ্কুল ভয়াবহ সংসারসাগরে নিমজ্জিত হইলেন । তাঁহারা কাতরভাবে চারি দিকে হস্ত প্রসারণ করিতে লাগিলেন, কিন্তু কোনরূপ অবলম্বন তাঁহাদের হস্তগত হইল না । তাঁহাদের কেহ কেহ শাল, বনাত ও অন্যান্য মৃদ্যবান্ দ্রব্য বিক্রয়-পূর্বক অন্ন সংস্থান করিতে লাগিলেন, কেহ কেহ উদরজালায় অস্থির হইয়া, ভিক্ষাবৃত্তি অবলম্বন করিলেন । \* ইঁহাদের ছুরবস্থা দর্শনে সদাশয় ইংরেজ রাজ-পুরুষের হৃদয় দয়াদ্র হইয়াছিল । অযোধ্যার রাজস্বসংক্রান্ত কমিশনের গাবিন্স সাহেব এ সম্বন্ধে এই ভাবে লিখিয়া গিয়াছেন—“বোধ হয় অযোধ্যার সম্রাটবংশীয়গণ এবং নবাবের বহুসংখ্যক আত্মীয়স্বজন অধিকতর সমবেদনার পাত্র ছিলেন । ইঁহারা নবাবের সরকার হইতে বৃত্তি পাইতেন । আমাদের আধিপত্য প্রতিষ্ঠিত হইলে এই বৃত্তির লোপ হয় । গবর্ণমেন্ট ইঁহাদের সাহায্যের জন্ত অর্থদানের ব্যবস্থা করিয়াছিলেন বটে, কিন্তু এ বিষয়ে যথোচিত অনুসন্ধান-পূর্বক দানের প্রকৃত পাত্রদিগের নামের তালিকা প্রস্তুত করা আবশ্যক হইয়াছিল । এইরূপ প্রয়োজনের অনুরোধে অযথা বিলম্ব ঘটে । এ দিকে উপায়হীন সম্রাটবংশীয়গণ আপনাদের ভরণপোষণের জন্ত নিরতিশয় কষ্টে নিপতিত হইলেন । আমরা জানিতে পারিয়াছি যে, যঁহারা কখন অন্তঃপুর হইতে বহির্গত হইলেন নাই, তাঁহারা রাত্রির অন্ধকারের মধ্যে সর্বসমক্ষে আত্মগোপনপূর্বক ভিক্ষা করিয়াছেন” । † রাজস্বকমিশনের এইরূপ স্পষ্টবাদিতা এইরূপ সত্যপ্রিয়তার পরিচয় দিয়াছেন এবং অপরের শোচনীয় অবস্থায় একান্ত মর্মান্বিত হইয়া, আত্ম-শ্লাঘার বাসনা এইরূপে সংযত রাখিয়াছেন । ফলতঃ ইংরেজের আধিপত্যে এই সকল লোকের অধঃপতন ও অবমাননার একশেষ ঘটিয়াছিল । পক্ষান্তরে দরিদ্র লোকেরও সাতিশয় কষ্ট হইয়াছিল । লক্ষ্মীর অবরোধের ইতিহাসলেখক রীড সাহেব এ সম্বন্ধে এইভাবে লিখিয়া গিয়াছেন—“তাঁহাদের ( অযোধ্যাবাসীদের ) অনুরাগপ্রাপ্তির জন্ত আমরা অতি অল্প কার্য্যই করিয়াছি । বিরাগবৃদ্ধির জন্তই অনেক করা হইয়াছে । নবাবের রাজত্বে সহস্র সহস্র লোকে সম্রাট ভূস্বামী ও নবাব বংশীয়দিগের ব্যবহারের নিমিত্ত নানাবিধ শিল্পদ্রব্য প্রস্তুত করিত ।

\* *Kaye, Sepoy War, Vol. III, p. 419.*

† *Gubbins, Mutinies in Oudh, p. 78.*

কারুকার্যখচিত পাগড়ী, হুকা, জুতা প্রভৃতি সর্বদা বিক্রীত হইত । নবাবের আধিপত্যলোপের সহিত এই নিরীহ শিল্পীদিগের কার্য বন্ধ হয় । জনসাধারণ বিশেষতঃ দরিদ্রগণ আমাদের উপর অসন্তুষ্ট হইয়াছে, যেহেতু তাহারা সকল দিকে সাক্ষাৎ বা পরম্পরা সম্বন্ধে করভারে নিপীড়িত হইয়া পড়িয়াছে\*”। ব্রিটিশ গবর্ণমেন্ট অযোধ্যাবাসীদিগের এইরূপ দুঃবস্থার মোচনে ইচ্ছা করিয়াছিলেন বটে, কিন্তু সর্বপ্রথম তাঁহাদের ইচ্ছানুসারে যথোপযুক্ত কার্যের অনুষ্ঠান হয় নাই । যত দিন নবাবের আধিপত্য ছিল, এক নবাবের পর অল্প নবাব যত দিন শাসনদণ্ডের পরিচালনা করিতেছিলেন, ততদিন আশ্রিত ও অনুগত লোকে বৃত্তিভোগ করিত । এই বৃত্তিভোগীদিগের সংখ্যার স্থিরতা ছিল না ; বৃত্তিদানের ধারাবাহিক কোন নিয়মও বিধিবদ্ধ ছিল না । নানা লোকে নানারূপে বৃত্তিভোগ করিত । ইংরেজ যখন অযোধ্যা অধিকার করেন, তখন তাঁহারা সবিশেষ সম্বরণসহকারে এ বিষয়ের শৃঙ্খলা করিয়া উঠিতে পারেন নাই । যাহারা নবাধিকৃত প্রদেশের শাসনসংক্রান্ত কর্মে নিয়োজিত ছিলেন, সম্রাটসম্প্রদায়ের প্রতি তাঁহাদের তাদৃশ সমবেদনা পরিলক্ষিত হয় নাই । তাঁহারা বোধ হয় অযোধ্যার পেন্সনের তালিকার বিষয় কেবল কাগজেই আবদ্ধ রাখিতে ইচ্ছা করিয়াছিলেন, উহা যে কার্যে পরিণত হইয়া নিঃসহায় নিরবলম্বদিগের অন্নবস্ত্র-সংস্থানের সম্বল হইবে, ইহা তাঁহাদের উদ্বোধ হয় নাই । যাহারা কার্যে অসামর্থ্য প্রকাশ করিয়াছিল, তিক্ষা করিতে লজ্জিত ছিল, নৈরাশ্রে মর্ন্যাহত হইয়াছিল, তাহাদের জীবনমরণ সম্বন্ধে ইংরেজ রাজপুরুষগণ সর্বপ্রথম নিশ্চেষ্ট-ভাবের পরিচয় দিয়াছিলেন । কিন্তু স্যার হেনরি লরেন্স, ১৮৫৭ অব্দের ২০শে মার্চ অযোধ্যার প্রধান কমিশনরের কার্যভার গ্রহণপূর্বক এ বিষয়ে উদাস্ত প্রকাশ করেন নাই । উদারতায় তাঁহার প্রকৃতি উন্নত ছিল, সমবেদনায় তাঁহার হৃদয় কোমলতর হইয়াছিল, কর্তব্যপরায়ণতায় তাঁহার উৎসাহসহকৃত সংকার্য-প্রবৃত্তি শতগুণে বৃদ্ধি পাইয়াছিল । সুতরাং যাহারা এক সময়ে সুখসৌভাগ্যে কালযাপন করিতেন, সহসা তাঁহাদের শোচনীয় অধঃপতন দেখিয়া, তিনি উহার প্রতীকারে উত্তত হইয়াছিলেন । অযোধ্যার শাসনভার গ্রহণের পরেই তিনি

\* Rees, *Seige of Lucknow*, p. 34. Comp. Gubbins, p. 78.

এ সময়ে যাবতীয় কাগজপত্র সংগ্রহ করিতে উদ্যত হইলেন, এবং সদয়ভাবে দুর্দশাগ্রস্ত ব্যক্তিদিগকে শীঘ্র শীঘ্র বৃত্তি দেওয়া হইবে বলিয়া, আশ্বাস দেন । কিন্তু অযোধ্যা অধিকারের প্রায় চৌদ্দ মাস পরে তিনি অভিনব কর্মক্ষেত্রে প্রবেশ করিয়াছিলেন । স্মৃতরাং তাঁহার প্রস্তাবিত মহৎকর্মের অনুষ্ঠানে বহু বিলম্ব ঘটয়াছিল । ইহার মধ্যে সম্ভ্রান্ত সম্প্রদায় অধঃপতনের ফলভোগ করিয়া-  
ছিলেন, দুঃসহ কষ্টে নিপীড়িত হইয়াছিলেন এবং ইংরেজকে আপনাদের এইরূপ অধঃপতনের কারণ মনে করিয়া, তাঁহাদের উপর বিরক্ত ও বিদ্বিষ্ট হইয়া উঠিয়াছিলেন ।\*

পদচ্যুত নবাবের আত্মীয়স্বজন কেবল দারুণ দুর্দশাগ্রস্ত হইলেন নাই । অযোধ্যার সম্ভ্রান্ত সম্প্রদায় কেবল আপনাদের দুঃসহ কষ্টের ফল ভোগ করেন নাই । জনসাধারণ কেবল দারিদ্র্যে মগ্ন হইত ও করভারে অবসন্ন হইয়া উঠে নাই । ইহারা যখন শোচনীয় ভাবে দিনপাত করিতেছিল, নবাবের পদচ্যুতিতে যখন দীর্ঘনিশ্বাস পরিত্যাগপূর্বক অভিনব শাসনকর্তার প্রতি একান্ত বিদ্বিষ্ট হইয়াছিল, তখন আর এক সম্প্রদায়ও ইহাদের ঞ্চায় ব্রিটিশ গবর্ণমেন্টের প্রতি বিরক্তি-প্রকাশে উন্মুখ হইয়াছিলেন । অযোধ্যায় ইঁহাদের প্রভূত সম্মান ছিল, । ভূসম্পত্তি ও অর্থের বলে ইঁহাদের ক্ষমতা বৃদ্ধি পাইয়াছিল । পুরুষানুগত স্বভে ইঁহাদের প্রগাঢ় ক্ষমতা ও আস্থা ছিল । ইঁহারা যেরূপ ক্ষমতাপন্ন, যেরূপ সম্পত্তিশালী, যেরূপ সম্মানিত, সেইরূপ তেজস্বী, দৃঢ়তাসম্পন্ন ও জনসাধারণের আদরনীয় ছিলেন । চিরপ্রসিদ্ধ রাজপুত্র জাতি হইতে এই সম্প্রদায়ের উদ্ভব হইয়াছিল । ক্রমে লক্ষ্মীদরবারের উচ্চপদস্থ হিন্দু ও মুসলমান কর্মচারীদিগের বংশধরগণ ইঁহার অন্তর্ভুক্ত হইয়াছিলেন ।

অযোধ্যার এই সম্মানিত সম্প্রদায় তালুকদার নামে প্রসিদ্ধ । ব্রিটিশ গবর্ণমেন্ট যখন অযোধ্যার শাসনভার গ্রহণ করেন, তখন তালুকদারী স্বত্ব তাঁহাদের মনোযোগের বিষয়ীভূত হয় । গবর্ণমেন্টের কর্মচারীগণ এই সময়ে সকলকে এক সমভূমিতে আনয়ন করিতে উদ্যত হইয়াছিলেন । অযোধ্যার তালুকদারগণ ইঁহাদের উদ্যমের লক্ষ্যভ্রষ্ট হইলেন নাই । অযোধ্যার সম্ভ্রান্ত

\* *Kaye, Sepoy War, Vol. III, p. 421.*

ভূস্বামীদিগের উপর ইঁহাদের কিছুমাত্র মমতা বা শ্রদ্ধা ছিল না। ইঁহারা সাম্যবাদের বশবর্তী হইয়া, এই ভূস্বামিগণের উচ্ছেদসাধনে কৃতসঙ্কল্প হইয়াছিলেন। ইঁহারা তালুকদারগণকে অত্যাচারকারী বলিয়া নির্দেশ করিতেন। কর্ণেল স্টিমান্ অযোধ্যাভ্রমণবৃত্তান্ত গ্রন্থে তালুকদারদিগের দৌরাভ্যা ও উচ্ছৃ-  
 জ্বলভাবের বিষয় বিবৃত করিয়াছেন।\* এই ভূস্বামিসম্প্রদায়ের কার্যপ্রণালী সম্বন্ধে ইংরেজ রাজপুরুষগণ প্রশংসা করেন নাই। স্মৃতরাং ইঁহাদের স্বত্বনাশ-  
 কালেও কেহ কোনরূপে ক্ষুব্ধ হইতেন নাই। যাহারা ইঁহাদের অধীনতা স্বীকার  
 করিয়া যথানিয়মে কর দিত এবং উহার বিনিময়ে নির্দিষ্ট ভূসম্পত্তি ভোগ  
 করিত, গবর্ণমেন্ট সেই পল্লীসমাজের সহিত সাক্ষাৎসম্বন্ধে ভূমির বন্দোবস্ত  
 করেন। তালুকদারগণ স্বত্বচ্যুত হওয়াতে গবর্ণমেন্টের উপর নিরতিশয় বিরক্ত  
 হইয়া উঠেন। তাঁহারা রাজার শ্রেণীতে নিবেশিত ছিলেন। আপনাদের  
 তালুকে তাঁহাদের অপ্রতিহত ক্ষমতা ছিল। অধিকৃত পল্লীসমূহ হইতে তাঁহাদের  
 প্রচুর অর্থাগম হইত। সহসা তাঁহাদের এইরূপ ক্ষমতা, এইরূপ অর্থাগমের  
 উপায় বিলুপ্ত হয়।†

তালুকদারগণ ক্ষমতাহ্রষ্ট হইলেও ব্রিটিশ গবর্ণমেন্টের আশঙ্কার কারণ  
 অন্তর্হিত হয় নাই। গবর্ণমেন্টের কর্মচারিগণের সম্বন্ধে তালুকদারগণ  
 দৌরাভ্যাকারী বলিয়া প্রতিপন্ন হইয়াছিলেন। উক্ত কর্মচারিগণ এই দৌরাভ্যা-  
 দমনে কৃতসঙ্কল্প হইয়া তালুকদারদিগকে অধিকারহ্রষ্ট করিয়াছিলেন। কিন্তু  
 তালুকদারগণ বহুসংখ্যক অনুচরে পরিবৃত থাকিতেন। এই সকল অনুচর  
 সশস্ত্র ও যুদ্ধকর্ম অভ্যস্ত ছিল। অযোধ্যার চিরপ্রসিদ্ধ ও চিরমাতৃ ভূস্বামিগণ  
 ইঁহাদের সাহায্যে ব্রিটিশ গবর্ণমেন্টের বিরুদ্ধাচরণে অসমর্থ ছিলেন না। সশস্ত্র  
 অনুচরব্যতীত ইঁহাদের জঙ্গলপরিবেষ্টিত, মুগ্ধর দুর্গ ছিল। দুর্গপ্রাচীরে  
 কামান সকল মারাত্মক কার্যসাধনের জন্ত স্থাপিত রাখিয়াছিল। এই সকল  
 কামান দমদমা ও মীরাতের সুশিক্ষিত গোলন্দাজদিগের তাদৃশ ভীতিজনক  
 না হইলেও, অনিষ্টকর কর্মের অনুপযোগী ছিল না। ইংরেজ এখন এই আশঙ্কার

\* Sleeman, *Journey, through the kingdom of Oude*. 2 Vols.

† Syed Ahmed Khan, *Causes of the Indian Revolts*, p. 30.

কারণের উচ্ছেদে উত্তত হইলেন । দুর্গ হইতে কামান সকল অপসারিত, দুর্গের চারি দিকের জঙ্গল পরিষ্কৃত, সশস্ত্র অনুচরগণ নিরস্ত্রীকৃত ও দলভ্রষ্ট হইল । ইহাতে তালুকদারদিগের অধিকতর বিরাগ ও বিদ্বেষের উদ্ভেকের সহিত প্রতিহিংসা প্রবৃত্তি বলবতী হইয়া উঠিল । এইরূপে বহুসংখ্য অনুচরগণে, একটি বিদ্বেষপর সম্প্রদায়ের সংখ্যাবৃদ্ধির সহিত বলবৃদ্ধি হইতে লাগিল । স্থূলদৃষ্টিতে, নিরস্ত্রীকরণ দ্বারা সর্বপ্রকার বিপদের উন্মূলন হইল বলিয়া, বোধ হইতে পারে । কিন্তু যাহারা সমধিক কার্যাদক্ষ, তাহারা নিরস্ত্রীকৃত হইলেও প্রতিপক্ষের বিঘ্নশাস্তি হয় না । আজ যাহারা নিরস্ত্র হইল, সময়ান্তরে তাহারা ই সশস্ত্র হইয়া বিপক্ষের শোণিতপাতে উত্তম ও সাহস দেখাইতে পারে । সর্বসংসাধারিত্রী কোন দ্রব্যই আপনার বক্ষোদেশে গুপ্তভাবে রাখিতে কাতর হইয়েন না । ভয়ঙ্কর গৌহাত্তগুলি পৃথিবীর বক্ষঃস্থলে গোপনে রাখিয়া, প্রয়োজন অনুসারে তৎসমুদয় উহার নিকট হইতে ফিরাইয়া লওয়া যাইতে পারে । এই সকল অস্ত্র অবনীর বায়ুরহিত ও আলোকশূন্য অন্তর্দেশে দীর্ঘকাল থাকিলেও মারাত্মক কার্যসাধনের তাদৃশ অযোগ্য হয় না । সুতরাং যে সকল যুদ্ধবীর নিরীহভাবে হলচালনায় প্রবৃত্ত হয়, সুযোগ বুঝিয়া পরক্ষণে তাহারা ই মৃত্তিকার অভ্যন্তর হইতে অস্ত্রাদি বাহির করিয়া, ভয়াবহ কার্যসাধনে উদ্যত হইতে পারে । অযোধ্যার তালুকদারদিগের নিরস্ত্র অনুচরগণের সকলেই কৃষাগ-জনোচিত শাস্তিময় কর্মে ব্যাপৃত থাকে নাই । কেহ কেহ বোধ হয়, এই কর্মে প্রবৃত্ত হইয়াছিল, কিন্তু অধিকাংশই নিষ্কর্মা রহিয়াছিল । তাহারা যে অনিষ্টের ফলভোগ করিয়াছে, তজ্জন্ম তাহাদের বিদ্বেষভাব তুষানলের ঞ্চার অলক্ষ্য-ভাবে ছিল । তাহারা এইরূপ প্রগাঢ় বিরক্তির সহিত প্রতিহিংসাপরিতৃপ্তির জন্ম সুযোগ প্রতীক্ষা করিতেছিল ।

অধিকারচ্যুত সম্ভ্রান্তসম্প্রদায়, স্বত্বভ্রষ্ট ভূস্বামিগণ, তাঁহাদের নিরস্ত্র অনুচর-সমূহই কেবল অযোধ্যার বিপ্লবের মূলীভূত কারণস্বরূপ বর্তমান থাকে নাই । ইহারা ব্যতীত আর এক শ্রেণীর লোকে উত্তেজনা ও তন্মূলক উচ্ছৃঙ্খলভাবের পরিচয় দিবার সুযোগ প্রতীক্ষা করিতেছিল । ইহারা যেরূপ সমরকুশল, সেই-রূপ উদ্ধত প্রকৃতি ছিল । বহুসংখ্য সৈনিক অযোধ্যার নবাবের সরকারে থাকিত । ব্রিটিশ গবর্নমেন্ট যে সকল শ্রেণী হইতে লোক নিরীচনপূর্বক



তাহাদিগকে সৈনিকদল ভুক্ত করিতেন, নবাবের সরকারেও সেই সকল শ্রেণী হইতে লোক নির্বাচিত হইত । কিন্তু শিক্ষা ও নিয়মাদিতে এই উভয় সৈনিকদলের মধ্যে সবিশেষ পার্থক্য ছিল । ব্রিটিশ কোম্পানির সৈন্য ইউরোপীয় প্রণালী অনুসারে শিক্ষিত ও উৎকৃষ্ট অস্ত্রশস্ত্রে সজ্জিত থাকিত । নবাবের সরকারে এরূপ শৃঙ্খলা বা পারিপাট্য ছিল না । সৈনিকগণ যথানিয়মে বেতনও পাইত না । সুতরাং অনেকে উচ্ছৃঙ্খলভাবের পরিচয় দিত । যখন ইংরেজ অযোধ্যা অধিকারে উদ্যত হইলেন, তখন তথায় এইরূপ ৬০,০০০ ষাট হাজার সৈনিকপুরুষ ছিল । ব্রিটিশ গবর্ণমেন্ট ইহাদের প্রায় এক তৃতীয়াংশকে আপনাদের সৈনিকদলে গ্রহণ করেন, অবশিষ্ট লোকদিগকে কিছু কিছু টাকা দিয়া বিদায় করিয়া দেন । ইহারা কর্মচ্যুত হওয়াতে অসন্তুষ্ট হইল বটে, কিন্তু টাকা পাওয়াতে একবারে হতাশাস হইল না । সুতরাং ইহাদের মধ্যে সহসা কোনরূপ বিরাগের চিহ্ন দেখা গেল না । ইহারা টাকা লইয়া আপনাদের আবাসপল্লীতে উপস্থিত হইল, পিতামাতা স্ত্রীপুত্রাদির নিকটে লাভলোকমানের কথা বর্ণিত লাগিল, আপনাদের যৎসামান্য অর্থে কিছুকাল শান্তভাবে রহিল । এই সকল লোক স্বভাবতঃ অযোধ্যার অতীত ও বর্তমান বিষয়ের আলোচনার জ্ঞাত এবং অযোধ্যায় কি ঘটিতেছে, তাহা জানিবার নিমিত্ত ঔৎসুক্য প্রকাশ করিতে পারে । যে স্থানে ইহারা যথেষ্টভাবে বিচরণ করিত, আপনাদের গ্রামাচ্ছাদনের সংস্থান করিতে সচেষ্ট থাকিত, সেই স্থানের বিষয় ইহাদের স্মৃতিপথ হইতে বিচ্যুত হয় নাই । সুতরাং ইহারা ঔৎসুক্যের সহিত অযোধ্যার দিকে দৃষ্টি রাখিয়াছিল এবং ঔৎসুক্যসহকারে উহার অবস্থাপরিবর্তনের সহিত ঘটনাবলীপরিবর্তনের প্রতীক্ষা করিতেছিল ।

ইংরেজ অযোধ্যা অধিকার করিয়া, আপনাদের অভিনব প্রণালী অনুসারে উক্ত রাজ্যশাসনে প্রবৃত্ত হইলেন । তাহাদের অভিমত ব্যবস্থা অনুসারে শাসনদণ্ডের পরিচালনা করিতে গেলে, নানারূপে ব্যয়বাহুল্য ঘটে । করস্থাপন ব্যতীত এই ব্যয়নির্বাহের অন্য উপায় তাহাদের অবলম্বনীয় হয় না । পূর্বে উক্ত হইয়াছে যে, ইংরেজ অযোধ্যা গ্রহণ করাতে প্রজালোককে নানারূপ কর দিতে হয় । তাহারা এতদিন অল্পব্যয়ে সংসারযাত্রা নির্বাহ করিতেছিল, এখন ইংরেজী সভ্যতার অনুমোদিত উৎকৃষ্টতর রাজ্যশাসনের ফলভোগ করিতে

গিয়া অর্থের দায়ে উদ্ভ্রান্ত হইয়া পড়িল। ইংরেজ অহিফেনের উপর অধিক হারে কর নির্দেশ করিলেন। এ দিকে অভিনব ব্যবস্থা প্রচলিত হওয়াতে আবশ্যিক দ্রব্যাদির মূল্য বৃদ্ধি হইল। বিচারস্থলে অর্থিপ্ৰত্যাখীদিগের বহুপরিমাণে ব্যয় বৃদ্ধি পাইল। মোকদ্দমাগুলিরও বহুবিলম্বে নিষ্পত্তি হইতে লাগিল। এইরূপে অভিনব শাসনপ্রণালীতে অনভ্যস্ত প্রজালোকের নানারূপ অসুবিধা ঘটিতে লাগিল। লক্ষ্ণৌতে অহিফেনসেবীদিগের অভাব ছিল না। পিকিন এবং কাণ্টনের ঞায় অযোধ্যার রাজধানীতেও বহুসংখ্যা লোকে এই চিরপ্রসিদ্ধ মাদক দ্রব্যে আসক্ত ছিল। উহার উপর কর স্থাপিত হওয়াতে লোকের অসন্তোষের অবধি রহিল না। কথিত আছে, অনেকে যখন বর্দ্ধিতমূল্যেও উহা পাইল না, তখন একান্ত নৈরাশ্রে হতজ্ঞান হইয়া আপনাদের গলা কাটিয়া ফেলিল।\* এই ঘটনা সত্য হউক, নাই হউক, এইরূপ করস্থাপনে যে, লোকের বিরাগ বৃদ্ধি পাইয়াছিল, তদ্বিষয়ে সন্দেহ নাই।

অযোধ্যায় বেকরূপ শাসনপ্রণালী ছিল, ইংরেজের প্রবর্তিত শাসনপ্রণালী যে, তদপেক্ষা উৎকৃষ্ট, তদ্বিষয়ে সংশয় নাই, ইংরেজ যে, নবাধিকৃত রাজ্যে শাস্তি ও শৃঙ্খলা স্থাপন করিয়াছেন, তদ্বিষয়েও ভিন্নমত নাই। কিন্তু ইংরেজের প্রবর্তিত ব্যবস্থা, ইংরেজের প্রতিষ্ঠিত শাসনশৃঙ্খলা ভিন্ন দেশে ও ভিন্ন রুচির লোকের মনঃপূত হইতে কিছু সময়ের প্রয়োজন হইয়া থাকে। লোকে দীর্ঘকাল যে শাসন-প্রণালীতে অভ্যস্ত ছিল, সহসা সেই শাসনপ্রণালী বিপর্যাস্ত করিয়া ভিন্নরূপ ব্যবস্থা প্রচলিত করিলে, তাহাদের অভ্যাস ও রুচি অনুসারে শাসকবর্গের কিছুকাল ধৈর্য ও সহিষ্ণুতা অবলম্বন করা আবশ্যিক হয়। অরণ্যবিহারী জন্তু বা আকাশবিহারী বিহঙ্গের ঞায় অনভ্যস্ত মানবও ধীরে ধীরে অপরের পোষ মানিয়া থাকে। যাহারা আপনাদের প্রবর্তিত প্রণালী উৎকৃষ্ট মনে করিয়া, শীঘ্র শীঘ্র ইহাদিগকে আবদ্ধ ও বশীভূত করিতে চাহেন, তাঁহারা বোধ হয় মানবপ্রকৃতির পরিজ্ঞানে সমর্থ নহেন। ইংরেজ বোধ হয়, আপনাদের নিয়মের প্রচলন সম্বন্ধে এইরূপ অজ্ঞতার পরিচয় দিয়া থাকেন। তাঁহারা সভ্যতা ও সদাশয়তার দোহাই দিয়া, আপনাদের অজ্ঞতা গোপনে রাখেন এবং অনভ্যস্ত

\* রীজ সাহেব এইরূপ মত প্রকাশ করিয়াছেন।—*Siege of Lucknow, p. 35.*

লোক তাঁহাদের মঙ্গলময় নিয়মে শীঘ্র শীঘ্র অভ্যস্ত হইতে আগ্রহ প্রকাশ না করাতে তাহাদিগকে অকৃতজ্ঞ বলিয়া নির্দেশ করেন।\* ফলতঃ তাঁহারা তাড়া-তাড়ি আপনাদের অভিমত প্রণালীর সুফল দেখিতে ইচ্ছা করিয়া থাকেন। যেহেতু, আপনাদের বিষয়গুলি তাঁহাদের নিকটে ভাল বোধ হয়। পরদেশে পরের অনুষ্ঠিত বিষয়গুলি মন্দ বলিয়া, তাঁহারা তৎসমুদয়ের প্রতি অবজ্ঞার ভাব প্রকাশ করিয়া থাকেন। কোন বিষয়ের সংস্কার করিতে গেলে লোকের রুচি সংস্কৃত হইতে যে, কিছু সময় আবশ্যিক, তাহা তাঁহাদের উদ্বোধ হয় না। অযোধ্যার ইংরেজ সিবিলিয়ানগণ বোধ হয়, এইরূপ ভ্রান্তির বশবর্তী হইয়া তাড়াতাড়ি আপনাদের অভিমত বিষয়গুলির প্রচলনে উদ্বৃত হইয়াছিলেন। তাঁহারা অভিনব নিয়মের জন্ত দায়ী না হইতে পারেন, যেহেতু কলিকাতা হইতে উহার উৎপত্তি হইয়াছিল। কিন্তু কালবিলম্ব করিতে তাঁহাদের ইচ্ছা হয় নাই। তাঁহারা ধৈর্যসহকারে সুসময়ের প্রতীক্ষা করেন নাই। কিছুকাল পরে একজন সমদর্শী, অভিজ্ঞ রাজপুরুষ প্রধান কমিশনরের পদে প্রতিষ্ঠিত ও অভিনব কর্মক্ষেত্রে অবতীর্ণ হইয়াছিলেন বটে, কিন্তু ইহার পূর্বেই হঠকারী রাজকর্মচারিগণ সকল বিষয়ের সংস্কার করিতে গিয়া, এরূপ বিপ্লব ঘটাইয়াছিলেন যে, তাহার নিবারণের জন্ত বহুসংখ্য সৈনিকবলের প্রয়োজন হইয়াছিল।

লঙ্কোতে ধর্মোন্মত্ত মুসলমানদিগের অভাব ছিল না। গাজী ও ফকীরগণ উদ্দীপনাময়ী বক্তৃতা করিয়া, ধর্মের জন্ত সজ্জাতিদিগকে আত্মজীবনের উৎসর্গ করিতে উত্তেজিত করিত। এইরূপ এক জন ফকীর বক্তৃতাকালে ধৃত হয়। দণ্ডস্বরূপ তাহাকে ১০০ ঘা বেত মারা হয়। লঙ্কোনিবাসী মুসলমানগণ ইতঃপূর্বে ব্রিটিশ গবর্ণমেন্টের উপর বিরক্ত হইয়া উঠিয়াছিল। তাহাদের পূর্বতন স্বত্ব বিলুপ্ত হইয়াছিল, তাহাদের খাণ্ড দ্রব্যের মূল্য বৃদ্ধি পাইয়াছিল, করভারে তাহাদের কষ্টের একশেষ ঘটয়াছিল, ইহার উপর যখন তাহারা আপনাদের শ্রদ্ধাস্পদ ধর্মপ্রচারকদিগের বক্তৃতা শুনিতে লাগিল। ফিরিঙ্গীর শাসনে তাহাদের চিরপবিত্র ধর্মের অবমাননা ঘটিবে, তাহাদিগকে অস্পৃশ্য

\* কে সাহেব এই ভাবে উপস্থিত বিষয়ের উল্লেখ করিয়াছেন।—*Kaye, Sepoy War, Vol. III, p. 427.*

দ্রব্য স্পর্শ ও অখাণ্ড দ্রব্য ভোজন করিতে হইবে, উক্ত ধর্মপ্রচারকগণ যখন তাহাদিগকে ইহাই বুঝাইতে লাগিলেন, তখন তাহারা অধিকতর অস্থির হইয়া উঠিল। নিদারুণ বিদ্বেষ-বহি তাহাদের হৃদয়ের প্রতিস্বর দগ্ধ করিতে লাগিল। তাহারা ইহার জ্বালাময়ী যাতনায় উত্তেজিত হইয়া, প্রতিহিংসার তৃপ্তিসাধনের সুযোগ দেখিতে লাগিল।

ইংরেজ যাহাদের উপর প্রধান প্রধান কর্মের ভার সমর্পণ করিয়াছিলেন, তাহাদের মধ্যে কেহ কেহ নিরতিশয় চূনীতিপরায়ণ ও অত্যাচারী ছিল। এইরূপ অজ্ঞাতকুলশীল ব্যক্তি ইংরেজের প্রিয়পাত্র হইয়া নানারূপে অত্যাচার করিত। লক্ষ্ণৌয়ের কোতওয়াল ব্রিটিশ গবর্ণমেন্টের প্রতি সাতিশয় অনুরাগ প্রকাশ করিত, গবর্ণমেন্টের কার্যসাধনে সর্বদা ব্যগ্র থাকিত। কিন্তু লোকের মধ্যে ইহার কিছুমাত্র প্রতিপত্তি ছিল না। ইংরেজ রাজপুরুষগণ ব্যতীত আর কেহ ইহার কার্যে সন্তোষ প্রকাশ করিত না। রাজপুরুষগণ বোধ হয়, ইহার প্রকৃতি জানিতেন না। এই ব্যক্তি যেরূপ চরিত্র, সেইরূপ কুপ্রবৃত্তিপরায়ণ ছিল। ইহার অত্যাচারে পিতা ছহিতার সম্ভ্রমরক্ষার জন্ত সর্বদা সতর্ক থাকিত, স্বামী স্ত্রীর সম্মাননাশের আশঙ্কায় উদ্ভিগ্ধভাবে কাগযাপন করিত।\* এইরূপ দৌরাভ্যে লোকে ইংরেজ রাজপুরুষদিগের প্রতি প্রথমে তাদৃশ অনুরাগ প্রকাশ করে নাই।

অযোধ্যা যখন ইংরেজ রাজপুরুষদিগের শাসনদণ্ডের পরিচালনায় এইরূপ তরঙ্গায়িত হইয়াছিল, তখন আর হেনরি লরেন্স তথায় উপস্থিত হইলেন। তিনি ২০শে মার্চ প্রধান কমিশনরের কার্যভার গ্রহণ করেন। পূর্বে উক্ত হইয়াছে যে, এই প্রধান রাজপুরুষ অনেক প্রধান গুণে অনঙ্কিত ছিলেন। তিনি ভারতবর্ষীয়দিগের সহিত মিশিতেন, ভারতবর্ষীয়দিগের মনের ভাব জানিতেন, ভারতবর্ষীয়দিগকে স্নেহের চক্ষে দেখিতেন, ভারতবর্ষীয়দিগের উপকারসাধনে ও অসন্তোষনিবারণে উদ্বৃত থাকিতেন। তাহার ধারণা ছিল যে, ইউরোপীয়গণ সময়ের প্রতীক্ষা না করিয়াই, তাড়াতাড়ি আপনাদের শাসনপ্রণালীর অভিঘাতে ভারতবর্ষীয় শাসনপ্রণালীর গৌরব নষ্ট করেন। ভারতবর্ষীয়দিগের যে, নানা-

\* Rees, *Siege of Lucknow*, p. 35-36.

রূপ অসন্তোষের কারণ বিদ্যমান রহিয়াছে, এ বিষয়ে তাঁহার বিশ্বাস ছিল। তিনি এই বিশ্বাসের বশবর্তী হইয়া, আপনাদের শাসনপ্রণালীর শৃঙ্খলাসাধনে এবং অযোধ্যাবাসীদের অসন্তোষনিবারণে যত্ন প্রকাশ করিয়াছিলেন।\* তিনি এই সময়ে গবর্নর-জেনেরল এবং আপনার আত্মীয়বর্গের নিকটে যে সকল পত্র লিখিয়াছিলেন, তৎসমুদয়ে অযোধ্যার অবস্থা সম্বন্ধে তদীয় মনোগত ভাব পরিষ্কৃত হইয়াছিল। রাজপুরুষগণ যে, তাড়াতাড়ি সংস্কার করিতে গিয়া, বিপ্লবের বীজ রোপণ করিতেছিলেন, ইহা তাঁহার স্পষ্ট বোধ হইয়াছিল। এপ্রিল মাসে তিনি গবর্নর জেনেরলের নিকটে যে পত্র প্রেরণ করেন, তাহাতে এই ভাবে আপনার অভিমত প্রকাশ করিয়াছিলেন—“অতি নীঘ্র এবং অতি কঠোরভাবে নগরের উন্নতিসাধন করা হইয়াছে। বাড়ীগুলি তাড়াতাড়ি ভাঙ্গিয়া ফেলাতে লোকের অসন্তোষ বৃদ্ধি পাইয়াছে। ধর্মমন্দির, অগ্ন্যগ্ন গৃহ এবং খালিজমী গবর্নমেন্টের সম্পত্তি বলিয়া গ্রহণ করাতেও এইরূপ অসন্তোষের উৎপত্তি হইয়াছে। আমি এই সকল স্থানের অধিকাংশ নিজে দেখিয়াছি, এতৎসংস্পৃষ্ট লোকদিগকে শাস্ত করিয়াছি এবং কর্তৃপক্ষের উপযুক্ত আদেশ ব্যতীত এইরূপ সম্পত্তিগ্রহণ ও বাড়ী ভাঙ্গিয়া ফেলার প্রতিষেধ করিয়া দিয়াছি। রাজস্ব-গ্রহণের প্রণালীও সাতিশয় অসন্তোষজনক হইয়াছে। গত বৎসর একরূপ বর্দ্ধিত-হারে কর নির্দ্ধারিত হইয়াছিল যে, মোটের উপর শতকরা ১৫, ২০, ৩০ এমন কি ৫৫ টাকা পর্যন্ত খাজানা বাদ দিতে হইয়াছিল। তালুকদারদিগের সহিতও সাতিশয় কঠোর ভাবে ব্যবহার করা হইয়াছে। এক ফৈজাবাদবিভাগে তালুকদারগণ আপনাদের অধিকৃত পল্লীর অর্দ্ধাংশ, কেহ কেহ সমুদয় পল্লীর স্বত্বচ্যুত হইয়াছেন।”† স্যার হেনরি লরেন্স এইরূপে অযোধ্যাবাসীদের অসন্তোষের উল্লেখ করিয়াছিলেন, এইরূপ অসন্তোষের প্রতীকারে তাঁহার যত্ন পরিলক্ষিত হইয়াছিল। কিন্তু বহুবিলম্বে তিনি অভিনব কর্মক্ষেত্রে অবতীর্ণ হইয়াছিলেন। ধূমায়মান বহু ধীরে ধীরে প্রজ্বলিত হইয়া উঠিতেছিল, বহুবিলম্বে চেষ্টা হওয়াতে উহা নির্ঝাপিত হয় নাই।

\* *Gubbins, Mutinies in Oudh, p. 3.*

† *Kaye, Sepoy War. Vol. III. p. 429.*

শ্রী হেনরি লরেন্সের বিশ্বাস ছিল যে, যতদিন প্রজাবর্গকে সরলভাবে বিশ্বাস করা যায়, সরলভাবে প্রজাবর্গের মঙ্গলসাধনে উদ্বৃত্ত থাকা যায়, ততদিন রাজ্যের শান্তি নষ্ট হইবার বা প্রজাবর্গ হইতে কোনরূপ বিপদ ঘটবার আশঙ্কা থাকে না। তিনি এই বিশ্বাসপ্রযুক্ত সৈনিকদিগের প্রতি সদয়-ভাবপ্রকাশে উদ্বৃত্ত হইয়াছিলেন। অযোধ্যায় ইউরোপীয় পদাতি সৈন্য অধিক ছিল না। সমগ্র প্রদেশের মধ্যে লক্ষ্মীতে কেবল ৩২ সংখ্যক ইউরোপীয় পদাতি সৈনিকদল অবস্থিতি করিতেছিল। যাহা হউক, এপ্রিল মাস পর্য্যন্ত এই নবাধিকৃত প্রদেশে অশান্তির কোনরূপ নিদর্শন লক্ষিত হয় নাই। যে বিস্তৃত জলরাশি আন্তরণপটের দ্বারা স্থিরভাবে ছিল, প্রকৃতির কোনরূপ চাঞ্চল্যে তাহা আলোড়িত বা তরঙ্গসমাকুল হয় নাই। ইংরেজের প্রবর্তিত রীতি অনুসারে রাজ্যের শাসনকার্য্যনির্বাহ হইতেছিল। ইংরেজ আপনার অভ্যস্ত কর্ম্ম-পটুতার সহিত রাজ্যশাসনসংক্রান্ত বাবতীয় বিষয় সম্পন্ন করিতেছিলেন। সমগ্র প্রদেশ চারি বিভাগে এবং বার জেলায় বিভক্ত হইয়াছিল। প্রতি বিভাগে এক এক জন কমিশনের এবং প্রতি জেলার এক এক জন ডেপুটি কমিশনের নির্দিষ্ট কর্ম্মসম্পাদনে ব্যাপৃত ছিলেন। সমগ্র বিভাগের উপর প্রধান কমিশনের কর্তৃত্ব করিতেছিলেন। উত্তরপশ্চিম প্রদেশ দীর্ঘকাল হইতে ইংরেজের অধিকারে ছিল। ইংরেজও দীর্ঘকাল হইতে উহার সুশাসনের জন্ত যত্ন ও পরিশ্রম করিয়া আসিতেছিলেন। এই সুশাসিত প্রদেশের তুলনায় অযোধ্যায় গুরুতর অপরাধের সংখ্যা অধিক ছিল না। ইংরেজ এই সম্পত্তিবহুল প্রদেশ অধিকার করিয়া সমুদ্র ছিলেন। অধিবাসীদিগের প্রশান্ত্যভাব দর্শনে তাহাদের হৃদয় উদ্বেল সাগরের দ্বারা প্রফুল্লভাবে অধীর হইয়া উঠিয়াছিল। কিন্তু এই-রূপ প্রফুল্লতা দীর্ঘকাল থাকিল না। মে মাসের প্রারম্ভে স্থানে স্থানে অশান্তির নিদর্শন লক্ষিত হইতে লাগিল। নবাধিকৃত প্রদেশও উচ্ছৃঙ্খলভাবের অভিঘাতে চঞ্চল হইয়া উঠিল।

মে মাসের প্রারম্ভে অযোধ্যার ৭ সংখ্যক অনিয়মিত পদাতিদল টোটার ব্যবহারে অসম্মতি প্রকাশ করিল। অধিনায়কেরা তাহাদিগকে আপনাদের আদেশানুবর্তী করিতে চেষ্টা করিতে লাগিলেন, কিন্তু চেষ্টা ফলবতী হইল না। তাহাদিগকে কাওয়ার্জের ক্ষেত্রে সমবেত করা হইল। ব্রিগেডিয়ার অনেক

বুঝাইলেন, কিন্তু এই চেষ্টা ব্যর্থ হইল। যখন সিপাহীগণ বশীভূত হইল না, তখন স্মার হেন্‌রি লরেন্স্‌ বলপ্রকাশ পূর্বক তাহাদের নিরস্ত্রীকরণে উদ্বৃত্ত হইলেন। উক্ত সিপাহীদলকে যখন টোটার কথা বুঝাইয়া দেওয়া হইয়াছিল, তখন তাহারা কহিয়াছিল যে, অগ্রাণু সৈনিকদল টোটার ব্যবহারে আপত্তি করিয়াছে। তাহাদেরও ঐরূপ আপত্তি আছে। এই সকল সিপাহী ৪৮ সংখ্যক পদাতিকদলকে আপনাদের সহায়তা করিবার জ্ঞপ্তি পত্র লিখিয়াছিল। ঘটনাক্রমে এই পত্র অণু একজন তরুণবয়স্ক সিপাহীর হস্তগত হয়। উক্ত সিপাহী উহা আপনাদের সুবাদারকে দেখায়। সুবাদার সেনক তেওয়ারি, হাবিলদার হীরালাল দোবে এবং রামনাথ দোবে, ৪৮ সংখ্যক দলের এই তিন সৈনিক পুরুষ ঐ পত্র ইউরোপীয় অধিনায়কের নিকটে সমর্পণ করেন। স্মার হেন্‌রি লরেন্স্‌ এই ঘটনায় আর কালবিলম্ব করিলেন না। তিনি আপনার সঙ্কল্প কার্যে পরিণত করিতে উদ্বৃত্ত হইলেন। ১০ মে রাত্রিকালে উক্ত সিপাহীগণ কাওয়াজের ক্ষেত্রে সমবেত হইল। এই সময়ে চারি দিক নিস্তন্ধ ছিল। উজ্জল চন্দ্রালোকে চারি দিক উদ্ভাসিত হইয়াছিল। অপরাধী সৈনিকদলের সমক্ষে গোলাপূর্ণ কামান সকল সজ্জিত ছিল। ইউরোপীয় পদাতিকদল অস্ত্রশস্ত্র লইয়া, তাহাদের নিকটে দণ্ডায়মান ছিল। স্মার হেন্‌রি লরেন্স্‌ সন্নিবেশিত কামান ও সিপাহীদিগের মধ্যে অবস্থিতি করিতেছিলেন। গোলন্দাজগণ প্রজ্বলিত বর্ষী হস্তে লইয়া কামানের পার্শ্বে ছিল। এই দৃশ্যে সিপাহীগণ মনে ভাবিল যে, তাহাদিগকে কামানে উড়াইয়া দেওয়া হইবে। সুতরাং তাহারা স্থির থাকিতে পারিল না, অবিলম্বে উদ্ভ্রান্তভাবে কাওয়াজের ক্ষেত্র হইতে পলায়ন করিল। ১২০ জন মাত্র আপনার স্থানে দণ্ডায়মান রহিল। ইহাদিগকে অস্ত্রাদি পরিত্যাগ করিতে আদেশ দেওয়া হইল। ইহারা তৎক্ষণাৎ উহা পরিত্যাগ করিল। ইহার পর স্মার হেন্‌রি লরেন্স্‌ এই সিপাহীদিগের সহিত নানা বিষয়ে কথাবার্তা কহিতে লাগিলেন। ইতঃপূর্বে নগরের তিন ব্যক্তি সৈনিকনিবাসে গিয়া ১৩ সংখ্যক দলকে গবর্ণমেন্টের বিরুদ্ধে সমুথিত হইতে পরামর্শ দিয়াছিল। ঐ দলের হুশেন বক্স নামক একজন সিপাহী ইহাদিগকে ধরাইয়া দেয়। স্মার হেন্‌রি লরেন্স্‌ প্রকাশ্য দরবারে এই বিশ্বস্ত সিপাহীদিগকে পুরস্কৃত করিতে ইচ্ছা করেন।

শ্রী হেনরি লরেন্স্ এই সময়ে মরিয়াওন্ সৈনিকনিবাসে ছিলেন । ১২ই মে সূর্যাস্তসময়ে তাঁহার গৃহের সম্মুখে দরবার হইল । দরবারের দৃশ্য যেরূপ চিত্রাকর্ষক, সেইরূপ গভীরভাবে উত্তেজক হইয়াছিল । উপবেশনের স্থান কার্পেটে আচ্ছাদিত ছিল । দর্শকদিগের জন্ত আসনগুলি দরবারের স্থানের তিন দিকে গাজাইয়া রাখা হইয়াছিল । উহার পশ্চাদ্ভাগে সিপাহীগণ আপনাদের বিনয়-নয়তা দেখাইবার জন্ত প্রশান্তভাবে, প্রধান কমিশনরের কথা শুনিবার জন্ত ঔৎসুক্যসহকারে, দণ্ডায়মান রহিয়াছিল । যে সকল সিপাহী বিশ্বস্ততার জন্ত পুরস্কারযোগ্য হইয়াছিল, তাহাদের পুরস্কারের দ্রব্যাদি সকলের সমক্ষে স্থাপিত ছিল ।

নির্দিষ্ট সময়ে প্রধান কমিশনর দেওয়ানি ও সৈনিকবিভাগের প্রধান কর্মচারীদিগের সহিত দরবারের স্থানে উপস্থিত হইয়া, সিপাহীদিগকে সম্বোধন পূর্বক সরল হিন্দীভাষায় এইভাবে বক্তৃতা করিলেন যে, অপরের ধর্ম্মে হস্তক্ষেপ করা ব্রিটিশ গবর্ণমেন্টের নীতি নয় । গত এক শত বৎসরে ভারতবর্ষে ধর্ম্ম সম্বন্ধে অনেক অত্যাচার হইয়াছে । ব্রিটিশ গবর্ণমেন্ট এই অত্যাচার নিবারণ করিয়া, সকল ধর্ম্মাবলম্বীর প্রতি সমদর্শিতা দেখাইতেছেন । গবর্ণমেন্টের যেরূপ সৈনিকবল, সেইরূপ অর্থবল আছে । গবর্ণমেন্ট অল্প সময়ের মধ্যে বিলাত হইতে বহুসংখ্যক সৈনিকপুরুষ আনিতে পারেন । সৈনিকবলে এইরূপ সহায়-সম্পন্ন, অর্থবলে এইরূপ ক্ষমতাপন্ন গবর্ণমেন্টের উচ্ছেদে চেষ্টা করা বাতুলতার লক্ষণ । ইনি (প্রধান কমিশনর) নিজের লাভের জন্ত এখানে আইসেন নাই । এই প্রদেশের অধিবাসীদিগকে সুখে ও শান্তিতে রাখিবার জন্ত তাঁহাকে এই গুরুতর কার্যভার গ্রহণ করিতে হইয়াছে । সিপাহীরা বহু বৎসর হইতে নিমক খাইতেছে, বহু বৎসর হইতে তাহারা বংশপরম্পরায় কোম্পানির কার্যসাধনে নিয়োজিত রহিয়াছে এবং বহুযুদ্ধে আপনাদের বিশ্বস্ততা ও বীরত্বের পরিচয় দিয়া, কোম্পানির প্রাধান্য বদ্ধমূল করিয়াছে । ইহারা যুদ্ধের সময়ে আপনাদের আফিসারদিগের সহিত নানা কষ্ট সহিয়া, যেরূপ অকৃত্রিম সৌহৃদ্য দেখাইয়া আসিতেছে, তাহা ইহাদের মনে রাখা উচিত । \* এই ভাবে বক্তৃতা করিয়া, শ্রী হেনরি লরেন্স্ বিশ্বস্ত সিপাহীদিগকে স্বহস্তে পারিতোষিক

\* *Cave-Brown, Punjab and Delhi. Vol. 1. Ep. 2-36.*



দিলেন। তাঁহার বক্তৃতা যেরূপ ওজস্বিনী, সেইরূপ মনোহারিণী হইয়াছিল। উহার প্রত্যেক কথা শ্রোতৃবর্গের হৃদয়ে প্রবেশ করিয়াছিল। দরবার সাঙ্গ হইল। প্রধান কমিশনের আপনার কর্তব্য যথারীতি সম্পাদন করিলেন। গবর্ণমেন্টের কর্মচারী ও দর্শকগণ সমুদ্র হইলেন। ইংরেজ এবং এতদেশীয় আফিসারগণ আত্মীয়ভাবে পরস্পরের সহিত কথাবার্তা কহিতে লাগিলেন। শেষোক্ত আফিসারগণ ব্রিটিশ গবর্ণমেন্টের সৌজন্য ও সদাশয়তায় পরিতুষ্ট হইয়া, আপনাদের প্রভুভক্তি ও বিশ্বস্ততা দেখাইতে লাগিলেন। সিপাহীগণ পূর্বের শ্রায় প্রশান্তভাবে দরবারস্থল পরিত্যাগ করিল। এসময়ে সকলের মুখেই প্রশংসার চিহ্ন পরিদৃষ্ট হইয়াছিল। সকলের ব্যবহারে, সকলের কথাতে, সকলের মুখভঙ্গীতে এসময়ে স্পষ্টতঃ সারল্যের পরিচয় পাওয়া গিয়াছিল। কিন্তু এই সরলভাব দীর্ঘকাল থাকিবে কি না, ইহাই তখন কর্তৃপক্ষের বিবেচ্য হইয়াছিল। স্মার হেনরি লরেন্স কহিয়াছিলেন যে, এক পক্ষ কাল তাহাদিগকে সাতিশয় চিন্তাযুক্ত থাকিতে হইবে। এই এক পক্ষের মধ্যেই, তাহারা যাহার জন্ত চিন্তিত ছিলেন, তাহাই ঘটিল। বক্তৃতার মোহিনী শক্তিতে, যুক্তিপূর্ণ আশ্বাসবাক্যে, কর্তৃপক্ষের সদয় ব্যবহারে, সিপাহীগণ দীর্ঘকাল বিমুক্ত রহিল না। যে উদ্ভেজনা তাহাদিগকে বিচলিত করিয়া তুলিয়াছিল, তাহাই শেষে তাহাদিগকে সংহারক কার্যসাধনে প্ররতিত করিল।

লক্ষ্মী গোমতীর দক্ষিণতটে অবস্থিত। নগরের দৈর্ঘ্য প্রায় পাঁচ মাইল। উহার অট্টালিকা প্রভৃতি উপস্থিত সময়ে প্রায় সাত মাইল ব্যাপিয়া রহিয়াছিল। নগরে প্রায় দুই লক্ষ সৈনিক এবং বহু সংখ্যক অস্ত্রধারী লোক অবস্থিত করিতেছিল।\* নদীর উভয়তীরে মরিয়াওন, মুদ্‌কিপুর প্রভৃতি স্থানে এতদেশীয় সৈনিকনিবাস ছিল। অপর তটবর্তী সৈনিকনিবাস হইতে নগরে আসিবার জন্ত লৌহসেতু ছিল; এই সেতুর নিকটে আর একটি পাথরের সেতু ছিল, † এবং নদীর কিয়দূর ভাটিতে নৌসেতু রহিয়াছিল। লৌহসেতুর নিকটে উন্নত প্রাচীরে পরিবেষ্টিত, মচ্ছিবননামক পুরাতন, বিস্তৃত অট্টালিকা ছিল। এক সময়ে এই অট্টালিকায় অনেক প্রসিদ্ধ ঘটনার আবির্ভাব

\* Raikes, Notes on the Revolt &c. p. 104.

† নাম পাথরের সেতু বটে কিন্তু উহা পাকা ইটে প্রস্তুত হইয়াছিল।

ও তিরোভাব হইয়াছিল । উপস্থিত সময়ে উহাতে দ্রব্যাদি থাকিত । এই অট্টালিকা যেরূপ স্থলে অবস্থিত এবং উহার আয়তন যেরূপ বৃহৎ, তাহাতে উহা একটি দুর্গরূপে ব্যবহৃত হইতে পারিত । কিন্তু অট্টালিকার অবস্থা ভাল ছিল না । কাল উহার ক্ষয়সাধন করিতেছিল । বিপক্ষের আক্রমণে এই পুরাতন বাড়ী যে, দীর্ঘকাল অক্ষতভাবে থাকিবে, তদ্বিষয়ে সংশয় ছিল । স্থানীয় লোকে প্রথমে উহার ক্ষয়স্থায়িত্ব স্পষ্টরূপে বুঝিতে পারিয়াছিল । সীতাপুরের অতিরিক্ত সহকারী কমিশনের কুতল্‌আলি গাঁ এক সময়ে মচ্ছিভবন সম্বন্ধে লিখিয়াছিলেন যে, যদি ইংরেজের কামান এই বাড়ী ফেলিয়া না দেয়, তাহা হইলে বিপক্ষের গোলা উহার ধ্বংসসাধন করিবে । এই বিস্তৃত অট্টালিকা রাখা হইবে কি পরিত্যাগ করা যাইবে, তৎসম্বন্ধে তর্কবিতর্ক হইতে লাগিল । অবশেষে উহাতে নানাবিধ দ্রব্য ও অস্ত্রাদি রাখা হইল । চারি পার্শ্বে যে সকল বাড়ী ছিল, তৎসমুদয় পাছে বিপক্ষদিগের আশ্রয়স্থল হয়, এই আশঙ্কায় বাড়ীগুলি ভাঙ্গিয়া ফেলিবার প্রস্তাব হইল । স্যার হেনরি লরেন্স্‌ সাতিশয় উদারপ্রকৃতি ছিলেন । তিনি অধিকারীদিগকে না জানাইয়া এবং সমুচিত মূল্য না দিয়া, বাড়ীগুলি ভাঙ্গিয়া ফেলিতে সম্মত হইলেন না । অধিকারীদিগের আবাসগৃহ ভাঙ্গিয়া ফেলা নিঃসন্দেহ কঠোরতার কর্ম্ম । বিশেষতঃ সমুচিত মূল্য না দিলে এই কঠোরতা অধিকতর মর্ম্মপীড়ার কারণ হইয়া থাকে । প্রধান কমিশনের সহযোগীদিগের প্রস্তাবে সম্মত হইলেন । উপযুক্ত অর্থের বিনিময়ে প্রস্তাব কার্য্যে পরিণত হইল । কিন্তু আবাসগৃহ ব্যতীত স্থানে স্থানে ধর্ম্মমন্দির ছিল । বিপক্ষেরা মসজিদের চূড়ার অন্তরালে থাকিয়া ইংরেজদিগের উপর গুলিবৃষ্টি করিতে পারে, এইরূপ আশঙ্কার কারণ বর্ত্তমান ছিল । ইহাতেও ধর্ম্মভীরু প্রধান কমিশনের ধর্ম্মমন্দিরের সম্মান বিনষ্ট করিতে সম্মত হইলেন না । তিনি সহযোগীদিগকে মন্দিরগুলি রাখিতে বলিলেন । স্মৃতরাং পবিত্র স্থানগুলি অক্ষতভাবে রহিল । উত্তরকালে এই পবিত্র স্থান যে, মারাত্মক কার্য্যসাধনের সহায় হইবে, ধর্ম্মপ্রাণ শাসনকর্ত্তা ইহা ভাবিয়াও প্রজাবর্গের চিরন্তন ধর্ম্মে আঘাত করিতে সাহসী হইলেন না ।

ইউরোপীয় সৈনিকদলের বাসগৃহগুলি নগরের কিয়দূরে রেসিডেন্সির প্রায় দেড় মাইল পূর্বে গোমতীর বাঁকের দিকে ছিল, একটি পাহাড় গোমতীর

দিকে অবনত হইয়া পড়িয়াছে। গোমতীর তটে এই পাহাড়ের উপর সুদৃশ্য ত্রিতল বাটী—রেসিডেন্স অবস্থিত। রেসিডেন্টের বাসের জন্ম ১৮০০ অব্দে নবাব সাদত আলি কর্তৃক এই অট্টালিকা নির্মিত হয়। রেসিডেন্সিতে কতকগুলি তয়খানা অর্থাৎ ভূমধ্যস্থ কুঠরী আছে। অবরোধের সময়ে এই গৃহগুলি ৩২ সংখ্যক পদাতিদিগের মহিলা এবং বালকবালিকাদিগের আশ্রয়স্থান হয়। \* রেসিডেন্সি এবং উহার সীমার মধ্যস্থিত যাবতীয় গৃহ সাধারণের মধ্যে বেলিগার্ড নামে পরিচিত। † সহরে অযোধ্যার নিয়মিত সিপাহীগণের অধিকাংশ অবস্থিতি করিতেছিল। পক্ষান্তরে অনিয়মিত সিপাহীদের অনেকে গবর্ণমেন্টের কাৰ্যালয়ের পাহারার জন্ম নিয়োজিত ছিল।

এই সকল সিপাহী সহসা উত্তেজিত হইয়া উঠিলে বিপদ ঘটবার সম্পূর্ণ সম্ভাবনা ছিল। প্রধান কমিশনার সৰ্বপ্রথম এই সিপাহীদের বলহানি করিতে সচেষ্ট হইলেন। প্রহরীদের সংখ্যা কমাইয়া উহাদিগের মধ্যে ইউরোপীয় সৈনিকদিগকে রাখা হইল। সৈনিকনিবাস, ধনাগার প্রভৃতির রক্ষার ভার প্রধানতঃ সিপাহাদিগের উপর সমর্পিত ছিল। ইউরোপীয়দিগের জীবন ও সম্পত্তি এ সময়ে একরূপ সিপাহীদের উপর নির্ভর করিতেছিল। রেসিডেন্সির সীমার মধ্যে ধনাগার ছিল। ধনাগারে নগদ ৩০ লক্ষ টাকা এবং উহা অপেক্ষা অধিক মূল্যের কোম্পানির কাগজপ্রভৃতি রক্ষিত হইতেছিল। ধনাগাররক্ষক সিপাহীদের স্থানান্তরিত করিবার প্রস্তাব হইল। গাবিন্স্ সাহেব প্রথমতঃ এই প্রস্তাব উত্থাপন করিলেন। কিন্তু এক দিকে যেরূপ প্রস্তাবের অনুকূলযুক্তি ছিল, সেইরূপ প্রতিকূলযুক্তিও উহার বিরুদ্ধপক্ষ সমর্থন করিতেছিল। স্মার হেনরি লরেন্স্ প্রতিকূলযুক্তির কথা বলিলেন। সিপাহীগণ ধনাগাররক্ষার কৰ্ম হইতে অপসারিত হইলে তাহারা ভাবিবে যে, তাহারা কর্তৃপক্ষের অধিষ্ঠানের পাত্র হইয়াছে। এইরূপ মনোগতভাব হইতে উত্তেজনার উৎপত্তি হইবে, এবং তৎসঙ্গে মহাবিপ্লবের সূত্রপাত ঘটবে। কিন্তু যখন সৈনিকনিবাসের প্রধান

\* *J. Browne, Lucknow and its Memorial of the Mutiny, p. 1.*

† কর্ণেল বেলি যখন অযোধ্যার রেসিডেন্ট ছিলেন, তখন তিনি সৰ্বপ্রথম এই গৃহের বহিষ্কারে প্রহরীদের রাখেন। একজন সুবাদার উহাদের অধ্যক্ষ হয়। এই জন্ম বেলিগার্ড নাম হইয়াছে।—*Malleson, Indian Mutiny, Vol. I. p. 361, note.*

কর্মচারীগণ অনুকূল প্রস্তাবের সমর্থন করিলেন, তখন শ্রী হেনরি লরেন্সকে প্রতিকূলপক্ষ পরিত্যাগ করিতে হইল। রেসিডেন্সিতে ইউরোপীয় সৈন্য রাখিবার বন্দোবস্ত হইতে লাগিল। যে সকল কাগজপত্র ভিন্ন ভিন্ন ঘরে ছিল, তৎসমুদয় স্বতন্ত্র স্থানে লইয়া যাওয়া হইল। এইরূপে কতকগুলি ঘর খালি হইলে, ইউরোপীয় সৈন্য এবং রক্ষণীয় ইউরোপীয় আতুর এবং বালকবালিকাদিগের স্থান নির্দেশ করিয়া দেওয়া হইল।

ইহার মধ্যে তাড়িতবার্তাবাহ লক্ষ্মীতে আতঙ্কজনক বার্তা আনিয়া দিতে লাগিল। প্রথম দিন যে সংবাদ পাওয়া গেল, তাহা কর্তৃপক্ষের নিকটে অতিরঞ্জিত বোধ হইল। দ্বিতীয় দিনের সংবাদ পূর্বাপেক্ষা অধিকতর ভয়াবহ হইল। মীরাট ও দিল্লীর ঘটনায় শ্রী হেনরি লরেন্স চমকিত হইলেন। অগ্ন্যাগ্ন স্থানের ত্রায় এই স্থানেও সংবাদ আসিল যে, দিল্লী মোগলের অধিকৃত হইয়াছে। বৃদ্ধ বাহাদুর শাহ সম্রাটের পদে প্রতিষ্ঠিত হইয়াছেন। এই আতঙ্কজনক সংবাদ পাইয়া, শ্রী হেনরি লরেন্স সৈনিকবিভাগে কর্তৃত্ব করিবার অধিকারপ্রাপ্তির জন্ত গবর্নর-জেনেরলের নিকটে টেলিগ্রাম করিলেন। লর্ড কানিং সন্তোষসহকারে তাঁহার প্রার্থনায় সম্মত হইলেন। শ্রী হেনরি লরেন্স এইরূপে বিগ্রেডিয়ার-জেনেরলের পদে প্রতিষ্ঠিত হইয়া, সৈনিকবিভাগের উপর কর্তৃত্ব করিতে উদ্যত হইলেন।

নানাস্থানে নানারূপ সংবাদে সিপাহীগণ ক্রমে বিচলিত হইয়া উঠিতে লাগিল। তাহাদের কার্যপ্রণালীর স্থিরতা ছিল না। তাহাদের মধ্যে একতাও ছিল না। অনৈক্য ও পরস্পরের বিভিন্ন মতে তাহাদের বলক্ষয় হইয়াছিল। একপক্ষ অবিলম্বে যুদ্ধের উদ্যোগ করিতে চাহিলেও, অপরপক্ষ কিছুকাল প্রতীক্ষা করিবার প্রস্তাব করিল। এইরূপ দোলায়মানচিত্ত সিপাহীগণ দার্ষকাল যে, প্রশান্তভাবে থাকিবে, তাহার কোন সম্ভাবনা ছিল না। শ্রী হেনরি লরেন্স সিপাহীদিগের প্রকৃতি ভালরূপে বুঝিতেন। অগ্ন্যাগ্ন স্থানে যাহা ঘটয়াছিল, ইনি তদ্বিষয়ের সূক্ষ্মানুসূক্ষ্মরূপে পর্যালোচনা করিয়া দেখিয়াছিলেন। পঞ্জাবের সিপাহীগণ নিরস্ত্রীকৃত হইয়াছিল। লক্ষ্মীতেও অনায়াসে সিপাহীদিগকে নিরস্ত্রীকৃত করিতে পারা যাইত, কিন্তু শ্রী হেনরি লরেন্স কেবল লক্ষ্মীর শাসনকর্তা ছিলেন না, সমগ্র অযোধ্যাপ্রদেশ তাঁহার শাসনাধীন ছিল। এক

স্থানের সিপাহীগণ নিরস্ত্রীকৃত হইলে অত্র স্থানের সশস্ত্র সিপাহীদিগের উত্তেজনা-বৃদ্ধির সম্ভাবনা ছিল । সুতরাং প্রধান কমিশনর সহসা সিপাহীদিগের নিরস্ত্রীকরণে উদ্বৃত্ত হইলেন না । সিপাহীদিগের যে সকল অন্তোষ ও বিরক্তির কারণ ছিল, তৎসমুদয়ের উন্মূলন হইতে পারে কি না, তিনি তাহারই আলোচনা করিতে লাগিলেন । তাঁহার ধারণা ছিল যে, সিপাহীদিগের বিরক্তির কারণ রহিয়াছে । অন্ততঃ তাহাদের বিশ্বাস জন্মিয়াছে যে, কোম্পানি বাহাদুর তাহাদের প্রতিঅগ্রায় ব্যবহার করিতেছেন । বেতন সম্বন্ধে অযোধ্যার অনিয়মিত সৈনিকদলের অভিযোগ ছিল । তলব তাহাদের সর্কাপেক্ষা প্রিয় বিষয়ের মধ্যে পরিগণিত । তাহারা তলবের বিনিময়ে কোম্পানির কার্যসাধনে জীবন সমর্পণ করিয়াছিল । কিন্তু কোম্পানির নির্দিষ্ট তলব তাহাদের আশানুরূপ ছিল না । নিয়মিত সৈনিকদলের বেতন অপেক্ষা অনিয়মিত সৈনিকদলের বেতন অনেক কম ছিল । এজন্য উভয় দলের বেতন সমান করিবার প্রস্তাব হইল । প্রস্তাব কার্য্যে পরিণত হইতে বিলম্ব ঘটিল না । অনিয়মিত সৈনিকদলের বেতন নিয়মিত সৈনিকদলের বেতনের সমান করিবার আদেশ প্রচারিত হইল ।

এইরূপে সিপাহীদিগকে সন্তোষে ও শান্তভাবে রাখিবার জন্য বন্দোবস্ত হইল । কিন্তু সিপাহীগণ সন্তুষ্ট বা শান্ত হইল না । প্রতিদিনই তাহাদের উত্তেজনাসম্বন্ধে নানা জনরব প্রচারিত হইতে লাগিল । এই সকল জনরবে কোনরূপ নূতনত্ব ছিল না । ইউরোপীয় সৈনিকগণও তদ্বিষয়ে কোনরূপ মনোযোগ দিল না । তাহারা সিপাহীদিগের কার্য্যকলাপের দিকে দৃষ্টি রাখিতে লাগিল । সিপাহীগণ বাহিরে প্রশান্ত ভাব দেখাইয়া, আপনাদের কর্তব্য কর্ম্ম সম্পাদন করিতে লাগিল ।

পূর্বে উক্ত হইয়াছে যে, লক্ষ্ণৌ নগরে বহুসংখ্য অট্টালিকা ও মস্জিদ প্রভৃতি ছিল । এই সকল অট্টালিকার মধ্যে ফরিদবক্স, ছত্রমঞ্জিল, শাহ নজৌফ, সেকেন্দর বাগ, এমামবারা, বেগম কুঠী, কৈশর বাগ প্রভৃতি প্রধান । নগরের দক্ষিণ এবং পূর্বভাগে একটি খাল আছে, এই খালের দক্ষিণ ভাগে অনেকগুলি স্থান উপস্থিত ঘটনার জন্য ইতিহাসে প্রসিদ্ধি লাভ করিয়াছে । ইহার মধ্যে আলমবাগ নামক স্থান প্রধান । আলমবাগ একটি প্রাচীন, সুবিস্তৃত উদ্যান, উহা নগরের দুই মাইল অন্তরে কাণপুরে যাইবার পথের পার্শ্বে অবস্থিত । এই

পথেই চারবাগ নামক আর একটি স্থান। যে স্থানে খালের সহিত গোমতীর সংযোগ ঘটিয়াছে, সেই স্থানের কিয়দূর দক্ষিণে দিলকোশা নামক প্রাসাদ অবস্থিত। উহার নিকটে মার্টিনিয়ার কলেজ রহিয়াছে। রেসিডেন্সির উপরে দণ্ডায়মান হইলে নগরের সৌন্দর্য্য স্পষ্টরূপে অনুভূত হয়। উহার সঙ্গীর্ণ গলি, প্রশস্ত প্রাসাদ, সুদৃশ্য মসজিদ প্রভৃতি দর্শকের নিকটে রমণীয় আলেখ্যের স্থায় প্রতীয়মান হইয়া থাকে।

এই সুদৃশ্য নগরে স্মার্ট হেন্‌রি লরেন্স সুখে ও শান্তিতে থাকিবার ইচ্ছা করিয়াছিলেন। কিন্তু তাঁহার ইচ্ছা পূর্ণ হইল না। ঘটনাচক্রে আবর্তনে সুখ ও শান্তি তিরোহিত হইল। দুঃসহ দুঃখ ও অপ্রতিহতবিধেয় অশান্তির জ্বালাময়ী শিখায় সমগ্র নগর পরিব্যাপ্ত হইয়া উঠিল।

ইউরোপীয়গণ এতদিন সিপাহীদিগের গতিবিধি পর্য্যবেক্ষণ করিতেছিলেন। কিন্তু এই পর্য্যবেক্ষণে সিপাহীদিগের সঙ্কল্পনিষ্ক্রিয় পথ অবরুদ্ধ রহিল না। মে মাসের শেষে তাহাদের সঙ্কল্প কার্য্যে পরিণত হইল। ৩০মে রাত্রিকালে স্মার্ট হেন্‌রি লরেন্স মরিয়্যাওনের সৈনিকনিবাসে, রেসিডেন্সিগৃহে, আপনার সহচরবর্গের সহিত আহার করিতেছিলেন, এমন সময়ে তদীয় অগ্রতম সহচর তাঁহাকে কহিলেন যে, আজ ৯টার তোপ হইবামাত্র সিপাহীরা তাঁহাদের বিরুদ্ধাচরণে প্রবৃত্ত হইবে। এই কথা বলিবার পরেই ৯টার তোপ হইল, কিন্তু সিপাহীদিগের বিরুদ্ধাচরণের কোন নিদর্শন লক্ষিত হইল না। স্মার্ট হেন্‌রি লরেন্স হাসিয়া সহচরকে কহিলেন—“আপনার বন্ধুগণ ঠিক সময়মত কার্য্য করে না।” এই কথা যেমন তাঁহার মুখ হইতে বাহির হইয়াছে, অমনি সিপাহীদিগের আনাসগৃহের দিকে ঘন ঘন বন্দুকের শব্দ হইতে লাগিল। প্রধান কমিশনার ও তাঁহার সহচরবর্গ সমস্ত্রমে ভোজনস্থান হইতে উঠিলেন, ঘোটকগুলি সজ্জিত করিয়া আনিবার আদেশ দিলেন এবং বাহিরে আসিয়া আপনাদের বাহনের প্রতীক্ষায় রহিলেন। তাঁহারা গৃহের বহির্ভাগের সোপানে দণ্ডায়মান ছিলেন। চক্রেয় কিরণে চারি দিক অপেক্ষাকৃত স্পষ্টভাবে লক্ষিত হইতেছিল। তাঁহাদের নিকটে একদল সশস্ত্র সিপাহী প্রহরীর কার্য্যের জগ্ন শ্রেণীবদ্ধভাবে ছিল। এই দলের অধিনায়ক, সেনাপতির নিকটে বন্দুক ভরিবার অনুমতি প্রার্থনা করিল। অবিলম্বে অনুমতি দেওয়া হইল। ৩০ জন

সিপাহী বন্দুক ভাঙ্গিয়া এবং উহাতে ক্যাপ সংযোগ করিয়া দণ্ডায়মান ইংরেজদিগের নিকটে রহিল। স্মার হেন্‌রি অবিচলিত সাহস ও নির্ভীকতার সহিত তাহাদিগকে কহিলেন—“আমি তুপ্তদিগকে সৈনিকনিবাস হইতে তাড়াইয়া দিবার জন্ত চলিলাম। বতক্ষণ ফিরিয়া না আসি, ততক্ষণ তোমরা কর্মস্থানে উপস্থিত থাকিবে। কাহাকেও আমার বাড়ীর অনিষ্ট করিতে এবং আমার বাটীতে প্রবেশ করিতে দিবে না। অথবা তোমাদিগকে ফাঁসী দিব।” গ্রহরী সিপাহীগণ গুলিভরা বন্দুক কাঁধে লইয়া গৃহদ্বাররক্ষার জন্ত রহিল। স্মার হেন্‌রি লরেন্সের কথার অধমাননা হইল না। সেই রাত্রিতে যখন সৈনিকনিবাসের গৃহগুলি বিনষ্ট হইতেছিল, তখন কেবল রেগিডেন্সিগৃহ বিলুপ্তিত বা ভস্মীভূত হইল না।

স্বাক্ষীভূত অশ্ব সকল আনীত হইল। স্মার হেন্‌রি লরেন্স এবং তাঁহার সহচরগণ সৈনিকদিগের আবাসগৃহের অভিমুখে যাত্রা করিলেন। সৈনিকনিবাস হইতে একটি বিস্তৃত পথ নগরের অভিমুখে গিয়াছিল। স্মার হেন্‌রি লরেন্স সর্বপ্রথম এই পথরক্ষায় উদ্যত হইলেন। তিনি অবিলম্বে ৩২ সংখ্যক দলের কতিপয় সৈনিক পুরুষকে কয়েকটি কামানের সহিত পথরক্ষার জন্ত নিযুক্ত করিলেন। এ দিকে উত্তেজিত সিপাহীরা ইউরোপীয়দিগের জীবন ও সম্পত্তির বিনাশে বন্ধপরিকর হইল। তাহারা ভাবিয়াছিল যে, সায়ংকালে ফিরিঙ্গিগণের ভোজনগৃহে উপস্থিত হইলেই, সকলকে ভোজনস্থলে উপবিষ্ট দেখিতে পাইবে। সুতরাং তাহারা অবিলম্বে ভোজনগৃহে উপস্থিত হইল, কিন্তু ইউরোপীয়েরা পূর্বে বন্দুকের শব্দ শুনিয়া, কাওয়াজের ক্ষেত্রের অভিমুখে প্রস্থান করিয়াছিলেন। সিপাহীদিগের আশা ফলবতী হইল না। সিপাহীরা ভোজনস্থান শূন্য দেখিয়া, সেই গৃহে অগ্নি দিল। তাহাদের ব্রিগেডিয়ার উপস্থিত হইয়া, তাহাদিগকে প্রশান্তভাবে থাকিতে কহিলেন। তাহারা ব্রিগেডিয়ারকে গুলি করিল। এ দিকে তাহাদের সহযোগিগণ দলে দলে বিকট চীৎকার করিতে করিতে আফিসরদিগের বাংলার অভিমুখে প্রধাবিত হইল। গৃহ সকল বিলুপ্তিত ও ভস্মীভূত হইতে লাগিল। সহরের ইউরোপীয়েরা আপনাদের আবাসগৃহের ছাদে উঠিয়া, যখন দূরে ধূমস্তূপের সঙ্গে সঙ্গে ভয়ঙ্কর অগ্নিশিখা দেখিতে পাইলেন, তখন তাঁহারা আপনাদের সজাতির ও স্বদেশীয়ের শোচনীয় অবস্থা ভাবিয়া, আতঙ্কে একান্ত আকুল হইয়া উঠিলেন।

কিন্তু সিপাহীদিগের সমগ্র দল সহসা এইরূপ ভয়াবহ বিপ্লবে ব্যাপ্ত হয় নাই, সহসা আপনাদের শিক্ষাদাতা ও প্রতিপালনকর্তার বিরুদ্ধে অস্ত্র সঞ্চালন করে নাই, সহসা তাঁহাদের সম্পত্তিতেও আপনাদিগকে সম্বন্ধ করিবার আশায় উৎফুল্ল হইয়া উঠে নাই। যখন কেহ কেহ সম্পত্তিলুপ্তনে প্রমত্ত ছিল, গৃহদাহে ব্যাপ্ত হইয়াছিল, ফিরিঙ্গির জীবননাশে আগ্রহ প্রকাশ করিয়াছিল, তখন অনেকে তাহাদের পক্ষসমর্থনে উত্তত না হইয়া, নিমকের সম্মান রক্ষা করিয়াছিল। ইহারা আপনাদের বিশ্বস্ততায় বিসর্জন দেয় নাই। সজাতি ও সতীর্থদিগের উৎসাহবর্ধনে উত্তত হয় নাই, বা যাহাদের আদেশে এতদিন পরিচালিত হইয়াছিল, যাহাদের শিক্ষায় বীরপুরুষদিগের মধ্যে স্থান পরিগ্রহ করিয়াছিল, যাহাদের প্রদত্ত সামরিক ভূষণে ও অস্ত্রাদিতে গৌরবাস্বিত ছিল, তাঁহাদের শোণিতপাতে অগ্রসর হয় নাই। ৭১ সংখ্যক দলের সিপাহী-রাই গবর্ণমেন্টের একান্ত বিরোধী হইয়া উঠিয়াছিল। কিন্তু এই দলের মধ্যেও অনেকে শান্তভাবে রহিয়াছিল। ৭১ সংখ্যক দলের অনেক সিপাহী আপনাদের উত্তেজিত সতীর্থদিগের সহিত না মিশিরা, ৩২ সংখ্যক ইউরোপীয় পদাতিদলের পার্শ্বে স্থান পরিগ্রহ করিয়াছিল। ১৩ সংখ্যক দলের ৩০০ শত সিপাহী আপন দলের পতাকা এবং টাকার বাক্স লইয়া ইউরোপীয়দিগের সহিত সম্মিলিত হয়। ৪৮ সংখ্যক দল যদিও কাওয়াজের ক্ষেত্রে নিশ্চেষ্টভাবে ছিল, এবং যদিও অধিনায়কদিগের আদেশে উত্তেজিত সিপাহীদিগের বিরুদ্ধে অগ্রসর হইতে অসম্মত হইয়াছিল, তথাপি তাহারা প্রকাশ্যভাবে সেই উত্তেজিত সিপাহীদিগের সহিত সম্মিলিত হয় নাই। ইহাদের অধিনায়ক ইহাদিগকে ৩২ সংখ্যক দলের বাসস্থানে লইয়া যাইবার জন্ত বৃথা চেষ্টা করিতে লাগিলেন, অবশেষে তিনি হতাশ হইয়া, সহরের রেসিডেন্সিতে যাইতে কহিলেন। এই প্রস্তাবে ইহারা মুখে সম্মতি প্রকাশ করিল বটে, কিন্তু কার্যতঃ অনেকে দল পরিত্যাগ করিতে লাগিল। অধিনায়ক পতাকা ইত্যাদি লইয়া লক্ষ্মীতে উপস্থিত হইলেন। ৪৮ সংখ্যক দলের এক শতেরও কম লোক সহরের অভিমুখে যাত্রা করিল।

পূর্বে উক্ত হইয়াছে যে, একজন উত্তেজিত সিপাহীর গুলির আঘাতে ব্রিগেডিয়ার দেহত্যাগ করিয়াছিলেন। ৭১ সংখ্যক দলের আর একজন অধিনায়কও এইরূপে নিহত হইলেন। একজন সুবাদার এবং কতিপয় সৈনিক



পুরুষ এই হতভাগ্য খেতকায়কে রক্ষা করিবার জন্ত বিছানার নীচে লুকাইয়া রাখিয়াছিল, কিন্তু তাহাদের প্রয়াস সফল হয় নাই। সৌভাগ্যক্রমে এই সময়ে সৈনিকনিবাসে ইউরোপীয় বালকবালিকা বা কুলমহিলা বেশী ছিল না। সুতরাং এই অসহায়দিগের শোণিতপাতে সৈনিকনিবাস কলঙ্কিত হয় নাই।

পরদিন রবিবার। এইবারে গ্রীষ্টধর্মাবলম্বিগণ উপাসনাগৃহে উপাশ্রু ভগবানের আরাধনায় অভিনিবিষ্ট হইয়া থাকেন। ৩১শে মের এই রবিবার ইউরোপীয়দিগের পক্ষে সর্কধ্বংসের বার বলিয়া পরিগণিত ছিল। এই বারে বিভিন্ন স্থানের সিপাহীগণ ইউরোপীয়দিগের বিরুদ্ধে সমুখিত হইবার সঙ্কল্প করিয়াছিল, এইবারে ইউরোপীয়দিগের উপাসনামন্দিরগুলি উপাসকদিগের শোণিতস্রোতে রঞ্জিত করিবার প্রস্তাব ছিল, এইবার, যে কোন ইউরোপীয়, যেখানে যে ভাবে থাকুন না কেন, তাহারই মানবলীলাসংবরণের দিন বলিয়া নির্দিষ্ট হইয়াছিল। লক্ষ্যেতে এই দিন বিনা গোলযোগে অতিবাহিত হয় নাই। ৩শে মে রাত্রিকালে উত্তেজিত সিপাহীগণ ঘোড়দৌড়ের মাঠে সমবেত হয়। স্মার্ট হেনরি লরেন্স ইহাদের সমুচিত শাস্তিবিধানের জন্ত তথায় গমন করেন। ইহারা ঐ স্থানে দীর্ঘকাল থাকিতে পারে নাই, অবিলম্বে ইহাদের দলভঙ্গ হয়। কর্তৃপক্ষ ৬০ জনকে অবরুদ্ধ করেন। সহরে কতকগুলি মুসলমান উত্তেজিত হইয়া উঠে। কিন্তু পুলিশের চেষ্টায় ইহাদের দলভঙ্গের সহিত উৎসাহ ভঙ্গ হয়।

# ষষ্ঠ অধ্যায় ।

## অযোধ্যা ।

বিপ্লবের প্রকৃতি—সাঁতাপুর—মুলাওন—মোহমদী—শাহজাহানপুরের পলাতকদিগের নি-  
ধন—ফৈজাবাদ—সুলতানপুর—বহরইচবিভাগ—সিক্রোরা—মোল্লাপুর—দরীয়াবাদ—পলা-  
তকদিগের দুর্দশা—লক্ষ্মী—স্মার হেনরি লরেঙ্গের স্বাস্থ্যহানি—লক্ষ্মীরক্ষার বন্দোবস্ত—চিন-  
হাটে ইংরেজসৈন্যের পরাজয়—মচ্ছিবনের কিয়দংশের বিধ্বংস—লক্ষ্মীর অবরোধ—স্মার  
হেনরি লরেঙ্গের দেহত্যাগ—সেনাপতি হাবেলক ও আউট্রামের উপস্থিতি ।

আপাততঃ লক্ষ্মী নগরে গোলযোগের নিরুত্তি হইল বটে, কিন্তু ইউরোপীয়-  
গণ দীর্ঘকাল শান্তিসুখ উপভোগ করিতে পারিলেন না । লক্ষ্মীর প্রশান্তভাব  
অবিলম্বে দূরীভূত হইল, সমগ্র অযোধ্যাপ্রদেশ সহসা বিচলিত হইয়া উঠিল,  
কর্তৃপক্ষ সহসা ভয়ঙ্কর বিপত্তিজালে পরিবেষ্টিত হইয়া পড়িলেন । কেবল  
কতিপয় সৈনিকদলমাত্র তাহাদের বিরুদ্ধে সমুখিত হইল না । সমগ্র অযোধ্যা  
প্রদেশের এক প্রান্ত হইতে অপর প্রান্ত পর্য্যন্ত মহাবিপ্লবের আবির্ভাব হইল ।  
অস্ত্রধারী বীরপুরুষদিগের সহিত উত্তেজিত জনসাধারণ, পরস্বাপহারক  
দুর্বৃত্তগণ সূশৃঙ্খলা ও সূশাসনের গৌরব বিপর্য্যস্ত করিয়া ফেলিল ।

যে বিপ্লবে সমগ্র জনপদের শৃঙ্খলা নষ্ট হয়, সকলের জীবন ও সম্পত্তি বিঘ্ন-  
সঙ্কুল হয়, সর্ববিষয়ে গভীর আতঙ্ক ও বিপদের সঙ্কার হয়, সে বিপ্লব কেবল ব্যক্তি-  
বিশেষে বা সম্প্রদায়বিশেষে আবদ্ধ থাকে না । ফরাসীদেশের একজন প্রসিদ্ধ  
লেখক (বিকৃত হুগো) এ সম্বন্ধে এই ভাবে লিখিয়াছেন যে, যাহারা কোনরূপ  
দুর্ভিতসন্ধিসাধনে কৃতসঙ্কল্প হয়, যাহারা কোন বিষয়ে প্রতিহিংসাপর হইয়া উঠে,  
যাহারা অপরের সম্পত্তিতে আপনাদের দুঃখদারিদ্র্যমোচনের চেষ্টা করে,  
তাহাদের সকলেই বিপ্লবের বিস্তারে উত্তেজিত হয় । এইরূপ বিপ্লব ভাড়িতবেগে  
সহসা চারি দিকে প্রসারিত হয় এবং সহসা পবনসহায় প্রজ্জ্বলিত বহ্নির শ্রায়  
সমস্ত দগ্ধ করিতে থাকে । যাহারা নানা ভাবে কথা বলে, যাহারা কল্পনা-  
বলে নানা বিষয়ের স্বপ্ন দেখে, যাহারা আপনাদের প্রতিহিংসার তৃপ্তিসাধনে  
বন্ধপরিকর হইয়া উঠে, যাহারা মানসিক উত্তেজনায় একান্ত অধীরতা

প্রকাশ করে, যাহারা দুঃখদারিদ্র্যজনিত মনঃকষ্টে জ্ঞানশূণ্য হইয়া পড়ে, এইরূপ মহাবিপ্লব তাহাদের উত্তেজনায় উদ্ভূত হয়, তাহাদিগের দলবৃদ্ধির সহিত প্রবর্দ্ধিত হয় এবং তাহাদের বলবতী হিংসার সহিত যেরূপ ভয়ঙ্কর, সেইরূপ মারাত্মক হইয়া উঠে। স্বতরাং মানবজাতির নিম্নস্তর হইতে এই বিপ্লবের উৎপত্তি ও বিকাশ হয়। যে সকল নিরক্ষর লোক নিম্নশ্রেণীর কৌতূহলবৃদ্ধির জন্ম তৎপর হয়, যে সকল অনামা ব্যক্তি চারি দিকে ঘুরিয়া বেড়ায়, যে সকল পরস্বাপহারক প্রকাশ্য পথের পার্শ্বে অবস্থিতি করে, যাহারা রাত্ৰিকালে যেখানে সেখানে শুইয়া থাকে, গৃহের প্রাচীর ও ছাদের পরিবর্তে কঠিন মৃত্তিকা, বিমুক্ত বায়ু, অনন্ত আকাশ যাহাদের সুষুপ্তিস্থতের বৃদ্ধি বা বিধ্বংসের একমাত্র অবলম্ব হয়, যাহারা পরিশ্রমের পরিবর্তে কেবল অদৃষ্টের উপর আপনাদের প্রতিদিনের অন্নসংগ্রহের আশা করে, অস্বীয়স্বজন বা সম্মানপ্রতিপত্তির সহিত যাহাদের কোন সংশ্রব নাই, ভবিষ্যৎ ভাবনার সহিত যাহাদের কোন সম্বন্ধ নাই, যাহাদের দেহরক্ষার জন্ম নিত্য-প্রয়োজনীয় দ্রব্যের কোন সংস্থান নাই, তাহারাই প্রধানতঃ এই বিপ্লবের পরি-পোষক হয়। এই প্রকার লোকের প্রত্যেকেই আপনাদের ছুরাকাজ্জ্বার তৃপ্তি-সাধনের জন্ম রাজ্যের যাবতীয় শৃঙ্খলা বিনষ্ট করিয়া ফেলে। বাতাবর্ত্ত যেমন বস্তুগুলিকে উৎক্ষিপ্ত করিয়া চারি দিকে ছড়াইয়া ফেলে, ইহাদের অত্যাচার-প্রবাহ সেইরূপ সুশাসনের বন্ধন উচ্ছেদ পূর্বক কিছুকালের জন্ম সুখ ও শান্তিকে উৎক্ষিপ্ত করিয়া, দূরে ফেলিয়া থাকে।

অযোধ্যা প্রদেশেরও এইরূপ অবস্থা ঘটিয়াছিল। অযোধ্যার অন্ত্যন্ত স্থানের সিপাহীগণ যখন জানিতে পারিল যে, রাজধানীর সিপাহীরা ব্রিটিশ কোম্পানির বিরোধী হইয়াছে, তখন তাহারা কোন দিকে দৃকপাত না করিয়া, গবর্ণমেন্টের বিরুদ্ধ পক্ষ অবলম্বন করিল। সেই সঙ্গে সঙ্গে অযোধ্যার অন্ত্যন্ত শ্রেণীর লোকেও বিপ্লবের বিস্তারে উত্তেজিত হইল। প্রতিদিন লক্ষৌ সহরে নানা স্থান হইতে বিপ্লবের সংবাদ উপস্থিত হইতে লাগিল। প্রতিদিনই লক্ষৌর কর্তৃ-পক্ষ ইংরেজদিগের নিধন, দ্রব্যাদির বিলুপ্তন বা গৃহাদির ভস্মীকরণের সংবাদ পাইয়া, নিরতিশয় চিন্তিত হইতে লাগিলেন। ইংরেজ অন্নদিন মাত্র অযোধ্যা অধিকার করিয়াছিলেন, অন্নদিনের মধ্যেই তাহাদের ক্ষমতা ও প্রাধান্যের সহিত

শাসনশৃঙ্খলা প্রতিষ্ঠিত হইয়াছিল। এই প্রতিষ্ঠিত ক্ষমতা, প্রাধান্য ও শৃঙ্খলা কাগজের ঘরের গ্নায় ক্ষণভঙ্গুর হইয়া উঠিল। যে স্থানে যাহার কিছুমাত্র ক্ষমতা আছে, সে-ই তথায় স্বপ্রধান হইল। তাহার ইচ্ছা অব্যাহত, তাহার কার্য অপ্রতিহত, তাহার ক্ষমতা ও প্রাধান্য অপ্রতিহত হইয়া উঠিল। জুন মাসের প্রথম দশ দিনের মধ্যে এই মহাবিপ্লব সর্বাসঙ্গসম্পন্ন হইল। ইংরেজ বিনা যুদ্ধে অযোধ্যায় আধিপত্য স্থাপন করিয়াছিলেন, এখন তাঁহাদের সেই আধিপত্যের পুনঃস্থাপন জন্ত যুদ্ধ করিতে বহুসৈনিকবল আবশ্যিক হইল।

খয়রাবাদবিভাগের সদর ষ্টেশন সীতাপুরে সিপাহীরা প্রথমে ব্রিটিশ গবর্ণ-  
মেন্টের বিরুদ্ধে সমুথিত হয়। এই স্থানে ৪১ সংখ্যক এতদেশীয়  
সীতাপুর। পদাতিকদল এবং অযোধ্যার ৯ ও ১০ সংখ্যক অনিয়মিত সৈনিকদল  
অবস্থিত করিতেছিল। জর্জ ক্রিশ্চিয়ান এই বিভাগের কমিশনার ছিলেন।  
কতিপয় ইউরোপীয় আফিসর ভিন্ন ভিন্ন সৈনিকদলে কর্তৃত্ব করিতেছিলেন।  
মে মাসের শেষ পর্য্যন্ত সীতাপুরের কমিশনার কোনরূপ গোলযোগের  
আশঙ্কা করেন নাই। তিনি ৩০শে মে আগরার জজ রেইক্‌স্ সাহেবের  
নিকট এই ভাবে লিখিয়াছিলেন—“এই স্থানে সমুদয় শান্তভাবে রহিয়াছে।  
আমার অধীন বিভাগের লোকের মধ্যে কোন গোলযোগ নাই। ৪১ সংখ্যক  
সিপাহীদলের মধ্যেও কোনরূপ গোলযোগ ঘটে নাই। আমার অধীনে সাড়ে নয়  
শত লোক আছে। যদি এই অবস্থার পরিবর্তন হয়, লোকের মধ্যে যদি উদ্বে-  
জন্য নিদর্শন দেখা যায়, তাহা হইলে আমি ঐ লোক দ্বারা এক ঘণ্টার মধ্যেই  
গোলযোগের দমন করিতে পারিব।” কমিশনার সাহেব অযোধ্যার অনিয়মিত  
সিপাহী এবং পুলিশের সৈনিকপুরুষদিগকে লক্ষ্য করিয়া এইরূপ লিখিয়াছিলেন।  
এই সকল লোকের উপর তাঁহার বিশ্বাস ছিল। তিনি ভাবিয়াছিলেন যে, গোল-  
যোগ ঘটিলে তিনি ইহাদের সাহায্যে উহার নিবারণ করিতে পারিবেন। কিন্তু  
তাঁহাদের অভিনব শাসননীতি সমুদয় আশার উচ্ছেদসাধন করিয়াছিল। ধনী,  
দরিদ্র, সকলেই এক অবস্থায় পতিত হইয়াছিল। অভিজাত সম্প্রদায়ের  
গৌরব ও প্রাধান্য বিলুপ্ত হইয়া গিয়াছিল। উত্তরপশ্চিম প্রদেশের পূর্বতন  
লেক টেনেন্ট-গবর্ণর রবার্ট্‌সন সাহেবের ভবিষ্যদ্বাণী এখন ফলোন্মুখ হইয়া  
উঠিতেছিল। নিয়মিত ও অনিয়মিত, সকল শ্রেণীর সিপাহীরা এক সঙ্গে

ব্রিটিশ গবর্নমেন্টের বিরোধী হইয়াছিল। যদি এই সময়ে ভূস্বামিগণ ইংরেজদিগের পক্ষে থাকিতেন, তাহা হইলে ইংরেজদিগকে অসহায় বালকের আয় কাতরভাবে চারি দিকে দৃষ্টিপাত করিতে হইত না। তাঁহারা উক্ত ভূস্বামীদিগের সাহায্যে অবিলম্বে এই বিপ্লবের গতিরোধে সমর্থ হইতেন।

সীতাপুরের নিয়মিত ও অনিয়মিত, উভয় শ্রেণীর সৈনিকেরাই কর্তৃপক্ষের নিকটে আপনাদের বিশ্বস্ততা প্রতিপন্ন করিতে লাগিল। তাহারা বলিল যে কর্তৃপক্ষের অবিশ্বাস জন্মিলে, তাহাদের মনে নিদারুণ কষ্ট হইবে। একজন এতদেশীয় বৃদ্ধ আফিসর গলদশ্রলোচনে তাঁহার ইউরোপীয় সহযোগীদিগকে কহিলেন, যাহারা এতদিন বাঙনিষ্পত্তি না করিয়া, তাঁহাদের পক্ষ সমর্থন করিয়াছে, শিবিরেই হউক, সৈনিকনিবাসেই হউক, বা যুদ্ধক্ষেত্রেই হউক, তাঁহাদের কষ্টে কষ্ট বোধ, এবং তাঁহাদের বিপদে বিপদ বোধ করিয়াছে, তাহাদের প্রতি যেন এখন কোনরূপেই অবিশ্বাসের ভাব প্রকাশ করা না হয়। কিন্তু সিপাহীদিগের কথা ঠিক রহিল না, বৃদ্ধ আফিসরের কাতরোক্তিও শেষে সত্য বলিয়া প্রতিপন্ন হইল না। ৩রা জুন সিপাহীগণ উত্তেজিত হইয়া, ইউরোপীয়দিগের বিরুদ্ধে অস্ত্র ধারণ করিল। ঐ দিন প্রাতঃকালে ৪১ সংখ্যক দলের লোক চীৎকার করিয়া কহিতে লাগিল যে, ১০ সংখ্যক অনিয়মিত দলের সৈনিকেরা ধনাগার লুণ্ঠন করিতেছে। ৪ সংখ্যক দলের, কর্ণেল বার্চনামক একজন অধিনায়ক ঐ স্থানে গমন করিয়া দেখেন যে, গোলযোগের শান্তি হইয়াছে। ফিরিয়া আসিবার সময়ে ধনাগাররক্ষক একজন সিপাহীর গুলির আঘাতে তাঁহার প্রাণ-বিয়োগ হয়।\* অপরে নির্দেশ করিয়াছেন যে, যখন সিপাহীদিগের কেহ কেহ উত্তেজিতভাবে ধনাগারের দিকে এবং কেহ কেহ কামানের দিকে গমন করে, তখন কর্ণেল বার্চ গোলযোগ থামাইতে গিয়া, গুলির আঘাতে দেহত্যাগ করেন। তাঁহার একজন সহযোগী আহত হইলেন।† কমিশনের সাহেবের গৃহে ইউরোপীয় স্ত্রীপুরুষ ও বালকবালিকা সমবেত হইয়াছিল, সশস্ত্র পুলিশ তাঁহার গৃহরক্ষায় নিয়োজিত ছিল। কিন্তু এই রক্ষকগণই শেষে ভক্ষক

\* *Gubbins, Mutinies in Oudh. p. 136.*

† *Hutchinson, Narrative of the Mutinies in Oude. p. 57. Comp. Kaye, Sepoy War, Vol. III. p. 455.*

হইয়া উঠে । কমিশনর সাহেব গৃহ পরিত্যাগ পূর্বক নিকটবর্তী নদীতটের অভিমুখে পলায়ন করেন, তদীয় সহধর্মিণী একটি শিশুকে বাহুতে রাখিয়া, তাঁহার অনুগামিনী হইলেন । কমিশনর সাহেব যখন নদীর অপর তটে উত্তীর্ণ হইলেন, অথবা উত্তীর্ণ হইবার আয়োজন করেন, তখন বিপক্ষের বন্দুকের গুলিতে দেহত্যাগ করেন । তাঁহার পত্নী এবং শিশুটিও মৃত্যুমুখে পতিত হয় । অপরাপর ইউরোপীয়দিগের মধ্যে কেহ কেহ নদীতটে গতাস্থ হইলেন, কেহ কেহ নদীর মধ্যে দেহত্যাগ করেন, কেহ কেহ আপনাদের অদৃষ্টবলে কোনরূপে এই ভীষণ আক্রমণ হইতে আত্মরক্ষায় সমর্থ হইলেন । ৪১ সংখ্যক দলের ৩০ জন সিপাহী অসামান্য বিশ্বস্ততা দেখাইয়া, এই সকল পলাতককে রক্ষা করিয়াছিল । এই বিশ্বস্ত সিপাহীগণ পরদিন প্রাতঃকালে লক্ষ্মীতে সীতাপুরের সংবাদ পাঠাইয়া দেয় । অবিলম্বে লক্ষ্মী হইতে কতিপয় শিখ অশ্বারোহী বগি প্রভৃতি লইয়া পলাতকদিগকে আনিতে যাত্রা করে । এইরূপে পলাতকগণ আশ্রয়স্থান প্রাপ্ত হয় । যে সকল সিপাহীর বিশ্বস্ততার ইহাদের জীবনরক্ষা হইয়াছিল, তাহারা লক্ষ্মী হইতে আগত রক্ষকদিগের হস্তে ইহাদিগকে সমর্পণ পূর্বক আপনাদের বাসগ্রামে গমন করে । তাহাদের হৃদয় বিচলিত হইয়াছিল । তাহারা ইউরোপীয়দিগের সঙ্গে থাকা এখন আপনাদের পক্ষে বিপত্তিজনক বলিয়া বোধ করিয়াছিল । তাহারা বিশ্বস্ততা প্রকাশ করিলেও আপনাদের উত্তেজিত সহযোগীদিগের বিরুদ্ধাচরণে উত্তত হয় নাই । সুতরাং তাহারা আপনাদের প্রতিপালনকর্তা প্রভুদিগের জীবনরক্ষারূপ পবিত্র কর্ম সম্পাদন-পূর্বক এখন গরীয়সী জন্মভূমিতে গমন করাই শ্রেয়স্কর মনে করিয়াছিল ।

খয়রাবাদবিভাগের অন্তর্গত দুইটি ছোট ষ্টেশনে বিপ্লব ঘটে । অন্ততর

ষ্টেশন মূলাওনে একজন ডেপুটি কমিশনর ছিলেন । এই স্থানে  
মূলাওন ।

৪১ সংখ্যক দলের কতিপয় সিপাহী এবং অযোধ্যার ৪ সংখ্যক অনিয়মিত সৈনিকদল অবস্থিতি করিতেছিল । যে মাসে ইহাদের উপর ডেপুটি কমিশনরের সন্দেহ হয় । কিন্তু সন্দেহ হইলেও, ডেপুটি কমিশনর সহসা কর্মস্থল পরিত্যাগ করেন নাই । যখন সীতাপুরে গোলযোগ ঘটে, তখনও তিনি কর্মস্থলে অবস্থিতি করিতেছিলেন । শেষে চারি দিকে যখন বিপ্লবের অঙ্গ সম্পূর্ণ হয়, ইউরোপীয়গণ যখন সীতাপুর হইতে পলায়ন করেন, মূলাওনের

সৈনিকদল যখন অধিকতর উত্তেজনার আবেগে স্বপ্রধান হইতে চেষ্টা করে, তখন ডেপুটী কমিশনের আর কোন উপায় না দেখিয়া, অস্বারোহণপূর্বক অক্ষতশরীরে লঙ্কোতে উপস্থিত হইলেন।

ইহার মধ্যে দ্বিতীয় স্টেশন মোহমদীতে শোচনীয় ঘটনার আবির্ভাব হয়।

যে টমাসনবংশের লোক রাজকীয় কর্মে আপনাদের দক্ষতার  
মোহমদী।

পরিচয় দিয়া, ভারতবর্ষে প্রসিদ্ধিলাভ করিয়াছিলেন, সেই বংশেরই এক ব্যক্তি এই স্থানে ডেপুটী কমিশনের পদে নিয়োজিত ছিলেন। কাপ্তেন অর্ নামক একটি সৈনিকপুরুষ ইহার সহকারী ছিলেন। নবাবের আধিপত্য-কালে ইনি যে সৈনিকদলের অধ্যক্ষ ছিলেন, উপস্থিত সময়ে অযোধ্যার সেই ৯ সংখ্যক অনিয়মিত সৈনিকদল মোহমদীতে অবস্থিত করিতেছিল। এই স্থান রোহিলখণ্ডের লীমান্তভাগে এবং শাহজাহানপুরের অতি নিকটে অবস্থিত। শাহজাহানপুরের বিপ্লবের সংবাদ পাইয়া, মোহমদীর কর্তৃপক্ষ নিরতিশয় চিন্তিত হইলেন। ১লা জুন শাহজাহানপুরের পলাতক ইউরোপীয়গণ মোহমদীতে উপস্থিত হওয়াতে তথাকার ইউরোপীয়দিগের সংখ্যা বৃদ্ধিত হয়। পলাতক-দিগের উপস্থিতির দুই দিন পরে অত্যাচার স্থানের গ্রাম মোহমদীও ঘোরতর বিপ্লব-তরঙ্গে আন্দোলিত হইয়া উঠে। ৪ঠা জুন সৈনিকেরা ধনাগার লুণ্ঠন করে, কয়েদীদিগকে ছাড়িয়া দেয় এবং ইংরেজের প্রবর্তিত যাবতীয় শাসনশৃঙ্খলা বিপর্যস্ত করিয়া ফেলে। পূর্বে উক্ত হইয়াছে যে, কাপ্তেন অর্ দীর্ঘকাল হইতে মোহমদীর সৈনিকদলের সুপরিচিত ছিলেন। সৈনিকেরা পূর্বতন পরিচয়ের জন্ত প্রথমতঃ কাপ্তেন অরের বিরুদ্ধে কোন কর্ম করিতে আগ্রহ দেখায় নাই। তাহারা কাপ্তেনের সমক্ষে ইউরোপীয়দিগের জীবন রক্ষা করিতে প্রতিজ্ঞা করে। ইহাতে আশ্বস্ত হইয়া, ৪ঠা জুন সন্ধ্যাকালে কাপ্তেন অর্ প্রভৃতি ইউরোপীয়গণ অক্ষতদেহে আওরঙ্গাবাদে প্রস্থান করেন। কুল-মহিলারা ও বালকবালিকাগণ বর্গীতে এবং দ্রব্যাদি লইয়া যাইবার গাড়িতে চড়িয়া যাত্রা করেন। কিন্তু পলাতকেরা অভীষ্ট স্থানে উপস্থিত হইতে পারিলেন না। পর দিন সিপাহীরা আপনাদের প্রতিশ্রুতি ভঙ্গ করিয়া তাহাদিগকে আক্রমণ করিল। এই আক্রমণে বাধা দিবার আর কোন উপায় রহিল না। সিপাহীদিগের গুলির আঘাতে পলাতকদিগের প্রায় সকলেই দেহত্যাগ করিল।

কাপ্তেন অর্ও মৃত্যুমুখে পাতিত হইতেন, গুরুদীন নামক একজন সিপাহী এই ঘোরতর সঙ্কটকালে কাপ্তেনকে কহে যে, তিনি হাতের পিস্তল ফেলিয়া দিলেই সে তাহাকে রক্ষা করিতে পারিবে। এই কথায় কাপ্তেন অর্ও পিস্তল ফেলিয়া দিলেন। গুরুদীন তদগুণেই কাপ্তেন অর্ও আক্রমণকারীর মধ্যে আসিয়া দাঁড়াইল। ইহার সাহায্যে কাপ্তেনের জীবনরক্ষা হইল।

পূর্বে উক্ত হইয়াছে যে, উপস্থিত সিপাহীবিপ্লব অযোধ্যার ত্রায় সুবিস্তৃত প্রদেশে কোন এক নির্দিষ্ট স্থানে আবদ্ধ থাকে নাই। উহা প্রজ্বলিত হতাশনের ত্রায় একে একে সকল স্থানেই পরিব্যাপ্ত হয়। সহসা এই জ্বালাময়ী পাবক-শিখার গতিরোধে ব্রিটিশ রাজপুরুষদিগের ক্ষমতা ছিল না। তাঁহারা যখন ইহার প্রচণ্ডভাব দেখিলেন, তখন আশঙ্কা ও উদ্বেগে প্রায় জ্ঞানশূন্য হইয়া, সর্বক্ষণ আপনাদের সমক্ষে সর্বসংহারক কালের বিকট মূর্তি দেখিতে লাগিলেন। সীতাপুর, মোহমদী প্রভৃতি স্থানে যাহা ঘটয়াছিল, ফৈজাবাদ প্রভৃতি বিভাগেও তাহাই ঘটিল।

ফৈজাবাদ, অযোধ্যার পূর্বভাগ। এই বিভাগ ফৈজাবাদ, সুলতানপুর,

সালোনি, এই তিন জেলায় বিভক্ত। ফৈজাবাদ ঘর্ষরার তীরে অব-  
ফৈজাবাদ।

স্থিত। এই স্থানে একজন কমিশনার এবং একজন ডেপুটি কমিশনার ছিলেন। একদল গোলন্দাজ সৈন্য, ২২ সংখ্যক এতদেশীয় পদাতিদল অযোধ্যার ৬ সংখ্যক অনিয়মিত পদাতি এবং ১৫ সংখ্যক অনিয়মিত অখারোহিদল অবস্থিত করিতেছিল। ২২ সংখ্যক পদাতিদলের অধ্যক্ষ সমগ্র সৈনিকদলের উপর কর্তৃত্ব করিতেছিলেন। এই সকল সৈনিকদল আপনাদিগকে বিশ্বস্ত বলিয়া নির্দেশ করিলেও কমিশনার কর্ণেল গোলডনে তাহাদের উপর বিশ্বাস স্থাপন করিতে পারেন নাই। মে মাসে মীরট ও দিল্লীর ঘটনা যখন তাঁহাদের গোচর হইল, তখন তাঁহারা ভাবিলেন যে, তাঁহাদিগকেও এই ভীষণ বিপ্লবের সন্মুখীন হইতে হইবে। যে প্রচণ্ড ব্যত্যায় উত্তরপশ্চিমাঞ্চলের অনেক স্থান বিশৃঙ্খল হইয়া পড়িয়াছে, অনেকের জীবন বিনষ্ট হইয়াছে, অনেক সম্পত্তি অধিকারীর হস্তভ্রষ্ট হইয়া গিয়াছে, সেই ব্যত্যায় অভিঘাতে তাঁহাদের জীবনেরও অনিষ্ট ঘটবে, তাঁহাদের সম্পত্তিও ধ্বংসোন্মুখ হইয়া পড়িবে এবং তাঁহাদের প্রবর্তিত শৃঙ্খলাও বিপর্যস্ত হইয়া যাইবে। সুতরাং তাঁহারা নিশ্চেষ্ট রহিলেন



না। আশঙ্কিত বিপ্লবের সমক্ষে তাঁহারা আত্মরক্ষার আয়োজন করিতে লাগিলেন। যে সকল জমীদারের উপর তাঁহাদের বিশ্বাস ছিল, তাঁহাদের সাহায্য গ্রহণ করা উচিত কি না এখন তদ্বিষয় বিচার্য্য হইল। আত্মরক্ষার স্থান প্রাচীরে পরিবেষ্টিত ও সুরক্ষিত করিবার আয়োজন হইতে লাগিল। কুলমহিলা ও বালকবালিকাদিগকে লক্ষ্মীতে পাঠাইবার প্রস্তাব হইল। কিন্তু এই সকল প্রস্তাব, এই সকল সঙ্কল্প, এই সকল ব্যবস্থা সর্বাংশে কার্য্যে পরিণত হইল না। বিশ্বস্ত জমীদারগণ যে, সুশিক্ষিত সিপাহীদিগের সহিত যুদ্ধ করিতে সমর্থ হইবেন, তদ্বিষয়ে সন্দেহ হইল। লক্ষ্মী যাইবার পথে নানারূপ বিঘ্নবিপত্তি ছিল, সুতরাং ঐ বিপত্তিময় পথ দিয়া, বালকবালিকা ও কুলমহিলাদিগকে পাঠানও অসম্ভব বোধ হইল। সুতরাং ফৈজাবাদের ইউরোপীয়গণ আপনাদের কুলনারী ও শিশুসন্তানগণে পরিবেষ্টিত হইয়া, মহাবিপ্লবের আশঙ্কায় নিরতিশয় উদ্বেগচিত্তে কালযাপন করিতে লাগিলেন।

ইংরেজ অযোধ্যা অধিকারপূর্বক যে শাসনপ্রণালীর প্রবর্তন করিয়াছিলেন, যে ব্যবস্থার পক্ষপাতী হইয়াছিলেন, এখন তৎসমুদয়ের পরীক্ষার সময় উপস্থিত হইল। পূর্বে উক্ত হইয়াছে যে, যদি এই সময়ে অযোধ্যার সমুদয় তালুকদার ইংরেজের পার্শ্বে দণ্ডায়মান হইতেন, তাহা হইলে ইংরেজের অনেকাংশে বলবৃদ্ধি হইত। কিন্তু সমুদয় তালুকদার এই সময়ে ইংরেজের সহিত সমবেদনাসূত্রে সঙ্ঘবদ্ধ হইলেন নাই। ইংরেজের রাজস্বগ্রহণ-প্রণালী এইরূপ সমবেদনা স্থাপনের প্রতিকূল হইয়াছিল। অভিনব ব্যবস্থায় অযোধ্যার এই প্রভাবশালী ও সম্পত্তিশালী তালুকদারগণ সামান্য লোকের অবস্থায় পাতিত হইয়াছিলেন। সমবেদনাপর স্মার্ট হেনরি লরেন্স্ ইঁহাদের এইরূপ অধঃপতনে আক্ষেপ প্রকাশ করিয়াছিলেন। তালুকদারগণ আপনাদের অধঃপতনে ইংরেজের প্রতি সন্তুষ্ট হইলেন নাই। তাঁহাদের হৃদয়গত বিদ্বেষবহি প্রচণ্ড প্রচ্ছন্নভাবে থাকিলেও উহা একবারে নির্দোষিত হয় নাই। উপযুক্ত সময়ে উহা যে, স্বকীয় প্রথরতার পরিচয় দিবে, তদ্বিষয়ে সন্দেহ করিবার কোন কারণ ছিল না। এখন সেই সময় উপস্থিত হইল। তালুকদারদিগের অনেকে এখন আপনাদের প্রকৃত মূর্ত্তি ধারণ করিলেন। তাঁহাদের হৃদয়গত বিদ্বেষবহির প্রচণ্ড শিখায় এখন ইংরেজ বেরূপ বিস্মিত, সেইরূপ শঙ্কিত ও সন্ত্রস্ত হইয়া পড়িলেন। তালুকদারদিগের মধ্যে

শাহগঞ্জের রাজা মানসিংহ প্রধান ছিলেন । ইংরেজের বন্দোবস্তে তিনি তদীয় বিস্তৃত জমিদারীর স্বত্বচ্যুত হইয়াছিলেন । অভিনব গবর্ণমেন্টের নিকটে রাজা মানসিংহকে রাজস্বের জন্ত অনেক টাকার দায়ী হইতে হইয়াছিল । রাজা মানসিংহ বুঝিয়াছিলেন যে, ইংরেজ গবর্ণমেন্ট তাঁহাকে রাজস্বের জন্ত অগ্রায়রূপে দায়ী করিতেছেন । যথানিয়মে রাজস্ব না দেওয়ার জন্ত ইংরেজ কর্মচারিগণ কর্তৃক তিনি অবরুদ্ধ হইতে পারিতেন, কিন্তু সে সময়ে তাঁহাকে লক্ষ্মীতে পাওয়া যায় নাই । সুবিচারের জন্তেই হ'উক, বা আইন-ব্যবসায়ীদিগের পরামর্শ-গ্রহণের জন্তেই হ'উক, তিনি ব্রিটিশ রাজধানীতে উপস্থিত হইয়াছিলেন । কলিকাতায় তিনি কি করিয়াছেন, অযোধ্যায় তিনি কি ভাবে প্রত্যাবৃত্ত হইয়াছেন, তাহা ভালরূপে জানা যায় নাই । কিন্তু অযোধ্যায় ফিরিয়া গেলেই তাঁহাকে আটক করা হয় । কেহ কেহ বলেন, গবর্ণমেন্টের আদেশে তিনি নজরবন্দী হইয়াছিলেন, কেহ কেহ লিখিয়াছেন যে, তিনি দেনার দায়ে অবরুদ্ধ হইয়াছিলেন । সহকারী কমিশনর অর্ সাহেবের সহিত তাঁহার সবিশেষ আলাপপরিচয় ছিল । অর্ সাহেব তাঁহাকে ছাড়িয়া দিতে অনুরোধ করিয়াছিলেন ।\* কৈজাবাদের ডেপুটি কমিশনর এই কার্যের অনুমোদন করেন নাই । তাঁহার দৃঢ় বিশ্বাস ছিল যে, মানসিংহ যাহাই করুন না কেন, তিনি কখনও গবর্ণমেন্টের প্রতিকূল হইবেন না । যাহা হ'উক, মে মাসের শেষ ভাগে এবং জুন মাসের প্রারম্ভে অযোধ্যার কর্তৃপক্ষ রাজা মানসিংহের প্রতি যে তীক্ষ্ণ দৃষ্টি রাখিয়াছিলেন, তদ্বিশেষে সংশয় নাই । মানসিংহ সহকারী কমিশনরকে কহিয়াছিলেন যে, যদি তাঁহাকে নজরবন্দী না করা হয়, তাহা হইলে তিনি সহকারী কমিশনরকে সপরিবারে শাহগঞ্জ নামক স্থানের দুর্গে আশ্রয় দিয়া, রক্ষা করিবেন । সহকারী কমিশনর সকলের সম্মুখেই এইরূপ ব্যবস্থা করিতে বলিলেন । প্রধান কমিশনরও ইহাতে সন্মত হইলেন । কিন্তু ইচ্ছা থাকিলেও, মানসিংহ, যাবতীয় কুলমহিলা ও বালকবালিকাকে রক্ষা করিতে পারিবেন কি না, তাবিতে লাগিলেন । তিনি কেবল সিবিল কর্মচারীদিগের পরিবারবর্গকে আশ্রয় দিতে চাহিলেন, কিন্তু এই প্রস্তাব ডেপুটি কমিশনরের মনঃপূত হইল না । অবশেষে:

\* *Hutchinson. Narrative of the Mutinies in oude, p. 71, note.*

মানসিংহ ভাবিয়া কহিলেন, তিনি সকলকেই আশ্রয় দিতে প্রস্তুত আছেন, কিন্তু তাঁহাদিগকে অতিগোপনে ষ্টেশন হইতে আশ্রয়গৃহে যাইতে হইবে। রাজা মানসিংহের এই প্রস্তাব সৈনিক কর্মচারীদিগকে জানান হইল। সৈনিক কর্মচারিগণ উহাতে অমত প্রকাশ করিলেন। তাঁহারা মানসিংহ অপেক্ষা আত্মবলের উপরই অধিক পরিমাণে নির্ভর করিয়াছিলেন। কেবল একজন মাত্র আফিসর আপনার স্ত্রী এবং সন্তানদিগকে সিবিল কর্মচারীদিগের পরিবারবর্গের সহিত শাহগঞ্জে পাঠাইতে সম্মত হইলেন।

৭ই জুন রাত্রিকালে কুলমহিলারা নিরাপদে আশ্রয়স্থলে উপনীত হইলেন। তাহার পরদিন সায়ংকালে সিপাহীরা প্রকাশভাবে ইংরেজদিগের বিরুদ্ধাচরণে প্রবৃত্ত হইল। তাহারা প্রথমে কামানগুলি অধিকার করিতে গেল। এই সকল কামানে গোলা ভরা হইয়াছিল। গোলন্দাজেরা প্রজ্বলিত বর্তিকা হস্তে লইয়া, উহার পার্শ্বে দণ্ডায়মান ছিল। কিন্তু তাহারা কামান ছুঁইতে না ছুঁইতে পদাতিকেরা আসিয়া পড়িল। আফিসরদিগের আদেশপালনে তাহারা যত প্রকাশ করিল না। আফিসরদিগের অনুনয়বাক্যেও তাহারা বিচলিত হইল না। তাহারা স্পষ্টাক্ষরে বলিতে লাগিল যে, কামান গুলি তাহাদের। তাহারা কামান অধিকার করিলেও আফিসরদিগের কোনরূপ অনিষ্টসাধনে উত্তত হইল না। তাহারা রক্ষকস্বরূপ হইয়া আফিসরদিগকে সৈনিকনিবাসে আনিল।

পদাতিগণ এইরূপে আফিসরদিগের রক্ষার ভার গ্রহণ করিল বটে, কিন্তু অস্বারোহিগণ উহাতে সান্তিশয় অসম্বৃত্ত হইল। তাহারা ইউরোপীয়দিগের শোণিতপাতে আগ্রহ প্রকাশ করিতে লাগিল। ১৫ সংখ্যক অনিয়মিত অস্বারোহিদলের একজন রেসেলাদার এই বিপ্লবের কর্তৃত্ব গ্রহণ করিল। এই ব্যক্তি ইংরেজ আফিসরদিগকে বধ করিবার জন্ত সিপাহীদিগকে উত্তেজিত করিতে লাগিল। কিন্তু গোলন্দাজগণ ও পদাতিকেরা দৃঢ়তার সহিত ইহাতে অসম্মতি প্রকাশ করিল। ইংরেজ আফিসরেরা সমস্ত রাত্রি বন্দিভাবে রহিলেন। পদাতি ও গোলন্দাজেরা তাঁহাদিগকে কেবল রক্ষা করিল না, তাঁহাদের পলায়নেরও সুবিধা করিয়া দিল। তাহারা নৌকা সংগ্রহ করিল, আফিসরদিগকে টাকা দিল। ২২ সংখ্যক দলের সৈনিকেরা আফিসরদিগকে মঙ্গল লইয়া নদীর তটে উপস্থিত হইল। নৌকা সংগৃহীত হইয়াছিল, কিন্তু মাঝি মাঝী কেহই ছিল না।

সুতরাং পলাতকেরা আপনারাই হাল ও দাঁড় ধরিয়৷ নিরাপদে ফৈজাবাদ পরিত্যাগ করিলেন ।

ইউরোপীয়গণ অক্ষতশরীরে প্রস্থান করিলেন বটে, কিন্তু সকলে বিপদ হইতে পরিত্রাণ পাইলেন না । এই সিপাহীযুদ্ধঘটিত অত্যাচার বিবরণের ঞ্চায় ফৈজাবাদের ইউরোপীয়দিগের পলায়নবৃত্তান্তও নানারূপ বিসদৃশ ঘটনায় পরিপূর্ণ । উপস্থিত বিপ্লবের সাধারণ ঘটনা—লুটতরাজ করা, ঘরদ্বার জ্বালাইয়া দেওয়া প্রভৃতির মধ্যে, পরস্পর বৈষম্য নাই । কিন্তু অত্যাচার ঘটনার মধ্যে একটির সহিত আর একটির সাদৃশ্য দেখা যায় না । অত্যাচার স্থানের ঞ্চায় ফৈজাবাদেও সম্পত্তি লুণ্ঠিত হইয়াছিল । কিন্তু অত্যাচার স্থানের উত্তেজিত সিপাহীদিগের ঞ্চায় ফৈজাবাদের সিপাহীগণ সমভাবে তাহাদের আফিসরদিগের প্রতি নির্দয়তা বা অবিষম্বৃত্তা দেখায় নাই । তাহারা কমিশনের এবং তদীয় সঙ্গীদিগকে কেবল অক্ষতদেহে যাইতে দেয় নাই, অধিকন্তু যাহাতে পলাতকেরা নিরাপদে ফৈজাবাদ হইতে পলায়ন করিতে পারে, তাহার সুবিধা করিয়া দেয় । ইংরেজেরা এই সময়ে উত্তেজিত সিপাহীদিগের একান্ত আয়ত্ত হইয়াছিলেন । সিপাহীদিগের ইচ্ছার উপর তাঁহাদের জীবন নির্ভর করিতেছিল । সিপাহীরা দয়া-প্রদর্শনে উন্মুখ না হইলে সকলকেই মেসপালের ঞ্চায় মৃত্যুমুখে পাতিত হইতে হইত । তাঁহাদের কোনরূপে বাধা দিবার ক্ষমতা ছিল না । কিন্তু সিপাহীদিগের মধ্যে সকলেই এই নিঃসহায়, নিরবলম্ব ও নিরতিশয় দুর্দশাগ্রস্ত মেসপালের নিধনে আগ্রহযুক্ত হয় নাই । কথিত আছে যে, ২২ সংখ্যক দলের সিপাহীরা পলাতকদিগকে বধ করিবার জন্ত আজিমগড়ের ১৭ সংখ্যক দলের সিপাহীদিগের নিকটে লোক পাঠাইয়াছিল । \* যাহা হউক পলাতকগণ নদীপথে গমন করিয়াও পরিত্রাণ পাইলেন না । তাঁহাদের নিকটে স্নিগ্ধকর জলপথও মৃত্যুপথ স্বরূপ হইল । তাঁহারা ৩০ মাইল পথ অতিক্রম করিয়াছেন, এমন সময়ে বেমগঞ্জের নিকটে দেখিলেন যে, তাঁহাদের দক্ষিণ পার্শ্বে পদাতি ও অশ্বারোহী সিপাহীগণ শ্রেণীবদ্ধ রহিয়াছে । ইহাদের উদ্দেশ্য সহজেই বুঝা গেল । এইখানে নদীর পরিসর অধিক ছিল না । সুতরাং পলায়ন পূর্বক আত্মরক্ষা করা অসম্ভব হইল ।

\* *Gublins, Mutinies in Oudh. p. 150.*

আজিমগড়ের ১৭ সংখ্যক পদাতিগণ আরোহীদিগের উপর গুলিবৃষ্টি করিতে লাগিল । আরোহীরা আত্মরক্ষার জন্ত নদীর অপর তটে যাইতে উদ্বৃত্ত হইলেন । এদিকে সিপাহীগণ নৌকার নদীপার হইল । সুতরাং নদীতটে উঠিয়া পলায়ন করা ব্যতীত আর কোন উপায় রহিল না । কর্গেল গোলডনে নিহত হইলেন । প্রথম হুইখানি নৌকার আরোহীরা পলায়ন করিতে গিয়া, অনেকে মৃত্যুমুখে পাতিত হইল । কেহ কেহ জলমগ্ন হইলেন । অবশিষ্ট পলাতকেরা কোনরূপে আমোরা নামক স্থানে গিয়া প্রাণরক্ষা করিলেন । এই স্থানে চতুর্থ নৌকার আরোহীরা ইঁহাদের সহিত সম্মিলিত হইলেন । সর্বসমেত আট জন পলাতক একত্র হইয়া নিরাপদে কাপ্তেনগঞ্জে উপনীত হইলেন । তেজআলি খাঁ নামক ২২ সংখ্যক দলের একজন বিশ্বস্ত সিপাহী ইঁহাদের মধ্যে ছিল । অতঃপর ইঁহারা যাবতীয় বিভিন্ন বিপত্তি হইতে নিষ্কৃতি লাভের আশায় কাপ্তেনগঞ্জ পরিত্যাগ পূর্বক আবার পথ অতিবাহনে প্রবৃত্ত হইলেন । ইঁহারা যে সকল পল্লী দিয়া যাইতে লাগিলেন, তৎসমুদয়ের প্রধানেরা ইঁহাদের সহিত সদ্ব্যবহার করিতে লাগিল । কেহ কেহ ইঁহাদের অসুবিধা দূর করিবার জন্ত টাকা এবং ঘোড়া দিল । কিন্তু ইঁহাতেও পলাতকদিগের নিষ্কৃতিলাভ হইল না । কোন পল্লীর অধিবাসিগণ সৌজন্য ও দয়ার ভাণ করিয়া, ইঁহাদের সর্বনাশসাধনে প্রবৃত্ত হইল । এই পল্লীতে মুসলমানের সংখ্যা অধিক ছিল । পল্লীবাসিগণ বন্দুক ও তরবারি লইয়া, ইউরোপীয়দিগকে আক্রমণ করিল । এই মারাত্মক অস্ত্রের আঘাতে উক্ত আট জনের প্রায় সকলেই দেহ ত্যাগ করিলেন । কেবল এক জন মাত্র ঘটনাক্রমে আপনাদের নিরতিশয় দুর্দশার ও ছরদৃষ্টের পরিচয় দিবার জন্ত জীবিত রহিলেন ।

৮ই জুন ফৈজাবাদ হইতে যে চারি খানি নৌকা যাত্রা করিয়াছিল, তাহার তিন খানির আরোহীদিগের অদৃষ্টে এইরূপ দশা ঘটিল । অযোধ্যার প্রাচীন রাজধানী অযোধ্যার প্রান্তভাগে অবশিষ্ট নৌকাখানি ঘটনাক্রমে অন্তরালে থাকাতে আক্রমণকারী সিপাহীদিগের লক্ষ্যের বহির্ভূত হইয়াছিল । এই জন্ত উক্ত নৌকার আরোহীদিগের জীবনরক্ষা হইল । ফৈজাবাদ হইতে যাহারা পলায়ন করিয়াছিলেন, তাঁহাদের ছরবস্থার কথা বিশদভাবে বর্ণিত হয় নাই । যাহারা কোনরূপে আপনাদের জীবনরক্ষার সমর্থ হইয়াছিলেন, তাঁহাদের কেহ

কেহ এই শোচনীয় ঘটনার বর্ণনা করিয়া গিয়াছেন । ষাঁহারা আত্মরক্ষার জগু অগ্নাগ্ন স্থান হইতে পলায়ন করিয়াছিলেন, তাঁহাদের পলায়নবৃত্তান্তের সহিত এই বিবরণের তাদৃশ পার্থক্য নাই । পলাতকেরা কোন স্থানে প্রচণ্ড আতপতাপে অবসন্ন হইয়াছেন । কোন স্থানে পল্লীবাসীদিগের যত্নে আহাৰ্য্য ও পানীয় পাইয়াছেন । কোন স্থানে আশ্রয়গৃহের অভাবে কষ্টের একশেষ ভোগ করিয়াছেন । তাঁহাদের সহচর বা বন্ধু, তাঁহাদের নিকটে দেহত্যাগ করিয়াছেন । তাঁহাদিগকে এই মর্ষভেদী, শোচনীয় দৃশ্য নিস্তরুভাবে দেখিতে হইয়াছে । তাঁহাদের পরমস্নেহের ধন, বাৎস্যল্যের অদ্বিতীয় অবলম্বন, প্রাণাধিক শিশুসন্তান তাঁহাদের ক্রোড়ে হৃৎসহ যাতনা পাইয়া, অনন্ত নিদ্রায় অভিভূত হইয়াছে । তাঁহারা অশ্রুপূর্ণ নয়নে ইহা দেখিয়া, আবার বিপত্তিপূর্ণ পথ অতিবাহনে প্রবৃত্ত হইয়াছেন । পলাতকদিগের পলায়নবৃত্তান্ত এইরূপ শোচনীয়ভাবে পরিপূর্ণ । ষাঁহারা ফৈজাবাদ হইতে নৌকায় আরোহণপূর্বক প্রস্থান করিয়াছিলেন, তাঁহাদের মধ্যে একটি কুলমহিলা আপনার কতিপয় শিশুসন্তানের সহিত নৌকা পরিত্যাগ পূর্বক পলায়ন করেন । ইনি আপনার পলায়নবৃত্তান্তের বর্ণনা করিয়াছেন । এই বর্ণনাতেও পূর্বোক্ত বিচিত্র ঘটনার সমাবেশ হইয়াছে । ইনি কখনও অনাবৃত স্থলে রাত্রিযাপন করিয়াছেন, কখনও অনলকণাসদৃশ রৌদ্র-তাপে নিপীড়িত হইয়াছেন, কখনও পানীয় বা আহাৰ্য্যের অভাবে একান্ত অবসন্ন হইয়া পড়িয়াছেন । ইঁহার সন্তানগুলি পীড়িত হইয়া, ইঁহাকে অধিকতর কষ্ট দিয়াছে । পল্লীবাসীদিগের কেহ কেহ উত্তেজিত সিপাহীদিগের ভয়ে ইঁহার সাহায্য করিতে অসম্মত হইয়াছে । কেহ কেহ বলবতী দয়ার আকর্ষণ পরিহার করিতে না পারিয়া, সভয়চিত্তে ইঁহাকে উপযুক্ত আশ্রয়স্থল, সুখাণ্ড আহারীয় ও সুশীতল পানীয় দিয়াছে । ইঁহার শিশুসন্তানদিগকে একান্ত অবসন্ন দেখিয়া, দয়াবতী ধাত্রী উহাদের পরিচর্যা করিয়াছে । রাজা মানসিংহ ইঁহার সাহায্য করিয়াছেন । এইরূপ নানা কষ্ট ভোগ করিয়া, ইনি ভারতবাসীর অনন্ত দয়ায় এবং সৌজন্তে প্রাণ রক্ষা করেন । কোন কোন পলাতক গোরক্ষপুরের অভিমুখে প্রস্থান করিয়াছিলেন । পথে ইঁহারা অবরুদ্ধ হইলেন । অবরোধকারিগণ ইঁহাদিগকে উত্তেজিত সিপাহীদিগের হস্তে সমর্পণ করিতে উদ্বৃত্ত হইয়াছিল । এমন সময়ে মহম্মদ হোসেন খাঁ নামক এক ব্যক্তির অনুচর-

গণ ইঁহাদিগকে রক্ষা করেন। মহম্মদ হোসেন খাঁ ইঁহাদিগকে আশ্রয় দেন, পরে গোরক্ষপুরের মাজিষ্ট্রেট ইঁহাদিগকে জানিবার জন্ত রক্ষক পাঠাইয়া দেন। ফৈজাবাদ হইতে যে মহিলা শিশুসন্তান লইয়া পলাইয়াছিলেন, তাঁহার সহিত আরও কতিপয় পলাতক সম্মিলিত হইলেন। ইঁহাদেরও দুর্দশার একশেষ হইয়াছিল। ইঁহাদের একজনের একটি সন্তানের মৃত্যু হয়। ইঁহাদের নিকটে সমাধি দিবার কোনরূপ উপকরণ ছিল না। ইঁহারা হাত দিয়া গর্ত করিয়া, কোনরূপে এই শিশুর সমাধিক্রিয়া সম্পন্ন করেন। যঁহারা উপস্থিত বিপ্লবে প্রাণের দায়ে উদ্ভ্রান্ত হইয়া, আশ্রয়স্থানপ্রাপ্তির আশায় নানা দিকে ধাবিত হইয়াছিলেন, তাঁহাদের অদৃষ্টে এইরূপ কষ্ট, এইরূপ যাতনা, এইরূপ শোকতাপ ভিন্ন আর কিছুই ঘটে নাই।

ফৈজাবাদের দেওয়ানিবিভাগের চারি জন ইংরেজ কর্মচারী আত্মরক্ষার জন্ত নৌকায় আশ্রয় গ্রহণ করেন নাই। বিপ্লবের সময়ে ইঁহারা, অনুচর এবং কুলকামিনী ও বালকবালিকাদিগের সহিত মানসিংহের সাহায্যপ্রাপ্তির আশায় ১১ই জুন শাহগঞ্জ উপনীত হইলেন। এই সময়ে মানসিংহ শাহগঞ্জে ছিলেন না, সিপাহীদিগের উত্তেজনায় কি ঘটতেছে, জানিবার জন্ত অযোধ্যায় গিয়াছিলেন। এই স্থান হইতে তিনি বলিয়া পাঠাইলেন যে, কুলকামিনী ও বালকবালিকারা তাঁহার আশ্রয়ে থাকিতে পারে, কিন্তু তিনি পুরুষদিগকে আশ্রয় দিতে পারিবেন না। পুরুষেরা যেন শীঘ্রই প্রস্থান করেন, যেহেতু সিপাহীরা ইউরোপীয়দিগের অনুসন্ধানের জন্ত কল্যাণ তাঁহার বাড়ীতে হাইবে। সিপাহীদিগের আসিবার দিনেই নৌকা সংগৃহীত হইল। ৩৮ জন নদীর অভিমুখে যাত্রা করিলেন। ইঁহাদের উনত্রিশ জন নৌকায় চড়িয়া সূর্যোদয়ের প্রাক্কালে ফৈজাবাদের নয় মাইল দূরে গমন করিলেন। নদীতটে আসিবার সময়ে অপর নয় জনের গাড়ি ভাঙ্গিয়া গেল। সুতরাং ইঁহারা নৌকা ধরিতে না পারিয়া, শাহগঞ্জে ফিরিয়া গেলেন। অতঃপর ইঁহাদিগকে গোরক্ষপুরে পাঠান হয়। এ দিকে নৌকারোহিগণ গোপালপুরের রাজার সাহায্যে নিরাপদে দানাপুরে উপনীত হইলেন।

ইউরোপীয়দিগের পলায়নবিবরণে, ভারতবর্ষীয়দিগের এইরূপ দয়্যার পরিচয় পাওয়া যায়। এ সময়ে ভারতের দুঃখিনী নারীরাও আপনাদের জীবন

সঙ্কটাপন্ন করিয়া বিপন্নদিগের উদ্ধারসাধনে যত্নবতী হইয়াছে। এক দিকে যেমন নরহত্যা, নরশোণিতপ্রবাহের ভয়ঙ্কর ভাব প্রকাশ পাইয়াছে, অপর দিকে সেইরূপ অসামান্য দয়া, অপরিমিত কোমলতা এবং অপরিমেয় সমবেদনার দৃশ্য পরিষ্কৃত হইয়াছে। এই শেষোক্ত প্রকারের একটি ঘটনা এ স্থলে বিবৃত হইতেছে।

ফৈজাবাদের ডেপুটি কমিশনের কাছারিতে গিয়া শুনিলেন, সেনানিবাসের সিপাহীগণ যুদ্ধোন্মুখ হইয়াছে। তিনি এই সংবাদ শুনিবামাত্র একজন বিশ্বস্ত চাপরাসী দ্বারা, আপনার স্ত্রীকে, অবিলম্বে সমুদয় সম্পত্তি পরিত্যাগপূর্বক, নদীতটে যাইতে বলিয়া পাঠাইলেন। এই চাপরাসী তাঁহার স্ত্রীর সহিত যাইবার জন্ত আদিষ্ট হইল। সহধর্মিণীর নিকটে সংবাদ পাঠাইয়া, ডেপুটি কমিশনের কার্যালয়রোধে সেনানিবাসে গমন করিলেন। এদিকে কমিশনের পত্নী শিবিকারোহণে বিশ্বস্ত ভৃত্যের সহিত নদীকূলের অভিমুখে যাইতে লাগিলেন। সিপাহীগণ এই সময়ে সম্পত্তিলুণ্ঠনের নিমিত্ত চারি দিকে ঘুরিয়া বেড়াইতে লাগিল। ভীতা ও অসহায়া ইংরেজমহিলা সন্ধ্যাসমাগমে কোন এক পল্লীতে প্রবেশ করিলেন। একটি দয়াশীলা পল্লীবাসিনী আপনার জীবন সঙ্কটাপন্ন করিয়াও, তাঁহাকে স্বকীয় গৃহে আশ্রয় দিয়া, একটি অব্যবহার্য তুন্দুরের মধ্যে লুকাইয়া রাখিল। এদিকে বাহকগণ শিবিকা নদীকূলে রাখিয়া প্রস্থান করিল। কমিশনের পত্নী ভয়বিহ্বলচিত্তে সমস্ত রাত্রি, সেই তুন্দুরের মধ্যে লুকায়িত রহিলেন। রাত্রিকালে সিপাহীরা উক্ত গ্রামে প্রবেশ করিয়া, চারি দিকে পলায়িত ইংরেজপুরুষ ও ইংরেজরমণীর অনুসন্ধান প্রবৃত্ত হইল এবং পলায়িত ও আশ্রিতদিগকে বাহির করিয়া না দিলে, প্রাণসংহার করা হইবে বলিয়া, গ্রামবাসীদিগকে ভয় দেখাইতে লাগিল। আপনার জীবনহানির সম্ভাবনা জানিয়াও, কোমলহৃদয়া আশ্রয়দাত্রী নিরাশ্রয়া ইংরেজমহিলাকে উত্তেজিত সিপাহীদিগের হস্তে সমর্পণ করিল না। যখন ঐ রমণী গ্রামে প্রবেশ করেন, তখন গ্রামের পুরুষেরা কৃষিক্ষেত্রের কার্যে ব্যাপ্ত ছিল, সুতরাং তাহাদের অনেকে ঐ বিষয় অবগত ছিল না। কিন্তু গ্রামের অধিকাংশ মহিলা ঐ বিষয় জানিত, তথাপি তাহাদের কেহই উহা প্রকাশ করিল না। ভয়ব্যাকুলা বিদে-

শী, দরিদ্রা আশ্রয়দাত্রীর অনুগ্রহে তুন্দুরের অভ্যন্তরে নীরবে সমস্ত রাত্রি



যাপন করিলেন । ক্রমে ভয়াবহ কোলাহলের শাস্তি হইল, সিপাহীগণ স্থানান্তরে চলিয়া গেল । রাত্রি প্রভাত হইলে, ডেপুটি কমিশনরের পূর্বোক্ত বিশ্বস্ত ভৃত্য, মহারাজ মানসিংহের নিকটে গিয়া, একখানি নৌকা প্রার্থনা করিল । মানসিংহ বিপন্নের উদ্ধারার্থে ভৃত্যের প্রার্থনা পূর্ণ করিলেন । ডেপুটি কমিশনরের পত্নী ও অপর কয়েকটি ইউরোপীয় মহিলা আপনাদের সম্মানবর্গের সহিত নৌকার অভ্যন্তরে প্রবেষ্ট হইলেন । বহির্ভাগে সমভিব্যাহারী কতিপয় বিশ্বস্ত ভৃত্য ও সিপাহী বসিয়া রহিল, এবং উহা তীর্থযাত্রীর নৌকা বলিয়া, সাধারণের নিকটে ভাণ করিতে লাগিল । দুই এক স্থানে ইহাদের সহিত উত্তেজিত সিপাহীদিগের সাক্ষাৎ হইয়াছিল, কিন্তু নৌকার অভ্যন্তরে পলাতক ইউরোপীয় আছে, ইহা সিপাহীগণ বুঝিতে পারে নাই । সন্ধ্যা উপস্থিত হইলে, নৌকা কোন নিরাপদ স্থানে লাগাইয়া, কয়েক জন ভৃত্য ছুফ ও রুটীর জন্ত, নিকটবর্তী পল্লীতে গমন করিল । এখানেও পল্লীবাসীগণ বিপন্ন পলাতকদিগের সাহায্য করিতে বিমুখ হইল না । একটি দয়াবতী রমণী শিশু-গুলিকে ক্ষুধার্ত দেখিয়া, দ্রুতগতি গ্রামে প্রবেশ করিল, এবং কয়েকটি ছুফবতী ধাত্রী সঙ্গে করিয়া, নৌকার নিকটে উপস্থিত হইল । ইউরোপীয় মহিলাগণ আত্মসহকারে ইহাদিগকে নৌকায় উঠাইলেন ; ইহারা আপনাদের স্তম্ভদানে শিশুদিগের তৃপ্তিসাধন করিল । সিপাহীগণ জানিতে পারিলে, এই আশ্রয়দাত্রী ও সাহায্যকারিণী মহিলাদিগের প্রাণসংহার করিত । আপনাদের জীবন এইরূপ সংশয়াপন্ন করিয়াও, উক্ত রমণীগণ বিপন্নদিগের যথাশক্তি সাহায্য করে । এইরূপ সাহায্য পাইয়া, উক্ত কুলকামিনীগণ নিরাপদে এলাহাবাদে উপনীত হইলেন । ডেপুটি কমিশনর ও তাঁহার সহধর্মিণী এই মহত্বপূর্ণ কার্য বিন্মৃত হইলেন নাই । যুদ্ধের অবসান হইলে, তাঁহারা উক্ত দয়াবতী মহিলাদিগকে যথোচিত পুরস্কৃত করিয়াছিলেন ।

সুলতানপুর জেলার প্রধান নগর সুলতানপুর গেমতীর দক্ষিণভাগে অবস্থিত । এই স্থানে ১৫ সংখ্যক অনিয়মিত অশ্বারোহীদের শিবির সুলতানপুরে ছিল । এতদ্ব্যতীত ৮ সংখ্যক অনিয়মিত পদাতিদল এবং কতকগুলি অস্ত্রধারী পুলিশপ্রহরী অবস্থিতি করিতেছিল । কর্নেল ফিসার ইহাদের অধিনায়ক ছিলেন । এই জুন সুলতানপুরের দেওয়ানিবিভাগের প্রধান কর্মচারী

সংবাদ পাইলেন যে, স্থানান্তরের উত্তেজিত সিপাহীগণ সুলতানপুরের সিপাহী-দিগের সহিত সম্মিলিত হইয়া, ইউরোপীয়দিগের নিধনের চেষ্টা করিতেছে। তৎপরদিনেও এইরূপ আতঙ্কজনক সংবাদ সুলতানপুরে পৌঁছিল। কর্ণেল ফিসার ৭ই তারিখে দুই জন আফিসরকে সঙ্গে দিয়া, কুলমহিলাদিগকে এলাহাবাদে পাঠাইলেন। ৯ই জুন প্রাতঃকালে সৈনিকেরা ইউরোপীয়দিগের বিরুদ্ধে সমুখিত হইল। কর্ণেল স্বরিতগতিতে সৈনিকবাসে গিয়া, সিপাহীদিগকে প্রশান্তভাবে ও স্নেহসহকারে আপনাদের কর্তব্যসাধনের জন্ত বঝাইতে লাগিলেন। ইহার মধ্যে একজন নজীব কর্ণেলের পৃষ্ঠদেশে গুলির আঘাত করিল। কর্ণেল আপনার সৈনিকদিগের সম্মুখে সাজঘাতিকরূপে আহত হইয়া পড়িয়া গেলেন। যাহারা তাঁহার স্নেহের পাত্র ছিল, যাহাদিগকে তিনি কর্তব্যসম্পাদনে দৃঢ়প্রতিজ্ঞ হইবার জন্ত ধীরভাবে উপদেশ দিতেছিলেন, তাহারা এইরূপে তদীয় উপদেশের সম্মান রক্ষা করিল। তাহাদের কেহই এ সময়ে আসন্নমৃত্যু অধিনায়কের সাহায্যের জন্ত উপস্থিত হইল না। টুকার নামক একজন সেনানায়ক কর্ণেলকে ডুলীর মধ্যে স্থাপন করিলেন। এই ডুলীর পাশ্বেই আর একজন সেনানায়ক নিহত হইলেন। এদিকে কর্ণেল ফিসারেরও মৃত্যু-যাতনার অবসান হইল। সিপাহীরা এইরূপে আপনাদের অধিনায়কদিগের শোণিতপাত করিয়া, টুকার সাহেবকে পলাইতে হইল। টুকার অশ্বারোহণ-পূর্বক প্রাণের দায়ে গোমতীর অভিমুখে ধাবিত হইলেন। গোমতীতটে দড়িয়ানাংক স্থানে রোস্তম শাহ নামক একজন তালুকদারের একটি দুর্গ ছিল। চারি দিকে বহুবিস্তৃত নিবিড় জঙ্গলে এই দুর্গ পরিবেষ্টিত ছিল। ভূমির অভিনব বন্দোবস্তে রোস্তম শাহ নিরতিশয় ক্ষতিগ্রস্ত হইয়াছিলেন। রাজপুরুষেরা তাঁহার অনেক জমী অগ্নায়পূর্বক আধকার করিয়াছিলেন। কিন্তু ইংরেজ রাজপুরুষদিগের অগ্নয়াচরণেও এই ধীরপ্রকৃতি তালুকদারের হৃদয়ে ইংরেজের প্রতি বিদ্বেষভাব উদ্দীপিত হয় নাই। যাহাদের বিচারে তাঁহার ক্ষতি হইয়াছিল, দয়া ও সৌজন্তের বশীভূত হইয়া, তিনি এ সময়ে তাঁহাদেরই উপকারসাধনে উদ্বৃত্ত হইলেন। নিরাশ্রয় ও বিপন্ন টুকার সাহেব তাঁহার দুর্গে আশ্রয় গ্রহণ করেন। ইহার সহিত আরও কতিপয় পলাতক সম্মিলিত হইলেন। আশ্রয়দাতা তালুকদারের সদয়ব্যবহারে আশ্রিতদিগের সর্ববিষয়ে শান্তিলাভ হয়। বারা-

গমার কমিশনের হেনরি টুকার অতঃপর ইঁহাদিগকে আপনার নিকটে আনয়ন করেন । কিন্তু সুলতানপুরের দেওয়ানিবিভাগের কর্মচারীদিগের অদৃষ্ট এইরূপ প্রসন্ন হয় নাই । দুইজন কর্মচারী সুলতানপুরের জাসিন্ খাঁ নামক একজন জমীদারের গৃহে আশ্রয় গ্রহণ করেন । জাসিন্ খাঁ বাহিরে ইঁহাদের প্রতি বন্ধুত্ব ও সদয়ভাব প্রকাশে ক্রটি করে নাই । কিন্তু শেষে তাহার বিশ্বাসঘাতকতা পরিস্ফুট হয় । আশ্রয়দাতা আশ্রিতদিগকে আপনার গৃহ হইতে বাহির করিয়া দেয় । তাহার ইচ্ছানুসারে উভয় কর্মচারী বন্দুকের গুলিতে নিহত হইলেন । অযোধ্যার ভূস্বামীদিগের পক্ষে এইটি কেবল বিশ্বাসঘাতকতার একমাত্র দৃষ্টান্ত, রাজপুরুষদিগের গোচর হইয়াছিল ।

এইরূপে সুলতানপুরে ইউরোপীয়দিগের প্রাধান্য অস্তহিত হইল । অগ্রান্ত স্থানের উত্তেজিত লোকে আপনাদের কৃতকার্য্যতায় উৎফুল্ল হইয়া যেরূপ উৎসব করিয়াছিল, ইউরোপীয়দিগের নিধনে ও অপসারণে সুলতানপুরেও তাহার অনুষ্ঠান হইল । ইংরেজদিগের বাসগৃহ ভস্মীভূত এবং দ্রব্যাদি বিলুপ্ত হইল । গৃহদাহজনিত প্রজ্বলিত অনলস্বূপ কিয়ৎকালের জন্য উত্তেজিত সিপাহীদলের আয়োদ বর্দ্ধন করিল । এইরূপ আয়োদের পর সিপাহীরা নবাবগঞ্জের অভিমুখে প্রস্থান করিল ।

কৈজাবাদবিভাগের আর একটি স্থানে সৈনিকনিবাস ছিল । অযোধ্যার

১ সংখ্যক পদাতিদলের প্রধান অংশ সলোনিতে অবস্থিতি করিতে-  
সলোনি ।

ছিল । মে মাস এবং জুন মাসের প্রথম সপ্তাহ পর্য্যন্ত এ স্থলে কোনরূপ গোলযোগ ঘটে নাই । সিপাহীগণ প্রশান্তভাবে ছিল । লোকে ধীরভাবে আপনাদের নির্দিষ্ট কর্ম করিতেছিল । জমীদারগণ নিয়মিতরূপে গবর্ণমেন্টের প্রাপ্য খাজানা দিতেছিলেন । প্রগাঢ় শান্তির সময়ে লোকে যে ভাবে থাকে, যেরূপে কর্ম করে, যে নিয়মে সংসারযাত্রানির্ব্বাহে অগ্রসর হয়, সালোনির অধিবাসীদিগের মধ্যে তাহাই পরিলক্ষিত হইতেছিল । সুতরাং কর্তৃপক্ষ সহসা কোনরূপ বিপ্লবের আশঙ্কা করেন নাই । কিন্তু যখন তাঁহারা সংবাদ পাইলেন যে, কৈজাবাদ ও সুলতানপুরের সিপাহীগণ গবর্ণমেন্টের বিরুদ্ধাচরণে প্রবৃত্ত হইয়াছে, তখন তাঁহাদের স্পষ্ট বোধ হইল যে, সলোনির সিপাহীগণ দীর্ঘকাল বিশ্বস্তভাবে থাকিবে না । ৯ই জুন এই সিপাহীদিগের মধ্যে

উত্তেজনার নিদর্শন লক্ষিত হয়। ১০ই জুন ইহারা প্রকাশ্যভাবে ব্রিটিশ কোম্পানির বিপক্ষ হইয়া উঠে। কিন্তু উত্তেজিত সিপাহীদিগের বিপক্ষতায় অন্যান্য স্থানে যে ভয়াবহ ব্যাপারের অনুষ্ঠান হইয়াছিল, সালোনিতে তাহা অনুষ্ঠিত হয় নাই। এই স্থানে কোন ইউরোপীয়ের জীবনহানি ঘটে নাই। কোন ইউরোপীয় আপনার সমক্ষে প্রীতিভাজন বন্ধুজনকে বিপক্ষের অস্ত্রাঘাতে দেহত্যাগ করিতে দেখেন নাই। এই স্থানের সিপাহীগণ আপনাদের প্রাধান্যঘোষণা করে। কারাগারের কয়েদীদিগকে বিমুক্ত করিতে অগ্রসর হয়। কিন্তু তাহারা আফিসরদিগের অমূল্য জীবন রক্ষা করিতে ক্রটি করে নাই। তাহারা আফিসরগণের রক্ষকস্বরূপ হইয়া নগরের বহির্ভাগ পর্য্যন্ত গমন করে। ২০ জন বিশ্বস্ত সিপাহী এই সময়ে আপনাদের অধিনায়ককে পরিত্যাগ করে নাই। ইউরোপীয়গণ এইরূপে বিপদ হইতে পরিত্রাণ পাইয়া, দরাওপুর নামক স্থানের দুর্গে উপনীত হইলেন। এই দুর্গ রাজা হনুমন্ত সিংহ নামক একজন তালুকদারের অধিকৃত ছিল। রস্তুম শাহের গায় রাজা হনুমন্ত সিংহও ভূমিঘটিত বন্দোবস্তে সাতিশয় ক্ষতিগ্রস্ত হইয়াছিলেন। রস্তুম শাহের গায় তিনিও এ সময়ে বিপন্ন ইংরেজদিগের প্রতি অপরিমিত প্রীতি প্রকাশ করেন। তাঁহার উদারতা, তাঁহার হিতৈষিতা, তাঁহার মহানুভাবতা, এ সময়ে পরিস্ফুট হয়। যে জাতির লোকে তাঁহাকে উৎসন্ন প্রায় করিয়াছিল, উপস্থিত সঙ্কটকালে তাঁহার যত্নে সেই জাতির বিপন্ন ব্যক্তিদিগের বিঘ্নবিপত্তি দূর হয়। তিনি সালোনির বিপন্ন ইউরোপীয়দিগকে আপনার দুর্গে আশ্রয় দেন। তান ইঁ হাদের পরিচর্যার দিকে দৃষ্টি রাখেন। তিনি ইঁ হাদের সহিত দেখা করিয়া, সমুদয় বিষয়ের বন্দোবস্ত করেন। যখন ইউরোপীয়গণ ইঁ হার নিকট বিদায় গ্রহণ করেন, তখন তাঁহাদের একজন ইঁ হাকে কহিলেন যে, বিপ্লবের শাস্তি হইলে তিনি তদীয় প্রণষ্ট বিষয়ের উদ্ধারে সহায়তা করিবেন। এই কথায় উদারপ্রকৃতি তালুকদার সোজাভাবে দাঁড়াইয়া উত্তর করিলেন—“সাহেব! আপনাদের দেশের লোকে এই দেশে আসিয়া আমাদের রাজাকে তাড়াইয়া দিয়াছে। আপনারা আমাদের ভূসম্পত্তির দলীলপত্রীক্ষার জন্ত আপনাদের কর্মচারীদিগকে চারি দিকে পাঠাইয়াছেন। যে সম্পত্তি স্বরণাতীত কাল হইতে আমার বংশের দখলে রহিয়াছিল, আপনারা তাহা লইয়াছেন। আমি আপনাদের আদেশের বিরুদ্ধে দণ্ডায়মান হই নাই। এখন

সহসা আপনাদের অদৃষ্ট পরিবর্তিত হইয়াছে । এই দেশের লোকে আপনাদের বিরোধী হইয়া উঠিয়াছে । আপনারা যাহাকে সম্পত্তিচ্যুত করিয়াছেন এখন তাহারই নিকটে উপস্থিত হইয়াছেন । আমি আপনাদিগকে রক্ষা করিয়াছি । কিন্তু এখন—এখন আমি আমার সশস্ত্র অনুচরদিগকে লইয়া লক্ষ্মী যাইব এবং আপনাদিগকে এই দেশ হইতে তাড়াইতে চেষ্টা করিব” ।\* রাজা হনুমন্ত সিংহ গম্ভীরভাবে এই কথা কহিয়া, আশ্রিত ইউরোপীয়দিগকে বিদায় দিয়াছিলেন । সন্তোষের বিষয় এই যে, বিপ্লবের শাস্তি হইলে এই সদাশয় তালুকদারকে তাঁহার সম্পত্তি ফিরাইয়া দেওয়া হইয়াছিল । সলোনির ইউরোপীয়গণ রাজা হনুমন্তের সাহায্যে নিরাপদে এলাহাবাদে উপনীত হইলেন । এই সময়ে অপরাপর সম্ভ্রান্ত ব্যক্তিগণও বিপ্লবদিগের যথোচিত সাহায্য করিয়াছিলেন ।

বহরইচবিভাগের মধ্যে বহরইচ, গণ্ডা এবং মোল্লাপুর বা মলাপুর জেলা ।

প্রথম দুইটি ঘর্ষরানদীর বাম তটে এবং তৃতীয়টি উহার দক্ষিণ তটে বহরইচ ।

অবস্থিত । উপস্থিত সময়ে চার্লস উইলফীল্ড ( পরে সার্ চার্লস উইলফীল্ড ) এই বিভাগের কমিশনার ছিলেন । ইনি বহরইচে থাকিতেন । এই ষ্টেশন ব্যতীত পশ্চিমে মটপুর, দক্ষিণে সিক্রোরা, দক্ষিণপশ্চিমে গণ্ডা অবস্থিত । ইহার মধ্যে সিক্রোরা প্রধান সৈনিক ষ্টেশন । ১৮৫৭ অব্দের মে মাসে সিক্রোরার সৈনিকনিবাসে একদল অখারোহী, একদল পদাতি এবং অযোধ্যার অনিয়মিত সৈনিকদলের গোলন্দাজ সৈনিক ছিল । কাপ্তেন বোনিও এই সকল সৈনিকদলের অধিনায়ক ছিলেন ।

যখন মিরাত এবং দিল্লীর সংগাদ বহরইচে উপস্থিত হয়, তখন তত্রত্য সৈনিকদিগের মধ্যে কোনরূপ অসন্তোষ বা উত্তেজনা দেখা যায় নাই । সিপাহীরা পূর্বের ঞায় রাজভক্তির পরিচয় দিতেছিল, পূর্বের ঞায় বিশ্বস্তভাবে আপনাদের কর্ম সম্পাদন করিতেছিল, পূর্বের ঞায় সন্তোষসহকারে আপনাদের অধিনায়কদিগের প্রতি শ্রদ্ধা দেখাইতেছিল । কিন্তু কেবল মিরাত এবং দিল্লীর ঘটনার উপস্থিত বিপ্লবের পরিসমাপ্তি হয় নাই । মিরাতে যাহার আবির্ভাব হইয়াছিল, দিল্লীতে যাহার বিস্তৃতি ঘটয়াছিল, তাহা অগ্ণাত সৈনিকনিবাসেও পরিব্যাপ্ত

\* *Mulleson, Indian Mutiny, Vol. I. p. 407, note.*

হইয়া পড়ে । এক সৈনিকনিবাস হইতে আর এক সৈনিকনিবাসে এই বিপ্লবের সংবাদ উপস্থিত হয় । প্রতি সৈনিকনিবাস উহাতে আন্দোলিত হইয়া উঠে । এইরূপ বিপ্লবের অভিঘাতে বহুইচবিভাগেরও সম্ভাড়িত হইবার সম্ভাবনা ছিল । সুতরাং কমিশনর সাহেব নিশ্চিন্ত থাকিতে না পারিয়া, মহিলা ও বালকবালিকাদিগকে উপযুক্ত রক্ষক সঙ্গে দিয়া, লক্ষ্মীতে পাঠাইয়া দিলেন । তিনি স্বধর্ম্মাবলম্বীদিগের রক্ষার জন্তও নিশ্চেষ্ট রহিলেন না । অযোধ্যা ব্রিটিশ কোম্পানির অধিকৃত হওয়াতে তালুকদারদিগের যার পর নাই ক্ষতি হইয়াছিল । এখন এই তালুকদারগণই উপস্থিত সঙ্কটকালে ব্রিটিশ কর্মচারীদিগের প্রধান রক্ষক হইলেন । পূর্বে এইরূপ কতিপয় তালুকদারের মহানুভাবতার বিষয় বিবৃত হইয়াছে । বহুইচবিভাগের কমিশনরও আপনাদের রক্ষার জন্ত তালুকদারদিগের সাহায্য প্রার্থনা করেন । ইঁহাদের মধ্যে বলরামপুরের রাজা শ্যাম দিগ্বিজয় সিংহ প্রধান । ইনি কমিশনর সাহেবের বন্ধু ছিলেন । ইনি ইংরেজদিগের বিপদে উৎফুল্ল হইয়েন নাই । ইংরেজদিগকে অধিকতর বিপন্ন করিতে ইনি যত্ন বা উৎসাহের পরিচয় দেন নাই । উইঙ্গ্ ফীল্ড সাহেবের প্রার্থনাপূরণে ইঁহার আগ্রহ পরিস্ফুট হয় । কমিশনর সাহেব আপনাদের বিপত্তিকালে ইঁহাকে প্রধান সহায় মনে করিয়া আশ্বস্ত হইয়েন ।\*

একদা সহসা রাত্ৰিকালে জনরব উঠিল যে, সিপাহীগণ গবর্ণমেন্টের বিরুদ্ধাচরণে উত্তত হইয়াছে । মহিলা ও বালকবালিকাগণ লক্ষ্মীতে প্রেরিত হইলে, আফিসরেরা কমিশনরের গৃহে শয়ন করিতেন । এখন সিপাহীদিগের সম্মুখান-বার্তা শুনিয়া, ইঁহারা গভীর নিশীথের অন্ধকারের মধ্যে সৈনিকনিবাসের দিকে ধাবিত হইলেন । গোলন্দাজেরা তাঁহাদের আদেশপালনে অগ্রসর হইল । কিন্তু এ সময়ে সিপাহীদিগের বিরুদ্ধাচরণের কোন চিহ্ন দেখা গেল না । আফিসরেরা আপনাদের শয়নগৃহে প্রত্যাঘর্জন করিলেন । সৈনিকনিবাস নিশীথের নিস্তর-ভাবের মধ্যে নিমগ্ন রহিল ।

এই স্থানের সিপাহীদিগের উত্তেজনাসম্বন্ধে অন্তরূপ কথার উল্লেখ হইয়া

\* দিগ্বিজয় সিংহ অতঃপর কে. সি. এস. আই. উপাধিতে ভূষিত এবং গবর্ণর-জেনারেলের কৌন্সিলের সদস্য হইলেন ।

থাকে । সিপাহীদিগের মধ্যে আশঙ্কা জন্মিয়াছিল যে, রাত্রিকালে যখন তাহারা নিদ্রিত থাকিবে, তখন তাহাদিগকে গুলি করিয়া বধ করা হইবে । এইরূপ কাল্পনিক আশঙ্কায় তাহারা সাতিশয় উদ্বিগ্ন হইয়া উঠে । উদ্বিগ্নের আবেগ ক্রমে উত্তেজনায় পরিণত হয় । ইহাতে অধিনায়কের স্পষ্ট বোধ হইল যে, সৈনিকদল তাঁহার বশবর্তী থাকিবে না । তিনি প্রতিমুহূর্ত্তে ঘোরতর বিপ্লবের আশঙ্কা করিতে লাগিলেন । স্যার হেনরি লরেন্স দেওয়ানি এবং সৈনিকবিভাগের অধ্যক্ষদিগের নিকট লিখিয়াছিলেন যে, যদি বিপ্লব ঘটে, তাহা হইলে আপনাদিগকে নিরাপদ করিবার জন্ত তাঁহাদের সকল বিষয়ে স্বাধীনতা থাকিবে । সর্কাগ্রে কমিশনর উইল্ফীল্ড সাহেব এই উপদেশের সম্মান রক্ষা করিলেন । তিনি অশ্বারোহণপূর্বক সায়ন্তন বায়ুসেবনচ্ছলে বহির্গত হইয়া, সবেগে গণ্ডার অভিমুখে ধাবিত হইলেন ।

এই সময়ে গণ্ডায় কোনরূপ গোলযোগ ঘটে নাই । কাছারিতে বিচারক-

গণ নিরুদ্ধে কৰ্ম করিতেছিলেন । সৈনিকনিবাসের সিপাহীগণ গণ্ডা ।

প্রশান্তভাবে ছিল । মে মাসের শেষ পর্য্যন্ত এইরূপ প্রশান্তভাবে

অব্যাহত থাকে । জুন মাসের প্রথম সপ্তাহে সাধারণের মধ্যে ভাবান্তর লক্ষিত হইতে থাকে । কিন্তু ইহাতে কোন বিষয়ে কোনরূপ অশৃঙ্খলা বা কোনরূপ গোলযোগের সূত্রপাত হয় নাই । সিপাহীগণ দৃঢ়তার সহিত কহে যে, তাহারা কখনও নিমকের সম্মানরক্ষায় উদাস্ত প্রকাশ করিবে না । কিন্তু যখন উইল্ফীল্ড সাহেব ফৈজাবাদ ও সিক্রোরার সংবাদ লইয়া উপস্থিত হইলেন, তখন গণ্ডার সিপাহীদিগের বিশ্বস্ততা সম্বন্ধে কর্তৃপক্ষের সন্দেহ জন্মিল । সিপাহীরা যদিও বিশ্বস্তভাবে থাকিতে আগ্রহ প্রকাশ করিতে লাগিল, তথাপি অধিনায়কদিগের সন্দেহ দূর হইল না । উইল্ফীল্ড সাহেব দেওয়ানি কৰ্ম-চারীর সহিত বলরামপুরের অভিমুখে পলায়ন করিলেন । বলরামপুররাজ ইহাদিগকে আশ্রয় দিলেন, এবং কয়েকদিন পরে উপযুক্ত রক্ষক সঙ্গে দিয়া, গোরক্ষপুরে পাঠাইয়া দিলেন । পথে অণু একজন সদয়প্রকৃতি রাজার সাহায্যে ইহারা নিরাপদে গোরক্ষপুরে উপনীত হইলেন । গণ্ডার সৈনিকদলের অধিনায়ক এবং তাঁহার সহযোগী আপনার লোকদিগকে প্রশান্তভাবে ঐ স্থানে রাখিলেন । কিন্তু পরে যখন তাঁহারা দেখিলেন যে, তাঁহাদের প্রয়াস

কোন অংশে সফল হইবে না, তখন তাঁহারা ঐ স্থানে না থাকিয়া, পর দিন সিক্রোরার কতিপয় আফিসরের সহিত বলরামপুরের অভিমুখে প্রস্থান করিলেন ।

এইরূপে গণ্ডা ও সিক্রোরা হইতে শ্বেতপুরুষগণ আপনাদের প্রাণের দায়ে পলায়ন করিলেন । কেবল একজন মাত্র সাহসী সেনানায়ক—বন্হাম আপনাদের প্রাধান্যরক্ষার আশায় শেষোক্ত স্থল রহিলেন । এই অধিনায়ক গোলন্দাজদলে অধ্যক্ষতা করিতেন । ইঁহার সৈনিকগণ আপাততঃ ইঁহার প্রতি অনুরক্ত রহিল, ইঁহার আদেশপালনে আগ্রহ দেখাইতে লাগিল, ইঁহার বিপত্তিনিবারণে সতর্কতার পরিচয় দিতে লাগিল । কমিশনের অগ্র স্থানের অভিমুখে ধাবিত হইয়াছিলেন । পদাতিদলের আফিসরেরা স্থানান্তরে প্রস্থান করিয়াছিলেন \*, ব্রিটিশ কোম্পানির আধিপত্যের চিহ্ন বিলুপ্ত হইয়াছিল । এইরূপ সঙ্কটময় স্থানে, এইরূপ উত্তেজিতপ্রায় সৈনিকদিগের মধ্যে গোলন্দাজ সেনানায়ক অবস্থিতি করিতে লাগিলেন । সিপাহীগণ বিশ্বস্তভাবে থাকিতে প্রতিশ্রুত হইয়া, তাঁহাকে আপনাদের অধিনায়ক হইতে বলিল । তিনি সম্মত হইলেন এবং পদাতি ও গোলন্দাজদিগকে সঙ্গে লইয়া, লক্ষ্মী যাইবার বন্দোবস্ত করিলেন । কিন্তু অধিনায়কের আশা ফলবতী হইল না । সিপাহীদিগের প্রতিশ্রুতিও রক্ষিত হইল না । পদাতিগণ কথার অবাধ্য হইয়া উঠিল । গোলন্দাজদিগেরও ভাবান্তর ঘটিল । অধিনায়ক ইহাতেও বিচলিত না হইয়া, আপনার কামানের পার্শ্বে রহিলেন । যখন পদাতিগণ তাঁহার দিকে অগ্রসর হইল, তখন তিনি গুলি করিতে গোলন্দাজদিগকে আদেশ দিলেন । তাঁহার আদেশ প্রতিপালিত হইল না । অধিকন্তু তাঁহার লোকেই তাঁহার দিকে বন্দুক উঠাইল । কিন্তু এ সময়ে সকলেই সমভাবে তাঁহার বিরোধী হয় নাই । প্রভুভক্তি অনেককে এ সময়েও প্রভুর প্রতি সদাচরণে প্রবর্তিত করিয়াছিল । ইহারা অধিনায়কের

\* সিপাহীযুদ্ধের ইতিহাসলেখক কে সাহেব গুনিয়াছিলেন যে, পূর্বেদিন সন্ধ্যাকালে আফিসরেরা আপনাদের সৈনিকগণকর্তৃক অবরুদ্ধ হইয়াছিলেন । প্রাতঃকালে পাহারা বদলি না হওয়াতে রক্ষকেরা সৈনিকনিবাসে চলিয়া যায় । এই সুযোগে আফিসরগণ অস্বাভাবিকভাবে বলরামপুরে পলায়ন করেন ।—*Kaye, Sepoy War, Vol. III. p. 476. note.*



জন্তু ঘোড়া আনে, টাকার জোগাড় করে, এবং যাঁহার জীবনরক্ষার্থে এইরূপ আয়োজনে তৎপর হইয়াছিল, তাঁহাকে পলাইতে কহে। সিক্রোরার গোলন্দাজদিগের অধিনায়ক আর কোন উপায় না দেখিয়া, সস্তপ্তহৃদয়ে আপনার চিরপরিচিত ও চির আদরণীয় কামান ছাড়িয়া, লঙ্কোতে প্রস্থান করেন ।

পলায়নসময়ে এই অধিনায়ককে বলিয়া দেওয়া হইয়াছিল যে, তিনি যেন নদীপার হইবার সময়ে, বৈরাম ঘাটের দিকে অগ্রসর না করেন, যেহেতু ঐ ঘাটে উত্তেজিত সিপাহীদিগের অধিকাংশ অবস্থিতি করিতেছে। পলাতক সেনানায়ক এ জন্তু সাবধান হইয়াছিলেন। কিন্তু বহরইচের ইউরোপীয়দিগকে কেহই এইরূপ সাবধান করিয়া দেয় নাই। ঐ স্থানের সেনানায়ক এবং ডেপুটি কমিশনার ও তাঁহার সহকারী অস্বারোহণে নওপাড়ার অভিমুখে ধাবিত করেন। কিন্তু এই স্থানে তাঁহারা আশ্রয় পাইলেন না। নওপাড়ার অধিপতি অপ্রাপ্তবয়স্ক ছিলেন। যিনি তাঁহার সম্পত্তির তত্ত্বাবধান করিতেছিলেন, ইংরেজের প্রতি তাঁহার সমবেদনা ছিল না। যাহা হউক, পলাতকগণ এ স্থানে আশ্রয় না পাইলেও, কোনরূপে বিপন্ন হইলেন না। কিন্তু দুর্ভাগ্যক্রমে ইঁহারা উত্তেজিত সিপাহীদিগের অবস্থিতিস্থল বৈরাম ঘাটের দিকে গমন করিলেন। পলাতকগণ এতদেশীয়দিগের পরিচ্ছদ ধারণ করিয়াছিলেন। এইরূপ ছদ্মবেশে ইঁহারা ঘাটে উপস্থিত হইয়া, আপনাদের ঘোড়াগুলি নৌকায় তুলিয়া দিলেন। এই সময়ে কতিপয় সিপাহী, ফিরিঙ্গি পলাইতেছে বলিয়া, চীৎকার করিয়া উঠিল। অমনি অপর সিপাহীগণ নদীতটে উপনীত হইয়া, আরোহীদিগের উপর গুলি চালাইতে লাগিল। ডেপুটি কমিশনার ও সেনানায়ক নিহত হইলেন। ডেপুটি কমিশনারের সহকারীকে নৌকার বাহিরে আনা হইল। সহচরদিগের অদৃষ্টে যাহা ঘটয়াছিল, কয়েকদিন পরে ইঁহার অদৃষ্টেও তাহাই ঘটিল। কথিত আছে, বহরইচের সেনানায়ক, ফজল আলি নামক একজন দস্যুকে ধরিয়াছিলেন। বিচারে এই দস্যুর প্রাণদণ্ড হয়। ইহাকে ধরিবার সময়ে যে সকল সিপাহী উক্ত সেনানায়কের সাহায্য করিয়াছিল, তাহারা এখন কোম্পানির বিরোধী হইয়া, ১৭ সংখ্যক পদাতিকলকে বলিয়া পাঠাইল যে, ফজল আলির নিধনের জন্তু সেনানায়কের সম্বন্ধে কি করিতে হইবে। উক্ত পদাতিকগণ উত্তর

দিল—“উহার শিরশ্ছেদ কর”। অবিলম্বে এই সেনানায়ক এবং তাঁহার একজন সহচর ধৃত ও নিহত হইলেন। \*

মোল্লাপুর বা মলাপুরে কোনও সিপাহী ছিল না, সুতরাং ঐ স্থানে সহসা কোনরূপ বিপদ ঘটবে বলিয়া, কেহ আশঙ্কা করেন নাই। কিন্তু মোল্লাপুর।

কিছুদিন পরে উচ্ছৃঙ্খল লোকের জ্ঞাত শান্তির ব্যাঘাত হয়। রাজপুরুষেরা শান্তিরক্ষায় অসমর্থ হইয়া পলায়ন করেন। পথে সীতাপুর এবং অন্যান্য স্থানের পলাতকেরা ইঁহাদের সহিত সন্মিলিত হইলেন। ইঁহারা প্রথমে নৌকায় চড়িয়া পলাইতেছিলেন, কিন্তু ইহাতে বিপদের সম্ভাবনা আছে জানিয়া, নৌকা পরিত্যাগপূর্বক স্থলপথে যাত্রা করেন। পথে ইঁহাদিগকে দণ্ডিয়ানাংক স্থানের রাজার মতিয়ারিস্থিত ভবনে প্রায় দুই মাস অবস্থিতি করিতে হয়। ইহার পর কেহ কেহ শত্রুহস্তে পতিত হইলেন। কেহ কেহ নেপালের পাহাড়ে পলায়ন করেন। ঐ স্থানের একজন রাজা পলাতকদিগকে আশ্রয় দেন। কিন্তু ইহাতেও হতভাগ্যদিগের জীবনরক্ষা হয় নাই। নেপালতরাইর অস্বাস্থ্যকর জল-বায়ুর পরাক্রমে অনেকের প্রাণান্ত ঘটে। কেবল একজন মাত্র পীড়ার আক্রমণ হইতে রক্ষা পাইয়া, জঙ্গ বাহাদুরের গোরক্ষপুরস্থিত শিবিরে উপনীত হইলেন।

লক্ষ্মীবিভাগের অন্তর্গত দরীয়াবাদে অযোধ্যার ৫ সংখ্যক পদাতিদল অবস্থিতি করিতেছিল। মে মাসে ইহাদের মধ্যে কোনরূপ গোলযোগ ঘটে দরীয়াবাদ। নাই। কাপ্তেন ইহাদের প্রতি স্নেহ প্রকাশ করিতেন। ইহারাও কাপ্তেনকে ভালবাসিত এবং ধীরভাবে কাপ্তেনের আদেশ পালন করিত। সুতরাং কাপ্তেনের বিশ্বাস ছিল যে, তাঁহার স্নেহের পাত্রগণ শেষ সময় পর্য্যন্ত তাঁহার প্রতি অনুরক্ত থাকিবে। প্রায় তিন লক্ষ টাকা দরীয়াবাদের ধনাগারে ছিল। এই অর্থরাশি উপস্থিত সময়ে গোলযোগের কারণস্বরূপ হইয়াছিল। পদাতিদলের কাপ্তেন প্রথমতঃ এই টাকা লক্ষ্মীতে লইয়া যাইতে ইচ্ছা করিয়াছিলেন। কিন্তু তাঁহার অনুপস্থিতিতে দরীয়াবাদের অন্যান্য ইউরোপীয়ের বিস্ম ঘটবে বলিয়া, তিনি এ বিষয়ে নিরস্ত হইলেন। শেষে ঐ অর্থ স্থানান্তরিত করাই

\* *Mutiny of the Bengal Army. By one who served under Sir Charles Napier, p. 82.*

সিদ্ধান্ত হইল । কাশ্মীর সমস্ত টাকা ধনাগার হইতে, এবং সমস্ত কয়েদীকে কারাগার হইতে সৈনিকনিবাসে আনিলেন । কয়েদীরা কারাগার হইতে মুক্তিলাভ করিয়া, পাছে কোনরূপ গোলযোগ ঘটায়, এই আশঙ্কায় উক্তরূপ ব্যবস্থা হইল । ২ই জুন সমস্ত টাকা গাড়িতে বোঝাই করা হইল । সিপাহীরা আনন্দ-সূচক ধ্বনি করিয়া, সৈনিকনিবাস হইতে যাত্রা করিল । কিন্তু অর্ধ মাইল পথ অতিক্রম করিতে না করিতে তাহাদের ভাবান্তর ঘটিল । তাহারা আপনাদের অধিনায়কের সমক্ষে উচ্ছৃঙ্খলভাবের পরিচয় দিল । কিন্তু এ সময়ে তাহাদের মধ্যে কেহ কেহ প্রভূভক্তিতে বিসর্জন দেয় নাই । যখন তাহাদের সতীর্থগণ ইউরোপীয়দিগকে আক্রমণ করিতে উত্তত হয়, তখন তাহারা উহাতে বাধা দেয় । সিপাহীদিগের এইরূপ বিপর্যয় ইউরোপীয়গণ হতাশ্বাস হইলেন । গাড়িবোঝাই টাকা আবার দরীয়াবাদে ফিরাইয়া আনা হইল । ইউরোপীয়গণ উপায়ান্তর না দেখিয়া, পলায়নে উত্তত হইলেন ।

উত্তম সফল হইল । কেহ কেহ একায় চড়িয়া লক্ষ্মীতে উপস্থিত হইলেন । কেহ কেহ অশ্বারোহণে পলায়ন করিলেন । সিপাহীগণ কাশ্মীরের প্রতি গুলি চালাইলেও কাশ্মীর অশ্বারোহণে অক্ষতশরীরে লক্ষ্মীতে উপস্থিত হইলেন । সিপাহীরা কয়েকদিন দরীয়াবাদে রহিল । পরে তাহাদের প্রধান আড্ডা নবাব-গঞ্জের অভিমুখে ধাবিত হইল । ইংরেজেরা এইরূপে দরীয়াবাদ হইতে নিষ্কাশিত হইলেন । সমগ্র বিভাগে অযোধ্যার নবাবের প্রাধান্য ঘোষিত হইল ।

এইরূপে অযোধ্যার ভিন্ন ভিন্ন বিভাগে, ভিন্ন ভিন্ন সৈনিকদলে গোলযোগ ঘটে । এ সম্বন্ধে সিপাহীযুদ্ধের ইতিহাসলেখক কে সাহেব এই ভাবে লিখিয়াছেন—“এই সকল ঘটনার ইংরেজের জীবন এবং ইংরেজের সম্পত্তির যেরূপ অনিষ্ট ঘটিয়াছে, সেইরূপ আমাদের জাতীয় গৌরবেরও হানি হইয়াছে । প্রত্যেক স্থানেই আমাদের প্রাধান্য অস্তহিত হইয়াছে । প্রত্যেক স্থানেই আমাদের সজাতিগণ শৃগালশকুনি প্রভৃতির ভক্ষ্য না হইলেও, আপনাদের প্রাণনাশের ভয়ে উদ্ভ্রান্তভাবে পলায়ন করিয়াছে এবং কিছুকাল পূর্বে যে সকল লোকে সতয়ে তাঁহাদের আদেশ পালন করিয়াছে, তাহাদেরই নিকটে কাতরভাবে করুণা ভিক্ষা করিয়াছে । \*\* ইহাদের কেহ কেহ বহু কষ্টে লক্ষ্মীতে উপনীত হইয়াছে, কেহ কেহ গোরক্ষপুরে পলায়ন করিয়াছে, কেহ কেহ বা

ভাগ্যক্রমে এলাহাবাদে গিয়া, আপনাদিগকে নিরাপদ ভাবিয়াছে। অবশিষ্ট পলাতকেরা পথে জীবন বিসর্জন করিয়াছে। যেরূপ দুর্ঘটনার মধ্যে ইহাদের প্রাণরক্ষা হইয়াছে, যেরূপ যাতনাভোগের পর ইহারা দেহত্যাগ করিয়াছে, তাহা সম্পূর্ণরূপে বিবৃত হয় নাই।” \*

এ স্থলে কতিপয় পলাতক রাজপুরুষের শোচনীয় অদৃষ্টের কথা সংক্ষেপে বর্ণিত হইয়াছে। উপস্থিত সময়ের ভয়ঙ্কর কিপ্লেবে ইংরেজদিগের বিরূপ দশাবিপৰ্য্যয় ঘটয়াছিল, তাহা এই বর্ণনায় বুঝা যাইবে। সীতাপুরের স্মার্ট মাউন্ট ষ্ট্রুয়ার্ট্ জাক্সন নামক একজন সিবিলিয়ান আপনার দুইটি ভগিনীর সহিত উক্ত স্থানের দুর্ঘটনা হইতে কোনরূপে পরিত্রাণ পাইয়া পলায়ন করেন। পলায়নের গোলযোগে একটি ভগিনী আপনার ভ্রাতা হইতে বিচ্ছিন্ন হইয়া পড়েন। জাক্সন সাহেব একটি মাত্র ভগিনীর সহিত আশ্রয়স্থানের অভিমুখে ধাবিত হইলেন। পথে আরও কতিপয় পলাতকের সহিত ইহাদের সাক্ষাৎ হয়। সকলেই মিথৌলীতে গমন করেন। এই স্থানে মোহমদীর সহকারী ডেপুটি কমিশনের কাপ্তেন অর্ আপনার স্ত্রী এবং সন্তানদিগকে পাঠাইয়াছিলেন। অযোধ্যার ৯ সংখ্যক আনয়মিত সৈনিকদলের সূবাদার ঈশ্বরী সিংহ ইহাদের রক্ষক ছিলেন। মিথৌলীর রাজা লুনী সিংহ কাপ্তেন অরের নিকটে অনেক বিষয়ে ঋণী ছিলেন। এইজন্ত কাপ্তেন আপনার প্রণয়িনী ও স্নেহাম্পদ সন্তানদিগকে ঐ স্থানে পাঠাইতে সাহসী হইয়াছিলেন। বিবি অর্ সমস্ত রাত্রি পথ অতিবাহন করিয়া পূর্বাহ্ন আটটার সময় মিথৌলীতে উপস্থিত হইলেন। রাজা এই সময়ে নিদ্রিত ছিলেন। বিবি অরের উপস্থিতির দুই ঘণ্টা পরে রাজার নিদ্রাভঙ্গ হয়। রাজা বিবি অর্কে আপনার দুর্গে স্থান না দিয়া, কাচিয়ানি নামক স্থানের দুর্গে পাঠাইয়া দেন। যেহেতু ঐ স্থান রাজার নিকটে অধিকতর নিরাপদ বোধ হইয়াছিল। বিবি অর্ কাচিয়ানির দুর্গে উপনীত হইলেন। দুর্গটি মৃত্তিকানির্মিত। উহার চারি দিকে নিবিড় জঙ্গল। এই স্থানে জনসমাগম নাই। স্বাপদকুলের বিহারভূমি—মৃগায় দুর্গে উপস্থিত হইয়া, বিবি অর্ যেরূপ বিরক্ত, যেরূপ দুঃখিত, সেইরূপ শঙ্কিত হইলেন। দুর্গে ব্যবহারোপযোগী

\* *Kaye, Sepoy War, Vol. III. p. 481-482.*

জব্বাতি ছিল না। সূতরাং নানা বিষয়ে বিবি অরের অসুবিধা ঘটিল। সন্ধ্যাকালে রাজা স্বয়ং দুর্গে আসিয়া, বিবি অরের সহিত সাক্ষাৎ করিলেন এবং উপস্থিত সঙ্কটকালে তাঁহাকে রক্ষা করিতে প্রতিশ্রুত হইলেন। জাকসন সাহেব, তাঁহার ভগিনী, কাপ্তেন অর্ এবং অপর কয়েক জন পলাতকও এই দুর্গে উপস্থিত হইয়াছিলেন। মিথৌলীর রাজা ইঁহাদিগকেও আশ্রয় দেন। তিনি উত্তেজিত সিপাহীদিগের জন্ত ভীত হইলেও, ইঁহাদের নিকটে খাণ্ড সামগ্রী প্রেরণ করেন। কাচিয়ানির জঙ্গল বন্য জন্ততে একরূপ পরিপূর্ণ ছিল যে, স্বাপদ-কুলকে দূরে রাখিবার জন্ত পলাতকদিগকে রাত্রিকালে খোলা জায়গায় আগুন জ্বালাইয়া থাকিতে হয়।

সীতাপুর হইতে আরও কতিপয় পলাতক এই স্থানে আসিয়াছিলেন। ইঁহাদেরও ছরবস্ত্র একশেষ হইয়াছিল। ইঁহাদের পরিচ্ছদ ছিন্ন হইয়াছিল। ইঁহাদের পায়ের জুতা নষ্ট হইয়া গিয়াছিল। জঙ্গলের কণ্টকময় পথ অতিক্রম করিতে ইঁহাদের পদদেশ ক্ষতবিক্ষত হইয়া গিয়াছিল। \* পথশ্রমে, আহাৰ্য্য ও পানিয়ার অভাবে ইঁহারা একবারে অবসন্ন হইয়া পড়িয়াছিলেন। এইরূপ দুঃসহ যাতনায় ইঁহাদিগকে কাচিয়ানির জঙ্গলে থাকিতে হয়।

ইহার মধ্যে কাপ্তেন অর্ ঐ দুর্গে সমাগত হইলেন। কিছুকাল সকলে সেই গভীর অরণ্য প্রদেশে, সেই স্বাপদ-পরিবৃত মৃগায় দুর্গে অবস্থিতি করিতে লাগিলেন। জুন মাস অতীত হইল। জুলাই মাসও দেখিতে দেখিতে চলিয়া গেল। কিন্তু পলাতকদিগের দুর্গতি দূর হইল না। ক্রমে আগষ্ট মাস সমাগত হইল। এখন মিথৌলীর রাজা বিপন্ন ইউরোপীয়দিগের অধিকতর বিপদের হেতুভূত হইয়া উঠিলেন। তাঁহার নিকটে উত্তেজিত সিপাহীরা পলাতক-দিগের সন্ধান পাইল। কিন্তু সিপাহীগণ ঐ নিবিড় অরণ্যে প্রবেশ করিল না। রাজার আদেশে পলাতকেরা আপনাদের অরণ্যময় বাসস্থল পরিত্যাগ করিলেন। তাঁহারা কোথায় যাইবেন, কাহার হস্তে সমর্পিত হইবেন, তাহা বুঝিতে পারিলেন না। তাঁহারা ভাবিলেন, আতপতাপে, বৃষ্টিপাতে অথবা স্বাপদের আক্রমণে তাঁহাদের যাবতীয় কষ্টের অবসান হইবে। কিন্তু ৬দৃষ্ট-

\* *English Captive in Oudh. Edited by M. Wylie, p. 14.*

দোষে তাঁহাদের কষ্টের শেষ হইল না। তাঁহাদের কেহ কেহ পথশ্রমে অবসন্ন হইলেন। কেহ কেহ জঙ্গলের জ্বরে অভিভূত হইয়া পড়িলেন। তাঁহাদের কেহ অপরের কোনরূপ সাহায্য করিতে পারিলেন না। কেবল পরস্পর সজলনয়নে ও নির্বাকভাবে পরস্পরের কষ্ট দেখিতে লাগিলেন। রৌদ্রনিবারণের জন্ত তাঁহাদের মাথার উপর কোনরূপ আচ্ছাদন ছিল না। পথের কণ্টক বা কঠিন মৃত্তিকাস্তূপের সজ্জ্বৰ্ব হইতে পদদেশ রক্ষার জন্ত কোনরূপ আবরণ ছিল না। পরিবানের পরিচ্ছিন্ন বস্ত্রখণ্ড ব্যতীত, জলবায়ুর পরাক্রম হইতে তাঁহাদের দেহরক্ষারও কোনরূপ সম্ভল ছিল না। কেহ একখানি সামান্য কাপড় নিজের ব্যবহারের জন্ত চাহিলে, পাষাণ রক্ষকেরা অনুমতির বিনিময়ে আঘাত করিত। এইরূপ কষ্টে অসহায় জীবগণ দুর্গম অরণ্য হইতে নিষ্কাশিত হইলেন। জঙ্গলের বাহিরে দুইখানি গাড়ি ছিল। সকলকে ঐ গাড়িতে স্তূপাকারে রাখা হয়। এই গাড়িবোঝাই স্তূপীকৃত জীব অতঃপর আপনাদের অপরিজ্ঞাত স্থানের অভিমুখে যাত্রা করে।

মিথোলীর রাজার কর্মচারী জহির উল্ হুসেন এই সময়ে এইরূপ শোচনীয় ঘটনার স্থলে উপস্থিত হয়। অসহায় ইউরোপীয়গণ এতক্ষণ নানারূপ যাতনা ভোগ করিলেও অবদ্বভাবে বাইতেছিলেন। জহির উল্ হুসেন এখন পুরুষদিগকে শৃঙ্খলাবদ্ধ করে। কিছুক্ষণ পরে ইউরোপীয়েরা বুঝিতে পারিলেন যে, তাঁহাদিগকে লক্ষ্যে লইয়া যাওয়া হইতেছে। দেড় শত অস্ত্রধারা লোক ও একটি কামান ইঁহাদের পুরোভাগে এবং অপর দেড় শত অস্ত্রধারী লোক ও একটি কামান ইঁহাদের পশ্চাভাগে বাইতে থাকে। যৎসামান্য খাণ্ড দ্রব্য ইঁহাদের সম্মুখে ফেলিয়া দেওয়া হইত। পানীয় অনিচ্ছার সহিত অনেক বিলম্বে প্রদত্ত হইত। এইরূপ যাতনাময় সুদীর্ঘ ছয় দিনের পর ইঁহাদিগকে লক্ষ্যের কৈশরবাগের অভিমুখে লইয়া যাওয়া হয়। প্রাসাদের কিছু দূরে ইঁহারা গাড়ি হইতে নামিয়া নির্দিষ্ট স্থলে যাত্রা করেন। ইঁহাদের দেহ বিচ্ছিন্ন হইয়া গিয়াছিল। অনাহারে, অনিদ্রায় ও নিদারুণ পিপাসায় ইঁহারা মুমূর্ষুপ্রায় হইয়া পড়িয়াছিলেন। একজন (স্মার মাউন্ট ষ্টুয়ার্ট জাক্সন) পথে অচৈতন্য হইয়া পড়িয়া গেলেন। সামান্য ভ্রাতৃগণ ইঁহাকে চারপায়ায় তুলিয়া লইল। দুইটি কুলমহিলা জলের জন্ত কাতরকণ্ঠে চীৎকার করিতে লাগিলেন।

ইঁহাদিগকে এরূপ অপরিষ্কার পাত্রে জল দেওয়া হইল যে, ইঁহারা উহা মুখে দিতে সক্ষম হইলেন না। ইউরোপীয়গণ এইরূপ শোচনীয়ভাবে কৈশরবাগে উপনীত হইলেন। বাগের সীমার মধ্যে অনেকগুলি ছোট বড় ঘর ছিল। আস্তাবলের একটি ছোট ঘরে অবরুদ্ধ ইউরোপীয়দিগকে স্থান দেওয়া হয়।

এ সময়ে নরদানবদিগের পার্শ্বে নরদেবদিগেরও আবির্ভাব ঘটয়াছিল। নিশ্চয়, নির্দয় ও নিরতিশয় কঠোর প্রকৃতি লোকের মধ্যে দয়াশীল মানবের হৃদয়নিহিত কোমলতার পরিচয় পাওয়া যাইতেছিল। প্রহরীদিগের মধ্যে এইরূপ একটি কোমল প্রকৃতি লোক ছিলেন। ইঁহার নাম মির ওয়াজিদ আলি। রাজ্যভ্রষ্ট নবাবের নামে ইঁহার নাম হইলেও ইনি নবাবের প্রাধান্যপুনঃপ্রতিষ্ঠার আশায় বিমুগ্ধ হইলেন নাই। ওয়াজিদ আলি এই দুঃসময়ে অবরুদ্ধদিগের প্রধান সহায় হইলেন। রাত্রি দুই প্রহরের সময়ে অবরুদ্ধদিগকে আর একটি গৃহে লইয়া যাওয়া হয়। এই গৃহ পূর্বাপেক্ষা অনেক ভাল ছিল।

অবরুদ্ধদিগের অদৃষ্টে পরে যাহা ঘটয়াছিল, তাহা বুঝাইবার জন্য, লঙ্কোর দরবারের বিষয় সংক্ষেপে বলা যাইতেছে। নবাব ওয়াজিদ আলির বেগম হজরত মহলের ব্রিজিস্ কাদের নামক একটি চতুর্দশবর্ষবয়স্ক (কোন কোন মতে একাদশবর্ষবয়স্ক) পুত্রকে নবাব করা হয়। হজরত মহল ইঁহার নামে রাজ্যশাসনে প্রবৃত্ত হইলেন। চাকলাদার, নাজীর প্রভৃতি কর্মচারিগণ ইঁহার নামে ভিন্ন ভিন্ন বিভাগে রাজকীয় কর্ম সম্পাদন করিতে থাকেন। ভিন্ন ভিন্ন বিভাগের তালুকদারদিগকে লঙ্কোর দরবারে আসিতে অনুরোধ করা হয়। ব্রিটিশ গবর্ণমেন্ট অযোধ্যা অধিকার পূর্বক বার দল সৈন্য প্রস্তুত করেন। এই সৈন্যের অধিকাংশ পূর্বে নবাবের সরকারে কর্ম করিত। এই সৈন্য এবং কয়েক রেজিমেন্ট অশ্বারোহী, “অযোধ্যার অনিয়মিত সৈনিকদল” নামে পরিচিত। প্রধানতঃ এই সকল সৈন্য লঙ্কো অবরোধ করে, এবং ইঁহারাই ব্রিজিস্ কাদেরকে নাম মাত্র নবাব করিয়া, স্বপ্রধানভাবে থাকে। দারোগা মনু খাঁ হজরত মহলের প্রধান সহায় ছিলেন। পূর্বেও ওয়াজিদ আলি দরবারের রাজস্ববিভাগে কর্ম করিতেছিলেন। কিন্তু উক্ত সৈনিকদিগের প্রাধান্যে ইঁহাদের ক্ষমতা অনেকাংশে সঙ্কুচিত

হইয়া পড়ে। ইহার মধ্যে একজন ধর্মোন্মত্ত মৌলবীর আবির্ভাব হয়। এ ব্যক্তি সিপাহীদিগের মধ্যে এরূপ প্রাধান্য বিস্তার করেন যে, উহাতে লক্ষ্মীর দরবারকেও বিব্রত হইতে হয়। ইহার কথা বৈচিত্র্যপূর্ণ।

এই মৌলবীর নাম আহম্মদ উল্লা শাহ। ১৮৫৭ অব্দের জানুয়ারি মাসে আহম্মদ উল্লা কতিপয় সশস্ত্র অমুচর লইয়া ফৈজাবাদের মসজিদে ধর্মসম্বন্ধে বক্তৃতা আরম্ভ করেন। কর্তৃপক্ষ ইঁহাকে যাবতীয় অস্ত্র পরিত্যাগ করিতে আদেশ দেন। মৌলবী এই আদেশপালনে অসম্মত হইলেন। কর্তৃপক্ষ অগত্যা বল প্রকাশ করেন। গোলযোগে মৌলবী স্বয়ং আহত এবং তাঁহার দুই তিন জন অমুচর নিহত হয়। প্রথম বারে মৌলবীর বিচারে লক্ষ্মীর প্রধান আদালত, অধস্তন আদালতের ব্যবস্থা নামঞ্জুর করেন। দ্বিতীয় বারের বিচারে বিলম্ব ঘটে। ইহার মধ্যে ফৈজাবাদে বিপ্লব উপস্থিত হয়। মৌলবী কারাগার হইতে মুক্তি লাভ করিয়া, উত্তেজিত সিপাহীদিগের অধ্যক্ষ হইলেন। কিন্তু তিন দিন পরে সিপাহীরা ইঁহার কর্তৃত্বে এরূপ বিরক্ত হয় যে, তাহারা তিন শত টাকা দিয়া, ইঁহাকে বিদায় দেয়। মৌলবী লক্ষ্মীতে উপস্থিত হইলেন। হজরত মহল ইঁহার অভ্যর্থনা করেন। ব্যয়নির্কাহের জন্ত ইঁহাকে প্রতিদিন বহু অর্থ দেওয়া হয়। ইংরেজের পরাক্রমে অনেক সিপাহী দিল্লী হইতে তাড়িত হইয়া, লক্ষ্মীতে উপস্থিত হইতে থাকে। ইহারা মৌলবীর অধীনতা স্বীকার করে। এইরূপে বলসম্পন্ন হইয়া, মৌলবী গোমতীতটে—গোঘাটে অযোধ্যার পূর্বতন মন্ত্রী আলি নকি খাঁর বিস্তৃত বাসভবনে অবস্থিতি পূর্বক উদ্দীপনাময়ী ভাষায় ঘোষণাপত্র প্রচার করিতে থাকেন। এই ঘোষণাপত্রে সর্ববিষয়ে তাঁহার কর্তৃত্ব বিশদরূপে পরিব্যক্ত হয়। দরবার হইতে যে আদেশপত্র প্রচারিত হয়, মৌলবী তাহার বিরোধী হওয়াতে অবরুদ্ধ হইলেন। শেষে দিল্লীর সিপাহীরা ইঁহাকে ছাড়িয়া দেয়। মৌলবী অতঃপর আপনার ক্ষমতায় বহুসংখ্য সশস্ত্র লোকের অধিনায়ক হইয়া উঠেন।

ওয়াজিদ আলির ছায় মহারাজ মানসিংহও কৈশরবাগে অবরুদ্ধ ইংরেজদিগের প্রতি সদয়ভাব প্রকাশ করেন। মানসিংহের কর্মচারী অনন্তরাম অবরুদ্ধদিগকে বিমুক্ত করিতে স বিশেষ মনোযোগী হইলেন। যাহারা শৃঙ্খলে আবদ্ধ ছিলেন, ওয়াজিদ আলির চেষ্টায়, তাঁহাদের শৃঙ্খল অপসারিত হয়।



মৌলবী সন্দেহ হইয়া, এই বিষয় জানিবার জন্ত লোক পাঠাইয়াছিলেন, কিন্তু ওয়াজিদ আলি চরাদিগকে অর্থ দিয়া, একরূপ পরিতোষিত করেন যে, তাহারা মৌলবীকে প্রকৃত সংবাদ জানাইতে নিরস্ত থাকে । যে দিন সেনাপতি হাবেলক্ ও আউট্রাম লক্ষ্মীতে উপস্থিত হইলেন, সেই দিন মৌলবীর আদেশে উনিশ জন ইংরেজের প্রাণনাশ হয় । জাক্সন্ সাহেবের যে ভাগিনী পথে তাঁহার ভ্রাতা হইতে বিচ্ছিন্ন হইয়া পড়িয়াছিলেন, তিনি ইঁহাদের মনো ছিলেন । \* ওয়াজিদ আলি এবং রাজা মানসিংহ ইঁহাদের প্রাণরক্ষার জন্ত গোপনে চেষ্টা করিয়াছিলেন, কিন্তু মৌলবী এবং তাহার অধীন সিপাহীদিগের (ইহারা দিল্লী হইতে আসিয়াছিল) জন্ত কৃতকার্য হইতে পারেন নাই । ওয়াজিদ আলির উপর মৌলবীর সন্দেহ জন্মিয়াছিল । ওয়াজিদ আলি প্রকাশ্য ভাবে চেষ্টা করিলে নিঃসন্দেহ তাঁহার প্রাণ যাইত ।

২৬শে অক্টোবর হইতে ১৬ই নবেম্বর পর্য্যন্ত মন্সু খাঁ প্রায়ই কয়েদীদিগের সহিত দেখা করিতেন । তাঁহার উদ্দেশ্য ছিল, কাপ্তেন অর্ দ্বারা তিনি সেনাপতি আউট্রামের নিকটে এই ভাবে পত্র লিখাইবেন যে, যদি ইংরেজেরা এক বারে অযোধ্যা পরিত্যাগ করেন, তাহা হইলে দরবার কয়েদীদিগকে ছাড়িয়া দিবেন । জাক্সন্ সাহেব এবং কাপ্তেন অর্, উভয়েই এই ভাবে পত্র লিখিতে অসম্মত হইলেন । পরে মন্সু খাঁ ইঁহাদিগকে রেসিডেন্সির অবরোধকারী সিপাহীদিগের অধিনায়ক হইতে বলেন । আফিসরেরা ঘৃণা ও বিরক্তির সহিত এই প্রস্তাবেও অসম্মতি প্রকাশ করেন । উভয় প্রস্তাব অগ্রাহ হইল দেখিয়া, মন্সু খাঁ কয়েদীদিগের নিকট হইতে চলিয়া গেলেন । কয়েদীরা ভাবিলেন যে, তাঁহাদের অন্তিম কাল নিকটবর্তী হইয়াছে ।

পরিশেষে তাঁহারা বাহা ভাবিতেছিলেন, যাহার জন্ত অস্থির হইয়াছিলেন, ভগবানের উপর নির্ভর করিয়া, ধীরভাবে যাহার আলিঙ্গনে প্রস্তুত ছিলেন, তাহা তাঁহাদের নিকটবর্তী হইল । ১৪ই নবেম্বর কয়েদীরা দূরে কামানের গভীর গর্জন শুনিতে পাইলেন । তাঁহারা বুঝিতে পারিলেন যে, প্রধান সেনাপতি স্যার কোলিন্ কাম্পবেল লক্ষ্মীর উদ্ধারার্থে আসিতেছেন । পর দিন

\* বলা বাহুল্য যে, ইঁহারা কাচিয়ানির অবরুদ্ধ ইংরেজ নহেন ।

দৃষ্টিস্তায় অতিবাহিত হইল। এই দুই দিন কৈশরবাগে একরূপ গোলযোগ ঘটিল যে, দূরবর্তী কামানের ধ্বনি অবরুদ্ধদিগের শ্রুতিপ্রবিষ্ট হইল না। ১৬ই নবেম্বর বেলা নয়টার সময় ৭১ সংখ্যক দলের কতকগুলি সিপাহী অস্ত্রাদিতে সজ্জিত হইয়া, সাহেবদিগকে স্থানান্তরে লইয়া যাইতে আসিল। ইহাদের উদ্দেশ্য বুঝিতে কাহারও বিলম্ব হইল না। পুরুষেরা ধীরতার বিসর্জন দিলেন না। কাপ্তেন অরু, সংসারে যাহা তাঁহার প্রিয়তম, যাহা তাঁহার পরমস্নেহাস্পদ, তাহার নিকটে সজলনয়নে বিদায় লইলেন।

কিয়ৎক্ষণ পরে দূরে বন্দুকের শব্দ শুনা গেল। রক্ষকগণ অবরুদ্ধ মহিলাদিগকে বুঝাইল যে, কয়েকটি এতদ্দেশীয় কয়েদীকে গুলি করা হইতেছে। কিন্তু শেষে সমুদয় প্রকাশ পাইল। মহিলাগণ রক্ষকশূণ্য হইলেন। স্বামী, ভ্রাতা ও অভিভাবকেরা ঘাতকের অস্ত্রাঘাতে দেহত্যাগ করিলেন। এই ঘটনার পর রোগে একটি বালিকার মৃত্যু হয়। প্রহরীদিগের এক ব্যক্তি দয়া করিয়া, এবং অপর ব্যক্তি টাকা পাইয়া, রাত্রির অন্ধকারের মধ্যে কোনরূপে বালিকাটির সমাধি দেয়। এখন দুইটি মহিলা, একটি বালিকা অবশিষ্ট থাকে।

এই সময়ে লক্ষ্মীবাসিনী একটি দয়াশীলা নারী বালিকার জীবনরক্ষার জন্ত যত্নবতী হইয়া উঠে। অযত্নসম্মত স্নেহে আকৃষ্ট হইয়া, এই অবলা আর্তপরিত্রাণ রূপ পবিত্র কর্ম সম্পাদনের জন্ত ওয়াজিদ আলির সহিত সম্মিলিত হয়। ওয়াজিদ আলি ইহাকে অবরুদ্ধ মহিলাদিগের কর্মে নিযুক্ত করেন।

দরবারের হাকিম সদয়প্রকৃতি ও পরোপকারী ছিলেন। অবরুদ্ধ কুলনারী দুইটির অবস্থা দেখিয়া, তিনি সাতিশয় দুঃখিত হইলেন। ওয়াজিদ আলির মন্ত্রণায় তিনি দরবারের কর্তৃপক্ষকে কহেন যে, কয়েদীদিগের বালিকাটি একান্ত পীড়িত হইয়াছে। হাকিম প্রত্যহ এই সংবাদ দরবারের গোচর করিতে থাকেন। প্রত্যহ দরবারের প্রধান কর্মচারীরা হাকিমের নিকটে অবগত হইলেন যে, বালিকাটির অবস্থা ক্রমেই মন্দ হইতেছে। কিন্তু এ সময়ে হাকিমের ত্রায় প্রহরীদিগের অধ্যক্ষকেও বশীভূত করা আবশ্যিক হইয়াছিল। নচেৎ ওয়াজিদ আলির সঙ্কল্প প্রকাশিত হইয়া পড়িত। ইহার মধ্যে দরবারের আদেশে প্রহরীদিগের অধিনায়ক অত্র কর্মে নিয়োজিত হইল। ইহার স্থানে যে ব্যক্তি আসিল, ওয়াজিদ আলি তাহাকে এবং তাহার লোকদিগকে অর্থ দ্বারা বশীভূত

করিলেন । এই সময়ে পূর্বোক্ত হাকিম দরবারে জানাইলেন যে, বালিকাটির মৃত্যু হইয়াছে । এখন লক্ষ্মীর উক্ত নারী বালিকার উদ্ধারে উত্তত হইল । সে উহার গায়ে রঙ মাখাইয়া দিল, উহাকে কাপড়ে সম্পূর্ণরূপে আচ্ছাদিত করিল, পরে উহাকে লইয়া, এই ভাবে রোদন করিতে করিতে যাইতে লাগিল যে, সে যেন আপনার মৃত শিশুসন্তানকে সমাধি দিবার জন্ত লইয়া যাইতেছে । এইরূপে উক্ত দয়াবতী নারী প্রহরীদিগের হস্ত হইতে নিষ্কৃতি পাইয়া, আপনার স্নেহময় বহনীয় পদার্থ রাজা মানসিংহের গৃহে লইয়া যায় । কিছু দিন পরে বালিকাটি নিরাপদে আলমবাগের ইংরেজশিবিরে সমানীত হয় ।

ইহার পর পূর্বোক্ত অবরুদ্ধ মহিলা দুইটি আপনাদের পরিত্রাণের উপায় দেখিতে থাকেন । এ সময়ে যদিও চারি দিকে ইংরেজের জয়লাভ হইতে ছিল, তথাপি লক্ষ্মী সহরে এবং উহার প্রান্তভাগে উত্তেজিত সিপাহীগণ দলবদ্ধ ছিল । কিন্তু ওয়াজিদ আলি মহিলা দুইটিকে রক্ষা করিতে উদাসীন ছিলেন না । তিনি পাক্কীতে করিয়া ইহাদিগকে অনেক কষ্টে কৈশরবাগের অন্ত গৃহে লইয়া যান । এই সময়ে প্রহরীরা একরূপ সাবধান হইয়াছিল যে, ওয়াজিদ আলিকে ছদ্মবেশে কয়েদীদিগের সহিত দেখা করিতে হইত । ওয়াজিদ আলি কয়েদীদিগকে বিমুক্ত করিতে পারিলে, সেনাপতি আউট্রাম তাঁহাকে এক লক্ষ টাকা পারিতোষিক দিতে প্রতিশ্রুত হইয়াছিলেন । ইহাতে গবর্ণমেন্টেরও সম্মতি ছিল । ওয়াজিদ আলি অবরুদ্ধ মহিলাদ্বয়ের সমক্ষে আপনার সন্তানদিগের মাথার হাত দিয়া শপথ করিয়াছিলেন যে, তিনি এ বিষয়ে যথাশক্তি চেষ্টা করিবেন । যাহা হউক, পূর্বোক্ত স্থল নিরাপদ বোধ না হওয়াতে ওয়াজিদ আলি মহিলাদ্বয়কে অন্ত বাটীতে আনয়ন করেন । ওয়াজিদ আলির পরিবারবর্গ এই স্থানে থাকিত । মহিলারা, ওয়াজিদ আলির স্ত্রী এবং সন্তানদিগের সহিত অবস্থিতি করেন । এই স্থানে তাঁহাদের যাবতীয় অভাবের মোচন হয় । বিবি অর্ এই স্থান হইতে একখানি পত্র লিখিয়া ওয়াজিদ আলির একজন আত্মীয়ের হস্তে এই বলিয়া সমর্পণ করেন যে, প্রথমে যে ইংরেজ আফিসরকে পাওয়া যাইবে, তাঁহাকেই যেন উক্ত পত্র দেওয়া হয় । বিধাতা এ সময়ে অনুকূল হইলেন । পত্রবাহক বাড়ী হইতে বহির্গত হইয়াছেন, এমন সময়ে এক দল গুর্খা ও দুই জন ইংরেজ আফিসরকে দেখিতে পাইলেন ।

পত্র সমর্পিত হইল। আফিসরেরা স্বরিতগতিতে মহিলা দুইটির উদ্ধারে যাত্রা করিলেন। নির্দিষ্ট স্থলে উপস্থিত হইয়া, ইঁহারা আপনাদের কুলকামিনীদিগকে পাকীতে তুলিয়া দিলেন। বাহক উপস্থিত ছিল না। আফিসরদিগের ভৃত্য এবং কতিপয় গুর্থা বাহক হইল। আফিসরেরা সহরের সঙ্কীর্ণ পথ অতিক্রম পূর্বক উক্ত পাকী সেনাপতি মাক্গ্রেগরের শিবিরে লইয়া গেলেন। পর দিন মহিলা দুইটি সেনাপতি আউট্রামের শিবিরে উপনীত হইলেন। যে দেশের এক শ্রেণীর লোকে ইঁহাদের দুঃসহ যাতনার কারণ হইয়াছিল, ইঁহাদিগকে প্রিয়তম আত্মীয়জন হইতে জন্মের মত বিচ্ছিন্ন করিয়াছিল, সেই দেশের অন্য শ্রেণীর লোকেরই অনন্ত করুণায় এইরূপে ইঁহাদের জীবন রক্ষা হইল। \*

অযোধ্যার ভিন্ন ভিন্ন বিভাগে, ভিন্ন ভিন্ন সৈনিকদলের মধ্যে এইরূপ উত্তেজনা এবং তৎপ্রযুক্ত এইরূপ ভয়াবহ বিপ্লব ঘটতে প্রধান কমিশনার স্যার হেনরি লরেন্স সাতিশয় উদ্বিগ্ন হইলেন। কিন্তু উদ্বেগের আবেগে তিনি কর্তব্যসম্পাদনে নিরন্ত থাকেন নাই। অপ্রতিবিধেয় বিপদের আশঙ্কায় তাঁহার উত্তম ও অধ্যবসায় অন্তর্হিত হয় নাই। অযোধ্যার কৰ্মভার গ্রহণ করার পরে তাঁহার স্বাস্থ্য ভগ্ন হইয়াছিল। তাঁহার দেহ দিন দিন ক্ষীণ হইয়া পড়িতেছিল। তাঁহার দৃঢ়তাব্যঞ্জক প্রসন্ন মুখশ্রী দিন দিন পরিম্লান হইয়া যাইতেছিল, তথাপি তিনি কর্তব্যকৰ্মসম্পাদনে পরিশ্রম করিতে বিরত হইতেন নাই। ১১ই জুন পর্য্যন্ত সমগ্র উত্তরপশ্চিম প্রদেশের মধ্যে অযোধ্যার রাজধানী এবং কাণপুর, এই দুই স্থান ইংরেজের অধিকারে ছিল। ১১ই জুনের পর হইতে লক্ষৌ রক্ষার জন্ত স্যার হেনরি লরেন্সের অধিকৃতর উত্তমের নিদর্শন পরিদৃষ্ট হয়। রাত্রিতে প্রায়ই তাঁহার নিদ্রা ছিল না। তিনি প্রায়ই ছদ্মবেশে নগরের নানাভাগ পরিদর্শন করিতেন। সময়ে সময়ে কামানের পার্শ্বে শয্যা পাতিয়া গোলন্দাজ সৈনিকদিগের সহিত অবস্থিতি করিতেন। কিন্তু এ শয্যাও তাঁহার নিদ্রার জন্ত প্রস্তুত হইত না। তিনি শয্যায় থাকিয়া, নগররক্ষার প্রণালী অবধারণ করিতেন। কিরূপে আত্মবলের বৃদ্ধি ও বিপক্ষবলের ক্ষয় করিতে হইবে, তাহার নির্ধারণের জন্ত গভীর চিন্তায়

\* *English Captive in Oudh : Edited by M. Wylie, p. 29-47.*

নিযুক্ত থাকিতেন। সংক্ষেপে আপনার রক্ষণীয় নগরে তিনি সর্বব্যাপী ছিলেন। সকল স্থানেই তাঁহাকে দেখা যাইত।\*

নগরে সামরিক আইন অনুসারে লোকের দণ্ডবিধান হইতেছিল। মচ্ছি-ভবনের পার্শ্বে কতকগুলি ফাঁসি কাঠ স্থাপিত হইয়াছিল। যাহারা ব্রিটিশ গবর্ণমেন্টের বিরুদ্ধাচারী বলিয়া ধৃত হইত, এই স্থানে তাহাদের যাবতীয় বাসনার পরিসমাপ্তি ঘটিত। স্মার হেন্‌রি লরেন্স নরহত্যার একান্ত বিরোধী ছিলেন। যাহাতে লোকের জীবনরক্ষা হয়, তৎপ্রতি তাঁহার সবিশেষ দৃষ্টি ছিল। দুর্ঘটনার গুরুত্বে বাধ্য হইয়া, তিনি নিরতিশয় মনঃকষ্টের সহিত এইরূপ দণ্ডের অনুমোদন করিতে লাগিলেন। সৈনিক প্রহরিগণ ইউরোপীয় অধিনায়কদিগের অধীনে থাকিয়া শাস্তি রক্ষা করিতে লাগিল। ইউরোপীয়গণ নিয়মিতরূপে আপনাদের দৈনন্দিন কর্ম নিৰ্বাহ করিতে লাগিলেন। কিন্তু এ দিকে যাহার উপর যাবতীয় গুরুতর কর্মের ভার সমর্পিত হইয়াছিল, যিনি প্রবলবাত্যাতাড়িত মহাসমুদ্রে তরণীর একমাত্র কর্ণধার ছিলেন, তাঁহার স্বাস্থ্যের কোনরূপ উন্নতি হইল না। স্মার হেন্‌রি লরেন্স ক্রমেই ক্ষীণ—ক্রমেই অবসন্ন হইয়া পড়িতে লাগিলেন। সুতরাং প্রয়োজনীয় কর্ম সম্পাদনের জন্ত একটি সমিতি প্রতিষ্ঠিত হইল। গাবিন্স সাহেব এই সমিতির অধ্যক্ষ হইলেন। তিন দিন মাত্র সমিতির অধিবেশন হইল। কিন্তু এই তিন দিনেই বিপদ গুরুতর হইয়া উঠিল।

৩০ শে মের ঘটনার পর গাবিন্স সাহেব সমগ্র সিপাহীদলের নিরস্ত্রীকরণে কৃতসঙ্কল্প হইয়াছিলেন। কিন্তু প্রধান কমিশনার এ বিষয়ে তাহার একান্ত বিরোধী ছিলেন। এ সময়ে তিনি ভারতবাসীর সকলকেই শত্রুভাবে দেখিতে ইচ্ছা করেন নাই। কৃষ্ণবর্ণ অপরাপর ইংরেজের ভয়ঙ্কর কারণ হইলেও, স্মার হেন্‌রির পক্ষে উহা অনেক সময়ে সাহসের আশ্রয়, আশার অবলম্বন এবং বিপত্তিনিবারণের প্রধান উপায় স্বরূপ ছিল। তিনি ভারতবাসীর প্রভুভক্তিতে বিশ্বাস করিতেন। ঘটনাচক্রে পড়িয়া, সিপাহীরা তাঁহাদের বিরুদ্ধে অস্ত্র পরিগ্রহ করিলেও তিনি মনে করিতেন যে, ঐ সিপাহীদিগের মধ্যেও প্রভুভক্ত লোকের অভাব নাই। এই বিশ্বাসপ্রযুক্ত তিনি সমুদয় সিপাহীকে সৈনিকদল হইতে

\* Rees, siege of Lucknow, p. 39.

নিষ্কাশিত করিতে চাহেন নাই । কিন্তু গাবিন্স্ সাহেব কয়েক দিনের জন্ত শাসনসমিতির অধ্যক্ষ হইয়া, আপনার সঙ্কল্প অনুসারে কার্য্য করিতে লাগিলেন । তাঁহার কথায় ভিন্ন ভিন্ন দলের অধিনায়ক সিপাহীদিগকে অস্ত্রশস্ত্র হইতে বিচ্যুত করিলেন, এবং তাহাদিগকে নবেম্বর মাস পর্য্যন্ত বিদায় দিয়া, আপন আপন বাটীতে যাইতে কহিলেন । এই বিষয় অবিলম্বে স্মার হেন্‌রি লরেন্সের গোচর হইল । স্মার হেন্‌রি অমনি রোগশয্যা হইতে গাত্রোত্থান করিলেন । মুহূর্ত্তমধ্যে রুগ্নশরীরে সৈন্তাধ্যক্ষের কার্য্যভার গ্রহণ পূর্কক সমিতির অনুমতি রহিত করিয়া ফেলিলেন । তাঁহার আদেশে সিপাহীদিগকে ফিরাইয়া আনিবার জন্ত লোক প্রেরিত হইল । প্রায় ৫০০ পাঁচ শত নিরস্ত্র সিপাহী প্রফুল্লভাবে—সহাস্র-বদনে ফিরিয়া আসিয়া, আপনাদের চিরাভ্যস্ত সৈনিকব্রত গ্রহণ করিল । ইহারা অবরোধের সময়ে প্রভুভক্তির সর্বিশেষ পরিচয় দিয়াছিল । \* রেসিডেন্সি-রক্ষার জন্ত ইংরেজদিগের পর্য্যাপ্তপরিমাণে সৈন্ত ছিল না । বিশ্বস্ত সিপাহীগণ প্রত্যাবৃত্ত ও সামরিক পরিচ্ছদে পুনরায় সজ্জিত হইলেও, স্মার হেন্‌রি লরেন্সের বলবৃদ্ধি হয় নাই । এই জন্ত স্মার হেন্‌রি অগ্নরূপ ব্যবস্থা করিতে উদ্বৃত হইলেন । এই ব্যবস্থাতেও তাঁহার কৃষ্ণবর্ণের প্রতি অপরিসীম প্রীতি ও বিশ্বাসের পরিচয় পাওয়া গেল । যে সকল সিপাহী দীর্ঘকাল কোম্পানির কৰ্ম্ম করিয়া আপনাদের আবাসপল্লীতে পেন্সন ভোগ করিতেছিল, তাহাদিগকে আহ্বান করা হইল । প্রধান কমিশনরের সাদর আহ্বানে প্রায় পাঁচ শত জরাগ্রস্ত সিপাহী লক্ষ্মীতে আসিল । স্মার হেন্‌রি ইহাদের যথোচিত আদর ও অভ্যর্থনা করিলেন । ইহাদের অনেকে কোম্পানির কার্য্যসাধনের জন্ত সমরক্ষেত্রে প্রতিপক্ষের অস্ত্রাঘাতে বিকলাঙ্গ হইয়াছিল । কাহারও চক্ষু গিয়াছিল, কাহারও হস্ত নষ্ট হইয়াছিল, কেহ কেহ বার্কিক্যপ্রযুক্ত হীনবল হইয়া পড়িয়াছিল । তথাপি ইহারা, এক সময়ে যাহাদের প্রদত্ত সামরিক ভূষণে শোভিত ছিল, যাহাদের নিকটে রণকৌশল শিখিয়া, বীরেন্দ্রবর্গের বরণীয় হইয়াছিল, যাহাদের জন্ত সমরক্ষেত্রে দেহপাতেও উদ্বৃত ছিল, উপস্থিত বিপত্তিকালে আবার তাহাদেরই জন্ত এই বার্কিক্যকালে—এইরূপ বিকলাঙ্গদেহে লক্ষ্মীতে

\* *Kaye, Sepoy War. Vol. III. p. 499.*

সমাগত হইল। স্মার হেনরি লরেস্‌ এই প্রভুভক্ত ও বিশ্বস্ত সিপাহীদিগের মধ্যে ১৭০ জনকে বাছিয়া লইলেন। ইতঃপূর্বে বিভিন্ন দল হইতে শিখসৈনিকদিগকে একত্র করা হইয়াছিল। এইরূপে প্রায় ৮০০ এতদেশীয় সৈনিকপুরুষ লক্ষ্মীরক্ষার জন্ত সংগৃহীত হইল।

১২ই জুন বিপদের সূচনা হইল। যে সৈনিকদল পুলিশের কর্মে নিয়োজিত ছিল, তাহার পদাতিগণ ১১ই জুন গবর্ণমেণ্টের বিরোধী হইয়া উঠিল। পর দিন অশ্বারোহিগণ ইহাদের পথে পদার্পণ করিল। ইহারা সুলতানপুরের অভিমুখে যাত্রা করিল। একজন ইংরেজ সেনানায়ক কতিপয় সৈন্য লইয়া, ইহাদের পশ্চাৎকাষিত হইলেন। ইহাদের অধিনায়কও ইহাদিগকে বুঝাইতে গেলেন। অধিনায়ক উপস্থিত হইয়া, আপনার লোকদিগকে বুঝাইতে চাহিলেন। কিন্তু কেহ তাঁহার কথা শুনিতে চাহিল না। এই সময়ে যে ব্যক্তি তাহাদের পরিচালক হইয়াছিল, সে নিষ্কোষিত তরবারির আক্ষালন করিতে করিতে ইহাতে বাধা জন্মাইতে লাগিল। এক জন সিপাহী আপনাদের ইংরেজ সেনানায়ককে মারিবার জন্ত বন্দুক ঠিক করিল। অমনি এই বন্দুক ফেলিয়া দিতে আর বারটি বন্দুক উত্তোলিত হইল। বার জনে বন্দুক তুলিয়া, সন্ধানকারীকে বাধা দিয়া কহিল, “কে এইরূপ সাহসিক ব্যক্তির প্রাণ সংহার করে ?”\* অধিনায়ক অক্ষতশরীরে ফিরিয়া গেলেন।

এই সময়ে সেনাপতি স্মার হিউ হইলার সাতিশয় বিপন্ন হইয়া পড়িয়াছিলেন। বিপদ হইতে মুক্তিলাভের আশায় তিনি স্মার হেনরি লরেস্‌র নিকটে সাহায্য প্রার্থনা করেন। গাবিন্স্‌ সাহেব কাণপুরের উদ্ধারের জন্ত সৈন্য প্রেরণ করিতে চাহিয়াছিলেন। কিন্তু ইহাতে অপর কেহ সম্মতি প্রকাশ করেন নাই। স্মার হেনরি লরেস্‌ও ইহাতে অমত প্রকাশ করেন। তাঁহার সৈনিকবল অল্প ছিল। ঈদৃশ বিপত্তির সময়ে তিনি নিজেই আত্মবলের অল্পতায় চিন্তিত হইয়াছিলেন। অধিকন্তু গঙ্গার তটভাগে বহুসংখ্যক সিপাহী অলস্থিতি করিতেছিল। সুতরাং গঙ্গা পার হওয়া অসাধ্য হইয়া উঠিয়াছিল। অল্পমাত্র সৈন্য গঙ্গা পার হইয়া, সিপাহীদিগের বিপুল শ্রেণী ভেদ করিয়া যাইতে পারে, এমন

\* Rees, Siege of Lucknow, p. 61.

সম্ভাবনা ছিল না। এই হেতু স্মার হেন্‌রি লরেন্স্‌ নিরতিশয় কোম্পানির সহিত কাণপুরের সেনাপতির প্রার্থনাপূরণে অসম্মত হইলেন। ইহারা বর্তমান সময়ের অবস্থার পর্যালোচনা করিয়াছেন, তাঁহারা এ বিষয়ে স্মার হেন্‌রি লরেন্সের দয়া বা সমবেদনার অভাব দেখিতে পাইবেন না। তিনি যে যুক্তি দেখাইয়াছিলেন, কেহই উহার খণ্ডন করিতে পারেন নাই। এ সময়ে প্রায় সকল স্থানেই ইংরেজদিগকে অল্পমাত্র সৈন্তের উপর নির্ভর করিতে হইয়াছিল। এক স্থান নিরাপদ করিতে হইলে, অন্য স্থানের বলক্ষয় হইত। গন্তব্য পথ বিঘ্নসঙ্কুল ছিল। স্মার হেন্‌রি লরেন্স্‌ স্পষ্ট বুদ্ধিতে পারিয়াছিলেন যে, তিনি কাণপুরের সেনাপতির সাহায্যার্থে অল্পসংখ্যক সৈন্ত পাঠাইলে বহুসংখ্যক সিপাহী গঙ্গা পার হইয়া আসিবে। অধিকন্তু তাঁহার নিজেরও বলক্ষয় হইবে। ইহা ভাবিয়া, তিনি গভীর দুঃখের আবেগে কাণপুরের বিপন্ন সজাতির জন্য দীর্ঘ নিশ্বাস পরিত্যাগ করিলেন, এবং দীর্ঘ নিশ্বাসের সহিত ঘোরতর বিপত্তির মধ্যে আপনার রক্ষণীয় স্থানের সুবন্দোবস্ত করিতে লাগিলেন। তাঁহার উদারতা ও সমবেদনা, এ সময়ে তদীয় বিপক্ষদলের স্বদেশবাসীদিগেরও দয়া আকর্ষণ করিয়াছিল। তাঁহার সমবেদনা প্রযুক্ত লক্ষ্যে কাণপুর হইতে পারে নাই। ভারতবাসিগণের অনেকে এ সময়ে বিশ্বস্তভাবে স্মার হেন্‌রি লরেন্সের পক্ষসমর্থনে উদ্বৃত্ত হইয়াছিল। যখন অযোধ্যা অধিকৃত হয়, তখন নবাবসরকারের কয়েক শত গোলন্দাজ ব্রিটিশ কোম্পানির চাকরী করিতে সম্মত হয় নাই। এখন ইহারা ইচ্ছা পূর্বক আপনাদের অধিনায়ক মীর ফরজান্দ আলীর সহিত ইংরেজের সৈনিকশ্রেণীতে প্রবেশ করিবার জন্য উপস্থিত হয়। ইহাদের প্রার্থনা অগ্রাহ্য হয় নাই। অবরোধের সময়ে ইহারা আপনাদের বিশ্বস্ততার স বিশেষ পরিচয় দিয়াছিল। ইহারা ইংরেজের পক্ষসমর্থনের জন্য দেহবিসর্জনে কাতর হয় নাই। উত্তেজিত সিপাহীরা ফরজান্দ আলীর গৃহস্থিত বহুমূল্য সামগ্রী লুণ্ঠন করিয়াছিল। গবর্ণমেন্ট ক্ষতিপূরণ না করিলে ফরজান্দ আলী আপনার অপরিমিত প্রভুভক্তির বিনিময়ে কোন ফল লাভ করিতে পারিতেন না।”\*

\* *Gubbins, Mutinies in Oudh, p. 190.*



রামদীন নামক এক জন অযোধ্যাবাসী প্রাচীন ব্রাহ্মণ এই দুঃসময়ে ইংরেজদিগের যথোচিত সাহায্য করেন । ইনি রাস্তার ওয়ারসিয়রের কন্ঠে নিযুক্ত ছিলেন । বিপ্লবপ্রযুক্ত ইঁহার কন্ঠ বন্ধ হয় । ইনি ছয় জন ঘনিষ্ঠ আত্মীয়ের সহিত লক্ষ্মোতে উপস্থিত হইলেন । ইঁহাদিগকে পদাতিসৈন্তের শ্রেণীতে নিবিষ্ট করা হয় । এই কন্ঠে ইঁহারা যথোচিত সাহস, উত্তম ও রণ-কৌশলের পরিচয় দেন । রাত্রিতে ইঁহারা কামানরক্ষার আয়োজন করিতেন । দিবসে ইঁহারা বিপক্ষদিগের সহিত যুদ্ধে বাপ্ত থাকিতেন । যুদ্ধে রামদীন এবং তাঁহার দুই জন আত্মীয় নিহত হইলেন : অবশিষ্ট আত্মীয়েরা জীবিত থাকেন । গবর্নমেন্ট পেন্সন দিয়া, ইঁহাদের অসামান্য রাজভক্তির গৌরব রক্ষা করেন । রামদীন এবং তাঁহার আত্মীয়গণ বাতীত পিরাণ নামক একজন মিস্ত্রী দ্বারা এই বিপত্তির সময়ে অনেক কাজ হয় । গাবিন্স সাহেব ইঁহার বিষয়ে লিখিয়াছেন—“এই ব্যক্তি অত্যন্ত কঠোর ছিল । ইঁহার এবং রামদীনের সাহায্য না পাইলে, আমরা যে সকল গাঁথনির কাজ আরম্ভ করিয়াছিলাম, তৎসমুদয় কখনও সম্পন্ন হইত না । আমি দেখিয়াছি, পিরাণ যেমন একখানি হাট হাত তুলিয়া বসাইতেছিল, অমনি বিপক্ষের নিক্ষিপ্ত গুলির আঘাতে উহা তাহার হস্ত হইতে স্থলিত হইয়াছে ।” \* অবরোধের পূর্বে গোলাপ নামক একজন কারিকর ইঞ্জিনিয়ারের কার্যবিভাগে নিয়োজিত ছিল । উক্ত বিভাগের কর্তা ইঁহাকে ইঁহার ইচ্ছানুসারে কন্ঠস্থলে থাকিতে বা গৃহে যাইতে কহিয়াছিলেন । গোলাপ গৃহে না গিয়া, বিপত্তিময় কন্ঠস্থলে থাকিতে ইচ্ছা করিয়াছিল । এই ব্যক্তি বিপদে কাতরতা প্রকাশ করে নাই । কোন সময়ে কর্তব্য কন্ঠে ইঁহার উদ্যম দেখা যায় নাই । গুরুতর বিপত্তিকালে কন্ঠকুশল ও প্রভুভক্ত গোলাপ আপনার প্রভুর উপকারের জন্ত কন্ঠশীলতার একশেষ দেখাইয়াছিল । যে দিন লক্ষ্মীর উদ্ধারার্থে ইংরেজসৈনিকদল রেসিডেন্সিতে প্রবেশ করে, সেই দিন গোলার আঘাতে এই পরমবিশ্বস্ত, কর্তব্যপরায়ণ কন্ঠচারীর মৃত্যু হয় । † এইরূপে ভারতবাসিগণ ধীরভাবে ইংরেজের জন্ত

\* *Gubbins, Mutinies in Oudh, pp. 190-91.*

† *Ibid, p. 191.*

আত্মোৎসর্গ করিয়াছিল । তাহারা বিদেশী প্রভুর প্রাণরক্ষার জন্ত স্বদেশবাসীর হস্তে প্রাণবিসর্জনেও কাতর হয় নাই ।

ইংরেজেরা যখন এইরূপে আত্মরক্ষার বন্দোবস্ত করিতেছিলেন, ভারতবাসি-গণ যখন এইরূপে আপনাদের বিশ্বস্ততা ও প্রভুভক্তির একশেষ দেখাইতে-ছিলেন, তখন গ্রীষ্মপ্রধান দেশের নিদারুণ গ্রীষ্মাতিশয্যে ইংরেজদিগের যার পর নাই কষ্ট হয় । তাঁহারা প্রবল বিপক্ষের পরাক্রমনাশে উত্তত হইয়াছিলেন, কিন্তু প্রকৃতির পরাক্রম নিরোধ করিতে পারেন নাই । জুন মাসের প্রারম্ভে ও মধ্যভাগে বৃষ্টি না হওয়াতে রেসিডেন্সিতে বসন্ত ও বিস্ফটিকা রোগের প্রাদুর্ভাব হয় । ইউরোপীয় সৈনিকদিগের মহিলারা ও বালকবালিকাগণ এই রোগে পীড়িত হইয়া পড়ে । স্থানের অল্পতা হেতু অনেককে এক ঘরে অবস্থিতি করিতে হইত, এই জন্ত রোগ ক্রমে প্রবল হইয়া উঠে । সৌভাগ্যক্রমে ২৮শে জুন বৃষ্টি হওয়াতে রোগের প্রাদুর্ভাব কমিয়া যায় । ইংরেজেরা যখন ছরস্ত রোগের আক্রমণ হইতে পরিত্রাণ পাওয়াতে উৎফুল্ল হইয়াছিলেন, তখন স্থানা-স্তরের দুঃসংবাদে তাঁহারা দুর্ভাবনায় একান্ত বিষন্ন হইয়া উঠেন । কাণপুরের ইংরেজ সেনাপতি স্মার্ট হিউ হইলারের আত্মসমর্পণের পর বহুসংখ্যক সিপাহী দলবদ্ধ হইয়া লক্ষ্মীর কুড়ি মাইল দূরবর্তী নবাবগঞ্জ বড়বাঁকি নামক স্থানে উপস্থিত হয় । এই স্থান হইতে তাহারা লক্ষ্মীর অভিমুখে যাত্রা করে । ২৯শে জুন প্রধান কমিশনরের নিকটে সংবাদ উপস্থিত হয় যে, সিপাহীদিগের অগ্র-গামী দল লক্ষ্মীর ৮ মাইল দূরে চিনহাট নামক স্থানে উপস্থিত হইয়াছে । অবিলম্বে এই সংবাদের সত্যতানিরূপণ এবং সমাগত সিপাহীদিগের সংখ্যা-নির্ধারণের জন্ত একদল অশ্বারোহী প্রেরিত হয় । কিন্তু ইহারা যথাযথ সংবাদ দিতে পারে নাই । স্মার্ট হেন্‌রি লরেন্স প্রকৃত সংবাদ না জানিয়া, স্বয়ং অল্প মাত্র সৈন্য লইয়া, বিপক্ষদিগের বিরুদ্ধে যাত্রা করিতে উত্তত হইলেন । ৩০শে জুন বেলা পূর্বাহ্ন ৩ টার সময়ে ইংরেজসৈন্য লক্ষ্মী হইতে প্রস্থান করে । চিনহাট একটি বৃহৎ পল্লী । উহা একটি বিস্তীর্ণ ঝিলের পার্শ্বে অবস্থিত । লক্ষ্মী এবং চিনহাটের মধ্যে কোক্রইল নামে একটি ক্ষুদ্র নদী আছে । লক্ষ্মী হইতে ফৈজাবাদের পথে কোক্রইলের সেতু অতিক্রম করিলে চিনহাটে উপস্থিত হওয়া যায় । ইংরেজসৈন্য এই সেতুর নিকটে উপনীত হয় । কুক্ষণে স্মার্ট হেন্‌রি

লরেন্স্ ইহাদিগকে বিপক্ষের সম্মুখে যাইবার জন্ত আদেশ দেন । সেনাপতির আদেশে সৈনিকেরা বিপক্ষের দিকে অগ্রসর হইতে থাকে । চিনহাট পল্লীর বামভাগে বিপক্ষদিগের শিবির ছিল । ইংরেজসৈন্য যে পথে চিনহাটের দিকে অগ্রসর হয়, সেই পথের বামপার্শ্বে ইস্‌মাইলপুর নামে একটি পল্লী অবস্থিত । এই পল্লীতে সিপাহীদিগের সহিত ইংরেজসৈন্যের যুদ্ধ ঘটে । সিপাহীরা ইংরেজদিগের গন্তব্যপথের মধ্যে কামানগুলি সাজাইয়া রাখিয়াছিল । ইংরেজসৈন্য দৃষ্টিপথবর্তী হইবা মাত্র বিপক্ষেরা এই সকল কামান হইতে তীব্রবেগে গোলাবর্ষণ করিতে লাগিল । ইহার পর অশ্বারোহী, পদাতি ও গোলন্দাজগণ দুই ভাগে বিভক্ত হইয়া, ইংরেজদিগের উভয় দিকে আসিয়া পড়িল । ইংরেজসৈন্য এইরূপে দুই দিকে বিপক্ষদিগের দুইটি প্রবল দলকর্তৃক আক্রান্ত হওয়াতে শৃঙ্খলাশূন্য হইয়া পড়িল । তাহারা কিছুতেই সিপাহীদিগের আক্রমণ নিরস্ত করিতে পারিল না । যে সকল ইউরোপীয় আপনাদের ইচ্ছায় সৈনিকদলে প্রবিষ্ট হইয়াছিল, তাহারা অধিনায়কের আদেশে অগ্রসর হইল বটে, কিন্তু সৈনিকের কর্মে তাহাদের পারদর্শিতা ছিল না । শিখেরাও এই সময়ে রণস্থলে স্থিরভাবে থাকিতে পারিল না । ব্রিটিশ পদাতিগণ বিপক্ষদিগকে তাড়াইয়া দিতে অগ্রসর হইল । কিন্তু তাহাদের অধিনায়ক বিপক্ষের গুলিতে ভূপতিত হইলেন । তাহারা আপনাদের অধ্যক্ষের পতন দেখিয়া, সহসা একটি তরঙ্গভঙ্গীবে উচ্চ ভূমির অন্তরালে গিয়া আশ্রয় লইল । বিপক্ষদিগের পরাক্রমে ইংরেজসৈন্য চারি দিকে এইরূপ শৃঙ্খলাশূন্য হওয়াতে, তাহাদিগকে প্রত্যাবর্তন করিতে আদেশ দেওয়া হইল । স্যার হেনরি লরেন্সের আদেশে লেফটেনেন্ট বনহাম কামান লইয়া ফিরিয়া যাইতে উদ্বৃত্ত হইলেন । কিন্তু কামান যে হস্তী দ্বারা লইয়া যাওয়া হইতেছিল, উহা গোলাবর্ষণে ভীত ও উন্মত্ত হইয়া উঠিল । বনহামও বিপক্ষের গুলিতে আহত হইলেন । ইংরেজের কামান শত্রুপক্ষের হস্তগত হইল । এ দিকে ইংরেজ বীরপুরুষগণের অনেকেই রণক্ষেত্রে দেহত্যাগ করিলেন । স্যার হেনরি লরেন্স্ যুদ্ধের সময়ে সকলের পুরোভাগে থাকিয়া, উৎসাহ দিতেছিলেন, যেখানে বলক্ষয় ঘটতেছিল, সেই খানেই তাঁহার আবির্ভাব হইতেছিল । কিন্তু তাঁহার এইরূপ উৎসাহ, এইরূপ উদ্বৃত্ত, এইরূপ সাহসেও কোন ফল হইল না । বিপক্ষের সংখ্যাধিক্যে অল্প মাত্র ইংরেজসৈন্য

হতোত্তম হইয়া, উদ্ভ্রান্তভাবে লক্ষ্মীর অভিমুখে ধাবিত হইল। আহতদিগকে লইয়া ঘাইবার নিমিত্ত কোন সুবিধা ছিল না; যেহেতু ডুলীর বাহকদিগের কয়েক জন নিহত হওয়াতে সকলেই পলায়ন করিয়াছিল। জললাভেরও কোন সুযোগ ছিল না; যেহেতু যাহারা জল দিবার জন্ত নিয়োজিত ছিল, তাহারাও রণস্থল পরিত্যাগ করিয়াছিল। এ দিকে প্রচণ্ড মার্ত্তণ্ডের তাপে ও নিদারুণ গ্রীষ্মে ইউরোপীয় সৈন্য একান্ত অবসন্ন হইয়া পড়িল। বিপক্ষের অজ্ঞাঘাত হইতে যাহারা পরিত্রাণ পাইয়াছিল, নিদারুণ পিপাসায় তাহাদেরও প্রাণবায়ু বহির্গত হইল। এই ঘোর বিপত্তিকালে এতদেশীয় পদাতি দ্বারা ইংরেজপক্ষের সবিশেষ সাহায্য হইয়াছিল। ইহারা দুঃসহ আতপতাপেও বিচলিত হয় নাই, স্বদেশীয়দিগের ভয়ঙ্কর আক্রমণেও পবিত্র কর্তব্য কৰ্ম্মের অবমাননা করে নাই। ইহাদের যত্নাতিশয়ে আহত ইউরোপীয় সৈনিকগণ শান্তি লাভ করে। ইহারা আপনাদের স্বদেশীয় সৈনিকদিগের প্রতি দৃকপাত না করিয়া, ইউরোপীয় সৈনিকদিগের গুশ্ৰুযায় মনোযোগী হয়। এক সময়ে ইহাদের বিশ্বস্ততা সন্দেহে সন্দেহ করা হইয়াছিল, এখন এই সন্দেহ সৰ্ব্বাংশে তিরোহিত হয়। এই সৈনিকগণ আপনাদের স্বদেশের উত্তেজিত সিপাহীদিগের উপর গুলিবৃষ্টি করিয়া, অপরিসীম বিশ্বস্তভাবের পরিচয় দেয়।

প্রাতঃকালে কোক্রইলের সেতু হইতে ইংরেজসৈন্য উৎসাহের সহিত বিপক্ষ-দিগের অভিমুখে অগ্রসর হইয়াছিল, এখন তাহারা নিরুৎসাহ ও নিরুত্তম হইয়া, একান্ত অবসন্নভাবে সেই সেতুর সমীপবর্তী স্থানে উপস্থিত হইল। - সেতুর নিকটে বিপক্ষ অশ্বারোহিদল গমনপথ নিরোধ করিয়াছিল। অতিকষ্টে এই পথ উন্মুক্ত হইল। পরিশ্রান্ত ও পিপাসার্ত্ত সৈনিকেরা লক্ষ্মীর প্রান্তভাগে উপস্থিত হইলে স্থানীয় স্ত্রী, পুরুষ, বালক, বালিকা, ধনী, নির্ধন, সমভাবে প্রত্যাবর্তিত ও আহত সৈনিকদিগের নিকটে আসিয়া, সুশীতল জল দিয়া তাহাদের তৃপ্তি সাধন করিল।

পূর্বে উক্ত হইয়াছে যে, রেসিডেন্সিরক্ষার জন্ত সৈনিকদল নিতান্ত অল্প ছিল। চিনহাটের যুদ্ধে এই অল্পসংখ্যক সৈনিকদিগের মধ্যেও এক শত উনিশ জন বিপক্ষদিগের অজ্ঞাঘাতে বা মার্ত্তণ্ডের মারাত্মক তাপে দেহত্যাগ করে। এখন সিপাহীদিগকে আক্রমণ করিবার কোন উপায় রহিল না। সিপাহীদিগের

সমক্ষে আত্মরক্ষা করাও দুঃসাধ্য হইয়া উঠিল । চিনহাটের যুদ্ধে জয়লাভ হওয়াতে উত্তেজিত সিপাহীরা দলে দলে গোমতীর তটে উপস্থিত হইতে লাগিল ।

লৌহময় সেতুর পথে কামান স্থাপিত ছিল । প্রস্তরময় সেতুও কামান দ্বারা সুরক্ষিত করা হইয়াছিল । গোমতী পার হইবার এই দুই পথ ভীষণ আগ্নেয় অস্ত্রের বলে অবরুদ্ধ ছিল । কিন্তু সেতু ব্যতীত নদী পার হইবার অন্য উপায় রহিয়াছিল । সিপাহীরা এই উপায় অবলম্বন করিল । তাহারা নৌকা সংগ্রহ পূর্বক নদী পার হইতে লাগিল । মধ্যাহ্নের পূর্বে ইংরেজদিগের আশ্রয়স্থল, ফৈজাবাদ, সীতাপুর, সুলতানপুর প্রভৃতি স্থানের উত্তেজিত সিপাহীগণ কর্তৃক অবরুদ্ধ হইল । লোকারণ্যের কোলাহল না থাকাতে কোন কোন লেখক লক্ষ্যে একটি প্রধান নীরব নগর বলিয়া নির্দেশ করিয়াছেন । এখন কামানের গভীর গর্জনে, বন্দুকের কঠোর শব্দে, যুদ্ধের ভৈরব রবে এই নগরের নিস্তব্ধতা ভঙ্গ হইল । সিপাহীদিগের সাহস পূর্ণমাত্রায় বিকাশ পাইল । তাহাদের আগমনপথ কোন অংশে অবরুদ্ধ রহিল না । তাহারা ওয়াজিদ আলির চিরপ্রসিদ্ধ রাজধানীতে উপস্থিত হইয়া, ইংরেজদিগের বাসস্থল রেসিডেন্সি ও মচ্ছিবনের নিকটবর্তী গৃহ সকল অধিকার করিল, এবং ঐ সকল গৃহ হইতে একরূপ তীব্রবেগে গুলিবৃষ্টি আরম্ভ করিল যে, রাত্রিদিন কিছুতেই উহার বিরাম হইল না ।

শার হেনরি লরেন্স এখন সাহায্যপ্রাপ্তির আশায় স্থানান্তরে আপনাদের ছরবস্তার সংবাদ পাঠাইলেন । বারাণসীর কমিশনরের নিকট ব্রিগেডিয়ার হাবেলকের নামে একখানি পত্র প্রেরিত হইল । উক্ত পত্রে শার হেনরি এই ভাবে আপনাদের হৃদশার বর্ণনা করিলেন,—“আমরা অণু প্রাতঃকালে বিপক্ষদিগকে আক্রমণ করিবার জন্ত আট মাইল দূরে গিয়াছিলাম । আমরা যুদ্ধে পরাজিত হইয়াছি । এতদেশীয় গোলন্দাজদিগের অসঙ্গত ব্যবহারে আমরাদিগের পাঁচটি কামান বিপক্ষদিগের হস্তগত হইয়াছে । বিপক্ষগণ এই স্থান পর্যন্ত আমাদের অনুসরণ করিয়াছে । চারি ঘণ্টা কাল হইল, তাহারা আমরাদিগকে আক্রমণ করিয়াছে । সম্ভবতঃ অণু রাত্রিতেই আমরা চারি দিকে অবরুদ্ধ হইব । বিপক্ষগণ সাতিশয় সাহসসম্পন্ন । আমাদের ইউরোপীয়দিগের সংখ্যা নিতান্ত অল্প । গত কল্যা আমাদের যে অবস্থা ছিল, আজ তাহার দশ

গুণ মন্দ দেখিতেছি। \* \* \* আপনি যদি শীঘ্র অর্থাৎ পনের বা কুড়ি দিনের মধ্যে উপস্থিত না হইলেন, তাহা হইলে আমাদের আত্মরক্ষা করা দুঃসাধ্য হইয়া উঠিবে।” স্মার হেনরি লরেন্স্ যাহার আশঙ্কা করিয়াছিলেন, কার্য্যতঃ তাহাই ঘটিল। জুলাই মাস আসিতে না আসিতে ইংরেজেরা চারি দিকে সিপাহীগণ-কর্তৃক আক্রান্ত হইলেন। ৩০শে জুন চিনহাটে তাঁহাদের পরাজয় ঘটয়াছিল। ১লা জুলাই তাঁহাদের অধিকৃত নগরের একরূপ দশাস্তর ঘটিল যে, মচ্ছিভবন পরিত্যাগ পূর্ব্বক রেসিডেন্সিতে সকলের সমবেত হওয়া আবশ্যিক হইয়া উঠিল। এক দিনের মধ্যেই লক্ষ্মীতে ইংরেজের প্রাধান্য অন্তর্হিত প্রায় হইল।

মচ্ছিভবনে বিবিধ যুদ্ধোপকরণ ছিল। উহার রক্ষার জন্ত ইউরোপীয় সৈনিকগণ ত্রিশটি কামান লইয়া অবস্থিতি করিতেছিল। গোলাগুলি প্রভৃতি অল্প স্থানে লইয়া যাওয়া অসাধ্য হইয়াছিল। স্মরণীয় যুদ্ধোপকরণ নষ্ট করিবার প্রস্তাব হইল। অনেক কৌশলে এই প্রস্তাব কার্য্যে পরিণত হইল। রেসিডেন্সি ও মচ্ছিভবনের মধ্যভাগে বিপক্ষ সিপাহীগণ রহিয়াছিল। রেসিডেন্সি হইতে মচ্ছিভবনে লোক পাঠাইলে সম্ভবতঃ ঐ লোক সিপাহীদিগের হাতে পড়িত এবং ইংরেজদিগের প্রস্তাব তাহাদের গোচর হইত। কিন্তু ইঞ্জিনিয়রেরা মচ্ছিভবনস্থিত স্বদেশীয়দিগকে আপনাদের প্রস্তাব জানাইতে উদাসীন রহিলেন না। তাঁহারা রেসিডেন্সির ছাদের উপরে উঠিয়া, একরূপ সঙ্কেতের উদ্ভাবন করিলেন। এই সঙ্কেত অনুসারে মচ্ছিভবনের লোকে বুঝিতে পারিল যে, বারুদ প্রভৃতি উড়াইয়া দিয়া, তাঁহাদিগকে রাত্ৰিকালে বিপক্ষদিগের অজ্ঞাতমারে রেসিডেন্সিতে যাইতে হইবে। সঙ্কেত অনুসারে কার্য্য হইল। রেসিডেন্সির ইংরেজেরা উদ্বেগ ও আশঙ্কার সহিত মচ্ছিভবনের দিকে উদ্গৃহীত হইয়া রহিলেন। কিছুক্ষণ পরেই তাঁহারা দেখিতে পাইলেন যে, প্রজ্বলিত অগ্নিশিখা, স্তম্ভের আকারে উপরে উঠিতেছে। পরমুহূর্ত্তেই গভীর শব্দ তাঁহাদের শ্রুতিপ্রবিষ্ট হইল। তৎসঙ্গে ধূমস্তূপে দৃশ্যমান আকাশ পরিব্যাপ্ত হইল। ইহা দেখিয়া, রেসিডেন্সির ইংরেজেরা স্পষ্ট বুঝিতে পারিলেন যে, তাঁহাদের সঙ্কেত অনুসারে কার্য্য হইয়াছে। দেখিতে দেখিতে বারুদ ও অন্যান্য যুদ্ধোপকরণ এবং প্রচুর খাদ্য দ্রব্য প্রভৃতি ভস্মীভূত হইয়া গেল। কিছুক্ষণ পরে মচ্ছিভবনের ইংরেজেরা অক্ষতশরীরে রেসিডেন্সিতে সমাগত

হইলেন। রেসিডেন্সির লোকে পুনঃ পুনঃ আনন্দধ্বনি করিয়া, ইঁহাদের হৃদয় উৎফুল্ল করিয়া তুলিল।

চিনহাটের যুদ্ধে ইংরেজসৈন্যের পরাজয়ের পর হইতে সিপাহীগণ প্রভূত বিক্রম ও সাহসের সহিত লক্ষ্মী অবরোধ করে। সিপাহীরা চিনহাটে ইংরেজদিগকে পরাজিত করিয়াছে, যখন এই সংবাদ চারি দিকে প্রচারিত হইল। তখন দুর্ভুক্ত লোকে অসংসাহসিককার্য্যসাধনে বদ্ধপরিকর হইয়া উঠিল। এ দিকে সিপাহীরা ইংরেজদিগের আবাসগৃহের দিকে গোলাবর্ষণে নিরস্ত থাকিল না। পূর্বে উক্ত হইয়াছে যে, ৩শে জুন চিনহাটের যুদ্ধে তাহারা জয়লাভ করে। ১লা জুলাই হইতে ইংরেজেরা লক্ষ্মীতে অবরুদ্ধ এবং সিপাহীদিগের আগ্রহ অস্ত্রের বিষয়ীভূত হইলেন। এক দিন অর্থাৎ হইতে না হইতে তাহাদের নিক্কিণ্ড গোলায়\* একরূপ বিপদ ঘটে যে, উহাতে সমগ্র ইংরেজজাতি কাতর হইয়া পড়ে। ১লা জুলাই রাত্রি দ্বিপ্রহরের সময়ে মচ্ছিবনের যুদ্ধোপকরণের ভাণ্ডার বিনষ্ট হয়। ২রা জুলাই প্রাতঃকালে স্মার্ট হেন্‌রি লরেন্স সৈন্যসম্মিলন ও কামানপ্রাপন প্রভৃতি বিষয়ের বন্দোবস্ত করেন। সূর্য্যের উত্তাপ যখন প্রথর হয়, তখন তিনি বর্হদেশ হইতে রেসিডেন্সিতে আসিয়া, আপনার বসিবার ঘরে একখানি কোচে শয়ন করেন। আর একখানি কোচে তাঁহার পার্শ্বে তদীয় ভ্রাতৃপুত্র শয়ানভাবে ছিলেন। স্মার্ট হেন্‌রির একজন সহকারী এক হাঁটু তাঁহার কোচে রাখিয়া, তাঁহারই সম্মুখে দাঁড়াইয়া, একখানি সরকারী কাগজ পড়িতেছিলেন। এতদ্ব্যতীত একটি এতদেশীয় ভৃত্যও ঐ ঘরে ছিল। এমন সময়ে একটা ভারিদ্ৰব্য ভাঙ্গার শব্দের মত আওয়াজ হইল। পরক্ষণে ধূম ও বালুকায় সমস্ত ঘর পরিপূর্ণ হইয়া গেল। কিয়ৎক্ষণের জন্ত গৃহের কিছুই কাহারও পরিদৃষ্ট হইল না। প্রধান কমিশনরের সহকারী ঘরের মেঝেতে পড়িয়া গেলেন। পরক্ষণেই তিনি উঠিয়া, চীৎকার করিয়া কহিলেন—“স্মার্ট হেন্‌রি! তুমি কি আঘাত পাইয়াছ?” প্রথমে কোন উত্তর শুনা গেল না।

\* এই গোলার ইংরেজী নাম শেল্। উহার অন্তর্ভাগ ফাঁপা। উহাতে নানা দাহ্য পদার্থ থাকে। এই গোলা কামান হইতে নিক্কিণ্ড হইলে ফাটিয়া যায়, এবং উহার অন্তর্ভাগের দাহ্য পদার্থ চারি দিকে নিক্কিণ্ড হইয়া পড়ে। এই সকল পদার্থের আঘাতে গৃহাদি ভগ্ন এবং লোকের জীবন নষ্ট হয়।

কিছুক্ষণ পরে প্রধান কমিশনের অতিক্ষীণস্বরে কহিলেন—“আমি মরিলাম ।” যখন ধূমরাশি তিরোহিত হইল, তখন দেখা গেল যে, স্মার্ট হেন্‌রি লরেস্সের কোচ তদীয় দেহনিঃসৃত শোণিতে রঞ্জিত হইয়াছে। সিপাহীরা চিনহাটে ইংরেজপক্ষের যে হাউইটজার নামক কামান অধিকার করিয়াছিল, সেই কামানের একটা গোলা স্মার্ট হেন্‌রি লরেস্সের গৃহে পড়িয়া ফাটিয়া যায় এবং উহার এক খণ্ডে তাঁহার বাম উরুর উপরিভাগ আহত হয়।

অবিলম্বে ডাক্তার ফেরারকে আনা হইল। ডাক্তার পরীক্ষা করিয়া দেখিলেন যে, আঘাত সাজ্জাতিক হইয়াছে। স্মার্ট হেন্‌রি লরেস্স্ যেরূপ রুগ্ন ও ক্ষীণ ছিলেন, তাহাতে উরুদেশ কাটিয়া ফেলিলে কোন ফল হইত না। সূচিকিৎসকের চিকিৎসাকৌশলে যাহা হইতে পারে, স্মার্ট হেন্‌রির অন্তিম সময়ের যাতনা দূর করিবার জন্ত তাহা হইল। আঘাতপ্রাপ্তিমাত্রেই স্মার্ট হেন্‌রি লরেস্স্ স্পষ্ট বুদ্ধিতে পারিয়াছিলেন যে, তাঁহার মৃত্যুসময় নিকটবর্তী হইয়াছে। তাঁহার যার পর নাই যাতনা হইয়াছিল। ক্রোধরসাবে তাঁহার ক্ষীণ দেহ অধিকতর ক্ষীণ হইয়াছিল। কিন্তু তিনি এই দুঃসহ যাতনাতেও ধীরতায় বিসর্জন দিলেন না। মেজর ব্যাক্স্ তাঁহার স্থলে প্রধান কমিশনের হইলেন। কর্ণেল ইংলিস্ প্রধান সেনাপতির কার্যভার গ্রহণ করিলেন। স্মার্ট হেন্‌রি লরেস্স্ মৃত্যুশয্যায় থাকিয়া, ইঁহাদিগকে যথাযোগ্য উপদেশ দিলেন। তিনি যে গৃহে ছিলেন, উহা বিপক্ষদিগের কামানের সন্মুখে থাকাতে তাঁহাকে অতিযত্নে এবং অতিধীরভাবে রেসিডেন্সির সীমার মধ্যে ডাক্তার ফেরারের বাসগৃহে লইয়া যাওয়া হইল। এই স্থানে তিনি সর্বদর্শী ভগবানে নির্ভর করিয়া, অন্তিম সময়ের প্রতীক্ষা করিতে লাগিলেন। অন্তিমকালে তিনি এই অভিপ্রায় প্রকাশ করিলেন যে, তাঁহার সমাধিস্তম্ভে এই কথা যেন ক্ষোদিত হয়—“এই খানে হেন্‌রি লরেস্স্ রহিয়াছেন, যিনি আপনার কর্তব্যসম্পাদনে চেষ্টা করিয়াছিলেন”। ইহার পর তিনি কহিলেন যে, তাঁহার সমাধিকালে যেন কোনরূপ আড়ম্বর না হয়। এইরূপে আপনার অভিপ্রায় ব্যক্ত করিয়া, সকলের নিকটে প্রীতির সহিত, স্নেহের সহিত বিদায় লইয়া, ৪ঠা জুলাই প্রাতঃকালে স্মার্ট হেন্‌রি লরেস্স্ প্রশান্তভাবে দেহত্যাগ করিলেন।

এইরূপে লক্ষ্মীর বিপন্ন ইংরেজদিগের আশার অদ্বিতীয় অবলম্বনস্বরূপ রক্ষক-



শ্রেষ্ঠের দেহাত্ম্য হয়। স্মার্ট হেন্‌রি লরেন্সের মৃত্যুসংবাদ কয়েক দিন গোপনে রাখা হইয়াছিল। স্মার্ট হেন্‌রি লরেন্স্‌ ক্রমে আরোগ্যলাভ করিতেছেন, এই সংবাদই রেসিডেন্সিতে প্রচারিত হইয়াছিল। কিন্তু প্রকৃত সংবাদ দীর্ঘকাল গোপনে রহিল না। অবিলম্বে এই শোচনীয় ঘটনার বিষয় রেসিডেন্সির লোকের পরিজ্ঞাত হইল। যে এই সংবাদ শুনিতে লাগিল, সে ই আপনাকে নিঃসহায় ও নিরবলম্ব ভাবিয়া, গভীর শোকে, হুঃসহ হুঃথে দীর্ঘনিশ্বাস পরিত্যাগ করিতে লাগিল। স্মার্ট হেন্‌রি লরেন্সের চরিত্র অপরের মানসপটে অঙ্কিত করিয়া দেওয়া হুঃসাধ্য। পৃথিবীতে যে সকল মহাপুরুষ মানবের মঙ্গলের জ্ঞাত অবতীর্ণ হইয়াছেন, স্মার্ট হেন্‌রি তাঁহাদের সহিত তুলনীয় হইতে পারেন। তাঁহার চরিত্রের যতই প্রশংসা করা যাউক না কেন, কিছুতেই সে প্রশংসা পর্যাপ্ত বোধ হয় না। স্মার্ট হেন্‌রি কর্তব্যসম্পাদনের জ্ঞাত আবিভূত হইয়াছিলেন, কর্তব্যসম্পাদনেই আপনার অমূল্য জীবনের উৎসর্গ করিয়াছেন। এই কর্তব্যপরায়ণ মহাপুরুষের যোগ্যতাসম্বন্ধে কেহই সন্দিহান করেন নাই। কোম্পানির ডিরেক্টরেরা স্মার্ট হেন্‌রির মৃত্যুসংবাদ জানিতে না পারিয়া, ২২শে জুলাই এই প্রস্তাব ধাৰ্য্য করিয়াছিলেন যে, লর্ড ক্যানিংয়ের মৃত্যুতে বা পদত্যাগে গবর্নর-জেনারেলের পদ শূন্য হইলে স্মার্ট হেন্‌রি লরেন্স্‌ সেই পদে নিয়োজিত হইবেন। স্মার্ট হেন্‌রি লরেন্স্‌ এইরূপে আপনার কর্মক্ষমতায় ও সদাশয়তায় ভারতের নিয়ন্তন অধিবাসী হইতে বিলাতের উচ্চতন কর্তৃপক্ষের বরণীয় হইয়াছিলেন। টড যেমন রাজপুতদিগের, মাক্‌ফার্সন যেমন খন্দদিগের, আউট্রাম যেমন ভীলদিগের, স্মার্ট হেন্‌রি লরেন্স্‌ সেইরূপ শিখদিগের এমন কি সমগ্র ভারতবাসীর ছিলেন। কি শোণিতময় যুদ্ধস্থলে, কি শান্তিময় কর্মক্ষেত্রে স্মার্ট হেন্‌রি সর্বত্র আপনার মহত্ত্ব দেখাইয়াছেন। দুর্দশাগ্রস্ত, পরাধীন জাতির প্রতি কিরূপে সমবেদনা দেখাইতে হয়, তাহা বোধ হয়, স্মার্ট হেন্‌রির মত কেহই জানিতেন না। এই চিরস্মরণীয় মহাপুরুষ আপনার সমাধিস্তম্ভে স্বয়ং যে কথার বিস্তার করিতে উপদেশ দিয়া গিয়াছেন, সেই কথা চিরকাল তাঁহার উদার প্রকৃতির পরিচয় দিবে। স্মার্ট হেন্‌রি কেবল কর্তব্যসম্পাদনচেষ্টাতে প্রাণ বিসর্জন করেন নাই, যথারীতি কর্তব্য সম্পাদন করিয়াও, অতীতদর্শী ঐতিহাসিকদিগের অপরিমীম শ্রদ্ধা ও প্রীতির অধিতীয় পাত্র হইয়াছেন।

স্মার হেনরি লরেন্স দেহত্যাগ করিলেন। এ দিকে উত্তেজিত সিপাহীগণ অধিকতর উৎসাহের সহিত গোলাবৃষ্টি করিতে লাগিল। লক্ষ্মী এখন সিপাহীগণের প্রধান কর্মস্থল হইয়াছিল। ইংরেজদিগের অধিতীয় আশ্রয়ক্ষেত্র রেসিডেন্সি এখন সিপাহীদিগের মারাত্মক অস্ত্রের লক্ষ্য হইয়া উঠিয়াছিল। নগরের শান্তি তিরোহিত, শৃঙ্খলা বিনষ্ট, পাঁরপাটা অন্তর্হিত হইয়াছিল। রাজপথে জনসমাগম ছিল না। লোকে সভয়চিত্তে রেসিডেন্সি হইতে দূরে পলায়ন করিয়াছিল। ঘোড়াগুলি আরোহিশূন্য হইয়া ইতস্ততঃ প্রধাবিত হইতেছিল। হাতী ও উটগুলিকে উহাদের পরিচালকগণ তাড়াতাড়ি স্থানান্তরে লইয়া গিয়াছিল। নদীস্থিত নৌকাগুলি রেসিডেন্সি হইতে অপসারিত হইয়াছিল। এইরূপে রেসিডেন্সির নিকটবর্তীর স্থানে লোকের দৈনন্দিন কর্ম প্রায় বন্ধ হইয়াছিল। দিনের পর দিন অতিবাহিত হইতে লাগিল। অবরোধকারী সিপাহীদিগের গোলাবৃষ্টি প্রতিদিন অধিকতর ভয়ঙ্কর হইয়া উঠিতে লাগিল। বিরাম নাই—বিশ্রাম নাই। গোলাবৃষ্টিতে রেসিডেন্সির লোকে উদ্ভ্রান্ত হইয়া পড়িতে লাগিল। তাহাদের বাসস্থলে গোলযোগের একশেষ ঘটিল। কুলমহিলা ও বালকবালিকারা প্রাণ রক্ষার জন্ত রেসিডেন্সিতে উপস্থিত হইয়াছিল। এ দিকে যে সকল ভৃত্য ইউরোপীয়দিগের পরিচর্যা করিত, তাহারা পলায়ন করিয়াছিল। যাঁহারা এই গ্রীষ্মপ্রধান দেশে আসিয়া অপরের পরিচর্যায় পরিতোষিত হইতেন, গৃহকর্মে অপরের উপর নির্ভর করিয়া, স্নেহ ও শান্তিতে কালযাপন করিতেন, তাঁহারা এখন স্বহস্তে আপনাদের গৃহ পরিষ্কার করিতে লাগিলেন, কূপ হইতে আপনাদের জল তুলিয়া লইতে লাগিলেন, আপনাদের খাণ্ড দ্রব্য পাক করিতে লাগিলেন, এবং বস্ত্রাদি ধৌত করিয়া লইতে লাগিলেন। এইরূপে জীবনধারণের জন্ত যাহা যাহা আবশ্যিক, তৎসমুদয়ই তাঁহারা নিজে করিতে লাগিলেন। রেসিডেন্সিতে লোকসংখ্যা অল্পসারে অবস্থিতিগৃহের সংখ্যা অধিক ছিল না। অনেকে একঘরে একত্র বাস করিতে লাগিল। অনেককে আস্তাবল আশ্রয় করিতে হইল। এ দিকে হাসপাতালের দৃশ্য সাতিশয় শোচনীয় হইয়া উঠিল। ইংরেজেরা এক সময়ে যে বিস্তৃত গৃহে আহারপানে পরিতৃপ্ত হইতেন, তাহাই এখন হাসপাতাল হইল। উক্ত গৃহ সহসা আহতগণে পরিপূর্ণ হওয়াতে, উহা ইংরেজের সাতিশয় মর্ষপীড়ার উদ্দীপক হইয়া উঠিল। কুলমহিলারা সমুদয় কর্ম পরিত্যাগ পূর্বক আহত-

দিগের শুশ্রূষা করিতে লাগিলেন । ইঁহারা এই দুর্দশাগ্রস্ত জীবদিগকে সুশীতল পানীয় দিতে লাগিলেন, পাথার বাতাস দিয়া ইহাদের শ্রান্তি দূর করিতে লাগিলেন, আহতস্থানে পটি বাঁধিয়া, যথানিয়মে ঔষধ দিয়া, শান্তিবিধানে যত্নবতী হইলেন এবং স্নেহশীল আত্মীয়ের গায়, প্রীতিময় পরিজনের গায় অপরিসীম স্নিগ্ধভাব দেখাইয়া, সন্তুষ্টিসাধনে প্রয়াস পাইতে লাগিলেন ।\*

এদিকে সিপাহীদিগের অসামান্য সাহস ও পরাক্রমের পরিচয় পাওয়া যাইতে লাগিল । ইংরেজদিগের আশ্রয়স্থল ভেদ করিবার জন্ত যে কোন স্থানে কামান স্থাপিত হইতে পারে, সেই স্থলেই উক্ত মারাত্মক অস্ত্র সন্নিবেশিত হইল । মসজিদের চূড়া, বাড়ীর ছাদ ও প্রাচীর প্রভৃতি উন্নত স্থলে লক্ষ্য-ভেদকুশল বিপক্ষগণ অবস্থিতি করিতে লাগিল । যখনই শ্বেতকায়গণ তাহাদের দৃষ্টিপথবর্তী হইতে লাগিল, তখনই তাহারা ঐ সকলের অন্তরালে থাকিয়া, আপনাদের অভ্যস্ত কৌশলের পরিচয় দিতে লাগিল । সিপাহীদিগের কামান হইতে মারাত্মক গোলা নিক্ষিপ্ত হইতে লাগিল । সূর্যোদয়ের পর তিন ঘণ্টা কাল পর্যন্ত তাহারা অবিরত গোলাগুলির বৃষ্টি করিত । মধ্যাহ্নকালে উহার প্রভাব কিয়দংশে শিথিল হইত । অপরাহ্নকালে আবার উহার তীব্রতা বাড়িয়া উঠিত ।†

এ দিকে ইংরেজেরা আত্মরক্ষার জন্ত যথাশক্তি প্রয়াস পাইতে লাগিলেন । কৰ্ম্মকুশল ও অধ্যবসায়সম্পন্ন মানবের চেষ্টায় এ সময়ে যাহা হইতে পারে, তাহার কিছুই অসম্পন্ন রহিল না । গুলিবৃষ্টির বিরোধের জন্ত ইংরেজেরা বিপক্ষের সম্মুখে প্রাচীর দিতে প্রবৃত্ত হইলেন । প্রাচীর প্রস্তুত করিবার উপকরণ না থাকিলেও, তাঁহাদের উত্তমভঙ্গ হইল না । মেহগনি কাঠের টেবিল ও অন্যান্য আসবাব, বাক্স, সিন্দুক, বঁগী, গোয়ান, আফিসের রাশীকৃত কাগজপত্র, অধিক কি কাপ্তেন হে সাহেবের পুস্তকালয়স্থিত বহুমূল্য হস্তলিখিত ও মুদ্রিত পুস্তক এখন অবরুদ্ধ-দিগের আত্মরক্ষার জন্ত প্রাচীর প্রস্তুত করিবার উপকরণ হইল । এক সময়ে তাঁহারা যে সকল দ্রব্য আমোদিত হইতেন, যে সকল দ্রব্য আবশ্যিক কৰ্ম্ম

\* *Rees, Siege of Lucknow, p. 92.*

† *Lucknow and its Memorials &c. p. 2.*

সম্পাদন করিতেন, যে সকল দ্রব্য পরিতৃপ্ত থাকিতেন, এখন সেই সকল দ্রব্য বিপক্ষদিগের সম্মুখে স্থাপিত হইল।

অত্যাশ্রয় স্থানে বিপন্ন ইংরেজদিগের মধ্যে যেরূপ উত্তমের নিদর্শন পরিস্ফুট হইয়াছিল, লক্ষ্যের রেসিডেন্সিতেও তাহা পূর্ণ মাত্রায় পরিদৃষ্ট হইল। দেওয়ানি-বিভাগের কর্মচারীরা সৈনিকবিভাগের কর্মচারীর ন্যায় বিপক্ষের আক্রমণ-নিরোধে, অস্ত্রপ্রয়োগে, আত্মরক্ষার উপায় অবলম্বনে উৎসাহ ও একাগ্রতার একশেষ দেখাইতে লাগিলেন। দিন অতিবাহিত, রাত্রি সমাগত হইতে লাগিল, তাঁহাদের সৈনিকব্রতের উদ্‌যাপন হইল না। ইঁহারা দিন রাত্রি আপনাদের অবলম্বিত কর্মসম্পাদনের জন্য বিপত্তিময় কর্মক্ষেত্রে সমান উত্তম, সমান উৎসাহ ও সমান একাগ্রতা দেখাইতে লাগিলেন। বিপক্ষেরা তাঁহাদের সম্মুখে যেরূপ ক্ষমতার পরিচয় দিতে লাগিল, দুঃস্থ রোগও তাঁহাদের মধ্যে সেইরূপ পরাক্রম প্রকাশ করিতে লাগিল। ওলাউঠা, জ্বর, অতিসার, বসন্ত রোগের প্রাহুর্ভাবে তাঁহারা একান্ত বিব্রত হইয়া পড়িলেন। এতদ্ব্যতীত তাঁহাদের মধ্যে খাণ্ড দ্রব্যের একান্ত অভাব হইল। অনেক সময় তাঁহাদিগকে আপনাদের প্রতিপালিত এবং আপনাদের শকটসংযোজিত বৃষগুলির মাংসে উদরাগ্নির নিরূপণ করিতে হইল। প্রথর উত্তাপে, গতাস্থ অশ্বের দেহনিঃসৃত পুতিগন্ধে, দৌরাভ্যা-কর মশামাছিতে তাঁহারা নিরতিশয় আকুল হইয়া পড়িলেন। অবরোধ-কারিগণ তাঁহাদের উপর প্রতিদিন গোলাগুলি বৃষ্টি করিতে লাগিল; তাঁহারাও নিত্যদৃষ্ট ও নিত্যসজ্জাটত বিষয় মনে করিয়া, প্রতিদিন উহাতে ভয়শূন্য হইয়া উঠিতে লাগিলেন এবং প্রতিদিন ঐ ভয়ঙ্কর অগ্নিবৃষ্টিতেও উপেক্ষা করিয়া, স্থিরভাবে আপনাদের কর্মে ব্যাপৃত রহিলেন। গোলা সকল তাঁহাদের পদ-দেশের সম্মুখে পড়িতে লাগিল, তাঁহারা ভ্রক্ষেপ না করিয়া, পরস্পর কথোপকথন করিতে লাগিলেন। গুলি সকল তাঁহাদের কেশাগ্রের উপর দিয়া যাইতে লাগিল, ঐ বিষয়ে বাঙনিম্পত্তি করিতে তাঁহাদের প্রবৃত্তি রহিল না। আসন্ন মৃত্যু হইতে মুক্তিলাভ এরূপ সাধারণ ঘটনার মধ্যে পরিগণিত হইল যে, উহাতে মহিলাগণ ও বালকবালিকাদিগেরও মনোযোগ রহিল না। জুলাই এবং আগষ্ট মাসে জন্ম ও মৃত্যু, উভয়ই সমভাবে অবরুদ্ধদিগের মর্ম্মপীড়ার কারণ হইয়া উঠিল। এই সময়ে অনেক শিশুসন্তানের মৃত্যু হইল। অনেকে জন্মগ্রহণ

করিল ।\* কিন্তু বিপক্ষগণ নিরন্তর ভয়াবহ কৰ্ম্মসাধনে ব্যাপ্ত থাকাতে প্রসূতির ও সন্তঃপ্রসূত সন্তানের পরিচর্যার একান্ত ব্যাঘাত ঘটিল । কাহারও স্বামী নিহত হইয়াছিল । নবপ্রসূত সন্তানের জীবনরক্ষার জন্ত দুগ্ধের সংস্থান ছিল না । প্রসূতি কাতরভাবে অপরের নিকটে দুগ্ধ ভিক্ষা করিতে লাগিল । † কোন সময়ে অবরুদ্ধদিগের শান্তি ছিল না । তাঁহারা প্রশান্তভাবে ঈশ্বরের আরাধনাতেও অভিনিবিষ্ট হইতে পারিতেন না । এ সময়েও তাঁহাদের গৃহদ্বারে গোলা পড়িয়া ফাটিয়া যাইত, উহার ভয়ঙ্কর শব্দে তাঁহাদের প্রশান্তভাব তিরোহিত হইত । ‡ একদিন গোলার আঘাতে রেসিডেন্সির ছাদের কিয়দংশ ভাঙ্গিয়া পড়াতে ছয় জন সৈনিক চাপা পড়িল । ইহাদের মধ্যে কেবল দুই জনকে জীবিত অবস্থায় বাহির করা হইল ।§ খাদ্য ও পানীয় এরূপ দুস্প্রাপ্য হইয়া উঠিয়াছিল যে, মূল্যের দিকে কাহারও দৃকপাত ছিল না । স্মার্ট হেনরির লরেন্সের দ্রব্যাদিবিক্রয়কালে এক ডজন ব্রাণ্ডি দুই শত টাকায় এবং চারিখানি ছোট পিষ্টক পঁচিশ টাকায় বিক্রীত হইয়াছিল । ¶ এক একটি ডিম আট আনা বা এক টাকার কমে পাওয়া যাইত না । কাপড় পরিষ্কার করিবার কোন সুবিধা ছিল না । ধোপা বার খানি মাত্র কাপড় কাচিতে দশ টাকা চাহিত । ॥

এইরূপে সকল দিকেই অবরুদ্ধদিগের যাতনার একশেষ ঘটিল । বিপক্ষেরা গোলাগুলিবৃষ্টি ব্যতীত ইহাদের বসতিস্থলের বিধ্বংসের জন্ত কুল্যা খনন করিতে লাগিল । ইঁহারা আত্মরক্ষার জন্ত প্রতিকুল্যা খনন করিতে লাগিলেন । এইরূপে জুনের পর জুলাই, জুলাইর পর আগষ্ট মাস অতিবাহিত হইল । এই দীর্ঘকালের মধ্যে আগ্নেয়ান্দ্রে বা হ্রস্ব রোগে প্রায় প্রতিদিনই ইংরেজদিগের লোকক্ষয় হইতে লাগিল । তাঁহাদের প্রধান ইঞ্জিনিয়ার নিহত হইলেন । তাঁহাদের প্রধান কমিশনরের পতন হইল । তাঁহাদের প্রধান গোলন্দাজ—

\* *Mrs. Case, Day by day at Lucknow. pp. 144, 171.*

† *Ibid. p. 152.*

‡ *Ibid, p. 133.*

§ *A Lady's Diary of the Siege of Lucknow, p. 99.*

¶ *Mrs. Case, Day by day &c. p. 172.*

॥ *Ibid, p. 187.*

সিক্রোরার প্রসিদ্ধ অধিনায়ক আহত হইয়া পড়িয়া রহিলেন । এ সময়ে পুরুষমাত্রেই সৈনিকব্রত অবলম্বন করিয়াছিল । তথাপি তাহাদের বলবৃদ্ধি হয় নাই । রেসিডেন্সিরক্ষার জন্ত ১,৬৯২ জন নিয়োজিত ছিল । ইহার মধ্যে ৯২৭ জন ইউরোপীয় এবং ৭৬৫ জন ভারতবর্ষীয় । অবরোধের কালে ৩৫০ জন ইউরোপীয় এবং ১৩৩ জন ভারতবর্ষীয় হত ও আহত হয় ।\* এতদ্ব্যতীত রোগে বহুসংখ্যক বালকবালিকা দেহত্যাগ করে । † ২৩০ জন ভারতবর্ষীয় পলাইয়া যায় । বহুসংখ্যক বিপক্ষের আক্রমণে বাধা দিতে এই অল্পসংখ্যক লোকের সামর্থ্য রহিল না । ইহারা আশাবিহীন হৃদয়ে স্থানান্তর হইতে সাহায্যপ্রাপ্তির প্রতীক্ষা করিতে লাগিল । ক্রমে সেপ্টেম্বর মাসের প্রথমার্দ্ধ অতীত হইল । কিন্তু সাহায্যকারী সৈনিকদিগের সমাগম হইল না । এই সময়ে অঙ্গদ নামক একজন বিশ্বস্ত সিপাহী ইহাদের চরের কর্মে নিয়োজিত ছিল । অঙ্গদ দীর্ঘকাল সৈনিকবিভাগে কর্ম করিয়া, ব্রিটিশ কোম্পানির নিকটে পেন্সন পাইতেছিল । বিশ্বস্ত অঙ্গদ এখন অতিগোপনে স্থানান্তর হইতে সংবাদ আনিয়া দিতে লাগিল । উপস্থিত সময়ে অপরে বুঝিতে না পারে, এই জন্ত গ্রীক প্রভৃতি ভাষায় পত্রাদি লিখিত হইত । কিন্তু সকলের মধ্যে এই প্রাচীন ভাষার আলোচনা ছিল না । একজন্ত ইংরেজেরা অতি ক্ষুদ্র কাগজে অতি ক্ষুদ্র অক্ষরে স্বদেশীয় ভাষায় পত্র লিখিতেন । চরেরা এই পত্র অতিগোপনে নির্দিষ্ট স্থলে লইয়া যাইত । কোন কোন সময়ে হাঁসের পেনের ভিতরে এই পত্র পুরিয়া দেওয়া হইত । পত্রবাহক উহা কাণে গুঁজিয়া বা অন্য কোন স্থানে গোপন করিয়া, লইয়া যাইত । লক্ষ্মীর অবরুদ্ধ ইংরেজেরা বিশ্বস্ত চর অঙ্গদের নিকটে অবগত হইলেন যে, সেনানায়ক হাবেলক কাণপুর হইতে লক্ষ্মীর উদ্ধারার্থে যাত্রা করিয়াছেন । এই সংবাদে লক্ষ্মীর ইংরেজেরা উৎফুল্ল হইলেন, উৎফুল্লভাবে—আশ্বস্তহৃদয়ে প্রতিদিন হাবেলকের আগমন-প্রতীক্ষা করিতে লাগিলেন । সেপ্টেম্বর মাসের শেষ ভাগে তাঁহাদের আশা ফলবতী হইল । প্রায় তিন মাসের পর, তাঁহারা দূর হইতে সাহায্যকারী সৈনিকদিগের সমাগমচিহ্ন দেখিতে পাইলেন । এই সময়ে সমগ্র নগর

\* *Lucknow and its Memorials of the Mutiny, p. 3.*

† *Lieut. Innes, Rough Narrative of the Siege of Lucknow, p. 13.*

বায়ুসস্তাড়িত সাগরের ত্রায় সংক্ৰমিত হইয়া উঠিল। লোকে ইতস্ততঃ প্রধাবিত হইতে লাগিল। অনেকে আপনাদের বাঙ্কনীয় দ্রব্য লইয়া, পলায়নের উদ্যোগ করিল। অবরোধকারী সিপাহীরা পূর্বাপেক্ষা অধিকতর তীব্রভাবে গুলিবৃষ্টি আরম্ভ করিল। এদিকে হাবেলকের সৈন্য নগরের পথে পথে বিপক্ষদিগের সহিত যুদ্ধ করিয়া, রেসিডেন্সির সম্মুখে উপস্থিত হইল।\* ইহাদের বন্দুকের শব্দে, ইহাদের উৎসাহব্যঞ্জক আনন্দধ্বনিতে অবরুদ্ধ ইংরেজেরা উৎফুল্লভাবে রেসিডেন্সির চারি দিক হইতে বহির্গত হইতে লাগিলেন। বিপক্ষেরা তাঁহাদিগকে লক্ষ্য করিবে, তৎপ্রতি দৃকপাত নাই। বিপক্ষদিগের অস্ত্রাঘাতে প্রাণান্ত ঘটবে, তদ্বিষয়ে চিন্তা নাই। তাঁহারা কামানের পশ্চাদ্ভাগ হইতে, ভগ্ন গৃহের অন্তরাল হইতে, প্রাচীরের অন্তর্ভাগ হইতে বহির্গত হইতে লাগিলেন। মহিলারা রেসিডেন্সির সঙ্কীর্ণ কুঠরী, তয়খানা এবং আয়ুগোপনের অন্ত্রায় স্থল হইতে বাহিরে আসিলেন। আহতগণ হাসপাতাল হইতে হামাগুড়ি দিয়া বাহির হইল। উত্থানশক্তি-রহিত পীড়িতগণ আপনাদের শয্যায় উদগ্রীব হইয়া রহিল। সমগ্র রেসিডেন্সি যেন অপূর্ব ষাট্‌মন্ত্রবলে আপনার সমগ্র অংশ হইতে সজীব মূর্তি বাহির করিতে লাগিল। হাবেলক এবং আউট্রাম ২৫শে সেপ্টেম্বর আপনার সৈনিকদল লইয়া অবরুদ্ধদিগের সম্মুখে সমাগত হইলেন। হাইলাণ্ডার সৈনিকগণ সবেগে মহিলাদিগের সমক্ষে উপনীত হইয়া, করমর্দনপূর্বক তাঁহাদের পরমন্নেহের ধনগুলিকে ক্রোড়দেশ হইতে ছিনাইয়া লইল; এবং উহাদিগকে আপনাদের বাহুদেশে রাখিয়া, প্রগাঢ় প্রীতিভরে মুখ চুম্বন করিতে লাগিল। এইরূপে শিশুগুলি এক সৈনিকের বাহুদেশ হইতে আর এক সৈনিকের বাহুদেশে যাইতে লাগিল।† অবরুদ্ধগণ উৎফুল্লভাবে করমর্দন পূর্বক সমাগত অধিনায়কদিগের সম্বর্দ্ধনা করিল এবং সর্বলোকপালক ভগবানকে ধন্যবাদ দিয়া, এই ঘোর বিপত্তিকালে আপনাদের সাহায্যকারীদিগের উপর নির্ভর করিয়া রহিল।

\* ২৫শে সেপ্টেম্বর মধ্যাহ্নকালে সাহায্যকারী সৈনিকদিগের আগমনের নিদর্শন দেখিতে পাওয়া যায়। বেলা অপরাহ্ন পাঁচটার সময় এই সৈনিকেরা রেসিডেন্সির পুরোবর্তী পথ দিয়া উপস্থিত হয়। সেনানায়ক নীল এই পথে নিহত হইলেন। এখন এই পথের নাম নীল-রোড হইয়াছে।—*Lucknow and its Memorials of the Mutiny*, p. 3.

† *Marshman, Memoirs of Sir Henry Havelock*, p. 414.

# দ্বিতীয় খণ্ড ।

## প্রথম অধ্যায় ।

দিল্লী ।

দিল্লীতে ইংরেজপক্ষের সৈন্যের সমাগম—নগর আক্রমণের বন্দোবস্ত—সেনাপতির ঘোষণা-  
পত্র—নগর আক্রমণ—সিপাহীদিগের পরাক্রম—ইংরেজসৈন্যের উচ্ছৃঙ্খলভাব—রাজপ্রাসাদ  
অধিকার—মোগল ভূপতির স্থানান্তরে প্রস্থান—তাঁহার অবরোধ—শাহজাদাদিগের নিধন—  
কাপ্তেন হড্‌সনের কার্যের সমালোচনা—দিল্লীর অধিবাসীদিগের ফাঁসী—নিকল্‌সনের  
দেহত্যাগ ।

সেনাপতি হাবেলক যে দিন স্যার জেম্‌স্‌ আউট্রামের সহিত লক্ষ্যের  
অবরুদ্ধ স্বদেশীয়দিগের উদ্ধারার্থে সমাগত হইলেন, তাহার কয়েক দিন পূর্বে  
সেনাপতি উইল্‌সন কর্তৃক মোগলের চিরপ্রসিদ্ধ রাজধানী অধিকৃত হয়।  
আগষ্ট মাসের শেষ পর্য্যন্ত ইংরেজসৈন্য দিল্লী অধিকার করিবার জন্ত সর্বিশেষ  
চেষ্টা করিয়াছিল। কিন্তু তাহাদের সংখ্যা অধিক ছিল না। যুদ্ধোপকরণেও  
তাহাদের বলবৃদ্ধি হয় নাই। তাহারা দিল্লী অবরোধ করিতে গিয়া, আপনারাই  
বিপক্ষগণ কর্তৃক অবরুদ্ধ হইয়াছিল। শেষে তাহাদের সংখ্যা বর্দ্ধিত হয়।  
যুদ্ধোপকরণেও তাহারা অধিকতর বলসম্পন্ন হইয়া উঠে। পঞ্জাবের প্রধান  
কমিশনার তাহাদের সাহায্যার্থে সৈন্য ও কামান ইত্যাদি পাঠাইয়া দেন।  
প্রসিদ্ধ যুদ্ধবীর নিকল্‌সন তাহাদের উদ্ধারার্থে আত্মজীবনের উৎসর্গ করিবার  
জন্তই যেন, দিল্লীতে উপস্থিত হইলেন। সাহসী সেনানায়ক নিবিলি চেম্বারলেন্  
যদিও আহত হইয়াছিলেন, তথাপি এখন সঙ্কলিত কার্যসাধনের জন্ত পূর্বের  
শ্রম উৎসাহযুক্ত এবং পূর্বের শ্রম পরায়ণ হইলেন। ৬ই সেপ্টেম্বর মিরাত  
হইতে একদল সৈন্য আগমন করে। রাজা গোলাপ সিংহ জন্ম হইতে যে সৈন্য  
পাঠাইতে প্রতিশ্রুত হইয়াছিলেন, তাহা তদীয় তনয় কর্তৃক প্রেরিত হয়।  
মিরাতের সৈনিকদলের উপস্থিতির দুই দিন পরে ঐ সাহায্যকারী সৈনিকগণ  
ইংরেজের শিবিরে পদার্পণ করেন। এইরূপে সহায়সম্পন্ন হইয়া, সেনাপতি



দিল্লী অধিকার করিবার জন্ত যাবতীয় বিষয়ের আয়োজন করেন। সৈন্ত, গোলাগুলি, বন্দুক, কামান প্রভৃতির যাহা কিছু এ সময়ে স্থানান্তর হইতে প্রেরিত হইতে পারে, সমুদয়ই ইংরেজের শিবিরে পছঁছে। সেপ্টেম্বর মাসের প্রারম্ভে এইরূপে যাবতীয় বাঞ্ছনীয় বিষয়ের সমাগম হয়। সেপ্টেম্বর মাসের প্রারম্ভেই ইংরেজসৈন্ত প্রকৃতরূপে মোগলের রাজধানী অবরোধ করে।

প্রধান ইঞ্জিনিয়ার বেয়ার্ড্‌ স্মিথ নগর আক্রমণের সমুদয় ব্যবস্থা করিয়াছিলেন; প্রধান সেনাপতি তাঁহার প্রস্তাবে সম্মত হইয়া, সৈনিকদিগের প্রতি আদেশপত্র প্রচার করিলেন। এই পত্রে তিনি উল্লেখ করিয়াছিলেন যে, এখন সৈনিকদিগের যথোচিত সাহস, কর্মক্ষমতা ও বীরত্বপ্রকাশের সহিত ধীরতা-প্রদর্শনের সময় উপস্থিত হইয়াছে। সৈনিকেরা যেন আপনাদের এই সকল অভ্যস্ত গুণ হইতে বিচ্যুত না হয়। তাহারা যেন সর্বদা ইঞ্জিনিয়ারদিগের সাহায্য করে। পরিখাখননেই হউক, কামানসন্নিবেশেই হউক, প্রাচীর-নির্মাণেই হউক, কোন বিষয়েই যেন তাহাদের কোনরূপ ঔদাস্য না জন্মে। গোলন্দাজেরা ইতঃপূর্বে সবিশেষ পরিশ্রম ও কৌশলের সহিত আপনাদের কর্তব্য সম্পাদন করিয়াছে, এখনও যেন পূর্বাপেক্ষা অধিকতর শ্রমসাধ্য এবং পূর্বাপেক্ষা অধিকতর কৌশলময় কর্মসম্পাদনে প্রস্তুত থাকে। ইহার পর তিনি সৈনিকদিগকে এই ভাবে সাবধান করিয়া দিলেন যে, তাহারা যেন কোন সময়ে উদ্বেজনায়া অধীর না হয়। বিপক্ষগণ সাতিশয় নির্দয়ভাবে নরহত্যা প্রভৃতি করিয়াছে বটে, কিন্তু ইহা মনে করিয়া, তাহারা যেন অসহায় নারী ও বালকবালিকার প্রতি কোনরূপ অত্যাচার না করে এবং কোনরূপে যেন তাহাদের জীবননাশে উদ্বৃত না হয়।

অতঃপর ইংরেজ আপনাদের অভ্যস্ত কর্মপটুতার পরিচয় দিতে উদ্বৃত হইলেন। সময়ের পরিবর্তনে সামরিক প্রণালীর পরিবর্তন ঘটয়াছিল। বিজ্ঞান এ বিষয়ের উন্নতিসাধনের প্রধান সহায় হইয়াছিল। যাহারা সভ্য ও পণ্ডিত বলিয়া জগতে আদর লাভ করিয়াছেন, বিজ্ঞান আজ্ঞাবাহক পরিচারকের স্থায় নানা বিষয়ে তাঁহাদের অভীষ্টকর্মসাধনে সাহায্য করিতেছে। জগতের যাবতীয় উন্নতিসাধক কর্মের স্থায় সভ্য মানব আপনাদের স্বশ্রমের সংহারেও বিজ্ঞানের সাহায্য গ্রহণ করিয়াছেন। উপস্থিত সঙ্কটকালে ইংরেজ, বিপক্ষের

বলক্ষয়ের জন্তু বৈজ্ঞানিক কৌশলের সহিত কার্য্য আরম্ভ করিলেন । তাঁহাদের দলে ৬,৫০০ জন সৈনিক ছিল । ইহার মধ্যে তাঁহাদের সজ্জাতির সংখ্যা ১,২০০ । এই সৈনিকদল প্রায় ৩০,০০০ হাজার বিপক্ষের ক্ষমতানাশে উত্তত হইল ।\*

পূর্বে দিল্লীর যে বিবরণ দেওয়া হইয়াছে, তাহাতে উহার অবস্থিতিস্থল, উহার প্রাচীর, উহার ভিন্ন ভিন্ন তোরণের বিষয় বিবৃত হইয়াছে । † ইংরেজ ভিন্ন ভিন্ন তোরণের দিকে কামানস্থাপনে উত্তত হইলেন । কাশ্মীর এবং মোরী দরওয়াজা তাঁহাদের লক্ষ্য হইল । ৭ই সেপ্টেম্বর রাত্ৰিকালে কামান সন্নিবেশিত হইবে বলিয়া স্থির হইল । ঐ দিন সেনাপতি উইলসন্ সৈনিকদিগের মধ্যে উদ্দীপনাময়ী ভাষায় পূর্বোক্ত আদেশপত্র প্রচার করিলেন । ঐ দিন সায়ংকালে ইঞ্জিনিয়ারেরা নির্দিষ্ট কৰ্ম্মসাধনে প্রবৃত্ত হইলেন । ‡ রাত্ৰিকালে কামানস্থাপনের শরঞ্জাম উটে বোঝাই করিয়া লইয়া যাওয়া হইল । গোকুর গাড়িতে গোলা বারুদ ইত্যাদি প্রেরিত হইল । পশ্চাতে বৃহৎ কামানসমূহের এক একটি চল্লিশটি বলদে পরিচালিত হইতে লাগিল । কামানের গাড়ির শব্দে, চালকদিগের কোলাহলে অতিশয় গোলযোগ ঘটিল । বিপক্ষেরা এই গোলযোগেও আক্রমণকারীদিগের উদ্দেশ্য বুঝিতে পারিল না । তাহাদের কামান সকল নীরবে রহিল । তাহাদের বন্দুক নিশ্চেষ্টভাবে থাকিল । তাহাদের পরিচালকগণ যেন কিছুই হয় নাই ভাবিয়া, সর্বপ্রকার ঔদাস্যের পরিচয় দিল । বিপক্ষের এইরূপ নিশ্চেষ্টভাব দেখিয়া, ইংরেজেরা উৎসাহযুক্তহৃদয়ে চারি স্থানে কামান স্থাপন করিলেন । এই সকল কামান হইতে নগরের দিকে গোলাবৃষ্টির আরম্ভ হইল । ১৩ই সেপ্টেম্বরের অপরাহ্ন পর্য্যন্ত এরূপ তীব্রবেগে গোলাবৃষ্টি হইল যে, উহাতে প্রাচীরের দুই স্থান ভগ্ন হইয়া গেল । অতঃপর ঐ ভগ্ন স্থান দিয়া, সৈনিকদলের অভিযানের প্রস্তাব হইল । প্রস্তাবানুসারে কার্য্য করিতে বিলম্ব ঘটিল না । সৈনিকগণ পাঁচ দলে বিভক্ত হইল । চারি দলের চারি জন অধিনায়ক আপনাদের সৈন্ত লইয়া, ভিন্ন ভিন্ন দিকে যাত্রা করিলেন । সর্বশেষ অর্থাৎ পঞ্চম দল প্রথম দলের সাহায্যার্থে রহিল ।

\* *Major-General Handcock, Siege of Delhi in 1857, p. 20.*

† উপস্থিত গ্রন্থের দ্বিতীয় ভাগ দেখ ।

‡ *Handcock, Siege of Delhi, p. 18.*

বিপক্ষের সংখ্যায় অধিক ছিল । অস্ত্রাদিতেও তাহারা শক্তিসম্পন্ন ছিল । তাহাদের অধিনায়ক বখত খাঁও সামরিক কৌশলে অভ্যস্ত ছিলেন । কিন্তু তাহাদের মধ্যে শৃঙ্খলা ছিল না । বৈজ্ঞানিক কৌশলে তাহাদের বলবৃদ্ধি হয় নাই । ইংরেজসৈন্য অপেক্ষা নানা বিষয়ে হীনবল হইলেও, সিপাহীরা যুদ্ধস্থলে আপনাদের যথোচিত সাহস ও বীরত্ব দেখাইয়াছিল । তাহারা আপনাদের সংখ্যাবৃদ্ধির জন্য বিভিন্ন স্থানের উত্তেজিত সিপাহীদলকে সাদরে আহ্বান করিয়াছিল । আমন্ত্রণপত্রে তাহাদের কবিত্বের নিদর্শনও পরিব্যক্ত হইয়াছিল । ভাবুক কবির দ্বারা তাহারা বিভিন্ন স্থানের সিপাহীদিগকে সম্বোধন করিয়া বলিয়াছিল যে, বসন্ত ব্যতিরেকে যেমন গোলাপ বিকশিত হয় না, ছুঙ্ক ব্যতিরেকে যেমন শিশুর উৎফুল্লভাব থাকে না, তোমাদের সমাগম ব্যতিরেকে আমাদের হৃদয়ও সেইরূপ উৎফুল্ল হইতেছে না ।\* এইরূপ কবিত্বময়ী গাথার রচনা করিয়া, তাহারা স্থানান্তরের ভিন্ন ভিন্ন দলকে মোগলের প্রসিদ্ধ রাজধানীতে আসিতে অনুরোধ করিয়াছিল । তাহাদের চেষ্টায় মহিমাম্বিত মোগলের সমক্ষে বিশাল সৈন্যসাগরের আবির্ভাব ঘটয়াছিল । এই সৈনিকেরা আপনাদের শিক্ষাদাতা ইংরেজের সমক্ষে শিক্ষার সবিশেষ পরিচয় দিতে ক্রটি করে নাই । ইংরেজ ইহাদের সাহস, ইহাদের রণকৌশল, ইহাদের বীরত্ব দেখিয়া পুলকিত হইলেন এবং ইহাদের পরাজয়েও গুণের প্রশংসা করিয়া, বীরপুরুষোচিত উদার প্রকৃতির পরিচয় দেন । †

১৫ই সেপ্টেম্বর রাত্রি তিনটার সময়ে ইংরেজের ভিন্ন ভিন্ন সৈনিকদল প্রস্তুত হইল । উষাকালে ইহারা নগরের ভিন্ন ভিন্ন তোরণের দিকে অগ্রসর হইতে লাগিল । ব্রিটিশ সৈনিকপুরুষের পার্শ্বে তেজস্বী শিখ, সাহসী সিপাহী, দৃঢ়কায় গুর্খা আপনাদের সমরকৌশলের পরিচয় দিবার জন্য স্থান পরিগ্রহ করিয়াছিল । তাহারা এক সময়ে চিনিয়াবালার চিরপ্রসিদ্ধ যুদ্ধক্ষেত্রে ইংরেজের বিরুদ্ধে অস্ত্রধারণ করিয়াছিল, তাহারাও এখন ইংরেজের রাজ্যশাসনগুণে সেই শত্রুতা বিশ্বস্ত হইয়া, ইংরেজের জন্যই আত্মজীবনের উৎসর্গ করিতে দৃঢ়-

\* *Martin, Indian Empire. Vol. II. p. 216.*

† *Kaye, Sepoy War. Vol. III. p. 610.*

প্রতিজ্ঞ হইয়াছিল ।\* ইংরেজ এইরূপে স্বদেশের ঞ্চায় বিদেশের বীরপুরুষগণে বলসম্পন্ন হইয়া, পরাক্রান্ত বিপক্ষের সম্মুখীন হইলেন । †

সেনানায়ক নিকলসনের আদেশে প্রথম ও দ্বিতীয় দল নগরের অভিমুখে অগ্রসর হইল । সিপাহীরা এমন তীব্রবেগে গোলাবৃষ্টির আরম্ভ করিল, এমন পরাক্রমের সহিত ইট ও পাথর নিক্ষেপ করিতে লাগিল, যে ইংরেজসৈন্য পরিথার নীচে মই রাখিয়া প্রাচীরের ভগ্ন স্থানে উঠিতে প্রথমে সমর্থ হইল না, শেষে তাহাদের প্রয়াস সফল হইল । দুই তিন খানি মই ফেলিয়া সাহসিক সৈনিকদিগের কেহ কেহ প্রাচীরে উঠিতে লাগিল । সিপাহীদিগের গুলিতে ইহাদের একজনের পতন হইলেও অপরে নিরস্ত হইল না । ইহারা কাশ্মীর তোরণের নিকটবর্তী এই ভগ্ন স্থান অধিকার পূর্বক মেইনগার্ডে উপস্থিত হইল ।

\* *Twelve Years of a Soldier's Life in India, p. 289.* খাঁ সিংহ নামক এক জন শিখসর্দার চিনিয়াবালায় ইংরেজের বিপক্ষে যুদ্ধ করিয়াছিলেন । উপস্থিত সময়ে ইনি দিল্লীতে ইংরেজের পক্ষে থাকিয়া যুদ্ধ করেন ।—*Kaye, Sepoy War. Vol. III. p. 610, note.*

† দিল্লীর যুদ্ধে যে সকল শিখ সৈনিক দেহত্যাগ করে, তাহাদের মধ্যে সুবাদার রতন সিংহ সবিশেষ অসিদ্ধি লাভ করিয়াছেন । রতন সিংহ পাতিয়ালানামী শিখ । স্বাস্থ্যভঙ্গ হওয়াতে ইনি গবর্ণমেন্টের সৈনিকদল হইতে অবসর লইয়াছিলেন । যখন পঞ্জাবের প্রথম পদাতিকদল দিল্লীর নিকটবর্তী হয়, তখন উক্ত দলের অধিনায়ক দেখিলেন যে, বৃদ্ধ রতন সিংহ দুইখানি তরবারি হস্তে লইয়া, পথের পার্শ্বে দণ্ডায়মান রহিয়াছেন । রতন সিংহ সৈনিকদলের সঙ্গে যাইতে চাহিলেন । অধিনায়ক প্রথমে সম্মত হইলেন না । রতন সিংহ কহিলেন—“কি ! আমার পুরাতন দল আমাকে ফেলিয়া দিল্লীতে যুদ্ধ করিতে যাইবে ? আশা করি, আপনি আমার পুরাতন শিখদিগের পরিচালনার জন্ত আমাকে পুনর্ব্বার যুদ্ধক্ষেত্রে যাইতে দিবেন । আমি আপনাদের জন্ত এই দুইখানি তরবারি ভাঙ্গিব ।” অধিনায়ক বৃদ্ধ শিখের এইরূপ তেজস্বিতা ও প্রভুভক্তি দেখিয়া, তাঁহার প্রার্থনায় সম্মত হইলেন । এই বৃদ্ধ সুবাদার যুদ্ধে যার পর নাই সাহস দেখাইয়াছিলেন । ১লা ও ২রা আগষ্ট যখন সিপাহীরা অবিশ্রান্তভাবে গুলিবৃষ্টি করিতে থাকে, সুবাদারের দলের ইংরেজ অধিনায়ক যখন দেহত্যাগ করেন, তখন বৃদ্ধ সুবাদার সেই গুলিবৃষ্টির মধ্যে এক লক্ষ্যে প্রাচীরে উঠিয়া, বিপক্ষদিগকে কহিয়াছিলেন :—“যদি কেহ যুদ্ধ করিতে ইচ্ছা করে, সে কাপুরুষের ঞ্চায় এক স্থানে দাঁড়াইয়া গুলিবৃষ্টি না করিয়া, এই স্থানে উপস্থিত হউক । আমি পাতিয়ালার রতন সিংহ ।” ইহা কহিয়া তিনি প্রাচীর হইতে লাফাইয়া পড়িয়া, আপনার দলের লোকের সহিত বিপক্ষদিগের মধ্যে গিয়াছিলেন । বিপক্ষগণ তৎকর্তৃক তাড়িত হইয়াছিল ।

যে দিন প্রাতঃকালে দিল্লী আক্রান্ত হয়, সেই দিনেও বৃদ্ধ সুবাদার একদল আক্রমণকারী সৈনিকের পুরোভাগে ছিলেন । কয়েক মিনিটের মধ্যেই তিনি সাজ্বাতিক আঘাত প্রাপ্ত হইলেন । তাঁহার দলের জমাদার দয়াল সিংহ তাঁহার পার্শ্বে দেহত্যাগ করেন ।—*Lord Roberts, Forty-one years in India. Vol. I. p. 254, note.*

দ্বিতীয় দল এই সময়ে কাবুল দরওয়াজার দিকে অগ্রসর হইয়া বিপক্ষদিগের পরাক্রম খর্ব করিয়া ফেলিল। এই স্থানে ইংরেজসৈন্য যার পর নাই ক্ষতিগ্রস্ত হইয়াছিল। সিপাহীরা এরূপ পরাক্রমের সহিত যুদ্ধ করিয়াছিল যে, তাহাদের নিক্কিণ্ড গুলির পর গুলির আঘাতে ইংরেজপক্ষের সৈনিকদিগের অনেকে দেহত্যাগ করিয়াছিল। তথাপি শেষে ইংরেজসৈন্য অভীষ্ট স্থান অধিকার করে।

কাবুল দরওয়াজা অধিকৃত হইলে, নিকল্‌সন্ লাহোর দরওয়াজার দিকে অগ্রসর হইলেন। এই দরওয়াজার পথের উভয় পার্শ্ববর্তী বাড়ীতে সিপাহীগণ অবস্থিতি করিতেছিল। উক্ত পথে যাইবার সময়ে সাহসী যুদ্ধবীরগণের অনেকেই দেহত্যাগ করিল। সেনানায়ক নিকল্‌সন্ সাজ্জাতিকরূপে আহত হইলেন। তাঁহাকে সৈনিকনিবাসের চিকিৎসালয়ে লইয়া যাওয়া হইল।

এদিকে তৃতীয় দল বারুদে কাশ্মীর দরওয়াজা উড়াইয়া দিবার আয়োজন করিল। হোম, স্মিথ, কারমাইকেল, হাবিলদার মধু প্রভৃতি সাহসী সৈনিকেরা বারুদের বস্তা দরওয়াজার নীচে রাখিল। এই কার্যে কারমাইকেল নিহত এবং হাবিলদার মধু আহত হইল। অতঃপর সল্‌কেল্ড্ নামক একজন সৈনিক-পুরুষ সন্নিবেশিত বারুদস্তূপে আগুন দিবার জন্ত দেশলাই হাতে লইয়া, প্রস্তুত হইল। কিন্তু উহা প্রজ্বলিত হইতে না হইতে সেও সাজ্জাতিক আঘাত পাইল। ভূপতিত হইবার সময়ে এই সাহসী সৈনিক পুরুষ আর একজনের হাতে দেশলাই দিল। এই সৈনিকের নিকটে অত্র একজন দাঁড়াইয়াছিল, গুলির আঘাতে তাহার পতন হইল। যাহার হাতে দেশলাই দেওয়া হইয়াছিল, বিপক্ষের নিক্কিণ্ড গুলিতে তাহারও প্রাণান্ত হইল। অত্র সৈনিক দেশলাই জ্বালাইয়া বারুদে দিল। মুহূর্ত্ত মধ্যে দরওয়াজা নষ্ট হইল। বারুদের আগুনে অনেক সিপাহী দেহত্যাগ করিল। সল্‌কেল্ডের পার্শ্বে হাবিলদার তিলক সিংহ আহত হইয়াছিল। রামহেত নামক একজন সৈনিক দেহত্যাগ করিয়াছিল। এতদ্ব্যতীত অত্র ছয় জন ভারতবাসী সৈনিক আপনাদের সাহসের একশেষ দেখাইয়াছিল। এই কার্যসাধনে ইংরেজসৈনিকের পার্শ্বে ভারতবর্ষীয় সৈনিকেরাও স্থিরভাবে যুদ্ধ করিতে করিতে আহত হইয়াছিল, কেহ কেহ সেই যুদ্ধস্থলে অনন্ত নিজায় অভিভূত হইয়াছিল।\*

\* *Martin, Indian Empire. Vol. II. p. 442.*

কিন্তু চতুর্থ দল তৃতীয় দলের আয় কৃতকার্য্য হয় নাই। ইহারা নগরের উপকণ্ঠবর্ত্তী কৃষ্ণগঞ্জ নামক স্থান হইতে বিপক্ষদিগকে তাড়িত করিয়া লাহোর দরওয়াজা অধিকার করিতে অসমর্থ হয়। জঙ্গুর সৈনিকদল সর্ব্বপ্রথম এই স্থানের আক্রমণে নিয়োজিত হইয়াছিল। কিন্তু তাহারা সাতিশয় ক্ষতিগ্রস্ত হইয়া পলায়ন করে। সেনানায়ক রীড গুরখাদিগের সহিত কামান লইয়া, বিপক্ষদিগের সম্মুখে আগমন করেন। কিন্তু তিনিও আহত ও পরাজিত হইলেন। নীবিলা চাম্বারলেন স্বয়ং আহত হইয়াও এই সময়ে সিপাহীদিগকে বাধা দিবার আয়োজন করেন। তাঁহার আদেশে সশস্ত্র রক্ষকেরা হিন্দুরাওর গৃহের ছাদে সন্নিবেশিত হয়। অনেক আহত সৈনিক বন্দুক হস্তে করিয়া, ঐ স্থানে থাকে। সিপাহীগণ রীডকে পরাজিত করিয়াছে, এমন সময়ে অন্ততম সেনানায়ক হোপ্ গ্রাণ্ট সেনাপতি উইলসনের আদেশে কয়েক শত শিখ ও ইউরোপীয় সৈনিক লইয়া তাঁহার সাহায্যার্থে অগ্রসর হইলেন। বিপক্ষ সিপাহীরা আপনাদের সাহস ও পরাক্রমের একশেষ প্রদর্শন করে। সুশিক্ষিত ইংরেজ বীরপুরুষেরা ইহাদের অসামান্য সাহস ও অদ্ভুত রণকৌশল দেখিয়া অতিমাত্র বিস্মিত হইলেন। ক্রমে সিপাহীদিগের কামান হইতে গোলাবৃষ্টি কমিয়া আইসে। শেষে তাহারা ইংরেজপক্ষের চতুর্থ দলকে বাধা দিতে নিরস্ত হয়।

এইরূপে ১৪ই সেপ্টেম্বর ইংরেজসৈন্যের প্রয়াস অনেকাংশে সফল হয়। তাহারা প্রাচীর ভেদ পূর্ব্বক নগরে প্রবেশ করে। সেনাপতি উইলসন্ অশ্বে আরোহণ পূর্ব্বক এক হস্তে দিল্লীর মানচিত্র লইয়া নগরে সমাগত হইলেন। প্রধান ইঞ্জিনিয়ারও উৎফুল্লভাবে নগরে গমন করেন। সেনাপতি এবং তাঁহার সহচরবর্গ নগরমধ্যবর্ত্তী স্কিনারের গৃহে সেই রাত্রি যাপন করেন।\*

পরদিন যুদ্ধের গোলযোগ—কামানের গর্জন, বন্দুকের শব্দ, ধূমজনিত অন্ধকার, গোলাগুলিবৃষ্টির ভয়াবহ দৃশ্য প্রায় অন্তর্হিত হয়। এই দিনে ইংরেজের সৈনিকেরা অন্তরূপে আপনাদের জিগীষার তৃপ্তিসাধন করে।

\* স্কিনারনামক একজন ফিরিঙ্গী কর্তৃক এই গৃহ নির্মিত হয়। স্কিনার প্রথমে মোগল সম্রাটের দরবারে কর্ম্ম করিতেন। লর্ড লেক্ দিল্লী অধিকার করিলে, স্কিনার ইষ্টইণ্ডিয়া কোম্পানির সৈনিকনিভাণে কর্ম্ম গ্রহণ করেন। ক্রমে ইহার পদোন্নতি হয়।—*Lord Roberts, Forty-one years in India. Vol. I. p. 241, note.*

মোগলের প্রসিদ্ধ রাজধানী অনেক বহুমূল্য দ্রব্যে পরিপূর্ণ ছিল। স্বর্ণ, রৌপ্য, মণি, বস্ত্র, প্রভৃতি মূল্যবান পদার্থে উহার সমৃদ্ধি বহুকাল হইতে লোকসমাজে খ্যাতিলাভ করিয়াছিল। এই সমৃদ্ধি বিজয়ী সৈনিকদিগের পক্ষে লোভনীয় বিষয়ের মধ্যে পরিগণিত। কিন্তু রজত, কাঞ্চন প্রভৃতি অংশতঃ স্থানান্তরিত বা সংগোপিত হইয়াছিল। যাহারা দিল্লী হইতে পলায়নে উদ্বৃত্ত হইয়াছিল, তাহারা উহা সঙ্গে লইয়াছিল। কেহ কেহ পুনঃপ্রাপ্তির প্রত্যাশায় উহা মাটিতে পুতিয়া রাখিয়াছিল। কিন্তু অন্য এক পদার্থের সংগোপনে ইহাদের তাদৃশ মনোযোগ হয় নাই। কাল, সাদা বা সবুজ রঙ্গের সুরাপূর্ণ বোতল অধিবাসীদিগের অনাদরণীয় হইলেও ইংরেজপক্ষের সৈনিকদিগের সাতিশয় লোভনীয় ছিল। যে পানীয়ে এক সময়ে তাহাদের অবসাদ অন্তর্হিত, উত্তম উদ্দীপিত ও সাহস সংবর্দ্ধিত হইত, অন্য সময়ে তাহাতেই তাহারা সর্বাংশে নিশ্চেষ্ট, নিষ্ক্রিয় ও জড়ভাবাপন্ন হইয়া পড়িত। ১৫ই সেপ্টেম্বর মহানগরী দিল্লীতে ইংরেজপক্ষের সৈনিকদলের এই দশা ঘটিল। দিল্লীর কিয়দংশ অধিকার করিয়াই, এই সকল সৈনিক দোকানপাট লুণ্ঠ করিতে লাগিল এবং বিলুপ্তিত সুরা আগ্রহসহকারে উদরস্থ করিয়া, উহার তীব্রতেজে প্রায় জ্ঞানশূন্য হইয়া পড়িল। ইংরেজ সৈনিকদিগের গ্রায় পঞ্জাবের দৃঢ়কায় শিখেরাও সুরাপানে প্রমত্ত হইল। ইহাদের মধ্যে কোনরূপ শৃঙ্খলা রহিল না, অধিনায়কের আদেশানুসারে কার্য্য করিতে আগ্রহ দেখা গেল না। সুরাপানে সকলেই উচ্ছৃঙ্খল, সকলেই স্বপ্রধান, সকলেই নীতিজ্ঞানশূন্য হইয়া পড়িল। এক জন ইংরেজ অধিনায়ক ( কাপ্তেন হড্‌সন ) লিখিয়া গিয়াছেন—“আমার জীবনে এই প্রথম বার ইংরেজসৈনিকদিগকে বারংবার তাহাদের অধিনায়কের অনুসরণে অসম্মত হইতে দেখিয়াছি।”\* অন্য একজন সদাশয় ইংরেজ এ সময়ে স্বয়ং সুরা-প্রমত্ত ইংরেজদিগের উচ্ছৃঙ্খলভাব দেখিয়া, ঘৃণা ও লজ্জার সহিত উহার উল্লেখ করিয়া গিয়াছেন।† সেনাপতি উইল্‌সন্ সৈনিকদিগের মধ্যে এইরূপ শৃঙ্খলাহানি দেখিয়া চিন্তিত হইলেন। সেনাপতি হাবেলক কাণপুরে আপনার সৈনিকদিগকে সুশৃঙ্খলভাবে রাখিবার জন্ত মদের বোতল সকল কমিশরিমেণ্টের

\* *Twelve years of a Soldier's Life in India, p. 296.*

† *Martin, Indian Empire. Vol. II. p. 444.*

কর্মচারীদিগের হাতে সমর্পণ করিয়াছিলেন। সেনাপতি উইলসন্ ইহা না করিয়া ১৬ই সেপ্টেম্বর যাবতীয় সুরা নষ্ট করিতে আদেশ দিলেন। দিল্লীর রাজপথে সুরাস্রোত প্রবাহিত হইল। সুরাপূর্ণ শত শত বোতল ভগ্ন হইয়া রহিল। উহার মধ্যস্থিত তরল পদার্থে পথ কর্দমাক্ত হইল। যে দ্রব্য চিকিৎসালয়ে রুগ্ন ও আহতদিগের নিরতিশয় আবশ্যক ছিল, তাহা পথের ধূলি-রাশিতে বিলীন হইল।\*

১৫ই সেপ্টেম্বর ইংরেজের সৈনিকদল উত্তেজক মদিরার প্রভাবে এইরূপ প্রমত্তভাবে ছিল। বিপক্ষ সিপাহীগণ যদি সুর্যোগ বুঝিয়া, অভীষ্টসাধনে উদ্যত

\* রবার্টস্ নামক এক জন সৈনিক ( পরে লর্ড রবার্টস্ ; ইনি ভারতবর্ষের প্রধান সেনাপতি হইয়াছিলেন ) এই সময়ে দিল্লীর সৈনিকদলে ছিলেন। তিনি লিখিয়াছেন যে, কেহ কেহ উত্তাপে এরং অত্যধিক পরিশ্রমে ক্লান্ত হইয়া, সুরা পান করিয়াছিল বটে, কিন্তু তিনি এই দিন কাহাকেও সুরপানে প্রমত্ত হইতে দেখেন নাই।—*Lord Roberts, Forty-one years in India. Vol. I. p. 243, note.* কিন্তু অপর লেখকেরা সাধারণতঃ সৈনিকদিগের প্রমত্তভাবেই বর্ণনা করিয়া গিয়াছেন।

১৪ই সেপ্টেম্বর নগরের অত্যন্ত অংশ ইংরেজদিগের অধিকৃত হইয়াছিল। অস্ত্রাগার রাজপ্রাসাদ, সেলিমগড় এবং নগরের অগ্ণ্যন্ত জনবহুল স্থান সিপাহীদিগের অধিকারে ছিল।—*Lord Roberts, Forty-one years in India. Vol. I. p. 240-241.*

বুদ্ধ মোগল ভূপতির একজন কর্মচারী ( ইহার বিষয় স্থানান্তরে বিবৃত হইবে ) এই সময়ে দিল্লীতে উপস্থিত ছিলেন। তিনি লিখিয়া গিয়াছেন—“১৪ই সেপ্টেম্বর ইংরেজসৈন্য কাশ্মীর তোরণ দিয়া, নগরে প্রবেশ করে। তাহারা কোতওয়ালি এবং জুম্মা মসজিদ পর্য্যন্ত অগ্রসর হয়। কতিপয় সওয়ার কোতওয়ালি হইতে ইংরেজপক্ষের অগ্রগামী সৈনিকদিগের মধ্যে গোলা চালাইয়াছিল। উহাতে তাহাদের পঞ্চাশ জন হত ও আহত হয়। সিপাহীরা জুম্মা মসজিদে থাকিয়া, ইংরেজসৈন্যের গতিরোধ করে। ইহাতে উক্ত সৈনিকগণ কাশ্মীর তোরণে ফিরিয়া যায়।—*Two Native Narratives of the Mutiny in Delhi, p. 70.* জুম্মা মসজিদ নগরের মধ্যভাগে অবস্থিত। সম্রাট্ শাহ জাহান কর্তৃক উহা নিৰ্ম্মিত হয়। ইংরেজসৈন্য কর্তৃক দিল্লী অধিকৃত হইলে এক ব্যক্তি অসন্তোষের সহিত উক্ত মসজিদের প্রাচীরে চক্ দিয়া এই ভাবে একটি কবিতা লিখিয়া গিয়াছিল।—

“আহবঘোষণাপরে দেখি ঘোর রণ,

ভগবানে, সৈন্যগণে ডাকে ঘন ঘন।

কিন্তু শেষে জয়লাভ হ'লে যুদ্ধস্থলে,

না স্মরে ঈশ্বরে নাহি মানে সৈন্যদলে।”

এই সুদৃশ্য মসজিদ অতঃপর বিনষ্ট করিবার প্রস্তাব হইয়াছিল। কিন্তু লর্ড লয়েন্সের চেষ্টায় এই অসঙ্গত প্রস্তাব কার্যে পরিণত হয় নাই।—*Address on Ancient Buildings in India by Lord Curzon, at the Annual meeting of the Asiatic Society of Bengal, 7th February, 1900.*



হইত, যদি ইংরেজপক্ষের দিকে দৃষ্টি রাখিয়া, কিছু বুদ্ধিকৌশলের পরিচয় দিত, তাহা হইলে ১৫ই সেপ্টেম্বর তাহাদের অভিলষিত কর্মসম্পাদনের সুযোগ ঘটিত। তাহাদের এই সুযোগে ইংরেজকে যার পর নাই বিপদাপন্ন হইতে হইত। কৃষ্ণগঞ্জ এখনও তাহাদের অধিকারে ছিল। লাহোরতোরণ এবং মহানগরীর মধ্যবর্তী বহুসংখ্যক বাড়ী তাহাদের হস্তে রহিয়াছিল। পাহাড়ের উপরিস্থিত সৈনিকনিবাসে ইংরেজের অতি অল্পমাত্র সৈনিক অবস্থিতি করিতে ছিল। ইহাদের মধ্যে অধিকাংশ পীড়িত ছিল। এদিকে নগরের মধ্যভাগে ইংরেজের সৈনিকদল বিশৃঙ্খলভাবে রহিয়াছিল। উপযুক্ত সেনাপতির প্রতিভাবলে পরিচালিত হইলে, সিপাহীগণ ইংরেজের সমগ্র সৈনিকদলকে বিপন্ন করিয়া বৃদ্ধ মোগলের জয়পতাকাস্থাপনে বোধ হয়, অসমর্থ হইত না। ফলতঃ ১৫ই সেপ্টেম্বর দিল্লীস্থিত ইংরেজের সম্মুখে করালকাদম্বিনীর আবির্ভাব ঘটিয়াছিল। এই মেঘমালা হইতে অশনিপাত হওয়া অসম্ভব ছিল না। ইংরেজের ভাগ্যবলে এই কাদম্বিনীর করাল ছায়ার বিলয় হয়। বিপক্ষ সিপাহীদিগের জয়লাভ শেষে তাহাদেরই পরাজয়ের সোপানস্বরূপ হইয়া উঠে।

১৫ই সেপ্টেম্বর বিনা বিপত্তিতে অতিবাহিত হইল। সেনাপতি উইল্‌সন্‌ অপার সাহায্যকারী সৈনিকদল ব্যতিরেকে দিল্লীর অগ্ৰাণ্য স্থান আক্রমণ করিবেন কিনা, ভাবিতে লাগিলেন। কিন্তু তাঁহার সহযোগীরা পশ্চাদ্‌গমনের একান্ত বিরোধী ছিলেন। এক শত বৎসর পূর্বে লর্ড ক্লাইব্‌ ভারতে ইংরেজের আধিপত্যস্থাপনপ্রসঙ্গে বলিয়াছিলেন—“এক স্থানে স্থিরভাবে থাকা বিপত্তিজনক, পশ্চাদ্‌গমন সর্বনাশের কারণ।” দিল্লীর ইংরেজ সেনাপতি এখন এই কথাই গুরুত্ব বুঝিলেন, সুতরাং তিনি সৈনিকদিগকে অভীষ্টকর্মসাধনে অগ্রসর হইতে আদেশ দিলেন। ১৬ই সেপ্টেম্বরের প্রভাতকাল ইংরেজের সমক্ষে প্রশান্তভাবে দেখা দিল। দিল্লীর ইংরেজেরা এই দিনে পূর্বাপেক্ষা অধিকতর আশস্ত হইলেন। দুই দিন পূর্বে বিপক্ষ সিপাহীগণ ইংরেজের চতুর্থ সৈনিকদলকে পরাজিত করিয়া, কৃষ্ণগঞ্জ হইতে হটাইয়া দিয়াছিল। ১৬ই সেপ্টেম্বর প্রাতঃকালে তাহারা ঐ স্থান পরিত্যাগ করিয়াছিল। কৃষ্ণগঞ্জ ইংরেজের অধিকৃত হইল। উহার নানাবিধ অস্ত্রপূর্ণ অস্ত্রাগার ইংরেজের অধিকারে আসিল। ১৭ই সেপ্টেম্বর সায়ংকালে ইংরেজসৈন্য দিল্লীর

পথে পথে যুদ্ধ করিতে করিতে সম্রাটের প্রাসাদের দিকে অগ্রসর হইতে লাগিল। সিপাহীরা ইহাদিগকে বাধা দিতে নিরস্ত থাকিল না। গৃহের ছাদ, জানালা, দরওয়াজা প্রভৃতি হইতে ইহাদের উপর তীব্রবেগে গুলিবৃষ্টি হইতে লাগিল। ১৮ই লাহোর দরওয়াজা অবিকার করিবার চেষ্টা হইল। কিন্তু সিপাহীগণ বাড়ীর উপর হইতে অলক্ষ্যভাবে গুলিবৃষ্টি করাতে ইউরোপীয় সৈন্য একরূপ ভীত ও অবসন্ন হইয়া পড়িয়াছিল যে, তাহারা অগ্রসর হইতে সম্মত হইল না। ইহাতে সেনাপতি উইলসন্ চিন্তিত হইলেন। তাঁহার মস্তিষ্কের প্রত্যেক ভাগ, ধমনীর প্রত্যেক অংশ, শরীরের প্রত্যেক অঙ্গ অবসন্ন হইয়া পড়িল। এক দিন পরে তাহার এইরূপ অবসাদ, এইরূপ অশান্তির অবসান হইল। ২০শে সেপ্টেম্বর ইংরেজ লাহোর দরওয়াজা, জুম্মা মসজিদ, আজমীর দরওয়াজা অধিকার করিলেন। ঐ দিন সম্রাটের প্রাসাদে তাঁহাদের জয়-পতকা উড্ডীন হইল।

যদিও দিল্লীর স্থানে স্থানে বিপক্ষ সিপাহীগণ অবস্থিতি করিতেছিল, তথাপি ঐ মহানগরীতে ইংরেজের প্রাধান্যপ্রতিষ্ঠায় কোনরূপ ব্যাঘাত হইল না। ২০শে সেপ্টেম্বর ইংরেজ মোগলের চিরপ্রসিদ্ধ রাজধানীর অধিপতি হইলেন। তাঁহারা আপনাদের জয়লাভের জন্ত পৃথিবীর অমরনিকেতনে—প্রসিদ্ধ দেওয়ান-ই খাসে পানভোজন করিয়া আমোদিত হইলেন। \*

দিল্লী অধিকৃত হইল। বিপক্ষ সিপাহীগণ ভগ্নোৎসাহ হইয়া পড়িল। অধিবাসিগণ আপনাদের মূল্যবান্ দ্রব্যাদি লইয়া স্থানান্তরে যাইতে উদ্বৃত হইল। ইংরেজ সৈনিকগণ এখন প্রতিহিংসাতৃপ্তির সুযোগ দেখিতে লাগিল। যে স্থানে তাহাদের অসহায় কুলকামিনীদিগের শোণিতপাত হইয়াছিল, স্নেহাস্পদ সন্তানদিগের দেহাংশ বিচ্ছিন্ন হইয়া গিয়াছিল, তাহারা এখন সেই স্থানের অধিকারী হইয়াছিল। তাহাদের সশস্ত্র বিপক্ষগণের অনেকে এখন সেই স্থানে মৃত্যুমুখে পাতিত বা সেই স্থান হইতে নিষ্কাশিত হইয়াছিল। তাহারা এখন

\* মোগল সম্রাটদিগের খাস দরবারগৃহ—দেওয়ান-ই খাস খেত মন্দির প্রস্তরে নির্মিত এবং বিবিধ কারুকার্যে খচিত। ছাদের স্তম্ভ গুলিও মন্দির প্রস্তরের। এই দরবারগৃহে সুপ্রসিদ্ধ ময়ূরসিংহাসন স্থাপিত ছিল। দেওয়ান-ই খাসে এই কথা ক্ষোদিত হইয়াছিল—“যদি পৃথিবীতে স্বর্গ থাকে; তাহা হইলে উহা এই, উহা এই, উহা এই”—*Two Native Narratives of the Mutiny in Delhi, p. 11.*

যাহাকে সম্মুখে পাইল, তাহার প্রতি অস্ত্রপ্রয়োগে কাতর হইল না । এ দিকে শিখ সৈনিকেরাও সম্পত্তিলুণ্ঠনে বা অধিবাসীদিগের নিধনে তাহাদের দৃষ্টান্তের অনুবর্তী হইল । মোগলের রাজধানী ইংরেজদিগের ঞ্চায় শিখদিগেরও বিদ্রোহ-ভাবের উদ্দীপক হইয়াছিল । মোগলের আদেশে তেগবাহাদুর যে স্থানে নিহত হইয়াছিলেন, গোবিন্দ সিংহ যে স্থানের অধিবাসীদিগের বিপক্ষতায় একান্ত নিপীড়িত হইয়াছিলেন, বাঁদা যে স্থানে কষ্টের একশেষ ভোগ করিয়া, আত্ম-বিসর্জন করিয়াছিলেন, সেই স্থানের বিষয় তাহারা বিস্মৃত হয় নাই । আপনাদের চিরমাতৃ, চিরভক্তিভাজন ধর্ম গুরুদিগের শোচনীয় দশার সহিত দিল্লী এবং মোগলের নাম তাহাদের মানসপটে একস্থানে গ্রথিত ছিল । তাহারা দিল্লী এবং মোগলের নামে উত্তেজিত হইত, ঘণার ভাব প্রকাশ করিত এবং প্রতি-হিংসার আবেগে অধীর হইয়া পড়িত । সুতরাং ইংরেজ ও শিখ, সমভাবে আপনাদের বলবতী হিংসার পরিতর্পণে অগ্রসর হইল । যাহারা এক সময়ে ইংরেজের নিধনে লিপ্ত ছিল, কুশনারী ও বালকবালিকার শোণিতে যাহাদের হস্ত কলঙ্কিত হইয়াছিল, ঞ্চায়ানুসারে তাহারা দয়ার পাত্র না হইতে পারে । কিন্তু যাহারা কখনও ইংরেজের বিরুদ্ধে অস্ত্র উত্তোলন করে নাই, ইংরেজের নিষ্কাশনে বা নিধনে আগ্রহ প্রকাশ করে নাই, সংসারের শান্তিময় পথ হইতে পরিভ্রষ্ট হয় নাই ; যাহারা আপনাদের উত্তেজিত, মশস্ত্র সজাতিগণ কর্তৃক নিপীড়িত ও ক্রান্তসর্বস্ব হইয়াছিল, জন্মভূমির প্রতি অপরিমিত অনুরাগ প্রযুক্ত যাহারা সতয়ে, উদ্বিগ্নচিত্তে এবং একান্ত কাতরভাবে উচ্ছ্বাল, সৈনিকগণে পরিপূর্ণ বিপত্তিময় নগরে বাস করিতেছিল, তাহাদের জীবনের দিকে দৃষ্টি রাখা এ সময়ে ইংরেজ সৈনিক পুরুষদিগের একান্ত কর্তব্য ছিল । কিন্তু এই পবিত্র কর্তব্যের পালনে সকলে সমভাবে মনোযোগী হয় নাই । প্রচণ্ড বিপ্লবের সজ্যাতে অসং ব্যবস্থার সহিত অনেক সং ব্যবস্থাও বিলুপ্ত হয় । উদ্ধত লোকের সহিত অনেক নিরীহ লোকেরও শোণিতপাত হইয়া থাকে । প্রায় সকল দেশের বিপ্লবেই এই ভয়াবহ মারাত্মকভাবের নিদর্শন লক্ষিত হয় । দিল্লীর বিপ্লবে ইহা বিশিষ্টরূপে লক্ষিত হইয়াছিল । যাহারা কোনরূপে শান্তির ব্যাঘাত জন্মায় নাই, ইংরেজসৈনিকের সঙ্গীনে তাহাদের হৃদয় বিদ্ধ, তরবারিতে দেহ বিচ্ছিন্ন বা বন্দুকের গুলিতে মস্তিষ্ক বিদীর্ণ হইয়া গিয়াছিল । দিল্লীর প্রাচীরের

মধ্যে যাহারা বাস করিতেছিল, তাহারা সকলেই এখন ইংরেজপক্ষের ইউ-রোপীয় ও এতদেশীয় সৈনিকদিগের নিকটে শত্রু স্তরাং বধ্য বলিয়া পরিগণিত হইয়াছিল।\* শান্ত, অশান্ত, উদ্ধত ও অমুদ্ধত, অপরাধী ও নিরপরাধ, সকলকেই সমভাবে এই মহাপাপের ফলভোগ করিতে হইয়াছিল। দিল্লীর অধিকারের পর প্রথম কয়েক দিন এইরূপে নিরীহ, নির্দোষ লোক বন্দুকের গুলিতে বা অগ্নিরূপে মৃত্যুমুখে পাতিত হয়। সাহস ও রণকৌশলে প্রসিদ্ধ ইংরেজ বীর পুরুষগণের মধ্যে অনেকে এই নিন্দনীয় কৰ্ম্মের ভার স্বয়ং গ্রহণ না করিলেও, উহার অনুমোদন করিতে সঙ্কুচিত হইয়াছেন নাই।† যুদ্ধে যাহারা বিকলাঙ্গ এবং রোগে যাহারা একান্ত অবসন্ন হইয়া পড়িয়াছিল, তাহাদের প্রতিও এ সময়ে দয়া প্রদর্শিত হয় নাই। বিপক্ষগণ প্রায় এক শত আহত ও রুগ্ন সিপাহীকে আপনাদের শিবিরে ফেলিয়া গিয়াছিল। কাপ্তেন হডসনের সৈনিকেরা এই নিঃসহায় জীবদিগের সকলকেই বধ করে। কতকগুলি আহত সিপাহী মোগলের প্রসিদ্ধ দরবারগৃহের বারেন্দায় গুইয়াছিল। ইংরেজের সঙ্গীনের আঘাতে ইহাদেরও প্রাণবায়ু বহির্গত হয়। একজন ইংরেজ ইঞ্জিনিয়ার এই সময়ে লিখিয়াছিলেন—“তরবারির আঘাতে একজন সিপাহীর দুই হাত কাটা গিয়াছিল, শরীরে বন্দুকের গুলি প্রবিষ্ট হইয়াছিল। পেটের দুই স্থানে সঙ্গীনের আঘাত লাগিয়াছিল। এই ব্যক্তি তখনও জীবিত ছিল। একজন ইংরেজ-সৈনিক বন্দুকের গুলিতে এইরূপ দুর্দশাগ্রস্ত এবং এইরূপ নিঃসহায় ও নিরবলম্ব লোকেরও মস্তিষ্ক বাহির করিয়া দেয়। ইহা দেখিয়া আমার যে কিরূপ ঘৃণা ও লজ্জার উদ্বেক হইয়াছিল, তাহা বনিবার নয়।”‡ কিন্তু সৈনিকেরা এতদেশীয় মহিলাদিগের প্রতি কোনরূপ অত্যাচার করে নাই। বালকবালিকারাও ইহাদের অজ্ঞাঘাতের বিষয়ীভূত হয় নাই। অজ্ঞাতসারে কোন কোন নারীর উপর গুলি নিক্ষিপ্ত হইতে পারে, কিন্তু জ্ঞাতসারে কোন রূপ অত্যাচার ঘটে নাই। পক্ষান্তরে উত্তেজিত মুসলমানেরা মসজিদ প্রভৃতি নিভৃত স্থলে লুকায়িতভাবে থাকিয়া, ইংরেজসৈন্তের উপর গুলি চালাইয়াছিল।

\* *Lord Roberts, Forty-one years in India. Vol. I. p. 245.*

† *Kaye, Sepoy War. Vol. III. p. 636.*

‡ *Martin, Indian Empire. Vol. II. p. 445.*

ইহাদের নিক্ষিপ্ত গুলিতে কতিপয় ইংরেজ ও এদেশীয় সৈনিকের প্রাণান্ত হয়। ইহাদের আত্মগোপনের স্থল বিধ্বস্ত এবং ইহারা ধৃত ও নিহত হয়। এই ঘটনায় দিল্লীর লোকে একরূপ শঙ্কিত হয় যে, অতঃপর কেহ ইংরেজপক্ষের কোন ব্যক্তির প্রাণনাশের চেষ্টা করে নাই।

দিল্লীর প্রাসাদ অধিকৃত হইয়াছিল বটে, কিন্তু তখন বৃদ্ধ বাহাদুর শাহ ইংরেজের হস্তে পতিত হইয়াছেন নাই। ১৪ই সেপ্টেম্বর তাঁহার রাজধানী আক্রান্ত হয়। ১৯শে সেপ্টেম্বর রাত্রিতে ইংরেজ যখন চাঁদনীর চক প্রভৃতি অধিকার করেন, তখন সেনাপতি বখত খাঁ আর কোন উপায় না দেখিয়া, পলায়নে কৃত-সম্মত হইলেন। তিনি প্রাসাদে গিয়া, বৃদ্ধ বাহাদুর শাহকে কহেন যে, যদিও তাঁহার রাজধানী বিপক্ষের হস্তে পতিত হইয়াছে, তথাপি এখনও অনেক স্থানে তাঁহার অভীষ্টসিদ্ধির পথ সুগম রহিয়াছে। তাঁহার নামে এবং তাঁহার উপস্থিতিতে অনেকে উৎসাহযুক্ত হইয়া বিপক্ষদিগের সহিত যুদ্ধ করিতে প্রস্তুত হইবে। সিপাহীযুদ্ধের ইতিহাস-লেখক কর্নেল মালিসন এ সম্বন্ধে এই ভাবে লিখিয়াছেন যে, যদি বাহাদুর শাহ আপনার পূর্বপুরুষ বাবর বা হুমায়ুন অথবা আকবরের গুণ দৃঢ়তাসম্পন্ন ও উদ্যমশীল হইতেন, তাহা হইলে বখত খাঁর অনুরোধ ব্যর্থ হইত না। কিন্তু বাহাদুর শাহের কিছুমাত্র তেজস্বিতা বা দৃঢ়তা ছিল না। বার্ককে তিনি একান্ত অবসন্ন হইয়া পড়িয়াছিলেন। যুদ্ধের সময়ে তিনি সম্ভবতঃ অপরের হস্তে ক্রীড়াপুত্তলস্বরূপ রহিয়াছিলেন। অবরোধের সময়ে সিপাহীদিগের অধিনায়কেরা তাঁহার উপর কর্তৃত্ব করিত। তাহাদের পরাজয়ের সঙ্গে এই কর্তৃত্বও বিলুপ্ত হয়।\*

ইংরেজ ঐতিহাসিক এই ভাবে বৃদ্ধ বাহাদুর শাহের দুর্বলতার উল্লেখ করিয়াছেন। বখত খাঁ বিফলমনোরথ হইলেন। তিনি পরদিন দেখা করিবেন বলিয়া, বাহাদুর শাহের নিকটে বিদায় লইলেন। এই সময়ে অত্র এক প্রধান ব্যক্তি কৰ্মক্ষেত্রে অবতীর্ণ হইলেন। ইনি বখত খাঁর পথে না গিয়া, বৃদ্ধ বাহাদুরকে আপনার দিকে রাখিতে উদ্যত হইলেন।

মীর্জা এলাহি বক্স বাহাদুর শাহের আত্মীয় ছিলেন। ভূপতির জ্যেষ্ঠ পুত্র

\* Malleon, Indian Mutiny. Vol. II., p. 72.

দারা বখ্তের সহিত ইঁহার কন্যার বিবাহ হইয়াছিল। বখ্ত খাঁ চলিয়া গেলে এলাহি বক্স বৃদ্ধ ভূপতিকে আপনার বাড়ীতে আনিলেন। এই স্থানে তিনি ভূপতিকে বুঝাইলেন যে, উত্তেজিত সিপাহীদিগের সঙ্গে তাঁহার যাওয়া উচিত নহে, গেলে তাঁহার পরাজয় এবং অনিষ্ট ঘটবে। দুর্দশাগ্রস্ত বৃদ্ধ তাঁহার কথা শুনিলেন। অতঃপর তিনি এলাহি বক্সের বাড়ী হইতে জীমৎ মহল ও তাঁহার পঞ্চদশবর্ষবয়স্ক পুত্রের সহিত হুমায়ূনের সমাধিভবনে উপনীত হইলেন। যিনি রাজ্য হইতে তাড়িত হইয়া দুঃখ ও দুর্গতির একশেষ ভোগ করিয়াছিলেন এবং যাহারা রাজপদে প্রতিষ্ঠিত হইয়া, মন্ত্রীদিগের ষড়যন্ত্রে রাজভোগের সুখ হইতে চিরদিনের জন্য বিচ্ছিন্ন হইয়াছিলেন, তাঁহাদের দেহ এই স্থানের মৃত্তিকাগর্ভে শায়িত রহিয়াছিল। হুমায়ূন ব্যতীত গাজিউদ্দীনকর্তৃক নিহত দ্বিতীয় আলমগীর এই স্থানে রহিয়াছিলেন। এখন এই স্থানে সর্বশেষ মোগল ভূপতিরও ষাবতীর আশার অবসান হইল।

পূর্বে রজীব আলির কথা বলা হইয়াছে। এই ব্যক্তি হুডসন সাহেবেব দক্ষিণ হস্ত স্বরূপ ছিল। দিল্লীর কোথায় কি হইতেছে, বিশ্বস্ত রজীব আলি তাহার সংবাদ লইয়া, হুডসন সাহেবকে জানাইত। এ সময়ে দিল্লীর অনেক সম্ভ্রান্ত ব্যক্তি ইংরেজদিগের পক্ষে ছিলেন। মুন্সী জীবনলাল এই দুঃসময়ে ইংরেজের যথোচিত উপকার করিয়াছিলেন।\* বাহা হউক বৃদ্ধ ভূপতি হুমায়ূনের সমাধিক্ষেত্রে অবস্থিতি করিতেছেন শুনিয়া, রজীব আলি মীর্জা এলাহি বক্সকে কহিল যে, তিনি যেন ২৪ ঘণ্টাকাল ভূপতিকে ঐ স্থানে রাখেন। এলাহি বক্স দেখিয়াছিলেন যে, ইংরেজের পরাক্রম অনিবার্য। তাঁহাদের জয়লাভ হইয়াছে। এ সময়ে ভূপতিকে ইংরেজের হস্তে সমর্পণ করিতে পারিলে, তিনি বিজয়ী ইংরেজের সন্তোষসাধনে সমর্থ হইবেন। সুতরাং রজীব আলির সহিত তাঁহার সহজেই সন্ধিলন ঘটিল। তিনি রজীব আলির কথায় সন্মত হইলেন। এ দিকে রজীব আলি কাপ্তেন হুডসনকে এই সংবাদ দিল। হুডসন সাহেব অবিলম্বে ভূপতিকে ধরিবার জন্য সেনাপতি উইলসনের অনুমতি চাহিলেন। সেনাপতি এই বলিয়া অনুমতি দিলেন যে, ভূপতির প্রতি যেন কোনরূপ অসৎ ব্যবহার

\* *A short account of the Life of Rai Jeewanlal Bahadur. By his son.*

এবং তাঁহার জীবনের যেন কোনরূপে হানি না করা হয় । কাপ্তেন হড্‌সন্ তাঁহার ৫০ জন মাত্র সৈনিক লইয়া, রজীব আলির সহিত অখারোহণে ছমাযুনের সমাধিক্ষেত্রের অভিমুখে ধাবিত হইলেন ।

নির্দিষ্ট স্থলের নিকটে উপনীত হইয়া, কাপ্তেন হড্‌সন্ আপনার সৈনিকদিগকে যথাস্থানে সন্নিবেশিত করিলেন । অতঃপর রজীব আলি এবং তাহার একজন সহচর জীন্নৎ মহলের নিকটে গমন করিল । দুই ঘণ্টাকাল অতিবাহিত হইল । কাপ্তেন হড্‌সন্ দুই ঘণ্টাকাল উদ্বিগ্নভাবে চরের আগমন-প্রতীক্ষা করিতে লাগিলেন । অবশেষে তাঁহার উদ্বিগ্ন হইল । জীন্নৎ মহল দেখিয়াছিলেন যে, যদি তাঁহাদের জীবনরক্ষা হয়, তাহা হইলে এ সময়ে আত্মসমর্পণ করাই শ্রেয়ঃ । তিনি এ বিষয়ে ভূপতিকে সন্মত করাইয়াছিলেন । সুতরাং রজীব আলির অভীষ্ট সিদ্ধ হইল । রজীব আলি আসিয়া সংবাদ দিল, হড্‌সন্ যদি নিজমুখে বলেন যে, গবর্ণমেন্ট ভূপতিকে কোনরূপে বিপদগ্রস্ত করিবেন না, তাহা হইলে তিনি আত্মসমর্পণ করিবেন । কাপ্তেন হড্‌সন্ সন্মত হইলেন ।

অবিলম্বে বস্ত্রাচ্ছাদিত যানে জীন্নৎ মহল বহির্গত হইলেন । তরুণবয়স্ক জোয়ান্ বখ্ত তাঁহার অনুগমন করিলেন । তাহার পর বৃদ্ধ ভূপতির পাকী ধীরে ধীরে আসিতে লাগিল । কাপ্তেন হড্‌সন্ নিকোষিত তরবারি হস্তে লইয়া, ইঁহাদের প্রতীক্ষায় সমাধিভবনের দ্বারদেশে উপস্থিত ছিলেন । তৈমুরের বংশধর এখন ভীতচিত্তে, কাতরভাবে তাঁহার নিকটে সমাগত হইলেন । এই দৃশ্য মানবের প্রধান শিক্ষার বিষয় । যাহারা মোগলের ক্ষমতা, মোগলের আধিপত্য, মোগলের সমৃদ্ধি, মোগলের সুখসৌভাগ্যের বিষয় ভাবিয়া দেখিয়াছেন, তাঁহারা এই দৃশ্যে নখর মানবের অদৃষ্টচক্রের অভাবনীয় আবর্তন দেখিয়া বিস্মিত হইবেন । লোকে যাহার নামে সর্ববিষয়ে উৎসাহিত হইত, যাহার প্রতি শ্রদ্ধাশ্রদ্ধা প্রদর্শনে ব্যগ্র হইয়া উঠিত, যাহার গৌরবে আপনাদিগকে গৌরববৃদ্ধ বোধ করিত, বার্ককো, ঘটনাবলীর অভিঘাতে, সর্বোপরি অনিবার্য নিয়তির অপরিবর্তনীয় বিধানে যিনি পূর্বতন ক্ষমতা হইতে পরিলুপ্ত হইয়াছিলেন । যিনি অপরের ক্ষমতা ও উৎসাহের অদ্বিতীয় অবলম্বনস্বরূপ ছিলেন, তিনি এখন শ্রীতিমগ্নী প্রণয়িনী, পরমহাস্যপূর্ণ পুত্র এবং আপনার জীবনভিক্ষার

জগত সাতিশয় দীনভাবে একটি অধস্তন ইংরেজ সৈনিক পুরুষের নিকটে সমাগত হইলেন । যাহার উদ্দেশে এক সময়ে “দিল্লীখরো বা জগদীখরো বা” ধ্বনিতে চারি দিক পরিপূর্ণ হইত, সেই মহাপরাক্রান্ত, সৰ্বজনমাগ্ন সন্ন্যাসীর বংশধর এখন এইরূপ শোচনীয় অবস্থায় পাতিত হইলেন । লোকে ইংরেজের অসীম শক্তিতে স্তম্ভিত হইল । বৃদ্ধ ভূপতির বহুসংখ্যক অনুচর কোনরূপে বাধা না দিয়া, সেই মহাশক্তির নিকটে ভীতিবিহ্বলচিত্তে মস্তক অবনত করিল ।

কাপ্তেন হড্‌সন্, বাহাদুর শাহকে অস্ত্র পরিত্যাগ করিতে কহিলেন । ভূপতি জিজ্ঞাসা করিলেন যে, তিনি হড্‌সন্, বাহাদুর কি না ? এই প্রশ্নের যথাযোগ্য উত্তর প্রদত্ত হইল । অতঃপর ভূপতি তাঁহার এবং তদীয় স্ত্রী ও পুত্রের জীবন-রক্ষা সম্বন্ধে যে প্রতিশ্রুতি করা হইয়াছিল, হড্‌সন্ সাহেবকে তাহা নিজমুখে বলিতে অনুরোধ করিলেন । অনুরোধ রক্ষিত হইল । এই সময়ে হড্‌সন্ সাহেব দৃঢ়তার সহিত কহিলেন যে, ভূপতি যদি পলায়নের চেষ্টা করেন, তাহা হইলে তিনি তাঁহাকে কুকুরের মত মারিয়া ফেলিবেন ।\* ভূপতি অতঃপর কাপ্তেন হড্‌সনের হস্তে দুইখানি তরবারি সমর্পণ করিলেন । কাপ্তেন হড্‌সন উহা আপনার আরদালির হস্তে দিলেন । অনন্তর বাহাদুর শাহ, জীমৎমহল এবং জোয়ান-বখতকে নগরে আনা হইল । ইহাদের পাক্কীর পার্শ্বে বহুসংখ্যক অনুচর ছিল । ইহারা ক্রমে সরিয়া গেল । দিল্লীর প্রসিদ্ধ চাঁদনী চক দিয়া যখন পাক্কী যাইতে লাগিল, তখন লোকে বিস্ময়বিমূঢ় হইয়া নিরীকভাবে উহার প্রতি দৃষ্টিযোজনা করিয়া রহিল । ভূপতি স্ত্রীপুত্রের সহিত নগরে সমানীত এবং প্রধান সিবিল কর্মচারী সগুর্স সাহেবের হস্তে সমর্পিত হইলেন ।

কাপ্তেন হড্‌সন্ যদি ধীরভাবে ও সৌজন্তসহকারে ভূপতিকে বন্দী করিতেন এবং তাঁহার কার্য যদি ঐ খানেই পরিসমাপ্ত হইত, তাহা হইলে তিনি ইতিহাসে সম্মান লাভ করিতে পারিতেন । কিন্তু তিনি কর্তব্যসম্পাদনে ধীরতা বা সৌজন্তের পরিচয় দিতে পারেন নাই । ইংরেজ ঐতিহাসিক এ সম্বন্ধে এই ভাবে লিখিয়াছেন—“বাহাদুর শাহকে কুকুরের মত গুলি করিয়া মারিতে বা কসাইখানার ঘাঁড়ের মত নিপাতিত করিতে আদেশ দিতে এই

\* *Hodson, Twelve Years in India, p. 506.*



সাহসী সৈনিকের হৃদয় উৎফুল্ল হইতে পারে। কিন্তু তাঁহাকে তদীয় প্রকৃতির অনুরূপ কর্ম সম্পাদন করিতে দেওয়া হয় নাই। তাঁহার বন্দী শোচনীয়-দশাগ্রস্ত এবং অক্ষম, বৃদ্ধ পুরুষ। ইনি কুপরামর্শে পরিচালিত ও ঘটনাস্রোতে ভাসমান হইয়াছিলেন। ঐ স্রোত সংযতভাবে রাখিতে ইঁহার কোন ক্ষমতা ছিল না। তাঁহার নামে অনিষ্টকর কর্ম অঙ্কিত হইয়াছিল। এইরূপ ক্ষীণ-প্রাণ জীবের প্রতি পাশবিক অত্যাচার করা, নারীহত্যা অপেক্ষা অধিকতর পুরুষোচিত কর্ম নয়।\* অত্র একজন ঐতিহাসিকও কাপ্তেন হড্‌সনের এইরূপ ব্যবহারের নিন্দা করিয়াছেন। কাপ্তেন হড্‌সন ভূপতির প্রতি অসম্মান-প্রদর্শনে প্রতিষেক হইয়াছিলেন। কিন্তু তিনি এইরূপ প্রতিষেধের প্রতি মনোযোগী হইবেন নাই। † হড্‌সন সাহেব নিজেই স্বীকার করিয়াছেন যে, ভূপতি বৃদ্ধ এবং অক্ষম। তাঁহার নামে তদীয় পুত্রেরা অসভ্যজনোচিত অত্যাচার করিয়াছিল। তথাপি কাপ্তেন হড্‌সন এই বৃদ্ধ এবং অক্ষম ব্যক্তিকে জীবিত বা মৃত অবস্থায় আনিতে চাহিয়াছিলেন। ‡ তিনি বাহাদুর শাহের নিকটে যে তরবারি পাইয়া-ছিলেন, তাহার একখানি পরাক্রান্ত নাদির সাহের ছিল। আর একখানি সম্রাট জাহাঙ্গীর ব্যবহার করিতেন। কাপ্তেন হড্‌সন দ্বিতীয় খানি ক্রীশ্রীমতী মহারানীকে উপহার দিবার জন্ত রাখিলেন। §

কিন্তু কাপ্তেন হড্‌সনের মৃগয়াসুরাগ ইহাতেই অন্তর্হিত হইল না। এখনও বৃদ্ধ ভূপতির পুত্রগণ অথবা নিকট আত্মীয়গণ লুক্কায়িতভাবে ছিলেন। হড্‌সন সাহেব, বিশ্বস্ত চর—একচক্ষু রজীব আলির নিকটে ইঁহাদের সংবাদ পাইলেন। এ দিকে এলাহি বক্স ইঁহাদিগকে বন্দী করিবার আয়োজন করিলেন। এই উভয় ব্যক্তি দিল্লীর সম্রাটপরিবারের অন্তর্ভুক্ত এবং দিল্লীর সম্রাটের সহিত আত্মীয়তাসূত্রে আবদ্ধ ছিল। এখন এই দুই জনই তাহাদের আত্মীয়-দিগের অধোগতির পথ উন্মুক্ত করিয়া দিল। ¶ তিন জন শাহবাদা—মীর্জা খাজের সুলতান, মীর্জা মোগল, এবং মীর্জা আবুবখর, বৃদ্ধ মোগল ভূপতির

\* *Kaye, Sepoy War. Vol. III. p. 647-648.*

† *Martin, Indian Empire, Vol. II. p. 447.*

‡ *Twelve Years in India, p. 300.*

§ *Ibid, p. 307-308.*

¶ *Kaye, Sepoy War. Vol. III. 649, note.*

অবরোধের স্থল—সমাধিভবনে অবস্থিতি করিতেছিলেন, কাপ্তেন হড্‌সন্ ইঁহা-  
দিগকে ধরিবার জন্ত সেনাপতি উইল্‌সনের অনুমতি প্রার্থনা করিলেন। সেনাপতি,  
কাপ্তেন হড্‌সনের প্রকৃতি জানিতেন। সুতরাং তিনি অনুমতি দিতে দোলায়-  
মানচিত্র হইলেন, শেষে সেনানায়ক নিকল্‌সনের আগ্রহে অনেক কষ্টে  
নিতান্ত অনিচ্ছার সহিত অনুমতি দিলেন। কাপ্তেন হড্‌সন্ একশত সৈনিক  
পুরুষ এবং তাঁহার সহযোগীর সহিত পুনর্বার হুমায়ূনের সমাধিভবনের অভিমুখে  
ধাবিত হইলেন। রজীব আলি ও এলাহি বক্স অশ্বরোহণে উক্ত স্থলে গমন  
করিল। শাহজাদাদিগের মুক্তির কোন উপায় রহিল না। ইঁহাদের অনেক  
গুলি সশস্ত্র অশুচর ঐ স্থানে অবস্থিতি করিতেছিল। সর্কাপেক্ষা সাহসিক শাহজাদা  
আশ্বরক্ষার জন্ত যুদ্ধ করিতে চাহিলেন। কিন্তু এই প্রস্তাব অপর দুই জনের  
মনঃপূত হইল না। বৃদ্ধ পিতার দৃষ্টান্ত ইঁহাদিগকে জীবনরক্ষার জন্ত কাপ্তেন  
হড্‌সনের নিকটে করুণাভিক্ষায় প্রবর্তিত করিল। দুই ঘণ্টাকাল ইঁহারা  
বিজ্ঞতার নিকটে কাতরভাবে এইরূপ প্রার্থনা করিলেন, কিন্তু কাপ্তেন হড্‌সন্  
কিছুতেই এই প্রার্থনাপূরণে সন্মত হইলেন না। অবশেষে তিন জন শাহজাদা  
বিজ্ঞতার মহানুভাবতার উপর নির্ভর করিয়া, আত্মসমর্পণে প্রস্তুত হইলেন।

রথের মত গোবাহিত বস্ত্রাচ্ছাদিত যানে তিনটি রাজকুমার আপনাদের  
অবস্থিতিস্থল হইতে বহির্গত হইলেন। তাঁহারা কাপ্তেন হড্‌সনের নিকটে  
আগমনপূর্বক বাহিরে কোনরূপ ভয়ের চিহ্ন না দেখাইয়া, কাপ্তেনকে গম্ভীর-  
ভাবে সেলাম করিয়া কহিলেন যে, অবশ্য আদালতে তাঁহাদের বিষয়ে রীতিমত  
বিচার হইবে। কাপ্তেন হড্‌সন্ প্রত্যভিবাদন করিলেন, কিন্তু কোন উত্তর  
দিলেন না। তাঁহার বিশ্বাস জন্মিয়াছিল যে, রাজকুমারগণ তাঁহাদের অসহায়  
বালকবালিকা এবং কুলনারীর শোণিত পাত করিয়াছেন। সুতরাং তিনি  
তাঁহাদের শোণিতপাতে কৃতসঙ্কল্প হইয়াছিলেন। বলবতী প্রতিহিংসার আবেগে  
তাঁহার কোমল মনোবৃত্তি এ সময়ে নিতান্ত অকার্য্যকর হইয়া পড়িয়াছিল।  
তিনি সর্বপ্রথম অনুগমনকারী, সশস্ত্র লোকদিগের অন্তর্গত হইলেন।  
এ সময়ে ইংরেজের ক্ষমতা দর্শনে লোকের সাহস অস্তর্হিত হইয়াছিল। লোকে  
সম্রাটের প্রাসাদে ইংরেজের জয়পতাকা উড্ডীন দেখিয়াছিল, সুতরাং ইংরেজের  
বিক্রমচরণ করা অসংসাহসিক কর্ম বলিয়া মনে করিয়াছিল। হড্‌সন্ সাহেব

অনুচরদিগকে অস্ত্র পরিত্যাগ করিতে আদেশ দিলেন । আদেশ প্রতিপালিত হইল । কাপ্তেনের সৈনিকেরা ইহাদের পরিত্যক্ত অস্ত্র, ঘোটক ও যানাদি প্রাপ্তনের মধ্যস্থলে একত্র করিল ।

অবশেষে কাপ্তেন হড্‌সন্ চালকদিগকে নগরের অভিমুখে রথ চালাইতে আদেশ দিলেন । তাঁহার সৈনিকগণ যানের পার্শ্বে যাইতে লাগিল । বহুসংখ্যক লোক নিৰ্ঝাঁকুভাবে ইহাদের অনুগমন করিল । রথ নগরের সমীপবর্তী হইল । কাপ্তেন হড্‌সন্ আপনার সৈনিকদিগকে সম্বোধন পূৰ্ব্বক পার্শ্ববর্তী লোক শুনিতে পায়, এই ভাবে চীৎকার করিয়া কহিলেন, এই শাহজাদারা নরঘাতক । ইহারা আমাদের কুলমহিলা ও বালকবালিকাদিগকে বধ করিয়াছে । গবর্ণমেন্টের ইচ্ছানুসারে এখন ইহাদিগকে শাস্তিভোগ করিতে হইবে । ইহা কহিয়া, তিনি শাহজাদাদিগকে রথ হইতে নামিয়া, নিম্নভাগের গাত্রচ্ছদ খুলিতে আদেশ দিলেন । শাহজাদারা কম্পিতহৃদয়ে আদেশ পালন করিলেন । অবশেষে তাঁহাদিগকে পুনর্বার রথে চড়িতে আদেশ দেওয়া হইল । অনন্তর কাপ্তেন হড্‌সন্ আপনার উদ্দেশ্যসাধনে উদ্বৃত্ত হইলেন । তাঁহার সওয়ারগণ তদীয় আদেশ পালন না করিতে পারে, ইহা ভাবিয়াই হউক, অথবা তিনি স্বয়ং আততায়ী বধ করিয়া, প্রতিহিংসার তৃপ্তিতে আমোদিত হইবেন, এই ইচ্ছাতেই হউক, কাপ্তেন হড্‌সন্ এক জন সওয়ারের হস্ত হইতে পিস্তল লইলেন এবং আপনার নিরস্ত্র বন্দীদিগকে নিজ হস্তে গুলি করিয়া বধ করিলেন । অতঃপর তিনি আপনার শিকার লইয়া দৃষ্টচিত্তে নগরে প্রবিষ্ট হইলেন । সাধারণে দেখিতে পায়, এই জঘ্ন কোতয়ালির সম্মুখে নিহত রাজকুমারদিগের দেহ রাখা হইল । প্রায় দুই শত বৎসর পূৰ্বে সম্রাট আওরঙ্গজেবের আদেশে শিখগুরু তেগ বাহাদুরের বিচ্ছিন্ন দেহ যে স্থানে স্থাপিত হইয়াছিল, শাহজাদাদিগের শবও সেই স্থানে সাধারণের দৃষ্টপথবর্তী হইল । ইহাতে জিঘাংসু শিখগণ যেরূপ সন্তুষ্ট হইল, কাপ্তেন হড্‌সনের স্তায় হিংসালীল ইংরেজও সেইরূপ সন্তোষ লাভ করিলেন । শব কয়েক দিন কোতয়ালিতে রহিল, অবশেষে উহা গলিত ও পুতি-গন্ধময় হইলে স্বাস্থ্যের অনুরোধে স্থানান্তরিত ও সমাহিত হইল ।

কাপ্তেন হড্‌সন্ নিঃসন্দেহ প্রতিহিংসার আবেগে এই কৰ্ম্ম করিয়াছিলেন, আত্মপক্ষের নিধনে যাহারা একান্ত সন্তোষিত হয়, তাঁহারা যদি আততায়ীর

গুরুতর অপরাধের প্রতিশোধের জন্য একান্ত অর্ধৈর্ষ্য হইয়া পড়ে, তাহা হইলে তাহাদের নিকটে প্রায়ই কোমল মানসিকবৃত্তির সম্মান থাকে না। কাপ্তেন হড্‌সনের নিকটেও দয়া, মহানুভাবতা প্রভৃতির এইরূপ সম্মানহানি ঘটিয়াছিল। কাপ্তেন হড্‌সন্ সাহসী বীর পুরুষ। শাহজাদাদিগের এক জনের প্রস্তাব যদি কার্য্যে পরিণত হইত, কাপ্তেন হড্‌সন্ যদি সম্মুখসমরে অরাতি নিপাত করিতেন, তাহা হইলে তাঁহার বিরুদ্ধে কোন কথা বলিবার ছিল না। সর্বপ্রথম তিনি যে কার্য্য করিয়াছিলেন, তাহাতে তদীয় বীরত্বের নিদর্শন পরিলক্ষিত হইয়াছিল। তিনি রাজকুমারদিগকে অবরুদ্ধ করিয়াছিলেন। তিনি তাঁহাদের সশস্ত্র অমুচর-গণের নিরস্ত্রীকরণে সমর্থ হইয়াছিলেন। তিনি ঐ সকল অমুচরকে রাজকুমার-দিগের যান হইতে দূরে রাখিয়াছিলেন। ইহার পর তিনি যদি অবরুদ্ধদিগকে বৃদ্ধ ভূপতির গ্ৰায় রাজপুরুষের হস্তে সমর্পণ করিতেন, তাহা হইলে তদীয় অসামান্যসাহসসহকৃত বীরত্ব গৌরবান্বিত হইত। কিন্তু তিনি সাতিশয় নির্দয়-ভাবে আপনার নিরস্ত্র, নিঃসহায় ও একান্ত নিরবলম্ব বন্দীদিগের প্রাণসংহার করিয়াছিলেন। ইহাতে তাঁহার বীরত্বগৌরব রক্ষিত হয় নাই। তাঁহার কর্ম্মে কোন কোন রাজপুরুষ সে সময়ে উত্তেজনাপ্রযুক্ত সন্তোষ প্রকাশ করিয়াছিলেন বটে,\* কিন্তু তিনি স্বদেশের সকলের নিকটে প্রশংসা লাভ করিতে পারেন নাই। উত্তেজনার সময়ে ষাঁহারা এ জন্য আফ্লাদ প্রকাশ করিয়াছিলেন, ধীরতার সময়ে তাঁহারাও ছঃখিত হইয়াছিলেন। কর্ণেল মালিসন্ সাহেব এ সম্বন্ধে এই ভাবে লিখিয়াছেন,—“ইহা অপেক্ষা অধিকতর পাশবিক এবং অধিকতর অনা-বশ্যক অত্যাচার আর হইতে পারে না। ইহা যেরূপ গুরুতর ভ্রম, সেইরূপ গুরুতর পাপের মধ্যে পরিগণিত। আমাদের শিবিরে এইরূপ জনরব উঠিয়াছিল যে, এই সকল রাজকুমার মে মাসে আমাদের স্বদেশীয় নরনারীদিগের হত্যা-কাণ্ডে লিপ্ত ছিলেন, কিন্তু এই অপরাধ প্রতিপন্ন করিবার জন্য কোনরূপ প্রমাণ প্রদর্শিত হয় নাই। বিচারালয়ে এই সকল বিষয় প্রকাশিত হইবার সম্পূর্ণ

\* পঞ্জাবের প্রধান বিচারক (পরে অযোধ্যার প্রধান কমিশনার) রবার্ট মন্টো-গোমারি সাতিশয় সন্তোষ প্রকাশ করিয়া, কাপ্তেন হড্‌সনের নিকটে পত্র লিখিয়াছিলেন।—*Twelve years in India, p. 316, note., Comp. Martin, Indian Empire. Vol. II. p. 440.*

সম্ভাবনা ছিল। যদি প্রমাণের বলে কুমারেরা অপরাধী হইতেন, তাহা হইলে, তাঁহাদের যথোপযুক্ত শাস্তি হইয়াছে বলিয়া, ইংলণ্ডের লোকে সম্ভাব্য প্রকাশ করিত। কুমারেরা আত্মসমর্পণ করিয়াছিলেন, অনুচরদের মধ্যে কেহই তাঁহাদিগকে বিমুক্ত করিতে চেষ্টা করে নাই, যখন হড্‌সন্ সাহেব তাঁহার বধা জীবদিগকে গাড়ি হইতে নামিয়া গায়ের কাপড় খুলিতে বলেন, তখন কেহই কোনরূপ উত্তেজনার চিহ্ন দেখায় নাই। তাঁহার সাহস ও দৃঢ়তা অপেক্ষাকৃত অল্প, তিনি চারি দিকে বহুসংখ্যক লোক দেখিয়া, হয় ত নৈরাশ্রে অধীর হইয়া, বন্দীদিগের প্রাণ সংহার করিতেন। কিন্তু কাপ্তেন হড্‌সনের প্রত্যেক ধমনী যেন লৌহময় ছিল। তাঁহার বুদ্ধিবৈকল্যও ঘটে নাই। দিল্লীর ভূপতিকে বধ করিবার আদেশ না পাওয়াতে হড্‌সন্ হুঃখিত হইয়াছিলেন। তাঁহার পাশবিক প্রবৃত্তিকে পরিতৃপ্ত করা আবশ্যক হইয়াছিল। তিনি এইরূপ ভীকরনোচিত নরহত্যার উহার ভূমিসাধন করিয়াছিলেন।

“নিতান্ত হুঃখের বিষয় যে, হড্‌সন্ তাঁহার প্রবৃত্তির উত্তেজনার দশীভূত হইয়া, এই কাজ করিয়াছিলেন। জ্বারের সম্বন্ধে ইহা হুঃখজনক, যেহেতু এইরূপ নরহত্যা নিতান্ত হীন এবং নিতান্ত অনাবশ্যক কর্ম। সাধারণের সম্বন্ধে ইহা হুঃখের বিষয়, যেহেতু প্রকাশভাবে রাজকুমারদিগের বিচার হইলে উপস্থিত ঘটনাপ্রসঙ্গে অনেক রহস্য সাধারণের গোচর হইবার সম্ভাবনা ছিল। হড্‌সনের স্মনামের বিষয়ে ইহা শোচনীয়, যেহেতু লোকের শোণিত উষ্ণ থাকিলে যদিও এইরূপ কার্যে তাঁহাদের দৃকপাত হয় না বটে, কিন্তু শেষে যখন তাঁহারা প্রকৃতিস্থ হইবেন, তখন হড্‌সন্ তাঁহাদের নিকটে চিরকালের জন্ত চিহ্নিত পুরুষ বলিয়া পরিচিত হইবেন। উপস্থিত বিজ্রোহের ইতিহাসে তাঁহার নামের সহিত যে সকল ঘটনার সংশ্রব আছে, এই ঘটনা অপেক্ষা তাহার কিছুই অধিকতর কষ্টের উদ্দীপক নহে।” \*

কে সাহেবও এই ভাবে আপনার অভিমত প্রকাশ করিয়াছেন। এই ঐতিহাসিক উল্লেখ করিয়াছেন—“তিনি ( কাপ্তেন হড্‌সন্ ) আফ্লাদে উৎফুল্ল হইয়া, ২৩শে সেপ্টেম্বর লিখিয়াছিলেন—‘আমি চব্বিশ বর্ষের মধ্যে তৈমুরের

\* Malleon, Indian Mutiny. Vol. II. p. 80-81

বংশের প্রধান ব্যক্তিদিগের সহক্বে কাজ শেষ করিয়া ফেলিয়াছি। আমি নিষ্ঠুর নহি। কিন্তু আমি স্বীকার করি যে, পৃথিবীকে এই সকল নরপিশাচগণ হইতে বিমুক্ত করিবার সুযোগ ঘটতে আমার আহ্লাদের সঞ্চার হইয়াছে।’ \* \* হড্‌সন্ সাহেব এই নরহত্যায় আমোদ লাভ করিয়াছিলেন, এবং ইহা মনে করিয়া গর্ষিত হইয়াছিলেন। ইহাতে তাঁহার কোনরূপ কষ্টবোধ হয় নাই। তিনি ইহার সমর্থন করাও আবশ্যিক বোধ করেন নাই। কিন্তু তাঁহা অপেক্ষা অধিকতর সাধুভাবসম্পন্ন কর্তৃপক্ষ রাজকুমারদিগের নিধন সহক্বে প্রশ্নের উত্থাপন করিতে পারেন, এজন্ত তিনি এই দুইটি যুক্তি দেখাইয়াছিলেন— প্রথমতঃ সেনাপতি তাঁহাকে বলিয়াছিলেন যে, বন্দীদিগের জন্ত তিনি বিরক্ত হইতে ইচ্ছা করেন না। দ্বিতীয়তঃ, যদি তিনি বন্দীদিগকে বধ না করিতেন, তাঁহাদের অনুরক্ত লোক তাঁহাকে বধ করিত। কিন্তু রাজকুমারদিগকে কিছুমাত্র বিচারবিতর্ক না করিয়াই, বধ করিতে হইবে, সেনাপতি উইল্‌সন্ এরূপ আভাস দেন নাই। তিনি সম্ভবতঃ এই ভাবে বলিয়াছিলেন যে, তাঁহা-দিগকে দেওয়ানিবিভাগের কর্তৃপক্ষের হস্তে সমর্পণ করিতে হইবে। দ্বিতীয় যুক্তি অপেক্ষাকৃত প্রবল। কিন্তু লোকে সে সময়ে নিতান্ত নির্জীব ও নিস্তেজ হইয়া পড়িয়াছিল। তাহারা হড্‌সনের আদেশে হুমায়ূনের সমাধিক্ষেত্রে অস্ত্রাদি পরিত্যাগ করিয়াছিল; ইহাতে তাহাদের দুর্বলতার পরিচয় পাওয়া যাইতেছে।

“\* \* প্রকৃত কথা এই যে, দিল্লী অধিকারের সময়ে যখন আমাদের লোকের শোণিত ক্রোধে ও ঘৃণায় উষ্ণ হইয়াছিল, এবং শত্রুপক্ষের অসংখ্য অত্যাচার মনে হওয়াতে যখন তাহাদের মুখে লজ্জা ও বিরাগের চিহ্ন প্রকাশ পাইয়াছিল, তখন আমাদের ভারতপ্রবাসী স্বদেশীয়দিগের মধ্যে যাহারা সর্বাপেক্ষা উৎকৃষ্টগুণসম্পন্ন ও জ্ঞানী, তাহারা প্রথমে উত্তেজনার আবেগে যাহার অনুমোদন করিয়াছিলেন, শেষে প্রশান্তভাবে সময়ে তাহারই জন্ত দুঃখিত হইয়াছিলেন। যদিও এক সময়ে কাপ্তেন হড্‌সনের বিশ্বাস জন্মিয়াছিল যে, সমগ্র জাতি ইহাতে আহ্লাদিত হইবে, তথাপি আমি নিঃসন্দেহভাবে বলিতে পারি যে, ইংলণ্ডের লোকে এজন্ত ঘৃণার সহিত সাতিশর দুঃখ প্রকাশ করিয়াছিল। কেহ ইহার অনুমোদন করিয়াছে, আমি

তাহা শুনি নাই; অধিক কি, কেহ ইহার সমর্থন করিয়াছে, তাহাও আমার শ্রুতিপ্রবিষ্ট হয় নাই।”\*

ঐতিহাসিক মার্টিন সাহেবও এই বিষয়ের অনুমোদন করেন নাই।† পূর্বে উক্ত হইয়াছে যে, লর্ড রবার্ট্‌স্ উপস্থিত সময়ে দিল্লীর সৈনিকদলে ছিলেন। তিনি লিখিয়াছেন,—“আমি অপরাপর লোকের সহিত দিল্লীর ভূপতিকে দেখিতে গিয়াছিলাম। তাঁহাকে বার পর নাই দুর্দশাগ্রস্ত বোধ হইয়াছিল।\*\* ফিরিয়া আসিবার সময়ে ভূপতির দুইটি পুত্র এবং একটি পোস্তের শব দেখিয়া চমকিত হইয়াছিলাম। উহা কোতয়ালির সম্মুখে পাথরের বেদীর উপর পড়িয়া রহিয়াছিল।” ইহার পর তিনি এই শাহজাদাদিগের নিধনের বিবরণ দিয়া, তজ্জন্ম দুঃখ প্রকাশ করিয়াছেন।‡

সে সময়ে ইংরেজদিগের অনেকে এরূপ উত্তেজিত হইয়া উঠিয়াছিলেন যে, একজন সংবাদপত্রে লিখিয়াছিলেন—“স্ত্রীলোক এবং বালক বালিকা-দিগের জীবনরক্ষা করিতে হুকুম দেওয়া সেনাপতির ভুল হইয়াছিল। ইহারা মনুষ্য নহে—দানব বা বশুজন্তু। ইহাদিগকে কুকুরের মত মারিয়া ফেলাই উচিত।” ২১শে সেপ্টেম্বর দিল্লীর যেরূপ অবস্থা ঘটিয়াছিল এই লেখক তাহার এইরূপ বর্ণনা করিয়াছিলেন—“সমুদয় বিদ্রোহী দিল্লী ছাড়িয়া গিয়াছিল। আমাদের সৈনিকগণ ব্যতীত অতি অল্প লোককেই নগরে দেখিতে পাওয়া যাইত। যখন আমাদের সৈন্য নগরে প্রবেশ করে, তখন যে সকল লোককে পাওয়া গিয়াছিল, তাহাদের সকলকেই সঙ্গীনে বধ করা হইয়াছিল। কোন কোন ঘরে ৪০৫০ জন লুকাইয়াছিল। ইহাতেই আপনি বুঝিতে পারেন যে, নিহত লোকের সংখ্যা কত অধিক। ইহারা বিদ্রোহী নহে, নগরের অধিবাসী। ইহাদের আশা ছিল যে, আমাদের সর্বপ্রকারকঠোরতাশূন্য শাসনে ইহাদিগকে ক্ষমা করা হইবে। আমি আহ্লাদের সহিত জানাইতেছি যে, ইহারা এ বিষয়ে হতাশ হইয়াছিল।§ বিজয়ী সৈনিকেরা দুই দিন পর্যন্ত দিল্লীতে এইরূপ

\* Kaye, Sepoy War. Vol. III., p. 652-654.

† Martin, Indian Empire. Vol. II., p. 448.

‡ Lord Roberts, Forty-one Years in India. Vol. I., p. 249-250.

§ Martin, Indian Empire. Vol. II., p. 449.

যথেষ্টাচারের পরিচয় দেয়। নরহত্যা ও সম্পত্তিবিলুপ্তন তাহাদের প্রধান কর্তব্যকর্মের মধ্যে পরিগণিত হয়।\* এই সময়ে বিলাতের বিখ্যাত টাইমস্-নামক সংবাদপত্রের বোম্বাইস্থিত সংবাদদাতা লিখিয়াছিলেন, “যে দিন নাদির শাহ চাঁদনী চকের ক্ষুদ্র মসজিদে থাকিয়া, অধিবাসীদিগকে নিহত হইতে দেখিয়াছিলেন, সেই দিনের পর হইতে শাহ জাহানের নগরে এইরূপ দৃশ্য লোকের দৃষ্টিপথবর্তী হয় নাই।” †

যাহারা সংসারজালে আবদ্ধ, যাহারা প্রবৃত্তির একান্ত বশীভূত, তাহারা যে,

\* বিলুপ্ত সম্পত্তির সংখ্যা অত্যন্ত অধিক ছিল। একজন ইংরেজ এ সময়ে ঘটনাস্থলে উপস্থিত ছিলেন। তিনি স্বয়ং দেখিয়া লিখিয়া গিয়াছেন, রাইফল নামক দলের একজন সৈনিক বিলুপ্ত সম্পত্তি এবং পারিতোষিকে দশ হাজার টাকারও অধিক লইয়া ইংলণ্ডে যাইবে।—*Times, November 21st, 1857, quoted in the Indian Empire. Vol. II., p. 449, note.*

সৈনিকদিগের স্তায় ইংরেজপক্ষের সাধারণ লোকেও বিলুপ্তনে প্রমত্ত ছিল। লর্ড রবার্টস্ লিখিয়াছেন—“যখন আমি অঝারোহণে কাশ্মীরতোরণ দিয়া আমার কার্যে যাইতেছিলাম, তখন দেখিলাম, পথের পার্শ্বে একখানি ডুলী রহিয়াছে, বেহারা নাই; স্পষ্ট বোধ হইল, উহাতে আহত লোক রহিয়াছে। আমি দেখিবার জন্য অথ হইতে নামিলাম; যাহা দেখিলাম, তাহাতে আমার যুগপৎ দুঃখ ও ভয় হইল। বিগেডিয়ার জন নিকলসন্ আহত হইয়া, ডুলীর মধ্যে ছিলেন। তিনি আমাকে কহিলেন যে, বেহারারা ডুলী নামাইয়া লুণ্ঠন করিতে গিয়াছে। তাঁহার অতিশয় কষ্ট হইতেছে; তাঁহাকে হাসপাতালে লইয়া যাওয়া হয়, ইহাই তাঁহার ইচ্ছা। তিনি ডুলীতে গিঠ দিয়া, শুইয়াছিলেন, আঘাত দেখা যাইতেছিল না। আমি কহিলাম, আঘাত বোধ হয়, গুরুতর হয় নাই। তিনি উত্তর করিলেন—‘আমি মরিতেছি। আমার আর কোন আশা নাই।’ ঈদৃশ মহৎ ব্যক্তিকে এইরূপ অসহায় এবং এই ভাবে মৃত্যুমুখে পতিতপ্রায় দেখিয়া, আমার অসহনীয় কষ্ট হইল। আমার চারি দিকে অনেক লোক মরিতেছিল; আমার বন্ধুগণ—সহযোগীগণ আমারই পার্শ্বে দেহত্যাগ করিতেছিলেন, তখন আমার মনের অবস্থা এরূপ হয় নাই। সে সময়ে বোধ হইয়াছিল যে, নিকলসন্কে হারাইলে সকলই হারাইতে হইবে।

ডুলীর বেহারাগণ পল্টনের পরিচারক ও অনুচরদিগের সহিত নিকটবর্তী বাড়ী, এবং দোকানপাট লুণ্ঠন করিতেছিল। ইহারা যাহা কিছু হাতে পাইতেছিল, তাহাই লুণ্ঠিয়া লইতেছিল। আমি কষ্টে চারি জন বেহারা সংগ্রহ করিলাম, ৬১ সংখ্যক দলের একজন সার্জেণ্টের (এক শ্রেণীর সৈনিক) নাম লিখিয়া লইলাম, তাহাকে, ডুলীর মধ্যে কে আছেন, জানাইয়া, উক্ত ডুলী হাসপাতালে লইয়া যাইতে বলিলাম।

নিকলসনের সহিত এই আমার শেষ দেখা। আমি কয়েক বার হাসপাতালে গিয়া, তাঁহার বিষয়ে, জিজ্ঞাসা করিয়াছিলাম। কিন্তু তাঁহাকে আর দেখিবার অনুমতি পাই নাই।—*Lord Roberts, Forty-one Years in India. Vol. I. p. 236.*

† *Bombay Correspondent, Times, November 16th, 1857, quoted in the Indian Empire. Vol. II., p. 450.*



আত্মীয়স্বজন বা স্বদেশবাসীদিগের নিধনে জ্ঞানশূন্য হইয়া, এইরূপে প্রতি-  
হিংসার তৃপ্তিসাধন করিয়াছে, তাহা কিছুমাত্র বিচিত্র নহে। মানব সংসার-  
ক্ষেত্রে প্রায়শঃ এই ভাবেই আত্মপ্রকৃতির পরিচয় দিয়া থাকে। কিন্তু যাহারা  
এ সময়ে বিদেশের নির্দোষ ও নিরীহ ব্যক্তিদিগকে রক্ষা করিতে যত্নশীল  
হইয়াছেন, এবং আপনাদের লোকদিগকে বিদেশীয়দিগের প্রতি অযথারূপে  
অস্বচ্ছন্দ্য করিতে দেখিয়া, স্বণায় তাহাদের অপকর্মের নিন্দা করিয়াছেন,  
তাঁহাদিগকে সাধারণ মানবের শ্রেণীতে নিবেশিত করা সম্ভব নহে। তাঁহারা  
নিঃসন্দেহ নরলোকে দেবতাস্বরূপ। নিরতিশয় সুখের বিষয়, এই উত্তেজনার  
সময়ে, অনেক ইংরেজ এইরূপ দেবপ্রকৃতির পরিচয় দিয়াছেন।

যে দিন সেনাপতি হাবেলক এবং আউট্রামের উপস্থিতিতে লক্ষ্মীর অবরুদ্ধ  
ইংরেজেরা আহ্লাদে উৎফুল্ল হইলেন,— বালকবালিকারা পর্য্যন্ত আনন্দে অধীর  
হইয়া, মাতার মুখ চুম্বন করিতে করিতে ভগবানের অসীম দয়ার কথা বলিতে  
থাকে, তাহার কয়েকদিন পূর্বে, দিল্লীর নিরীহ অধিবাসীরা নৈরাশ্রে অধীর  
হইয়া, সংসারে যে কর্ম সর্বাপেক্ষা কঠোর, সর্বাপেক্ষা শোচনীয়, সর্বাপেক্ষা  
নির্দয়ভাবের উদ্দীপক, তাহারই অনুষ্ঠান করে। পাছে ইহাদের প্রাণাধিক  
প্রণয়িনী এবং দুহিতারা বিজয়োন্নত সৈনিকদিগের হস্তে পতিত হয়, এই  
আশঙ্কায় ইহারা স্বহস্তে তাহাদের প্রাণ সংহার করে। একজন পরিদর্শক  
লিখিয়া গিয়াছেন,—“আমি চৌদ্দটি স্ত্রীলোকের মৃতদেহ দেখিলাম। দেহগুলি  
শালে ঢাকা ছিল। প্রত্যেক স্ত্রীলোকের গলদেশ, কণের এক প্রান্ত হইতে  
অপর প্রান্ত পর্য্যন্ত বিচ্ছিন্ন হইয়াছিল। আমি সেই স্থানের একজনকে  
ধরিলাম। সে কহিল, ‘পাছে ইহারা আপনাদের হাতে পড়ে, এই আশঙ্কায়  
ইহাদের স্বামিগণ ইহাদিগকে এইরূপে বধ করিয়াছে।’ ইহা কহিয়া, ঐ ব্যক্তি  
ইহাদের স্বামীদিগের শব দেখাইয়া দিল। তাহারা আপনাদের অভীষ্ট কর্ম  
সম্পাদনপূর্ব্বক শেষে আত্মহত্যা করিয়াছিল।”\* দিল্লীর অধিবাসীদিগের এই  
আশঙ্কা অমূলক হইলেও, তাহারা সন্মানে জ্ঞানশূন্য হইয়া, এইরূপ কঠোরতার  
পরিচয় দিয়াছিল। দিল্লীর সদাশয় কমিশনের গ্রিথেড্ সাহেব নগরের শোচনীয়

\* *Times, November 19th, 1857, quoted in the Indian Empire. Vol. II. p. 460.*

অবস্থা সম্বন্ধে তাঁহার পত্নীর নিকটে এই ভাবে লিখিয়াছিলেন—“যদি ভূপতি আপনার পরিবারবর্গের এবং নিজের জীবন রক্ষা করিতে ইচ্ছা করিতেন, তাহা হইলে আমাদের হস্তে তাঁহার প্রাসাদ সমর্পণ করা উচিত ছিল। একরূপ হইলে আমি এই লোকহত্যা নিবারণ করিতাম। বহুসংখ্যক স্ত্রীলোক আমাদের দয়ার উপর নির্ভর করিয়া, আত্মসমর্পণ করিয়াছিল। ইহারা নিরাপদে স্থানান্তরে গিয়াছিল। এই হতভাগ্য যাত্রীর দল শোচনীয়ভাবে উদ্দীপক হইয়াছিল। অনেকে শিশুসন্তান এবং বৃদ্ধদিগকে লইয়া, হাঁটিতে অসমর্থ ছিল”।\*

দিল্লীর উন্নত লোকের হস্তে ইউরোপীয়দিগের প্রাণান্ত ঘটয়াছে। উচ্ছৃঙ্খল সৈনিকদিগের হস্তে শেষে দিল্লীর লোকেও প্রাণ বিসর্জন করিয়াছে। হিংসা প্রাচীনকাল হইতেই মোগলের সমৃদ্ধিময়ী রাজধানীকে বারংবার এইরূপ নরশোণিতপ্রবাহে রঞ্জিত করিয়াছে। এই প্রবল বৃত্তির উত্তেজনা হইতে নিষ্কৃতি পাইয়া, শেষে সকলে সেই সর্বমঙ্গলময়, সর্বসাক্ষী, সর্বপ্রকারপক্ষপাত-শূন্য বিচারকের সমক্ষে উপনীত হইয়াছে। হিন্দু, মুসলমান, খ্রীষ্টান, প্রধান, অপ্রধান, সকলেই সমভাবে সেই মহাবিচারকের করুণার উপর নির্ভর করিয়াছে। সহৃদয়গণ যেন এখন রক্তমাংসের কথা ছাড়িয়া, ইহাদের সদগতির জন্ত প্রার্থনা করেন।

দিল্লীতে ইংরেজের প্রাধান্য স্থাপিত হইল। ইংরেজের ষাবতীয় বিশ্ববিপত্তি দূর হইয়া গেল। বৃদ্ধ মোগল ভূপতি ইংরেজের বন্দী হইলেন। তাঁহার সুবিস্তৃত রাজধানীর অধিকাংশ স্থান ভগ্নস্বূপে পরিণত হইল। সৈনিকদিগের জিঘাংসা এবং বিলুপ্তপ্রবৃত্তির তৃপ্তিলাভ হইল। যে রাজপুরুষ এক সময়ে ভয়ে আত্মগোপন করিয়াছিলেন, তিনি এখন কৰ্ম্মস্থলে আসিয়া, অভীষ্ট কৰ্ম্মসম্পাদনে ব্যাপ্ত হইলেন। দিনের পর দিন, সপ্তাহের পর সপ্তাহ, মাসের পর মাস অতিবাহিত হইল। প্রতিদিন, প্রতি সপ্তাহে, প্রতি মাসে মাজিষ্ট্রেট্ স্মার্টমাস মেট্ কাফের বিচারে, অবাধে লোকের ফাঁসি হইতে লাগিল।† দিল্লী উত্তেজিতসিপাহীদিগের আশার উদ্দীপক ছিল। বৃদ্ধ মোগলতাহাদের একাগ্রতা,

\* *Creathed, Letters, p. 285.*

† *Martin, Indian Empire. Vol. II. p. 451-452.*

তাহাদের উৎসাহ, তাহাদের অধ্যবসায়ের প্রধান অবলম্বনরূপ ছিলেন। এখন এই অবলম্বনের অধঃপতন ঘটিল। সিপাহীদিগেরও মোহভঙ্গ হইল। এই মহীয়সী সাধনায় সিদ্ধি লাভ করিতে ইংরেজ যার পর নাই ক্রটিগ্রস্ত হইলেন। তাহাদের ৩,৮০৭ জন সৈনিক হত, আহত ও নিরুদ্দেশ হয়। তাহাদের প্রায় ৬১,০০০০০ টাকা ব্যয় হইয়া যায়।\* ইহার উপর তাহাদের একজন প্রসিদ্ধ যুদ্ধবীরের দেহত্যাগে তাহারা একান্ত শোকগ্রস্ত হইলেন। ১৪ই সেপ্টেম্বর সেনানায়ক নিকলসন্ যুদ্ধে আহত হইয়াছিলেন। ২৩শে সেপ্টেম্বর এই আঘাতে তাহার প্রাণবিয়োগ হয়। দিল্লীর অধিকারে এবং নিকলসনের দেহত্যাগে ইংরেজের হর্ষে বিষাদ ঘটে। এক নগর হইতে আর এক নগরে, এক সৈনিকনিবাস হইতে আর এক সৈনিকনিবাসে ইংরেজের সমক্ষে এই সংবাদ উপস্থিত হয় যে, দিল্লী অধিকৃত হইয়াছে; বৃদ্ধ মোগল ভূপতি বন্দী হইয়াছেন, কিন্তু নিকলসন্ দেহত্যাগ করিয়াছেন; এই সংবাদে ইংরেজ যেরূপ পুলকিত হইলেন, সেইরূপ হুঃখের আবেগে দীর্ঘ নিশ্বাস পরিত্যাগ করেন।

\* *Martin, Indian Empire. Vol., II. p. 450.*

## দ্বিতীয় অধ্যায় ।

### ইংরেজ সেনাপতির লক্ষ্মীতে যাত্রা ।

সেনাপতি হাবেলকের কাণপুরে উপস্থিতি—তাঁহার লক্ষ্মীতে যাত্রার আয়োজন—তাঁহার মঙ্গলোয়ারে উপস্থিতি—উনাও এবং বসিরথগঞ্জের যুদ্ধ—হাবেলকের কাণপুরে প্রত্যাবর্তনের উদ্যোগ—সেনানায়ক নীলের বিরক্তি—হাবেলকের পুনর্বার লক্ষ্মীর দিকে যাত্রা—বসিরথগঞ্জের দ্বিতীয় যুদ্ধ—হাবেলকের আবার কাণপুরে প্রত্যাবর্তনের উদ্যোগ—তাঁহার মঙ্গলোয়ারে প্রত্যাবর্তন—লক্ষ্মীর পথে পুনর্বার যাত্রা—বসিরথগঞ্জের তৃতীয় যুদ্ধ—হাবেলকের কাণপুরে প্রত্যাবর্তন—বিঠুরের যুদ্ধ—আউট্রামের কাণপুরে উপস্থিতি—তাঁহার বিজ্ঞাপনপত্র—হাবেলক, আউট্রাম এবং নীলের লক্ষ্মীতে যাত্রা—তাঁহাদের আলমবাগে উপস্থিতি—চারবাগের সেতুপথে যুদ্ধ—ছত্রমঞ্জিল ও ফরিদবক্স—খাসবাজার—নীলের নিধন—হাবেলক ও আউট্রামের রেসিডেন্সিতে উপস্থিতি ।

একদিন দিল্লী উত্তেজিত সিপাহীদিগের প্রধান আড্ডা ছিল। বিভিন্ন স্থানের সিপাহীগণ নানা দিক হইতে দিল্লীতে সমবেত হইয়াছিল। দিল্লীর বর্ষীয়ান ভূপতির নামে তাহারা যেরূপ উৎসাহযুক্ত, সেইরূপ অধ্যবসায়সম্পন্ন হইয়া উঠিয়াছিল। তাহারা বৃদ্ধ মোগলের নামে স্বাধীনভাবে সমুদয় কার্য করিত। সুতরাং দিল্লীতে তাহাদের প্রাধান্য অব্যাহত, তাহাদের ক্ষমতা অপ্রতিহত, তাহাদের বাসনা অসংযত ছিল। এখন দিল্লী তাহাদের অধিকার হইতে বিচ্যুত হইল। বৃদ্ধ ভূপতি তাহাদের হস্ত হইতে পরিভ্রষ্ট হইলেন। দিল্লীতে তাহাদের আশাতঙ্ক হইল। তাহারা স্থানান্তরে প্রস্থান করিল। অনেকে লক্ষ্মীতে গিয়া, অভিনব অধিনায়কের অধীন হইল।

দিল্লী অধিকৃত হওয়াতে লোকে ইংরেজের ক্ষমতার পরিচয় পাইল বটে, কিন্তু ইহাতে বিপ্লবের শাস্তি হইল না। উদ্ধত লোকেও অসংসাহসিক কৰ্মসাধনে নিরস্ত থাকিল না। এখনও নানা স্থানে সিপাহীগণ দলবদ্ধ হইয়া রহিয়াছিল। নানা স্থানে সাহসী অধিনায়কগণ ইহাদিগকে ইংরেজের বিরুদ্ধে পরিচালিত করিতেছিলেন। ষ্বরিলীতে খাঁ বাহাদুর খাঁর প্রাধান্য ছিল।

ফরক্বাদের নবাবের ক্ষমতা অক্ষুণ্ণভাবে রহিয়াছিল। অধোদ্যার নানা স্থানে উত্তেজিত সিপাহীদিগের উত্তেজন্য নিদর্শন পরিদৃষ্ট হইতেছিল। কুমার সিংহের পরাক্রমে সমগ্র বিহার, এমন কি উত্তরপশ্চিমাঞ্চলের অনেক স্থান আন্দোলিত হইয়াছিল। ঝাঁসীর রাণী ইংরেজের ক্ষমতানাশে উত্তৃত হইয়াছিলেন। তাত্যাটোপে ইংরেজসৈন্যকে বিব্রত করিবার চেষ্টা করিতেছিলেন। মধ্যপ্রদেশে, দক্ষিণাপথে, বোম্বাই প্রেসিডেন্সিতে সিপাহীদিগের প্রভুভক্তি এবং সাধারণ লোকের প্রশান্ত্যভাব অশুভিত হইয়াছিল। এ সময়ে ভারতের নানা স্থানের সিপাহীগণ একসূত্রে নিবদ্ধ হইয়াছিল। নানা স্থানের লোকেও একরূপ কাৰ্য্যপ্রণালীর অনুবর্তন করিয়াছিল। এক স্থানে যাহা সম্পন্ন হইয়াছিল, অপর স্থানে তাহাই ঘটয়াছিল। এইরূপ বৈচিত্র্যহীন ঘটনাবলি সংক্ষেপে বর্ণনীয়। উপস্থিত বিপ্লবসমক্ষে এপর্য্যন্ত যাহা বর্ণিত হইয়াছে, তাহাতে পাঠকবর্গ বোধ হয়, বিপ্লবের প্রকৃতি এবং উহার পরিব্যাপ্তির বিষয় বুঝিতে পারিয়াছেন। এখন বারংবার একবিধ ঘটনার একরূপ বর্ণনায় তাঁহাদের বিরক্তি ও ধৈর্য্যচ্যুতি ঘটতে পারে। যে সকল বিষয় বৈচিত্র্যপূর্ণ, তৎসমুদয়ের বর্ণনা পাঠকবর্গের সমক্ষে উপস্থিত করা হইয়াছে। পরাক্রান্ত কুমার সিংহ প্রভৃতির জায় ঝাঁসীর রাণী ও তাত্যাটোপের কথা বৈচিত্র্যপূর্ণ। ইহাদের বিচিত্র ইতিহাস যথাস্থানে বিবৃত হইবে। এই কথা বলিবার পূর্বে অপরায় স্থানে যাহা ঘটয়াছিল, তাহা সংক্ষেপে বলা যাইতেছে।

যখন দিল্লী অধিকৃত হয়, তখন ইংরেজেরা লক্ষ্ণৌর রেসিডেন্সিতে অবরুদ্ধভাবে ছিলেন। ইহাদের সাহায্যের জন্ত সেনাপতি হাবেলক এবং আউট্রাম ২৫শে সেপ্টেম্বর লক্ষ্ণৌতে সমাগত হইলেন। ইহাদের উদ্ধারের কথা বুঝিবার পূর্বে কাণপুরের কথা এক বার মনে করা উচিত। পূর্বে উক্ত হইয়াছে যে, সেনাপতি হাবেলক নানা সাহেবকে পরাজিত করিয়া, কাণপুরে শান্তি স্থাপন করেন। তিনি সেনানায়ক নীলকে কাণপুরে রাখিয়া, লক্ষ্ণৌর অবরুদ্ধদিগের উদ্ধারার্থে যাত্রা করেন। তাঁহার সৈন্যসংখ্যা অল্প ছিল। তাঁহার গন্তব্যপথে বিপক্ষ সিপাহীরা অবস্থিতি করিতেছিল। বর্ষার প্রাচুর্য্যপ্রযুক্ত স্থলপথে যাত্রায় অনেক অসুবিধা ঘটয়াছিল। কিন্তু সেনাপতি অসুবিধার দিকে দৃকপাত করেন নাই। ২১শে জুলাই প্রাতঃকালে বৃষ্টি হইতে থাকে। বর্ষার আবির্ভাবে

ভাগীরথীরও পরিপুষ্টি ঘটে । এই দুর্দিনে হাবেলকের কামান এবং সৈনিক-গণের কিয়দংশ একখানি ছোট ষ্টীমারের সাহায্যে গঙ্গার অপর তটে পহঁছে । সমুদয় সৈন্য পার করিতে চারি দিন অতিবাহিত হয় । ২৪শে জুলাই সেনাপতি স্বয়ং ভাগীরথী উত্তীর্ণ হইয়া, রাত্ৰিকালে সৈনিকগণের সহিত লঙ্কোর পথে মঙ্গলোয়ার নামক পল্লীতে উপনীত হইলেন । গাড়ি এবং রসদ প্রভৃতির সংগ্রহের জন্ত সেনাপতিকে এই স্থানে চারি দিন থাকিতে হয় । অতঃপর সেনাপতি ২৯শে তারিখ উনাওর অভিমুখে অগ্রসর হইলেন । তিনি তিন মাইল পথ অতিক্রম করিয়াছেন, এমন সময়ে তাঁহার পথে বিপক্ষগণ পরিদৃষ্ট হইল । তাঁহার দক্ষিণভাগে জলাভূমি ছিল । তাঁহার পুরোভাগে—উনাও এবং ব্রিটিশ সৈন্যের মধ্যে—অনেকগুলি বাগানের উন্নত প্রাচীরের শ্রেণী ছিল । এই প্রাচীর যে পল্লী পর্য্যন্ত গিয়াছিল, উহা হইতে উনাও পর্য্যন্ত একটি সঙ্কীর্ণ পথ ছিল । পল্লীর বাড়ীগুলিতে বিপক্ষ সিপাহীগণ অবস্থিতি করিতেছিল । ইহারা জানালা, দরওয়াজা বা ভগ্ন স্থান দিয়া, ইংরেজসৈন্যের উপর গুলি চালাইবার জন্ত প্রস্তুত ছিল ।\* সেনাপতি হাবেলক সাহসসহকারে অগ্রসর হইলেন । বিপক্ষগণ তাড়িত হইল বটে, কিন্তু উনাও তাহাদের অধিকারে রহিল । কিন্তু এই স্থানেও তাহারা পরাজিত হইয়া, ১৫টি কামান ফেলিয়া, পলায়ন করিল ।

অতঃপর সেনাপতি সৈনিকদিগকে কিয়ৎক্ষণ বিশ্রাম করিতে আদেশ দিলেন । যখন খাণ্ড দ্রব্যাদির পাক হইতেছিল, তখন তিনি শত্রুপক্ষ হইতে অধিগত কামানগুলি সঙ্গে লইয়া যাইবার সুবিধা না হওয়াতে, অকর্মণ্য করিয়া ফেলিলেন । বিশ্রাম ও আহারে তিন ঘণ্টা অতীত হইল । তিন ঘণ্টার পর সেনাপতি আবার আপনার লক্ষ্য স্থানের অভিমুখে অগ্রসর হইতে লাগিলেন । তাঁহার সৈনিকদল ছয় মাইল পর্য্যন্ত গিয়াছে, এমন সময়ে তাহাদের অগ্রভাগে বিস্তৃত প্রান্তরের মধ্যে প্রাচীরপরিবেষ্টিত একটি পল্লী দৃষ্টিগোচর হইল । এই পল্লীর নাম বসিরথগঞ্জ । উহার সম্মুখে একটি বিস্তৃত ঝিল বর্ষার প্রাচুর্ভাব প্রযুক্ত নদীর মত হইয়াছিল । লঙ্কোর পথে আর একটি ঝিল দেখা যাইতেছিল । লোকের গমনাগমনের জন্ত উহার উপর বাধ ছিল । পল্লীর প্রবেশপথে

\* *Marshman, Memoirs of Sir Henry Havelock, p, 329.*

যুদ্ধিকানির্ধিত উচ্চ স্থানের উপর চারিটি কামান স্থাপিত হইয়াছিল। সিপাহীরা এই স্থানে ইংরেজ সেনাপতিকে বাধা দিতে লাগিল। কিন্তু তাহারা কৃতকার্য হইতে পারিল না। যুদ্ধে তাহাদের বিলক্ষণ সাহস ও ক্ষমতা প্রকাশিত হইয়াছিল। কিন্তু শেষে তাহারা পূর্বোক্ত বাধের সাহায্যে ইংরেজসৈন্যের হস্ত হইতে মুক্তিলাভ করিল। এইরূপে ইংরেজ সেনাপতি আপনার অভীষ্ট স্থলে যাইবার পথে দুই স্থানের—উনাও এবং বসিরথগঞ্জের—যুদ্ধে জয়ী হইলেন।

কিন্তু জয়লাভেও সেনাপতির হৃদয় আশ্বস্ত বা প্রফুল্ল হইল না। যখন দুই যুদ্ধ শেষ হইয়া গেল, তখন তিনি দেখিলেন, তাঁহার পদাতিদলের মধ্যে সাড়ে আট শতের বেশী সৈনিক নাই। এতদ্ব্যতীত তাহারা পীড়িত হইয়াছিল, তাহাদিগকে সঙ্গে লইয়া যাইবার কোন সুবিধা ছিল না। তাঁহার সৈন্যসংখ্যা এত অধিক ছিল না যে, তিনি ইহাদিগকে উপযুক্ত রক্ষকের তত্ত্বাবধানে রাখিয়া যাইতে পারেন। তিনি জানিতেন যে, লক্ষ্মীর অভিমুখে যাত্রা করিতে হইলে, তাঁহাকে আরও অনেক স্থলে বিপক্ষের সহিত যুদ্ধ করিতে হইবে। এখনও লক্ষ্মী তাঁহা হইতে ছত্রিশ মাইল দূরে ছিল। বর্ষার আবুবির্ভাবে অনেক স্থান জলে পরিব্যাপ্ত হইয়াছিল। বৃষ্টি ও জলীয় বায়ু হইতে দেহরক্ষার জন্ত যথোপযুক্ত পরিচ্ছদ ছিল না। এক দিকে সূর্যের প্রখর তাপ, অপর দিকে বৃষ্টি ও পল্লময় পথের আর্দ্রতার মধ্যে থাকাতে তাঁহার সৈনিকদলে বিষুচিকা ও অতিসারের প্রাদুর্ভাব হইয়াছিল। এদিকে নানা সাহেবের অশ্বারোহিগণ কাণপুরের দিকে তাহার প্রত্যাবর্তনের পথ অবরোধ করিবার চেষ্টা করিতেছিল। নানাদিকে এইরূপ বিষ দেখিয়া, সেনাপতি কাণপুরে ফিরিয়া যাইতে উদ্বৃত্ত হইলেন। তিনি ৩০শে জুলাই উনাও এবং তৎপর দিন মঙ্গলোয়ারে প্রত্যাবর্তন করিলেন। এই স্থান হইতে রুথ ও আহতদিগকে কাণপুরে পাঠাইয়া দিলেন, এবং সেনানায়ক নীলের নিকটে এই ভাবে পত্র লিখিলেন যে, লক্ষ্মী যাইতে হইলে, তাঁহার আরও এক হাজার সৈনিক এবং কামানের সহিত একদল গোলন্দাজ সৈন্য আবশ্যিক হইবে।

পূর্বে উক্ত হইয়াছে যে, সেনাপতি নীল কাণপুরে শান্তিস্থাপনে নিরোদ্ধিত ছিলেন। তাঁহার সাহস ও উদ্বৃত্ত প্রকৃতির বিষয় পূর্বে বর্ণিত হইয়াছে। সেনাপতি হাবেলকের পত্র এই উদ্বৃত্তপ্রকৃতি সৈনিকপুরুষের হস্তগত হইল।

পত্র পাইয়া, কাণপুরের সেনানায়ক নিরতিশয় বিরক্ত হইলেন। তাঁহার উদ্বোধ হইল যে, সেনাপতি হাবেলক যখন ফিরিয়া আসিয়াছেন, তখন সাধারণে তাঁহার জয়লাভের কথায় বিশ্বাস করিবে না; সেনাপতির সাহায্যের জন্ত একদল সৈনিক এবং কয়েকটি কামান প্রেরিত হইল বটে, কিন্তু নীল কঠোর ভাষায় হাবেলকের পত্রের উত্তর দিতে নিরস্ত থাকিলেন না। নীল, হাবেলকের অধস্তন কর্মচারী ছিলেন। নীলের পত্রের উত্তরে হাবেলক লিখিয়াছিলেন যে, তিনি জীবনে কখনও এইরূপ পত্র পড়েন নাই। \* যাহা হউক, হাবেলকের বিশ্বাস ছিল যে, কলিকাতা হইতে তাঁহার সাহায্যের জন্ত দুইদল সৈন্য প্রেরিত হইবে। কিন্তু এ সময়ে উত্তরপশ্চিম প্রদেশের গায় বিহারপ্রদেশেও বিপ্লব ঘটয়াছিল। হাবেলক যে সৈন্যের প্রতীক্ষা করিয়াছিলেন, তাহা ঐ প্রদেশের বিপ্লবনিবারণের জন্ত প্রেরিত হইয়াছিল। হাবেলক এখন যে সৈন্য ও কামান পাইলেন, তাহা লইয়া, ৪ঠা আগষ্ট, দ্বিতীয় বার অবরুদ্ধ রেসিডেন্সির অভিমুখে অগ্রসর হইলেন। তিনি শুনিতে পাইলেন যে, বিপক্ষ সিপাহীগণ আবার বসিরথগঞ্জ সমবেত হইয়াছে। এই স্থানে দ্বিতীয় বার যুদ্ধ ঘটিল। সিপাহীরা পুনর্বার পরাজিত হইয়া হটিয়া গেল। কিন্তু বিপক্ষের পরাজয়েও ইংরেজ সেনাপতির উদ্দেশ্য সিদ্ধ হইল না। সেনাপতি পূর্বে গোলন্দাজদলের অধ্যক্ষকে সিপাহীদিগের ১৫টি কামান অকর্মণ্য করিয়া ফেলিতে আদেশ দিয়াছিলেন, কিন্তু সকল গুলি সম্পূর্ণরূপে বিনষ্ট হয় নাই। উহার দুইটি বিপক্ষেরা পুনর্বার হস্তগত করিয়া, স্বকার্যসাধনে উত্তৃত হইয়াছিল। এদিকে সেনাপতির শিবিরে বিস্মৃচিকারোগের আবির্ভাব ঘটয়াছিল। বসিরথগঞ্জের যুদ্ধে কামানের গোলা, বারুদ প্রভৃতির একচতুর্থাংশ খরচ হইয়া গিয়াছিল। পথের মধ্যে সই নামক একটি গভীর নদী ছিল। এতদ্ব্যতীত আরও তিন স্থানে বহুসংখ্যক সিপাহী অবস্থিতি করিতেছিল। অধিকন্তু গোবালিয়রের উদ্ভেদিত সৈনিকদল তাহাদের মহারাজের শাসন না মানিয়া, কারীর অভিমুখে অগ্রসর হইয়াছিল। কারী, কাণপুরের ৪৬ মাইল দক্ষিণ-পশ্চিমে অবস্থিত। এই স্থান হইতে সহজে কাণপুর আক্রমণ এবং এলাহা-

\* Malleon, Indian Mutiny. Vol. I., p. 502, note.



বাদের পথ অবরোধ করিবার সম্ভাবনা ছিল। এই সকল ভাবিয়া, সেনাপতি পুনর্বার কাণপুরে ফিরিয়া যাইতে উদ্বৃত্ত হইলেন। তিনি ধীরভাবে অনেক ভাবিয়া, প্রত্যাবর্তনে কৃতসঙ্কল্প হইয়াছিলেন। এই সময়ে বর্ষার প্রাদুর্ভাব প্রযুক্ত অনেক স্থান জলপ্লাবিত হইয়াছিল। হাতী, উট, গাড়ি প্রভৃতি অনেক কষ্টে সংগৃহীত হইত। গম্ভব্য পথের অনেক স্থান বিপক্ষ সিপাহীগণ কর্তৃক অবরুদ্ধ ছিল। ইহাদের সহিত যুদ্ধে এবং ওলাউঠা প্রভৃতি রোগে সেনাপতির বলক্ষয় হইয়াছিল। তাঁহার উত্তরভাগে ফরাক্কাবাদের নবাব বহুসংখ্যক উত্তেজিত সিপাহীর অধিনায়ক হইয়া, ইংরেজের প্রাধান্যনাশের জন্ত প্রস্তুত ছিলেন। তাঁহার দক্ষিণভাগে গোবালিয়রের সৈনিকদল কাণপুরের দিকে অগ্রসর হইয়াছিল। লক্ষ্মীর ইংরেজদিগের উদ্ধার করা এ সময়ে অবশ্য কর্তব্য ছিল বটে, কিন্তু অল্পমাত্র সৈনিকবলে ঐ উদ্দেশ্যসিদ্ধির কোন সম্ভাবনা ছিল না। এই সকল কারণে সেনাপতি হাবেলকের কাণপুরে প্রত্যাবর্তন সঙ্গত হইয়াছিল।

সেনাপতি মঙ্গলোয়ারে ফিরিয়া আসিলেন। এই স্থানে আপনার লোকদিগকে একত্র করিবার জন্ত চারি দিন থাকিয়া, ১১ই আগষ্ট গঙ্গা পার হইতে উদ্বৃত্ত হইয়াছেন, এমন সময় শুনিলেন যে, বিপক্ষ সিপাহীরা পুনর্বার বসিরথগঞ্জে সমবেত হইয়াছে। ইহাদের একদল উনাওতে অগ্রসর হইয়া, গঙ্গা পার হওয়ার সময়ে তাঁহাকে বাধা দিবার সুযোগ দেখিতেছে। সুতরাং সেনাপতি বিপক্ষদিগকে তাড়াইবার জন্ত আবার লক্ষ্মীর পথে অগ্রসর হইলেন। বিপক্ষগণ উনাও হইতে তাড়িত হইল। রাত্ৰিকালে ইংরেজ সেনাপতি নগরের চারি দিক্ পর্য্যবেক্ষণ করিতে লাগিলেন। ১২ই আগষ্ট প্রাতঃকালে তিনি কিয়দূর অগ্রসর হইয়া দেখিলেন যে, বিপক্ষগণ বসিরথগঞ্জের পুরোভাগে মৃগায় প্রাচীরের পশ্চাতে দলবদ্ধ রহিয়াছে। বসিরথগঞ্জে তৃতীয় বার যুদ্ধ ঘটিল। এই যুদ্ধেও সিপাহীরা তাড়িত ও পরাজিত হইল। সেনাপতি হাবেলক ১৩ই আগষ্ট গঙ্গা পার হইয়া, কাণপুরে উপস্থিত হইলেন। তিনি আপনার পরিশ্রান্ত সৈনিকদিগকে দুই দিন বিশ্রাম করিতে আদেশ দিলেন। ১৬ই তারিখ উষাকালে সেনানায়ক নীলের অধীনে এক শত সৈনিক রাখিয়া, তিনি বিঠুরের অভিযুখে অগ্রসর হইলেন। এই স্থানে বিভিন্নদলের বহুসংখ্যক সিপাহী অবস্থিতি

করিতেছিল। নানা সাহেবের অনুচরগণ দুইটি কামান লইয়া, ইহাদের মধ্যে ছিল। সমুদয়ে প্রায় চারি হাজার সশস্ত্র লোক ইংরেজের বিরুদ্ধে সমবেত হইয়াছিল। এই সিপাহীরা ইংরেজ সেনাপতি কর্তৃক আক্রান্ত হইয়া যথোচিত সাহস ও রণদক্ষতার পরিচয় দিয়াছিল। ইহারা একরূপ পরাক্রমে আপনাদের কামান রক্ষা করিয়াছিল, একরূপ সাহসে ইংরেজসৈন্যের ব্যুহভেদে অগ্রসর হইয়াছিল, একরূপ কৌশলে খাচু দ্রব্যাদি আটক করিতে গিয়াছিল যে, ইংরেজও তাহাদের প্রশংসাবাদে নিরস্ত থাকেন নাই। কিন্তু শেষে তাহাদের পরাজয় হইল। সেনাপতি ১৭ই আগষ্ট কাণপুরে প্রত্যাবৃত্ত হইলেন। এই আগষ্টের কলিকাতা গেজেট এই স্থানে তাঁহার হস্তগত হইল। তিনি গেজেটে দেখিতে পাইলেন যে, স্যার জেম্‌স্‌ আউট্রাম লক্ষ্মীর উদ্ধারের জন্ত তাঁহার স্থলে সেনাপতির পদে প্রতিষ্ঠিত হইয়াছেন।

লর্ড ক্যানিং বোধ হয়, হাবেলকের প্রত্যাবর্তনে দুঃখিত হইয়াছিলেন। কিন্তু তিনি যদি ঘটনাস্থল এবং সময়ের অবস্থার পূর্বাপর পর্যালোচনা করিয়া দেখিতেন, তাহা হইলে বোধ হয়, হাবেলক তৎকর্তৃক অধঃকৃত হইতেন না। যাহা হউক, সেনানায়ক আউট্রামের জন্ত এ বিষয়ে কোন গোলযোগ ঘটিল না। পূর্বে উক্ত হইয়াছে যে, আউট্রাম ১লা আগষ্ট কলিকাতায় উপনীত হইয়াছিলেন। \* উহার চারি দিন পরে তিনি অযোধ্যার প্রধান কমিশনরের পদে প্রতিষ্ঠিত হইলেন। অবিলম্বে তিনি কলিকাতা হইতে যাত্রা করেন। পথে বিপক্ষ সিপাহীদিগের দলভঙ্গ করিয়া, আউট্রাম ১৬ই সেপ্টেম্বর কাণপুরে উপস্থিত হইলেন। গবর্নমেন্ট তাঁহাকে সেনাপতির পদে নিযুক্ত করিয়াছিলেন, কিন্তু আউট্রাম দেখিলেন, এই পদ গ্রহণ করিলে সেনাপতি হাবেলকের যার পর নাই মনঃক্ষোভ জন্মিবে। তিনি বিপক্ষের আশাভঙ্গ করিতে গিয়া, স্বপক্ষের প্রধান ব্যক্তির উৎসাহভঙ্গের কারণ হইবে। আউট্রাম উদারতার বশবর্তী হইয়া, অবিলম্বে এই বলিয়া বিজ্ঞাপনপত্র প্রচার করিলেন যে, সেনাপতি হাবেলক, যে কার্য্য করিয়াছেন, তাহাতে তাঁহার সবিশেষ সম্ভাষণ জন্মিয়াছে। তিনি দেওয়ানী বিভাগের কর্মচারিরূপে অযোধ্যার কর্মস্থলে উপস্থিত থাকিমা,

\* এই ইতিহাসের ৪র্থ ভাগ, ১৭৬ পৃষ্ঠা দেখ।

নিজের ইচ্ছায় সৈনিকবিভাগে সেনাপতির সাহায্য করিবেন। আউট্রামের এইরূপ স্বার্থত্যাগের পরিচয় পাইয়া, প্রধান সেনাপতি সান্ত্বনয় সন্তোষ প্রকাশ করিলেন।

এইরূপে হাবেলক, লক্ষ্মীর অধিকারের জন্ত যে সৈনিকদল প্রস্তুত হইয়াছিল, তাহার প্রধান অধ্যক্ষের পদে প্রতিষ্ঠিত রহিলেন। আউট্রাম তাহার সহকারী হইলেন। এই সৈনিকদলের এক ভাগের কর্তৃত্ব নীলের উপর সমর্পিত হইল। তিন জন সাহসী ইংরেজ সেনাপতি সুজাতির উদ্ধারার্থে লক্ষ্মীযাত্রায় উত্তীর্ণ হইলেন। গঙ্গা পার হওয়ার জন্ত নৌসেতু প্রস্তুত হইতে লাগিল। ১৯শে সেপ্টেম্বর সেতুনির্মাণ শেষ হয়। ঐ দিন হইতে সৈনিকদল গঙ্গা পার হইতে থাকে। তৎপর দিন কামান প্রভৃতি অপর পারে লইয়া যাওয়া হয়। সৈনিকদল ২১শে সেপ্টেম্বর কাণপুরের অপর তট হইতে যাত্রা করিয়া, পূর্বের স্থায় মঙ্গলোয়ারে উপস্থিত হয়। মঙ্গলোয়ারে বিপক্ষ সিপাহীগণ অবস্থিতি করিতেছিল। ইহারা ঐ স্থান হইতে তাড়িত হয়। অনন্তর সৈনিকগণ উনাওতে কিছুকণ বিশ্রাম করিয়া পর দিন বসিরথগঞ্জে পঁহুছে। তাহারা অবিরতবৃষ্টি পাতের মধ্যে এই স্থান হইতে ষোল মাইল অতিক্রম করিয়া, বানি নামক পল্লীতে গমন করে। বানি হইতে লক্ষ্মী যাইতে হইলে সেই নদী পার হইতে হয়। নদী পার হওয়ার কোন অসুবিধা ছিল না। উহার উপর ইষ্টকনির্মিত সেতু ছিল। সৈনিকদল নদী পার হইয়া আলমবাগের অভিমুখে অগ্রসর হইল। এই বিস্তৃত বাগানে বিপক্ষ সিপাহীরা ছয়টি কামান লইয়া অবস্থিতি করিতেছিল। ২৩শে সেপ্টেম্বর কিছুকণ বিশ্রামের পর ইংরেজসৈন্য ইহাদের অভিমুখে ধাবিত হইল। সেনানায়ক নীল পার্শ্ববর্তী পল্লী হইতে কতকগুলি বিপক্ষকে তাড়াইয়া দিলেন। বিপক্ষগণ আলমবাগ এবং উহার নিকটবর্তী একটি বাড়ীতে থাকিয়া, বিলক্ষণ পরাক্রমের সহিত আগস্তক ইংরেজসৈন্যের গতিরোধ করিল। কিন্তু শেষে তাহারা এই স্থান হইতে তাড়িত হইল। সন্ধ্যা হওয়াতে সেনাপতি হাবেলক সৈনিকদিগকে বিশ্রাম করিতে আদেশ দিলেন। তাহারা ষথাস্থানে কামানসম্মিবেশ করিয়া, বিশ্রাম করিতে লাগিল। কিন্তু সহসা তাহাদের মধ্যে গোলযোগ ঘটিল। পলায়মান সিপাহীরা নূতন কামান আনিয়া, তাহাদের উপর গোলাবর্ষণ করিতে

লাগিল। এই সময়ে প্রবলবেগে বৃষ্টি হইতেছিল। সমুদয় স্থান অন্ধকারময় হইয়া উঠিয়াছিল। পথ, হাতী, ঘোড়া, বলদ, প্রভৃতি চতুষ্পদের সহিত দ্বিপদ মানুষ এবং কামান প্রভৃতি অচল আঘেয়াস্ত্রে পরিপূর্ণ ছিল। যাহা হউক, সিপাহীদিগের এই উদ্যমও সফল হইল না; আলমবাগ ইংরেজসৈন্তের অধিকারে রহিল। শেষে সিপাহীদিগের সন্নিবেশস্থলও তাহাদের অধিকৃত হইল। তাহাদের একদল, এক হাঁটু কাদা ভাঙ্গিয়া, আপনাদের অবস্থিতিস্থলের চারি দিক পর্যবেক্ষণ করিতে লাগিল। এই সময়ে বৃষ্টিপাত বন্ধ হইয়াছিল। এই সময়ে দিল্লীর অধিকারের সংবাদও শিবিরে প্রচারিত হইয়াছিল। ইংরেজসৈন্ত এই সংবাদ পাইয়া, লক্ষ্যের পুরোভাগে কামানের ধ্বনি করিয়া, হর্ষ প্রকাশ করিতে লাগিল। পর দিন তাহারা আপনাদের শক্তিসম্বন্ধের জ্ঞান বিশ্রাম করিল। আলমবাগে তাহাদের দ্রব্যাদি রহিল। আড়াই শত সশস্ত্র রক্ষক উহার পাহারা দিতে লাগিল।

২৫শে জুন প্রাতঃকালে হাবেলক আউট্রামের সহিত পরামর্শ করিয়া, সোজা পথের পরিবর্তে একটু ঘুরিয়া রেসিডেন্সির অভিমুখে অগ্রসর হইলেন। তাহারা চারবাগের নিকট উপস্থিত হইয়াছেন, এমন সময়ে তথাকার সিপাহীগণ প্রবলবেগে গুলিবৃষ্টি করিতে লাগিল। তাহারা চারবাগের সেতুর অপর ভাগে স্থাপিত কামান হইতে এমন বেগে গোলা চালাইতে লাগিল যে, ইংরেজের কামানের গোলা অকার্যকর হইয়া পড়িল। সেনাপতির তরুণবয়স্ক পুত্র হাবেলক দেখিলেন যে, সেতুর নিকটে তাঁহার পিতা বা আউট্রাম, কেহই উপস্থিত নাই। তাঁহার পিতা যেখানে ছিলেন, তিনি স্বরিতগতিতে সেই স্থানের দিকে গেলেন, তিন চারি মিনিটের মধ্যে ফিরিয়া আসিয়া নীলকে কহিলেন যে, সৈনিকদিগকে সেতুপথে অগ্রসর হইবার জ্ঞান তাঁহাকে আদেশ দিতে হইবে। সেনানায়ক নীলের আদেশে পঁচিশ জন সৈনিক অগ্রসর হইল। কিন্তু মুহূর্তের মধ্যে তাহাদের শরীর ছিন্নবিচ্ছিন্ন হইয়া গেল। সেনাপতির পুত্র কোনরূপে রক্ষা পাইলেন। সেনাপতি হাবেলক এই সময়ে উপস্থিত হইয়া, নিষ্কোশিত তরবারির আক্ষালন করিতে করিতে সৈনিকদিগকে অগ্রসর হইতে আদেশ দিতে লাগিলেন। সৈনিকগণ নির্ভীকচিত্তে কামানের গোলার সম্মুখে সেতু পার হইল। তাহারা কামানগুলি অধিকার করিল, সন্ধ্যানে

বিপক্ষদিগের অনেকের প্রাণান্ত করিয়া ফেলিল, এবং বিপুলবিক্রমে লক্ষ্মী সহরে প্রবেশলাভ করিল।

সৈনিকগণ অতঃপর কৈশরবাগের দিকে অগ্রসর হইল। বিপক্ষেরা এই স্থান হইতেও গোলাবৃষ্টি করিয়া, তাহাদের সাতিশয় ক্ষতি করিতে লাগিল। এইরূপ ক্ষতিগ্রস্ত হইয়াও, তাহারা সেতুপথে একটি নালা পার হইয়া, ছত্রমঞ্জিল এবং ফরিদবক্স প্রাসাদ অধিকার করিল। পশ্চাদগামী সৈনিকদলের সহিত একত্র হইবার জন্ত আউট্রাম অগ্রগামী সৈনিকদলকে ছত্রমঞ্জিলে কয়েক ঘণ্টা রাখিবার প্রস্তাব করিলেন। কিন্তু হাবেলক এই প্রস্তাবে সন্মত না হইয়া, অপরূপ রেসিডেন্সির অভিমুখে অগ্রসর হইতে আদেশ দিলেন। ইতঃপূর্বে আউট্রামের বাহতে বন্দুকের গুলি লাগিয়াছিল, রুধিরস্রোত বন্ধ করিবার জন্ত তিনি বাহতে রুমাল বাঁধিয়াছিলেন। একজন তাঁহাকে আহত স্থানে পটি বাঁধিবার জন্ত অশ্ব হইতে নামিতে কহিলে, আউট্রাম উত্তর করিলেন, “যে পর্য্যন্ত রেসিডেন্সিতে উপস্থিত না হই, সে পর্য্যন্ত এইভাবে থাকিব।” রেসিডেন্সিতে যাত্রাকালে হাইলাণ্ডার সৈন্য সর্কাগ্রে স্থাপিত হইল। তৎপশ্চাতে শিখগণ এবং তাহাদের পশ্চাদ্ভাগে মাদ্রাজের সৈনিকগণ রহিল। এইরূপে ব্যবস্থিত হইয়া, ইংরেজসৈন্য সহরের সঙ্কীর্ণ গলি দিয়া, রেসিডেন্সির অভিমুখে যাইতে লাগিল। গলির পার্শ্বস্থিত উচ্চগৃহসমূহে সিপাহীগণ অবস্থিতি করিতেছিল। হাবেলকের সৈন্য এইরূপ বিপত্তিময় পথে খাসবাজার নামক স্থানে উপনীত হইল। এই স্থানের গৃহগুলি বিপক্ষ সিপাহীগণে পূর্ণ ছিল। ইংরেজসৈন্য খাসবাজারের তোরণের নিকট উপস্থিত হইলে আবার সিপাহীগণ কর্তৃক আক্রান্ত হয়। সেনানায়ক নীল ইহাদের পরিচালনা করিতেছিলেন। তিনি তোরণ অতিক্রম আপনার সহচরকে কহিলেন যে, কামানগুলি ভিন্ন পথে গিয়াছে, উহা ফিরাইয়া আনিতে হইবে। এই আদেশ দিয়া, তিনি অশ্বের রশ্মি সংযত করিয়া, কামান আসিতেছে কি না, দেখিবার জন্ত মুখ ফিরাইয়া রহিলেন; এমন সময়ে একজন সিপাহী তোরণের উপর হইতে তাঁহার মস্তক লক্ষ্য করিয়া, গুলি করিল। গুলি মস্তক ভেদ করিয়া, বাম কর্ণের নিম্নভাগে প্রবিষ্ট হইল। নীল এই আঘাতে গতাস্থ ও অশ্ব হইতে পতিত হইলেন। কিন্তু সৈনিকেরা ইহাতে সাহসে বিসর্জন দিল না। তাহারা হাবেলক এবং আউট্রামের কথায়

উৎসাহিত হইয়া, গুলিবৃষ্টির মধ্যে রেসিডেন্সির দিকে অগ্রসর হইতে লাগিল। অবশেষে ইহাদের অনেকে ২৫শে সেপ্টেম্বর, রাত্রির অন্ধকারের মধ্যে মহোল্লাসে নির্দিষ্ট স্থানে সমাগত হইল।\* ইহাদের আগমনে রেসিডেন্সির যেরূপ অবস্থা ষটিয়াছিল, তাহা পূর্বে বর্ণিত হইয়াছে। ২৫শে সেপ্টেম্বর সমুদয় সৈন্য রেসিডেন্সিতে প্রবেশ করিতে পারে নাই। অধিকাংশ তৎপর দিন প্রাতঃ-কালে উপস্থিত হয়। পশ্চাদ্গামী সৈনিকদল পীড়িত ও আহতদিগকে লইয়া, কর্ণেল নেপিয়ারের ( পরে লর্ড নেপিয়ার, ইনি ভারতবর্ষের প্রধান সেনাপতি হইয়াছিলেন। ) তত্ত্বাবধানে রেসিডেন্সিতে পদার্পণ করে। এইরূপ বিঘ্নবিপত্তি অতিক্রম পূর্বক সেনাপতি হাবেলক ও আউট্রাম লঙ্কোর রেসিডেন্সিতে সমাগত হইলেন। পথে সেনানায়ক নীল দেহত্যাগ করেন। সৈনিকদিগের অনেকে রোগের আক্রমণে নিজ্জীব হইয়া পড়ে। অনেকে সিপাহীদিগের আক্রমণে হত ও আহত হয়।

\* *Marshman, Memoirs of Sir Henry Havelock, p. 412-413.*

## তৃতীয় অধ্যায় ।

### উত্তরপশ্চিমপ্রদেশ ও অযোধ্যা ।

সেনাপতি গ্রিথেডের দিল্লী হইতে যাত্রা—গাজীউদ্দীন নগর—বুলন্দসহর—মালঘর—খুজ্জা—মৌনী সন্ন্যাসী—আলিগড়—আকবরাবাদ—আগরা—মৈনপুরী—সেনাপতি আউট্রামের পত্র—কালীনদীর তীরে যুদ্ধ—প্রধান সেনাপতি স্তার্ কোলিন্ কাম্‌পেলের যুদ্ধক্ষেত্রে যাত্রা—কাজোয়ার যুদ্ধ—প্রধান সেনাপতির অযোধ্যায় প্রবেশ—জঙ্গ্বাহাছর—প্রধান সেনাপতির লক্ষ্মোতে প্রবেশ—তাঁহার সহিত সেনাপতি হাবেলক ও আউট্রামের সন্মিলন—সেনাপতি হাবেলকের দেহত্যাগ—আউট্রামের আলমবাগে অবস্থিতি—প্রধান সেনাপতির কাণপুরে যাত্রা ।

সেনাপতি উইল্‌সনের স্বাস্থ্যভঙ্গ হইয়াছিল। দিল্লী অধিকৃত হইলে উইল্‌সন্ হিমগিরির শীতল সমীরে সুস্থ হইবার জন্তু সিমলায় গিয়াছিলেন। দিল্লী পরিত্যাগের পূর্বে তিনি গঙ্গা ও যমুনার মধ্যবর্তী ভূখণ্ড হইতে বিপক্ষ সিপাহী-দিগকে নিষ্কাশিত করিবার জন্তু সৈন্ত পাঠাইবার বন্দোবস্ত করেন। ৭৫০ জন ইংরেজ, এবং ১,৯০০ জন এতদেশীয় সৈনিক প্রস্তুত হয়। লেফ্‌টেনেন্ট কর্ণেল গ্রিথেড্ এই সৈনিকদলের অধ্যক্ষ হইলেন। ২৪শে সেপ্টেম্বর প্রাতঃকালে ইহারা দিল্লী হইতে যাত্রা করে। এই সময়ে মহিমাবিত মোগলের জনকোলাহলময় রাজধানী মহাশ্মশানের মত হইয়াছিল। পথে লোকসমাগম ছিল না। যুদ্ধযাত্রী ইংরেজ সৈনিকদিগের পদশব্দ ব্যতীত আর কোন শব্দ সে সময়ে শ্রুতিগোচর হয় নাই। নানাস্থানে মৃতদেহ পড়িয়া রহিয়াছিল। গলিত শবের ছুর্গন্ধে চারি দিকের বায়ু দূষিত হইয়া উঠিয়াছিল। কোন স্থানে কুকুর এক জনের বিচ্ছিন্ন দেহাংশ আগ্রহের সহিত উদরস্থ করিবার চেষ্টা করিতেছিল। কোন স্থলে শকুনি চঞ্চুপুট দ্বারা আপনার অভীষ্ট খাদ্য তুলিয়া লইতেছিল, সৈনিকদিগের সমাগমে ক্ষুধার্ত্ত বিহঙ্গ দূরে সরিয়া গেলেও, সেই ভোজ্য দ্রব্যের দিকে সতৃষ্ণভাবে দৃষ্টিযোজনা করিয়া রহিয়াছিল। কোন কোন স্থানে শবগুলি যেন জীবন্তভাবে অক্ষুরূপ ছিল। কোন কোন শবের হস্তস্থিত অস্ত্র

পূর্ববৎ উত্তোলিত রহিয়াছিল। ইংরেজ সৈনিকদিগের ঞায় অশ্বগুলিও এই ভয়ঙ্কর দৃশ্যে চমকিত হইয়াছিল। যুদ্ধযাত্রিগণ নীরবে এই ভয়াবহ শ্মশান অতিক্রম পূর্বক নগরের বহির্ভাগে উপস্থিত হইল।

উক্ত বীভৎস দৃশ্য ও দুর্গন্ধ বায়ু পরিহার করিয়া, সৈনিকগণ যখন বিস্তৃত স্থলের বিশুদ্ধ ও বিমুক্ত বায়ুর মধ্যে আসিল, তখন তাহাদের আহ্লাদের অবধি রহিল না। তাহারা স্মৃৎস্পর্শ সমীরে উৎফুল্ল হইয়া অগ্রসর হইতে লাগিল। এগার মাইল পথ গিয়া, তাহারা গাজীউদ্দীন নগরে উপস্থিত হইল। বিপক্ষ সিপাহীরা এই স্থান ছাড়িয়া চলিয়া গিয়াছিল। কতিপয় সিবিলিয়ান, যে দিন দিল্লী অধিকৃত হয়, তাহার পর দিন ঐ নগরে উপস্থিত হইয়াছিলেন। ইঁহাদের মধ্যে বুলন্দসহরের সহকারী মাজিষ্ট্রেট লায়েল সাহেব ছিলেন।\* সিবিলিয়ানেরা পুনরায় কন্ঠস্থলে যাইবার জন্ত সৈনিকদিগের সহিত সম্মিলিত হইলেন।

যাহা হউক, কর্ণেল গ্রিথেড্ ২৮শে সেপ্টেম্বর উষাকালে বুলন্দসহরে যাত্রা করিলেন। অগ্রগামী সৈনিকদল সূর্যোদয়সময়ে চারিটি পথের সন্ধিস্থলে উপনীত হইল। এই চৌমাথা হইতে একটি পথ বুলন্দসহরের দিকে, একটি মালঘরের দিকে গিয়াছিল। চৌমাথার ঘাঁটিতে বিপক্ষ সওয়ারগণ অবস্থিতি করিতেছিল। ইংরেজপক্ষের অগ্রগামী সৈন্য বুলন্দসহরে পঁছঁছিতে না পঁছঁছিতেই ইহারা চলিয়া যায়। সেনানায়ক গ্রিথেড্ বুলন্দসহর আক্রমণ করেন। প্রধানতঃ ইংরেজদিগের অশ্বারোহী এবং গোলন্দাজেরা এই যুদ্ধে ব্যাপৃত থাকে। বিপক্ষেরা পরাজিত ও তাড়িত হয়। তাহাদের তিন শত সৈনিক রণক্ষেত্রে দেহত্যাগ করে। ইংরেজপক্ষের ৪৭ জন হত ও আহত হয়। সিপাহীদিগের তিনটি কামান এবং অনেক যুদ্ধোপকরণ বিজয়ী সৈনিকেরা অধিকার করে। বুলন্দসহরের যুদ্ধের পর সেনাপতি এক মাইল দূরে কালীনদীর তীরে শিবির সন্নিবেশ করেন। ঐ দিন অপরাহ্নকালে তাঁহার সৈনিকেরা মালঘরে উপস্থিত হয়। মালঘরের নবাব ওয়ালিদাদ খাঁ

\* ইনি পরে উত্তরপশ্চিম প্রদেশের লেফ্টেনেন্ট-গবর্নরের পদে প্রতিষ্ঠিত ও স্তার আল-ফ্রেড লায়াল নামে অভিহিত হইলেন।



দিল্লীর বৃদ্ধ মোগলের নামে উক্ত জনপদ শাসন করিতেছিলেন। ইংরেজ-সৈন্যের উপস্থিতিতে তিনি প্রস্থান করেন। তাঁহার দুর্গে নানাবিধ দ্রব্য ছিল। ১লা অক্টোবর এই দুর্গ বিনষ্ট করা হয়। দুর্গধ্বংসকালে প্রজ্বলিত বারুদস্তুপে একজন ইংরেজ সৈনিক দেহত্যাগ করে। গ্রিথেডের সৈনিকদল, আহতদিগকে মিরাতে পাঠাইবার বন্দোবস্ত করিবার জন্ত চারি দিন বুলন্দসহরে থাকে। লায়েল সাহেব পুনর্বার এই স্থানের শান্তিরক্ষায় ব্যাপৃত হইলেন। দুই তিন দিন পরে ইঁহার সাহায্যার্থে মিরাত হইতে কতিপয় সৈনিক উপস্থিত হয়। বুলন্দসহরের পশ্চিমে রোহিলখণ্ডের বিস্তৃত ভূভাগ অবস্থিত। এই ভূভাগ সিপাহী-দিগের অধিকারে ছিল। সিপাহীরা রোহিলখণ্ড হইতে অনেক বার বুলন্দসহরে উপস্থিত হয়। লায়েল সাহেবের সাহায্যকারী সৈনিকগণ ইহাদের আক্রমণনিরোধের জন্ত সজ্জিত থাকে।

গ্রিথেডের সৈন্য ৩রা অক্টোবরে বুলন্দসহর পরিত্যাগ করে। তাহারা ঐ দিন অপরাহ্নকালে খুর্জা নামক স্থানে উপনীত হয়। খুর্জা আলিগড়ের পথে অবস্থিত। এই স্থানে প্রধানতঃ মুসলমানের বাস। ব্রিটিশ গবর্ণমেন্টের সওয়ারদিগের কেহ কেহ এই স্থানের অধিবাসী। সৈনিকেরা খুর্জায় প্রবেশ করিয়া দেখিল যে, পথের পার্শ্বে একটি নরকঙ্কাল রহিয়াছে। উহার মস্তক নাই। ভগ্ন অস্থিগুলিতে আঘাতের চিহ্ন রহিয়াছে। ডাক্তারেরা পরীক্ষা করিয়া উহা কোন ইউরোপীয় নারীর কঙ্কাল বলিয়া নির্দেশ করেন। এই কথায় ইংরেজ-সৈন্য সাতিশয় উত্তেজিত হইয়া, স্থানীয় লোকের সমুচিত শাস্তিবিধানে সঙ্কর করে। ইহাদিগকে অনেক বুঝাইয়া শাস্ত করা হয়। অধিবাসীরা স্পষ্টভাবে কহে যে, তাহাদের কোন দোষ নাই; তাহারা গবর্ণমেন্টের আজ্ঞাবহ ভৃত্য মাত্র। এ সময় অতি সামান্য সূত্রে ইংরেজসৈনিকের জিঘাংসা কিরূপ প্রবল হইয়া উঠিত, তাহা এই বিবরণে বুঝা যাইতেছে।

আর একটি বিষয়ে ইংরেজসৈনিকদিগের মধ্যে সহসা উত্তেজনার সঞ্চার হয়। যে স্থানে শিবির সন্নিবেশিত ছিল, তাহার নিকটবর্তী বৃক্ষতলে একজন সন্ন্যাসী বসিয়াছিল, এই সন্ন্যাসী মৌনী, সূতরাং সৈনিকদিগের কথার কোন উত্তর না দিয়া, আপনার সমক্ষে, যে ছোট বারকস্ ছিল, উহা পরীক্ষা করিতে সঙ্কত করিল। কিয়ৎকণ পূর্বে এই বারকস্স্থানিতে খাদ্যদ্রব্য ছিল।

প্রথমে উহাতে কোনরূপ অস্বাভাবিক বিষয় পাওয়া গেল না। সূক্ষ্মরূপে পরীক্ষার পর দেখা গেল যে, বারকসের নীচে ছিদ্র আছে, ছোট একখানি চতুষ্কোণ কাঠে ঐ ছিদ্র ঢাকা হইয়াছে; কাঠখানি খোলা হইলে ছিদ্রের মধ্যে একখানি ক্ষুদ্র জড়ান কাগজ পাওয়া গেল। উহা সেনাপতি হাবেলকের গ্রীক ভাষায় লিখিত পত্র। উহাতে সেনাপতি লিখিয়াছিলেন যে, তিনি লক্ষ্মীর ইংরেজদিগের উদ্ধারার্থে যাত্রা করিয়াছেন। তাঁহার সৈন্যসংখ্যা অল্প। গাড়ি ইত্যাদি নাই। এ সময়ে অপর সৈনিকদলের সাহায্যগ্রহণ একান্ত আবশ্যিক হইয়াছে। যে কোন ইংরেজ সৈন্যধাক্কের হস্তে এই পত্র পড়িবে, তিনি যেন তাঁহার সাহায্যার্থে উপস্থিত হইয়েন। সেনানায়ক গ্রিথেড্ এই পত্র পাইয়া অবিলম্বে কাণপুরে যাইতে ইচ্ছা করিলেন।\* এ সময়ে, ইংরেজদিগকে স্থানান্তরে সংবাদ পাঠাইতে এবং স্থানান্তর হইতে সংবাদ আনিতে চরের উপর নির্ভর করিতে হইত। তাঁহারা সাধারণের অজ্ঞাত ভাষায় পত্র লিখিয়া, চরের হস্তে সমর্পণ করিতেন। চরেরা ঐ পত্র নানাকৌশলে প্রাচুর্য্যভাবে রাখিয়া, নানাবেশে নির্দিষ্ট স্থানে যাত্রা করিত। অনেক সময়ে ইহারা বিপক্ষ সিপাহীদিগের শিবিরে গিয়া, তাহাদের সংবাদ আনিয়া দিত। লক্ষ্মীর অবরোধকালে ইংরেজদিগকে যে, এইরূপ চরের সাহায্য গ্রহণ করিতে হইয়াছিল, তাহা পূর্বে উক্ত হইয়াছে।

ইংরেজসৈন্য অতঃপর আলিগড়ে উপস্থিত হয়। সিপাহীরা পূর্বেই এই স্থান পরিত্যাগ করিয়া গিয়াছিল। যখন সৈনিকদল অগ্রসর হয়, তখন উচ্ছৃঙ্খল লোকে শিঙ্গা বাজাইয়া, ঢোল পিটিয়া, অশ্রাব্য ভাষার উচ্চারণ করিতে করিতে ইংরেজসৈন্যকে বাধা দিবার চেষ্টা করে, কিন্তু যখন দ্রুতগামী অশ্বগণ কামান লইয়া তাহাদের সমক্ষে উপস্থিত হয়, তখন ঐ সকল লোকের সাহসের সহিত বাচালতার অন্তর্দান করে। ইহারা দুইটি কামান ফেলিয়া নগরে প্রবেশ পূর্বক উহার দ্বাররোধ করে, এবং আক্রমণকারীদিগের ভয়ে অপর দিক দিয়া বাহির হইয়া যায়। সৈনিকগণ ইহাদের পশ্চাদ্ধাবিত হয়। ইহাদের অনেকে ধাতুক্লেত্রে আত্মগোপন করে। ইংরেজপক্ষের অস্বারোহিণ প্রত্যাবর্তনকালে

\* *Lord Roberts, Forty-one years in India. Vol. I., p. 264-265.*

ইহাদিগকে দেখিতে পাইয়া অনেককে বধ করে । ইংরেজ সেনাপতির সমাগমে আলিগড়ের অধিবাসিগণ আতঙ্কিত হয় । এত দিন নানারূপ অশান্তিতে তাহারা নিরতিশয় বিব্রত ছিল ; এখন শান্তিময় শাসনের ফলভোগ করিতে পাইবে বলিয়া, তাহারা সৈনিকদিগের আবশ্যক দ্রব্যাদির সংগ্রহে আগ্রহযুক্ত হয় ।

আলিগড়ের চৌদ্দ মাইল দূরে কাণপুরের দিকে আকবরাবাদ অবস্থিত । সেনানায়ক গ্রিথেড্ আলিগড়রক্ষার জন্য কতিপয় সৈনিক রাখিয়া, আকবরাবাদে যাত্রা করেন । আকবরাবাদে মঙ্গল সিংহ এবং মহাতাপ সিংহ, এই দুই যমজ ভ্রাতা কর্তৃত্ব করিতেছিলেন । এই রাজপুত ভ্রাতৃদ্বয় গবর্ণ-মেণ্টের বিরুদ্ধ পক্ষ অবলম্বন করিয়াছিলেন । ইহাদিগকে ধরিবার চেষ্টা করা হয় । সন্ধ্যাকালে ইংরেজপক্ষের অশ্বারোহিগণ উক্ত পল্লী অবরোধ করে । পলায়নকালে রাজপুত ভ্রাতৃদ্বয় নিহত হইলেন । ইহাদের গৃহে তিনটি ছোট কামান এবং ইউরোপীয় কুলনারীদিগের ব্যবহৃত নানাবিধ দ্রব্য পাওয়া যায় ।

গ্রিথেড্ যখন উক্তরূপ অদ্ভুত উপায়ে সেনাপতি হাবেলকের লিখিত পত্র প্রাপ্ত হইলেন, সেই সময়ে আগরা হইতেও অনেক পত্র তাঁহার শিবিরে উপস্থিত হয় । এই সকল পত্র ইউরোপের প্রাচীন ও আধুনিক ভাষায় লিখিত হইয়াছিল । আগরার দুর্গস্থিত ইংরেজেরা পত্রে সান্তিশয় কাতরভাবে সাহায্য-প্রার্থনা করিয়াছিলেন । সুতরাং গ্রিথেড্ কাণপুরের পরিবর্তে আগরায় যাইতে উদ্যত হইলেন ।

লেফ্ টেনেন্ট-গবর্ণর কলবিন্ সাহেবের দেহত্যাগ পর্য্যন্ত আগরার ঘটনা পূর্বে বর্ণিত হইয়াছে । কলবিনের দেহত্যাগের পর রীড সাহেব কিছু দিনের জন্য তৎপদে প্রতিষ্ঠিত ছিলেন । কিন্তু এই সময়ে সৈনিকবিভাগের কর্মচারীর কর্তৃত্বের উপর নির্ভর করা একান্ত আবশ্যক হওয়াতে রীড সাহেবের স্থলে কর্নেল ফ্রেজার নিয়োজিত হইলেন । কর্তৃপক্ষ আগরা বা তৎপার্শ্ববর্তী ভূখণ্ডে শান্তিস্থাপনে সমর্থ হইলেন নাই । তাঁহাদের প্রাধান্য অস্তহিত হইয়াছিল । যাবতীয় বিষয়ের শৃঙ্খলাসাধনের জন্য কেহ কোনরূপ ক্ষমতাপ্রকাশ করিতে পারিতেন না । সকলেই স্থানান্তরের সিপাহীদিগের আক্রমণের আশঙ্কায় একান্ত ব্যাকুল ছিলেন । কলবিন্ সাহেবের দেহত্যাগের পূর্বে এই সংবাদ প্রচারিত

হইয়াছিল যে, গোবালিয়রের উত্তেজিত সিপাহীরা মেহিদপুর, মালব, ভূপাল প্রভৃতি স্থানের সিপাহীদিগের সহিত সম্মিলিত হইয়া, আগরা আক্রমণ করিবে। গোবালিয়রের সিপাহীরা যেরূপে উত্তেজনার পরিচয় দেয়, মহারাজ শিন্দে যেরূপে তাহাদিগকে নিজের রাজধানীতে কিছুকালের জন্ত রাখেন, দূরদর্শী দিনকর রাও যেরূপে এই আকস্মিক বিপদের শাস্তি করিতে বুদ্ধিকৌশলের পরিচয় দেন, তাহা পূর্বে উক্ত হইয়াছে। কিন্তু উত্তেজিত সৈনিকদল দীর্ঘকাল গোবালিয়রের অবস্থিতি করে নাই। তাহারা মহারাজের শাসন না মানিয়া, উচ্ছৃঙ্খলভাবে নানা স্থানে প্রধাবিত হয়। ক্রমে মধ্য ভারতবর্ষের পূর্বোক্ত জনপদসমূহের উত্তেজিত সিপাহীদিগের সম্মিলনে তাহাদের বলবৃদ্ধি ঘটে। ১৪ই সেপ্টেম্বর ইংরেজসৈন্য চিরস্মরণীয় মোগলের চিরপ্রসিদ্ধ রাজধানীতে প্রবেশ করে। উহার চারি দিন পরে যখন দিল্লীতে তাহাদের আধিপত্য প্রতিষ্ঠিত হয়, তখন অনেক সিপাহী হতাশ হইয়া, দিল্লী পরিত্যাগ করে। ফিরোজ শাহ নামক একজন শাহ জাদা ইহাদের অধিনায়ক হইয়া ২৬শে সেপ্টেম্বর মথুরায় উপনীত হইলেন। এই স্থানে হীরা সিংহ নামক একজন সুবাদারকর্তৃক পরিচালিত ৭২ সংখ্যক এতদেশীয় পদাতিকদলের সহিত ইহাদের সম্মিলন ঘটে। শেষে সম্মিলিত দল মধ্যভারতবর্ষের সিপাহীদিগের সহিত একত্র হয়। এই বিশাল সৈনিকদলের আক্রমণভয়ে আগরার দুর্গস্থিত ইংরেজেরা আত্মহারা হইয়া পড়েন। তাঁহারা এই জন্ত নানা ভাষায় পত্র লিখিয়া, গ্রিথেডের নিকটে পাঠাইয়া দেন। গ্রিথেড্ কালবিলম্ব না করিয়া, আগরার অভিমুখে অগ্রসর হইলেন।

গ্রিথেড্ ৭ই অক্টোবর বিজয়গড়নামক স্থানে উপস্থিত হইলেন। পর দিন রাত্রি দ্বিপ্রহরের সময়ে যাত্রা করিয়া, ১০ই তারিখ প্রাতঃকালে নৌসেতু দ্বারা যমুনা উত্তীর্ণ হইয়া, আগরার দুর্গপ্রাচীরের সমীপে সমাগত হইলেন। ইংরেজসৈন্য সর্বিশেষ সত্বরতাসহকারে নির্দিষ্ট স্থানে উপনীত হইয়াছিল। সূর্য্যতাপে ইহাদের মুখ বিবর্ণ হইয়াছিল। পথের ধূলিরাশিতে ইহাদের পরিচ্ছদ নিরতিশয় মলিন হইয়া গিয়াছিল। ইহারা যখন দুর্গপ্রান্তে উপস্থিত হয়, তখন যাহারা ইহাদের সম্বন্ধনার জন্ত দ্বারদেশে দণ্ডায়মান ছিলেন, তাঁহারা ইহাদিকে স্বদেশীয় লোক বলিয়া চিনিতে পারেন নাই। একটি কুলনারী সমীপবর্তী রেইক্‌স

সাহেবকে কহিয়াছিলেন—“এই ভীমদর্শন লোকগুলি নিশ্চয়ই আফগান।” রেইক্‌স সাহেবও সর্ব প্রথম ইহাদিগকে ইংরেজসৈন্য বলিয়া চিনিতে পারেন নাই।\* আতপতাপে নিপীড়িত হইয়া, ধূলি ও কর্দম তুচ্ছ বোধ করিয়া, ইহারা বিশ্রামবাতিরেকে ৪৮ মাইল অতিক্রম পূর্বক এইরূপ অপরিচ্ছন্নভাবে, এইরূপ বিবর্ণবদনে স্বদেশীয়দিগের উদ্ধারার্থে উত্তরপশ্চিম প্রদেশের রাজধানীতে পদার্পণ পূর্বক দুর্গের পুরোভাগে প্রকাশ্য পথে অবস্থিত করিতে লাগিল। এ দিকে ইহাদের অধিনায়ক, কোথায় শিবিরসন্নিবেশ করিতে হইবে, কর্তৃপক্ষের নিকটে জিজ্ঞাসা করিলেন। দুই ঘণ্টা কাল, তাঁহার সহিত আগরার কর্তৃপক্ষের এই বিষয়ে তর্কবিতর্ক হইল। দুই ঘণ্টা কাল, পরিশ্রান্ত সৈনিকেরা দুর্গের সম্মুখে পথে রহিল। অবশেষে কাওয়াজের বিস্তৃত ক্ষেত্র ইহাদের শিবিরসন্নিবেশের জগু নির্দিষ্ট হইল। এই ক্ষেত্রের যে যে স্থানে তাঁবু ফেলা হইবে, তাহা চিহ্নিত হইল। ঘোটকগুলি নির্দিষ্ট স্থলে সন্নিবেশিত রহিল। সৈনিকেরা খাণ্ডের আয়োজন করিতে লাগিল। কোন কোন আফিসর তাড়াতাড়ি দুর্গে গমন করিলেন। দুর্গবাসীদিগের অনেকে সাহায্যকারী সৈন্যের আগমনে আশ্বস্ত হইয়া, বহির্দেশে উপস্থিত হইলেন। প্রাচীরবেষ্টিত দুর্গের অভ্যন্তরে অপরূপভাবে থাকাতে ইহাদের সাতিশয় কষ্টবোধ হইয়াছিল। এখন বহির্ভাগের বিস্তৃত ক্ষেত্রের বিমুক্ত বায়ু ইহাদিগকে স্পর্শে স্পর্শে উৎফুল্ল করিয়া তুলিতে লাগিল। এ দিকে শিবিরের লোকে তাড়াতাড়ি ভোজন করিয়া নানা কর্মে ব্যাপ্ত হইল। কেহ কেহ, যে সকল জিনিসপত্র পশ্চাতে ধীরে ধীরে আসিতেছিল, তৎসমুদয়ের প্রতীক্ষা করিতে করিতে ভূমিশয্যায় নিদ্রিত হইল। কেহ কেহ সমীপোবিষ্ট বন্ধুগণের সহিত নানা কথা কহিতে লাগিল। কেহ কেহ, যে কয়েকটি তাঁবু পঁহুছিয়াছিল, তৎসমুদয় খাটাইবার বন্দোবস্ত করিতে লাগিল। কেহ কেহ বৃক্ষতলে বসিয়া, পথশ্রান্তিজনিত অবসাদ দূর করিতে লাগিল। মোগলের রাজধানী যাহাদিগকর্তৃক অধিকৃত হইয়াছে, বৃদ্ধ মোগল ভূপতি যাহাদের হস্তে বন্দী হইয়াছেন, তাহাদিগকে দেখিবার জগু আগরার দেড় লক্ষ অধিবাসীর দুই তৃতীয়াংশ কোতুহলের আবেগে দলে দলে

\* Raikes, Notes on the Revolt &c., p. 70.

কাওয়াজের বিস্তৃত ক্ষেত্রে আসিতে লাগিল। যতদূর পর্য্যন্ত দৃষ্টি চলে, ততদূর পর্য্যন্ত আকাশের প্রশান্তভাবের কোন ব্যত্যয় দেখা গেল না। পরিবর্দ্ধিত শহরের কাণ্ড এবং পত্রাচ্ছাদিত বৃক্ষগুলি কেবল বায়ুবেগে আন্দোলিত হইতে-  
ছি। দূরে—অতিদূরে বিপক্ষদিগের অবস্থিতি বা আগমনের কোন নিদর্শন পরিব্যক্ত হইল না। আগরার কর্তৃপক্ষ সমাগত সেনাপতিকে জানাইলেন যে, দিল্লীর সৈনিকদিগের সমাগমবার্তা শুনিয়া, বিপক্ষেরা ৯ মাইল দূরে কালী নদীর অপর পারে গিয়াছে। তাঁহারা দৃঢ়তার সহিত আপনাদের কথার সত্যতা প্রতিপন্ন করিতে লাগিলেন। কিন্তু পূর্বে উক্ত হইয়াছে যে, আগরায় কোনরূপ শাসনশৃঙ্খলা ছিল না। কর্তৃপক্ষ যাবতীয় বিষয় অবগত হইয়া, সুনিয়মে আবশ্যিক কর্মসম্পাদনে সমর্থ ছিলেন না। এখন এইরূপ শৃঙ্খলাবিপর্যায়, এইরূপ অন-  
ভিজ্ঞতার ফল প্রত্যক্ষীভূত হইল।

যখন গ্রিথেডের সৈনিকেরা নিরুদ্ধেগে বিশ্রামস্থল উপভোগ করিতেছিল, তখন চারি ব্যক্তি নাগরা বাজাইতে বাজাইতে সহসা কাওয়াজের ক্ষেত্রে প্রহরী সৈনিকদিগের সমক্ষে উপস্থিত হইল। একজন প্রহরী ইহা-  
দিগকে চলিয়া যাইতে কহিল। অমনি ইহাদের একজন পরিচ্ছদের মধ্যস্থিত তরবারি বাহির করিয়া, তাহাকে কাটিয়া ফেলিল। অন্য একজন প্রহরী সহযোগীরা সাহায্যার্থে আসিল। কিন্তু সেও আহত হইল। শেষে ক্ষেত্রস্থিত সৈনিকদিগের অজ্ঞাঘাতে এই চারি ব্যক্তিই দেহত্যাগ করিল। কিন্তু এই সংবাদ পশ্চাদ্ভাগের সৈনিকদলে প্রচারিত হইতে না হইতেই কামানের গভীর শব্দ শ্রুতিপ্রবিষ্ট হইল। পর মুহূর্ত্তেই প্রজ্বলিত লৌহপিণ্ড সকল প্রবলবেগে শিবিরে পড়িতে লাগিল। যাহারা তৃণশয্যায় নিদ্রাস্থল ভোগ করিতে-  
ছিল, যাহারা বন্ধুজনের সহিত নানা কথায় আমোদিত হইতেছিল, যাহারা তরুতলে বসিয়া, নিশ্চিন্তমনে শারীরিক অবসাদ দূর করিতেছিল, যাহারা তাঁবু ফেলিবার, দ্রব্যাদি সাজাইবার, বাহনগুলিকে যথাস্থানে রাখিবার কর্মে ব্যাপৃত ছিল, তাহারা সকলেই এই আকস্মিক ব্যাপারে অতিমাত্র চমকিত হইল। সৈনিকেরা শশব্যস্তে উঠিয়া দাঁড়াইল, আপনাদের অস্ত্র হাতে লইল, কেহ কেহ অশ্বে আরোহণ করিল। মুহূর্ত্তমধ্যে সৈন্য ও কামান, উভয়ই বিপক্ষদিগের পরাক্রমনাশের জন্য প্রস্তুত হইল। কিন্তু এই মুহূর্ত্তকালের মধ্যেই শিবিরের

ভৃত্যগণ, সৈনিকগণ, স্থানান্তর হইতে আগত পরিদর্শকগণ বিপক্ষের কামানের গোলায় একান্ত উদ্ভ্রান্ত হইয়া পড়িল।

যে সকল আফিসর (ইঁহাদের মধ্যে লর্ড রবার্টস্ ছিলেন) দুর্গে গিয়াছিলেন, তাহারা প্রসন্নচিত্তে দুর্গস্থিত কুলমহিলাদিগের সহিত যেমন ভোজনস্থলে উপবিষ্ট হইয়াছেন, অমনি কামানের গভীর শব্দ তাঁহাদের শ্রুতিপ্রবিষ্ট হইল। এক বারের পর আর বার, তৎপর আর এক বার, এইরূপে বারংবার সেই ভীষণ আগ্নেয়াস্ত্রের ভয়ঙ্কর গর্জন দুর্গবাসীদিগের হৃদয়ে সন্ত্রাসের সঞ্চার করিল। ভোজনস্থলে উপবিষ্ট ব্যক্তিগণ সমস্ত্রমে দণ্ডায়মান হইলেন, এবং একজন অপরকে আশ্বস্ত করিবার জন্তু কহিলেন—“এ কি! ইহা কখনও বিপক্ষের কামানধ্বনি নহে।” কিন্তু এই কথা আশ্বাসদায়ক হইল না। বিপক্ষগণই সহসা গ্রিথেডের শিবির আক্রমণ করিয়াছিল। তাহাদের কামানই এইরূপ ভয়ঙ্করভাবে গর্জন করিতেছিল। আফিসরগণ মুহূর্ত্তমাত্র বিলম্ব না করিয়া, গৃহের সিঁড়ির দিকে ধাবিত হইলেন, এবং এক লক্ষ সজ্জিত অশ্বে উঠিয়া দুর্গ হইতে বাহির হইয়া, যে দিকে কামানের শব্দ হইতেছিল, সেই দিকে সবেগে অধিষ্ঠিত অশ্বের চালনা করিলেন। তাঁহারা অর্দ্ধপথ অতিক্রম করিয়াছেন, এমন সময়ে বিষম গোলযোগে বিভ্রত হইয়া পড়িলেন। লর্ড রবার্টস্ এইভাবে উপস্থিত দৃশ্যের বর্ণনা করিয়াছেন—“নানা বর্ণের নানা শ্রেণীর লোক—বালক, বালিকা, স্ত্রী, পুরুষ; নানা শ্রেণীর ইতর জীব—হাতী, ঘোড়া, উট, বলদ; নানা প্রকার জিনিসপত্র, নানা প্রকার যান এক স্থানে আসিয়া পড়িল। লোকে এরূপ ভীত হইয়া চীৎকার করিতে লাগিল, যেন দৈত্য বা দানবেরা তাহাদের পশ্চাতে আসিতেছে। যাহারা সাহায্যকারী সৈনিকদিগের সমাগমে প্রকুল হইয়া, দুর্গের বহির্ভাগে আসিয়াছিল, তাহারা পুনর্বার দুর্গে ফিরিয়া যাইবার জন্তু আকুল হইয়া উঠিল। যাহারা কোতূহলী হইয়া, নগর হইতে শিবিরে যাইতেছিল, তাহারা তাড়াতাড়ি পুনর্বার নগরে যাইতে উদ্যত হইল। কামানের প্রথম বারের গর্জনে ইহারা উদ্ভ্রান্তভাবে ধাবিত হইয়া, যে সকল যান বা বাহনে গ্রিথেডের দ্রব্যাদি, রুগ্ন বা আহতগণ আসিতেছিল, তৎসমুদয়ের মধ্যে পড়িল। সকলেই তাড়াতাড়ি গন্তব্য স্থানের দিকে যাইতে উদ্যত; সকলেই তাড়াতাড়ি আপনার পথ পরিষ্কার করিয়া লইতে ব্যস্ত। গাড়িতে

হাতীর পথ রুদ্ধ হইল। মানুষ হাতী দেখিয়া, এ উহার গায়ে গিয়া পড়িতে লাগিল। উটগুলির সহিত বলদগুলির সংঘর্ষ ঘটিল। অতিমাত্র গোলযোগে ও অশৃঙ্খলায় সকলের গন্তব্য পথই রুদ্ধপ্রায় হইয়া পড়িল। অথচ সকলেই আপনাদের পথ বিমুক্ত করিবার জন্ত পরস্পর ঠেলাঠেলি করিতে লাগিল। কামানের গর্জনে মাছেরে ঝায় হস্তীগুলিও ভীত হইয়া উঠিয়াছিল। উহারা ভয়প্রযুক্ত অধিকন্তু অঙ্কুশের তাড়নায় বিকট রব করিতে লাগিল। গোয়ানের পরিচালকগণ, বলদগুলির অধিকতর বেগ জন্মাইবার জন্ত, সবলে উহাদের লেজ মূচড়াইতে লাগিল। উটগুলিকে ষোড়ার মত বেগে চালাইবার জন্ত পরিচালকগণ একরূপ ব্যস্ত হইল যে, টানাটানিতে উহাদের নাসাবন্ধ রজ্জু ছিঁড়িয়া গেল।” এইরূপে সকলেই তাড়িতবেগে নির্দিষ্ট স্থানে উপস্থিত হইবার জন্ত প্রয়াস পাইতে লাগিল। আফিসরেরা অতিকষ্টে গন্তব্য পথ পরিষ্কার পূর্বক শিবিরে উপস্থিত হইয়া যাহা দেখিলেন, তাহাতে তাহাদের অতিমাত্র বিস্ময় জন্মিল। সমগ্র শিবির যেন ঘোরতর হৃদয়ঙ্কর ক্ষেত্র হইয়া উঠিয়াছিল। এক স্থানে দুই জন অশ্বারোহী পরস্পর অসিযুদ্ধে প্রবৃত্ত ছিল। অত্র স্থানে এক জন সঙ্গীন, অপর জন তরবারি লইয়া, পরস্পরকে মারিবার চেষ্টা করিতেছিল। স্থানান্তরে বিপক্ষদলের কতকগুলি অশ্বারোহী ইংরেজপক্ষের একটি কামান কিছু দূরে লইয়া গিয়াছিল। কোন স্থানে ইংরেজসৈনিকগণ সামরিক বেশে সজ্জিত হইবার অবসর পায় নাই—তাহারা জামা মাত্র গায়ে দিয়াই, বিপক্ষ অশ্বারোহীদিগের আক্রমণনিরোধে অগ্রসর হইয়াছিল। এই সৈনিকদিগেরকিয়-দূরে—বামভাগে ইংরেজপক্ষের গোলন্দাজগণ কামানের গোলা চালাইতেছিল। ইহারাও সামরিক পরিচ্ছদধারণের সময় পায় নাই। এ দিকে সহিসেরা সবিশেষ সহরতাসহকারে ঘোটকগুলি সজ্জিত করিতেছিল। ভিন্ন ভিন্ন দলের পদাতিগণ আপনাদের অস্ত্রাদি লইতে ব্যস্ত হইয়াছিল। সেনাপতি গ্রিথেড্ সিপাহীদিগের এইরূপ আকস্মিক আক্রমণের কয়েক মিনিট পরেই ঘটনাস্থলে উপনীত হইয়াছিলেন। তিনি আক্রান্ত সৈনিকদিগকে অগ্রসর হইতে আদেশ দিলেন। সিপাহীরা সহসা ইংরেজের শিবির আক্রমণ করিয়াই হটয়া গেল। ইংরেজসৈন্য ইহাদের পশ্চাদ্ধাবিত হইল। ইহারা কামান ফেলিয়া, কালী নদীর অপর পারে চলিয়া গেল। ইহাদের পরিত্যক্ত ১৩টি কামান ইংরেজের অধিকৃত হইল।



গ্রিথেডের সৈনিকদল ১৩ই অক্টোবর পর্যন্ত আগরায় রহিল। ১৪ই অক্টোবর ইহারা আগরা হইতে যাত্রা করিয়া, মৈনপুরীর অভিমুখে অগ্রসর হইল। পথে ইহাদের অধিনায়কের পরিবর্তন হইল। কর্তৃপক্ষের আদেশে কর্ণেল হোপ্‌ গ্রাণ্ট, গ্রিথেডের স্থলে নিয়োজিত হইয়াছিলেন। তিনি দিল্লী হইতে গ্রিথেডের শিবিরে উপস্থিত হইয়া, আপনার কর্মভার গ্রহণ করিলেন। মৈনপুরীর ঘটনা পূর্বে বর্ণিত হইয়াছে। মৈনপুরীরাজ গবর্ণমেন্টের বিপক্ষতা করিয়াছিলেন। তাঁহার একজন আত্মীয়ের চেষ্টায় ধনাগার রক্ষিত হইয়াছিল। ইংরেজসৈন্যের উপস্থিতির এক দিন পূর্বেই তিনি কামান বারুদ ইত্যাদি ফেলিয়া স্থানান্তরে প্রস্থান করিয়াছিলেন। ইংরেজসৈন্য উপস্থিত হইয়া, তাঁহার দুর্গ বিনষ্ট করে, বারুদ উড়াইয়া দেয়। মৈনপুরীর সিভিল কর্মচারিগণ বিপ্লবের কালে পলায়ন পূর্বক আগরার দুর্গে আশ্রয় গ্রহণ করিয়াছিলেন। এখন তাঁহারা এই সৈনিকদলের সহিত কর্মস্থলে আসিয়া, আপনাদের কর্মে ব্যাপ্ত হইলেন। অতঃপর সৈনিকদল বিওয়ারনামক স্থানে উপস্থিত হয়। এই স্থানে মিরাত্‌, আগরা, ফতেগড়, এবং কাণপুরের পথ পরস্পরসংযোজিত হইয়াছে। ইংরেজসেনাপতি, বিওয়ারে স্যার জেম্‌স্‌ আউট্রামের পত্র পাইলেন। এই সেনাপতির পত্রও হাবেলকের পত্রের আয় গ্রীকভাষায় লিখিত হইয়াছিল। পত্রখানি একখণ্ড পেনের অভ্যন্তরে পুরিয়া দেওয়া হইয়াছিল। পত্রবাহক ঐ পেন আপনার হাতছড়ির অন্তর্ভাগ প্রবেশিত করিয়া লইয়া আসিয়াছিল। চরগণ কিরূপ স্ক্রুশলে এবং কিরূপ সাবধানে ইংরেজের শিবিরে পত্রাদি লইয়া আসিত, তাহা এই ঘটনায় প্রতিপন্ন হইতেছে। সেনাপতি আউট্রাম দিল্লীর সেনানায়কের নিকটে সাহায্যপ্রার্থনা করিয়াছিলেন। সুতরাং সেনাপতি সত্বর লক্ষ্মীর অভিমুখে যাত্রা করিলেন। তিনি ২২শে অক্টোবর বিওয়ার পরিত্যাগ পূর্বক ২৮ মাইল দূরবর্তী গুরসাহিগঞ্জে উপস্থিত হইলেন, এবং তৎপর দিন কাণ্ডকুঞ্জের প্রান্তবর্তী মিরগ-কি-সরাই নামক স্থানে পহুছিলেন।

এই দিন বিপক্ষ সিপাহীদিগের সহিত ইংরেজসৈন্যের ক্ষুদ্র যুদ্ধ ঘটে। সিপাহীরা আপনাদের কামান লইয়া, কালী নদীর অপর পারে উত্তীর্ণ হয়। এ পার হইতে ইংরেজসৈন্য গোলাবৃষ্টির আরম্ভ করিলে, তাহারা কামান ফেলিয়া যায়। হোপ্‌ গ্রাণ্টের সৈন্য নদী পার হইয়া, তাহাদের পশ্চাদ্ধাবিত হয়।

তাহাদের পদাতিগণ অদৃশ্য হয় । তাহাদের অশ্বারোহিগণ সবেগে গঙ্গার জলে গিয়া পড়ে । অনেকে শ্রোতোবেগে ভাসিয়া যায় । কেহ কেহ অপর তটে উত্তীর্ণ হয় । ২৬শে অক্টোবর হোপ্ গ্রাণ্টের সৈনিকদল কাণপুরে পহঁছে । ৩১শে তাহারা আলমবাগ এবং বানিসেতুর মধ্যভাগের প্রান্তরে উপস্থিত হয় । প্রধান সেনাপতির উপস্থিতি পর্য্যন্ত তাহারা এই স্থানে অবস্থিতি করে ।

পূর্বে উক্ত হইয়াছে যে, শ্চার কোলিন্ কাম্প্বেল্ ভারতবর্ষের প্রধান সেনাপতির পদে নিয়োজিত হইয়া, ১৩ই আগষ্ট ইংলণ্ড হইতে কলিকাতায় পহঁছেন । এই সময়ে চারি দিক বিপ্লবময় ছিল । সমগ্র অযোধ্যাপ্রদেশ উত্তেজিত সিপাহীদিগের যথেষ্টাচারের ক্ষেত্র হইয়াছিল । রোহিলখণ্ডে ইংরেজের প্রাধান্য অন্তর্হিত হইয়াছিল । গঙ্গা ও যমুনার মধ্যবর্তী বিস্তীর্ণ ভূভাগে ভয়াবহ বিপ্লবের পূর্ণবিকাশ ঘটিয়াছিল । মোগলের রাজধানীর পুরোভাগে ইংরেজসৈন্য অপরূপভাবে অবস্থিতি করিতেছিল । মধ্যভারতবর্ষ উত্তেজিত লোকের উত্তেজনাতরঙ্গে আন্দোলিত হইয়া উঠিয়াছিল । অনেক স্থানে সংবাদ-প্রেরণের পথ অপরূপ ছিল । এইরূপ সঙ্কটকালে শ্চার কোলিন্ কাম্প্বেল প্রধান সেনাপতির কর্মভার গ্রহণ করেন । তিনি কিরূপে চারি দিকে পরিব্যাপ্ত ভয়ঙ্কর অগ্নিস্তূপের নির্বাপণে সমর্থ হইয়াছিলেন, তাহা সংক্ষেপে বিবৃত হইতেছে ।

সর্বপ্রথম প্রধান সেনাপতি বিপ্লবের ক্ষেত্রে সৈন্য পাঠাইবার বন্দোবস্ত করেন । পূর্বে উক্ত হইয়াছে যে, চীনদেশে যে সৈন্য যাইতেছিল, তাহা ভারতের বিপ্লবনিবারণে নিয়োজিত হয় । রণতরীর অধ্যক্ষ কাপ্তেন পীল আপনার নোসেনা ও কামান লইয়া, কলিকাতায় উপস্থিত হইলেন । মরীচ দ্বীপ প্রভৃতি ভিন্ন ভিন্ন উপনিবেশ হইতে সৈন্য ও যুদ্ধোপকরণ সংগৃহীত হয় । এইরূপে বিভিন্ন স্থানের সৈনিক পুরুষগণ এখন গবর্নমেন্টের বিলুপ্তপ্রায় প্রাধান্যের পুনঃস্থাপনের জন্ত বিভিন্ন স্থানে প্রেরিত হয় । শ্চার কোলিন্ কাম্প্বেল ২৭শে অক্টোবর কলিকাতা হইতে যাত্রা করেন, রাত্রিদিন ঘোড়ার ডাকে গিয়া, ১লা নবেম্বর এলাহাবাদে উপনীত হইলেন । তৎপর দিন তিনি ফতেপুরে পহঁছেন । প্রধান সেনাপতি যখন এইরূপ সত্বরতার সহিত যুদ্ধক্ষেত্রের অভিমুখে অগ্রসর হইতেছিলেন, তখন কাণপুরের পথে কাপ্তেন

পীল সিপাহীদিগের সহিত যুদ্ধে জয়লাভ করেন। ভারতের ইতিহাসপ্রসিদ্ধ স্থানে এই যুদ্ধ হয়। ফতেপুরের প্রায় ২৪ মাইল উত্তরপশ্চিমে কাজোয়া নামক পল্লী অবস্থিত। ১৬৫৯ খৃষ্টাব্দে আওরঙ্গজেব এই স্থানে তাঁহার ভ্রাতা সুলতান সুলজার সহিত যুদ্ধে জয়লাভ করিয়া ভারতসাম্রাজ্যের অধিকারে প্রতিদ্বন্দ্বিশূণ্য হইয়াছিলেন। দানাপুরের বহুসংখ্যক সিপাহী কাজোয়ার সমবেত হইয়াছিল। ১লা নবেম্বর ইংরেজসৈন্য ইহাদের সম্মুখীন হয়। যুদ্ধে ইংরেজ সেনানায়ক নিহত হইলেন, কিন্তু রণতরীর অধ্যক্ষ কাপ্তেন পীলের কৌশলে সিপাহীদিগের দলভঙ্গ হয়। এই যুদ্ধের এক দিন পরে অর্থাৎ ৩রা নবেম্বর প্রধান সেনাপতি কাণপুরে উপনীত হইলেন। এই সময়ে লক্ষ্মীর দিকে তাহার তীক্ষ্ণ দৃষ্টি ছিল। তিনি সংবাদ পাইয়াছিলেন যে, লক্ষ্মীতে তাঁহার স্বদেশীয়ের নিকটে যে খাদ্য দ্রব্যাদি আছে, তাহাতে নবেম্বরের শেষ পর্য্যন্ত চলিবে। খাদ্যের অভাবে অধিকন্তু পরাক্রান্ত বিপক্ষের অস্ত্রবর্ষণে তাঁহাদের সৈনিকগণ, বালকবালিকাগণ, কুলমহিলাগণ একান্ত বিপন্ন হইয়া পড়িবে। তিনি ইহা ভাবিয়া, সর্বাগ্রে লক্ষ্মীর বিপন্ন স্বদেশীয়দিগের উদ্ধারে কৃতসঙ্কল্প হইলেন। পূর্বে উক্ত হইয়াছে যে, সেনাপতি হোপ্ গ্রাণ্ট আপনার সৈনিকদল লইয়া আলমবাগ এবং বানিসেতুর মধ্যভাগের বিস্তৃত প্রান্তরে অবস্থিত করিতেছিলেন। প্রধান সেনাপতি আপনার প্রধান সহকারী ব্রিগেডিয়ার মানস্ফীল্ডের\* সহিত ৯ই নবেম্বর এই স্থানে সমাগত হইলেন। তাঁহার আদেশে সেনানায়ক ওয়াইণ্ডহাম কাণপুররক্ষার জন্ত ঐ স্থানে থাকেন।

স্মার কোলিন্ কাম্প্বেলের সৈনিকগণ যখন অযোধ্যায় প্রবেশ করে, তখন তাহাদের চারি দিকে ভয়ঙ্কর বিপ্লবের ফল পরিদৃষ্ট হইয়াছিল। পথে মানবের সমাগম ছিল না। উদ্দাম কুকুর ভিন্ন আর কোন জীবিত প্রাণীকে বিচরণ করিতে দেখা যাইত না। লোকালয়ে লোকবসতি ছিল না। সেনাপতি হাবেলকের উপস্থিতির সময়েই পল্লীবাসিগণ আপনাদের গৃহ পরিত্যাগ করিয়া গিয়াছিল। জনবহুল পল্লী, লোকপূর্ণ রাজপথ, কৃষীবলপূর্ণ কৃষিক্ষেত্রসমূহ, সমস্তই নিস্তরুভাবে ছিল। এইরূপ জনসম্পর্কশূণ্য স্থান অতিক্রম করিয়া,

\* ইনি অতঃপর লর্ড উপাধি পাইয়া, লর্ড সাওহট্ট নামে অভিহিত হইলেন।

প্রধান সেনাপতি ওয়াজিদ আলির রাজধানীর প্রান্তভাগে উপনীত হইলেন। তিনি কেবল স্বদেশীয় সৈনিকগণে বলসম্পন্ন হইলেন নাই। নেপালের প্রধান মন্ত্রী জঙ্গ বাহাদুর সিপাহীবিপ্লবের প্রারম্ভে গবর্ণমেন্টের সাহায্যার্থে নেপালী সৈন্য পাঠাইবার প্রস্তাব করিয়াছিলেন। এই প্রস্তাব প্রথমে লর্ড ক্যানিংয়ের অনুমোদিত হইয়াছিল। জঙ্গ বাহাদুর স্বয়ং তিন হাজার সৈন্য লইয়া, আপনাদের সমুন্নত পার্শ্বভূখণ্ড হইতে ভারতের সমতল ক্ষেত্রের অভিমুখে অগ্রসর হইলেন। জঙ্গ বাহাদুর ইংলণ্ডের গিয়াছিলেন। ইংলণ্ডের অবস্থা দর্শনে তাঁহার উদ্বোধ হইয়াছিল যে, ইংরেজ ভারতবর্ষে আপনাদের প্রাধান্যরক্ষায় কখনও অসমর্থ হইবেন না।\* উপস্থিত সময়ে জঙ্গ বাহাদুর প্রকৃতরূপে নেপালের শাসনদণ্ডের পরিচালক ছিলেন। ইংরেজ গবর্ণমেন্টের উপর তাঁহার যেমন অনুরাগ, সিপাহীদিগের উপর তাঁহার সেইরূপ বিদ্বেষভাব ছিল। সুতরাং তিনি এই সময়ে ইংরেজের উপকার এবং সিপাহীদিগের শোণিতপাত করিবার জন্য আগ্রহযুক্ত হইলেন। কিন্তু জঙ্গলময় তরাই অতিক্রমের পর, তাঁহার নিকটে সংবাদ আসিল যে, ব্রিটিশ গবর্ণমেন্ট তাঁহার সাহায্য গ্রহণ করা হইবে কি না, তদ্বিষয়ের বিবেচনা করিতেছেন। তাঁহার সৈন্য ১৫ই জুনের মধ্যে অযোধ্যায় পহঁছিতে বলিয়া, আশা করিয়াছিল। কিন্তু গবর্ণমেন্টের কথায় তাহারা পুনর্বার আপনাদের রাজধানী কাঠমুণ্ডুর দিকে যাত্রা করিল। আরণ্য ভূভাগের অস্বাস্থ্যকর জলবায়ুতে তাহাদের অনেকেই পীড়িত হইয়া পড়িয়াছিল। তাহারা এইরূপ কষ্টভোগ পূর্বক আপনাদের রাজধানীতে পদার্পণ করিয়াছে, এমন সময়ে কলিকাতা হইতে সংবাদ পহঁছিল যে, গবর্ণমেন্ট তাহাদের সাহায্যপ্রার্থী হইয়াছেন। সুতরাং ২৬শে জুন গুর্খা সৈন্য পুনর্বার নেপালের পার্শ্বভূখণ্ড পরিত্যাগ পূর্বক নিবিড় জঙ্গল অতিবাহনে প্রবৃত্ত হইল। তাহারা যে সময়ে ব্রিটিশাধিকৃত জনপদে উপস্থিত হয়, তাহার কয়েক দিন পূর্বে শ্রী হেনরি লরেন্স দেহত্যাগ করিয়াছিলেন, এবং শ্রী হিউ হইলার উত্তেজিত সিপাহীর অস্বাভাবিক অনন্ত নিদ্রায় অভিভূত হইয়াছিলেন। গবর্ণমেন্টের এইরূপ ব্যবহারে জঙ্গ বাহাদুর নিরতিশয় বিরক্তি হইয়াছিলেন। তিনি

\* William Digby, *A friend in need : Friendship forgotten*, p. 43.

আপনার একজন ইংরেজ বন্ধুকে কহিয়াছিলেন—“আপনি দেখুন আমার সহিত কিরূপ ব্যবহার করা হইয়াছে ।\* এইরূপ শাসনকর্তারা যখন রাজ্যশাসন করিতেছেন, তখন আপনারা কিরূপে ভারতবর্ষ রক্ষার আশা করিতে পারেন ?\* কিন্তু ষাঁহার হস্তে এ সময়ে ভারতবর্ষের শাসনদণ্ড সমর্পিত ছিল, তাঁহাকে সাবধানে প্রত্যেক কর্মে হস্তক্ষেপ করিতে হইতেছিল । গুর্খাদিগের উপর লর্ড ডালহৌসীর তাদৃশ বিশ্বাস ছিল না । যখন ইউরোপে যুদ্ধ উপস্থিত হইত, তখনই গুর্খাগণ অস্ত্রাদির সংগ্রহে ব্যাপৃত হইত । তাহাদের মধ্যে এই সময়ে শত্রুতাচরণের নিদর্শন দেখা যাইত । † ইহা ভাবিয়াই, লর্ড ক্যানিং, নেপাল-গবর্ণমেন্টের সাহায্যগ্রহণ সম্বন্ধে প্রথমে দোলায়মানচিত্ত হইয়াছিলেন । কিন্তু শেষে পুনর্বার বিবেচনার পর তিনি ইহাদের সাহায্যগ্রহণে কৃতসঙ্কল্প হইলেন । স্যার হেনরি লরেন্স দৃঢ়তাসম্পন্ন গুর্খাদিগকে তাহাদের পর্বতময় বসতিক্ষেত্র হইতে শীঘ্র আনিবার জন্য গবর্ণর-জেনেরলের নিকটে টেলিগ্রাম করিয়াছিলেন । কেহ কেহ নির্দেশ করিয়াছেন যে, যদি গুর্খা সৈন্য যথাসময়ে লক্ষ্মীতে উপস্থিত হইত, তাহা হইলে স্যার হেনরি লরেন্স বিপক্ষ সিপাহীদিগকে তাড়াইয়া স্যার হিউ হইলারের উদ্ধারসাধনে সমর্থ হইতেন । ‡ যাহা হউক, ব্রিটিশ গবর্ণমেন্ট প্রথমে নেপাল গবর্ণমেন্টের উপর সন্দিগ্ধ হইলেও উক্ত গবর্ণমেন্টের দৃঢ়কায়, সাহসী সৈনিকগণ ইংরেজের পক্ষসমর্থনে কিছুমাত্র ঔদাস্য বা কিছুমাত্র অস্থিরতার পরিচয় দেন নাই । তাহারা পরমবিখ্যস্ত যুদ্ধবীরের স্যার সিপাহীদিগের সহিত যুদ্ধে সাহস ও পরাক্রমের একশেষ দেখাইয়াছিল । ঐতিহাসিকগণ আহ্লাদ ও প্রীতির সহিত তাহাদের অসামান্য বীরত্বের বর্ণনা করিয়া গিয়াছেন । এই কথা বলিবার পূর্বে প্রধান সেনাপতির আগমনের পূর্বে ওয়াজিদ আলীর রাজধানীতে কি ঘটতেছিল, তাহা সংক্ষেপে বলা যাইতেছে ।

সেনাপতি হাবেলক এবং আউট্রাম্ বিপক্ষ সিপাহীদিগকে লক্ষ্মী হইতে একবারে নিষ্কাশিত করিতে পারেন নাই । তাঁহারা যে, লক্ষ্মীর অবরুদ্ধদিগের উদ্ধারসাধন করিয়াছেন, ইতিহাসের সূত্রানুসারে ইহা প্রকৃত নহে । তাঁহাদের

\* Mead, Sepoy Revolt, p. 87.

† Martin, Indian Empire, Vol. II., p. 278.

‡ Mead, Sepoy Revolt, p. 86.

আগমনে অবরুদ্ধদিগের বলবৃদ্ধি হইয়াছিল মাত্র । ওয়াজিদ আলীর রাজধানীর ভিন্ন ভিন্ন স্থানে তখনও সিপাহীরা আপনাদের প্রাধান্য রক্ষা করিতেছিল । সেনাপতি আউট্রাম সিপাহীদিগের দল বিচ্ছিন্ন করিয়া কাণপুরে যাইবার পথ পরিষ্কার করিতে পারেন নাই । যাহা হউক, আউট্রাম প্রথমে সৈনিকদিগের অবস্থিত জগ্ন নদীতীরবর্তী তারা কুঠী, ছত্রমঞ্জিল, ফরিদবক্স প্রাসাদ অধিকার করিতে উদ্যত হইলেন । ২৬শে সেপ্টেম্বর এই সকল স্থান অধিকৃত হয় । ৬ই নবেম্বর তাঁহার নিকটে সংবাদ পহঁছে যে, হোপ গ্রান্ট আপনার সৈনিক দল লইয়া, আলমবাগের নিকটবর্তী প্রান্তরে উপস্থিত হইয়াছেন । এই খানে তিনি প্রধান সেনাপতির আগমনপ্রতীক্ষায় শিবিরসন্নিবেশ করিয়া রহিয়াছেন ।

শ্রী জেমস্ আউট্রাম প্রধান সেনাপতিকে লক্ষ্যের অবস্থা এবং আপনাদের সৈন্যসন্নিবেশের বিবরণ প্রভৃতি জানাইতে ইচ্ছা করিয়াছিলেন । কিন্তু উপস্থিত সময়ে এই সঙ্কল্প কার্যে পরিণত করা একান্ত দুঃসাধ্য ছিল । পথে সিপাহীগণ অবস্থিত করিতেছিল । ইহাদের বিপুল ব্যাহ ভেদ করিয়া যাওয়া, এ সময়ে একান্ত অসম্ভব বলিয়া বোধ হইয়াছিল । হেনরি কাবেনা নামক দেওয়ানী বিভাগের একজন কর্মচারী এই অসম্ভব কর্ম সাধনে উদ্যত হইলেন । ইংরেজের অবয়বে সচরাচর যে সকল বিশেষ লক্ষণ পরিদৃষ্ট হইয়া থাকে, কাবেনার দেহে তৎসমুদয়ের কিছুই অভাব ছিল না । তাহার দেহ দীর্ঘ, বর্ণ গোর, কেশ-গুচ্ছ তাম্ররাগযুক্ত ছিল । এই সকল লক্ষণ ছদ্মবেশধারণের একান্ত অন্তরায় হইয়াছিল । শ্রী জেমস্ আউট্রাম যদিও সাহসিককর্মসাধনে উৎসাহদাতা ছিলেন, তথাপি কাবেনার অবয়বগত লক্ষণ দেখিয়া, দোলায়মানচিত্ত হইলেন । কিন্তু কাবেনা স্থিরপ্রতিজ্ঞ ছিলেন, তিনি আউট্রামের কথায় নিরস্ত হইলেন না । যাবতীয় বিপদের মধ্যেও সঙ্কলিত কর্মসাধনে তাঁহার দৃঢ়তা ও আগ্রহের পরিচয় পাওয়া যাইতে লাগিল । আউট্রাম তাঁহার আগ্রহ দেখিয়া যাইতে অনুমতি দিলেন । কাবেনা পরস্বাপহারক বদ্মায়েসের বেশ পরিগ্রহণ করিলেন । তিনি চুলগুলি ছোট করিয়া ছাটিয়া ফেলিলেন, রেশমী কাপড়ে আঁটা পায়জামা, মসলিনের আঁটা শার্ট পরিলেন । শার্টের উপর হরিদ্রাবর্ণের অঙ্গরক্ষা রহিল । কোমরে শ্বেতবর্ণ কোমরবন্ধ, এবং কাঁধে একখানি রঙ্গীন কাপড় রাখা হইল । মাথায় শ্বেতবর্ণের পাগড়ী শোভা পাইল । কাঁধ পর্য্যন্ত দেহের সমুদয় উর্দ্ধভাগ

এবং কণ্ঠে পর্য্যন্ত সমুদয় হাতে তৈলমিশ্রিত কাল রঙ লেপিয়া দেওয়া হইল । এই অপূৰ্ণ বেশ পরিগ্রহের পর কাবেনা এক হাতে ঢাল, আর এক হাতে তরবারি লইয়া, কানোজী লাল নামক এক জন বিশ্বস্ত চরের সহিত ৯ই নবেম্বর রাত্রি ৯টার সময়ে প্রধান সেনাপতির শিবিরের অভিমুখে যাত্রা করিলেন । পর দিন তিনি নিরাপদে প্রধান সেনাপতির শিবিরে উপনীত হইলেন । কাবেনার এইরূপ সাহসে, আউট্রামের নির্দিষ্ট যাবতীয় বিষয় স্মার কোলিনের গোচর হইল । প্রধান সেনাপতি যখন আলমবাগের পুরোবর্তী প্রান্তরে হোপ্ গ্রাণ্টের সহিত সম্মিলিত হইলেন, তখন বিপক্ষগণ স্থানে স্থানে দবলদ্ধ হইয়া, এবং স্থানে স্থানে কামান সন্নিবেশ করিয়া, তাঁহাকে বাধা দিবার সুযোগ প্রতীক্ষা করিতেছিল । আউট্রাম, কাবেনার সহিত যে ভাবে প্রধান সেনাপতির গন্তব্য পথ নির্দেশ করিয়া পাঠাইয়াছিলেন, প্রধান সেনাপতি প্রায় তদনুসারে আপনার পথ ঠিক করিয়া লইলেন । তিনি ১১ই নবেম্বর অপরাহ্ন-কালে আপনার সৈনিকদল পরিদর্শন করিলেন । পর দিন সূর্যোদয়সময়ে তাঁহার সৈন্ত রেসিডেন্সির অভিমুখে যাত্রা করিল ।

১৩ই নবেম্বর প্রধান সেনাপতি আলমবাগ এবং দেলকোশা বাগানের মধ্যবর্তী জেল্লাবাদ নামক স্থানের মুখ্য দুর্গ অধিকার করেন । পর দিন প্রাতঃকালে তাঁহার সৈন্ত দেলকোশা বাগানে উপস্থিত হয় । ইংরেজসৈন্ত এই বাগান এবং মার্টিনিয়ার কালেক্স অধিকার করে । মার্টিনিয়ার হইতে তাহারা সেকেন্দরবাগের নিকটবর্তী পল্লীতে উপনীত হয় । এই পল্লীর সঙ্কীর্ণ গলি দিয়া, তাহারা সেকেন্দরবাগের অভিমুখে অগ্রসর হইতে থাকে । সিপাহীরা সেকেন্দরবাগের মধ্যবর্তী দোতলা বাড়ীর জানালা প্রভৃতি হইতে একরূপ তীব্র-বেগে গুলিবৃষ্টির আরম্ভ করে যে, উহাতে ইংরেজসৈন্ত সাতিশয় বিব্রত হইয়া পড়ে । এই সময়ে শিখদিগের সাতিশয় সাহস ও পরাক্রম পরিস্ফুট হয় । কামানের গোলায় সেকেন্দরবাগের প্রাচীর যখন ভগ্ন হয়, তখন হাইলাণ্ডার, শিখ, পঞ্জাবের মুসলমান প্রভৃতি সকলেই অভ্যন্তরভাগে প্রবেশের জন্য আপনাদের সাহসের পরিচয় দিতে উৎসুক হইয়া উঠে । প্রথমে এক জন হাইলাণ্ডার, ভগ্ন প্রাচীরে উঠিয়া, যেমন ভিতরে লাফাইয়া পড়ে, অমনি গুলির আঘাতে তাহার প্রাণবায়ু বহির্গত হয় । পঞ্জাবের ৪সংখ্যক পদাতিকদের এক জন

শিখ তাহার অনুসরণ করে । কিন্তু অবিলম্বে তাহারও ঐ দশা ঘটে । অতঃপর ইংরেজপক্ষের অগ্র সৈনিকেরা অগ্রসর হয় । গোকুল সিংহ নামক শিখ সূবাদার ঐ পথে আপন দলের সৈন্তের পরিচালনা করেন । উক্ত দলের মোকারব খাঁ নামক একজন পঞ্জাবী মুসলমান যার পর নাই সাহস ও পরাক্রম প্রদর্শন করে । সেকেন্দরবাগের বৃহৎ দ্বার যখন অবরুদ্ধ করিবার চেষ্টা হয়, তখন মোকারব খাঁ উহাতে বাধা দিবার জন্ত আপনার বাম হস্ত উভয় দ্বারের মধ্যদেশে প্রবেশ করাইয়া দেয় । তরবারিতে ঐ হস্ত আহত হইলে, মোকারব উহা টানিয়া আনিয়া আপনার দক্ষিণ হস্ত প্রবেশিত করে । তরবারির আঘাতে ঐ হাত কণ্ঠ পর্য্যন্ত বিচ্ছিন্ন হইয়া পড়ে, কিন্তু মোকারবের উদ্দেশ্য সিদ্ধ হয় । দ্বারদেশ উন্মুক্তভাবে থাকে । ঐ উন্মুক্ত পথে ইংরেজপক্ষের ভিন্ন ভিন্ন সৈনিকদল সেকেন্দরবাগে প্রবেশ করে ।\* এই যুদ্ধে প্রধান সেনাপতির উরুদেশ আহত হইয়াছিল । কিন্তু আঘাত গুরুতর হয় নাই ।

যে সকল সৈনিকপুরুষ এই সময়ে প্রধান সেনাপতির দলে ছিলেন, তাঁহাদের কেহ কেহ উপস্থিত যুদ্ধের বিবরণ লিখিয়া গিয়াছেন । ৯৩ সংখ্যক হাইল্যান্ডার দলের ফর্বস্-মিচেল নামক এক জন সার্জেন্ট নির্দেশ করিয়াছেন যে, সেকেন্দরবাগের মধ্যস্থলে একটি বৃহৎ পিপুল বৃক্ষ ছিল । উহার শাখাগুলি ঘনসন্নিবিষ্ট পত্রাবলীতে সমাচ্ছন্ন । উহার নিম্নদেশে শীতলজলপূর্ণ কয়েকটি জালা রহিয়াছিল, যখন যুদ্ধ শেষ হয়, তখন কতিপয় ইংরেজসৈনিক উহার শীতল ছায়ায় শ্রান্তিবিনোদন এবং জালার শীতল জলে পিপাসাশান্তির জন্ত বৃক্ষতলে উপস্থিত হইল । ঐ স্থলে আপনাদের দলের কতিপয় সৈনিকের মৃতদেহ তাহাদের দৃষ্টিগোচর হইল । তাহাদের এক জন শবগুলির আঘাতের স্থান পরীক্ষা করিয়া বুঝিতে পারিল যে, বৃক্ষের উপরিভাগ হইতে নিক্ষিপ্ত গুলিতে ইহাদের প্রাণান্ত হইয়াছে । ইহা ভাবিয়া, সেই ব্যক্তি বৃক্ষের উপরিভাগে কেহ রহিয়াছে কি না, পর্য্যবেক্ষণের জন্ত অপর একজনকে অনুরোধ করিল । দ্বিতীয় ব্যক্তি উর্দ্ধমুখে নিরীক্ষণ পূর্বক উচ্চৈঃস্বরে কহিল “হাঁ ! আমি দেখিতে পাই-

\* Lord Roberts, Forty-one years in India. Vol. I., pp. 326-327.



যাছি,” ইহা কহিয়াই, সেই ব্যক্তি লক্ষ্য নির্দেশ পূর্বক বন্দুক ছুঁড়িল। অমনি বৃক্ষের উপরিভাগ হইতে একটি সুসজ্জিত ও গতাস্থ দেহ ভূপতিত হইল। উহার পরিধানে গোলাপীরঙ্গের রেশমী কাপড়ের আঁটা পায়জামা, এবং অঙ্গরক্ষা ছিল। ভূপতনে বক্ষোদেশের দিকে অঙ্গরক্ষার কিয়দংশ বিচ্ছিন্ন হইয়া গিয়াছিল। অনাবৃত বক্ষঃস্থল দর্শনে উহা নারীদেহ বলিয়া বোধ হইল। এই নারী দুটি পিস্তল লইয়াছিল। একটি গুলিভরা পিস্তল তাহার কটিদেশে আবদ্ধ ছিল। যে ব্যক্তি বন্দুক ছুঁড়িয়াছিল, সে যখন এই বিষয় জানিতে পারিল, তখন গলদশ্রলোচনে কহিল,—“আমি যদি ইহাকে পূর্বে নারী বলিয়া জানিতে পারিতাম, তাহা হইলে সহস্রবার মরিলেও ইহার প্রতি অস্ত্রাঘাত করিতাম না।\*”

সেকেন্দরবাগের বাটী অতঃপর বিধ্বস্ত হয়। এখন একখানি ছোট বাগানবাড়া ব্যতীত এই গৃহের কোন চিহ্ন নাই। এইরূপে এক সময়ে বিপ্লবঘটিত যাবতীয় নিদর্শন বিনষ্ট করিবার প্রস্তাব হইয়াছিল। অনেকের ইচ্ছা ছিল যে, দিল্লীর পাহাড়ের স্মৃতিচিহ্নসমূহ এবং লক্ষ্যের সুদৃশ্য রেসিডেন্সি সমভূমিতে পরিণত হয়। কিন্তু দূরদর্শী ব্যক্তিগণের নিকট এইরূপ প্রস্তাব সমীচীন বোধ হয় নাই। এই সকল চিহ্ন শ্রীশ্রীমতী মহারানীর প্রজাবর্গের অসামান্য স্বত্ব-সম্বন্ধিত রাজভক্তির সাক্ষীস্বরূপ। ইংরেজ এবং এতদ্দেশীয়গণ যে, সমভাবে আপনাদের কর্তব্য পালন করিয়াছে, তাহা এই সকল চিহ্ন দর্শকের মানসপটে সুস্পষ্টরূপে অঙ্কিত করিয়া দেয়। অধিকন্তু এই সকল চিহ্ন শাসকবর্গকে প্রজালোকের সহিত সদব্যবহার করিতে উপদেশ দিয়া থাকে। বস্তুতঃ এইরূপ চিহ্ন যেমন ইংরেজ ও ভারতবাসীর বীরত্বের দ্যোতক এবং রাজভক্তির উদ্দীপক, সেইরূপ ঘটনাবৈশিষ্ট্যে মানবের প্রকৃতি কিরূপ স্বাপদভাবে পরিণত হয়, তাহারও পরিচায়ক। এইরূপে এই সকল বিপ্লবঘটিত চিহ্ন হইতে নানা বিষয়ে উপদেশ লাভ হয়। লর্ড লরেন্সের শ্রায় মনস্বী ব্যক্তি জুম্মামসজিদের ধ্বংস-সাধন করিতে দেন নাই। লর্ড রবার্টসের শ্রায় বীর পুরুষ এইরূপ অসভ্যভাবের সমর্থন করেন নাই। †

\* *Forbes-Mitchell, Reminiscences of the Great Mutiny p. 57-58.*

† *Forty-one years in India. Preface, p. IX.*

১৬ই নবেম্বর অপরাহ্নকালে ইংরেজপক্ষের হতাবশিষ্ট সৈনিকগণ পুনর্বার রেসিডেন্সির অভিমুখে অগ্রসর হইল। ইহাদের বামভাগে প্রায় এগার শত গজ পর্য্যন্ত খোলা ময়দান ; ময়দানের পার্শ্বে একটি মাত্র ক্ষুদ্র পল্লী ; দক্ষিণভাগে প্রায় তিন শত গজ পর্য্যন্ত একটি ক্ষুদ্র প্রান্তর ; তৎপরে প্রায় চারি শত গজ পর্য্যন্ত ক্ষুদ্র ঝোপ—মধ্যে মধ্যে ক্ষুদ্র কুটার এবং বাগান, ইহার পর নবাব গাজিউদ্দীন হাইদরের প্রসিদ্ধ সমাধিমন্দির শাহনজিফ্ । \* এই সমাধিমন্দির খেত প্রস্তরের গুহ্বজে সুশোভিত ; উহার বিস্তৃত প্রাঙ্গণ উন্নত প্রাচীরে পরিবেষ্টিত। শাহনজিফের কিয়দূরে কদমরসুল নামক একটি ক্ষুদ্র মসজিদ।

ইংরেজপক্ষের পদাতিগণ যখন পূর্বোক্ত পল্লী অধিকার করে, তখন তাহারা তাদৃশ বাধা প্রাপ্ত হয় নাই। ইহার পর গোলন্দাজেরা শাহনজিফ্ এবং কদম-রসুলের দিকে গোলা বর্ষণ করিতে থাকে। শিখ পদাতিগণ শেষোক্ত মসজিদ অধিকার করে। কিন্তু শাহনজিফ্ অধিকার করা সর্ব্বাপেক্ষা কষ্টকর হইয়া উঠে। এই মসজিদের নিকটবর্তী জঙ্গলে এবং উহার উন্নত প্রাচীরের অন্তর্ভাগে অবস্থিতি করিয়া, সিপাহীগণ গুলিবৃষ্টি করিতে থাকে। প্রধান সেনাপতি অশ্ব-পৃষ্ঠে অধিষ্ঠিত হইয়া, সাতিশয় উদ্বেগের সহিত ঐ মসজিদের দিকে দৃষ্টিযোজনা করিয়া থাকেন। তদীয় সহযোগীরা তাঁহার নিকটে অশ্বপৃষ্ঠে থাকিয়া, উদ্বিগ্ন-ভাবে আত্মপক্ষের সৈনিকদিগের কার্যকলাপ পরিদর্শন করেন। প্রথমে তাহারা মসজিদ আক্রমণে নিয়োজিত ছিল, তাহাদের সাহায্যের জন্য আরও পদাতি প্রেরিত হয়। কিন্তু এইরূপ বলবৃদ্ধিতেও তাদৃশ সুবিধা ঘটে নাই। সিপাহীগণ তিন ঘণ্টাকাল সমান উত্তম, সমান ক্ষিপ্ৰকারিতা, সমান পরাক্রমের সহিত আক্রমণকারীদিগকে বাধা দেয়। তাহাদের কামানে, তাহাদের বন্দুকে, ইংরেজ-পক্ষের ঘর পর নাই ক্ষতি হয়। প্রধান সেনাপতি আত্মপক্ষের বলক্ষয় দেখিয়া, চিন্তিত হইলেন। তাঁহার একজন পার্শ্বচরের বাহুদেশ ছিন্ন হয়, অত্র একজন

\* ধর্ম্মপ্রচারক মহম্মদের জামাতা আলির সমাধিমন্দির নজফ্ পাহাড়ের উপর অবস্থিত। শাহ নজিফ্ এই সমাধিমন্দিরের প্রতিকৃতিরূপ।

† কদমরসুল মহম্মদের পদচিহ্ন। আরব হইতে মহম্মদের পদাঙ্কযুক্ত একখানি প্রস্তর আনিয়া এই মসজিদে রাখা হইয়াছিল। বিপ্লবের সময়ে এই পবিত্র প্রস্তর স্থানান্তরিত হয়।  
—Forty-one years in India. Vol. I., p. 330, note.

আহত হইলেন । একজন সেনানায়কের বাহন নিহত হওয়াতে তিনি ভূপতিত হইলেন । এদিকে রাত্রি সমাগত এবং চারি দিক অন্ধকারে আচ্ছন্ন হইতে থাকে । এই সকল কারণে প্রধান সেনাপতি সাতিশয় উদ্বিগ্ন হইয়া উঠেন, উদ্বেগে তাঁহার ললাটরেখা আকৃষ্ট হইয়, মুখভঙ্গীতে গভীর দুশ্চিন্তার নিদর্শন অভিব্যক্ত হইতে থাকে । বিপক্ষদিগের পরাক্রম পর্য্যদস্ত করা তাঁহার নিকটে এখন অসম্ভব বোধ হইল । তাঁহার সৈন্য অগ্রসর হইতে সমর্থ হইল না ; পশ্চাৎ হটয়া যাইতেও ইচ্ছা করিল না । তাহারা যেমন অগ্রসর হইতে উদ্যত হইল, অমনি সমুদ্রত প্রাচীরের রক্ষা হইতে গুলির পর গুলি আসিয়া তাহাদের অনেকের প্রাণনাশ করিতে লাগিল । ইংরেজসৈন্য বহুকষ্টে প্রাচীরের সমীপবর্তী হইল বটে, কিন্তু তাহারা যেখানে উপস্থিত হইল, সেখানে দ্বারদেশ তাহাদের পরিদৃষ্ট হইল না । তাহাদের সঙ্গে মই ছিল না । সুতরাং উন্নত প্রাচীরে উঠিবার কোন সুবিধা দেখা গেল না । কামানের গোলায় সুদৃঢ় প্রাচীর ভাঙ্গিবার চেষ্টা হইল । কিন্তু প্রকাণ্ড প্রাচীরের দৃঢ়তা এই ভীষণ আগ্নেয়াস্ত্রকেও পরাজিত করিল । চেষ্টা ব্যর্থ হইল দেখিয়া, ক্যাপ্টেন পীল কামান ফিরাইয়া আনিতে আদেশ দিলেন । এদিকে প্রধান সেনাপতি হত ও আহতদিগকে লইয়া আসিবার জন্ত সেনানায়ক হোপ্ গ্রাণ্টের নিকটে আদেশ পাঠাইলেন । এইরূপে পশ্চাৎ হটয়া যাওয়াই একরূপ সিদ্ধান্ত হইল ।

যিনি সেনাপতির আদেশ লইয়া উপস্থিত হইলেন, তাঁহার সহিত পরামর্শের পর সেনানায়ক হোপ্ স্থির করিলেন যে, সেনাপতির আদেশপালনের পূর্বে প্রাচীরের কোন স্থান দিয়া অভ্যন্তরে প্রবেশ করা যায় কি না, দেখিতে হইবে । ইঁহারা দুই জনে জঙ্গলের অন্তরাল দিয়া অন্ত্যান্ত স্থান পরিদর্শন করিতে লাগিলেন । ইঁহাদের উদ্দেশ্য সিদ্ধ হইল । ইঁহারা প্রাচীরের এক স্থানে ফাটল দেখিতে পাইলেন । এই স্থান দিয়া, উভয়ে অভ্যন্তরভাগে প্রবেশ করিলেন । অন্ত্যান্ত সৈনিকও ঐ পথে ভিতরে প্রবেশ করিল । ইঁহাদের গতিরোধ হইল না । সিপাহীরা পূর্বেই শাহনজিফ্ হইতে প্রস্থান করিয়াছিল । আক্রমণকারিগণ বিনা বাধায় অভ্যন্তরে প্রবেশ পূর্বক প্রাচীরের দ্বার খুলিয়া দিল এবং প্রধান সেনাপতিকে জানাইল যে, পশ্চাদ্গমনের প্রয়োজন নাই । এই ছরধিগম্য স্থান তাহাদের অধিকৃত হইয়াছে ।

ইংরেজসৈন্য সন্ধ্যার পর শাহনজিফে প্রবেশ করে। সিপাহীরা আপনাদের ঋণ দ্রব্যাদি ফেলিয়া, তাড়াতাড়ি প্রস্থান করিয়াছিল। সৈনিকেরা অন্তর্ভাগে প্রবেশ করিয়া দেখে যে, প্রদীপ যথাস্থানে জলিতেছে, চাপাটি প্রস্তুত রহিয়াছে, ডাল তখনও হাঁড়িতে ফুটতেছে। যাহা হউক, শাহনজিফের পর আরও দুইটি স্থান অধিকারের প্রয়োজন হয়। এদিকে রেসিডেন্সির সেনানায়কগণও নিশ্চেষ্ট-ভাবে থাকেন নাই। যাহাতে প্রধান সেনাপতি সহজে তাঁহাদের সহিত সন্মিলিত হইতে পারেন, তাঁহারা তজ্জন্তু সবিশেষ চেষ্টা করিতে থাকেন। সেনাপতি হাবেলক যখন জানিলেন যে, সেকেন্দরবাগ প্রধান সেনাপতির অধিকৃত হইয়াছে, তখন তিনি কুল্যা দ্বারা ফরিদবক্স প্রাসাদের বাহিরের প্রাচীর উড়াইয়া দিলেন এবং ঐ ভগ্ন স্থানে কামান সন্নিবেশ করিয়া, বিপক্ষদিগের উপর গোলাবৃষ্টি করিতে লাগিলেন। ইহার মধ্যে তাঁহার পদাতিগণ ফরিদবক্স এবং মতিমহলের মধ্যবর্তী দুইখানি বাড়ী আক্রমণ ও অধিকার করিল। ইহাতে প্রধান সেনাপতির পথ অধিকতর সুগম ও উহার দূরত্ব অধিকতর অল্প হইয়া উঠিল। ১৬ই নবেম্বর এই ঘটনা হয়। ১৭ই নবেম্বর উষাকালের পূর্বে শ্রী কোলিনের সৈনিকগণ বিপক্ষদিগের নাগরার শব্দ ও ঘণ্টাধ্বনিতে জাগরিত হইয়া খোর্সেদমঞ্জিল\* আক্রমণে প্রস্তুত হইতে থাকে। শাহনজিফ অধিকার করিতে শ্রী কোলিনের প্রভূত বলক্রম হইয়াছিল। এই জন্তু শ্রী কোলিন্ অতিসাবধানে আপনার দল হইতে সৈনিক নির্বাচন করিয়া, তাহাদিগকে এই কর্মে নিয়োজিত করেন। খোর্সেদমঞ্জিল অধিকৃত হয়। সিপাহীরা ঐ স্থান হইতে মতিমহলে পহঁছে। পূর্বে উক্ত হইয়াছে যে, সেনাপতি হাবেলক মতিমহল পর্য্যন্ত স্থান অধিকার করিয়াছিলেন। মতিমহল অধিকৃত হইলেই, অবরুদ্ধদিগের সহিত তাহাদের উদ্ধারকারী সৈনিকদলের সন্মিলনের সুযোগ ঘটে। এই সুযোগও দূরবর্তী হইল না। সিপাহীরা মতিমহলরক্ষার জন্তু যথোচিত ক্রমতার পরিচয় দিয়াছিল। কিন্তু শেষে তাহাদের ক্রমতা পর্য্যদস্ত হইল। সূর্যাস্তের পূর্বে ইংরেজসৈন্য মতিমহল অধিকার করিল।

যখন খোর্সেদমঞ্জিল অধিকৃত হয়, তখন প্রধান সেনাপতি, রবার্ট্ স্কে আপন

\* খোর্সেদ—সূর্য্য ; মঞ্জিল—গৃহ। লক্ষ্মীপ্রবাসী ইংরেজদিগের নিকটে এই বাড়ী খানাখর নামে পরিচিত। ৩২ সংখ্যক পদাতিদলের সৈনিকেরা এই গৃহে ভোজনাদি করিত।

দলের পতাকা উক্ত গৃহের উপরে স্থাপন করিতে আদেশ দেন । তাঁহারা কত দূর অগ্রসর হইয়াছেন, তাহা আউট্রামকে জানাইবার জন্ত এইরূপ আদেশ প্রদত্ত হইয়াছিল । রবার্ট্‌স্, প্রধান সেনাপতির একজন পার্শ্বচর এবং অন্য একটি সৈনিকপুরুষের সাহায্যে খোর্সেদমঞ্জিলের উপর আপনাদের পতাকা স্থাপন করেন । বিপক্ষদিগের একজন জমাদার কৈশরবাগ হইতে উক্ত পতাকার দিকে কামান ঠিক করিয়া গোলা নিক্ষেপ করে । নিক্ষিপ্ত গোলায় পতাকা পড়িয়া যায় । রবার্ট্‌স্ উহা তুলিয়া পুনর্বার পূর্বোক্ত স্থলে স্থাপন করেন । সিপাহীদিগের কামানের গোলায় পুনর্বার উহা ভূপতিত হয় । কিন্তু রবার্ট্‌স্ ইহাতেও হতোদ্যম না হইয়া, তৃতীয় বার আপনাদের জয়পতাকা স্থাপন করেন ।\* ভারতের পূর্বতন প্রধান সেনাপতি (লর্ড রবার্ট্‌স্) এক সময়ে এইরূপ সাহস ও কর্মকুশলতার পরিচয় দিয়াছিলেন । যে জমাদারের নিক্ষিপ্ত গোলায় ইংরেজের জয়পতাকা অধঃপাতিত হইয়াছিল, বিপক্ষগণ তদীয় লক্ষ্যভেদকৌশলের পরিতুষ্ট হইয়া, তাহাকে ৫০০ শত টাকা পারিতোষিক দিয়াছিল ।†

মতিমহল অধিকৃত হইলেও সিপাহীদিগের উদ্যমভঙ্গ হইল না । তাহারা কৈশরবাগ হইতে মতিমহল ও খোর্সেদমঞ্জিলের মধ্যভাগে গোলাবৃষ্টি করিতে লাগিল । প্রধান সেনাপতি, খোর্সেদমঞ্জিলে ছিলেন । রেসিডেন্সির সৈনিকেরা গোলাবৃষ্টির মধ্যেও মতিমহল হইতে খোর্সেদমঞ্জিলে যাইতে লাগিল । স্মার্ট হেন্‌রি হাবেলক, স্মার্ট জেমস্ আউট্রাম, অক্ষতদেহে গিয়া, খোর্সেদমঞ্জিলের নিম্নাবনত ভূমিতে স্মার্ট কোলিনের সহিত সম্মিলিত হইলেন । কর্ণেল নেপিয়র (পরে ভারতবর্ষের প্রধান সেনাপতি লর্ড নেপিয়র) ষাইবার সময়ে আঘাত পাইলেন । হাবেলকের পার্শ্বচর সেই ভীষণ গোলাবৃষ্টি অতিক্রমপূর্বক খোর্সেদমঞ্জিলে গিয়া, হাবেলককে কহিলেন যে, তদীয় তনয়ও আহত হইয়াছেন । হাবেলক কিছুমাত্র চাঞ্চল্য প্রকাশ না করিয়া, প্রধান সেনাপতির সহিত ধীরভাবে কথা কহিতে লাগিলেন । শেষে তিনি জানিতে পারিলেন যে, তনয়ের আঘাত সাজ্বাতিক হয় নাই । এইরূপে প্রধান সেনাপতি আলমবাগের নিকটবর্তী

\* *Forbes-Mitchell, Reminiscences of the Great Mutiny, p. 101. Comp. Forty-one years in India. Vol. I. p. 337.*

† *The English Captives in Oudh, p. 38.*

প্রান্তর হইতে পাঁচ দিনে নির্দিষ্ট স্থানে উপস্থিত হইলেন । এই অভিযানে তিনি যার পর নাই ক্ষতি স্বীকার করেন । তাঁহার ৪৫ জন আফিসার এবং ৪৯৬ জন সৈনিক অর্থাৎ তদীয় সমগ্র সৈনিকদলের একদশমাংশের অধিক ভাগ হত বা আহত হয় ।\*

প্রধান সেনাপতি অতঃপর বালকবালিকা ও কুলমহিলাদিগকে লইয়া, রেসিডেন্সিপরিত্যাগে কৃতসঙ্কল্প হইলেন । হাবেলক ইহাতে আপত্তি করিতে লাগিলেন, আউট্রাম ইহাতে অমত প্রকাশ করিলেন, অন্যান্য প্রান্তর সেনানায়কও ইহার বিরোধী হইলেন । তাঁহারা প্রায় পাঁচ মাস কাল, যে স্থানে থাকিয়া, বহুসংখ্যক বিপক্ষের সম্মুখে আত্মরক্ষা করিয়াছিলেন, এখন সহসা সেই স্থানপরিত্যাগের প্রস্তাব হওয়াতে তাহাদের যেরূপ মনঃ-ক্ষোভ, সেইরূপ বিষয় জন্মিল । তাঁহারা বিপক্ষদিগকে একবারে নিষ্কাশিত করিয়া, অযোধ্যার রাজধানীতে আপনাদের প্রাধান্য বৃদ্ধমূল করিতে চাহিয়া-ছিলেন । সেনানায়ক ইংলিস্ এই জন্ত প্রধান সেনাপতির নিকটে কেবল ৬০০ শত মাত্র সৈনিকের জন্ত প্রার্থনা করিলেন । কিন্তু প্রধান সেনাপতি তাঁহাদের এইরূপ প্রার্থনায়, এইরূপ আপত্তিপ্রকাশে কিছুমাত্র বিচলিত হইলেন না । লক্ষ্মীতে আসিতে তাঁহার বলক্ষয় হইয়াছিল । এদিকে কাণপুরের সংবাদ না পাওয়াতে তিনি নিরতিশয় চিন্তিত হইয়াছিলেন । লক্ষ্মীর রেসিডেন্সি তাঁহার নিকটে আপনাদের উদ্দেশ্যসাধনের অল্পযোগী বোধ হইয়াছিল । সুতরাং তিনি কাহারও কথা না শুনিয়া, রেসিডেন্সি পরিত্যাগ করিতে আদেশ দিলেন । রেসিডেন্সি হইতে প্রথমে দেলকোশায় যাওয়া স্থির হইল । এই পথের দূরত্ব পাঁচ মাইলের কম হইবে না । মতিমহল হইতে শাহনজিফ পর্য্যন্ত বিস্তীর্ণ প্রান্তর অবস্থিত । পূর্বে উক্ত হইয়াছে যে, সিপাহীগণ কৈশরবাগ হইতে গোলাবৃষ্টি করিতেছিল । সুতরাং খোলা ময়দান দিয়া বাইবার নময়ে, তাহাদের নিক্ষিপ্ত গোলার ক্ষতিগ্রস্ত হইবার সম্পূর্ণ সম্ভাবনা ছিল । এজন্য এই প্রান্তরে তাড়াতাড়ি মৃৎপ্রাচীর নির্মিত এবং উহাতে কামান স্থাপিত হইল । কামান হইতে সিপাহীদিগের অধ্যুষিত স্থানে গোলা নিক্ষিপ্ত হইতে লাগিল । এদিকে ১৬ই নবেম্বর মহিলা ও বালকবালিকারা দেলকোশায়

\* *Reminiscences of the Great Mutiny, p. 102.*

অভিযুখে অগ্রসর হইল। ইহাদের জন্ত গাড়ি, পাকী প্রভৃতির কোন রূপ বন্দোবস্ত ছিল না। নানারূপ অশৃঙ্খলার নানারূপ গোলযোগ ঘটিল। সূর্যাস্ত-কালে ইহারা সেকেন্দরবাগে উপনীত হইল। এই স্থানে অবস্থিতি করারও সুবিধা হইল না। সেকেন্দরবাগে প্রায় দুই হাজার সিপাহী দেহত্যাগ করিয়াছিল। ইউরোপীয় সৈনিকদিগের দেহ সমাহিত হইয়াছিল। শিখেরা আপনাদের সজাতির শবগুলি গোমতীর তটে দগ্ন করিয়াছিল। কিন্তু সিপাহীদিগের মৃতদেহগুলির সংকার হয় নাই। এই কর্মসম্পাদনে ইংরেজপক্ষের সৈনিকদিগেরও কোনরূপ স্মরণ ঘটেনি। সুতরাং সিপাহীদিগের দেহগুলি শৃগালকুকুরের ভক্ষ্য হইয়াছিল। উহার পুতিগন্ধ এখন ইংরেজদিগের অসহ্য হইয়া উঠিল। ১৮৫৮ অব্দের মার্চ মাসে ইংরেজসৈনিকেরা যখন সেকেন্দরবাগে উপস্থিত হয়, তখন ঐ হতভাগ্য জীবদিগের শ্বেতবর্ণ কঙ্কালগুলি তাহাদের পরিদৃষ্ট হইয়াছিল। সিপাহীদিগের নিধনের ছয় মাস পরে তাহাদের অস্থিগুলি সমাহিত হয়।\*

কুলনারী ও বালকবালিকাগণ নিরাপদে দেলকোশায় পঁহুছে। ২০শে, ২১শে, ২২শে, এই তিন দিন যান ইত্যাদি সংগৃহীত হয়। এই স্থানে নবাবপরিবারের প্রায় পঁচিশ লক্ষ টাকার হীরাজহরত প্রভৃতি পাওয়া যায়। এতদ্ব্যতীত নানাপ্রকার খাদ্য দ্রব্য ও অন্যান্য ব্যবহারোপযোগী পদার্থ অধিকৃত হয়।† কিন্তু এই স্থানে একটি ঘটনায় ইংরেজেরা যার পর নাই সন্তোষিত হইলেন। ২০শে নবেম্বর সেনাপতি হাবেলকের অতিসাররোগ জন্মে। পর দিন রাত্ৰিকালে তাঁহাকে ডুলীতে দেলকোশায় আনা হয়। তিনি এই স্থানে একটি স্বতন্ত্র তাঁবুতে উক্ত ডুলীর মধ্যে অবস্থান করেন। ক্রমে তাঁহার রোগ প্রবল হইয়া উঠে। তাঁহার পুত্র বাহুদেশে আহত হইয়াছিলেন। আহত বাহু এ সময়ে পটিতে আবদ্ধ হইয়া, গলদেশে ঝুলিতেছিল। তথাপি পিতৃভক্ত পুত্র অত্ন হস্তে পিতার যাবতীয় অভাব মোচন করিতে লাগিলেন। কিন্তু রোগ ভাল হইল না। ২৪শে নবেম্বর সেনাপতি হাবেলক ঐ ডুলীতেই দেহত্যাগ করিলেন।

\* *Reminiscences &c. p. 106.*

† *Forty-one years in India. Vol. I. b. 347*

তিনি সৈনিককর্মে একরূপ যোগ্যতার পরিচয় দিয়াছিলেন যে, তাঁহার স্বদেশীয়গণ তৎপ্রতি সমুচিত সম্মানপ্রদর্শনে বিমুখ হইলেন নাই । মৃত্যুর কয়েক দিন পূর্বে তিনি সম্মানসূচক 'নাইট' উপাধি প্রাপ্ত হইলেন । তাঁহার মৃত্যুসংবাদ ইংলণ্ডে পছঁছিবাব পূর্বে তত্রত্য কর্তৃপক্ষ আবার তাঁহাকে সম্মানসূচক উপাধি দিয়া, বার্ষিক বৃত্তিদানের ব্যবস্থা করেন । ইংলণ্ডের লোকে যখন তাঁহার দেহ-ত্যাগের বিষয় অবগত হয়, তখন তাহার সাতিশয় শোকগ্রস্ত হইয়া উঠে । সেনাপতির স্বদেশীয়গণ চাঁদা করিয়া, তদীয় স্মৃতিচিহ্নস্থাপনের উদ্যোগ করে । হাবেলকের প্রতিমূর্তি প্রসিদ্ধ নৌ-সেনাপতি নেলসনের পার্শ্বে স্থাপিত হয় ।\*

২২শে নবেম্বর নিশীথকালে সৈনিকগণ রেসিডেন্সি হইতে যাত্রা করে, স্মতরাং ঐ তারিখে লক্ষ্মীর ইংরেজদিগের বীরত্ব এবং ধৈর্য্য ও অধ্যবসায়ের প্রধান পরিচয়স্থল সম্পূর্ণরূপে পরিত্যক্ত হয় । সকলে রেসিডেন্সি পরিত্যাগ পূর্বক আলমবাগে পছঁছে । সিপাহীরা ২৩শে তারিখের পূর্বে ইংরেজসৈন্তের প্রস্থানের বিষয় জানিতে পারেন নাই । স্মতরাং ইংরেজসৈন্তকে ইহাদের আক্রমণে তাদৃশ বিব্রত হইতে হয় নাই । সেনাপতি হাবেলকের শব আলমবাগে আনীত ও সমাহিত হয় । প্রধান সেনাপতি সেনানায়ক আউট্রামকে ৪,০০০ সৈন্ত ও ২৫টি কামানের সহিত আলমবাগে রাখিয়া, ২৭শে নবেম্বর কাণপুরে যাত্রা করেন । তাঁহার সঙ্গে ৩,০০০ হাজার সৈন্ত ছিল । মহিলা, বালকবালিকা এবং পীড়িত ও রুগ্ন ব্যক্তিগণে প্রায় ২,০০০ রক্ষণীয় জীব তাঁহার সহযাত্রী হইয়াছিল ।

পূর্বে উক্ত হইয়াছে যে, সেনাপতি ওয়াইণ্ডহাম কাণপুররক্ষায় নিয়োজিত ছিলেন । প্রধান সেনাপতি তাঁহাকে এই আদেশ দিয়াছিলেন যে, তিনি কখন কাণপুর হইতে স্থানান্তরে যাত্রা করিবেন না । তাঁহাকে কাণপুরের মুগ্ধ দুর্গ সুদৃঢ় করিতে হইবে । যদি গোবালিয়রের সৈনিকদল উপস্থিত হয়, তাহা হইলে তিনি এই দুর্গে থাকিয়া, আত্মরক্ষা করিবেন । এতদ্ব্যতীত তাঁহাকে নোসেতু রক্ষা করিতে হইবে । এইরূপ আদেশ দিয়া, প্রধান সেনাপতি লক্ষ্মীতে যাত্রা করেন । কিন্তু এই আদেশে উপেক্ষা করাতে কাণপুরের ইংরেজ

\* *Marshman, Memoirs of Sir Henry Havelock, p. 450.*



সেনানায়ককে বিপদাপন্ন হইতে হয় । স্মার্ক কোলিন্ কাম্পবেল যখন লক্ষ্মী হইতে কাশ্মীরে প্রত্যাবর্তন করেন, তখন তিনি সেনানায়ক ওয়াইওহাম্কে গোবালিয়রের সিপাহীদিগের পরাক্রমে পরাজিত ও সাতিশয় বিব্রত দেখেন ।

এই কথা বলিবার পূর্বে প্রধান সেনাপতির কাশ্মীরে প্রত্যাবর্তনকালের একটি কোতুকাবহ ঘটনার উল্লেখ করা যাইতেছে । প্রধান সেনাপতির সৈনিকদলের দ্রব্যাদি লোঝাই গাড়িগুলি যখন আলমবাগের সেতু অতিক্রম করিয়া, লক্ষ্মীর পথে উপস্থিত হয়, তখন একখানি বিস্কুট বোঝাই গাড়ি উল্টিয়া পড়ে এবং উহার চাকা ভাঙ্গিয়া যায় । কমিসরিয়েট বিভাগের হীরালাল চট্টোপাধ্যায় নামক একটি বিংশতিবর্ষবয়স্ক বাঙ্গালী যুবকের উপর এই খাণ্ডদ্রব্যরক্ষার ভার ছিল । হীরালাল আপনার রক্ষণীয় পদার্থ শৃঙ্খলার সহিত রাখিবার জন্ত যথাশক্তি চেষ্টা করিতে লাগিলেন । কিন্তু হাইলাণ্ডার সৈনিকেরা তাঁহাকে এক পার্শ্বে ফেলিয়া দিল, এবং বিস্কুটের থলিয়াগুলি খুলিয়া, যে যত পারিল, লইতে লাগিল । এই সময়ে প্রধান সেনাপতি ঘটনাস্থলে উপনীত হইলেন । হীরালাল সবোঙ্গে তাঁহার নিকটে গিয়া কহিলেন,—“ধর্ম্মাবতার ! আপনি আমার মা বাপ । আপনাকে বলিব কি, এই উচ্ছৃঙ্খল হাইলাণ্ডারগণ আমার কথা শুনে না, ইহারা এ ভাবে কমিসরিয়েটের বিস্কুট চুরি করিয়া লইতেছে, যেন ইহারা মজা করিতেছে ।” প্রধান সেনাপতি অশ্বেষ রশ্মি সংঘত করিয়া, কোনও আফিসার নিকটে আছেন কি না, জিজ্ঞাসা করিলেন । নিরুপায় বাঙ্গালী যুবক উত্তর করিলেন—“না ধর্ম্মাবতার ! কোনও আফিসার নাই । কেবল একজন কর্পোরেল ( নিম্নপদস্থ সৈনিকপুরুষ ) আছেন । তিনি আমাকে কহিলেন, থলিয়া বন্ধ কর, নচেৎ আমি তোমাকে গুলি করিব” । ইহা শুনিয়া, পূর্কোক্ত সৈনিক পুরুষ প্রধান সেনাপতির নিকটে উপস্থিত হইয়া অভিবাদনপূর্বক কহিলেন,—“তাঁহার দলের প্রায় সমুদয় আফিসার আহত হইয়াছেন । কেবল একজন অক্ষতশরীরে আছেন । কিন্তু তিনি সৈনিকদলের অগ্রভাগে রহিয়াছেন । গাড়ি ভাঙ্গিয়া যাওয়াতে বিস্কুটগুলি রাখিবার কোনও উপায় ছিল না । এই ক্ষণে সৈনিকেরা উহা মাটিতে না ফেলিয়া, আপনাদের সঙ্গের থলিয়াতে রাখিয়াছে । হীরালাল ইহা শুনিয়া, জোড়হাতে কহিলেন,—“যদি এক গাড়ি বিস্কুট কম হয়, তাহা হইলে কমিসরিয়েটের কর্তা আমার কথা শুনিবেন না । আমাকে

৩০ যা বেত মারিতে আদেশ দিবেন। এই বণ্ড হাইলাণ্ডারদিগের সম্মুখে একজন গরীব বাঙ্গালী কি করিতে পারে।” প্রধান সেনাপতি হাসিয়া কহিলেন,—“হাঁ বাবু! আমি জানি, এই হাইলাণ্ডারগণ যখন ক্ষুব্ধ হইয়া, তখন ইহারা সাতিশয় ছুঁড়ান্ত হইয়া উঠে। ইহাদিগকে বিস্কুট দাও।” ইহা কহিয়া তিনি হীরালালকে এই ভাবে একখানি রসিদ দিবার জন্ত আপনার পার্শ্বচরকে আদেশ দিলেন যে, একখানি বিস্কুটের গাড়ি ভাঙ্গিয়া যাওয়াতে সমুদয় বিস্কুট প্রধান সেনাপতির আদেশানুসারে পশ্চাদ্ভাগের সৈনিকদিগের মধ্যে ভাগ করিয়া দেওয়া হইয়াছে। অতঃপর তিনি সৈনিকদিগকে সম্বোধন করিয়া কহিলেন,—“আমি তোমাদিগকে এই বিস্কুট দিলাম। তোমরা উহা ভাগ করিয়া, তোমাদের অগ্রভাগের সহযোগীদিগকে দাও। কিন্তু আমার নিকটে তোমাদিগকে এক বিষয়ে প্রতিশ্রুত হইতে হইবে। যদি রমের গাড়ি ভাঙ্গিয়া যায়, তাহা হইলে তোমরা উহা লইতে পারিবে না।” সৈনিকেরা উত্তর করিল,—“না, আমরা কখন রম স্পর্শ করিব না।” “উত্তম, মনে রাখিও যে, তোমাদের উপর আমার বিশ্বাস আছে”, ইহা কহিয়া, প্রধান সেনাপতি আপনার অধিষ্ঠিত বাহন চালাইয়া দিলেন। \*

\* শ্রীযুক্ত হীরালাল চট্টোপাধ্যায় এখন মাক্‌নীল কোম্পানির কার্যালয়ে খাজাঙ্কির কর্ম করিতেছেন। উপস্থিত লেখক ইহার নিকট হইতে বিপ্লবসংক্রান্ত অসংখ্য বিবরণও সংগ্রহ করিয়াছেন।

## চতুর্থ অধ্যায় ।

### তাত্যা টোপে ।

তাত্যা টোপে—তাঁহার যুদ্ধকৌশল—পাণ্ডুনদীর তীরে তাঁহার সহিত ওয়াইণ্ড্‌হামের যুদ্ধ—তাঁহার জয়লাভ—তাঁহার কাণপুরে অবস্থিতি ও বাহরচনা—স্কার্ কোলিন্ কাম্প-বেলের কাণপুরে উপস্থিতি—তাঁহার সহিত যুদ্ধে তাত্যা টোপের পরাজয় ।

২৯শে নবেম্বর প্রাতঃকালে প্রধান সেনাপতি কাণপুরের নোসেতু উত্তীর্ণ হইলেন । এই সময়ে কাণপুরের ইংরেজসৈন্য নিরতিশয় উদ্বেগের সহিত তাঁহার আগমন প্রতীক্ষা করিতেছিল । সেনানায়ক ওয়াইণ্ড্‌হাম যুগ্ম দুর্গে থাকিয়া, সিপাহীদিগের আক্রমণ নিরস্ত করিতে আদিষ্ট হইয়াছিলেন । এখন গবর্ণমেন্টের ঘোড়ার সাজসরঞ্জামের কারখানা যে স্থানে আছে, সেই স্থানে—নোসেতুর প্রান্ত-ভাগে উক্ত দুর্গ নিৰ্ম্মিত হইয়াছিল । কাণ্ডেন মোর্বে টমসন্ \* কাণপুরের ছুরাচার আজিম উল্লার ষড়যন্ত্রমূলক লোমহর্ষণ ঘটনা হইতে নিষ্কৃতিলাভ করিয়া, এখন পুনর্বার আপনাদের শোচনীয় দশার নিদর্শনস্থলে আত্মসংরক্ষণকর্মে ব্যাপৃত হইয়াছিলেন । তাঁহার তত্ত্বাবধানে চারি হাজার কুলী প্রতিদিন সূর্যোদয় হইতে সূর্যাস্ত পর্য্যন্ত দুর্গ নিৰ্ম্মাণ করিতেছিল । সেনাপতি ছইলার বিপক্ষ-দিগের ষড়যন্ত্র বুঝিতে না পারিয়া, আপনাদের আত্মরক্ষার স্থান পরিত্যাগ পূর্বক বহুসংখ্যক রক্ষণীয় লোকের সহিত প্রাণ বিসর্জন করিয়াছিলেন । সেনাপতি ওয়াইণ্ড্‌হাম আত্মক্ষমতার গর্বে অধীর হইয়া, নিজের ইচ্ছায় কাণপুর পরিত্যাগ পূর্বক বহুসংখ্যক সৈনিকের জীবননাশের কারণ হইলেন । ষড়যন্ত্র ও বিশ্বাস-ঘাতকতায় ছইলারের পতন হইয়াছিল । গর্ব ও অসমীক্ষ্যকারিতায় ওয়াইণ্ড্‌হামের পরাজয় ঘটিল । ছলনাপর, জিঘাংসু সৈনিকেরা ছইলারের নিরস্ত্র ও একান্ত নিঃসহায় লোকের শোণিতপাত করিয়া, কাপুরুষতার পরিচয় দিয়াছিল । একজন রণকুশল বীরের পরাক্রমে সম্মুখসমরে ওয়াইণ্ড্‌হামের সশস্ত্র সৈনিক-গণের অধঃপতন হইল ।

\* মোর্বে টমসনের আত্মরক্ষার কথা উপস্থিত গ্রন্থের তৃতীয় ভাগে বর্ণিত হইয়াছে ।

এই যুদ্ধকুশল বীরপুরুষের নাম তাত্যা টোপে । ইনি মহারাষ্ট্রীয় ব্রাহ্মণ । আহম্মদনগরে ইঁহার জন্ম হয় । ইনি নানা সাহেবের প্রধান পার্শ্বচর ছিলেন । প্রতিপালক প্রভুর প্রতি ইঁহার অপরিমিত শ্রদ্ধা ছিল । ইনি প্রভুর কৰ্মসাধনে বিশ্বস্ততা ও অধ্যবসায়ের একশেষ দেখাইয়াছিলেন । উপস্থিত সময়ে ইঁহার বয়স প্রায় পঞ্চাশ বৎসর হইয়াছিল । ইঁহার উন্নত দেহ, বৃহৎ মস্তক, বিস্তৃত ললাট, সুগঠিত কলেবর, প্রতিভাব্যঞ্জক মুখশ্রী অসামান্য কৌশলসহকৃত বীরত্বের পরিচায়ক ছিল । ইনি প্রতিপালক প্রভুর জন্ত ইংরেজের বিরুদ্ধে অস্ত্র ধারণ করেন, এবং আপনার ক্ষমতায় ও রণপাণ্ডিত্যে ইংরেজ বীরপুরুষের গ্ৰায় ইংরেজ ঐতিহাসিকেরও বরণীয় হয়েন ।

এই প্রসিদ্ধ বীরপুরুষ গোবালিয়রের সৈনিকদলের অধিনায়ক হইয়াছিলেন । উক্ত সৈনিকদল যেরূপ সুশিক্ষিত সেইরূপ পরাক্রমশালী । ইতঃপূর্বে কোন স্থানের যুদ্ধে ইঁহারা পরাজিত হয় নাই । মহারাজ শিন্দে এবং তাঁহার সুবিজ্ঞ মন্ত্রীও ইঁহাদিগকে সংযতভাবে রাখিতে পারেন নাই । কাণপুরের সেনানায়ক ওয়াইগ্‌হামের দলে ২,৪০০ সৈনিক ছিল । ওয়াইগ্‌হাম ভাবিয়াছিলেন যে, তিনি এই সৈনিকবলের সাহায্যে বিপক্ষদিগকে পরাজিত ও তাড়িত করিতে পারিবেন । বিপক্ষেরা কাণপুরের সাত মাইল দূরে পাণ্ডুনদীর তটবিভাগে উপনীত হইয়াছে, এই কথা যখন তাঁহার গোচর হইল, তখন তিনি ঐ স্থল হইতে তাহাদের নিষ্কাশনে কৃতসঙ্কল্প হইলেন ।

সেনাপতি ওয়াইগ্‌হাম ২৬শে নবেম্বর পাণ্ডুনদীর অভিমুখে অগ্রসর হইলেন । এদিকে তাত্যা টোপে যুদ্ধের জন্ত প্রস্তুত হইয়াছিলেন । তিনি ৯ই নবেম্বর কান্নীতে উপনীত হয়েন । কান্নী যমুনার দক্ষিণভাগে, কাণপুরের ৪৬ মাইল দক্ষিণপশ্চিমে অবস্থিত । কান্নী ও কাণপুরের পথে ভগিনীপুর এবং সূচণ্ডী পল্লী রহিয়াছে । সূচণ্ডী হইতে কাণপুর ১৪ মাইল দূরে অবস্থিত । এই পথ পাণ্ডুনদী এবং গঙ্গার খাল, এই দুইটি জলপ্রবাহে দুই স্থানে বিচ্ছিন্ন হইয়াছে । সূচণ্ডী হইতে ৪ মাইল পথ অতিক্রম করিলে পাণ্ডুনদী এবং আর ৪ মাইল গেলে গঙ্গার খাল পাওয়া যায় । অন্য একটি পথ অবলম্বন করিলে কান্নী হইতে কাণপুরের কিছু উত্তরপূর্বে উপনীত হওয়া যায় । এই পথের এক শাখা আকবরপুরে গিয়াছে । আকবরপুর হইতে কিছু উত্তর দিকে সিওনী

নামক স্থানে পাণ্ডুনদীর সহিত উজার সংযোগ ঘটিয়াছে। তৎপরে ৪ মাইল উত্তরপশ্চিমে গঙ্গার খাল দ্বারা উহা বিচ্ছিন্ন হইয়াছে। এই খাল অতিক্রম পূর্বক দুই মাইল গেলে শিবরাজপুরনামক পল্লীতে উপনীত হওয়া যায়। উক্ত পল্লী ট্রান্স্‌রোডের পার্শ্বে, গঙ্গার সরাই ঘাটের প্রায় তিন মাইল অন্তরে এবং কাণপুরের প্রায় একুশ মাইল উত্তরপশ্চিমে অবস্থিত।

চতুর মহারাজীয় সেনাপতি কাণপুরের দিকে অগ্রসর হওয়ার সময়ে এই সকল পথের দিকে সবিশেষ দৃষ্টি রাখিয়াছিলেন। চরের সাহায্যে স্মার্ক কোলিন্ কাম্প্‌বেলের অভিযানের যাবতীয় সূক্ষ্ম বিবরণ তাঁহার গোচর হইয়াছিল। তিনি ৩০০০ হাজার সৈনিক এবং ২০টি কামানে কালী সুরক্ষিত করেন। তাঁহার গন্তব্য পথ বিমুক্তভাবে ছিল। তিনি ১০ই নবেম্বর যমুনা পার হইয়া, অনন্তর ভগিনীপুরে উপস্থিত হইয়া, তথায় ১,২০০ সৈন্ত এবং চারিটি কামান রাখেন। ইহার পর আকবরপুর দিয়া সিওলী এবং শিবরাজপুরে উপনীত হইলেন। আকবরপুরে ২০০০ সৈন্ত ও ৬টি কামান, সিওলীতে ২০০০ সৈন্ত ও ৪টি কামান, এবং শিবরাজপুরে ১০০০ সৈন্ত ও ৪টি কামান রাখা হয়। এইরূপে মরাঠা সেনাপতি ১০ই হইতে ১৯শে পর্য্যন্ত, অর্থাৎ ৯ দিনের মধ্যে বিনাবাধায় বিভিন্ন স্থল অধিকার এবং বিভিন্ন স্থানে সৈন্ত ও কামান সন্নিবেশ করেন। কাণপুরের পশ্চিম এবং উত্তরপশ্চিম দিকের জনপদ হইতে তত্রত্য ইংরেজ-শিবিরে রসদ ইত্যাদি যাইত। তাত্যা টোপের ব্যবস্থাকৌশলে রসদ আসিবার এই সকল পথ সর্ব্বাংশে অবরুদ্ধ হইয়াছিল। মহারাজীয় সেনাপতির এইরূপ সৈন্তসন্নিবেশের বিবরণ কাণপুরের ইংরেজ সেনানায়কের অবিদিত ছিল না। ওয়াইণ্ড্‌হাম্ ২০শে নবেম্বর কালী হইতে শিবরাজপুর পর্য্যন্ত সৈন্তসন্নিবেশের বিষয় অবগত হইলেন। পূর্বে উক্ত হইয়াছে যে, মহারাজীয় সেনাপতি আকবর-পুর, ভগিনীপুর, সিওলী, এবং শিবরাজপুর অধিকার করিয়াছিলেন। শেষোক্ত দুই পল্লীর মধ্যে গঙ্গার খাল রহিয়াছে। ওয়াইণ্ড্‌হাম্ রাত্রিকালে এই খাল দিয়া কতিপয় সৈন্ত ও কামান সিওলী বা শিবরাজপুর আক্রমণের জন্ত পাঠাইতে ইচ্ছা করিলেন। এইরূপ ব্যবস্থায় আকবরপুর হইতে বিপক্ষসৈন্তের আগমনের পূর্বেই ইংরেজসৈন্তের কাণপুরে প্রত্যাবর্তনের সম্ভাবনা ছিল।

ওয়াইণ্ড্‌হাম্ আপনার সঙ্কল্পিত বিষয় লক্ষ্যে প্রধান সেনাপতির নিকটে

লিখিয়া পাঠাইলেন। কিন্তু উহার কোন উত্তর আসিল না। পথ অবরুদ্ধ হইয়াছিল। ওয়াইণ্ড্‌হাম কালবিলম্ব না করিয়া, গোবালিয়রের সৈনিকদলের রণকুশল অধ্যক্ষকে বাধা দিতে উত্তত হইলেন। তিনি ২৪শে নবেম্বর প্রাতঃ-কালে অগ্রসর হইয়া, কান্নী যাইবার পথে, গঙ্গার খালের সেতুর নিকটবর্তী স্থানে শিবির স্থাপন করিলেন। তাত্যা টোপে ওয়াইণ্ড্‌হামকে অগ্রসর হইতে দেখিয়া বুঝিলেন যে, ইংরেজ সেনাপতি তাঁহাকে বাধা দিতে আসিয়াছেন। সুতরাং তিনিও প্রতিপক্ষের ক্ষমতারোধে প্রস্তুত হইলেন। ঐ দিনেই তাঁহার আকবরপুরস্থ সৈন্য সূচণ্ডীর অভিমুখে যাত্রা করিল। এই শেষোক্ত পল্লী এবং গঙ্গার খালের মধ্য ভাগে পাণ্ডুনদী রহিয়াছে। গোবালিয়রের সৈন্য ২৫শে তারিখ পাণ্ডুর তটে উপনীত হইল। এই সংবাদ পাইয়াই, ইংরেজ সেনাপতি যে, ২৬ তারিখ পাণ্ডুনদীর অভিমুখে অগ্রসর হইয়াছিলেন, তাহা পূর্বে উক্ত হইয়াছে। এই ক্ষুদ্র সরিতের তটবিভাগে এখন তাঁহার সহিত মহারাষ্ট্রীয় সেনাপতির যুদ্ধ উপস্থিত হইল।

২৬শে নবেম্বর সূর্যোদয়ের পূর্বে ওয়াইণ্ড্‌হাম আপনাদের দ্রব্যাদিরক্ষার বন্দোবস্ত করিয়া, বিপক্ষদিগের ব্যূহপরিদর্শনের জন্ত কিছু দূর অগ্রসর হইলেন। তিনি দেখিলেন যে, বিপক্ষপ্রায় পাণ্ডুনদীর তটে বিপক্ষদিগের ২৫০০ হাজার পদাতি, ৫০০ অশ্বারোহী, ৬টি বৃহৎ কামান রহিয়াছে। ইংরেজ সেনাপতি ইহাদিগকে আক্রমণ করিতে আদেশ দিলেন। সিপাহীদিগের সম্মুখে ঘনসন্নিবিষ্ট বৃক্ষশ্রেণী ছিল। যখন ইংরেজসৈন্য অগ্রসর হইল, তখন তাহারা আপনাদের দক্ষিণ ভাগে সরিয়া গেল। অতঃপর বৃক্ষতলে সন্নিবেশিত কামান হইতে গোলাবর্ষণ আরম্ভ হইল। এদিকে ইংরেজপক্ষের কামানও নিশ্চেষ্টভাবে থাকিল না। এই কামানের গোলা অধিকতর কার্যকর হইয়া উঠিল। উহা বিপক্ষদিগের কামান নিশ্চেষ্ট করিয়া ফেলিল। তিনটি কামান ইংরেজপক্ষের অধিকৃত হইল। অতঃপর সিপাহীরা বৃক্ষস্থল হইতে হটয়া গেল। ইংরেজ সেনাপতি আপনায় সৈনিকগণের সহিত নগরের অভিমুখে যাত্রা করিলেন। ওয়াইণ্ড্‌হামকে পশ্চাৎ ফিরিয়া বাইতে দেখিয়া, গোবালিয়রের সিপাহীদিগের মধ্যে সাহসের সঞ্চার হইল। তাহাদের অশ্বারোহিগণ পুনর্বার অগ্রসর হইল। ইংরেজ সেনাপতি ইহা দেখিয়া ফিরিয়া দাঁড়াইলেন। কিন্তু বিপক্ষগণ তাঁহার সৈনিকদিগকে

আক্রমণ করিতে চেষ্টা করিল না। সুতরাং সেনাপতি পশ্চাদ্ গমন পূর্বক কাল্পীর পথের নিকটে কতকগুলি ইটের পাঁজার সম্মুখে শিবির স্থাপন করিলেন। তাঁহার দলে ৯২ জন হত ও আহত হইয়াছিল। বিপক্ষদিগের দলে ইহা অপেক্ষা অধিক লোক স্বেহত্যাগ করিয়াছিল। যাহা হউক, এই সময়ে প্রধান সেনাপতির নিকট হইতে ওয়াইণ্ড্‌হামের শিবিরে এই ভাবের একখানি পত্র উপস্থিত হইল যে, লক্ষ্মীর সমুদয় গোলযোগ শেষ হইয়াছে। প্রধান সেনাপতির মৈনিকেরা কাণপুরের অভিমুখে আসিতেছে। কাণপুরের ইংরেজ সৈন্যধাক্ ভাবিলেন যে, বিপক্ষেরা পাণ্ডুর তটে যেরূপ ক্ষতি স্বীকার করিয়াছে, তাহাতে আবার যুদ্ধের জন্ত প্রস্তুত হইতে, অন্ততঃ প্রধান সেনাপতির উপস্থিতি পর্য্যন্ত, তাহাদের বিলম্ব হইতে পারে। ইহা ভাবিয়া, ওয়াইণ্ড্‌হাম আপনার শিবিরে অবস্থিতি করিতে লাগিলেন।

কিন্তু মরাঠা সেনাপতি নির্কোষ বা রণকৌশলে অনভিজ্ঞ ছিলেন না। তাঁহার স্বদেশীয় বীরপুরুষেরা যেরূপে যুদ্ধের প্রণালী নির্ধারণ করিতেন, যে ভাবে বিপক্ষের ব্যুহভেদে অগ্রসর হইতেন, যেরূপ কৌশলে পরাক্রান্ত অরাতির সম্মুখে আত্মরক্ষা করিতেন, তাহা তাঁহার অবিদিত ছিল না। তিনি রণচাতুরীতে অভ্যস্ত, অগ্রগমনে বা পশ্চাদ্গমনে কৌশলসম্পন্ন, ব্যুহরচনায় এবং বিপক্ষের অধিকৃত স্থলের আক্রমণে সুদক্ষ ছিলেন। ইংরেজ সেনাপতির সহিত প্রথম যুদ্ধে ভীত না হইয়া, বরং তাঁহার সামরিক কৌশলের ক্রটিতে তিনি অধিকতর সাহসসম্পন্ন হইয়া উঠিলেন। তাঁহার সৈন্য পশ্চাৎ হটিয়া গিয়াছিল। ইহাতেও ইংরেজ সেনাপতি যখন নগরে প্রত্যাবর্তনে উদ্বৃত্ত হইলেন, তখন তাঁহার প্রতিভা তাঁহাকে কৌশলময় কৰ্ম্মসাধনে প্রবর্তিত করিল। তিনি জানিতেন, যে সেনাপতির সম্মুখে বিপক্ষেরা থাকিতে না পারিয়া হটিয়া যায়, তিনি কখনও আপনার সন্নিবেশের স্থল পরিত্যাগ পূর্বক প্রত্যাবর্তনে উদ্বৃত্ত হইবেন না। এ স্থানে তিনি দেখিলেন যে, ইংরেজ সেনাপতি তাঁহার কামান অধিকার পূর্বক কেবল প্রত্যাবর্তনে মনোনিবেশ করিলেন না। তাঁহার অশ্বারোহীদিগেরও অগ্রসর হইবার সুবিধা করিয়া দিলেন। এতদ্ব্যতীত সেনাপতি যুদ্ধের প্রাক্কালে যে স্থানে শিবির সন্নিবেশ করিয়াছিলেন, সেই স্থানে পরিত্যাগ পূর্বক নগরের অধিকতর নিকটবর্তী স্থানে সৈন্য সমাবেশ করিলেন।

অভিজ্ঞ পাঠকের মানসপটে পঠিত গ্রন্থের বিষয় যেমন সুস্পষ্টরূপে অঙ্কিত হয়, তাত্যা টোপেও সেইরূপ স্পষ্টরূপে ওয়াইণ্ড্‌হামের এই ক্রটি বুদ্ধিতে পারিলেন । এইরূপ সুযোগ তাঁহাকে অধিকতর উদ্যমশীল করিয়া তুলিল । তিনি এই সুযোগে প্রকৃত সেনাপতির গ্রাম স্বকীয় প্রতিভাধরে অভীষ্টসাধনে উদ্যত হইলেন ।\*

যুদ্ধকুশল মরাঠা সেনাপতি আপনার প্রতিপক্ষের অধিনায়ককে ২৪ ঘণ্টাও অবসর দিলেন না । তিনি এই আদেশ দিলেন যে, সৈনিকদলের যে ভাগ ২৬শে তারিখ যুদ্ধে নিয়োজিত ছিল, তাহারা পর দিন প্রাতঃকালে অস্ত্রাদিতে সজ্জিত থাকিবে । সিওলী এবং শিবরাজপুরে যে সৈনিকদল অবস্থিতি করিতেছে, তাহারা ২৬শে তারিখ রাত্ৰিকালে পছঁছিয়া ইংরেজসৈন্যের দক্ষিণ ভাগে যখন গুলি চালাইতে থাকিবে, তখন পূর্বোক্ত সৈনিকগণ প্রতিপক্ষকে আক্রমণ করিবে । এইরূপ আদেশ দিয়া, চতুর মরাঠা সেনাপতি যুদ্ধার্থে অগ্রসর হইলেন । বিপক্ষবল যখন তাঁহার দৃষ্টিপথবর্তী হইল, তখন তাঁহার কামান হইতে গোলাবৃষ্টি হইতে লাগিল । ইংরেজপক্ষের কামানও নিশ্চেষ্ট থাকিল না । কিন্তু মুহূর্তকাল পরেই প্রতিপক্ষের কামান সকল একরূপ ভয়ঙ্করভাবে সংহারকার্য্য আরম্ভ করিল যে, উহাতে ওয়াইণ্ড্‌হামের সৈন্য একান্ত বিব্রত হইয়া পড়িল । তাত্যা টোপে সবিশেষ বুদ্ধিকৌশল প্রকাশ পূর্বক ব্যাহ সন্নিবেশ করিয়াছিলেন । তিনি প্রথমে কেবল কামান দ্বারা ওয়াইণ্ড্‌হামের সহিত যুদ্ধ আরম্ভ করেন । তাঁহার পদাতিদল পশ্চাত্তাগে অর্দ্ধচন্দ্রাকারে স্থাপিত ছিল । ইংরেজ সেনাপতি যদি এই ব্যাহভেদে অগ্রসর হইতেন, তাহা হইলে অর্দ্ধবৃত্তাকারে সন্নিবেশিত পদাতিশ্রেণী তাঁহাকে পরিবেষ্টনপূর্বক তদীয় ক্ষমতা পর্য্যদস্ত করিয়া ফেলিত । পাঁচ ঘণ্টা কাল যুদ্ধের পর ইংরেজ সেনাপতি জানিতে পারিলেন যে, বিপক্ষগণ নগরে প্রবেশ করিয়াছে । ওয়াইণ্ড্‌হাম আর কোন উপায় না দেখিয়া, সৈনিকদিগকে আপনাদের মৃগয় ছুর্গে ফিরিয়া যাইতে আদেশ দিলেন । প্রত্যাবর্তনকালে সৈনিকদল, বিপক্ষের কামানের গোলায় যেরূপ সম্ভ্রান্ত, সেইরূপ উচ্ছৃঙ্খল হইয়া পড়িল । তাহাদের শিবিরের পরিচারক

\* কর্ণেল মালিসনও এই ভাবে তাত্যা টোপের বুদ্ধির প্রশংসা করিয়াছেন ।—*Indian Mutiny. Vol. II., p. 237.*



ও অনুচরগণ পলায়ন করিয়াছিল । তাহাদের অনেক দ্রব্য বিপক্ষের হস্তগত হইয়াছিল । তাহাদের প্রায় তিন শত লোক যুদ্ধস্থলে দেহত্যাগ করিয়াছিল । তাহারা একরূপ ভীত হইয়াছিল যে, তাহাদের মধ্যে কিছুমাত্র শৃঙ্খলা ছিল না । তাহারা উদ্ভ্রান্তভাবে মালগুদাম খুলিল, পীড়িতদিগের জন্ত যে সুরা সংরক্ষিত ছিল, তাহা পান করিল, মদিরায় উন্মত্তপ্রায় হইয়া, আপনাদের আফিসারদিগের বাক্সগুলি ভাঙ্গিয়া ফেলিল । একজন প্রাচীন শিখসর্দার দুর্গদ্বারে দণ্ডায়মান ছিলেন । তিনি ইংরেজ সৈনিকদিগকে নিরতিশয় ভীতচিত্তে এবং উচ্ছৃঙ্খলভাবে দুর্গে আসিতে দেখিয়া, শৃঙ্খলারক্ষার জন্ত তাহাদিগকে থামাইতে চেষ্টা করিলেন । কিন্তু যখন তাঁহারা বৃদ্ধ সর্দারকে এক দিকে ঠেলিয়া ফেলিয়া দুর্গে প্রবেশ করিতে লাগিল, তখন তিনি হাত তুলিয়া তাহাদিগকে কহিলেন,— “যাহারা খালসাসৈন্যকে পরাজিত ও পঞ্জাব অধিকার করিয়াছে, তোমরা তাহাদের ভাই নও”, বৃদ্ধ সর্দার ইহা কহিয়া, পলায়মান সৈন্যের পশ্চাৎ যাইতে লাগিলেন এবং কাহারও কাহারও পিঠ চাপড়াইয়া কহিলেন,—“দোড়িও না, কোন ভয় নাই ; এখানে তোমাদিগকে কেহ মারিতে পারিবে না ।”\* তাত্যা টোপের রণকৌশলে ইংরেজসৈন্য ২৭শে নবেম্বর এইরূপ উদ্ভ্রান্তভাবে পলায়ন করিল । ওয়াইণ্ডহামকে মহারাষ্ট্রীয় বীরের বীরত্বচাতুরীতে এইরূপে পরাজয় স্বীকার করিতে হইল ।

ইংরেজ সেনাপতি এই সময়েও মৃতপ্রাচীরের মধ্যে আবদ্ধ থাকিতে ইচ্ছা না করিয়া গঙ্গা এবং নগরের মধ্যবর্তী বৃক্ষবহুল স্থানে রহিলেন । এই স্থানের গির্জাঘর এবং অন্যান্য গৃহগুলিতে ৫০০ শত নূতন তাঁবু, ১১,০০০ হাজার টোটা, ঘোড়ার সাজ, সৈনিকদিগের পরিচ্ছদ প্রভৃতি সংক্ষেপে পাঁচ লক্ষ টাকারও অধিক মূল্যের দ্রব্য ছিল । ইংরেজ সেনাপতি এ গুলি ২৭শে তারিখ রাত্তিকালে দুর্গে লইয়া বাইতে পারিতেন । কিন্তু তিনি এ বিষয়ে মনোযোগী করেন নাই । বোধ হয়, তাঁহার ধারণা ছিল যে, তিনি আপনার সন্নিবেশস্থলে থাকিয়াই ঐ সকল দ্রব্যের ভাণ্ডার রক্ষা করিতে পারিবেন । পর দিন প্রাতঃকালে তাত্যা টোপে নগর অধিকার করিলেন । বিবিধ পর্য্যন্ত গঙ্গার

\* Russell, Diary. Vol. I., p. 206.

তটভাগে তাঁহার প্রাধান্য প্রতিষ্ঠিত হইল। নগরের পুরোভাগে কামান সকল স্থাপিত হইল। এই সকল কামান হইতে একরূপ তীব্রবেগে গোলাবৃষ্টি হইতে লাগিল যে, সন্ধ্যাসমাগমের পূর্বে ইংরেজসৈন্য পলায়ন করিয়া, মৃৎ-প্রাচীরের মধ্যে আশ্রয় লইল। এ দিকে পূর্বোক্ত দ্রব্যাদির ভাঙার বিপক্ষ-দিগের হস্তগত হইল। এই ভাঙারের যে সকল দ্রব্য তাহারা অনাবশ্যক বোধ করিল, তৎসমুদয় ভস্মীভূত হইল। সৈনিকদিগের পরিচ্ছদাদি, যুদ্ধোপকরণ প্রভৃতি বিনষ্ট হইয়া গেল। কর্ণেল্ নেপিয়ার (অতঃপর লর্ড নেপিয়ার) ইঞ্জিনিয়ারবিভাগের কর্মে ব্যাপৃত হইয়া, বহুপরিশ্রমে যে সকল কাগজপত্র প্রস্তুত করিয়াছিলেন, তৎসমুদয়ও এই সন্ধে ভস্মীভূত হইল। সর্বভুক্ত অনল যখন ঐ সকল বিভিন্ন পদার্থ গ্রাস করিতেছিল, উহার প্রচণ্ড জ্বালাময়ী শিখা যখন ধূমস্তূপ ভেদ করিয়া, আকাশে উখিত হইতেছিল, তখন প্রধান সেনাপতির সৈনিকদল কাণপুরের সম্মুখে উপস্থিত হয়।

সেনাপতি ওয়াইণ্ড্‌হামের সৈন্যের মধ্যে কোন কোন দল বিপক্ষের প্রবল পরাক্রম খর্ব করিতে প্রয়াস পাইয়াছিল, কিন্তু তাত্যা টোপের সৈনিকদলের মধ্যভাগস্থ কামান হইতে একরূপ গোলাবৃষ্টি হইয়াছিল যে, তাহাদের অধিনায়কগণ কিছুতেই ঐ আক্রমণ নিরস্ত করিতে পারেন নাই। বৃদ্ধ ব্রিগেডিয়ার উইল্‌সনের বাহন হত হইল। শেষে রণস্থলে তাঁহারও দেহত্যাগ ঘটিল। আরও দুইজন অধিনায়ক নিহত হইলেন। কিন্তু ইঁহাদের সাহসে বিপক্ষগণের অগ্রসর হওয়ার তাদৃশ সুবিধা ঘটিল না। বিপক্ষেরা নোসেতু বিনষ্ট করে নাই, কিংবা গঙ্গার খালও পার হয় নাই; সুতরাং লক্ষ্য হইতে কাণপুরে আসিবার পথ এবং কাণপুর হইতে এলাহাবাদ যাইবার পথ বিমুক্তভাবে ছিল। যাহা হউক, ২৭শে তারিখ বিপক্ষদিগের পরাক্রমদর্শনে কাণপুরের ইংরেজসৈন্য নিরতিশয় চিন্তিত হইল। রাত্রিকালে এবং তৎপর দিন তাহাদের অদৃষ্টে কি ঘটবে, তাহারা উদ্বিগ্নচিত্তে তাহাই ভাবিতে লাগিল, কিন্তু রাত্রিসমাগমের পূর্বেই তাহাদের উদ্বিগ্ন হইল। যখন মার্কণ্ড আপনার রশ্মিজাল সংঘত করিয়া, জাহ্নবীর প্রান্তভাগে আশ্রয়গোপনে উদ্ভূত হইলেন, তখন নোসেতুর সম্মুখে প্রধান সেনাপতির আবির্ভাব হইল।

শ্রী কোমিন্ কাম্প্‌বেল লক্ষ্যে পরিত্যাগ পূর্বক সবিশেষ সতর্কতাসহকারে

কাণপুরের দিকে অগ্রসর হইতেছিলেন । ২৬শে নবেম্বর যখন তাত্যা টোপের বলবহলতা ওয়াইণ্ড্‌হামের দৃষ্টিগোচর হয়, তখন তিনি স্মার্ক কোলিন্ কাম্প্-বেল অথবা কাণপুরের পথে অথবা যে কোন ইংরেজ সেনানায়ক উপস্থিত থাকেন, তাঁহার নিকটে সাহায্য প্রার্থনা করিয়া পত্র পাঠাইয়াছিলেন । একজন এতদ্দেশীয় পত্রবাহক স্মার্ক কোলিনের দলের একটি সৈনিক পুরুষের হস্তে এই পত্র সমর্পণ করে । পত্র পড়িয়া স্মার্ক কোলিন্ স্পষ্ট বুদ্ধিতে পারিলেন যে, কাণপুর আক্রান্ত হইয়াছে । সুতরাং তিনি যত শীঘ্র পারেন, কাণপুরের অভিমুখে অগ্রসর হইতে লাগিলেন । ভাগীরথীতটে উপস্থিত হইয়া দেখিলেন যে, নোসেতু অব্যাহত রহিয়াছে । তাঁহার শিবির কাণপুরের অপর পারে সন্নিবেশিত হইল । তিনি স্বয়ং নোসেতু অতিক্রম পূর্বক ওয়াইণ্ড্‌হামের মৃৎপ্রাচীরপরিবেষ্টিত দুর্গে যাত্রা করিলেন । যাহারা প্রাচীরে ছিল, তাহারা প্রধান সেনাপতিকে দেখিতে পাইয়া, উল্লাসধ্বনি করিতে লাগিল । মুহূর্তমধ্যে প্রাচীরে লোকের পর লোক উঠিতে লাগিল । প্রধান সেনাপতি দুর্গে গিয়া, ওয়াইণ্ড্‌হামের সহিত সাক্ষাৎ করিলেন । এই সময়ে ওয়াইণ্ড্‌হামের বুদ্ধিচাতুরী, রণপাণ্ডিত্য, সৈন্তপরিচালনাকৌশল, সমস্তই তাত্যা টোপের নিকট ব্যর্থ হইয়াছিল । প্রধান সেনাপতি কাণপুরের এইরূপ অবস্থা দেখিয়া দুঃখিত হইলেন । তিনি ওয়াইণ্ড্‌হামকে আপনার সঙ্কলিত বিষয় জানাইয়া, শিবিরে ফিরিয়া আসিলেন । সমস্ত রাত্রি, কামান, জিনিসপত্র, মহিলা, বালকবালিকা এবং রুগ্ন লোক তাঁহার শিবিরে পছঁছিতে লাগিল ।

পর দিন প্রাতঃকালে তাত্যা টোপে দেখিলেন যে, জাহ্নবীর অপর তটে ইংরেজপক্ষের অপর সৈনিকদলের শিবির সন্নিবেশিত হইয়াছে । তিনি ইহা দেখিয়া, ঐ সৈনিকদিগের উত্তরণের পথ বিনষ্ট করিতে উদ্বৃত হইলেন । বৃহৎ কামান সকল সেতুর সন্মুখে স্থাপিত হইল । কিন্তু কাণ্টেন পীলের কামান হইতে এমন তীব্রবেগে গোলাবর্ষণ হইতে লাগিল যে, তাত্যা টোপের সৈনিকদিগের কামান কার্যকর হইল না । প্রধান সেনাপতির সৈনিকদল নোসেতু দিয়া কাণপুরে উপস্থিত হইতে লাগিল । তাহাদের পশ্চাৎ জিনিসপত্র এবং বালকবালিকা, পীড়িত প্রভৃতি রক্ষণীয় জীবগণের গাড়ি, ডুলী প্রভৃতি যাইতে লাগিল । ২৯শে নবেম্বর অপরাহ্ন ৩টার সময়ে ইহাদের দল কাণপুরের দিকে

যাত্রা করিয়াছিল। সমস্ত অপরাহ্নকাল, তৎপরবর্তী রাত্রি, তৎপরদিন অপরাহ্ন ৬টা পর্য্যন্ত, ইহারা দলে দলে নৌসেতুপথে ভাগীরথী অতিক্রম করে। সেতু অতিক্রম সময়ে ইহাদের তাদৃশ বাধা ঘটে নাই। ৩০শে নবেম্বর অপরাহ্ন ৬টার সময়ে ইহারা সকলে কাণপুরে পদার্পণ করে। গঙ্গার খালের অপর দিকে—বিস্তৃত প্রান্তরে ইহাদের শিবির স্থাপিত হয়। ৫ মাস পূর্বে নিঃসহায় ইউরোপীয়গণ আপনাদের বৃদ্ধ সেনাপতির সহিত ঘাতকের হস্তে দেহবিসর্জনের জন্ত দুঃসহ দুঃখের নিদর্শনস্বরূপ যে মৃৎপ্রাচীরবেষ্টিত স্থান হইতে বহির্গত হইয়াছিলেন, এখন ইহারা সেই ইতিহাসপ্রসিদ্ধ চিরস্মরণীয় স্থানের নিকটে অবস্থিতি করিতে লাগিল।

এই সময়ে বিপক্ষগণ পূর্বের গ্রায় সমগ্র নগর এবং ভাগীরথীর তটদেশ আপনাদের অধিকারে রাখিয়াছিল। সংখ্যায় তাহারা শক্তিসম্পন্ন ছিল। দুর্দ্বন্দ্ব কামানে তাহারা দুর্ভাগ্য হইয়া উঠিয়াছিল। ইহার উপর জয়লাভে তাহারা অধিকতর সাহসী এবং আত্মবলের পরিচয় দিবার জন্ত অধিকতর আগ্রহযুক্ত হইয়াছিল। ব্যূহসন্নিবেশে তাহাদের বুদ্ধিচাতুরী প্রদর্শিত হইয়াছিল। তাহাদের বামে—জাহ্নবী ও নগরের মধ্যবর্তী স্থলে—বৃক্ষবহুল উন্নত ভূখণ্ড, অনেকগুলি ভগ্নপ্রায় বাড়ী এবং নালা ছিল। তাহাদের মধ্যভাগে বহু-বিস্তৃত নগর রহিয়াছিল। উহার বহু সংখ্যক সঙ্কীর্ণ গলি চারি দিকে বক্রভাবে থাকাতে তাহাদের আত্মরক্ষার সুযোগ ঘটয়াছিল। তাহাদের দক্ষিণে—গঙ্গার খালের অপর দিকে বিস্তৃত প্রান্তর ছিল। এই প্রান্তরে গোবালিয়রের প্রসিদ্ধ সৈনিকদলের শিবির স্থাপিত হইয়াছিল। খালের সেতু ইহাদের অধিকারে ছিল, এবং ইহাদের নিকটে কাল্পীর পথ বিমুক্তভাবে রহিয়াছিল। এই বহুদলে বিভক্ত, বহুস্থানে সন্নিবেশিত, বহুবিধ যুদ্ধাস্ত্রে সজ্জিত সৈন্তের বিশ্বাস ছিল যে, শ্মার কোলিন কাম্পবেল তাহাদের নিষ্কাশনে সমর্থ হইবেন না। কিন্তু শ্মার কোলিন বীরোচিত গুণে অলঙ্কৃত ছিলেন। উপস্থিত কর্ম হ্রস্ব হইলেও তাঁহার নিকটে অসাধ্য বোধ হইল না। তিনি যখন পরাক্রান্ত বিপক্ষের সন্নিবেশস্থল দেখিলেন, তখন সম্পূর্ণ বুদ্ধিতে পারিলেন যে, তাহাদের বাম ভাগ ও মধ্যস্থল যেরূপ সুরক্ষিত, দক্ষিণ ভাগ সেরূপ নহে। বামে ভাগীরথী এবং ঘনসন্নিবিষ্ট-বৃক্ষশ্রেণী ও গৃহাদিতে তাহাদের আত্মরক্ষার সুযোগ ঘটয়াছে। মধ্যভাগে

নগরের বক্রাকার সঙ্কীর্ণ গলি এবং উন্নত গৃহসমূহে তাহাদের পক্ষ সুরক্ষিত হইয়াছে। কিন্তু দক্ষিণ ভাগে তাহাদের সম্মুখে বিস্তৃত প্রান্তর রহিয়াছে। এই প্রান্তরে কোনরূপ আবরণ নাই। এই দিকে তাহাদিগকে আক্রমণ করিলে, কেন্দ্রস্থল ও বাম ভাগ হইতে অপরাপর দলের আগমনের পূর্বে, তাহাদের পরাজয় সুসাধ্য হইবে। এই স্থান যদি অধিকৃত হয়, তাহা হইলে কালীর পথে গমনের ব্যাঘাত জন্মিবে, বাম ভাগ ও কেন্দ্রস্থল হইতে বিপক্ষেরা এই দিকে আসিলে, ঐ দুই স্থানে তাহারা হীনবল হইয়া পড়িবে।

প্রধান সেনাপতি প্রতিভাবলে ইহা স্থির করিলেন, কিন্তু তিনি সহস্রা বিপক্ষের ব্যহভেদে অগ্রসর হইলেন না। এ সময়ে অনেক সহায়শূন্য লোক তাঁহার রক্ষণীয় হইয়াছিল। তিনি লক্ষ্য হইতে আপনাদের কুলমহিলা, শিশু সন্তান, রুগ্ন ও আহতদিগকে সঙ্গে লইয়া আসিয়াছিলেন। ইহাদের ছরবহার তাঁহার মনে সাতিশয় কষ্ট জন্মিয়াছিল। ইহাদের কেহ কেহ অভিভাবকশূন্য হইয়াছিল, কেহ কেহ সংসারের প্রিয় জন হইতে জন্মের মত বিচ্ছিন্ন হইয়া পড়িয়াছিল, কেহ কেহ গুরুতর আঘাত পাইয়া বিকলাঙ্গ হইয়া উঠিয়াছিল, কেহ কেহ দুরন্ত রোগে একান্ত অবসন্ন হইয়াছিল। স্থার কোলিনু ইহাদের জন্ত নিরতিশয় চিন্তিত হইয়াছিলেন। ১লা, ২রা এবং ৩রা ডিসেম্বর ইহাদিগকে এলাহাবাদে পাঠাইবার বন্দোবস্ত করা হয়। শেষোক্ত তারিখ রাত্রিকালে ইহারা এলাহাবাদে যাত্রা করে। এই কয়েক দিন সিপাহীরা মধ্যে মধ্যে ইংরেজপক্ষের ঘাঁটি আক্রমণ করিয়াছিল বটে, কিন্তু তাহারা কৃতকার্য হইতে পারে নাই। যাহা হউক, প্রধান সেনাপতি পীড়িতদিগকে এলাহাবাদে পাঠাইয়া তৃপ্তি হইতে নিষ্কৃতি পাইলেন। এখন তিনি বলবত্বল, পরাজ্ঞাস্ত বিপক্ষের সমক্ষে আপনাদের প্রাধান্যস্থাপনে উত্তম হইলেন। তাঁহার ৫,০০০ হাজার পদাতি, ৬০০ শত অশ্বারোহী, এবং ৩৫টি কামান ছিল। তাঁহার প্রতিপক্ষগণ ২৫০০০ হাজার সৈন্য এবং ৪০টি কামান লইয়া যুদ্ধক্ষেত্রে উপস্থিত হইয়াছিল। কিন্তু ইহাদের মধ্যে ১৪০০০ হাজার সৈন্য সুশিক্ষিত ছিল। চারি দল গোলন্দাজ, দুই দল অশ্বারোহী, সাত দল পদাতি, সমুদয়ে ৭০০০ লোক গোবালিয়রের সৈনিকশ্রেণীভুক্ত ছিল। নানা সাহেবের অহুচর এবং বুদ্ধলখণ্ড ও মধ্য ভারতবর্ষের সিপাহীগণে বিপক্ষদের পরিপূতি

ঘটিয়াছিল। তাত্যা টোপে সমুদয় সৈন্তের অধ্যক্ষ ছিলেন। নানা সাহেব সৈনিকদলের বাম ভাগ অর্থাৎ তাঁহার অধীন সৈন্ত ও অনুচরদিগের পরিচালনা করিতেছিলেন।\*

৬ই ডিসেম্বর প্রাতঃকালে উভয় পক্ষে যুদ্ধারম্ভ হইল। তাত্যা টোপে ও নানা সাহেব সিপাহীদিগের পরিচালনা করিতে লাগিলেন। প্রধান সেনাপতি এবং ওয়াইণ্ডহাম, ওয়ালপোল প্রভৃতি সেনানায়কগণকর্তৃক ইংরেজ পক্ষের সৈন্ত পরিচালিত হইল। প্রায় সমস্ত দিন উভয় পক্ষ পরস্পরের পরাক্রমনাশের জন্য স বিশেষ সাহস ও রণকৌশলের পরিচয় দিল। কাপ্তেন পীলের পরিচালিত কামান এ সময়ে স বিশেষ কার্যকর হইল। তাত্যা টোপে পরাজিত হইলেন। তাঁহার বিপুল বাহিনী পরস্পরবিচ্ছিন্ন হইয়া ইতস্ততঃ প্রধাবিত হইল। ইংরেজ-সৈন্ত প্রায় ১৪ মাইল পর্য্যন্ত ইহাদের পশ্চাৎ গমন করিল। বিপক্ষদিগকে এইরূপে তাড়িত করিয়া, ইহারা নিশীথকালে কাণপুরে প্রত্যাগত হইল।

গোবালিয়রের সৈন্ত একরূপ তাড়াতাড়ি আপনাদের শিবির পরিত্যাগ পূর্বক চলিয়া গিয়াছিল যে, তাহারা কোন দ্রব্য সঙ্গে লইয়া যাইতে পারে নাই। বিজয়ী ইংরেজসৈন্ত যখন তাহাদের শিবিরে উপস্থিত হয়, তখন তাহারা দেখিয়াছিল যে, “চপাটি আঙুণে গরম হইতেছে, ঝাঁড়গুলি গাড়ির পশ্চাত্তাগে দণ্ডায়মান রহিয়াছে। পীড়িত ও আহতগণ চিকিৎসালয়ে অবস্থিতি করিতেছে”। † এইরূপে সমুদয় যথাবৎ রহিয়াছে, কেবল সৈনিকগণ ও তাহাদের পরিচারকগণ উপস্থিত নাই। কালীর পথের সমীপবর্তী স্থানে গোবালিয়রের সৈন্ত তাহাদের মধ্যস্থল এবং বাম ভাগ হইতে বিচ্ছিন্ন হইয়াছিল। এই দুই ভাগের সিপাহীদিগের সম্মুখে কেবল বিচুরের পথ ছিল। এই পথ অপরুদ্ধ হইলে তাহারা আর কোন দিকে হটয়া যাইতে পারিত না। সেনাপতি মানস্ফীল্ড উক্ত পথ অপরুদ্ধ করিবার ভার প্রাপ্ত হইলেন। কিন্তু তিনি এ বিষয়ে কৃতকার্য হইতে পারেন নাই। সিপাহীগণ কাণপুর পরিত্যাগপূর্বক বিচুরের পথে ধাবিত হয়।

\* মার্টিন সাহেব নির্দেশ করিয়াছেন যে নানা সাহেবের জাতা বাল সাহেব ইহাদের মধ্যে ছিলেন।—*Indian Empire, Vol. II, p. 474.*

† *Blackwood's Magazine, October, 1858, quoted in Malleson's Indian Mutiny. Vol. II., p. 271. note.*

পাছে ইহারা শিবরাজপুরের তিন মাইল দূরে সরাই ঘাটে গঙ্গা পার হইয়া, অযোধ্যার দিকে অগ্রসর হয়, এই আশঙ্কায় প্রধান সেনাপতি, সেনানায়ক হোপ্ গ্রাণ্টকে ইহাদের বিরুদ্ধে পাঠাইয়া দেন। সিপাহীরা আপনাদের কামান ইত্যাদি লইয়া, সরাই ঘাটে গঙ্গা পার হইবার উদ্যোগ করিতেছে, এমন সময়ে হোপ্ গ্রাণ্ট উপস্থিত হইয়া ইহাদিগকে পরাজিত করেন। ইহাদের ১৩টি কামান তৎকর্তৃক অধিকৃত হয়। ৯ই ডিসেম্বর এই যুদ্ধ ঘটে। এইরূপে ৬ই এবং ৯ই ডিসেম্বর, এই দুই দিনে দুই স্থানে পরাজিত হইয়া, সিপাহীদিগের দুই দল পরস্পরবিচ্ছিন্ন হইয়া পড়ে। গোবালিয়রের সৈন্য কালীতে গিয়া সমবেত হয়। তাত্যা টোপে পুনর্বার ইহাদিগকে শৃঙ্খলাবদ্ধ করেন। নানা সাহেব বিঠুরে উপস্থিত হইলেন। কিন্তু ইংরেজসৈন্যের উপস্থিতির সংবাদ পাইয়া, তিনি সরাই ঘাটের যুদ্ধের পূর্বেই আপনার কামান ও অনুচরবর্গকে লইয়া, অযোধ্যার দিকে প্রস্থান করেন।\* জুলাই মাসে সেনাপতি হাবেলক বিঠুরে নানা সাহেবের প্রাসাদধ্বংসের কার্য আরম্ভ করিয়াছিলেন। এখন এই বিধ্বংসব্যাপার শেষ হয়। প্রধান সেনাপতির আদেশে হোপ্ গ্রাণ্ট ১১ই ডিসেম্বর বিঠুরে

\* ৯৩ সংখ্যক হাইলাণ্ডার সৈনিকদলের সার্জেন্ট্ ফরবস্-মিচেল স্মার কোলিন্ কাম্প্-বেলের সৈন্যের মধ্যে ছিলেন। তিনি সিপাহীযুদ্ধের কালে আপন দলের যে কার্যবিবরণ দিয়াছেন, তাহাতে নির্দেশ আছে যে, সরাই ঘাটে যখন সিপাহীদিগের নৌকাগুলি আক্রান্ত হয়, তাহার পূর্বেই নানা সাহেবের নৌকা গঙ্গার অপর পারে যায়। নানা সাহেব অযোধ্যার দিকে নিরাপদে অগ্রসর হইলেন।—*Forbes-Mitchell, Reminiscences &c. p. 150.*

লর্ড রবার্টস্ লিখিয়া গিয়াছেন যে, অর্জুন তেওয়ারি নামক তাঁহার একজন চর ছিল। এই ব্যক্তি ১ সংখ্যক পদাতিদলে সিপাহীর কর্ম করিত। সিপাহীযুদ্ধের সময়ে অর্জুন তেওয়ারি ইংরেজদিগের প্রতি অপরিমিত বিশ্বস্ততা দেখায়। বাঁদার গোলযোগের সময়ে এই ব্যক্তি একজন ইউরোপীয় কেরণা এবং তাহার স্ত্রীকে রক্ষা করে। ইহার পর অর্জুন তেওয়ারি চরের কর্মে নিয়োজিত হইয়া, ইংরেজ সেনাপতিদিগের পত্রাদি নির্দিষ্ট স্থানে লইয়া বাইত। উপস্থিত সময়ে রবার্টস্ এই বিশ্বস্ত চরের নিকটে নানা সাহেবের সংবাদ জানিতে ইচ্ছা করেন। অর্জুন তেওয়ারি পর দিন তাঁহার সহিত দেখা করিবে বলিয়া, বিঠুরে চলিয়া যায়। ৮ই ডিসেম্বর প্রভুশঙ্ক চর রবার্টসের নিকট উপস্থিত হইয়া, এই সংবাদ দেয় যে, নানা সাহেব পূর্বরাত্রিতে বিঠুরে শয়ন করিয়াছিলেন, কিন্তু তাঁহাদের আগমনবার্তা শুনিয়া, কামান এবং অনুচরবর্গের সহিত অযোধ্যায় যাইবার জন্ত কয়েক মাইল দূরে গঙ্গা পার হইবার চেষ্টা করিতেছেন। যুদ্ধের অবসান হইলে লর্ড রবার্টসের চেষ্টায় অর্জুন তেওয়ারি গবর্নমেট হইতে আপনার জীবিতকাল পর্যন্ত বার্ষিক ১,২০০ শত টাকা পেন্সন পাইয়া-ছিল।—*Forty-one years &c. Vol. I., p. 375, note.*

গিয়া, তোপে মন্দির উড়াইয়া দেন, প্রাসাদ দগ্ধ করিয়া ফেলেন । বিশ্বাসঘাতক আজিমউল্লা যে গৃহে অবস্থিতি করিত, সেই গৃহে কতিপয় পত্র পাওয়া যায় । \* এতদ্ব্যতীত কতকগুলি বিচিত্র দ্রব্য অধিকৃত হয় । নানা সাহেব, ত্রিশলক্ষ টাকা, বারুদ ও গোলাগুলির বাক্সে বন্ধ করিয়া, একটি বৃহৎ কূপে ফেলিয়া দিয়াছিলেন । এতদ্ব্যতীত স্বর্ণ ও রৌপ্যের পাত্র ঐ কূপে নিক্ষিপ্ত হইয়াছিল । চরমুখে এই সংবাদ পাইয়া, ইংরেজসৈন্য ২৫ই হইতে ২৬শে ডিসেম্বর পর্য্যন্ত রাত্রি দিন ঐ বহুমূল্য দ্রব্যের উদ্ধারে জন্ত চেষ্টা করে । মুদ্রা ও বাসন ইত্যাদি পাওয়া যায়, কিন্তু সৈনিকগণ এই গুরুতর পরিশ্রমের পুরস্কারস্বরূপ কিছুই প্রাপ্ত হয় নাই ।

\* দুই খানি পত্র লাফেঁ নামক একজন ফরাসী কর্তৃক ফরাসীভাষায় লিখিত । উহা চন্দননগরে ফরাসীদিগের উপনিবেশসংক্রান্তবিষয়বস্তু । অনেকগুলি পত্র ইংলণ্ড হইতে প্রেরিত । আজিমউল্লা খাঁ সুপুরুষ । তাঁহার রূপমাধুরী দর্শনে ইংলণ্ডের একটি যুবতী তাঁহার সহিত পরিণয়সূত্রে আবদ্ধ হইবার জন্ত ভারতবর্ষে আসিতে ইচ্ছা করিয়াছিলেন । অনেক পত্র ইংলণ্ডের সম্রাস্তবংশের নারীর লিখিত । একটি প্রোঢ়া স্বকীয় পত্রে, পূর্বদেশীয় প্রিয় পুত্র বলিয়া, আজিমউল্লার সম্ভাষণ করিয়াছিলেন । কয়েক খানি পত্র আজিমউল্লার হস্ত-লিখিত । দুই খানি পত্র, কন্ঠাটিনোপলের ওমর পাশার নামে, সিপাহীদিগের অসন্তোষ এবং ভারতবর্ষের বর্তমান গোলযোগ সম্বন্ধে লিখিত হইয়াছিল ।—*Forty-one years &c.* Vol. I. p. 427-429.



## পঞ্চম অধ্যায়

ফতেগড় অধিকার—প্রধান সেনাপতির লক্ষ্মীযাত্রার উদ্যোগ।

ফতেগড় অধিকার—শ্যার কোলিন্ কাম্প্বেলের বেরেলীতে যাত্রার ইচ্ছা—গবর্নর-  
জেনেরলের ভিন্ন মত—শ্যার কোলিনের লক্ষ্মীতে যাত্রার উদ্যোগ—তাঁহার সৈনিকদলের  
উনাওতে অবস্থিতি—ইংরেজসৈন্যের শিবিরে চরের উপস্থিতি—তাঁহার অবরোধ—তাঁহার  
বিচিত্র আত্মবিবরণ—তাঁহার ফাঁসী।

গোবালিয়রের সুশিক্ষিত ও সাহসিক সৈনিকদলের আক্রমণ হইতে কাণপুর  
বিমুক্ত হইল। কিন্তু এখনও গঙ্গাযমুনার মধ্যবর্তী বিস্তৃত ভূভাগের অনেক  
স্থলে উত্তেজিত সিপাহীদিগের প্রাধান্য ছিল। সেনাপতি গ্রিথেড এবং হোপ্-  
গ্রাণ্ট ভিন্ন ভিন্ন স্থলে উপস্থিত হইয়াছিলেন বটে, কিন্তু তাঁহারা সর্বাংশে  
বিপ্লবের শাস্তি করিতে পারেন নাই। সিপাহীরা দলবদ্ধ হইয়া; পুনর্বার  
ইংরেজের প্রাধান্য বিপর্যাস্ত করিয়া ফেলিয়াছিল। মৈনপুরী, ফতেগড় প্রভৃতি  
স্থানে ইহাদের ক্ষমতা প্রতিষ্ঠিত ছিল। শ্যার কোলিন্ কাম্প্বেল এই সকল  
স্থানের পুনরধিকারে উদ্বৃত্ত হইলেন। তিনি দোয়াব অধিকার পূর্বক রোহিল-  
খণ্ড হইতে বিপক্ষদিগকে তাড়াইবার ইচ্ছা করেন। উত্তরপশ্চিম প্রদেশের  
তিনটি প্রধান স্থান তাঁহাদের অধিকৃত হইয়াছিল। তাঁহারা উত্তরপশ্চিমে দিল্লী,  
দক্ষিণপূর্বে এলাহাবাদ, এবং এতদুভয়ের মধ্যবর্তী আগরায় প্রাধান্যপ্রতিষ্ঠায়  
সমর্থ হইয়াছিলেন। কিন্তু ফতেগড়ে ফরক্কাবাদের নবাব স্বপ্রধান ছিলেন।  
প্রধান সেনাপতি সর্বপ্রথম ঐ স্থানে যাত্রার আয়োজন করিলেন। তিনি  
মৈনপুরী পর্য্যন্ত অধিকারের জন্য ব্রিগেডিয়ার ওয়াল্পোলকে পাঠাইয়া দিলেন।  
কর্ণেল সীটনের তত্ত্বাবধানে দোয়াবের উত্তরভাগ হইতে রসদ ইত্যাদি আসিতে-  
ছিল। ইনি মৈনপুরীর নিকটে ওয়াল্পোলের সহিত সন্মিলিত হইতে আদিষ্ট  
হইলেন। অতঃপর এই উভয় অধিনায়কের সৈনিকদল পরস্পর সন্মিলিত  
হইয়া, ফতেগড়ে যাত্রা করিবে, এইরূপ সিদ্ধান্ত স্থির হইল।

কর্ণেল সীটন রসদ ইত্যাদির রক্ষায় নিয়োজিত ছিলেন। তিনি এই  
ডিসেম্বর দিল্লী হইতে যাত্রা করেন। বিপক্ষেরা আলীগড়বিভাগে রহিয়াছে,

এই সংবাদ ইতঃপূর্বে তাঁহার গোচর হইয়াছিল । তিনি আলীগড়ে রসদ ইত্যাদি এবং উহার রক্ষার জন্য উপযুক্ত সৈনিক ও কামান রাখিয়া, বিপক্ষদিগের অভিমুখে অগ্রসর হইলেন । ডিসেম্বর মাসের মধ্যভাগে খাসগঞ্জ এবং পাতিয়ালীতে বিপক্ষেরা পরাজিত হয় । এই যুদ্ধে দিল্লীর প্রসিদ্ধ কাপ্তেন হডসন আপনার অশ্বারোহীদিগের সহিত ইংরেজ সেনানায়কের পক্ষ সমর্থন করিয়াছিলেন । অতঃপর ইংরেজের সৈনিকদল মৈনপুরীতে যাত্রা করে । মৈনপুরীরাজ তেজ সিংহ ইহাদিগকে বাধা দিবার জন্য যথাশক্তি চেষ্টা করেন, কিন্তু তাঁহার প্রয়াস বিফল হয় । ২৭শে ডিসেম্বর ইংরেজসৈন্য মৈনপুরীর যুদ্ধে জয়ী হয় । এ দিকে ব্রিগেডিয়ার ওয়াল্পোল্, আকবরপুর এবং এটোয়া হইয়া মৈনপুরীর নিকটে বেওয়ার নামক স্থানে কর্ণেল সীটনের সহিত সন্মিলিত হইলেন । সন্মিলিত সৈনিকদল অতঃপর ফতেগড়ের অভিমুখে যাত্রা করে ।

এ দিকে ২৪শে ডিসেম্বর প্রধান সেনাপতি কাণপুর পরিত্যাগ করেন । ৩১শে তারিখ তিনি গুরসাহিগঞ্জে উপস্থিত হইলেন । কাপ্তেন হডসন, সেনানায়ক ওয়াল্পোল্ এবং সীটনের পূর্বেই প্রধান সেনাপতির শিবিরে পদার্পণ করেন । গুরসাহিগঞ্জের পনর মাইল অন্তরে মীরণ-কা-সরাই নামক স্থানে প্রধান সেনাপতির শিবির ছিল । প্রথমোক্ত স্থান হইতে পাঁচ মাইল দূরে কালী নদী প্রবাহিত হইতেছে । বিপক্ষ সিপাহীদিগের যদি কিছুমাত্র বুদ্ধিকৌশল থাকিত, তাহা হইলে তাহারা পূর্বেই কালী নদীর সেতু ভগ্ন করিয়া, প্রধান সেনাপতির আগমনে বাধা দিতে পারিত । কিন্তু বিপদের সময়ে তাহাদের এইরূপ প্রত্যাশনমতি প্রকাশ পায় নাই । ইংরেজসৈন্য গুরসাহিগঞ্জে উপস্থিত হইলে তাহারা তাড়াতাড়ি সেতু ভাঙ্গিয়া ফেলিতে চেষ্টা করে । চেষ্টা বিফল হয় । প্রধান সেনাপতির ইচ্ছা ছিল যে, যাবৎ ওয়াল্পোল্ এবং সীটনের সৈন্য সন্মিলিত না হয়, তাবৎ তিনি ফতেগড়ের দিকে অগ্রসর হইতে নিরস্ত থাকিবেন । কিন্তু সেতু ভাঙ্গার সংবাদে প্রধান সেনাপতি আপনার সঙ্কল্প ত্যাগ করেন । নব বর্ষের প্রথম দিন ( ১৮৫৮ অক্টোবর ১লা জানুয়ারি ) তাঁহার হৃদয়ে অভিনব আশা ও উৎসাহ সঞ্চারিত করে । তিনি আশায় অধ্যবসায়-সম্পন্ন এবং উৎসাহে উৎকুল হইয়া, খোদাগঞ্জ পল্লীর নিকটে কালী নদীর সেতুর সম্মুখে উপস্থিত হইলেন । অবিলম্বে ইঞ্জিনিয়ারগণ সেতুর ভগ্ন অংশের

মেরামত করিতে থাকেন । অল্প সময়ের মধ্যে এই কৰ্ম সম্পন্ন হয় । পর দিন নিবিড় কুজ্জাটিকার মধ্যে বিপক্ষগণ ফতেগড় হইতে বহির্গত হইয়া, ইংরেজসৈন্তের গতিরোধের জন্ত কালী নদীর তটবিভাগে উপনীত হয় । কুজ্জাটিকা তিরোহিত হইলে দেখা গেল যে, ফরক্কাবাদের নবাবের বহুসংখ্যক সিপাহী খোদাগঞ্জ পল্লীতে সমবেত হইয়াছে । ইংরেজসৈন্ত সেতুপথে নদী উত্তীর্ণ হয় । নদীর তটে খোদাগঞ্জ পল্লীতে ২রা জানুয়ারি উভয় পক্ষে যুদ্ধ ঘটে । সিপাহীরা যথোচিত দৃঢ়তা ও পরাক্রমের সহিত আত্মপক্ষ সমর্থন করিয়াছিল । তাহাদের একটি কামান সেতুর সন্নিকটবর্তী টোলঘরের পশ্চাৎদিকে সন্নিবেশিত ছিল । এই কামানের গোলায় ইংরেজপক্ষের অনেকে দেহত্যাগ করে । উক্ত কামানকে নিশ্চেষ্ট করিবার জন্ত কাপ্তেন পীলের কামান সন্নিবেশিত হয়, এই কামানের গোলা প্রবলবেগে টোল ঘরে পড়িতে থাকে । উহাতে বিপক্ষদিগের অনেকে নিহত হয় । তাহাদের কামানও বিপর্যাস্ত হইয়া যায় । তাহারা ইংরেজের আগ্নেয়াস্ত্রের সম্মুখে স্থিরভাবে থাকিতে না পারিয়া, ফতেগড়ের অভিমুখে ৩।৪ মাইল শৃঙ্খলার সহিত গমন করে । অতঃপর তাহাদের মধ্যে সাহসের সঞ্চার হয় । তাহারা আবার যুদ্ধের জন্ত ফিরিয়া দাঁড়ায়, কিন্তু ইংরেজপক্ষের অশ্বারোহীদিগের অস্ত্রাঘাতে, শিখদিগের বন্দুকের গুলিতে, বড়শাধারীদিগের বড়শাপ্রয়োগে তাহাদের দলের বহুসংখ্যক সৈনিক মৃত্যুমুখে পতিত হয় । শবরাশিতে বিস্তৃত প্রান্তরের অনেক স্থান আচ্ছন্ন হইয়া উঠে । হতাবশিষ্ট সিপাহীগণ তাড়াতাড়ি ফতেগড় পরিত্যাগ পূর্বক ভাগীরথী উত্তীর্ণ হইয়া, রোহিলখণ্ডে পলায়ন করে ।

পর দিন স্মার কোলিন্ কাম্পবেল দুর্গাভিমুখে অগ্রসর হইলেন । কামানের গোলায় দুর্গদ্বার ভগ্ন হয় । ইংরেজসৈন্ত বিনা বাধায় দুর্গে প্রবেশ করে । সিপাহীরা প্রায় যাবতীয় দ্রব্য ফেলিয়া প্রস্থান করিয়াছিল । দুর্গে কামানের গাড়ির জন্ত অনেক সেগুন কাঠ সংগৃহীত হইয়াছিল । এতদ্ব্যতীত এঞ্জিন, নানাপ্রকার কামান, সৈনিকদিগের বহুসংখ্যক পরিচ্ছদ, সর্বসমষ্টিতে প্রায় দশ লক্ষ টাকার দ্রব্য ছিল । সিপাহীরা এগুলি ভস্মীভূত করে নাই । গঙ্গার উপরে যে নোসেতু ছিল, তাহাও বিনষ্ট হয় নাই । এখন পূর্বোক্ত বহুমূল্য দ্রব্য গবর্ণমেণ্টের অধিকৃত হইল । গঙ্গার সেতুও সুরক্ষিত রহিল ।

গোবালিয়রের সৈনিকদলের পরাজয়ের পর গঙ্গার দক্ষিণভাগের জনপদে সামরিক আইনের পরিবর্তে সাধারণ আইন জারি হইয়াছিল। এখন সাধারণ-বিভাগের কর্মচারীগণ লোকের জীবন ও সম্পত্তির রক্ষণ বা হরণের ভার গ্রহণ করিয়াছিলেন। এই সময়ে জনবর উঠিয়াছিল যে, ফরক্বাদের নবাব নগরে রহিয়াছেন। ইংরেজ বিচারক ঘোষণা করিলেন যে, যদি নবাব ধৃত না হয়েন, তাহা হইলে ইংরেজসৈন্য নগরে লুণ্ঠরাজ করিবে। কিছুক্ষণ পরে নবাব ধৃত ও বিচারকের সমক্ষে আনীত হইলেন। কিন্তু ইনি প্রকৃত নবাব নহেন। নবাবের সম্পর্কীয় ব্যক্তি। ইঁহার নাম নাজীর খাঁ। ইঁহার অদৃষ্টে যাহা ঘটয়াছিল, সার্জেন্ট্ ফরব্‌স্-মিচেল তাঁহার এইরূপ বিবরণ দিয়াছেন,—“এক খানি সামান্য চারপায়ায়, এই নবাববংশীয় সর্দারের\* হস্তপদ আবদ্ধ ছিল। কুলিগণ চারপায়া লইয়া আসিয়াছিল, কি প্রণালীতে অপরাধীর বিচার হইয়াছিল, তাহা আমি জানি না। কিন্তু আমার বিশ্বাস যে, কোন জুরি বা উকীল ছিল না। আমি জানি যে, প্রথমে তাঁহার দেহ শূকরের চর্কিতে পরিলিপ্ত করা হয়, পরে ধাক্কাডেরা তাঁহাকে কঠোরভাবে বেত্রাঘাত করে, অনন্তর তাঁহার ফাঁসী হয়”। † কর্নেল আলিসন নামক অত্র একজন সৈনিক কর্মচারী এইভাবে লিখিয়া গিয়াছেন—“৪ঠা ইঁহার ( নাজীর খাঁ ) ফাঁসী হয়। ফাঁসীর পূর্বে ইঁহার প্রতি অনর্থক নির্দয়তা প্রকাশ করা হইয়াছিল। ইঁহাকে বলপূর্বক শূকরের মাংস খাওয়ান হয়। ধাক্কাডেরা ইঁহাকে কঠোররূপে বেত্রাঘাত করে। এই কার্য্য একটি মহৎ ও বিজয়ী জাতির অযোগ্য”। ‡ রেইক্‌স সাহেব লিখিয়াছেন যে, ইংরেজদিগের হত্যাপরাধে ২৬শে জানুয়ারি ফরাক্বাদের দুই জন নবাবের ফাঁসী হয়। ইঁহাদের নাম নির্দেশ করা হয় নাই। মার্জিষ্ট্রেট্ ইঁহাদিগকে ফাঁসী দিয়াছিলেন বটে, কিন্তু ইঁহারা প্রকৃত অপরাধী কি না, তদ্বিষয়ের নির্দ্ধারণে সাবধান হইলেন নাই। § ইংরেজ বিচারক নিঃসন্দেহ উত্তেজনার বশীভূত হইয়া, এই ভাবে বিচারকার্য্য সম্পন্ন

\* লেখক ইঁহাকে ফরাক্বাদের নবাব বলিয়া নির্দেশ করিয়াছেন। কিন্তু ইনি ফরাক্বাদের প্রকৃত নবাব নহেন। প্রকৃত নবাবের বিচারের কথা পরে বিবৃত হইবে।

† *Reminiscences, &c. p. 168-169.*

‡ *Martin, Indian Empire. Vol. II., p. 476.*

§ *Raikes, Notes on the Revolt &c. p. 107. Indian Empire. Vol. II., p. 476.*

করিয়াছিলেন । বোধ হয়, তাঁহার বিশ্বাস জন্মিয়াছিল যে, উক্ত নবাববংশীয় ব্যক্তি কর্তৃক তাঁহার সজাতির লোকে নিহত হইয়াছে । এইরূপ নরহত্যা-কারী, দানব বা পিশাচ । স্মরণ্য দানবের ভাবে বা পৈশাচিকরূপে ইহার শাস্তি হওয়া উচিত । কিন্তু তাঁহার জানা উচিত ছিল যে, তদীয় স্বদেশের লোকের ধারণা তাঁহার ধারণার অনুরূপ হইবে না, এবং উত্তেজনার আবেগেও তাঁহার মত ইঁহারা অধীর হইয়া উঠিবেন না । তাঁহার স্বদেশে তাঁহা অপেক্ষা অধিকতর সাধুতাসম্পন্ন, অধিকতর গ্রাম্যপরায়ণ, এবং অধিকতর ধীরপ্রকৃতির লোক আছেন । ইঁহারা তৎকৃত কর্মের সমর্থন করেন নাই । তাঁহার কর্মে ইঁহাদের প্রশংসাবাদের পরিবর্তে অপরিমিত ঘৃণা ও ঘৃণা প্রকাশ পাইয়াছিল ।\* আর যে গবর্ণমেন্ট তাঁহাকে গ্রাম্যানুসারে বিচার করিবার জন্ত বিচারবিভাগের কর্মে নিযুক্ত করিয়াছিলেন, সেই গবর্ণমেন্টের নিকটেও তাঁহার প্রশংসাপ্রাপ্তির পরিবর্তে শাস্তিভোগ হইয়াছিল । †

\* টাইমসের সংবাদদাতা ডাক্তার রাসেল ১৮৫৮ অব্দের মে মাসে ফতেগড়ে উপস্থিত হইলেন । তিনি উপস্থিত ঘটনাসম্বন্ধে এই ভাবে লিখিয়াছিলেন—“আমরা মিলনে সাহেবের সহিত একত্র ভোজন করিয়া, পুরাতন কথা বলিতে বা শুনিতে লাগিলাম । যে ঘরে আমাদের মন্ডভাগ্য কুলমহিলাগণ নিহত হইয়াছিল, আমরা সেই ঘরে বসিয়াছিলাম । মিলনে সাহেব কহিলেন দুইটি মহিলাকে যে, কামানে উড়াইয়া দেওয়া হইয়াছিল, এবং এতদেশীয় ১০ সংখ্যক ও ৪১ সংখ্যক পনাতিদলের লোকে তাহাদের লক্ষ্যভেদশিক্ষার স্থলে কতিপয় শিশুকে যে, ভেদ্য লক্ষ্যস্বরূপ রাখিয়াছিল, তদ্বিষয়ে তাঁহার কোন সন্দেহ নাই । আমার মতে এগুলি বর্কর অসভ্যদিগের কাণ্ড । কিন্তু এই স্থানেই আমরা ফরাকাবাদের নবাবের সম্পর্কীয় এক ব্যক্তিকে নিরতিশয় জুঁজুপিতভাবে ফাঁসী দিয়াছিলাম ; একজন খ্রীষ্টধর্মযাজক ঘটনাস্থলে দর্শকের শ্রেণীতে দণ্ডায়মান ছিলেন, আমাদের এই কর্ম কি খ্রীষ্টধর্মাবলম্বী-সভ্যজনোচিত? ইহা যথার্থ যে, এই শোচনীয় দশাশ্রুত ব্যক্তি তাঁহার মৃত্যুর পূর্ব দিন, আপনার প্রাসাদে ইংরেজ রেজিমেন্টের এক বা দুই জন আফিসারকে ভোজ দিয়াছিলেন । তিনি আপনার নির্দোষত্বের বিষয়ে যাহা কহিয়াছিলেন, তাহা উক্ত সৈনিকপুরুষদিগের গ্রাহ্য হইয়াছিল বলিয়া, তাঁহার বোধ হইয়াছিল । কিন্তু অতিথিসৎকারের কয়েক ঘণ্টা পরেই, তিনি বিচারকের সমক্ষে উপনীত হইলেন । তাঁহাকে এ ভাবে ফাঁসী দেওয়া হয় যে, দর্শকদিগের প্রত্যেকেই বিশেষতঃ স্যার উইলিয়ম পীল উহাতে একান্ত অসন্তুষ্ট হইলেন । ফাঁসীর পূর্বে মুসলমানদিগকে শূকরের চর্মে সেলাই করা, শূকরের চর্মে তাহাদের গায়ে লেপিয়া দেওয়া, তাহাদের শব দক্ষ করা, এই সকল হিংসাত্মক অত্যাচারের কর্ম সাতিশয় অগৌরবকর ।—*Russell, Diary, Vol. II., p. 42-43.*

† মার্জষ্ট্রেট পাওয়ার সাহেব বিচার করিয়াছিলেন । এইরূপ কঠোরতা এবং অসভ্য কারণে অতঃপর ইঁহাকে সম্পূর্ণ করা হয় ।—*Martin, Indian Empire, Vol. II., p. 476, note.*

রেইক্‌স্‌ সাহেব লিখিয়াছেন যে, নবাবের প্রাসাদ বহুবিধ ভোগ্য দ্রব্যে পরিপূর্ণ ছিল। আয়না, ঝাড়লঠন, ছবি, পুস্তক যথাস্থানে সন্নিবেশিত রহিয়াছিল। অন্তর্মহলের দুই তিনটি বৃদ্ধা নারী ব্যতীত সমগ্র প্রাসাদে আর কোন লোক ছিল না। কিন্তু বিড়াল, ময়না, কুকুর গুলি চীৎকার করিতে করিতে খাণ্ড দ্রব্যের আশায় বিস্তৃত প্রাঙ্গণে বেড়াইতেছিল; ক্ষুধায় ক্লিষ্ট হইলেও ইহারা স্বাভাবিক সৌন্দর্য্য হইতে পরিত্রষ্ট হয় নাই। একটি হস্তী শৃঙ্খলাবিমুক্ত হইয়া, আপনার খাণ্ডের আহরণে ব্যাপৃত হইয়াছিল। কিন্তু সুদৃশ্য অশ্বগুলি ইহার গায় সৌভাগ্যশালী হয় নাই। উহারা আপনাদের অবস্থিতিস্থলে দৃঢ়রূপে আবদ্ধ ছিল, এবং ক্ষুধায় কাতর হইয়া, বারংবার পদ দ্বারা মাটি খুঁড়িতেছিল। উহাদের অদূরে যে দানা রহিয়াছিল, তৎপ্রতি উহারা সতৃষ্ণভাবে দৃষ্টিপাত করিতেছিল। দৃঢ়রূপে আবদ্ধ থাকাতে উহারা আপনাদের অভীষ্ট খাণ্ডদ্রব্যের নিকটে যাইতে সমর্থ ছিল না। কেহ ঐ দ্রব্য উহাদিগকে দিবার জন্ত উপস্থিত হয় কি না, দেখিবার জন্ত কাতরভাবে এক এক বার চারি দিকে নেত্র সঞ্চালন করিতেছিল। নীলগাই, বারশৃঙ্গ (যে হরিণের বারটি শৃঙ্গ বাহির হইয়াছে), হাঁস, বানর প্রভৃতি খাণ্ডের জন্ত অস্থির হইয়া বেড়াইতেছিল। রেইক্‌স্‌ সাহেব এই সকল অসহায় জীবদিগকে খাণ্ড দিবার বন্দোবস্ত করেন।\*

প্রধান সেনাপতি ফতেগড়ে অবস্থিতি করিতে লাগিলেন। রোহিলখণ্ডে বহুসংখ্যক সিপাহী তাহার গতি ও কার্য্য প্রণালীর পর্য্যবেক্ষণ করিতে লাগিল। তাহারা যখন গুলিল যে, তিনি স্বয়ং রামগঙ্গার ভয় সেতু পরীক্ষা করিতেছেন। তখন তাহারা স্থির থাকিতে পারিল না। ফতেগড়ের দিক হইতে রোহিলখণ্ডে প্রবেশ করিতে হইলে রামগঙ্গা পার হইতে হয়। এখন রোহিলখণ্ডের সিপাহীরা ভাবিল যে ইংরেজ সেনাপতি তাহাদের অধ্যুষিত জনপদ আক্রমণের সুযোগ প্রতীক্ষা করিতেছেন। ৫০০০ সিপাহী ৫টি কামান লইয়া ফতেগড়ের প্রায় ১২ মাইল উত্তরে গঙ্গা পার হইয়া, ইংরেজের অধিকৃত মামসাবাদ আক্রমণ করিল। কিন্তু তাহাদের উদ্দেশ্য সিদ্ধ হইল না। তাহারা আক্রান্ত স্থান হইতে তাড়িত হইল। ইংরেজ সেনাপতি তাহাদের

\* *Raikes, Notes on the Revolt &c., p. 107.*

কামানগুলি অধিকার করিলেন । এই বিভাগের অন্তর্গত পালম্‌হাউ নামক স্থান বিনাবাধায় অধিকৃত হইল । যিনি পূর্বে এই স্থানের তহশীলদার ছিলেন, তিনি উপস্থিত সময়ে আপনাকে দিল্লীর মোগল সম্রাটের অধীন রাজা বলিয়া, উত্তেজিত সিপাহীদিগের পরিচালক হইয়াছিলেন । এখন তাঁহার দশাস্তুর ঘটিল । গবর্নমেন্টের বিরোধী বলিয়া, যাহারা সন্দেহের পাত্র হইয়াছিল, তাহাদের অনেকেই অবরুদ্ধ হইল । যাহারা আপনাদিগকে দিল্লীর মোগলের অধীন রাজা বা নবাব বলিয়া প্রাধান্যস্থাপনে উদ্বৃত্ত হইয়াছিলেন, তাঁহারা এখন উচ্চাসন হইতে অধঃপাতিত হইয়া, নিম্ন শ্রেণীর অবরুদ্ধদিগের দলে স্থান পাইলেন । কি প্রণালীতে ইহাদের বিচার হইল, কি ভাবে ইহাদের বিরুদ্ধে সাক্ষ্য গৃহীত হইল, তাহা নির্দিষ্ট হয় নাই । ২৩ সংখ্যক হাইলাণ্ডার সৈনিক দলের সার্জেন্ট ফর্বস্-মিচেলের কথা ইতঃপূর্বে উক্ত হইয়াছে । ফর্বস্-মিচেল ঘটনাস্থলে উপস্থিত ছিলেন । তিনি কেবল ইহাই দেখিয়াছিলেন যে, অবরুদ্ধদিগকে দলে দলে কোতয়ালীর প্রান্তের মধ্যবর্তী একটি বৃহৎ অশ্বখ বৃক্ষের তলে লইয়া যাওয়া হইয়াছিল । গলদেশে রজ্জুবদ্ধ হইয়া, ইহারা ঐ বৃক্ষের শাখায় বিলম্বিত হইতেছিল । অপরাহ্ন তিনটা হইতে পর দিন সূর্যোদয় পর্য্যন্ত এই কার্য চলিয়াছিল । অবশেষে বৃক্ষশাখায় আর স্থান ছিল না । এইরূপে ১৩০ জনের ফাঁসী হইয়াছিল । কাপ্টেন হড্‌সনের কঠোর প্রকৃতির কথা ইতঃপূর্বে উক্ত হইয়াছে । এইরূপ ফাঁসীতেও তাঁহার মনে যুগা ও বিরাগের সঞ্চার হইয়াছিল । বিচারক, ২৩ সংখ্যক হাইলাণ্ডার দলের কেহ ফাঁসী দিবার কর্ম করিতে সম্মত আছে কি না, জিজ্ঞাসা করেন । তিনি এই বলিয়া লোভ দেখান যে, যিনি ফাঁসী দিবেন, তিনি দণ্ডিত ব্যক্তির অঙ্গুরী ও টাকাকড়ি পাইবেন । উক্ত সৈনিকদলের কেহই বিচারকের প্রলোভনে ঐরূপ জুগুপ্সিত কর্ম সাধনে সম্মত হইল না । শেষে বিচারক ঐ দলের একজন দীর্ঘকায় সৈনিক পুরুষের মত জিজ্ঞাসা করিলেন । এই সৈনিক পুরুষ নিরতিশয় বিরাগের ভাব প্রকাশ পূর্বক বিচারককে কহিল—“আপনি আমাদিগকে এ কি কথা বলিতেছেন ? এই ২৩ সংখ্যক দলের আমরা, মশস্ত্র লোকের সহিত যুদ্ধ করিবার জন্য সৈনিকশ্রেণীভুক্ত হইয়াছি । ভারতবর্ষের যাবতীয়

টত দ্রব্য পাইলেও, আমরা জন্মাদ হই না । কাপ্টেন হড্‌সন পার্শ্বে দণ্ডায়মান

ছিলেন । মৈনিক পুরুষের কথা শুনিয়াই তিনি বলিয়া উঠিলেন,—“বেশ কথা বলিয়াছ, আমি তোমার করমর্দন করিতে ইচ্ছা করি ।” অনন্তর তিনি উক্ত মৈনিকের করমর্দন পূর্বক সমীপবর্তী একজন কাপ্তেনের দিকে ফিরিয়া কহিলেন—“এইরূপ কর্মে আমার বড় বিরাগ জন্মিয়াছে । ঈদৃশ কর্মস্থলে যে, আমি কর্তব্যসম্পাদনে নিয়োজিত হই নাই, ইহাতে সন্তুষ্ট হইয়াছি ।” এই কথা বলিয়া, কাপ্তেন হড্‌সন্ অশ্বে আরোহণ পূর্বক চলিয়া গেলেন । অতঃপর কয়েকজন ডোম পাওয়া গেল । ইহারা ফাঁসীর কর্মে নিয়োজিত হইল । পূর্বমত বিচারে ফাঁসী হইতে লাগিল ।\*

শ্যার্কোলিন্ কাম্প্‌বেল প্রায় এক মাস কাল ফতেগড়ে রহিলেন । সে সময়ে অনেক ইংরেজ এইরূপ বিলম্ব দেখিয়া, তাঁহার প্রতি বিরক্ত হইয়াছিলেন । ইংরেজীসংবাদপত্রের সম্পাদকগণ, তিনি নিরতিশয় অকর্মণ্য ও শিথিলপ্রকৃতি বলিয়া, নির্দেশ করিতেও সঙ্কুচিত হইয়া নাই । কিন্তু ইহাতেও প্রধান সেনাপতির প্রশান্তভাবে ব্যত্যয় হয় নাই । একজন ঐতিহাসিক নির্দেশ করিয়াছেন যে, গ্রিথেড প্রভৃতি সেনানায়কগণ তাড়াতাড়ি ভিন্ন ভিন্ন স্থানে গিয়া, বিপক্ষদিগের পরাজয়সাধন করিয়াছিলেন বটে, কিন্তু ইহাতে সকল স্থানে সর্বাংশে শান্তি স্থাপিত হয় নাই । সেনানায়কদিগের গমনের পরে বিপক্ষেরা আবার বল সংগ্রহ করিয়া, ভিন্ন ভিন্ন স্থানে স্বপ্রধান হইয়াছিল । কিন্তু প্রধান সেনাপতি তাড়াতাড়ি এক স্থান হইতে আর এক স্থানে যাত্রা করেন নাই । তিনি যে স্থানে গিয়াছেন, সেই স্থান সম্পূর্ণরূপে অধিকৃত হইয়াছে । † বাহা হউক, প্রধান সেনাপতি দীর্ঘকাল ফতেগড়ে থাকিয়া রোহিলখণ্ডের বিপুল বিপক্ষদের গতিপর্যবেক্ষণ করিতে লাগিলেন । তাঁহার ইচ্ছা ছিল যে, তিনি ফতেগড় হইতে রোহিলখণ্ডে গমন করিবেন । কিন্তু এ বিষয়ে গবর্নর-জেনেরলের মত হইল না । তিনি প্রধান সেনাপতিকে রোহিলখণ্ডের পরিবর্তে লক্ষ্মোতে যাইতে কহিলেন । লর্ড কানিং এ সম্বন্ধে লিখিয়াছিলেন যে, সমগ্র উত্তরপশ্চিম প্রদেশের মধ্যে রোহিলখণ্ডে প্রাধান্য স্থাপন করা নিরতিশয় বাঞ্ছনীয় বটে, কিন্তু সর্বাংশে লক্ষ্মো অধিকার করা উহা অপেক্ষা অধিকতর

\* *Reminiscences &c p. 170-171.*

† *Holmes, Indian Mutiny. Appendix G. p. 581.*



বাহিনী। পূর্বে দিল্লীর উপর যেমন সাধারণের দৃষ্টি ছিল, এখন অযোধ্যার উপরেও সেইরূপ দৃষ্টি রহিয়াছে। অযোধ্যা সিপাহীদিগের শক্তিসঞ্চারের ক্ষেত্র। এই স্থানের কর্মের উপর তাহাদের যাবতীয় আশার উত্থান বা পতন নির্ভর করিতেছে। প্রধান সেনাপতি গবর্নর-জেনেরলের কথায় সম্মত হইলেন। তিনি আপনার ধীরতা ও গাম্ভীর্য রক্ষা করিয়া, নির্দেশ করিলেন যে, কোন্ কোন্ স্থানে সৈন্য চালনা করিতে হইবে, কি ভাবে যুদ্ধক্ষেত্র নির্দেশ করিতে হইবে, তদ্বিষয়ে যুদ্ধগামী সৈনিকদলের উপর গবর্নর-জেনেরলের সর্বতো-মুখী প্রভূতা আছে। এইরূপ নির্দেশ করিয়া, স্মার কোলিন্ লক্ষ্মী যাইতে প্রস্তুত হইলেন। সৈনিকদিগের বেতননির্ধারণ সম্বন্ধে লর্ড ডালহৌসির সহিত স্মার্ চার্লস্ নেপিয়ারের অনৈক্য ঘটিলে, স্মার্ চার্লস্ প্রধান সেনাপতির কর্ম পরিত্যাগ পূর্বক স্বদেশে যাত্রা করিয়াছিলেন।\* কিন্তু স্মার্ কোলিন্ কাম্প্বেলের সহিত লর্ড ক্যানিংয়ের অনৈক্য ঘটিলেও প্রধান সেনাপতি গবর্নর-জেনেরলের প্রাধান্যস্বীকারে বিমুখ হইলেন না। ওরা ফেব্রুয়ারি তাঁহার সৈনিকদল ফতেগড় পরিত্যাগ পূর্বক লক্ষ্মীতে যাত্রা করিল। ইহারা কাণপুর হইয়া চই ফেব্রুয়ারি উনাওতে উপস্থিত হইল। এই সময়ে গবর্নর-জেনেরল এলাহাবাদে অবস্থিতি করিতেছিলেন। প্রধান সেনাপতি কাণপুর হইতে উক্ত স্থানে গিয়া, তাঁহার সহিত সাক্ষাৎ করিলেন। অনন্তর ১০ই ফেব্রুয়ারি উনাওতে আসিয়া, লক্ষ্মীযাত্রার আদেশ দিলেন।

লক্ষ্মীর অধিকারের জন্য সৈন্যসংগ্রহের কোনরূপ ক্রটি হয় নাই। ফেব্রুয়ারি মাসের শেষ ভাগে ভিন্ন ভিন্ন সৈনিকদল উনাওতে সমবেত হইতে থাকে। ইংরেজ, শিখ প্রভৃতি বিভিন্ন জাতির বীরপুরুষগণ লক্ষ্মীর নিকটে থাকিয়া, পরাক্রান্ত বিপক্ষের ক্ষমতামাশের জন্য শক্তিসংগ্রহ করিতে থাকে। ভিন্ন ভিন্ন অধিনায়কগণ এই বিপুল বাহিনীর ভিন্ন ভিন্ন অংশের পরিচালনভার গ্রহণ করেন। কাপ্তেন পীল আপনার কামান ও নৌসৈন্য লইয়া, ইহাদের সহিত সম্মিলিত হইলেন।

উনাওতে যখন এইরূপ সৈন্যসমাগম এবং শৃঙ্খলাসাধন হইতেছিল, কামান

\* উপস্থিত গ্রন্থের প্রথম ভাগ, ২২৬ পৃষ্ঠা।

গুলি যথাস্থানে লইয়া যাইবার বন্দোবস্ত হইতেছিল, রসদ ইত্যাদি রাশীকৃত হইতেছিল, বিবিধ যান, বিবিধ চতুষ্পদ, বহুসংখ্যক অনুচর ও পরিচারক, বহু-  
 বিস্তৃত শিবির সমাকুল করিয়া তুলিতেছিল, তখন একটি ঘটনায় শিবিরের কর্তৃ-  
 পক্ষের সাবধানতা পরিস্ফুট হয় । মালিসন্ প্রভৃতির গ্রন্থে এই ঘটনার উল্লেখ  
 নাই । কিন্তু ঘটনাটি ঐতিহাসিকদিগের উপেক্ষণীয় নহে । ৯১ সংখ্যক হাই-  
 লাণ্ডার দলের একজন সার্জেন্ট উহা লিপিবদ্ধ করিয়াছেন । ঐতিহাসিক সূত্রের  
 অনুরোধে উহার সারাংশ এস্থলে উদ্ধৃত করা আবশ্যিক হইতেছে । ফর্বস্-  
 মিচেল্ এই ভাবে উহার উল্লেখ করিয়াছেন—“এই সময়ে আমাদের বিশেষ  
 কোন কৰ্ম ছিল না । আমি আমার তাঁবুতে শুইয়া, স্বদেশ হইতে আগত সংবাদ-  
 পত্র পাড়িতেছিলাম, এমন সময়ে একজনকে আমাদের শিবিরে উচ্চৈঃস্বরে  
 বলিতে শুনিলাম, ‘চাই পিঠা, চাই আঙ্গুরকিস্মিসের পিঠা, বড় ভাল পিঠা, কিনি-  
 বার আগে একবার পরীক্ষা করিয়া দেখুন ।’ \* \* পিঠেওয়ালা পূর্ণযৌবনসম্পন্ন,  
 দেখিতে বেশ সুন্দর, দাঁড়ি ও গৌফ কৃষ্ণবর্ণ । কোম্পানির সিপাহীরা যে ভাবে  
 দাড়ি ও গৌফেরক্ষিত্বাস করে, আগন্তুক বিক্রেতার দাড়ি গৌফও সেই ভাবে  
 বিস্তৃত । তাহার ললাট বিস্তৃত, নাসা ঈষৎ বন্ধিম, চক্ষু তীক্ষ্ণবুদ্ধির পরিচায়ক ।  
 সংক্ষেপে শিবিরের অনুচর বা পরিচারকদিগের আকৃতি হইতে এই আগন্তুক  
 ব্যবসায়ীর আকৃতি সৰ্বাংশে বিভিন্ন । কিন্তু যে ব্যক্তি তাহার পিষ্টকের ঝড়ি  
 লইয়া আসিয়াছিল, তাহার আকৃতি দেখিলে, তাহাকে বদমায়েস বলিয়া বোধ  
 হয় । রেজিমেন্টের নির্দিষ্ট বাজার থাকিত । যাবতীর দ্রব্য এই বাজার হইতে  
 আনিতে হইত । যাহারা বাজারের দোকানদার নয়, তাহারা অধিনায়কের  
 স্বাক্ষরযুক্ত পাশ ভিন্ন রেজিমেন্টের শিবিরে কোন দ্রব্য লইয়া আসিতে পারিত  
 না । আমি পিষ্টকবিক্রেতার নিকটে পাশের বিষয় জিজ্ঞাসা করিলাম । সে  
 ইংরেজীতে কহিল,—‘ব্রিগেডিয়ার আড্রিয়ান্ হোপ আমাকে পাশ দিয়াছেন ।  
 আমার নাম জেমি গ্রীণ । আমি মেসখানসামা ছিলাম ।’ \* \* জেমি গ্রীণের  
 আকৃতি দর্শনের পর তাহার পরিপূর্ণ ও সরল ইংরেজীর অনর্গল উচ্চারণ দেখিয়া,  
 আমি বিস্মিত হইলাম । ইংরেজীতে তাহার অধিকার ছিল, যেহেতু সে আমার  
 পাশে বসিল এবং আমার নিকটে সংবাদপত্র দেখিতে চাহিল । আমার বোধ  
 হইল যে, উপস্থিত সিপাহীযুদ্ধ সম্বন্ধে বিলাতের পত্রসম্পাদকদিগের কিরূপ

অভিমত, জানিবার জন্ত তাহার আগ্রহ জন্মিয়াছে। কথোপকথনকালে আমি তাহার অনর্গল ইংরেজী উচ্চারণের প্রশংসা করিলাম। সে কহিল, তাহার পিতা ইউরোপীয় রেজিমেন্টের মেস্‌থানসামা ছিল। সে বাল্যকাল হইতেই ইংরেজী কহিতে শিখিয়াছে। রেজিমেন্টের স্কুলে তাহার লেখাপড়ার অভ্যাস হইয়াছে। সে দীর্ঘকাল সৈনিকদলের মধ্যে লেখাপড়ার কর্ম করিয়াছে। যাবতীয় হিসাব তৎকর্তৃক ইংরেজীতেই লিখিত হইত। জেমি গ্রীণের সহিত যখন এইরূপ কথা হইতেছিল, তখন পিষ্টকের মূল্য লইয়া একজনের সহিত জেমি গ্রীণের ভৃত্যের বচসা ঘটিল। আমি জেমি গ্রীণের ভৃত্যের রুক্ষ দৃষ্টির বিষয় কহিলাম। জেমি গ্রীণ উত্তর করিল,—‘ইহার সম্বন্ধে কিছু মনে করিবেন না। এই ব্যক্তি আইরিশ, ইহার নাম মিকি। ইহার মাতা ৮৭ সংখ্যক আয়র্লণ্ডের সৈনিকদলের বাজারে থাকে। পিতৃহৃত্যসম্বন্ধে মার্জেণ্ট্ মেজরের বাবুচি পর্য্যন্ত সমগ্র রেজিমেন্টের উপর ইহার দাবী আছে। সম্প্রতি এই ব্যক্তি পঞ্জাব হইতে আসিয়াছে। কাণপুরের সৈন্তাধ্যক্ষের একটি যুবতী ভাষ্যা আছে। মিকির আকর্ষিত এই যুবতী নারীর প্রিয়দর্শন বলিয়া, সৈন্তাধ্যক্ষ ইহাকে কর্ম হইতে ছাড়াইয়া দিয়াছেন।’ ইহার পর জেমি গ্রীণ কহিল,—‘তামাসা ত তামাসা, কিন্তু একজনের আঙ্গুরকিস্মিসের পিষ্টক খাইয়া উহার মূল্য না দেওয়া হাইলণ্ডের তামাসা।’ জেমি গ্রীণের এই বিদ্রূপবাক্য শুনিয়া তাঁঙ্গুর সকলে, যে ব্যক্তি মূল্য দিতে অসম্মত হইয়াছিল, তাহাকে নির্দিষ্ট মূল্য দিবার জন্ত পীড়াপীড়ি করিল। সুতরাং ঐ ব্যক্তি স্বিকৃতি না করিয়া, মূল্য দিল। জেমি গ্রীণ এবং মিকি অল্প তাঁবুতে চলিয়া গেল। যাইবার পূর্বে জেমি গ্রীণ আমার নিকট হইতে কয়েকখানি সংবাদপত্র চাহিয়া লইল। এইরূপে পিষ্টকবিক্রেতার সহিত প্রথম বারের দেখাশুনা শেষ হইল।

“দ্বিতীয় বারের আলাপপরিচয় ইহা অপেক্ষা অধিকতর কৌতূহলজনক এবং উহার পরিণাম অধিকতর শোচনীয়। যে দিন উক্ত পিষ্টকবিক্রেতা আমাদের শিবিরে আসিয়া পিষ্টক বিক্রয় করে, সেই দিন সন্ধ্যাকালে শিবিরে পাহারা দিবার ভার আমার উপর ছিল। সূর্যাস্তসময়ে একজন সৈনিক আসিয়া আমাকে কহিল যে, আঙ্গুরকিস্মিসের পিঠেওয়াল লঙ্কোর একজন চর বলিয়া ধৃত হইয়াছে। \* \* \* এখন রাত্রি হওয়াতে তাহার ফাঁসী হইবে না। তাহাকে

আমার তত্ত্বাবধানে রাখা হইবে । শিবিরে পাহারা দিবার জন্ত অতিরিক্ত প্রহরীও থাকিবে । এই সংবাদে আমি যে, সাতিশয় চুঃখিত হইয়াছিলাম, তাহা বলা বাহুল্য মাত্র । যদিও চরেরা সকল সময়েই সৈনিকদলের মধ্যে সাতিশয় ঘণা ও বিরক্তি জন্মাইয়া থাকে, এবং যদিও তাহাদের প্রতি কাহারও দয়া-প্রকাশ হয় না, তথাপি ঐ ব্যক্তির প্রতি আমার সাতিশয় শ্রদ্ধা জন্মিয়াছিল । অল্পক্ষণের আলাপেই আমি তাহার ক্ষমতা বুঝিয়াছিলাম । এইরূপ সৌম্যদর্শন ও সুশিক্ষিত ব্যক্তি কিরূপে সামান্য অনুচর বা পরিচারকের ত্রায় নিম্নশ্রেণীর করণীয় কর্মভার গ্রহণ করিল, আমি তাহাই ভাবিতে লাগিলাম । এখন বুঝিতে পারিলাম যে, চর বলিয়া, এই ব্যক্তি উক্তরূপ সামান্যবেশে আসিয়াছিল ।

“বাহারা আমাদের সহিত যুদ্ধে উত্তম এবং আমাদের বিরুদ্ধাচরণে প্রবৃত্ত হইয়াছিল, তাহাদের উপর আমাদের যাবতীয় শ্রেণীর যে, কিরূপ বিদ্বেষভাব জন্মিয়াছিল, এস্থলে তাহার বর্ণনা করা অনাবশ্যক । কোন ব্যক্তি চর বলিয়া ধৃত হইলে ইন্ধনযুক্ত অগ্নির ত্রায় ঐ ব্যক্তি নিরবচ্ছিন্ন বিদ্বেষভাবের উদ্দীপক হইত মাত্র । ইউরোপীয় জাতিসমূহের পরম্পরের সহিত যুদ্ধ অপেক্ষা এসিয়াবাসীদিগের সহিত যুদ্ধ সাতিশয় নির্দয়ভাবে সম্পন্ন হইয়া থাকে । কিন্তু আমি যে বিদ্রোহঘটিত যুদ্ধের কথা বলিতেছি, উহা এসিয়ার যুদ্ধ অপেক্ষা অধিক-তর অপকৃষ্ট । \* \* এই যুদ্ধ কেবল নরহত্যা মাত্র । যেখানে কোন খৃষ্টান বা কোন খেত পুরুষ বিদ্রোহীদিগের হস্তে পড়িয়াছে, সেইখানে তাহারা নির্দয়-ভাবে নিহত হইয়াছে, এবং এতদেশের যে কোন ব্যক্তি উক্ত খৃষ্টান বা ইউরোপীয়ের পলায়নের সুবিধা করিয়া দিয়াছে, সে ব্যক্তিও বিদ্রোহীদিগের হস্তে প্রাণ বিসর্জন করিয়াছে । সামরিকবিভাগের বিচারকই হউন বা সাধারণ বিচারকই হউন, যেখানে কোন বিদ্রোহীর দেখা পাইয়াছেন, অথবা কোন এতদেশীয়ের উপর কোনরূপ সন্দেহ করিয়াছেন, সেই খানেই অবিলম্বে সেই হতভাগ্য ব্যক্তির অস্তিমকাল আসন্ন হইয়াছে । সাধারণ বিচারকগণ আমাদের ক্ষমতা প্রতিষ্ঠার প্রারম্ভে ভিন্ন ভিন্ন সৈনিকদলের সঙ্গে থাকিয়া, যে ভাবে বিচার-কার্য্য নিষ্পন্ন করিয়াছেন, তাহাতে যেরূপ ত্রায়পরতার অবমাননা ঘটিয়াছে, সেইরূপ নির্দয়তাপ্রকাশ হইয়াছে । সামরিক আইন অনুসারে যে শাস্তি ঘটে, তাহা উচিত হউক, বা অনুচিত হউক, কালবিলম্বব্যতিরেকে সম্পন্ন হয় । কিন্তু

যে সকল বিচারক বিদ্রোহীদের বিচারের জন্ত ভিন্ন ভিন্ন সৈনিকদলের সঙ্গে ছিলেন, আমি যতদূর জানিতে পারিগাছি, তাহাতে তাঁহারা সান্তিশয় নির্দয়-ভাবের পরিচয় দিয়াছেন। উক্ত বিচারকগণ নিঃসন্দেহ এই ভাবে আপনাদের কৰ্ম উচিত মনে করিয়াছেন যে, তাঁহারা যুদ্ধ ও বিদ্রোহের নিবারণে নিয়োজিত হইয়াছেন। পক্ষান্তরে অপরাধিগণ সান্তিশয় পাপজনক কৰ্ম সম্পন্ন করিয়াছে। প্রধান সেনাপতিও এইরূপ নরহত্যার বিরোধী ছিলেন, \* \* ফতেগড় হইতে কাণপুরে প্রত্যাবর্তনকালে পথিমধ্যে তিনি যখন কোন এক আমের বাগানে প্রবেশ করেন, তখন ঐ বাগানের প্রত্যেক বৃক্ষের শাখা বিলম্বিত, গলিত শবে পরিপূর্ণ ছিল। তিনি ইহা দেখিয়া সান্তিশয় বিরক্তিসহকৃত ঘৃণা প্রকাশ করিয়াছিলেন। কয়েক দিন পূর্বে পূর্বোক্ত শ্রেণীর একজন বিচারক কোন সৈনিকদলের সহিত যাইবার সময়ে, এই ভাবে ফাঁসীর ব্যবস্থা করিয়া গিয়াছিলেন।

“এখন আমার কথা বলিতেছি। জেমি গ্রীণ চর বলিয়া ধৃত হইয়াছে। এই সংবাদ শুনিবার পরক্ষণেই প্রোবোষ্ট মার্শেলের\* সহযোগিবর্গের মধ্যে কতিপয় সৈনিক পুরুষ তাহাকে আমাদের তাঁবুতে আনিয়া, আমার হস্তে সমর্পণ পূর্বক প্রাতঃকাল পর্য্যন্ত সাবধানে রাখিতে কহিলেন। তাহার সহিত পিষ্টকের চুপড়ীর পূর্বোক্ত বাহকও ছিল। সিদ্ধান্ত হইয়াছিল যে, যে সকল লোক ১৮৫৭ অব্দের জুলাই মাসে কাণপুরে ইউরোপীয় নরনারীদিগকে বধ করিয়াছিল, তাহাদের মধ্যে এই ব্যক্তি ছিল।\* \* আমি যেমন কয়েদী দুইটির রক্ষার ভার গ্রহণ করিয়াছি, অমনি কতিপয় প্রহরী ইহাদের জাতিনাশের জন্ত বাজার হইতে শূকর-মাংস আনিবার প্রস্তাব করিল। তখন ফাঁসী দিবার পূর্বে এই ভাবে কার্য হইত। আমি এই প্রস্তাবের একান্ত বিরোধী হইলাম, এবং স্পষ্টাক্ষরে কহিলাম, আমি যে পর্য্যন্ত প্রহরীদিগের অধ্যক্ষ থাকিব, সে পর্য্যন্ত কিছুতেই ইহা করিতে দিব না। অপর প্রহরীদিগকে এই বলিয়া সাবধান করিয়া দিলাম যে, যদি কয়েদীদিগের ধ্বংসনের জন্ত কেহ কোনরূপ চেষ্টা করে, তাহা হইলে তাহার সৈনিকচিহ্নের পরিচয়সূচক কোমরবন্ধ খুলিয়া

\* যে কর্মচারী সৈনিকবিভাগে কয়েদীদিগের তত্ত্বাবধান, কর্তৃপক্ষের আদেশমত অপরাধীদের শাস্তিবিধান, সৈনিকবিভাগের নিয়মানুসারে শৃঙ্খলাসাধন প্রভৃতি পুলিশের কর্ম করেন।

লওয়া হইবে। আদেশপালন না করাতে এই ব্যক্তি আবদ্ধ থাকিবে। অপেক্ষাকৃত শান্তস্বভাব প্রহরীরা আমার প্রস্তাবের অনুমোদন করিল। যে হতভাগ্য আপনার নাম জেমি গ্রীণ বলিয়া নির্দেশ করিয়াছিল, আমার এই আদেশ শ্রবণে তাহার মুখমণ্ডলে ঘেরূপ কৃতজ্ঞতার অভিব্যক্তি হইল, তাহা আমি কখনও বিস্মৃত হইব না। সে কহিল যে, আমার নিকটে এইরূপ সদয়-ভাবের কখনও প্রত্যাশা করে নাই। উহার জন্ত সে কৃতজ্ঞতা স্বীকার করিতেছে। তাহার দৃঢ় বিশ্বাস যে, আল্লা যুদ্ধের সময়ে আমাকে যাবতীয় বিঘ্নবিপত্তি হইতে রক্ষা করিবেন। \* \* আমি কয়েদীর এইরূপ প্রার্থনার জন্ত তাহাকে ধন্যবাদ দিলাম, এবং সে মায়ন্তন উপাসনা করিতে পারে, এজন্ত তাহার হস্তের বন্ধন খুলিয়া দিলাম। আমার এইরূপ সদয়ব্যবহারে তাহার সহচরের কেবল ক্রুদ্ধভাব পরিস্ফুট হইল। কিন্তু সে স্বীকার করিল যে, সার্জেন্ট সাহেব মুসলমানের কৃতজ্ঞতার পাত্র। যেহেতু, তিনি তাহাকে শূকরের বসালেপন হইতে রক্ষা করিয়াছেন।

“কয়েদীদিগকে তাহাদের মায়ন্তন উপাসনা সাঙ্গ করিতে দিলাম। সময় ও অবস্থা অনুসারে যতটুকু স্বাধীনতা দেওয়া যাইতে পারে, তাহারা ততটুকু স্বাধীনতা পাইল। আমি বিনা নিদ্রায় রাত্রিযাপনে কৃতসঙ্কল্প হইলাম। যেহেতু, যদি কয়েদী দুইটির কেহ পলায়ন করে, তাহা হইলে উহা নিরতিশয় দোষের মধ্যে গণ্য হইবে। \* \* আমি রেজিমেন্টের বাজার হইতে একজন মুসলমানকে আনাইয়া, আমার ব্যয়ে কয়েদীদিগের উপযোগী খাদ্য দ্রব্য প্রস্তুত করিতে কহিলাম। ইহাতে মুসলমান দোকানদার উত্তর করিল,—‘আপনি যখন মুসলমানের ঈদৃশ শোচনীয় অবস্থার সময়ে তাহার প্রতি এইরূপ দয়া প্রদর্শন করিয়াছেন, তখন যদি আপনি ইহার জন্ত আমাদিগকে একটি পরসাত্তব্য ব্যয় করিতে অনুমতি না দেন, তাহা হইলে আমাদের স্বধর্মের সম্মান হানি হইবে’।

“বাজার হইতে খাণ্ড আসিল। জেমি গ্রীণ উহা খাইয়া একখানি মাছরের উপর বসিয়া ছঁকা টানিতে টানিতে কহিল,—‘ঈশ্বরকে ধন্যবাদ যে, তিনি আমাকে জীবনের এই শেষ রাত্রিতে এইরূপ দয়াশীল সাহেবের তত্ত্বাবধানে রাখিয়াছেন। ইহার পর সে আমাকে কহিল,—‘আপনি আমাকে আমার জীবনের ঘটনা বলিতে অনুরোধ করিয়াছেন। ইহা যথার্থ বটে যে, আমি চর।

কিন্তু চর বলিলে সচরাচর যাহা বুঝায়, আমি কখনও সে শ্রেণীর লোক নহি। আমি সাধারণ চরের অন্তর্ভুক্ত নহি। আমি লক্ষ্মীর বেগমের সৈনিকদলের একজন কর্মচারী। আমাদের বিরুদ্ধে যে সৈন্য ও কামানাদি যাইতেছে, তাহাদের বলাবল সম্বন্ধে যাবতীয় বিবরণ জানিবার জন্ত এখানে আসিয়াছি। আমি লক্ষ্মীর সৈনিকদলের প্রধান ইঞ্জিনিয়ার। বিপক্ষদিগের অবস্থা ও গতি-বিধির পর্যবেক্ষণের জন্ত আসিয়াছি। কিন্তু আল্লা আমার কার্য সিদ্ধ হইতে দিলেন না। আমি আজ সন্ধ্যাকালে লক্ষ্মীতে ফিরিয়া যাইতে ইচ্ছা করিয়া ছিলাম। যদি অদৃষ্ট প্রসন্ন হইত, তাহা হইলে কল্যা স্বর্ঘ্যোদয়ের পূর্বেই তথায় পহুঁছিতে পারিতাম। যেহেতু, যাবতীয় অভীষ্ট বিবরণ সংগৃহীত হইয়াছিল। কিন্তু উনাও, লক্ষ্মীর পথে থাকাতে, আপনাদের কামান এবং গোলাগুলি বারুদ প্রভৃতি লক্ষ্মীতে যাইতেছে কিনা, দেখিবার জন্ত, আর একবার এই স্থানে আসিয়াছিলাম। কিন্তু একটি অসতীপুত্র আমাকে চর বলিয়া ধরাইয়া দিয়াছে। এই পাষণ্ড ফাঁসীর কাঠ হইতে আপনার গলা বাঁচাইবার জন্ত এইরূপে তাহার স্বদেশের এবং স্বধর্মের লোকদিগের জীবননাশের কারণ হইয়াছে। কিন্তু আল্লা সত্য, সেই ব্যক্তি জাহান্নমের (নরকের) আগুনে আপনার বিশ্বাসঘাতকতার পুরস্কার পাইবে।\*

‘আপনি আমার নাম জানিতে চাহিয়াছেন। আমার দুর্ভাগ্যের বিবরণ স্কটলণ্ডে আপনার বন্ধুদিগের নিকটে লিখিয়া পাঠাইবার অভিপ্রায় প্রকাশ করিয়াছেন। আমার নাম ইত্যাদি বলিতে কোন আপত্তি নাই। ইংলণ্ডের—ইংলণ্ড অর্থে আমি স্কটলণ্ডসমেত ইংলণ্ড বলিতেছি—লোক ঞ্চায়পর। আল্লা এই ভৃত্যের অদৃষ্টলিপিতে তাহাদের কেহ কেহ দুঃখিত হইতে পারেন। আমি দুই বার লণ্ডন এবং এডিনবরা দেখিয়াছি। এই দুই স্থানে আমার অনেক বন্ধু আছেন। আমার নাম মহম্মদ আলী খাঁ। রোহিলখণ্ডের সম্রাট মুসলমানবংশে আমার জন্ম। বেরিলী কলেজে আমার শিক্ষালাভ হইয়াছে। আমি সেখানে যাবতীয় ইংরেজী বিষয়ে পরীক্ষা দিয়া, প্রথম স্থান অধিকার করিয়াছি। বেরিলী কলেজ হইতে রুডকির গবর্নমেন্ট ইঞ্জিনিয়ারিং কলেজে

\* যে ব্যক্তি জেমি গ্রীপকে চর বলিয়া ধরাইয়া দেয়, বেরেলীর বিপ্লবকালে সে আপনার প্রতিপালক ইউরোপীয়কে বধ করে। এই অপরাধে পরবর্তী মে মাসে তাহার ফাঁসী হয়।

প্রবিষ্ট হইয়া, সেখানে কোম্পানির চাকরী পাইবার জন্ত ইঞ্জিনিয়ারিং শিখিয়াছি । এই কলেজের শেষ পরীক্ষায় সৈনিক এবং সাধারণ বিভাগের কর্মপ্রার্থী সমুদয় ইউরোপীয় ছাত্র অপেক্ষা অধিক নম্বর পাইয়াছি । কিন্তু ইহার ফল কি হইয়াছে ? আমি কোম্পানির ইঞ্জিনিয়ারদিগের মধ্যে জমাদারের কর্ম পাইয়াছি । আমাকে পাহাড়ের পথের কর্মে পাঠান হইয়াছে । একজন ইউরোপীয় আমার উপর কর্তৃত্ব করিয়াছেন । বোধ হয়, কেবল পাশাবিক শক্তি ব্যতীত এই ইউরোপীয় সর্বপ্রকারে আমা অপেক্ষা অপকৃষ্ট । ইহার কিছুমাত্র শিক্ষা হয় নাই । ইংলণ্ডে এই ব্যক্তি কখনও উচ্চপদ লাভ করিতে পারিত না । মূর্খের হস্তে ক্ষমতা গ্রাস্ত হইলে যেরূপ হয়, সেইরূপ এই ব্যক্তি ইউরোপীয়দিগের সাধারণ দোষ—ঔদ্ধত্য, গর্ব এবং স্বার্থপরতার একরূপ পরিচয় দিত যে, উহাতে সহজে আমরা উত্তেজিত ও বিরক্ত হইতাম । এইরূপ লোক দ্বারা আপনাদের জাতীয় প্রতিপত্তির কত দূর ক্ষতি হইতেছে, আমাদের ভাষা না জানিলে এবং আমাদের দেশের সুশিক্ষিত ব্যক্তিদিগের সহিত না মিশিলে, তাহা আপনারা কখনও জানিতে পারিবেন না । আপনাদের জাতীয় স্বার্থপরতা এবং দান্তিকতা সম্বন্ধে আপনাদের ঘোরতর শত্রুরা যাহা বলিয়া থাকে, তাহা প্রতিপন্ন করিবার জন্ত এইরূপ একটি দৃষ্টান্তই পর্যাপ্ত । ইহাতে লোকে আপনাদের উদারতা এবং সমবেদনা কেবল ভণ্ডামি বলিয়া নির্দেশ করিয়া থাকে । আমি অর্থের জন্ত কোম্পানির চাকরী গ্রহণ করি নাই । আমার সম্মান হইবে, কেবল এই আশাতেই চাকরী স্বীকার করিয়াছিলাম । কিন্তু প্রথমেই যাহাকে আমি ঘৃণা করি—কেবল ঘৃণা নয়, যাহার প্রতি একান্ত বিরক্তি প্রকাশ করি—তাহার অধীন হওয়াতে আমার অপমান ও অসম্মান ভিন্ন আর কিছুই ঘটে নাই । আমি পিতাকে এ বিষয় জানাইয়া, তাঁহার নিকটে চাকরী ছাড়িয়া দিবার অনুমতি চাহিয়াছিলাম । তিনি এ বিষয়ে সম্মতি প্রকাশ করিয়া লিখিয়াছিলেন যে, রাজবংশীয়গণ এই ভাবে কোম্পানির চাকরী করিতে পারেন না । আমি অযোধ্যার নবাব নসীরুদ্দীনের সরকারে কর্ম করিবার ইচ্ছা করিয়া, চাকরী ছাড়িয়া বাড়ী গেলাম । যখন আমি লক্ষ্মীতে উপস্থিত হই, তখন নেপালের জঙ্গ বাহাদুর ইংলণ্ডে যাইবার উদ্যোগ করিতেছিলেন । তাঁহার একজন ইংরেজীভাষাভিজ্ঞ সেক্রেটারির প্রয়োজন হইয়াছিল । আমি অবিলম্বে এই



কর্মের জন্ত আবেদন করিলাম। অনেক রাজা এবং ইংরেজ রাজকর্মচারী আমার আবেদনের সমর্থন করিলেন। আমি মহারাজের সেক্রেটারি হইয়া, তাঁহার সহিত ইংলণ্ডে উপনীত হইলাম। অগ্ৰাণ স্থানের মধ্যে এডিনবরায় গিয়াছিলাম। সে সময়ে মহারাজের সম্মানার্থে আপনাদের ৯৩ সংখ্যক হাইলাণ্ডার রেজিমেন্ট সামরিক বেশে সজ্জিত হইয়া, দণ্ডায়মান ছিল। যখন আমি হাইলণ্ডের পরিচ্ছদধারী এই রেজিমেন্ট দেখিলাম, তখন ইহা ভাবি নাই যে, হিন্দু-স্তানের সমতল ক্ষেত্রে ইহাদের শিবিরে আমি বন্দী হইব। কিন্তু কে অদৃষ্টের কথা বলিতে পারে, এবং উহার হাত ছাড়াইতে পারে ?

‘আমি ভারতবর্ষে ফিরিয়া আসিয়া ১৮৫৪ অব্দ পর্য্যন্ত স্বদেশের ভিন্ন ভিন্ন রাজদরবারে চাকরী করি, ঐ অব্দে আজিম উল্লার সহিত পুনর্বার ইংলণ্ডে যাই। আপনি উপস্থিত বিপ্লবপ্রসঙ্গে আজিম উল্লার নাম অবশ্য শুনিয়াছেন। পেশওয়ার দেহত্যাগের পর নানা সাহেব আজিম উল্লাকে আপনার এজেন্ট করেন। আমার গায় আজিম উল্লা খাঁও কাণপুরের গবর্নমেন্ট স্কুলের প্রধান শিক্ষক গঙ্গাদীনের প্রদত্ত শিক্ষাশুণে ইংরেজী ভাষায় ব্যুৎপত্তিলাভ করিয়াছিলেন। তাঁহার বিশ্বাস ছিল যে, যদি তিনি ইংলণ্ডে যাইতে পারেন, তাহা হইলে তদীয় প্রভুর বিরুদ্ধে লর্ড ডালহৌসীর নিষ্পত্তি বিপর্য্যস্ত করিয়া ফেলিতে পারিবেন। আজিম উল্লা সর্বোৎকৃষ্ট ব্যবহারাজীবদিগকে নিযুক্ত করিবার জন্ত এবং যদি আবশ্যক হয়, উচ্চপদস্থ রাজপুরুষদিগকে উৎকোচ দিবার নিমিত্ত, বহু অর্থ লইয়া, ইংলণ্ডে যাত্রা করেন। আপনি জানেন যে, লণ্ডনের সমাজে তাঁহার সম্মান লাভ হইয়াছিল। কিন্তু তিনি আপনার রাজনীতিসংক্রান্ত কর্মে কৃতকার্য হইতে পারেন নাই। পাঁচ লক্ষ টাকারও অধিক ব্যয় করিয়া, আমরা ১৮৫৫ অব্দে কনষ্টান্টিনোপল দিয়া ভারতবর্ষে আসিবার জন্ত ইংলণ্ড পরিত্যাগ করি, কনষ্টান্টিনোপল হইতে ক্রিমিয়া দেখিতে যাই। এই স্থানে ১৮ই জুন ইংরেজসৈন্তের আক্রমণ এবং পরাজয় আমাদের দৃষ্টিগোচর হয়। শিবাস্তোপলের পুরোভাগে উভয় সৈন্তের শোচনীয় অবস্থা দর্শনে আমাদের মানসিক ভাবের পরিবর্তন ঘটে। আমরা কনষ্টান্টিনোপলে প্রত্যাবৃত্ত হই। এই স্থানে কতিপয় ব্যক্তির সহিত আমা-  
রের সাক্ষাৎ হয়। ইঁহারা ক্রিমিয়ার রাজকর্মচারী বলিয়া, আত্মপরিচয় দিয়া-

ছিলেন। ইঁহারা আজিমউল্লা খাঁকে কহিয়াছিলেন যে, যদি তিনি ভারতবর্ষে বিদ্রোহ ঘটাইতে পারেন, তাহা হইলে তাঁহারা কার্যতঃ যথোচিত সাহায্য করিতে প্রতিশ্রুত আছেন। এই সময়ে আমি এবং আজিম উল্লা কোম্পানির গবর্নমেন্টের বিপর্যয়সাধনে কৃতসঙ্কল্প হই। ঈশ্বরকে ধন্যবাদ, আমরা এ বিষয়ে কৃতকার্য হইয়াছি। আপনি আমাকে যে সকল সংবাদপত্র দিয়াছেন, তৎসমুদয়ে দেখিলাম যে, কোম্পানির রাজত্ব গিয়াছে। তাহাদিগকে আর পরস্বহরণ বা পররাজ্য অধিকারের জন্ত সনন্দ দেওয়া হইবে না। যদিও আমরা এই দেশ ইংরেজের হস্ত হইতে কাড়িয়া লইতে পারিলাম না, তথাপি আমরা কিয়দংশে ভাল কাজ করিলাম। আমাদের জীবনেরও বৃথা উৎসর্গ হইল না; যেহেতু, আমার বিশ্বাস যে, শাসনকার্য্য সাক্ষাৎসম্মুখে পার্লামেন্টের অধীন হইলে উহা কোম্পানির অধিকারে যেমন ছিল, তাহা অপেক্ষা অধিকতর শ্রায়াভুগত হইবে, এবং আমি দেখিয়া যাইতে না পারিলেও, আমার বিশ্বাস যে, আমার নিপীড়িত ও পদদলিত স্বদেশীয়গণ ভবিষ্যতে উন্নতি লাভ করিতে পারিবে।

‘সাহেব ! আপনার তোয়ামোদ বা আপনার অনুগ্রহলাভের জন্ত বলিতেছি না। আমি আপনার যথোচিত অনুগ্রহ লাভ করিয়াছি। আমি জানি যে, আপনি ইহা অপেক্ষা আমার আর অধিক কিছু সাহায্য করিতে পারিবেন না। উহা করিবার ইচ্ছায় থাকিলেও, আপনার কর্তব্যজ্ঞান করিতে দিবে না। আমাকে নিশ্চয়ই মরিতে হইবে। আপনি আমার প্রতি যেরূপ অচিন্ত্যপূর্ব দয়া প্রকাশ করিয়াছেন, তাহাতেই আমার মনের কথা আপনাকে খুলিয়া বলিলাম। আমার হৃদয়ে আপনাদের প্রতি ঘৃণার ভাব নিহিত আছে। আমার মুখে, আপনাদের প্রতি প্রয়োগ করা যায়, এরূপ কঠোর কথাও রহিয়াছে। আমি এই ভাবেই আপনাদের শিবিরে উপস্থিত হইয়াছিলাম। কিন্তু আমার শ্রায় হতভাগ্যের প্রতি আপনার দয়া দেখিয়া, আমি লক্ষ্মী পরিত্যাগের পর এই দ্বিতীয় বার উপস্থিত বিপ্লবঘটিত অত্যাচারের জন্ত লজ্জিত হইতেছি। কয়েক দিন পূর্বে কাণপুরে থাকিতে একটি ঘটনার প্রথম বার আমার লজ্জার উদ্বেক হইয়াছিল। যখন কর্ণেল নেপিয়ার কাণপুরের ঘাটে কয়েকটি হিন্দু-দেবমন্দির কামানে উড়াইয়া দিতে উদ্যত হইলেন, তখন পাণ্ডারা

তাঁহার নিকটে গিয়া, মন্দিররক্ষার জন্ত প্রার্থনা করেন। কর্ণেল নেপিয়ার এই প্রার্থনার উত্তরে তাঁহাদিগকে কহেন,—‘এখন আমার কথা শুনুন। যখন আমাদের কুলনারীগণ, আমাদের বালকবালিকাগণ নিহত হয়, তখন আপনারা সকলেই এখানে ছিলেন। আপনারা জানেন যে, আমরা প্রতিহিংসা প্রযুক্ত এই সকল মন্দিরের বিধ্বংশে প্রবৃত্ত হই নাই। নৌসেতু নিরাপদে রাখিবার জন্ত মন্দিরগুলি বিনষ্ট করিতেছি। কিন্তু আপনাদের মধ্যে যদি কেহ একরূপ প্রমাণ দিতে পারেন যে, তিনি একটি খৃষ্টধর্মাবলম্বী পুরুষ, স্ত্রী বা শিশু সন্তানের সম্বন্ধে কিয়দংশে দয়ার কার্য্য করিয়াছেন, অন্ততঃ তিনি যদি একরূপও প্রমাণ দেখাইতে পারেন যে, ইহাদের জীবন রক্ষার জন্ত একটি কথাও বলিয়াছেন, আমি প্রতিশ্রুত হইতেছি, তিনি যে স্থানে দেবারাধনা করেন, আমি সেই স্থান যথাবৎ রাখিব।’ আমি এই সময়ে জনতার মধ্যে কর্ণেল নেপিয়ারের নিকটে দণ্ডায়মান ছিলাম। কর্ণেল নেপিয়ার বেশ কথার বলিয়াছিলেন। কেহ এই কথার উত্তর দিল না। ব্রাহ্মণেরা নীরবে চলিয়া গেল। কর্ণেল নেপিয়ার ইঙ্গিত করিলেন। মুহূর্ত্তমধ্যে মন্দিরগুলি বায়ুস্তরের মধ্যে উড়িয়া গেল। নেপিয়ারের ত্রায়সঙ্গত কথায় আমি লজ্জাতারে অধোবদন হইয়া ফিরিয়া আসিলাম।

‘এই কথায় আমি জিজ্ঞাসা করিলাম,—‘যখন বিদ্রোহ ঘটে, তখন আপনি কাণপুরে ছিলেন কি না?’ বন্দী উত্তর করিলেন,—‘না। ঈশ্বরকে ধন্যবাদ, তখন আমি রোহিলখণ্ডে আপনার বাড়ীতে ছিলাম। আমি কেবল যুদ্ধক্ষেত্রে অরাতিনিপাত করিয়াছি। অন্তরূপে কাহারও শোণিতে আমার হস্ত কলঙ্কিত হয় নাই। আমি বুঝিয়াছিলাম যে, ঝাটিকার সঞ্চার হইয়াছে, সুতরাং স্ত্রী ও সন্তানদিগকে নিরাপদে রাখিবার জন্ত বাড়ী গিয়াছিলাম। যখন আমি বাড়ীতে ছিলাম, তখন মিরাত এবং বেরিলীর বিপ্লবের কথা আমার শ্রুতিগোচর হয়। আমি অবিলম্বে বেরিলীতে গিয়া তত্রত্য সৈনিকদলের সহিত সম্মিলিত হই, এবং তাহাদের সহিত দিল্লীতে পদার্পণ করি। আমি দিল্লীতে প্রধান ইঞ্জিনিয়ারের কর্মে নিয়োজিত হইয়া, নগররক্ষার জন্ত যাবতীয় বিষয়ের বন্দোবস্ত করিয়াছিলাম। সেপ্টেম্বর মাসে ইংরেজেরা নগর অধিকার করেন। আমি ঐ পর্য্যন্ত দিল্লীতেই থাকি, পরে পরস্পরবিচ্ছিন্ন সিপাহীদিগের মধ্যে যাহাদিগকে একত্র করিতে পারিয়াছিলাম, তাহাদিগকে লইয়া, লক্ষ্মীযাত্রা করি।

আমরা প্রথমে মথুরায় উপনীত হই, সৈনিকদিগের পারের জন্ত যমুনার উপর যে পর্য্যন্ত নৌসেতু প্রস্তুত না হয়, সে পর্য্যন্ত ঐ স্থানে থাকি । শাহজাদা ফিরোজ শাহ এবং সেনাপতি বখত খাঁর অধীনে এখনও ত্রিশ হাজার সৈন্ত আছে । লক্ষৌতে উপস্থিত হইলে আমাকে প্রধান ইঞ্জিনিয়ারের কৰ্ম দেওয়া হয় । নবেম্বর মাসে যখন আপনাদের সৈনিকদল রেসিডেন্সির উদ্ধারের জন্ত উপস্থিত হয়, তখন আমি লক্ষৌতে ছিলাম । আমি সেকেন্দরবাগের ভয়ঙ্কর নর-হত্যা প্রত্যক্ষ করিয়াছি । যে দিন উহা আক্রান্ত হয়, তাহার পূর্বরাত্রিতে আমি উহার রক্ষার জন্ত যাবতীয় বিষয়ের আয়োজনে ব্যাপ্ত ছিলাম । যখন আপনারা শাহনজিফ আক্রমণ করেন, তখন ঐ স্থান হইতে আমি আপনাদের গতিপর্য্যবেক্ষণ করিয়াছিলাম । আমি লক্ষৌর সর্কাপেক্ষা সুশিক্ষিত সৈনিকদিগের মধ্যে তিন হাজারের অধিক লোক সেকেন্দরবাগরক্ষার জন্ত সন্নিবেশ করিয়াছিলাম । ইহাদের একটিও রক্ষা পায় নাই । পূর্বরাত্রিতে যখন আমার স্থাপিত দণ্ড হইতে আমাদের সবুজ পতাকা তুলিয়া আপনাদের হাইলণ্ডের টুপি বসান হয়, তখন আমি মুচ্ছিতপ্রায় হইয়াছিলাম । আমার প্লীহা জল হইয়া গিয়াছিল । আমি বুঝিয়াছিলাম যে, আমাদের সমস্তই শেষ হইল । সেকেন্দরবাগে গোলাবর্ষণের জন্ত শাহনজিফে কামানসন্নিবেশ করিয়াছিলাম । এই সময় হইতে আমি লক্ষৌ সহরে এবং উহার চারি দিকে, যে ভাবে প্রাচীর প্রভৃতি প্রস্তুত করিতে হইবে, তাহা ঠিক করি, এবং তৎসমুদয়ের নিৰ্ম্মাণকার্যের তত্ত্বাবধানে ব্যাপ্ত থাকি । আপনি লক্ষৌ গেলে উহা দেখিতে পাইবেন । যদি সিপাহীরা এবং গোলন্দাজগণ উহার পশ্চাতে দৃঢ়তা-সহকারে দণ্ডায়মান থাকে, তাহা হইলে লক্ষৌ অধিকারের পূর্বে আপনাদের অনেক সৈন্ত নষ্ট হইবে ।’

“ইহার পর আমি তাঁহাকে জিজ্ঞাসা করিলাম,—আমাদের প্রথম পরিচয়-কালে যাহার নাম তিনি মিকি বলিয়া নির্দেশ করিয়াছিলেন, সে জুলাই মাসে কাণপুরস্থিত স্ত্রীলোক ও বাগকবালিকাদিগের নিধনের জন্ত নানা সাহেবের নিয়োজিত লোকের মধ্যে ছিল কিনা? বন্দী উত্তর করিলেন,—‘আমার বিশ্বাস, ইহা সত্য । কিন্তু যখন আমি ইহাকে নিযুক্ত করি, তখন এ বিষয় আমার গোচর হয় নাই । এই ব্যক্তি বিশ্বাসী, ইহা শুনিয়া, ইহাকে সঙ্গে

লইয়াছিলাম । যদি জানিতাম যে, এই ব্যক্তি স্ত্রীলোক এবং শিশুসন্তানদিগকে বধ করিয়াছে, তাহা হইলে কখনও ইহার সংশ্রবে থাকিতাম না ।’ \* \* এই কথায় আমি জিজ্ঞাসা করিলাম যে,—নিধনের পূর্বে ইউরোপীয় কুলনারীদিগের সম্মম নষ্ট করা হইয়াছে । এই কথার সত্যতাসম্বন্ধে তিনি কিছু জানেন কিনা ? বন্দী করিলেন,—‘সাহেব আপনি বিদেশী, তাহা না হইলে এইরূপ প্রশ্নের উত্থাপন করিতেন না । যিনি এই দেশের আচারব্যবহার এবং জাতিগত কঠোর-নিয়ম অবগত আছেন, তিনি জানেন, এই কথা মিথ্যা । কেবল জাতিগত বিদ্বেষ ঝাড়াইবার জন্য ইহার উৎপত্তি হইয়াছে । আমি স্বীকার করি যে, কুলনারী-গণ এবং বালকবালিকারা নিহত হইয়াছে । কিন্তু কাহারও ইচ্ছা নষ্ট হয় নাই । ‘আমরা অসভ্যদিগের ইচ্ছার উপর রহিয়াছি । ইহারা যুবতী এবং বৃদ্ধা, সকলেরই সম্মম নষ্ট করিয়াছে’ এইরূপ নানা কথা কাণপুরের গৃহগুলির দেয়ালে লিখিত হইয়াছে । এই সকল কথা এ দেশের ইংরেজী সংবাদপত্রে বাহির হইয়াছে । এ দেশের সংবাদপত্রের এই কথা বিলাতের সংবাদপত্রে স্থান পরিগ্রহ করিয়াছে । কিন্তু কাণপুরের দেয়ালের ঐ সকল লেখা জালমাত্র । সেনাপতি আউট্রাম এবং হাবেলকের সৈন্য কাণপুর পুনরধিকার করিলে দেয়ালে উহা লিখিত হইয়াছিল । যদিও আমি সে সময়ে তথায় ছিলাম না, তথাপি যাহারা ছিল, তাহাদের কথাই আমি বলিতেছি । আমি যাহা কহিলাম, তাহা সত্য ।’

“নানা সাহেব কি জন্তু সাতিশয় নির্দয়ভাবে উক্তরূপ পাপকর্মের অনুষ্ঠান করিয়াছিল, আমি বন্দীর নিকটে অতঃপর তাহা জিজ্ঞাসা করিলাম । তিনি উত্তর করিলেন,—‘এসিয়াবাসিগণ দুর্বলপ্রকৃতি । তাহাদের প্রতিশ্রুতির উপর নির্ভর করা যাইতে পারে না । কিন্তু পূর্বসঙ্কলিত বিশ্বাসঘাতকতা হইতে এইরূপ অব্যবহিততার উৎপত্তি হয় না । প্রধানতঃ কর্তব্যপালনে ঔদাস্যই ইহার কারণ । যখন তাহারা কোন বিষয়ে প্রতিশ্রুত হয়, তখন তাহারা সেই প্রতিশ্রুতি রক্ষা করিতে ইচ্ছা করে বটে, কিন্তু অনুবিধা দেখিলেই উহা ভুলিয়া যায় । আমার বিশ্বাস, নানা সাহেবের সম্বন্ধ এইরূপ ঘটিয়াছিল । নানা সাহেব স্ত্রীলোক এবং বালকবালিকাদিগের জীবন রক্ষা করিতে ইচ্ছা করিয়াছিলেন । কিন্তু তাহার অন্তঃপুরে একটি দানবী অবস্থিতি করিতেছিল । এই নারী পূর্বে

বাঁদী ছিল। নানা সাহেবের পার্শ্বচরদিগের মধ্যে অনেকে ( আজিম উল্লা খাঁ ইহাদের মধ্যে একজন ), যাহাতে নিষ্কৃতিলাভ অসম্ভব হয়, সেই ভাবে উপস্থিত বিপ্লবে নানা সাহেবকে জড়াইতে ইচ্ছা করিয়াছিল। সুতরাং অনেকে দৃঢ়তার সহিত দানবীর ভয়ঙ্কর প্রস্তাবের সমর্থন করিল। উক্ত দানবী ইংরেজ মহিলাদিগকে বধ করিবার অনুমতি পাইল। যখন ৬ সংখ্যক পদাতিদলের সিপাহীগণ এবং নানা সাহেবের প্রহরিগণ এই ভয়াবহ কৰ্মসাধনে অসম্মত হইল, তখন ঐ নারী কতিপয় ছুরাআকে আনিল। ইহাদিগকর্তৃক এই কৰ্ম সম্পাদিত হইল। আমি সেনাপতি তাত্যা টোপের নিকটে ইহা অবগত হইয়াছি। অনুমতি দেওয়ার জন্ত তাত্যা টোপের সহিত নানা সাহেবের বিবাদ হইয়াছিল। আমি যাহা কহিলাম, তাহা সত্য। কাণপুরে ইউরোপীয় মহিলা ও বালকবালিকার নিধন নারীর কৰ্ম। নরদানব অপেক্ষা নারীদানবী অধিকতর ভয়ঙ্কর। কিন্তু কি জন্ত অভাগিনী মহিলাদিগের প্রতি ইহার শত্রুতা জন্মিয়াছিল, তাহা আমি জানি না। আমি কখন এ বিষয়ের অনুসন্ধানও করি নাই।\*

“ইহার পর আমি জিজ্ঞাসা করিলাম, সেনাপতি হুইলারের কণ্ঠা পিস্তলের গুলিতে চার পাঁচ জনকে বধ করিয়া, শেষে কাণপুরের কুপে ঝাঁপ দিয়াছিল। এই কথা এখন প্রচারিত হইয়াছে, ইহা সত্য কি না? বন্দী কহিলেন,—‘এই সকল গল্প নিরবচ্ছিন্ন কল্পনামূলক। উহার মূলে কোন সত্য নাই। সেনাপতি হুইলারের কণ্ঠা এখনও জীবিত আছেন। তিনি এখন লক্ষ্মীতে অবস্থিতি করিতেছেন। যে মুসলমান তাহাকে রক্ষা করিয়াছিল, তিনি মুসলমানী হইয়া, মুসলমানধর্মামুসারে তাহার সহিত পরিণয়সূত্রে আবদ্ধ হইয়াছেন।

“বন্দীর সহিত এইরূপ কথোপকথনে রাত্রি অতিবাহিত হইল। আমি বন্দীকে প্রাতঃকালের উপাসনা সমাপন করিতে দিলাম। উপাসনা শেষ করিয়া, তিনি এইরূপ দয়া প্রদর্শনের জন্ত আবার আমাকে ধন্যবাদ দিলেন। যখন তিনি কহিয়াছিলেন যে, তাঁহার স্ত্রী এবং তাঁহার দুইটি পুত্র রোহিলখণ্ডের বাড়ীতে আছে, এখানে হতভাগ্য পিতার অদৃষ্টের বিষয় পুত্রদ্বয় জানিতে পারে নাই, তখন কেবল একবার মাত্র তাঁহার দৃঢ়তার পরিবর্তে হর্ষলতা দেখা গিয়াছিল।

\* উপস্থিত গ্রন্থের তৃতীয় ভাগ কাণপুরের নিদারুণ শোচনীয় ঘটনা এই ভাবেই বিবৃত হইয়াছে। বলা বাহুল্য, তখন ফরবস্-মিচেল সাহেবের গ্রন্থ প্রকাশিত হয় নাই।

পরক্ষণেই তিনি এই ভাবের গোপন করিয়া কহিলেন,—‘আমি ইংলণ্ডের ইতিহাসের ঞায় ফরাসীদেশের ইতিহাস পড়িয়াছি। দাঁতুনের বিষয় আমার মনে আছে। আমি কোনরূপ দুর্বলতা দেখাইব না।’ অনন্তর তিনি আপনার কেশগুচ্ছমধ্যে লুক্কায়িত একটি স্বর্ণাঙ্গুরী বাহির করিয়া, আমাকে কৃতজ্ঞতার নিদর্শনস্বরূপ দিতে চাহিলেন। তিনি কহিলেন যে, এখন কেবল তাঁহার এই একটি মাত্র দ্রব্য আছে। ধৃত হইবার সময়ে অগ্ন্যাগ্ন দ্রব্য তাঁহার নিকট হইতে লওয়া হইয়াছে। এই দ্রব্যটি অতি সামান্য। মূল্য দশ টাকার বেশী হইবে না। কিন্তু কনষ্টান্টিনোপলের একটি সাধু পুরুষ তাঁহাকে এই অঙ্গুরী দিয়া কহিয়াছিলেন যে, ইহা ধারণ করিলে যাবতীয় বিপদ নিরাকৃত হইবে। আমি অঙ্গুরীটি গ্রহণ করিলাম। তিনি মস্ত উচ্চারণ করিয়া, উহা আমার আঙ্গুলে পরাইয়া দিলেন, এবং কহিলেন,—‘যখন আপনি লক্ষ্মীতে থাকিবেন, তখনই এই অঙ্গুরীটি দেখিবেন এবং মহম্মদ আলী খাঁর নাম স্মরণ করিবেন। আপনার কোনরূপ অনিষ্ট ঘটবে না।’ এই কথা শেষ হইবার পরক্ষণেই একজন প্রহরী উপস্থিত হইল। আমি নিতান্ত দুঃখের সহিত তাহার হস্তে বন্দীকে সমর্পণ করিলাম।

“পরক্ষণে লক্ষ্মীযাত্রার আদেশ প্রদত্ত হইল। মার্ভিও গগনের মধ্যভাগে উপস্থিত হইলে, আমরা আমাদের অবস্থিত স্থল পরিত্যাগ করিলাম। পথবর্তী একটি বৃক্ষের তল দিয়া যাইবার সময়ে সভয়ে দেখিলাম যে, আমার বন্দী এবং তাহার সহচর ঐ বৃক্ষে বিলম্বিত রহিয়াছে। আমি ইহা দেখিয়া, অতিকষ্টে অশ্রুবেগের সংবরণ করিলাম। ১১ই মার্চ বেগমকুঠী আক্রমণ-কালে আমি মহম্মদ আলী খাঁকে স্মরণ করিয়াছিলাম এবং তৎপ্রদত্ত অঙ্গুরী দেখিয়াছিলাম। যুদ্ধের কালে আমার গায়ে একটি আঁচড়ও লাগে নাই \* \* \* বিপ্লবের কালে অনেকেই অনেক মূল্যবান দ্রব্য লুণ্ঠিয়া লইয়াছিল। কেবল এই অঙ্গুরীটি মাত্র আমার হস্তগত হইয়াছিল।”\*

এইরূপে মহম্মদ আলী খাঁর কথা শেষ হইল। নিতান্ত দুঃখের বিষয় যে, মহম্মদ আলী যেরূপ সুশিক্ষিত, সেইরূপ দূরদর্শী ছিলেন না। তিনি ইংলণ্ডে

\* *Reminiscences &c. p. 174-193.*

গিয়াছিলেন, কনষ্টান্টিনোপলে উপস্থিত হইয়াছিলেন, ক্রিমিয়ার রণক্ষেত্রে পদার্পণ করিয়াছিলেন। এইরূপে ইংরেজের বসতিস্থলে, তুরুকদিগের রাজধানীতে, ইউরোপীয় সৈনিকদিগের বীর্যবহির বিক্ষুরণক্ষেত্রে তাঁহার সমাগম হইয়াছিল। কিন্তু তিনি স্বকীয় শিক্ষার গুণে এই সকল স্থানেও প্রকৃত জ্ঞানের সংগ্রহে সমর্থ হইয়া নাই। তাঁহার অন্তর্দৃষ্টি নিতান্ত অল্প ছিল। তিনি যে বীর পুরুষের সেক্রেটারি হইয়া সর্বপ্রথম ইংলণ্ডে গিয়াছিলেন, সেই বীর পুরুষের স্থায় ইংরেজের শক্তি ও ক্ষমতার পরিমাণ করিতে পারেন নাই। ক্রিমিয়ার যুদ্ধক্ষেত্রের আকস্মিক ব্যাপারে তাঁহার মতিভ্রম হইয়াছিল। তিনি এই ভ্রমপ্রযুক্ত স্বদেশে ইংরেজের ক্ষমতার বিপর্যয়সাধনে কৃতসঙ্কল্প হইয়াছিলেন। ইংরেজের প্রদত্ত কর্ম্ম তাঁহার নিকটে অবমাননাকর বোধ হওয়াতে তিনি ইংরেজের প্রতি জাতবিদ্বেষ হইয়াছিলেন। এই বিদ্বেষভাবও তাঁহার উক্ত অসংসাহসিক ও অসাধ্য সঙ্কল্পের পরিপোষণে সহায় হইয়াছিল। জঙ্গ বাহাদুর প্রকৃত বীর পুরুষ। তিনি বীরকুলের ক্ষমতা বুঝিয়াছিলেন। মহম্মদ আলী ইহা বুঝিতে না পারিয়া, অধঃপতনের পথে অগ্রসর হইলেন। যৌবনকালেই সুশিক্ষিত ও কর্ম্মক্ষম পুরুষের এইরূপ অদৃষ্টবিপর্যয় নিরতিশয় শোচনীয়ভাবে উদ্দীপক।



## ষষ্ঠ অধ্যায় ।

### লক্ষ্মী অধিকার—রোহিলখণ্ড ও অন্যান্য স্থানে বিপ্লবের শান্তি ।

লক্ষ্মী অধিকার—ফৈজাবাদের মৌলবী—তাঁহার সহিত যুদ্ধ—তাঁহার মৃত্যু—কইয়া—  
রোহিলখণ্ড—সাগর ও নন্দদা প্রদেশ—বোম্বাই প্রেসিডেন্সি—দক্ষিণাপথ ।

স্মার কোলিন্ কাম্প্বেল যেরূপে লক্ষ্মীতে উপস্থিত হইলেন, যেরূপে রেসি-  
ডেন্সির কুলমহিলা, বালকবালিকা এবং রুগ্ন ও আহত প্রভৃতি অসমর্থ লোকদিগকে  
লইয়া, কাণপুরে প্রত্যাভর্তন করেন, তাহা পূর্বে উক্ত হইয়াছে । তিনি কেবল  
আপনাদের নিঃসহায় ও নিরুপায় ব্যক্তিদিগের উদ্ধার সাধন করিয়াছিলেন ।  
ওয়াজিদ আলীর রাজধানী সর্ব্বাংশে অধিকার করেন নাই । তাঁহাদের পূর্বাধিকৃত  
স্থানগুলি আবার সিপাহীদিগের আয়ত্ত হইয়াছিল । পদচ্যুত নবাবের বেগম হজরৎ  
মহল শাসনকার্যের ব্যবস্থা করিতেছিলেন । যাহারা এক সময়ে দুর্দশাগ্রস্ত ইউ-  
রোপীয়দিগকে আশ্রয় দিয়াছিলেন, তাঁহারাও এই সময়ে নবাবের প্রতি কৃতজ্ঞতা  
প্রকাশার্থ তদীয় পত্নীর পক্ষ সমর্থন করিতেছিলেন । মেন্দিহুসেন এবং তাঁহার  
আত্মীয় মহম্মদহুসেন ইংরেজের বিপক্ষ হইয়াছিলেন । ফৈজাবাদের মহারাজ  
মানসিংহ যদিও যাবতীয় বিষয়ে ইংরেজের সাহায্য করিয়াছিলেন, তথাপি  
তিনি হজরৎ মহলের পক্ষ একবারে পরিত্যাগ করিতে পারেন নাই । তাঁহাকে  
উত্তেজিত সিপাহীদিগের পক্ষসমর্থনে বাধ্য হইতে হইয়াছিল ।\* সেনাপতি

\* রেসিডেন্সির অবরোধকালে মহারাজ মানসিংহ যদিও বেগমের পক্ষে থাকিয়া এক  
স্থানের অবরোধের তত্ত্বাবধান করিয়াছিলেন, তথাপি তিনি সর্বদা অবরুদ্ধ ইংরেজদিগের  
সংবাদ লইতেন । যদি বিপক্ষ সিপাহীদিগের প্রতি তাঁহার অধিকতর অনুরাগ থাকিত,  
তাহা হইলে ইংরেজেরা নিঃসন্দেহ অধিকতর বিপন্ন হইতেন । লক্ষ্মী ইংরেজদিগের অধিকৃত  
হইলে মহারাজ মানসিংহ তাঁহার শাহগঞ্জের দুর্গে গমন করেন । এই স্থানে তিনি মেন্দিহুসেন

আউট্রাম আলমবাগে অবস্থিত করিতেছিলেন। সিপাহীগণ তাহার শিবির আক্রমণে নিরস্ত থাকে নাই। তাহারা ভাবিয়াছিল যে, তাহাদিগকে স্বধর্ম-রক্ষার জন্ত এই যুদ্ধে প্রবৃত্ত হইতে হইয়াছে। রামায়ণের বীরত্বময়ী কথা এ সময়ে তাহাদের হৃদয়ে অভূতপূর্ব শক্তির সঞ্চার করিয়াছিল। তাহারা রামায়ণকীর্তিত মহাবীরের বেশে রণক্ষেত্রে সমাগত হইয়াছিল এবং পরাজিত হইলেও আপনাদের সাহসের পরিচয় দিয়াছিল।\* বেগম হজরৎ মহল দরবারে উপস্থিত হইয়া তালুকদার এবং সৈনিকদিগকে উৎসাহিত করিতে ছিলেন। ২৫শে ফেব্রুয়ারি যখন আলমবাগ আক্রান্ত হয়, তখন হজরৎ মহল হস্তিপৃষ্ঠে অধিষ্ঠিত হইয়া সমরক্ষেত্রে উপস্থিত ছিলেন। কিন্তু বেগমের এইরূপ সাহস, এইরূপ উৎসাহ, এইরূপ আগ্রহে কোন ফল হইল না। তাঁহার অধঃপতনকাল আসন্ন হইল। স্মার কোলিন্ কাম্পবেল ৩১০০০ হাজার সৈন্য এবং ১৬০টি কামান লইয়া তাঁহার চিরপ্রিয় রাজধানীর অভিমুখে অগ্রসর হইলেন।

স্মার কোলিন্ কাম্পবেলের সৈন্য ও কামান অধিক ছিল বটে, কিন্তু প্রায় কুড়ি মাইল পরিধিপরিমিত একটি বৃহৎ নগর অধিকারের জন্ত উহা পর্যাপ্ত ছিল না। যাহা হউক, প্রধান সেনাপতির বুদ্ধিচাতুরীতে অভীষ্ট সিদ্ধির পথ কণ্টকিত হইল না। সিপাহীদিগের সংখ্যাবল থাকিলেও তাদৃশ বুদ্ধিবল ছিল না। সেনাপতি হাবেলক এবং আউট্রাম যে পথে লক্ষ্মীতে উপস্থিত হইয়াছিলেন, স্মার কোলিন্ কাম্পবেল যে পথ অবলম্বন পূর্বক লক্ষ্মীতে এই সেনাপতিদ্বয়ের সহিত সম্মিলিত হইয়াছিলেন, সিপাহীরা ভাবিয়াছিল যে, তাহাদের প্রতিদ্বন্দ্বী সৈন্যের প্রধান অধিনায়ক দ্বিতীয় বারেও সেই পথে অগ্রসর

এবং মহম্মদ হুসেন কর্তৃক আক্রান্ত হইবেন। স্মার হোপ্ গ্রাণ্ট্ ১৮৫৮ অব্দের জুলাই মাসে আক্রান্ত দুর্গের উদ্ধার সাধন করেন।—*Carnegy, Historical Sketch of Fyzabad Tehsil. Purgana Puchhimrath, p. 19.*

\* ১৬ই জানুয়ারি সিপাহীরা আলমবাগ আক্রমণ করে। ইহাদের পরিচালক রামায়ণবর্ণিত হনুমানের বেশে সজ্জিত হইয়া, অস্বারোহণে আসিয়াছিল। এই ব্যক্তি দেহের নানা স্থানে সাংঘাতিক আঘাত পাইয়া ইংরেজের শিবিরে আনীত হয়। ইহার বিচিত্র পাগড়ি ইউরোপীয় সৈনিকেরা এবং লাকুল শিখেরা অধিকার করে।—*Outram at the Alumbaagh—Calcutta Review, March 1860, p. 4.*

হইবেন । এবারেও তাহারা ঐ সকল পথ অবরুদ্ধ করিবার চেষ্টা করিয়াছিল, কিন্তু স্মার কোলিন্ কাম্প্বেল গোমতীর উভয় তটে সৈনিকদল প্রেরণ করেন । ইহাতে সিপাহীদিগের ব্যাভেদ করিবার সুযোগ ঘটে । ২রা মাচ্চ' নগর আক্রান্ত হয় । আক্রমণকারিগণ সেকেন্দরবাগ এবং শাহনজিফ্ সহজে অধিকার করে । কৈশরবাগ এবং উহার নিকটবর্তী বেগমকুঠীতে বহুসংখ্যক সিপাহী অবস্থিতি করিতেছিল । এই দুই স্থান অধিকারের পূর্বে ইংরেজসৈন্য ঘোড়দোড়ের মাঠের নিকটে একটি বাড়ী অধিকার করে । সিপাহীদিগের অনেকেই এই বাড়ী ছাড়িয়া গিয়াছিল । তাহাদের মধ্যে কয়েকজন সৈনিক এরূপ তেজস্বিতা, নিষ্ঠুরতা এবং দৃঢ়প্রতিজ্ঞতার সহিত উহা রক্ষা করিতেছিল যে, আক্রমণকারিগণ তাহাদিগকে তাড়িত করিতে একান্ত অসমর্থ হয় । ইহাদের অস্ত্রে আক্রমণকারীদিগের কয়েক জন দেহত্যাগ করে । কয়েক জন আহত হয় । এইরূপ ক্ষতিগ্রস্ত হইয়া, তাহারা ফিরিয়া আইসে । অনন্তর সেনাপতি আউট্রামের আদেশে কামান আনা হয় । উহার গোলায় বিপক্ষ সিপাহীদিগের শক্তিব্রাস হয় । এই সুযোগে শিখগণ অগ্রসর হইয়া বিপক্ষদিগের প্রায় সকলকেই বধ করে । কেবল একজন মাত্র দেহের নানাস্থানে আহত হইয়া, জাবিতাবস্থায়, আনন্দধ্বনির মধ্যে ইংরেজসৈন্যের সমক্ষে সমানীত হয় । একজন ইংরেজ আফিসার স্বয়ং উপস্থিত ঘটনা দেখিয়া, এই ভাবে উহার বর্ণনা করিয়াছেন—“কতিপয় শিখ এবং ইংরেজসৈন্য প্রথমে হতভাগ্যের পা ধরিয়া দুই ভাগে ছিঁড়িয়া ফেলিবার চেষ্টা করে । কিন্তু ইহাতে অকৃতকার্য হওয়াতে তাহারা ইহার মুখে সঙ্গীনের আঘাত দিতে দিতে টানিয়া লইয়া যায় । তাহাদের উদ্দেশ্যসিদ্ধির জন্তু কিয়দূরে কয়েকখানি ছোট কাঠ একত্র করিয়া আগুন জ্বালান হইয়াছিল, হতভাগ্যকে ঐ আগুনের মধ্যে ধরিয়া ইচ্ছা পূর্বক দগ্ধ করা হয় ।” উক্ত আফিসার শেষে লিখিয়াছেন—“এই উনবিংশ শতাব্দীর গর্ভপূর্ণ সভ্যতা এবং লোকহিতৈষিতার সময়ে মানুষকে আগুনে পোড়াইয়া মারা হইবে, ইংরেজ এবং শিখগণ চারি পার্শ্বে থাকিয়া স্থিরভাবে উহা দেখিবে, ইহা নিরতিশয় শোচনীয় বিষয় ।”\* সদাশয় ইংরেজ বীরপুরুষ স্বপক্ষের এইরূপ

\* *Martin, Indian Empire. Vol II., p. 478.*

পাশবিক ব্যবহারে একান্ত সন্তুষ্ট হইয়া, বীরপুরুষোচিত মর্যাদা রক্ষা করিয়া-  
ছিলেন। উপস্থিত সময়ে অনেক স্থলে দানবপ্রকৃতির পার্শ্বে এইরূপ দেব-  
প্রকৃতির আবির্ভাব হইয়াছিল।

১০ই মার্চ বেগমকুঠী আক্রান্ত হয়। এই সময়ে স্মার কোলিন্ কাম্প্বেল  
জঙ্গ বাহাদুরের অভিনন্দনের জন্ত দরবারের আয়োজনে ব্যাপ্ত ছিলেন। পূর্বে  
উক্ত হইয়াছে যে, জঙ্গ বাহাদুর গুর্খা সৈন্য লইয়া ব্রিটিশসৈন্যের সাহায্যার্থে  
উপস্থিত হইয়াছিলেন। তাঁহার সৈন্য উত্তরপশ্চিম প্রদেশের যুদ্ধে সাতিশয়  
ক্ষমতার পরিচয় দেন। গম্ভীর সিংহ নামক একজন গুর্খা সেনানায়ক স্বহস্তে পাঁচ  
জন গোলন্দাজকে কাটিয়া একটি কামান অধিকার করেন। জঙ্গ বাহাদুর  
গোরক্ষপুর অধিকার এবং ফুলপুরে বিপক্ষ সিপাহীদিগের পরাজয় সাধন পূর্বক  
অযোধ্যায় উপস্থিত হইলেন। স্মার কোলিন্ কাম্প্বেল দরবারস্থলে যখন তাঁহার  
অভ্যর্থনা করেন, তখন তাঁহার নিকটে সংবাদ উপস্থিত হয় যে, বেগমকুঠী অধিকৃত  
হইয়াছে। স্মার কোলিন্ এই সংবাদে প্রফুল্ল হইয়া, নেপালের প্রধান বীরপুরুষ  
ও প্রধান মন্ত্রীর নিকটে স্বপক্ষের সৈনিকদলের প্রশংসা করেন।

যিনি দিল্লীর বৃদ্ধ মোগলকে বন্দী করিয়াছিলেন, এবং স্বহস্তে শাহজাদাদিগকে  
বধ করিয়া স্বদেশীয়দিগের নিকটে অপকীর্তির ভাগী হইয়াছিলেন, বেগমকুঠী  
আক্রমণকালে বিপক্ষের অস্বাঘাতে তাঁহার প্রাণবিয়োগ হয়। উক্ত কুঠীর ভিন্ন  
ভিন্ন গৃহে সিপাহীগণ অবস্থিত করিতেছিল। সুতরাং ইংরেজসৈন্য ভিন্ন ভিন্ন  
দলে বিভক্ত হইয়া, ভিন্ন ভিন্ন গৃহ আক্রমণ করে। একটি গৃহের দ্বারের একাংশ  
দিয়া দেখা গেল যে, অন্তর্ভাগে কতকগুলি সশস্ত্র সিপাহী রহিয়াছে। প্রজ্বলিত  
বারুদ দ্বারা ইহাদিগকে উড়াইয়া দিবার প্রস্তাব হইল। সুতরাং আক্রমণকারিগণ  
বারুদের বস্তার প্রতীক্ষায় রহিল। কিন্তু অসংসাহসিক হৃদয় অলক্ষণ ও বিলম্ব  
করিতে ইচ্ছা করিলেন না। তিনি নিষ্কোশিত তরবারি হস্তে করিয়া, অগ্রসর  
হইতে উদ্বৃত্ত হইলেন। মার্জেণ্ট্ ফর্বস্-মিচেল তাঁহার নিকটে ছিলেন।  
তিনি বারণ করিলেন। কিন্তু হৃদয় তাঁহার কথা শুনিলেন না। তিনি এক  
পা অগ্রসর হইয়াছেন, ফর্বস্-মিচেল তাঁহার স্কন্ধে হাত দিয়া, তাঁহাকে বহির্ভাগে  
আনিতে চেষ্টা করিতেছেন, এমন সময়ে দুঃসাহসিক কাপ্তেন 'মা গো' বলিয়া  
পড়িয়া গেলেন। একজন সিপাহীর নিষ্ক্রিপ্ত গুলিতে তাঁহার বক্ষঃস্থল বিদ্ধ

হইয়াছিল । কাশ্মীর হুসন আপনার হঠকারিতা এবং দুঃসাহসের জন্ত মৃত্যু-  
মুখে পাতিত হইলেন ।

মোলবী আহমউদৌল্লা এই সময়ে লক্ষ্মোতে উপস্থিত ছিলেন । ইংরেজের  
প্রতি তাঁহার যেরূপ বিদ্বেষভাব ছিল, ইংরেজের ক্ষমতানাশে তিনি যেরূপ বন্ধ-  
পরিকর হইয়াছিলেন, তাহা পূর্বে উক্ত হইয়াছে । ধর্মের নামে তিনি উত্তেজিত  
সিপাহীদিগকে অধিকতর উত্তেজিত করিয়া তুলিয়াছিলেন । মুসলমানগণ তাঁহার  
উদ্দীপনাময়ী বক্তৃতায় স্বধর্মরক্ষার জন্ত আত্মোৎসর্গে ও কাতর হয় নাই । কথিত  
আছে, তাঁহার হস্তে একটি কোড়া মাত্র থাকিত । তিনি যুদ্ধস্থলে এই কোড়া  
হস্তে করিয়া সিপাহীদিগকে উত্তেজিত করিয়া তুলিতেন । লক্ষ্মোতে লক্ষর শাহ  
নামক একজন ফকির তাঁহার সহিত গম্মিলিত হইয়াছিলেন । এই দুই জনের  
উত্তেজনায় সিপাহীরা অধিকতর সাহসী এবং অধিকতর বলসম্পন্ন হয় । ইংরেজ-  
সৈন্য ২১শে মার্চ মোলবীর বিরুদ্ধে যাত্রা করে । মোলবী এই সময়ে সাদতগঞ্জ  
অবস্থিত করিতেছিলেন । তিনি প্রতিপক্ষের সমক্ষে একরূপ দৃঢ়তা এবং একরূপ  
সাহস প্রদর্শন করেন যে, সেনানায়ক লুগাড উহাতে অতিমাত্র বিস্মিত হইলেন ।  
ঈদৃশ অধ্যবসায় এবং সাহসসহকৃত দৃঢ়প্রতিজ্ঞতা প্রায় তাঁহার দৃষ্টিপথবর্তী  
হয় নাই । তাঁহার দলের অনেকগুলি সৈনিক নিহত এবং অনেকগুলি  
গুরুতর আঘাত প্রাপ্ত হয় । অবশেষে মোলবীর দল বিচ্ছিন্ন হইয়া যায় ।  
ইংরেজসৈন্য তাহাদের পশ্চাদ্ধাবিত হয় । মোলবী স্বয়ং অক্ষতশরীরে প্রস্থান  
করেন ।

২১শে মার্চের মধ্যে বিপক্ষ সিপাহীগণ লক্ষ্মো পরিত্যাগ করে । ইংরেজেরা  
পুনর্বার ওয়াজিদ আলীর রাজধানীর অধীশ্বর হইলেন । তেজস্বিনী হজরৎ মহল  
রাজধানী পরিত্যাগ পূর্বক স্থানান্তরে গিয়া, বিপক্ষের পরাক্রমনাশের চেষ্টা  
করিতে থাকেন । যে সকল পরাক্রান্ত তালুকদার গবর্ণমেন্টের বিরুদ্ধে অস্ত্র  
ধারণ করিয়াছিলেন, তাঁহারা নানাস্থানে আত্মপ্রাধাণরক্ষায় উত্তত হইলেন ।  
কথিত আছে, রাজা মানসিংহের প্রায় দশ হাজার সশস্ত্র লোক ছিল । ইহারা  
গবর্ণমেন্টের বিপক্ষতা করে নাই । লক্ষ্মোর প্রাসাদ অধিকৃত হইলে মানসিংহের  
নিকটে সংবাদ পৌঁছই যে, ইংরেজসৈন্য নবাবের অন্তঃপুরবাসিনীদিগের মর্যাদা-  
নাশে উত্তত হইয়াছে । সংবাদপ্রাপ্তিমাত্রেই মানসিংহ লক্ষ্মোতে যাত্রা করেন ।

শেষে তিনি অবগত হইলেন যে, সংবাদ অলীক । ইংরেজসৈন্য কখন অসহায় স্ত্রীলোক এবং বালকবালিকাদিগের প্রতি কোনরূপ অত্যাচার করিতে উত্তত হয় নাই । মানসিংহ এই সংবাদে সন্তুষ্ট হইলেন । তিনি পদচ্যুত নবাবের নিমক খাইয়াছিলেন, সুতরাং নিমকের সম্মানরক্ষার জন্ত তাঁহার উত্তমশীলতা পরিস্ফুট হইয়াছিল ।

মোগলের রাজধানীতে বিলুপ্তনব্যাপারের ভয়াবহ দৃশ্যের আবির্ভাব হইয়াছিল । ইংরেজ, শিখ এবং গুর্খা সৈনিকেরা এই ভীষণ অভিনয়ের প্রধান অভিনেতা ছিল । ওয়াজিদ আলীর রাজধানীতেও এইরূপ দৃশ্য ঘটনিকার অন্তরালে লুক্কায়িতভাবে থাকে নাই । এখানেও ইংরেজ সৈনিকের পাশ্বে গুর্খা ও শিখগণ রহিয়াছিল । এখানেও বহুমূল্য দ্রব্যাদি ইহাদের পরস্বহরণপ্রবৃত্তির উদ্দীপক হইয়াছিল । ইংরেজসৈন্য কৈশরবাগ প্রভৃতি স্থলে কেবল বিপক্ষদিগের ক্ষমতা নাশ করে নাই, তাহারা ঐ সকল স্থলে যাবতীয় বহুমূল্য দ্রব্যের বিলুপ্তন বা বিধ্বংসে প্রবৃত্ত হইল । বিলুপ্তনের দৃশ্য বর্ণনীয় নহে । উন্নত সৈনিকেরা দ্রব্যাদির ভাঙার ভাঙ্গিয়া ফেলিল । স্বর্ণখচিত বস্ত্র, রৌপ্যময় পাত্র বিবিধ প্রকার অস্ত্র, পতাকা, শাল, বাণ যন্ত্র, পুস্তক, প্রাক্রমে আনিয়া স্তূপকার করিল । সকলেই সে সময়ে বিলুপ্তনপ্রবৃত্তিতে প্রমত্ত হইয়াছিল । পিস্তল, তরবারি প্রভৃতিতে যে সকল মণিমাণিক্য সন্নিবেশিত ছিল, তাহারা তৎসমুদয় পাইবার জন্ত ঐ সকল দ্রব্য ভাঙ্গিয়া ফেলিল । স্বর্ণখচিত বস্ত্রাদি হইতে স্বর্ণ বাহির করিবার জন্ত উহা অগ্নিতে নিক্ষেপ করিতে লাগিল । চীনেবাসন, কাচের দ্রব্যাদি বিচূর্ণিত হইতে লাগিল ।\* একজন লেখক ( সার্জেন্ট্ ফর্ব্‌স্-মিচেল ) এই ভাবে উক্ত বিলুপ্তনব্যাপারের বর্ণনা করিয়া গিয়াছেন,—“সমগ্র নগর বিলুপ্তনকারীদিগের হস্তে পড়িয়াছিল । ইউরোপীয়, শিখ, গুর্খা সৈনিকেরা এবং শিবিরের পরিচারকগণ ও অনুচরবর্গ অধিকন্তু নগরের উচ্ছৃঙ্খল লোকে লুণ্ঠিতরাজ্যে প্রমত্ত হইয়াছিল । ইমামবাড়ী, কৈশরবাগ এবং হজরৎগঞ্জের দৃশ্য অধিকতর ভয়ঙ্কর হইয়া উঠিয়াছিল । কোনরূপ শৃঙ্খলার সম্মান ছিল না, কোনরূপ সুনীতির বন্ধন ছিল না, সংক্ষেপে মানবের মানবোচিত গুণের কোনরূপ নিদর্শন

\* *Russell, Diary. Vol. I., p. 330-331.*

ছিল না । মানব যেন পশুভাবে পরিণত হইয়া পরস্পর কাড়াকাড়ি, ছড়াছড়ি করিতেছিল । অপরে যাহা বহুমূল্য ভাবিয়া সযত্নে রক্ষা করিয়াছিল, তাহা অনাবশ্যক বোধে বিচূর্ণিত বা ভস্মীভূত হইতেছিল । একটি ইউরোপীয় সৈনিক লক্ষ টাকারও অধিক মূল্যের কোম্পানির কাগজ প্রজ্জলিত হতাশন হইতে রক্ষা করে । অবশেষে উহা প্রকৃত অধিকারীর হস্তে সমর্পিত হয় । উদ্ধারকারী, পুরস্কারস্বরূপ মূল্যের উপর শতকরা পাঁচ টাকা হিসাবে কমিশন প্রাপ্ত হয় । শিখ এবং গুর্খারা সর্বাংশে বিলুপ্তনের ফলভোগী হয় । ইংরেজ সৈনিকেরা দ্রব্যাদির প্রকৃত মূল্যের পরিজ্ঞানে সমর্থ ছিল না । ইহারা এক বোতল সুরা ও কয়েকটি টাকার বিনিময়ে বহুমূল্য পদার্থ অপরকে দিতে উদ্বৃত্ত হয় ।\* বিলুপ্তনে উন্মত্ত ও উত্তেজনায় উচ্ছৃঙ্খল সৈনিকেরা এবং তাহাদের পশ্চাদ্ধাবিত অনুচর বা পরিচারকেরা নিহতদিগের উপরেও আত্মপরাক্রম প্রকাশে সঙ্কুচিত হয় নাই । বারুদের বস্তায় প্রজ্জলিত দেশলাই ফেলিয়া, গৃহের অন্তর্ভাগস্থিত সিপাহীদিগকে উড়াইয়া দিবার চেষ্টা হইয়াছিল । যখন বারুদরাশি জলিয়া উঠে, তখন আক্রমণকারিগণ গৃহের কাপড়, লেপ, তোষক প্রভৃতি দ্রব্য এবং কাঠের আসবাবে আগুন লাগাইয়া দেয় । অনল এই সকল পদার্থে প্রবর্দ্ধিত হইয়া উঠে । যাহারা নিহত হইয়াছিল, তাহাদের দেহ প্রায় দগ্ধ হয়, যাহারা আহত হইয়াছিল, তাহারা ও জীবিত থাকিতে উক্ত শবরাশির সহিত ভস্মীভূত হইয়া যায় । এই সকল গৃহের দুর্গন্ধ সাতিশয় ভীতিজনক হইয়া উঠে । ঐতিহাসিকেরা নির্দেশ করেন যে, ফ্রান্সের অধিপতি নবম চার্লস মৃত শত্রুর গন্ধ ভাল বলিতেন । তিনি যদি ১৮৫৮ অব্দের মার্চ মাসে লক্ষ্ণৌর পথ গুলিতে এক বার পদার্পণ করিতেন, তাহা হইলে তাঁহার মৃত্ত পরিবর্তিত হইয়া যাইত ।” †

লক্ষ্ণৌ আক্রমণকালে গবর্নর-জেনেরলের অযোধ্যা-সম্বন্ধে ঘোষণাপত্রে স্যার জেম্‌স্ আউট্রামের হস্তগত হয় । গবর্নর-জেনেরল এই ঘোষণাপত্রে

\* একজন সৈনিক, কোন আফিসার এবং টাইম্‌সের সংবাদদাতা রাসেল্ সাহেবকে মণিমানিক্যে পূর্ণ একটি রৌপ্য বাক্স, এক বোতল রম্ এবং দুইটি মোহর লইয়া দিতে চাহিয়া ছিল । কিন্তু ইহারা কেহই উহা গ্রহণ করেন নাই । শেষে একজন আফিসার কোন মণিকারের নিকটে ঐ সকল মণি ৭৫ হাজার টাকায় বিক্রয় করে ।—*Diary. Vol. I. p. 332.*

† *Reminiscences &c. p. 229-230.*

উল্লেখ করিয়াছিলেন যে, গবর্ণমেন্টের পক্ষাবলম্বী ছয় জন নির্দিষ্ট ভূস্বামী ব্যতীত অল্প ভূস্বামীদিগের ভূসম্পত্তি বাজেয়াপ্ত করা হইবে। যাহারা সাক্ষাৎসম্বন্ধে ইউরোপীয়দিগের নিধনে লিপ্ত থাকে নাই, এ সময়ে তাহারা যদি অবিলম্বে অস্ত্র পরিত্যাগ করে, তাহা হইলে প্রাণদণ্ড হইতে নিষ্কৃতি পাইবে। এই ভাবে ঘোষণাপত্র প্রস্তুত করিয়া, গবর্ণর-জেনেরল স্যার জেমস্ আউট্রামের নিকটে লিখিয়াছিলেন যে, যাবৎ লক্ষ্মী অধিকৃত না হয়, তাবৎ যেন এই ঘোষণাপত্র সাধারণের মধ্যে অপ্রকাশিত থাকে। স্যার জেমস্ আউট্রাম এইরূপে ভূস্বামীদিগের ভূসম্পত্তি বাজেয়াপ্ত করার বিষয়ে আপত্তি প্রকাশ করেন। তিনি ঘোষণাপত্রের প্রাপ্তি স্বীকার পূর্বক গবর্ণর-জেনেরলের নিকটে লিখিয়া পাঠান যে, ১৮৫৬ অব্দের ভূমির বন্দোবস্তে তালুকদারদিগের প্রতি অত্যাচার ব্যবহার করা হইয়াছিল। তাঁহারা সম্পত্তিচ্যুত হইয়া, স্বার্থরক্ষার জন্ত এখন গবর্ণমেন্টের বিরোধী হইয়াছেন। তাঁহাদিগকে বিদ্রোহী না বলিয়া, বিপক্ষ বলাই সঙ্গত। এই আপত্তিতে ঘোষণাপত্র অংশতঃ পরিবর্তিত হয়। স্যার জেমস্ আউট্রাম যে যুক্তি প্রদর্শন করিয়াছিলেন, তাহাতে তাঁহার উদারতা ও মহত্ব পরিষ্কৃত হইয়াছিল। ইংলণ্ডের অধিপতি জন্ যদি কিয়দংশে সমদর্শী হইতেন, তাহা হইলে বোধ হয়, রাণিমিডে মাগনাকার্টা স্বাক্ষরিত হইত না। অযোধ্যার তালুকদারদিগের প্রতি যদি কিয়দংশে উদারতা প্রদর্শিত হইত, তাহা হইলে বোধ হয়, উপস্থিত বিপত্তিকালে লর্ড কানিঙকে এইরূপ বিব্রত হইতে হইত না। বোর্ড অব্ কন্ট্রালের সভাপতি লর্ড এলেনবরাও আউট্রামের স্থায় এই ঘোষণাপত্রের বিরোধী হইলেন। ইংলণ্ডের লোকে লর্ড কানিঙের পক্ষ সমর্থন করাতে তাঁহাকে সভাপতির পদ পরিত্যাগ করিতে হয়। যাহা হউক, লর্ড কানিঙ যখন ১৮৫৯ অব্দের অক্টোবর মাসে লক্ষ্মীতে গমন করেন, সমৃদ্ধ দরবারে তালুকদারগণ যখন তাঁহার সমক্ষে উপনীত হইলেন, তখন তিনি এই ঘোষণাপত্রের প্রত্যাহার করেন। তালুকদারদিগের সহিত যে, অত্যাচার ব্যবহার করা হইয়াছিল, ইহা তখন তাহার স্পষ্ট বোধ হয়।\* বস্তুতঃ এই ঘোষণাপত্র অনেকের অপ্রীতিকর হইয়াছিল।

\* *Lord Roberts, Forty-one years in India. Vol. I. p. 462.*



লক্ষ্যে অধিকৃত হইল বটে কিন্তু, উহা যে প্রদেশের রাজধানী, সেই প্রদেশের অনেক স্থান এখনও অধিকারবহির্ভূত রহিল। প্রধান সেনাপতি অযোধ্যার ভিন্ন ভিন্ন স্থান অধিকারের জন্ত তিন জন অধিনায়কের অধীনে তিনটি সৈনিক-দল পাঠাইয়া দিলেন। সেনানায়ক লুগার্ড যে, কুমার সিংহের বিরুদ্ধে প্রেরিত হইয়াছিলেন, তাহা ইতঃপূর্বে লিখিত হইয়াছে।\* যাহা হউক উক্ত সৈনিক-দল ভিন্ন ভিন্ন স্থান হইতে প্রত্যাবৃত্ত হইয়া, প্রধান সেনাপতির সহিত সম্মিলিত হইলে রোহিলখণ্ড আক্রমণ করা হইবে, এইরূপ সিদ্ধান্ত হইল। এই কথা সংক্ষেপে বর্ণনীয়।

মৌলবী আহম্মদ উদৌল্লা লক্ষ্যের একুশ মাইল দূরে বারি নামক স্থানে অবস্থিতি করিতেছিলেন। এই স্থানে তিনি যে ভাবে সৈন্য সন্নিবেশ করিয়া-ছিলেন, তাহাতে তদীয় বুদ্ধিচাতুরী এবং রণকৌশলের প্রশংসা করিতে হয়। কিন্তু অখারোহীদিগের অনবধানতায় সঙ্কল্পসিদ্ধির ব্যাঘাত ঘটে। মৌলবী বারি পরিত্যাগ পূর্বক শাহজাহানপুরে গমন করেন। স্মার কোলিনের উপস্থিতিসংবাদ শ্রবণে তাঁহাকে এই স্থান ও পরিত্যাগ করিতে হয়। তিনি মোহমদীতে উপনীত হইলেন। এই স্থানে তাঁহার নিকট সংবাদ পঁছছে যে, প্রধান সেনাপতি শাহজাহানপুর পরিত্যাগ করিয়াছেন। সুতরাং মৌলবীও মোহমদী পরিত্যাগ পূর্বক শাহজাহানপুরে ইংরেজসৈন্যের বিরুদ্ধে যাত্রা করেন। যদি তিনি পথে বিশ্রাম না করিতেন, তাহা হইলে অভীষ্ট বিষয়ে কৃতকার্য হইতে পারিতেন। যখন শাহজাহানপুরের চারি মাইল অন্তরে তিনি বিশ্রাম করিতেছিলেন, তখন একজন রাজভক্ত পল্লীবাসী তাঁহার উপস্থিতি-সংবাদ শাহজাহানপুরের ইংরেজসৈন্যের অধিনায়ককে জানায়। সেনানায়ক নগর পরিত্যাগ পূর্বক জেলখানায় আশ্রয় রাখা করিতে থাকেন। সমগ্র নগর মৌলবীর পদানত হয়। মৌলবী অপেক্ষাকৃত ধনী অধিবাসীদিগের নিকট হইতে অর্থ গ্রহণ করেন। কিন্তু তৎকর্তৃক কেহ উৎপীড়িত হয় নাই। তিনি কেবল ইউ-রোপীয় যুদ্ধসংক্রান্ত নিয়মের অনুসরণ করিয়াছিলেন মাত্র। যাহা হউক, মৌলবী ১৮টি কামান যথাস্থানে সন্নিবেশিত করিয়া, ৩রা হইতে ১১ই মে পর্য্যন্ত

\* উপস্থিত গ্রন্থের ৪র্থ ভাগ দেখ।

প্রতিপক্ষ অধিনায়কের অভিযুখে তীব্রভাবে গোলাবৃষ্টি করিতে থাকেন। স্মার কোলিন্ কাম্পবেল এই সংবাদ পাইয়াই অবরুদ্ধ সেনানায়কের সাহায্যার্থে সৈন্ত প্রেরণ করেন। এই সৈন্তের অধিনায়ক ১১ই মে শাহজাহানপুরের সহযোগীদিগের সহিত সম্মিলিত হইলেন। কিন্তু মৌলবী অখারোহী সৈন্তে বলসম্পন্ন ছিলেন। তাঁহার পরাজয় সুসাধ্য হইল না। এদিকে নানাস্থান হইতে তাঁহার সাহায্যার্থে সৈন্ত আসিতে লাগিল। শাহজাদা ফিরোজশাহ তাঁহার সৈনিকদলের সহিত সম্মিলিত হইলেন। বেগম হজরৎ মহল তাঁহার সাহায্যার্থে আগমন করিলেন। নানা সাহেবের সৈন্তে তাঁহার সৈন্তসংখ্যা বর্দ্ধিত হইল। মৌলবী ১৫ই মে ইংরেজ সৈন্ত আক্রমণ করিলেন। সমস্ত দিন যুদ্ধ হইল। কিন্তু জয়পরাজয় স্থির হইল না। এই সংবাদ পাইয়া, প্রধান সেনাপতি যুদ্ধস্থলে উপস্থিত হইলেন। পানহাট নামক স্থানের যুদ্ধে বিপক্ষেরা যথোচিত সাহস ও বীরত্ব দেখাইয়া হটিয়া গেল মাত্র। ইংরেজ সৈন্ত তাহাদের পশ্চাদ্ভাগে অগ্রসর হইল না। মৌলবী প্রতিপক্ষের বশীভূত হইলেন না। প্রধান সেনাপতি স্বপক্ষের আর একজন অধিনায়কে তাঁহার অধীন সৈনিকদলের সহিত আসিতে লিখিয়া পাঠাইলেন। তিনি আসিলে ২৪শে মে সমগ্র সৈন্ত মৌলবীর বিরুদ্ধে অগ্রসর হইল। মৌলবী মোহমদীতে ছিলেন। তাঁহার অখারোহিগণ ইংরেজ সৈন্তকে বাধা দিতে লাগিল। ইহাতে ইংরেজপক্ষের সৈনিকেরা কামান চালাইবার জন্ত কিছুকাল বিলম্ব করিল, এই অবসরে মৌলবী যাবতীয় দুর্গ বিনষ্ট করিয়া, সেই স্থান পরিত্যাগ করিলেন। কাচিয়ানির অরণ্যপরিবেষ্টিত মৃগয় দুর্গ এক সময়ে পলাতক ইউরোপীয়দিগের আশ্রয়স্থল হইয়াছিল, তাহাও বিধ্বস্ত হইল।

মৌলবী অতঃপর বলসম্পন্ন হইবার জন্ত আবার অভিনব উপায়ের উদ্ভাবনে উদ্বৃত হইলেন। ইংরেজের উপর তাঁহার সাতিশয় বিদ্বেষভাব ছিল। কথিত আছে, যুদ্ধের প্রারম্ভে তিনি ভারতবর্ষের নানাস্থানে পরিভ্রমণ করিয়া, নানা শ্রেণীর লোককে উত্তেজিত করিবার চেষ্টা করিয়াছিলেন। যাহা হউক, তিনি এখন অযোধ্যার বেগমের অর্থে প্রবল এবং আপনার ক্ষমতা ও প্রাধাত্যে অটল হইয়া, ৫ই জুন অযোধ্যা ও রোহিলখণ্ডের প্রান্তভাগে—শাহজাহানপুরের তের মাইল উত্তরপূর্বে পোয়াইন নামক নগরে যাত্রা করেন। এই স্থানের রাজা

জগন্নাথ সিংহের ক্ষমতা ও প্রতিপত্তি ছিল। মৌলবীর ইচ্ছা ছিল যে, তিনি জগন্নাথ সিংহকে স্বপক্ষে আনিয়া যুদ্ধে প্রবৃত্ত হইবেন। তিনি পোয়াইনে যাইবার পূর্বে রাজাকে আপনার সঙ্কল্প জানাইয়াছিলেন। রাজাও তাঁহার সহিত সাক্ষাৎ করিতে সম্মত হইয়াছিলেন। সুতরাং মৌলবী আশ্বস্তহৃদয়ে পোয়াইনে গমন করিলেন। তিনি নির্দিষ্ট স্থলে উপস্থিত হইয়া দেখিলেন যে, নগরের দ্বার অবরুদ্ধ রহিয়াছে। প্রাচীরের উপর রাজা, তাঁহার ভ্রাতা এবং সশস্ত্র অনুচর-গণ অবস্থিতি করিতেছে। এই অচিন্ত্যপূর্ব দৃশ্যে মৌলবী চমকিত হইলেন। তাঁহার উদ্বোধ হইল যে, যাবৎ তিনি স্বকীয় বন্ধুতার শক্তিতে রাজার হৃদয়ে ভয় ও বিস্ময়ের সঞ্চার করিতে না পারিবেন, তাবৎ তাঁহার উদ্দেশ্য সিদ্ধ হইবে না। তিনি যে হস্তীতে অধিষ্ঠিত ছিলেন, সেই হস্তী দ্বারা নগরের দ্বার ভাঙ্গিয়া ফেলিতে আদেশ দিলেন। চালকের ইচ্ছিতে শক্তিশালী মাতঙ্গ অগ্রসর হইল এবং প্রকাণ্ড মস্তক দ্বারা দ্বারদেশে এমন বেগে ঠেলিতে লাগিল যে, কিয়ৎক্ষণের মধ্যেই উহা ভগ্নপ্রায় হইল। রাজার ভ্রাতা ইহা দেখিয়া, মৌলবীর প্রতি বন্দুক ছুঁড়িলেন। নিক্ষিপ্ত গুলির আঘাতে মৌলবী দেহত্যাগ করিলেন। তাঁহার অনুচরেরা পলায়ন করিল। রাজা এবং তাঁহার ভ্রাতা অতঃপর মৌলবীর মস্তক, দেহ হইতে বিচ্ছিন্ন করিয়া ফেলিলেন, এবং ছিন্ন মস্তক কাপড়ে জড়াইয়া উহা সঙ্গে লইয়া, শাহজাহানপুরে প্রস্থান করিলেন। যখন তাঁহারা উপস্থিত হইলেন, তখন মাজিষ্ট্রেট্ বন্ধুগণের সহিত ভোজন করিতে ছিলেন। অবিলম্বে বসনাবৃত মূল্যবান্ পদার্থ তাঁহাদের নিকটে স্থাপিত হইল, আবরণের উন্মোচনের পর তাঁহারা দেখিলেন, পরমশত্রু মৌলবীর রুধিরলিপ্ত ছিন্ন মস্তক তাঁহাদের পদতলে বিলুপ্ত হইতেছে। পর দিন সাধারণকে উৎসাহিত বা সন্ত্রাসিত করিবার জন্ত উহা প্রকাশ্য স্থানে স্থাপিত হইল। গবর্ণমেন্ট রাজাকে মৌলবীর ছিন্ন মস্তকের জন্ত পঞ্চাশ হাজার টাকা পারিতোষিক দিলেন। এক জন ইংরেজ ঐতিহাসিক এইভাবে লিখিয়া গিয়াছেন—“এইরূপে ফৈজাবাদের মৌলবী আহম্মদ উল্লার মৃত্যু হইল। কেহ অগ্রায় রূপে স্বাধীনতার বিধ্বংস দর্শনে সেই স্বাধীনতার পুনঃপ্রাপ্তির জন্ত যুদ্ধ করিলে, যদি দেশ-হিতৈষী বলিয়া গণ্য হয়, তাহা হইলে মৌলবী নিঃসন্দেহ প্রকৃত দেশহিতৈষী। তিনি গুপ্তভাবে কাহাকেও বধ করিয়া, আপনার তরবারি কলঙ্কিত করেন

নাই, তিনি নরহত্যাতেও লিপ্ত হয়েন নাই । যে বৈদেশিকগণ তাঁহার দেশ অধিকার করিয়াছিলেন, তিনি তাঁহাদের সহিত সন্মুখযুদ্ধে বিলক্ষণ দৃঢ়তার সহিত ঞায়সঙ্গতভাবে পুরুষোচিত পরাক্রমের পরিচয় দিয়াছিলেন । তিনি সমুদয় জাতির সাহসী এবং হৃদয়বান্ লোকেরই বরণীয় ।”\*

এইরূপে ইংরেজ সজাতির পরম শত্রুরও প্রশংসা করিয়া অপরিমিত মহত্বের পরিচয় দিয়াছেন । বস্তুতঃ উদ্ধৃত অংশ ইংরেজ জাতির অসামান্য মহানু-  
ভাবতার পরিচয়স্থল । স্বদেশপ্রেমিক ইংরেজ মৌলবীয় কার্যে তদীয় স্বদেশ-  
প্রেমের উচ্ছ্বাস দেখিতে পারেন, বীরোচিত গুণে অলঙ্কৃত ইংরেজের নিকটে  
মৌলবীর বীরত্ব প্রশংসনীয় হইতে পারে, কিন্তু এই বীরের তিরোভাগে যে,  
ইংরেজ এ সময়ে একটি পরাক্রান্ত শত্রুর হস্ত হইতে নিষ্কৃতি পাইয়াছিলেন,  
তদ্বিষয়ে সন্দেহ নাই । মৌলবী প্রভূতক্ষমতালালী, নির্ভীক, দৃঢ়তাসম্পন্ন এবং  
ইংরেজের প্রতিপক্ষের মধ্যে একজন উৎকৃষ্ট যোদ্ধা ছিলেন । তাঁহার দেহ  
দীর্ঘ ও সুগঠিত, তাঁহার চক্ষু বৃহৎ, তাঁহার ললাট বিস্তৃত এবং তাঁহার নাসিকা  
উন্নত ছিল । তাঁহার প্রতিপক্ষ বীরপুরুষেরা তদীয় সমরচাতুরী, এবং সৈন্ত-  
পরিচালনাকৌশলের প্রশংসা করিতে নিরস্ত থাকেন নাই । তিনি যুদ্ধক্ষেত্রে  
দুই বার প্রধান সেনাপতি স্যার কোলিন্ কাম্পবেলের চেষ্টা ব্যর্থ করিয়া  
ফেলিয়াছিলেন । স্যার কোলিনের ঞায় বীরপুরুষকেও তাঁহার সমরচাতুরীর  
প্রশংসা করিতে হইয়াছিল ।

এই ঘটনার কয়েক সপ্তাহ পূর্বে ইংরেজদিগের একটি পরাক্রান্ত বীর-  
পুরুষের দেহাত্যয় হয় । ইতঃপূর্বে নোসৈন্যাধ্যক্ষ কাপ্তেন পীলের ক্ষমতার  
পরিচয় দেওয়া হইয়াছে । ইনি লক্ষ্মীতে আহত হয়েন । ঐ স্থান অধিকৃত  
হইলে ইঁহার কার্য শেষ হয় । ইনি লক্ষ্মী পরিত্যাগ পূর্বক কাণপুরে উপনীত  
হয়েন । এই স্থানে বসন্তরোগে ২৭শে এপ্রেল ইঁহার মৃত্যু হয় । কাপ্তেন-  
পীলের নোসৈন্য উপস্থিত যুদ্ধে যথোচিত বীরত্ব দেখাইয়াছিল । কাপ্তেন

\* *Malleon, Indian Mutiny. Vol. II. p. 544*

এই গ্রন্থের স্থানান্তরে ( ২৩৬ পৃষ্ঠায় ) লিখিত হইয়াছে যে, মৌলবীর আদেশে লক্ষ্মীতে  
কতিপয় অবরুদ্ধ ইংরেজ নিহত হয়েন । *English Captives in Oudh* গ্রন্থের লেখক  
মৌলবীর প্রতি এইরূপ দোষারোপ করিয়াছেন । ( *pp.35, 38* ) কিন্তু তখন দিল্লীর সিপাহীরা  
লক্ষ্মীতে উপস্থিত ছিল । ইহাদিগকর্তৃক এই কৰ্ম সম্পাদিত হয় ।

পীল স্বয়ং এরূপ শৃঙ্খলা ও ক্ষমতার সহিত আপনার সৈনিকদলের পরিচালনা করিয়াছিলেন যে, তাঁহার স্বদেশের লোকে তদীয় বীরত্বের প্রতি সম্মানপ্রদর্শনে বিমুখ হইবেন নাই । তাঁহার স্মৃতিচিহ্নস্বরূপ শ্বেতপ্রস্তরময়ী মূর্তি নির্মিত হয় । উহা ভারতসাম্রাজ্যের রাজধানীতে ভাগীরথীর তটবর্তী প্রমোদোষ্ঠানে (ইডেন-গার্ডনে) স্থাপিত রহিয়াছে ।

লক্ষ্মী অধিকৃত হইলে প্রধান সেনাপতি রোহিলখণ্ড অধিকারে কৃতসঙ্কল্প হইলেন । অনেক সিপাহী লক্ষ্মী ছাড়িয়া রোহিলখণ্ডে গিয়াছিল । বেরিলীতে খাঁ বাহাদুর খাঁর প্রাধান্য ছিল । ফিরোজ শাহের সৈনিকদলে তাঁহার বলবৃদ্ধি হইয়াছিল । তিনি খাঁহাদের সহিত যুদ্ধে প্রবৃত্ত হইয়াছিলেন, তাঁহাদের ক্ষমতা, তাঁহাদের সৈনিকবল, তাঁহাদের বুদ্ধিকৌশল তাঁহার অবিদিত ছিল না । এজন্য তিনি বেরিলীতে সৈনিকদিগের মধ্যে এই ভাবে ঘোষণাপত্র প্রচার করিয়াছিলেন,—“তোমরা কাফেরদিগের সহিত সম্মুখযুদ্ধে অগ্রসর হইও না, যেহেতু, তাহারা তোমাদিগের অপেক্ষা অধিকতর শৃঙ্খলাসম্পন্ন, তাহাদের কামানও অনেক । তোমরা তাহাদের গতিপর্যবেক্ষণ করিও । নদীর ঘাটগুলি আটক করিয়া রাখিও । তাহাদের গমনাগমনের পথ অবরুদ্ধ করিও । তাহাদের রসদ ইত্যাদি বন্ধ করিও । তাহাদের ঘাঁটি এবং তাহাদের ডাকের পথ রুদ্ধভাবে রাখিও । সর্বদা তাহাদের শিবিরের চারি দিকে থাকিও । যাহাতে কোন বিষয়ে তাহাদের শাস্তিলাভ না হয়, তৎপ্রতি দৃষ্টি রাখিও ।” \* খাঁ বাহাদুর খাঁ মরাঠাসৈন্যের প্রবর্তিত রীতির অনুসরণ করিয়া বুদ্ধির পরিচয় দিয়াছিলেন । যাহা হউক, যে সকল অধিনায়ক প্রধান সেনাপতি কর্তৃক ভিন্ন ভিন্ন স্থানে প্রেরিত হইয়াছিলেন, তাঁহাদের মধ্যে ব্রিগেডিয়ার ওয়াল্পোল্ রুইয়ার অভিমুখে গমন করেন । রুইয়া লক্ষ্মীর ৫১ মাইল দূরে অবস্থিত । উহার দুর্গ উন্নত মৃৎপ্রাচীরে পরিবেষ্টিত । উহার অধিপতি নৃপৎসিংহ তাদৃশ ক্ষমতাপন্ন ছিলেন না, তিনি বৃদ্ধ ও পঙ্গু ছিলেন । ইংরেজসৈন্যের বিপক্ষে অগ্রসর হইতে তাঁহার কখনও ইচ্ছা হয় নাই । কথিত আছে, তিনি কেবল অযোধ্যার বেগমের আদেশপালনে উদ্বৃত্ত হইয়াছিলেন । কতিপয় বিপ্লবকারী তাঁহার দুর্গে আশ্রয়

\* *Russell, Diary. Vol. I., p. 276.*

গ্রহণ করিয়াছিল। কাপ্তেন হডসনের দলের একজন সৈনিক এই দুর্গে অবরুদ্ধ ছিল। সে পলাইয়া আসিয়া, ব্রিগেডিয়ার ওয়াল্পোলকে দুর্গের অবস্থা এবং নৃপৎসিংহের অভিসন্ধি জানায়। কিন্তু ব্রিগেডিয়ার তাঁহার কথায় বিশ্বাস করেন নাই। তিনি দুর্গপর্য্যবেক্ষণেও অগ্রসর হয়েন নাই, বিনা পরীক্ষায় দুর্গ আক্রমণের আদেশ দেন। ১৫ই এপ্রেল দুর্গ আক্রান্ত হয়। দুর্গস্থিত সৈনিকগণ আক্রমণকারীদিগকে বাধা দিতে নিরস্ত হয় নাই। তাহাদের নিষ্কিপ্ত গুলিতে অনেকে নিহত হয়। দুর্গের অন্তর্ভাগে একটি উন্নত বৃক্ষ ছিল। কাথত আছে, এক জন ইউরোপীয় এই বৃক্ষে অবস্থিতি করিতেছিল। ইহার গুলিতে সেনানায়ক আড্রিয়ান্ হোপ্ দেহত্যাগ করেন। কেহ কেহ নির্দেশ করিয়াছেন যে, উপস্থিত বিপ্লবে বিপক্ষ সিপাহীদিগের দলে ইউরোপীয় ছিল।\*

\* বাঁহারা উপস্থিত বিপ্লবসম্বন্ধে গ্রন্থ লিখিয়াছেন, তাহাদের মধ্যে অনেকের বিশ্বাস যে, বিপক্ষ সিপাহীদিগের মধ্যে ইউরোপীয় ছিল। রীজ সাহেব চিনহাটের যুদ্ধপ্রসঙ্গে লিখিয়াছেন যে, কোক্রইল সেতুর নিকটে একজন ইউরোপীয় সিপাহীদিগের পরিচালনা করিয়াছিল। এই ব্যক্তি স্মৃগঠিত ও স্ত্রী ছিল। বয়স প্রায় ২৫ বৎসর হইয়াছিল। মস্তকে জরির কাজ করা টুপি ছিল। রীজ সাহেব অনুমান করেন, এই ব্যক্তি রুশীয় বা স্বর্ধর্ম্ভ্রোহী খ্রীষ্টান।

রুইয়ার দুর্গস্থিত বৃক্ষ হইতে যে ব্যক্তি আড্রিয়ান্ হোপকে গুলি করিয়াছিল, সেও ইউরোপীয় বলিয়া নির্দ্ধারিত হয়। যেহেতু, তাহাকে বিশুদ্ধরূপে ইংরেজী কথা বলিতে শুনা গিয়াছিল। অধিকন্তু ফর্ব্‌স্মিচেল সাহেব লিখিয়াছেন যে, বিপ্লবের পর তাঁহার অধীন কোন কুঠীতে ঘারবানের কাজ খালি হয়। জমাদার, পদপ্রার্থী কয়েক ব্যক্তিকে লইয়া আইসে, ইহাদের মধ্যে দুর্গা সিংহ নামক এক ব্যক্তি নিয়োজিত হয়। দুর্গা সিংহ ১৮৫৭ অব্দের বিপ্লবে ৯ সংখ্যক পদাতিদলে ছিল। এই পদাতিদল আফিসারদিগের জীবনহানি করে নাই। দুর্গা সিংহ কহিয়াছে যে, সে স্বয়ং দুই জন ইউরোপীয়কে দেখিয়াছে। একজন মিরাতের উত্তেজিত সিপাহীদলে ছিল। এই ব্যক্তি বুদলে-কা-সরাইর যুদ্ধে নিহত হয়। অপর ব্যক্তি রোহিলখণ্ডের বেরিলীর সিপাহীদিগের সহিত দিল্লীতে উপস্থিত হয়। এই ব্যক্তি পদগোরবে সেনাপতি বখ্ত খাঁর অব্যবহিত নিম্নে ছিল। দিল্লীর অবরোধকালে ইহার উপর কামানপরিচালনের ভার ছিল। কোথায় কি ভাবে কামান সন্নিবেশিত করিতে হইবে, কামান কত উচ্চ করিলে গোলাবৃষ্টির সুবিধা ঘটবে, উক্ত ইউরোপীয় সৈনিক এই কর্মে ব্যাপৃত থাকিত। ১৪ই সেপ্টেম্বর এই ব্যক্তি সয়তানের শ্রায় অপূর্ব্ব পরাক্রমের সহিত যুদ্ধ করিয়াছিল। দিল্লী অধিকৃত হইলে উক্ত ইউরোপীয় সেনানায়ক মথুরায় গিয়া, সিপাহীদিগের যমুনা পার হওয়ার বন্দোবস্ত করে। এই সময়ে প্রায় ত্রিশ হাজার সৈন্য বখ্ত খাঁর এবং ফিরোজ শাহের অধীন ছিল। ইহাদের শৃঙ্খলাসম্বন্ধে গোলযোগ ঘটিয়াছিল। কিন্তু সিপাহীগণ বখ্ত খাঁ ও ফিরোজ শাহ অপেক্ষা উক্ত ইউরোপীয়কেই অধিক মানিত। এই সিপাহীরা অবোধ্যার উপনীত হয়। ইউরোপীয় সেনানায়ক তাহাদের সঙ্গে কিছু দিন থাকে। অতঃপর দুর্গা সিংহ ইহাকে রুইয়ার দেখিতে পায়। ইহারই নিষ্কিপ্ত গুলিতে

এদিকে হতাবশিষ্ট ব্যক্তিগণ প্রত্যাভিহিত হইল । রাত্রিকালে দুর্গস্থিত লোক পলায়ন করিল । পর দিন ইংরেজ সৈন্য দুর্গ ধ্বংস করিয়া ফেলিল । তাহারা ১৭ই এপ্রেল বিশ্রাম করিয়া, তৎপর দিন রোহিলখণ্ডের অভিমুখে যাত্রা করে । ২২শে এপ্রেল রামগঙ্গার তটবর্তী শীর্ষা নামক স্থানে ইহারা বিপক্ষদিগকে ( ইহাদের মধ্যে নৃপৎ সিংহের অনুচরগণও ছিল ) দেখিতে পায় । বিপক্ষগণ নৌসেতু দ্বারা রামগঙ্গা পার হইয়া পলায়ন করিতেছিল । কয়েক জন ইংরেজ সৈনিক নদী উত্তীর্ণ হইয়া, ইহাদিগকে আক্রমণ করে । ইহারা পরাজিত হয় । অনেকে রামগঙ্গায় নিমজ্জিত হইয়া যায় । বিপক্ষগণ পরাজিত ও দলভ্রষ্ট হওয়াতে রামগঙ্গার নৌসেতু অব্যাহত থাকে । বেলা ৩টার সময়ে সহসা প্রকৃতির প্রশান্তভাবের ব্যাঘাত হয় । প্রচণ্ড ধূলিঝড়ের সঙ্গে সঙ্গে প্রবলবেগে বৃষ্টি হইতে থাকে । মধ্যে মধ্যে বজ্রনির্ঘোষে চারি দিকের জীবকুল ভীতিবিহ্বল হইয়া উঠে । অবিরল বারিপাতে রামগঙ্গার পরিপুষ্টি ঘটে । ইংরেজসৈন্যের যে অংশ অপর তটে ছিল, তাহারা তাঁবু এবং খাণ্ডের অভাবে একান্ত বিব্রত হইয়া পড়ে । একটি পরিত্যক্ত পল্লী তাহাদের আশ্রয়স্থান হয় । বিপক্ষ সিপাহীগণ যে সকল নৌকা সংগ্রহ করিয়া, নদী পার হইয়াছিল, তৎসমুদয় প্রবল বাত্যাবেগে নিমজ্জিত বা ইতস্ততঃ বিক্ষিপ্ত হইয়া গিয়াছিল । সুতরাং পরিপুষ্ট রামগঙ্গার উত্তরণে একান্ত অসুবিধা ঘটে । এই দুঃসময়ে কমিশারি-য়টের গোমস্তা পূর্বপরিচিত হীরালাল চট্টোপাধ্যায় অভীষ্ট পানীয়ের দ্বারা অপর তটস্থিত সৈনিকদিগের তৃপ্তিসাধনে উদ্বৃত্ত হইলেন । তিনি কাপড়ে চা বাঁধিয়া উক্ত কাপড় মাথায় জড়াইয়া রাখেন, এবং সস্তুরণ দ্বারা নদী পার হইয়া সৈনিক-দিগের সমক্ষে সমাগত হইলেন । সৈনিকেরা এই চা দ্বারা আপনাদের অবসাদ দূর করে । আফিসারেরা হীরালালকে এই ভাবে নদী পার হইতে নিষেধ করিয়া-

আড্রিয়ান্ হোপ্ দেহত্যাগ করেন । রুইয়া হইতে ঐ ব্যক্তি বেরিলীতে যায় । নবাবগঞ্জের যুদ্ধে বখত খাঁ নিহত হইলে, অনেক সিপাহী নেপালে যায় । অনেকে মহারাণীর ঘোষণাপত্র অনুসারে আত্মসমর্পণে উদ্যত হয় । উক্ত ইউরোপীয় ইহাদিগকে পুনর্বার যুদ্ধে প্রবর্তিত করিতে অনেক চেষ্টা করে । কিন্তু তাহার চেষ্টা ব্যর্থ হয় । অবশেষে সে অশ্রুপাত করিতে করিতে কহে যে, তাহার বাড়ী নাই, দেশ নাই, ফিরিয়া যাইবার কোন স্থান নাই । দুর্গা সিংহের সহিত তাহার এই শেষ দেখা । ইহার পর তাহার অদৃষ্টে কি ঘটয়াছিল, জানা যায় নাই ।—*Reminiscences &c. Appendix, B.*

ছিলেন । কিন্তু হীরালাল তাহাতে নিরস্ত হয়েন নাই । তরুণবয়স্ক বাঙ্গালী যুবক আপনার কর্মপটুতায় অভীষ্ট বিষয়ে সিদ্ধিলাভ করেন । তাঁহার সাহস, তাঁহার প্রভুভক্তি, তাঁহার উত্তম উপস্থিত সময় সবিশেষ কার্যকর হয় ।

২৭শে এপ্রেল ব্রিগেডিয়ার ওয়াল্পোল্ প্রধান সেনাপতির সহিত সন্মিলিত হয়েন । ইঁহারা নোসেতু দ্বারা রামগঙ্গা উত্তীর্ণ হইয়া, রোহিলখণ্ডে পদার্পণ করেন । যে বিস্তৃত জনপদ এক সময়ে ইঁহাদের পদানত ছিল, ইঁহাদের আশ্রিত, অনুগত লোকে যে জনপদে এক সময়ে নিরাপদে, নির্বিবাদে কাল-যাপন করিত, ইঁহাদিগকে এখন সেই জনপদে আধিপত্যস্থাপনের জন্ত সৈনিক-দলের সহিত উপস্থিত হইতে হইল । ইঁহাদের সেই আশ্রিত, অনুগত লোকের জন্ত এখন অসুবল আবশ্যক হইয়া উঠিল । স্মার কোলিন্ কাম্প্বেল নিরীহ অধিবাসীদিগের জীবন ও সম্পত্তি রক্ষার জন্ত যত্নশীল ছিলেন । তিনি আদেশ দিয়াছিলেন যে, কেহ কাহারও সম্পত্তি লুণ্ঠন করিতে পারিবে না বা অকারণে কাহারও জীবনের হানি করিতে চেষ্টা করিবে না । রোহিলখণ্ডের অন্তর্গত জেলালাবাদে একটি মৃগয় দুর্গ ছিল । বিপক্ষেরা পূর্বে এই দুর্গ পরিত্যাগ করিয়া গিয়াছিল । ব্রিটিশ কোম্পানির অধিকারে যিনি এই স্থানের তহশীলদার ছিলেন, কথিত আছে, বিপক্ষদের সহিত তাঁহার সংযোগ ছিল । এই সময়ে এক জন ইংরেজ আফিসার প্রতিশ্রুত হয়েন যে, তহশীলদার আত্মসমর্পণ করিলে তাঁহার জীবনের কোনরূপ অনিষ্ট করা হইবে না । তহশীলদার এই প্রতিশ্রুতির উপর নির্ভর করিয়া, আত্মসমর্পণ করেন, কিন্তু মাজিষ্ট্রেটের বিচারে তাঁহার ফাঁসী হয় । ফাঁসীর পূর্বক্ষণে তিনি ধীরভাবে কহিয়াছিলেন যে, ইংরেজ আফিসারের অসত্য বাক্যই তাঁহাকে এই স্থানে আনয়ন করিয়াছে । স্মার কোলিন্ কাম্প্বেল মাজিষ্ট্রেটের কর্মে সাতিশয় ঘণা ও বিরক্তি প্রকাশ করেন । শেষে দণ্ডিত ব্যক্তির অপরাধ সপ্রমাণ হওয়াতে লর্ড কানিঙ্ মাজিষ্ট্রেটের কার্যের অনুমোদন করিয়াছিলেন ।

পূর্বে উক্ত হইয়াছে যে, প্রধান সেনাপতি তিন জন সেনানায়ককে ভিন্ন ভিন্ন দিকে পাঠাইয়াছিলেন । ইঁহাদের মধ্যে প্রথমে ব্রিগেডিয়ার ওয়াল্পোলের সহিত তাঁহার সন্মিলন হয় । তৎপরে অত্র দুই জন অধিনায়ক অত্র দিক হইতে তাঁহার শিবিরে উপনীত হয়েন । সন্মিলিত সৈন্য ৫ই মে বেরিলীর



অভিযুখে অগ্রসর হয়। বেরিলীর সৈন্য যুদ্ধে সবিশেষ সাহস ও পরাক্রমের পরিচয় দিয়াছিল। অশ্বসাদী গাজীগণ এমন সুকৌশলে, এমন ক্ষিপ্ৰকারিতার সহিত তরবারির চালনা করিয়াছিল যে, তাহাদের অস্ত্রাঘাতে ইংরেজপক্ষের সাতিশর ক্ষতি হইয়াছিল। ব্রিগেডিয়ার ওয়াল্পোল আহত হইয়াছিলেন, প্রধান সেনাপতির জীবনও সঙ্কটাপন্ন হইয়াছিল। যদি এক জন সৈনিক তাঁহার আদেশে আক্রমণকারী গাজীকে সঙ্গীনে বিদ্ধ না করিত, তাহা হইলে গাজীর তরবারি বিদ্যুৎবেগে তাঁহার দেহে নিপতিত হইত। যখন গাজীগণ পরাজিতপ্রায় হয়, তখন তাহাদের দলের পাঁচ জন মাত্র অশ্বসাদী উন্মুক্ত তরবারি হস্তে লইয়া, এমন তীব্রবেগে প্রতিপক্ষকে আক্রমণ করে যে, উহাতে তাহাদের অসীম সাহস ও হস্তলাঘব পরিস্ফুট হয়। পাঁচ জনের তরবারির আঘাতে ইংরেজপক্ষের প্রায় একশত জন সৈনিক দেহত্যাগ করে। ইহারা এমন শক্তির সহিত তরবারির চালনা করিয়াছিল যে, কাহারও মস্তক দুই ভাগে বিভক্ত হইয়াছিল। কাহারও স্বক্ক হইতে বক্ষঃস্থলের প্রান্তভাগ পর্য্যন্ত বিচ্ছিন্ন হইয়া গিয়াছিল। এইরূপে পাঁচ জন সাহসী সওয়ার তরবারির প্রয়োগে অসামান্য কৌশলের পরিচয় দিয়া, যুদ্ধক্ষেত্রে দেহপাত করে। ইংরেজের গোলন্দাজদের এক জন সুশিক্ষিত সৈনিক এ সময় বিপক্ষদিগের সহিত সন্মিলিত হইয়াছিল; এই ব্যক্তি সাংঘাতিক-রূপে আহত ও ইংরেজের শিবিরে সমানীত হয়। ইহাকে দেখিয়া, সহৃদয় ইংরেজ আফিসারগণ অশ্রুপাত করিতে করিতে কহিয়াছিলেন যে, এই ব্যক্তি এরূপ শিক্ষিত এবং এরূপ সাহসী ছিল যে, যখন তাঁহারা শত্রুপক্ষের নির্দিষ্ট কোন তোপ বন্ধ করিতে আদেশ দিতেন, তখনই আদেশানুসারে এই সাহসী পুরুষ সেই নির্দিষ্ট তোপটি বন্ধ করিয়া দিত। তাঁহাদের নিকটে এইরূপ সুশিক্ষিত হইয়া, এই ব্যক্তি শেষে তাঁহাদেরই বিপক্ষতাচরণে প্রবৃত্ত হইয়াছিল। ইহা যেরূপ দুঃখজনক, সেইরূপ শোকোদ্দীপক। ৭ই মে বেরিলী অধিকৃত হয়। ঠাঁ বাহাদুর ঠাঁ পলায়ন করেন। এইরূপে দিল্লী, লক্ষৌ, কাণপুর এবং বেরিলীতে ব্রিটিশ সিংহের চিরজয়ী পতাকা উড্ডীন হয়। ১৮৫৮ অব্দের জুনমাসের মধ্যে বিপক্ষগণ উত্তরপশ্চিমপ্রদেশের অগ্ৰাণ স্থান হইতে তাড়িত হয়। তাহাদের দল-ভঙ্গ হইয়া যায়। তাহাদের বসতিস্থলে এবং তাহাদের আধিপত্যের ক্ষেত্রে পুন-র্কার ব্রিটিশ কোম্পানির কর্মচারীগণ শাসনদণ্ডের পরিচালনায় প্রবৃত্ত হইলেন।

রোহিলখণ্ডের অন্তর্গত বিজনোর জেলাতে গোলযোগ ঘটে । সেক্সপিয়ার এই জেলার মাজিষ্ট্রেট ও কালেক্টর ছিলেন । আলীগড়নিবাসী সৈয়দ আহম্মদ সবজ্জের কন্ম করিতেছিলেন । উপস্থিত বিপ্লবে ইঁহার যথোচিত রাজভক্তি ও কন্মক্ষমতা পরিস্ফুট হয় । ইঁহার সাহায্যে ইংরেজেরা অক্ষতশরীরে পলায়ন-পূর্বক আত্মরক্ষা করেন । ইনি ইংরেজের অনুপস্থিতিকালে বিজনোরের শাসন-কার্য্যে ব্যাপৃত হইলেন । শেষে বিজনোরের গোলযোগ অন্তর্হিত হইয়া যায় । দেবাদুনে শান্তি স্থাপিত হয় । মিরাতের মাজিষ্ট্রেট ডনলোপ্ সাহেব উত্তেজিত লোকের আক্রমণনিবারণ এবং আপনাদের প্রাধান্তস্থাপনের জন্তু অভিনব অশ্ব-সাদী সৈনিকদলের প্রতিষ্ঠা করেন । ইহাদের ধূসরবর্ণ সামরিক পরিচ্ছদের নাম থাকি হওয়াতে ইহারা থাকিরেশেলা নামে প্রসিদ্ধি লাভ করে ।\* এইরূপে ১৮৫৮ অব্দের জুন মাসের মধ্যে উত্তর ভারতবর্ষের ভিন্ন ভিন্ন স্থান শান্তিপ্রবণ হয় । মাগর ও নর্মদাপ্রদেশ, মধ্য ভারতবর্ষ এবং বোম্বাই প্রেসিডেন্সিতেও ক্রমে লোকের উত্তেজনা এবং রাজ্যশাসনে নানারূপ অশৃঙ্খলার অবসান ঘটে ।

মাগর ও নর্মদাপ্রদেশ উত্তরপশ্চিম প্রদেশের অব্যবহিত দক্ষিণে অবস্থিত । ১৮৫৭ অব্দে এই প্রদেশ মাগর, জব্বলপুর, হুসেনাবাদ প্রভৃতি এগারটি জেলার বিভক্ত ছিল । ১৮৪৩ অব্দে গোয়ালিয়রের দরবার যখন ব্রিটিশ গবর্নমেন্টের বিরোধী হইলেন, মহারাজপুরের যুদ্ধে যখন এই বিরোধের পরিসমাপ্তি ঘটে, তখন অপরিচিত ও বিদেশীয় শাসনপ্রণালীতে বিরক্তি প্রযুক্তই হউক, অথবা গোয়ালিয়রের দরবারের প্ররোচনা প্রযুক্তই হউক, এই প্রদেশের সর্দারগণ এবং সাধারণ লোকে ব্রিটিশ গবর্নমেন্টের বিরুদ্ধাচরণে প্রবৃত্ত হয় । তদানীন্তন গবর্নর-জেনারল লর্ড এলেনবরা এই বিপ্লবের শান্তির জন্তু কর্নেল স্টিমানকে নিযুক্ত করেন । স্টিমানের শাসনপ্রণালীর গুণে শান্তি স্থাপিত হয়, লোকেও সন্তুষ্ট হইয়া উঠে । কিন্তু শেষে এই প্রদেশ উত্তরপশ্চিম প্রদেশের শাসনকর্তার অধীন হয় । উত্তরপশ্চিম প্রদেশের লেফ্টেনেন্ট-গবর্নর টমাসন্ সাহেবের পরস্বগ্রহণবিষয়িণী প্রণালীর দোষে আবার লোকের মধ্যে বিরাগের সঞ্চার হয় । এ স্থলে একটি দৃষ্টান্ত দেওয়া যাইতেছে । ১৮৪৩ অব্দের গবর্নমেন্ট দিলহেরি

\* *Dulop, Service and Adventure with the Khakee Ressalah.*

নামক স্থানের গোণ্ডরাজার বিশ্বস্ততায় পরিতুষ্ট হইয়া, তাঁহাকে একটি স্বর্ণপদক উপহার দেন। অমিতব্যয় প্রযুক্ত এই রাজার অনেক ঋণ হইয়াছিল। যখন মাগর ও নর্মদা প্রদেশ উত্তরপশ্চিম প্রদেশের শাসনকর্তার অধীন হয়, তাহার কিছুকাল পরে রাজা সমস্ত ঋণ পরিশোধ করেন। কিন্তু এই প্রদেশের গবর্ণমেন্টের শাসন প্রণালী ভিন্নরূপ ছিল। ১৮৫৫ অব্দে লেফ্‌টেনেন্ট-গবর্ণর দিলহেরির অধিপতির “রাজা” উপাধির উচ্ছেদে এবং ভূসম্পত্তির গ্রহণে উদ্যত হইলেন। যে বিভাগে রাজার ভূসম্পত্তি ছিল, কাপ্তেন টর্গান্ নামক একজন সহৃদয় রাজপুরুষ সেই বিভাগের শাসনকার্যে নিয়োজিত ছিলেন। উত্তরপশ্চিম প্রদেশের লেফ্‌টেনেন্ট-গবর্ণর সিদ্ধান্ত করিলেন যে, রাজা আপন কার্যে অযোগ্যতা দেখাইয়াছিলেন। তাঁহার “রাজা” উপাধির উচ্ছেদ ঘটবে। তদীয় জমিদারী প্রজাদিগের মধ্যে ভাগ করিয়া দেওয়া হইবে। তিনি প্রজাদিগের নিকট হইতে শতকরা কিছু উপস্বত্ব পাইবেন। কাপ্তেন টর্গান্ সমবেদনাপর ও উদারপ্রকৃতি ছিলেন। উত্তরপশ্চিম প্রদেশের গবর্ণমেন্টের এইরূপ রাজনীতির প্রতি তাঁহার কিছুমাত্র শ্রদ্ধা ছিল না। তিনি নিতান্ত অনিচ্ছার সহিত রাজাকে গবর্ণমেন্টের সিদ্ধান্ত জানাইলেন। বর্ষীয়ান পুরুষ মাতিশয় মনঃকোভে গবর্ণমেন্ট প্রদত্ত পদক আপনার বক্ষঃস্থল হইতে খুলিয়া ফেলিলেন, এবং কাপ্তেনকে কহিলেন,—“যাঁহারা তাহাকে এই পদক দিয়াছেন, তাঁহারা ই এখন তাঁহাকে তাঁহার সজাতির, স্ববংশের ও স্বদেশের সমক্ষে অপদস্থ করিতে উদ্বৃত হইয়াছেন। এই পদকটি যেন তাঁহাদিগকে ফিরাইয়া দেওয়া হয়।” কাপ্তেন অনেক কষ্টে তাঁহাকে শাস্ত করিলেন। গোণ্ডবনের লোকে ভাবিল যে, বৃদ্ধ রাজা গবর্ণমেন্টের বিরোধী হইবেন। কিন্তু এইরূপ অবমাননাতেও ক্ষমতাপন্ন বর্ষীয়ান পুরুষের রাজনিষ্ঠা অটল রহিল। রাজার পক্ষসমর্থন করাতে কাপ্তেন টর্গান্ উত্তরপশ্চিম প্রদেশের লেফ্‌টেনেন্ট-গবর্ণর কর্তৃক তিরস্কৃত হইয়াছিলেন, এজন্য রাজা তাঁহার প্রতি বারংবার কৃতজ্ঞতা প্রকাশেও ক্রটি করেন নাই। ১৮৫৭ অব্দে যখন নরসিংপুর জেলায় বিপ্লবের সূত্রপাত হয়, তখন কাপ্তেন টর্গান্ আপনার বাসগৃহপরিত্যাগে সন্মত হইলেন নাই। একদা প্রাতঃকালে তাঁহার গৃহ বহুসংখ্যক বন্দুকধারী লোকে পরিবেষ্টিত হয়। কাপ্তেন টর্গান্ দেখিলেন যে, ইহারা দিলহেরির লোক। তিনি অবিলম্বে দলপতিকে ডাকাইয়া

আনিয়া কারণ জিজ্ঞাসা করিলেন । দলপতি গম্ভীরভাবে উত্তর করিলেন—  
 “যখন আমাদের উপাধি এবং সম্পত্তি গৃহীত হয়, তখন আপনি আমাদের  
 প্রতি সদয়তাব দেখাইয়াছেন, এবং আমাদের জন্ত যথোচিত চেষ্টা করিয়াছেন ।  
 এজন্য আপনাকে তিরস্কৃত হইতে হইয়াছে । এখন আমরা শুনিতেছি যে,  
 গোলযোগ পাকিয়া উঠিয়াছে । সুতরাং আপনার কার্যের জন্ত এখানে  
 আসিয়াছি, আপনি যেমন আমাদের পক্ষে ছিলেন, আমরাও সেইরূপ আপনার  
 পক্ষে থাকিব । এখন আমাদেরকে কি করিতে হইবে, বলুন ।” কাণ্ডেন  
 টগান্ তাহাদের সাহায্যগ্রহণে সম্মতি প্রকাশ করেন । বিপ্লবের সময়ে  
 এই বংশের যাবতীয় লোক গবর্ণমেন্টের পক্ষে থাকিয়া, যথোচিত রাজভক্তি  
 প্রকাশ করে ।\*

দিলহেরির রাজার সম্বন্ধে যাহা ঘটয়াছিল মাগর এবং নর্মদাপ্রদেশের  
 অধিকাংশ রাজার সম্বন্ধে তাহাই ঘটে, দিলহেরিরাজের রাজনিষ্ঠা ছিল । কিন্তু  
 অন্যান্য রাজা সমভাবে এইরূপ দৃষ্টান্তের অনুসরণ করেন নাই । ইঁহাদের  
 মর্শবেদনা হইতে ভয়াবহ ঘটনার উৎপত্তি হয় । শ্য়ার্ হিউ রোজ্ মধ্যভারত-  
 বর্ষে বিপ্লবের নিবারণে নিয়োজিত হইয়াছিলেন । ইন্দোর হইতে কালী  
 পর্যন্ত একরূপ বিপ্লব ঘটে যে, উহার নিবারণের জন্ত উক্ত ইংরেজ সেনাপতিকে  
 সবিশেষ প্রয়াস স্বীকার করিতে হয় । রথগড়, মাগর, চন্দোর, জব্বলপুর  
 প্রভৃতি স্থানে সৈনিকবলে বিপ্লবের শাস্তি ঘটে । রথগড় মধ্যভারতবর্ষের  
 একটি প্রাচীন গিরিভূগ । উহা মাগরের চব্বিশ মাইল দূরবর্তী । মহম্মদ  
 ফজিল খাঁ নামক এক ব্যক্তি, “মুন্দেশরের নবাব” উপাধি ধারণপূর্বক এই  
 ভূগে ব্রিটিশ গবর্ণমেন্টের প্রতিপক্ষের পরিচালক হইলেন । ১৮৫৮ অব্দের জানু-  
 য়ারি মাসে শ্য়ার্ হিউ রোজ্ ভূগ আক্রমণ করেন । প্রতিপক্ষের অধিকাংশ  
 পলায়ন করে । ফজিল খাঁ ধৃত হইলেন । ভূগের প্রধান দ্বারের নিকটে ইঁহার  
 ফাঁসী হয় । মাগরের ভূগে মহিলা এবং বালকবালিকায় দেড় শতের অধিক  
 লোক অবরুদ্ধ ছিল । ১৮৫৮ অব্দের ফেব্রুয়ারি মাসের প্রারম্ভে এই ভূগ  
 অধিকৃত এবং অবরুদ্ধগণ বিমুক্ত হয় । বানপুরের সাহসী রাজা এক সময়ে

\* Malleon, *Indian Mutiny of 1857*, p. 256, note.

ইংরেজ পলাতকদিগকে আশ্রয় দিয়াও, শেষে ঘটনাক্রমে নিজের অনিচ্ছায় গবর্ণমেন্টের প্রতিপক্ষ হইয়াছিলেন। শাহগড়ের রাজাও বিপক্ষদলে মিশিয়াছিলেন। ইঁহারা উভয়েই পরাজিত হইলেন। মোগলসম্রাট আকবরের সময়ে চন্দেরি একটি প্রধান স্থান ছিল। “যদি তুমি এমন কোন নগর দেখিতে ইচ্ছা কর যে, উহার গৃহগুলি প্রাসাদের মত, তাহা হইলে চন্দেরি দেখ”, এই কথা আকবরের রাজত্বকালে প্রবাদবাক্যস্বরূপ হইয়াছিল। ঐ সময়ে চন্দেরিতে ১৪,০০০ প্রস্তরনির্মিত প্রাসাদ, ৩৮৪টি বাজার, ৩৬০টি পাহাশালা এবং ১২,০০০ মসজিদ ছিল। এই প্রসিদ্ধ নগর প্রতিপক্ষের হস্তগত হইয়াছিল। ১৮৫৮ অব্দের মার্চ মাসে উহা ইংরেজসৈন্যের অধিকৃত হয়। সেকেন্দর বেগম আপনার কন্টার নামে ভূপালের শাসনকার্য্য নিৰ্ব্বাহ করিতেছিলেন। ইঁহার চেষ্টায় ভূপালে শান্তি অব্যাহত থাকে।

বোম্বাই প্রেসিডেন্সিতে দক্ষিণমহারাষ্ট্রের ভূস্বামিগণ ইনামকমিশনে ক্ষতিগ্রস্ত হইয়াছিলেন।\* অধিকন্তু এই সময়ে নানা সাহেব এবং তাত্যা টোপের কার্য্যও ইঁহাদের গোচর হইয়াছিল। সুতরাং ভারতের পশ্চিম প্রান্ত সিপাহীদিগের উত্তেজনাতরঙ্গ হইতে নিষ্কৃতি পায় নাই। কিন্তু এ সময়ে লর্ড এল্‌ফিন্‌ষ্টোন বোম্বাইর গবর্ণর ছিলেন। ইঁহার কর্ম্মকুশলতার গোলযোগ নিরাকৃত হয়।

দক্ষিণাপথে হায়দরাবাদের নিজাম এবং তাঁহার চিরপ্রসিদ্ধ মন্ত্রী সলারজঙ্গের কর্ম্মকমতা ও রাজনিষ্ঠার গুণে শান্তির মঙ্গলময় বিধান বন্ধমূল থাকে। এইরূপে অনেকস্থলে ইংরেজের ন্যায় এতদেশীয়দিগেরও সাহসে, বুদ্ধিকৌশলে, রাজনিষ্ঠার গুণে এবং কর্ম্মনৈপুণ্যে বিপ্লবের অবসান ঘটে। কিন্তু মধ্য ভারতবর্ষের একটি স্থানের বিপ্লবনিবারণে বহু সৈনিক বল এবং যুদ্ধাভিজ্ঞ সেনাপতির যুদ্ধকৌশল আবশ্যক হয়। ঝাঁসীতে বিপ্লবের পূর্ণবিকাশ ঘটে। রাণী লক্ষ্মীবাইর বীরত্বে ইংরেজ সেনাপতিকে বিব্রত হইতে হয়। পরবর্ত্তী খণ্ডে এই বিষয় বিবৃত হইতেছে।

\* উপস্থিত গ্রন্থের প্রথম ভাগে ইনামকমিশনের বিষয় বিবৃত হইয়াছে

# তৃতীয় খণ্ড ।

## প্রথম অধ্যায় ।

### বাঁশী—লক্ষ্মী বাঈ ।

বাঁশীর সংস্থান—লক্ষ্মী বাঈ—তাঁহার বাল্যবিবরণ—তাঁহার বিবাহ—তাঁহার স্বামীর দেহত্যাগ—বাঁশীতে ব্রিটিশ গবর্নমেন্টের অধিকারস্থাপন—বাঁশীর বিপ্লব—এ সময়ে লক্ষ্মী বাঈর কার্য—ইংরেজের সেনাপতির বাঁশীতে যাত্রা—তাঁহার সহিত লক্ষ্মী বাঈর যুদ্ধের উদ্‌ঘোষ—বাঁশীর দুর্গ আক্রমণ—লক্ষ্মী বাঈর বীরত্ব ও পরাক্রম—তাঁহার বাঁশীপরিত্যাগ—বাঁশীর দুর্গে ইংরেজসেনাপতির অধিকারস্থাপন—রাও সাহেব ও তাত্যা টোপের সহিত লক্ষ্মী বাঈর সন্মিলন—কুঁচের যুদ্ধ—ইংরেজসৈন্যের কালী অধিকার—রাও সাহেব প্রভৃতির গোয়ালিয়রে গমন—মহারাজ শিন্দের পলায়ন—গোয়ালিয়রে রাও সাহেবের অধিকারস্থাপন—ইংরেজ সেনাপতির গোয়ালিয়রে যাত্রা—গোয়ালিয়রের যুদ্ধ—লক্ষ্মী বাঈর যুদ্ধহল-পরিত্যাগ—তাঁহার পশ্চাৎকাল—তাঁহার দেহত্যাগ—গোয়ালিয়রে মহারাজ শিন্দের পুনর্বার অধিকারস্থাপন—দামোদর রাও ।

বাঁশী সাগর ও নর্মদাপ্রদেশের অন্তর্গত । সাগর ও নর্মদাপ্রদেশের উত্তরে ব্রিটিশাধিকৃত বাঁদা, এলাহাবাদ এবং মীর্জাপুর জেলা, দক্ষিণে নাগপুর ও নিজামের রাজ্য, পশ্চিমে গোয়ালিয়র ও ভূপালরাজ্য । এই প্রদেশের অধিকাংশ সাক্ষাৎ সম্বন্ধে ব্রিটিশ গবর্নমেন্টের অধীন ছিল । উহার অন্তর্গত বাঁশীতেও লর্ড ডালহৌসীর আদেশক্রমে কোম্পানির আধিপত্য স্থাপিত হইয়াছিল । বাঁশীর বিপ্লবের বর্ণনা করিতে গেলেই বাঁশীর চিরপ্রসিদ্ধ রাণী লক্ষ্মী বাঈর কথা বলিতে হয় । থর্মাপলির নামে যেমন লিওনিদস্, হলদিঘাটের নামে যেমন প্রতাপ সিংহ, লোকের মানসপটে আবির্ভূত হইয়াছেন, বাঁশীর নামে সেইরূপ লক্ষ্মী বাঈ লোকের মনোমধ্যে উদিত হইয়া থাকেন । বাঁশীর বিপ্লবের প্রসঙ্গে এই বীররমণীর বিচিত্র বিবরণ বর্ণিত হইতেছে ।\*

\* শ্রীযুত দত্তাজের বলবন্ত পারসনবীস মরাঠী ভাষায় লক্ষ্মী বাঈর জীবনী প্রণয়ন করিয়াছেন । উপস্থিত বিবরণের সারাংশ ঐ গ্রন্থ হইতে সংকলিত হইল ।

কৃষ্ণরাও তাণ্ডে নামক একজন মহারাষ্ট্রীয় ব্রাহ্মণ কৃষ্ণানদীর তীরবর্তী ওয়াঁঙ্গি গ্রামে বাস করিতেন। পেশওয়োগণের অধীনে ইনি মামলতদারের ( মাজিস্ট্রেট ও কলেक्टर ) পদে প্রতিষ্ঠিত ছিলেন। ইঁহার পুত্র বলবন্তরাও পেশওয়ার সরকারে সেনানায়কের কর্ম করিতেন। বলবন্ত রাওয়ের দুই পুত্রের মধ্যে জ্যেষ্ঠ মোরোপন্ত পিতার সহিত পুণায় থাকিতেন। ইনি শেষে পেশওয়া বাজী রাওয়ের সহোদর চিমাজী আপ্পার সাতিশয় অনুগ্রহভাজন হইয়াছিলেন। বাজীরাও বিঠুরে গেলে চিমাজী আপ্পা কাশীধামে গিয়া বাস করেন। তাঁহার প্রিয় সহচর মোরোপন্ত তাণ্ডেও সপরিবারে কাশীবাসী হইলেন। এখানে তিনি চিমাজীর দেওয়ানের কর্ম করিতেন।

হিন্দুর এই চিরপবিত্র বারণসীধামে ১৮৩৫ অব্দের ১৯শে নবেম্বর মোরোপন্ত তাণ্ডের একটি কন্যা ভূমিষ্ঠ হয়। এই কন্যা পিতৃগৃহে মনু বাজী নামে পরিচিতা ছিলেন। মনুর বয়ঃক্রম ৩৪ বৎসর হইতে না হইতেই, তাঁহার মাতা ভাগীরথী বাজী দেহত্যাগ করেন। এই সময়ে মোরোপন্তের প্রধান সহায় ও অভিভাবক চিমাজী আপ্পারও মৃত্যু হয়। সুতরাং মোরোপন্ত কাশী পরিত্যাগ পূর্বক বিঠুরে গিয়া, বাজী রাওয়ের আশ্রয় গ্রহণ করেন। মাতৃহীন মনু বাজী পিতার সাতিশয় স্নেহ ও আদরের পাত্রী ছিলেন। তিনি সর্বদা পিতার নিকটে থাকিতেন, পিতার অসামান্য স্নেহসহকৃত আদরে মাতৃবিয়োগহুঃখ বিস্মৃত হইতেন, পিতৃসমীপে নানা ক্রীড়াকৌতুকে আমোদলাভ করিতেন। গৃহে কোন স্ত্রীলোক না থাকাতে বালিকার বাল্যকাল এইরূপে পিতৃসমীপে পুরুষদিগের মধ্যে অতিবাহিত হইয়াছিল। মনুর লাভণ্যময় দেহ, সুপরিষ্কৃত গৌরবাক্তি, সারল্যময় সদাচার দেখিয়া, বাজী রাওয়ের অনুচরবর্গ তাহাকে আদর করিয়া “ছবেলী” ( ময়না ) বলিয়া ডাকিতেন। পেশওয়ার দত্তক পুত্র নানা সাহেব ও রাও সাহেবের সহিত এই বালিকা সর্বদা নানা ক্রীড়া করিত। বালিকার প্রতি বাজী রাওয়ের নিরতিশয় স্নেহ ছিল। তাঁহার স্নেহাতিশয্যে বালিকার বাল্যস্বভাবসুলভ আবদার সহজে পূর্ণ হইত। নানা সাহেব যখন অস্বাস্থ্যবোধে ভ্রমণার্থে বহির্গত হইতেন, তখন মনুও ঘোড়ায় চড়িয়া তাঁহার অনুসরণ করিতেন। নানা সাহেবকে অসিক্রীড়ায় প্রবৃত্ত দেখিলে, মনুও তাঁহার সহিত অসিক্রীড়ায় উত্তম হইতেন। এতদ্ব্যতীত তিনি ঘুড়ি

উড়াইতেন, চক্রক্রীড়া করিতেন, স্বয়ং রাণী সাজিয়া, সঙ্গিনীদিগের মধ্যে কাহাকে দাসী, কাহাকেও সখী সাজাইতেন, কেহ তাঁহার আদেশ না মানিলে তাহাকে দণ্ড দিতেন। এইরূপ ক্রীড়ায় তাঁহার অধিকতর আমোদলাভ হইত। পদচ্যুত পেশওয়ার পুত্রদিগের সহিত তিনি যেরূপ বীরোচিত ক্রীড়াকৌতুকে আমোদিত হইতেন, সেইরূপ লেখাপড়াতেও আগ্রহ প্রকাশ করিতেন। বাল্যকালে সাধারণভাবে তাঁহার বর্ণপরিচয় হইয়াছিল। কথিত আছে যে, তিনি ভ্রাতৃত্বিতীয়ার দিন নানা সাহেবকে ভাইফোঁটা দিতেন। নিয়তির অপরিবর্তনীয় বিধানে সংসারক্ষেত্রে এই উভয়েরই পরিণাম প্রায় একরূপ হইয়াছিল।

একদা একজন জ্যোতিষী মনুর জন্মপত্রিকা দেখিয়া বলিয়াছিলেন যে, তিনি রাজমহিষী হইবেন। মোরোপন্ত জ্যোতিষীর কথায় বিশ্বাস স্থাপন করিতে পারেন নাই। ইতঃপূর্বে তিনি কণ্ঠার জন্ত উপযুক্ত পাত্রে অন্নসন্ধান করিয়াছিলেন, কিন্তু সফলমনোরথ হইয়েন নাই, এখন জ্যোতিষীর কথায় তাঁহার আস্থা জন্মিল না। কিন্তু জ্যোতিষী দৃঢ়তার সহিত বলিলেন যে, তাঁহার গণনার কখনও অশ্রুতা হইবে না। এই সময়ে ঝাঁশীর মহারাজ গঙ্গাধর রাওয়ের পত্নীবিয়োগ হইয়াছিল। জ্যোতিষী, মোরোপন্তকে তাঁহার সহিত কণ্ঠার বিবাহসম্বন্ধ স্থির করিতে বলিলেন। মোরোপন্ত জ্যোতিষীর দৃঢ়তা দর্শনে তাঁহাকেই বাজী রাওয়ের অনুরোধপত্র দিয়া, ঝাঁশীর অধিপতির নিকটে পাঠাইয়া দিলেন।

গঙ্গাধর রাও কণ্ঠা দেখিবার জন্ত একজন অমাত্য পাঠাইলেন। অতঃপর তিনি এই অমাত্যের মুখে মনুর রূপলাবণ্য ও গুণগোরবের বিবরণ শুনিয়া, বাজী রাওয়ের কথায় সন্মত হইলেন। ১৮৪২ অব্দের বৈশাখ মাসে মহাসমারোহে ঝাঁশীর মহারাজের সহিত অষ্টমবর্ষীয়া মনু বাজীর পরিণয় হইল। জ্যোতিষী আপনার গণনা সফল হইল দেখিয়া, সন্তুষ্ট হইলেন। মোরোপন্ত মহারাজকে গৌরীদান করিয়া, আপনাকে চরিতার্থ মনে করিলেন। পুরোহিত যখন গঙ্গাধর রাওর বস্ত্রাঞ্চলের সহিত মনুর বস্ত্রাঞ্চলের গ্রন্থিবন্ধন করেন, তখন মনু পুরোহিতকে বলিয়াছিলেন—“ভাল করিয়া দৃঢ়রূপে গ্রন্থিবন্ধন করুন।” যিনি অতঃপর অপূর্ব তেজস্বিতার সহিত “মেরি ঝাঁশী দেঙ্গী নেহি” বলিয়া,



উচ্চপদস্থ ব্রিটিশ রাজপুরুষের বিষয় জন্মাইয়াছিলেন, অষ্টমবর্ষ বয়সেই তাঁহার এইরূপ বাক্‌চাতুরী পরিক্ষুট হইয়াছিল ।

নববধূ রাজবাটীতে প্রবেশ করিলে মহারাষ্ট্রীয় রীতক্রমে শ্বশুরগৃহে বধূর নূতন নামকরণ হয় । মনুর দেহের স্বাভাবিক সৌন্দর্য্য নানাভূষণে অধিকতর রমণীয় হইয়াছিল । এই দিব্য কান্তি দর্শনে পুরবাসীদিগের আত্মাদের অবধি রহিল না । তাহারা বধূকে মূর্তিমতী লক্ষ্মী বলিয়া মনে করিতে লাগিল । এজন্ত লক্ষ্মীস্বরূপিনী বধূর নাম “লক্ষ্মী বাঈ” রাখা হইল । মোরোপস্তের মনু বাঈ পেশওয়ার অনুচরদিগের ছবেলী এইরূপে লক্ষ্মী বাঈ নামে প্রসিদ্ধ হইলেন । বিবাহের পর লক্ষ্মী বাঈয়ের পিতা ঝাঁশীর দরবারের অন্ততম সর্দার হইলেন । তিনি দ্বিতীয় বার দারপরিগ্রহ করেন । তাঁহার দ্বিতীয়া পত্নীর নাম চিমা বাঈ । ইঁহার এক পুত্র ও এক কন্যা জন্মে ।\*

১৮৫ . খ্রীঃ অকের অগ্রহায়ণ মাসে লক্ষ্মী বাঈ এক পুত্র প্রসব করেন । নব-কুমার লাভে গঙ্গাধর রাও নিরতিশয় আনন্দিত হইলেন । নগরে মহোৎসবের অনুষ্ঠান হয় । কিন্তু এই শিশুটির বয়স তিন মাস পূর্ণ হইতে না হইতেই, উহার দেহাত্যয় হইল । পুত্রশোকে লক্ষ্মী বাঈ কাতর হইলেন । গঙ্গাধর রাও হৃদয়ে একরূপ আঘাত পাইলেন যে, তাঁহার শরীর একবারে ভাঙ্গিয়া গেল । বহু চিকিৎসাতেও তিনি আর সুস্থ হইতে পারিলেন না । ছরস্ত রোগ অবশেষে তাঁহার হৃৎসহ শোকের শাস্তি করিল । তাঁহার দেহত্যাগের পর ঝাঁশীরাজ্য যেরূপে ব্রিটিশ কোম্পানির অধিকৃত হয়, তাহা এই গ্রন্থের প্রথম ভাগে বিবৃত হইয়াছে । মৃত্যুর পূর্বে গঙ্গাধর, যথাবিধানে দত্তক গ্রহণ করেন । এই দত্তক পুত্র দামোদর রাও নামে প্রসিদ্ধ হইলেন ।

ঝাঁশী ব্রিটিশ কোম্পানির অধিকৃত হইলে দরবারের কর্মচারিগণকে বিদায় দেওয়া হয় । মোরোপস্ত এবং লক্ষ্মণরাও রাণীর বিষয়কার্য্যের তত্ত্বাবধানের ভার গ্রহণ করেন । দামোদর রাও সপ্তমবর্ষে ( গর্ভাষ্টমে ) পদার্পণ করিলে লক্ষ্মী বাঈ ১৮৫৫ অকের মাঘ মাসে তাঁহার উপনয়ন সমারোহের সহিত সমাপন করিবার সুকল্প করেন । কিন্তু যথোপযুক্ত অর্থ না থাকাতে তিনি,

\* এই পুত্র ও কন্যা জীবিত আছেন । পুত্রের নাম চিন্তামণি রাও । ইঁহাদের বিবর্ত হইতে লক্ষ্মী বাঈয়ের মহারাষ্ট্রীয় জীবনীলেখক অনেক বিবরণ সংগ্রহ করিয়াছেন ।

দামোদর রাওয়ের নামে কোম্পানির সরকারের যে অর্থ গচ্ছিত ছিল, তাহার মধ্যে এক লক্ষ টাকা প্রার্থনা করিলেন। গবর্ণমেন্ট ইহাতে এই উত্তর দিলেন যে, দামোদর রাও বয়ঃপ্রাপ্ত হইয়া, ঐ টাকার দাবী করিলে, রানী উহা প্রত্যর্পণ করিবেন বলিয়া। যদি প্রতিশ্রুত হইতেন এবং তদ্বিষয়ে চারি জন পদস্থ ও সদ্ভাস্ত ব্যক্তিকে জামিন দিতে পারেন, তাহা হইলে ঐ টাকা দেওয়া যাইবে। গবর্ণমেন্টের এইরূপ উত্তরে লক্ষ্মী বাঈ সান্ত্বিত হইলেন। কিন্তু উপায়ান্তরের অভাবে তাঁহাকে ঐ প্রস্তাবেই সন্তুষ্ট হইতে হইল। তিনি লক্ষ টাকা ব্যয় করিয়া, মহালমারোহে পুত্রের উপনয়নসংস্কার সমাপন করিলেন।

লক্ষ্মী বাঈ ধর্ম্মানুষ্ঠানে ও ঈশ্বরচিন্তায় স্বকীয় মানসিক সন্তোষ বিস্তৃত হইবার চেষ্টা করিতেন। তিনি রাত্রি ৪টার সময়ে শয্যাভ্যাগ করিয়া, স্নানাদি কার্য সমাপন পূর্বক শিবপূজায় প্রবৃত্ত হইতেন। ৮টার সময়ে তাঁহার শিবপূজা শেষ হইত। তাহার পর পরিচ্ছদাদি পরিধান পূর্বক প্রাসাদপ্রাঙ্গণে ৪৫টি অশ্ব লইয়া প্রায় দুই ঘণ্টাকাল উহাদের চালনা করিতেন। ১১টার সময়ে পুনর্বার স্নান করিয়া শাক্তানুষ্ঠানিত প্রাত্যহিক দানধর্ম্মের অনুষ্ঠান পূর্বক ভোজন করিতেন। ভোজনান্তে বেলা ৩টা পর্য্যন্ত ১১শত রামনাম অষ্টপ্রকার চন্দনে ক্ষুদ্র ক্ষুদ্র কাগজে লিখিতেন, এবং ঐ কাগজের খণ্ডগুলি গোধূমচূর্ণের গুটিকার মধ্যে পুরিয়া উহা মৎস্যদিগকে খাওয়াইতেন; সায়ংকাল হইতে রাত্রি ৮টা পর্য্যন্ত পুরাণ শ্রবণ করিতেন। যাহারা তাঁহার সহিত সাক্ষাৎ করিতে চাহিত, তাঁহারা এই সময়ে সাক্ষাৎ করিত। অনন্তর পুনর্বার স্নান করিয়া, তিনি দেবার্চনার্য্য বসিতেন; ইহার পর রাত্রি দ্বিপ্রহরের পূর্বে শয়ন করিতেন। শ্রীমহালক্ষ্মী দেবীর প্রতি তাঁহার সর্বিশেষ ভক্তি ছিল, তিনি প্রতি শুক্রবার উপবাস করিয়া, সূর্যাস্তকালে মহালক্ষ্মীর মন্দিরে দেবীদর্শনে গমন করিতেন।

পতিবিয়োগের পর লক্ষ্মী বাঈ তিন বৎসরকাল এইরূপে কঠোর ব্রতচরণে দুর্ভিক্ষ জীবনভার বহন করিতেছিলেন। তিনি সহসা ব্রিটিশ কোম্পানির বিরুদ্ধাচরণে উদ্বৃত্ত হইতেন নাই। ব্রিটিশ কোম্পানির বিচারে তিনি দুঃখিত হইয়াছিলেন, ব্রিটিশ কোম্পানির কার্য্য নিরতিশয় গ্রামবহিভূত বলিয়া, তিনি সিদ্ধান্ত করিয়াছিলেন, এই কার্য্যের প্রতিরোধের জন্ত তিনি যথাসক্তি গ্রামসম্মত যুক্তি দেখাইয়াছিলেন, কিন্তু এইরূপ বিচারে, এইরূপ দুঃখের আবেগে, এইরূপ যুক্তি-

তর্কের মর্যাদাহানিতে তাঁহার হৃদয়নিহিত তুষানল প্রজ্বলিতপাবকে পরিণত হয় নাই। উপস্থিত বিষয় সম্বন্ধে প্রসিদ্ধ ঐতিহাসিক কে সাহেব এই ভাবে লিখিয়াছেন—“ক্রমে অশান্ত বিষয়ে রাণীর যার পর নাই বিরক্তি জন্মে, ইহার মধ্যে ইংরেজদিগের অনুষ্ঠিত গোহত্যা প্রধান। ধর্মপ্রাণ হিন্দুর নিকটে এই বিষয় সাতিশয় ধর্মহানিজনক। রাণী ইহার প্রতীকারের জন্ত ব্রিটিশ গবর্ণ-মেন্টের নিকটে আবেদন করিলেন। ঝাঁশীর লোকেও গবর্ণমেন্টকে এই বিষয় জানাইয়া প্রতীকারের প্রার্থনা করিল, কিন্তু এই আবেদনের উত্তর সন্তোষ-জনক হইল না। কর্তৃপক্ষ গোহত্যানিবারণে অসম্মত হইলেন; গবর্ণমেন্ট আবার রাণীর বিরক্তিবৃদ্ধির কারণ হইয়া উঠিলেন।” অতঃপর কে সাহেব রাণীর সম্বন্ধে এই ভাবে লিখিয়াছেন—“ইহার পর রাণীকে তাঁহার স্বামীর ঋণ পরিশোধ করিতে বলা হইল। রাণী এই অসম্মত আদেশের বিরুদ্ধে যুক্তি দেখাইলেন। এখানেও ইন্দোরের রেসিডেন্ট্‌ শ্রী রবার্ট হামিণ্টন রাণীর কথা রক্ষা করিতে লেফ্‌টেনেন্ট-গবর্ণরকে অনুরোধ করিলেন। কিন্তু লেফ্‌টেনেন্ট-গবর্ণর পূর্বের শ্রায় অটলভাবে রহিলেন। অতঃপর রাণীর বৃত্তির কিয়দংশ রদ করা হইল।\* রাণী যুক্তিমঙ্গতভাবে কহিলেন যে, তদীয় স্বামীর দেনা তাঁহার নিজের দেনা নহে, সুতরাং তিনি উহার জন্ত দায়ী হইতে পারেন না। তিনি ঝাঁশী ছাড়িয়া পুণ্যক্ষেত্রে বারাণসীতে বাস করিবার অনুমতি প্রার্থনার জন্ত গবর্ণমেন্টের নিকটে আবেদন করিতে প্রস্তুত আছেন। রাণীর সহিত যেরূপ ব্যবহার করা হইয়াছিল, তাহার পরিণামে যে, কি হইবে, বলিতে পারি না। কিন্তু এ সম্বন্ধে যাবতীয় কার্য্য এরূপ অনুদারতামূলক এবং এরূপ শ্রায়বহিভূত যে, কল্বিন সাহেব যদি ইহার কুফলের বিষয় ভাবিতেন, তাহা হইলে তিনিও চমকিত হইতেন।† এইরূপে গবর্ণমেন্টের প্রতি রাণীর বিরাগ ক্রমে ঘনীভূত হইতে

\* গবর্ণমেন্ট রাণীকে মাসিক পাঁচ হাজার টাকা বৃত্তি দিবার বন্দোবস্ত করিয়াছিলেন। রাণীর মহারাজীয় জীবনীলেখক বলেন, রাণী এই বৃত্তিগ্রহণে সম্মত হইয়েন নাই। তাঁহার যে কিছু অর্থ সঞ্চিত ছিল, তদ্বারা তিনি কোনরূপে দিনপাত করিতেন।

† মাংসে বিদ্ধ কণ্টকের শ্রায় নিম্নলিখিত পঞ্চগ্রহণকর্মণ্ড অন্ন উস্তেজনার উদ্দীপক নহে, ঝাঁশীর পূর্বদিকে নগরপ্রাচীরের বহির্ভাগে লক্ষ্মীদেবীর মন্দির আছে। গঙ্গাধর রাওর পূর্বপুরুষ দেবসেবার জন্ত দুই খানি গ্রামের উপস্থিত নির্দিষ্ট করিয়া গিয়াছিলেন। গঙ্গাধর রাওর মৃত্যু হইলে ডেপুটি কমিশনার এই বন্দোবস্ত পূর্বের শ্রায় রাখিতে গবর্ণমেন্টকে অনুরোধ করেন। কিন্তু গ্রাম দুইখানি অধিকার করিবার আদেশ দেওয়া হয়। রাণী ইহার

লাগিল। তাঁহার যেরূপ পুরুষোচিত ক্ষমতা, সেইরূপ নারীজনোচিত হিংসা-প্রবৃত্তি ছিল। তিনি ঝটিকাসঞ্চারের প্রতীক্ষায় রহিলেন। রাণী নিশ্চিত বুঝিয়াছিলেন যে, তাঁহার সময় উপস্থিত হইবে। ১৮৫৭ অব্দে তাঁহার বয়স উনত্রিশ কি ত্রিশ বৎসর হইয়াছিল।\* তাঁহার যেরূপ তীক্ষ্ণ বুদ্ধি, সেইরূপ কর্তব্যসাধনে দৃঢ়তা, বাক্কৌশল ও উৎকৃষ্ট যুক্তিবিদ্যাসপ্রণালী ছিল। তিনি কমিশনার বা গবর্নরের নিকটে আপনার বিষয় বিশদরূপে বলিতে পারিতেন; যখন ইংরাজ রাজপুরুষের সহিত কথা কহিতেন, তখন আপনার অন্তনিগূঢ় বিরক্তি বা ক্রোধ চাপিয়া রাখিতেন। তাঁহার বিরুদ্ধে নানা কথা প্রচারিত হইয়াছিল; কিন্তু এইরূপ বিরুদ্ধ কথা প্রচার করা আমাদের একটা রীতি। যখন কোন রাজ্য অধিকৃত হয়, তখন রাজ্যভ্রষ্ট ভূপতি অথবা তাঁহার উত্তরাধিকারীর বিরুদ্ধে নানা কথা প্রচারিত হইয়া থাকে। কথিত আছে, রাণী অপরের ক্ষমতায় বশীভূত ও পরিচালিত বালিকামাত্র ছিলেন। তিনি অমিতাচারে অক্ষুণ্ণ আসক্ত থাকিতেন। রাণী যে, কেবল বালিকা নহেন, তাহা তাঁহার কথাবার্ত্তাতে প্রকাশ পাইত। তাঁহার অমিতাচার অপরের কল্পনামূলক ব্যতীত আর কিছুই নহে।” †

উপস্থিত সময়ে ঝাঁশীতে ১২ সংখ্যক এতদেশীয় পদাতিদলের একাংশ, ১৪ সংখ্যক অনিয়মিত অশ্বারোহিদলের একাংশ এবং কতিপয় গোলন্দাজ সৈনিক ছিল। কাপ্তেন ডনলুপ এই সকল সৈনিকের অধিনায়ক ছিলেন। ঝাঁশী যে দিন ব্রিটিশরাজ্যের সহিত সংযোজিত হয়, সেই দিন হইতে কাপ্তেন স্কীন কমিশনারের পদে প্রতিষ্ঠিত ছিলেন। ঝাঁশীতে যে, কোনরূপ গোলযোগ ঘটিবে, ইহাতে কাপ্তেন স্কীনের বিশ্বাস ছিল না। যখন মিরাতে গোলযোগ ঘটে, তখনও কাপ্তেন স্কীনের বিশ্বাস জন্মে নাই যে, ঝাঁশীর সিপাহীরা গবর্ন-

প্রতিবাদ করেন। এই বিষয় পুনর্বার গবর্নমেন্টের বিচারের জন্ত যায়। ইহার ফল পূর্ববৎ হয়। কিন্তু গবর্নমেন্টের আদেশ কার্যে পরিণত হইতে না হইতেই ঝাঁশীতে বিপ্লব ঘটে।

\* উক্ত জীবনীতে উক্ত হইয়াছে যে, ১৮৩৫ খ্রীঃ অব্দে লক্ষ্মী বাঈর জন্ম হয়। সুতরাং ১৮৫৭ অব্দে তাঁহার বয়স ২২ বৎসরের অধিক হয় নাই।

† *Kaye, Sepoy War. Vol. III., p. 562-563.*

স্মার জন্ মালকম্ও রাণীর সূচরিত্রের যথোচিত প্রশংসা করিয়াছেন। উপস্থিত গ্রন্থের প্রথম ভাগে ইহা বিবৃত হইয়াছে।

মেণ্টের বিরুদ্ধে সমুখিত হইবে, অথবা বাহিরের লোকে সিপাহীদিগকে উত্তেজিত করিয়া তুলিবে। তিনি ১৮ই মে আগরায় এই ভাবে লিখিয়া পাঠাইয়াছিলেন—

“এই স্থানে যে, কোনরূপ আশঙ্কার কারণ আছে, তাহা আমার মনে হয় না। এখানকার সৈনিকেরা বিশ্বস্তভাবে আছে, এবং মিরাত ও দিল্লীর ঘটনায় অসীম ঘৃণা প্রকাশ করিতেছে। ইহারা কাপ্তেন ডনলুপের গ্ৰাম একজন উপযুক্ত অধিনায়কের অধীন রহিয়াছে। ইহাদিগকে কি ভাবে পরিচালিত করিতে হয়, তাহা তিনি জানেন। তিনি ইহাদের মধ্যে কোনরূপ অসন্তোষের কারণ দেখিতে পাইতেছেন না।” মে মাস অতীত হইল। জুন মাসের প্রারম্ভে কমিশনর সাহেব সিপাহীদিগের এইরূপ অনুরক্তি ও প্রভুভক্তির বিষয়ে নিঃসন্দেহ রহিলেন। তিনি কোনরূপ বিপদের আশঙ্কা করেন নাই। কিন্তু দেখিতে দেখিতে বিপদের পূর্বসূচনা ঘটিতে লাগিল।

কমিশনর সাহেব ৩রা জুন নিঃসন্দেহচিত্তে সিপাহীদিগের প্রভুভক্তির বিষয় প্রকাশ করিয়াছিলেন, ইহার এক দিন কি দুই দিন পরে দিবাভাগে সৈনিক-নিবাসের দুই খানি বাংলা পুড়িয়া গেল। এই দুর্গের দিকে বন্দুকের শব্দ হইতে লাগিল। কর্তৃপক্ষ আর কোন দিকে দৃষ্টিপাত না করিয়া, আর কোন বিষয় না ভাবিয়া, আশ্রয়ক্ষায় ও সম্পত্তিরক্ষায় উদ্বৃত্ত হইলেন। যুদ্ধাসমর্থ ইউরোপীয়গণ পরিবারবর্গ ও সম্পত্তি লইয়া নগরের দুর্গে আশ্রয় গ্রহণ করিল। সিপাহীদিগের আফিসরগণ সৈনিকনিবাসে রহিলেন। কাপ্তেন ডনলুপ এবং তাঁহার সহযোগীগণ সিপাহীদিগকে শাস্তভাবে রাখিতে চেষ্টা করিতে লাগিলেন। সিপাহীরা নিমকের মর্যাদা রক্ষা করিল না। পর দিন প্রাতঃকালে কাওয়াজ হইবে বলিয়া আদেশ প্রচারিত হইল। নির্দিষ্ট সময়ে এতদেশীয় আফিসরগণ বাঁশীর সিপাহীদিগের সহিত কাওয়াজের ক্ষেত্রে সমবেত হইলেন। সিপাহীগণ এ সময়ে কোনরূপ উত্তেজনার পরিচয় দিল না। তাহারা প্রশান্তভাবে যথোচিত সম্মানসহকারে অধিনায়কের আদেশের অনুবর্তী হইল। কিন্তু এইরূপ প্রশান্তভাবে, এইরূপ সম্মানপ্রদর্শনে কোন ফল হইল না। ঝটিকার প্রারম্ভে প্রকৃতি যেমন প্রশান্তভাবে থাকে, সিপাহীদিগের বাহ্যভাবও সেইরূপ প্রশান্ত রহিল। এই সময়ে স্কীন এবং গর্ডন সাহেব সৈনিকনিবাসে গিয়া, কাপ্তেন ডনলুপের সহিত সাক্ষাৎ করিলেন। অনন্তর স্কীন সাহেব দুর্গে প্রত্যাবৃত্ত

হইলেন। গর্ডন সাহেব আপনার গৃহে গিয়া, ভোজন সমাপন পূর্বক সাহায্যপ্রাপ্তির প্রত্যাশায় পার্শ্ববর্তী সর্দারদিগের নিকটে পত্র লিখিলেন। কিন্তু বিপদ অনিবার্য হইয়া উঠিল। ঐ দিন প্রাতঃকালে সমগ্র সিপাহীদল গবর্ণমেন্টের বিরুদ্ধে সমুথিত হইয়া, আপনাদের আফিসরদিগের উপর গুলি চালাইতে লাগিল। ইউরোপীয়দিগের মধ্যে প্রায় সকলেই নিহত হইলেন। কেবল একজন অধিনায়ক গুরুতর-রূপে আহত হইয়াও, কোনরূপে অশ্বারোহণ পূর্বক দুর্গে প্রস্থান করিলেন। উত্তেজিত সিপাহীগণ সৈনিকনিবাস এইরূপে নরশোণিতে রঞ্জিত করিল। অতঃপর তাহারা কারাগারের কয়েদীদিগকে ছাড়িয়া দিল, কাছারিঘর পুড়াইয়া ফেলিল। অবশেষে উত্তেজিত সিপাহী, কারামুক্ত কয়েদী, বিশ্বাসঘাতক পুলিশ প্রহরী, সকলে মিলিয়া, দুর্গ অবরোধ করিল।

৭ই জুন দুর্গবাসী ইউরোপীয়দিগের অদৃষ্টচক্র আবর্তিত হইল। চারি দিক করাল মেঘমালায় সমাবৃত হইয়াছিল। প্রবলবেগে ঝটিকার সঞ্চার ঘটয়াছিল। এই ভয়ঙ্কর ঝটিকাপাতের মধ্যে পলায়ন পূর্বক প্রাণরক্ষা করা ইউরোপীয়দিগের সুসাধ্য হইল না। সুতরাং তাহারা এখন নিরুপায় হইয়া, এক সময়ে যাহার প্রতি অগ্রায় ব্যবহারের এক শেষ করিয়াছিলেন, তাহারই শরণাগত হইলেন। ৭ই জুন প্রাতঃকালে কাপ্তেন স্কীন দুর্গ হইতে নিরাপদে স্থানান্তরে চলিয়া যাইবার বন্দোবস্ত করিবার নিমিত্ত লক্ষ্মী বাঈর নিকটে কতিপয় কর্মচারী পাঠাইলেন। কথিত আছে, ইঁহারা পথিমধ্যে অবরুদ্ধ ও রাণীর নিকটে আনীত হইলেন। রাণী ইঁহাদিগকে উত্তেজিত সিপাহীদিগের হস্তে সমর্পণ করিলেন। এই সকল সিপাহীর অন্নাঘাতে ইঁহাদের প্রাণান্ত ঘটিল।\* ঝাঁশীর প্রধান সদর আমীন রাণীর ভৃত্যগণ কর্তৃক নিহত হইলেন। স্কীন ও গর্ডন সাহেব সেই দিন রাণীর নিকটে বারংবার পত্র লিখিলেন। কিন্তু ইঁহাদের পত্র কোথায় গেল, তাহার কোন নিদর্শন পাওয়া গেল না। বেলা দুই ঘটিকার পর উত্তেজিত লোকে দুর্গ আক্রমণ করিল। কিন্তু ইঁহাতে দুর্গবাসীদিগের কোনরূপ ক্ষতি হইল না। ৮ই জুন প্রাতঃকালে তাহারা আবার অধিকতর উৎসাহের সহিত আক্রমণ করিল। দুর্গের বর্হিভাগে সশস্ত্র লোকে যেমন ইউরোপীয়দিগের

\* ইহা ইংরেজলেখকদিগের কথা। লক্ষ্মী বাঈর জীবনীলেখক যে বিবরণ সংগ্রহ করিয়াছেন, তাহাতে এরূপ ঘটনার উল্লেখ নাই।

শোণিতপাতে সচেষ্টিত হইয়াছিল, দুর্গের অভ্যন্তরেও সেইরূপ নিরস্ত্র বিশ্বাস-ঘাতকগণ তাঁহাদের অনিষ্টসাধনে অগ্রসর হইয়াছিল। আক্রমণকারীদিগের প্রবেশের জন্ত দুর্গদ্বার খুলিয়া দিবার চেষ্টা হয়। সৌভাগ্যক্রমে উপযুক্ত সময়ে এইরূপ চেষ্টার প্রতিরোধ করা হয়। ইহাতে কিছুকালের জন্ত দুর্গবাসিগণ অক্ষতশরীরে থাকেন। কিন্তু আক্রমণকারীদিগের উত্তম নিষ্ফল কবিনার সুযোগ ঘটিল না। কাপ্তেন গর্ডন নিহত হইলেন। আহারসামগ্রী ও গোলা-গুলি নিঃশেষপ্রায় হইল। চারি দিকে আক্রমণকারীদিগের সংখ্যা উত্তরোত্তর বৃদ্ধি পাইতে লাগিল। সুতরাং আক্রমণকারীদিগের হস্তে আত্মসমর্পণ ব্যতীত আর কোন উপায় রহিল না। কাপ্তেন স্কীন অগত্যা সন্ধিসূচক শ্বেতপতাকা উড়াইয়া দিলেন।

সিপাহীদিগের অধ্যক্ষগণ ইহা দেখিয়া, দুর্গদ্বারে সমাগত হইল, এবং কাপ্তেন স্কীনের সন্ধিস্থাপনের জন্ত গম্ভীরভাবে শপথ করিতে দেখিয়া, শালে মহম্মদ নামক একজন নেটিব ডাক্তারের দ্বারা জানাইল যে, যদি ইংরেজেরা অস্ত্র পরিত্যাগপূর্বক দুর্গ সমর্পণ করেন, তাহা হইলে তাঁহাদের কেশাগ্রও স্পর্শ করা হইবে না। এই প্রস্তাব গ্রাহ হইল। দুর্গবাসিগণ অস্ত্রাদি পরিত্যাগ করিলেন। দুর্গ হইতে যাত্রা করিবার আয়োজন হইতে লাগিল। কিন্তু হতভাগ্যদিগের নিষ্কৃতিলাভ ঘটিল না। দুর্গদ্বার অতিক্রম করিতে না করিতেই সশস্ত্র সিপাহীগণ তাঁহাদের মধ্যে আসিয়া পড়িল, এবং হাত বাঁধিয়া তাঁহাদিগকে বন্দী করিল। এখন বাধা দিবার—আত্মরক্ষা করিবার আর কোন উপায় রহিল না। আক্রান্ত-গণ নিরীহ মেঘপালের ন্যায় স্থিরভাবে রহিলেন। অবরুদ্ধদিগকে রাজপথ দিয়া নগরের বহির্ভাগে লইয়া যাওয়া হইল। কতিপয় সওয়ার এই সময়ে আসিয়া কহিল, রেশেলাদারের হুকুম, অবরুদ্ধদিগকে বধ করিতে হইবে। অনন্তর এই শোচনীয় দশাগ্রস্ত জীবদিগকে বৃক্ষশ্রেণীর নিকটে শ্রেণীবদ্ধভাবে রাখা হইল। জেলের সুপারিন্টেণ্ডেন্টের পরমবিশ্বাসের পাত্র দারোগা এই ভয়ঙ্কর কার্যের কর্তৃত্ব গ্রহণ করিল। জেলদারোগা সর্বপ্রথম আপনার প্রাচীন মনিবের প্রাণ সংহার করিল। মহিলাগণ ও বালকবালিকাদিগকে পুরুষগণ হইতে বিচ্ছিন্নভাবে রাখা হইল। ইহাদের সকলেই ঘাতকদিগের অস্ত্রাঘাতে দেহত্যাগ করিলেন। ইহাদের দেহ তিন দিন পর্য্যন্ত রাস্তায় ফেলিয়া রাখা

হইল। পরে অতি সামান্যভাবে এক ভাগে পুরুষদিগের, অত্র ভাগে নারীদিগের সমাধি হইল। এইরূপে পঞ্চাশ ষাট জন নিরীহ ও নিরপরাধ খৃষ্টধর্মাবলম্বীর শোণিতে নবাধিকৃত ঝাঁপী কলঙ্কিত হইল।\*

মহামতি কে সাহেব এই ভাবে ঝাঁপীর শোচনীয় ঘটনার বিবরণ দিয়াছেন। ইহার পর তিনি লিখিয়াছেন—“বিশ্বাস্ত্র প্রমাণ অনুসারে জানা গিয়াছে যে, এই ভয়ঙ্কর নরহত্যার সময়ে রাণীর ভ্রাতৃদিগের মধ্যে কেহই উপস্থিত ছিল না। প্রধানতঃ ইহা আমাদের পুরাতন লোকের কর্ম। অনিয়মিত অশ্বা-রোহিদগ হইতে এই নরহত্যার আদেশ প্রচারিত হয়। জেলদারোগা ইহার কড়ত্ব গ্রহণ করে।”† কে সাহেবের এইরূপ উক্তি প্রতাপন হইতেছে যে, ঝাঁপীর নরহত্যাকাণ্ডে রাণী লক্ষ্মী বাঈ লিপ্ত ছিলেন না।

মহারাষ্ট্রীয় লেখকদিগের মতে ৭৫ জন সাহেব, ১৯টি বিবি এবং ২৩টি বালকবালিকা নিহত হয়। এইরূপ নৃশংস কর্মে রাণীর কোনরূপ সম্বন্ধ ছিল কি না, লক্ষ্মী বাঈর জীবনীতে তদ্বিষয় এই ভাবে বর্ণিত হইয়াছে, ‡—

জুন মাসের প্রারম্ভে ঝাঁপীর সৈনিকদিগের মধ্যে উত্তেজনার সঞ্চার দেখিয়া, ডেপুটি কমিশনার কাপ্তেন গর্ডন এবং অপর ইউরোপীয়গণ ঝাঁপীর রাণীর নিকটে আশ্রয়ক্ষার জন্য আশ্রয় এবং ঝাঁপীরক্ষার জন্য সৈন্ত প্রার্থনা করেন। রাণী প্রার্থনাপূরণে সম্মত হইলেন, কিন্তু তাঁহার সৈন্তসংখ্যা অধিক ছিল না, এজন্য তিনি সমাগত রাজপুরুষদিগের নিকটে সৈন্তসংখ্যা বৃদ্ধি করিবার প্রস্তাব করেন। সে সময়ে এই প্রস্তাব রাজপুরুষদিগের অনু-মোদিত হয়।

প্রথম দিন এই ভাবে অতিবাহিত হইল। পর দিন গর্ডন সাহেব একাকী রাণীর সহিত সাক্ষাৎ করিয়া, তাঁহাকে কেবল আপনাদের কুলমহিলাগণ ও বালকবালিকাদিগের সংরক্ষণের ভার গ্রহণ করিতে অনুরোধ করিলেন।

\* *Kaye, Sepoy War. Vol. III, p. 369.*

† *Ibid.*

‡ লক্ষ্মী বাঈর একজন পুরাতন কর্মচারী ঝাঁপীর যুদ্ধ দেখিয়াছিলেন। ইনি উজ্জয়িনীতে গিয়া বাস করেন। উজ্জয়িনীর জজ রাও বাহাদুর চিন্তামণি নারায়ণ বৈদ্য এম্. এ. এল্. এল্. বি. ঐ কর্মচারীর নিকট হইতে উপস্থিত বিবরণ সংগ্রহ করিয়াছিলেন।



রাণী সম্মত হইলেন । তৎপরদিন ইংরেজরমণীগণ সস্তানদিগকে লইয়া, রাণীর প্রাসাদে উপস্থিত হইলেন । রাণী যথোচিত সৌজন্য প্রকাশ পূর্বক তাঁহাদের অবস্থিতির জন্ম স্থান নির্দেশ করিয়া দিলেন, এবং তাঁহাদের রক্ষার জন্ম উপযুক্ত প্রহরী নিযুক্ত করিলেন । কিন্তু তাঁহারা দীর্ঘকাল রাণীর তত্ত্বাবধানে থাকিলেন না । সিপাহীরা গবর্ণমেন্টের বিরুদ্ধে সমুথিত হইল । ইংরেজেরা দুর্গে আশ্রয় গ্রহণ করিলেন, এবং আপনাদের আশ্রয়স্থল অধিকতর সুরক্ষিত ও নিরাপদ মনে করিয়া, কুলমহিলাগণ ও বালকবালিকাদিগকে তথায় লইয়া গেলেন । মহিলারা রাণীর প্রাসাদ পরিত্যাগ করিলেও রাণী দুই তিন দিন পর্যন্ত প্রত্যহ রাত্রিকালে উত্তেজিত সিপাহীদিগের অজ্ঞাতসারে, তাঁহাদের আহারার্থে তিন মণ গমের রুটী পাঠাইয়া দিয়াছিলেন । অতঃপর তাঁহাদের অদৃষ্টে যাহা ঘটয়াছিল, তাহা কে সাহেবের লিখিত বিবরণে পরিব্যক্ত হইয়াছে । উত্তেজিত লোকের অস্বাভাবিক যত ইউরোপীয় স্ত্রীপুরুষ ও বালকবালিকা দেহত্যাগ করে, তাহা পূর্বে উক্ত হইয়াছে । রাণীর যদি উপযুক্তসংখ্যক সৈন্য ও সুদক্ষ কর্মচারী থাকিত, তাহা হইলে ৮ই জুন রাণীতে এই সকল অসহায় ইউরোপীয়ের শোণিতপাত হইত না । রাণী, মুন্সী অযোধ্যা প্রসাদ দ্বারা কাপ্তেন গর্ডন সাহেবকে বলিয়া পাঠাইয়াছিলেন যে, তিনি আদেশ পাইলে এই বিপত্তিকালে তাঁহাদের সাহায্যের জন্ম ঠাকুরজাতীয় সৈন্য সংগ্রহ করিতে পারেন । ইহার উত্তরে গর্ডন সাহেব কহিয়াছিলেন,—“আমরা আপনাদের সাহায্যগ্রহণের ইচ্ছা করি না । আমাদের বিষয় না ভাবিয়া, আপনারা আত্ম-রক্ষার চেষ্টা করুন ।” সুতরাং অক্রান্ত ইউরোপীয়দিগের রক্ষার জন্ম রাণীর সমক্ষে আর কোন উপায় ছিল না । সিপাহীরা দিল্লীর অভিমুখে প্রস্থান করিলে রাণী ইউরোপীয়দিগের শবগুলির যথারীতি সংকার করাইয়াছিলেন । দুই জন ইংরেজ এবং একটি ইংরেজমহিলা এই ভয়ঙ্কর ঘটনা হইতে কোনরূপে প্রাণ রক্ষা করেন । ইহাদের মধ্যে মার্টিন নামক এক ব্যক্তি আগরায় থাকেন । ইনি রাণীর দত্তক পুত্র শ্রীযুত দামোদর ঝাণ্ডের নিকটে স্পষ্টাক্ষরে লিখিয়াছিলেন,—“আপনার মাতৃদেবীর প্রতি সাতিশয় ঞ্চায়বিরুদ্ধভাবে এবং নির্দয়-রূপে এ বিষয়ের দোষভার সমর্পিত হইয়াছে । আমি ব্যতীত আর কেহই প্রকৃত ঘটনা জানেন না । আপনার গরীব মাতাঠাকুরাণী ১৮৫৭ অব্দের

জুন মাসে ঝাঁশীর ইউরোপীয় অধিবাসীদিগের নিধনব্যাপারে কোন অংশে লিপ্ত ছিলেন না। ইউরোপীয়গণ দুর্গে গেলে তিনি দুই দিন তাঁহাদের খাড়া-সামগ্রী পাঠাইয়া দেন। করেয়া হইতে এক শত বন্দুকধারী লোক আনিয়া, তাঁহাদের সাহায্যার্থে প্রেরণ করেন। কিন্তু ইংরেজেরা এই সকল লোককে এক দিন দুর্গে রাখিয়া, পরে বিদায় দেন। ইহার পর রাণী মেজর্ স্কীন এবং কাপ্তেন গর্ডনকে পলায়ন পূর্বক দতিয়া নামক স্থানের রাজার আশ্রয় গ্রহণ করিতে অনুরোধ করেন। এই অনুরোধও রক্ষিত হয় নাই। অবশেষে তাঁহারা আপনাদের সৈন্য ও পুলিশ প্রহরী প্রভৃতি কর্তৃক নিহত হইলেন।”\*

উত্তেজিত সিপাহীরা ইউরোপীয়দিগকে বধ করিল, ছাউনী লুণ্ঠিয়া লইল, ঝাঁশীর দুর্গে—ঝাঁশীর সৈনিকনিবাসে স্বপ্রধান হইয়া উঠিল, ইহার পর রাজ-প্রাসাদ তাহাদের লক্ষ্য হইল। তাহারা প্রাসাদ অবরোধ করিল। তাহাদের দলপতি রাণীকে কহিল, তাহারা দিল্লীতে যাইতেছে, এখন তিন লক্ষ টাকা না পাইলে তোপে রাজপ্রাসাদ উড়াইয়া দিবে। রাণীর যথোচিত প্রত্যাশমতি ছিল। তিনি বিপদে অভিভূত না হইয়া, বলিয়া পাঠাইলেন যে, তাঁহার রাজ্য, তাঁহার সম্পত্তি, সমস্তই পরহস্তগত হইয়াছে। তিনি এখন দারিদ্র্যে নিপীড়িত, এখন পরমুখপ্রেক্ষিণী অনাথা। তাঁহার ঞ্চয় দরিদ্র অনাথার উপর অত্যাচার করা তাঁহার স্বদেশীয় সিপাহীদিগের উচিত নয়। কিন্তু সিপাহীরা এই কাতরোক্তিতে কর্ণপাত করিল না। এদিকে রাণীর পিতা সিপাহীদিগকে শাস্ত করিবার জন্ত তাহাদের সর্দারের সহিত সাক্ষাৎ করিতে গিয়াছিলেন। তিনি অবরুদ্ধ হইলেন। সিপাহীরা কহিল, কিছু টাকা না পাইলে তাহারা রাণীর দায়াদ সদাশিব রাও নারায়ণকে ঝাঁশীর গদিতে প্রতিষ্ঠিত করিবে। রাণী নিরুপায় হইলেন। তিনি পিতাকে বিমুক্ত করিতে কহিলেন, এবং আপ-

\* মূল পত্রখানি পরিশিষ্টে উদ্ধৃত হইল। কে সাহেব লিপিরাছেন (*Sepoy War. III. 365*) রাণী ৬ই জুন অপরাহ্নকালে পতাকা উড়াইয়া বহুসংখ্য অনুচরের সহিত সিপাহীদিগের আবাসস্থলে উপনীত হইলেন। আহম্মদ আলী নামক একজন মোল্লা স্বধর্মনিরত লোকদিগকে উপাসনার জন্ত আহ্বান করেন। এইরূপে ইংরেজদিগের বিরুদ্ধাচরণের জন্ত ইঙ্গিত করা হয়। কর্নেল মালিসনও এই বিষয়ের উল্লেখ করিয়াছেন (*Indian Mutiny. I. 185*). কিন্তু রাণীর বিমাতা কহেন যে, এই সময়ে রাণী এক বারও প্রাসাদ হইতে বহির্গত হইলেন নাই।

নার সম্পত্তি হইতে অলঙ্কারাদিতে এক লক্ষ টাকা দিয়া, সিপাহীদিগকে শাস্ত করিলেন । সিপাহীরা অর্থলাভে উৎফুল্ল হইয়া, “মুলুক খোদাকা, মুলুক বাদশাহকা, অম্মল ( আমল ) রাণী লক্ষ্মী বাঈকা” এইরূপ ঘোষণা করিতে করিতে দিল্লীর অভিমুখে প্রস্থান করিল । রাণী এই বিষয় ইংরেজ কর্তৃপক্ষের নিকটে লিখিয়া পাঠাইলেন ।

কর্ণেল মালিসন্ সাহেব এ সম্বন্ধে লিখিয়াছেন যে, সিপাহীরা টাকা চাহিয়াছিল, রাণী ঝাঁশীর গদিতে প্রতিষ্ঠিত হইতে চাহিয়াছিলেন, সুতরাং তিনি অর্থের বিনিময়ে অভীষ্ট পদ লাভ করেন । সিপাহীরা উৎকোচে বশীভূত হইয়া, লক্ষ্মী বাঈ ঝাঁশীর রাণী বলিয়া, ঘোষণা করে ।\* কে সাহেবও এই ভাবে লিখিয়া গিয়াছেন ।† কিন্তু উল্লিখিত ঘটনায় প্রতিপন্ন হইবে যে, রাণী ঝাঁশীর গদিলাভের জন্ত সিপাহীদিগের সহিত সম্মিলিত হয়েন নাই । তিনি একান্ত নিরবলম্ব হইয়া পড়িয়াছিলেন । অর্থদান ভিন্ন উত্তেজিত সিপাহীদিগের হস্ত হইতে নিষ্কৃতিলাভের আর কোন উপায় ছিল না । সিপাহীদিগের দলভুক্ত হইলে তিনি আপনার অলঙ্কারাদি দিতেন না বা এই অর্থদানের বিষয় ইংরেজ রাজপুরুষদিগের গোচর করিতেন না । ঘটনাচক্রের অভাবনীয় আবর্তন তাঁহাকে এই ভাবে সিপাহীদিগের সম্ভাষণসাধনে প্রবর্তিত করিয়াছিল ।

সিপাহীরা চলিয়া গেলে রাণী গবর্ণমেন্টের নিয়োজিত ফৌজদারির সেরেস্টাদার গোপাল রাও প্রভৃতি সম্ভ্রান্ত ব্যক্তিগণকে ডাকাইয়া, অতঃপর কর্তব্য নির্ধারণসম্বন্ধে পরামর্শ জিজ্ঞাসা করিলেন । সাগরপ্রদেশে এই সময়ে গোলযোগ ঘটে নাই । সুতরাং তথাকার কমিশনের সাহেবকে সাবধান করিবার জন্ত ঝাঁশীর ঘটনা জানাইতে হইবে, এবং ঝাঁশীর সম্বন্ধে কিরূপ ব্যবস্থা করা উচিত, তদ্বিষয়ে তাঁহার আদেশ প্রার্থনা করা যাইবে, এইরূপ সিদ্ধান্ত স্থির হইল । তদনুসারে গোপাল রাও সমুদয় ঘটনা সাগরের কমিশনের সাহেবের নিকটে লিখিয়া পাঠাইলেন । রাণীও স্বয়ং নানা স্থানের রাজপুরুষদিগকে যাবতীয় বিবরণ জানাইয়া, আত্মপক্ষসমর্থন করিলেন । ঝাঁশীর কমিশনের কাপ্তেন পিক্‌নে সাহেব লিখিয়া গিয়াছেন,—“বিশ্বস্ত সূত্রে অবগত হওয়া গিয়াছে, রাণী

\* *Malleon, Indian Mutiny. Vol. I., p. 190-191.*

† *Kaye, Sepoy War. Vol. III., p. 370.*

আমাদের স্বদেশীয়দিগের নিধনে দুঃখ প্রকাশ করিয়া, জব্বলপুরের কমিশনরের নিকটে পত্র লিখিয়াছিলেন। পত্রে উল্লেখ ছিল যে, এই ব্যাপারে তাঁহার কোনরূপ সংশ্রব ছিল না। যাবৎ ইংরেজ গবর্ণমেন্ট ঝাঁশীর পুনরধিকারের বন্দোবস্ত না করেন, তাবৎ তিনি ঐ রাজ্য শাসন করিবেন, এই ভাবে পত্র লিখিয়া, তিনি ইংরেজগবর্ণমেন্টের সহিত মিত্রতা রক্ষা করিতে চেষ্টা করিয়াছিলেন।” ইহাতে প্রতিপন্ন হয়, রাণী ইংরেজ সরকারের প্রতিনিধিস্বরূপ ঝাঁশী আপনার অধিকারে রাখিয়াছিলেন।\* সে সময়ে ইংরেজ সরকার হইতে কোন পত্র আসিলে ঝাঁশীর কর্মচারীদিগের অব্যবহিততায় রীতিমত উহার উত্তর দেওয়া হইত না, সুতরাং অনেক সময়ে রাণীর উদ্দেশ্য ইংরেজ রাজপুরুষদিগের গোচর হইত না। এইরূপ গোলযোগের মধ্যেও রাণীর পূর্বোক্ত পত্র যথাস্থানে পহঁছিয়াছিল। কিন্তু বিধাতা রাণীর অদৃষ্টলিপি পূর্বেই ঠিক করিয়াছিলেন। সুতরাং উহার বিপর্যয়সাধন হয় নাই। পূর্বে আগরাপ্রবাসী মার্টিন সাহেবের পত্রের কথা লিখিত হইয়াছে। উক্ত পত্রের এক স্থলে উল্লেখ আছে—“তিনি (রাণী) জব্বলপুরের কমিশনর মেজর এরস্কিন এবং আগরার প্রধান কমিশনর কণেল ফেজারের নিকটে খরিটা (পত্র) পাঠাইয়াছিলেন। আমি এই পত্র স্বহস্তে আগরার প্রধান কমিশনরের নিকটে সমর্পণ করিয়াছিলাম। রাণীর কথা শুনিয়া, কমিশনর কি বলেন, জানিতে আমার ঔৎসুক্য জন্মিয়াছিল। কিন্তু ঝাঁশীর নাম পূর্বেই তাঁহাদের নিকটে কলঙ্কিত হইয়া দাঁড়াইয়াছিল। কোন কথা না শুনিয়াই, রাণী অপরাধিনী বলিয়া, সিদ্ধান্ত করা হইয়াছিল।”

এইরূপে অভাগিনীর অদৃষ্টচক্র আবার নিম্নাভিমুখে আবর্তিত হইল। তাঁহার বিশ্বস্ত কর্মচারিগণ অপসারিত হইয়াছিলেন। তাঁহার পিতা মোরোপস্ত তাদৃশ রাজনীতিচতুর ছিলেন না। তাঁহার দেওয়ান লক্ষণ রাও, অল্পদিন হইল, ঐ পদে উন্নীত হইয়াছিলেন, সুতরাং তাঁহারও তাদৃশ কর্মপটুতা বা অভিজ্ঞতা ছিল

\* কে সাহেব লিখিয়াছেন যে, তিনি জব্বলপুরের কমিশনর মেজর এরস্কিনের বিজ্ঞাপনীতে এরূপ কোন কথা প্রাপ্ত হয়েন নাই (*Sepoy War. III, p. 370.*). কিন্তু আগরাপ্রবাসী মার্টিন সাহেব স্বয়ং ঘটনা দেখিয়া বাহা লিখিয়াছেন, তাহার সহিত পিঙ্কনে সাহেবের উক্তি সাদৃশ্য আছে।

না। দেশের অবস্থাভিজ্ঞ এবং ইংরেজীভাষাভিজ্ঞ কেহই এই সঙ্কটকালে তাঁহাকে সংপরামর্শ দিতে বা সংপথ দেখাইতে উপস্থিত ছিলেন না। ঝাঁশীর নূতন বন্দোবস্ত কালে বোরছা প্রভৃতি স্থানের যে সকল লোক রাজ্যশাসন-সংক্রান্ত কর্মে নিয়োজিত হইয়াছিলেন, রাণীর সহিত তাঁহাদের তাদৃশ সম্বন্ধ ছিল না। এই রূপে সকল দিকই অভাগিনীর নিকটে গাঢ় তমোজ্বালে আচ্ছন্ন ছিল। নিঃসহায়, অনাথা তরঙ্গময় সংসারসাগরে একান্ত নিরবলম্বভাবে ভাসিতে-ছিলেন। এই নিবিড় তমোরাশির ভেদে কোনরূপ আলোকবর্তী তাঁহার সহায় হয় নাই। কেহই এই তরঙ্গান্দোলিত ভয়াবহ সাগর হইতে তাঁহার উদ্ধারের জন্ত হস্ত প্রসারণ করে নাই।

উত্তেজিত সিপাহীদিগের আক্রমণে ঝাঁশীতে ইংরেজের প্রাধান্য বিনুপ্ত হইয়াছিল। রাণী ঝাঁশীর বিপ্লবের বিবরণ স্থানান্তরের ইংরেজ রাজপুরুষদিগকে জানাইয়াছিলেন। ইংরেজের অনুপস্থিতিতে তিনি ঝাঁশীর শাসনভার গ্রহণ করিয়াছিলেন। এই সময়ে তাঁহার সম্পর্কীয় সদাশিব রাও নারায়ণ ঝাঁশীর আধিপত্যগ্রহণে উত্তত হইলেন। সদাশিব ঝাঁশীর ত্রিশ মাইল দূরবর্তী করেরা নামক একটি দুর্গ অধিকার করেন। তত্রত্য ইংরেজেরা তাড়িত হইলেন। ইহার পর সদাশিব পার্শ্ববর্তী গ্রামসমূহ অধিকার পূর্বক “ঝাঁশীর মহারাজ” উপাধি পরিগ্রহ করেন। লক্ষ্মী বাঈ তাঁহার বিরুদ্ধে সৈন্য প্রেরণ করেন। ইহার পরে করেরা দুর্গ অবরোধ করিলে সদাশিব মহারাজ শিন্দের রাজ্যে পলায়ন পূর্বক ঝাঁশী আক্রমণের জন্ত সৈন্যসংগ্রহে প্রবৃত্ত হইলেন। তাঁহার বিরুদ্ধে আর একদল সৈন্য প্রেরিত হয়। এবার সদাশিব বন্দিভাবে ঝাঁশীতে আনীত হইলেন।\* অতঃপর দুর্ধর্ষ ঠাকুর এবং বুদ্ধলাগণ রাণীর শাসনদক্ষতায় শাস্ত-ভাব অবলম্বন করে।

রাণী এক শত্রুকে পরাজিত ও বন্দী করিলেন। অন্য এক পরাক্রান্ত শত্রু তাঁহার বিরুদ্ধে সমুখিত হইলেন। ঝাঁশীর দেড় মাইল দূরে বোরছা নামক

\* করেরা অবরোধ এবং ঝাঁশী আক্রমণ অপরাধে সদাশিব ১৮৫৮ অক্টোবর ২৬শে জুন গবর্নমেন্টের আদেশে আন্দামানে নির্বাসিত হইলেন। ঐ স্থানে সাড়ে আঠার বৎসর অবস্থিতির পর তাঁহার মুক্তিলাভ হয়। অতঃপর গবর্নমেন্ট তাঁহাকে মাসিক কুড়ি টাকা বৃত্তি দেন। ১৮৮৮ অক্টোবর তাঁহার দেহাত্যয় হয়।

জনপদ ( নামাস্তর তেহরী ) অবস্থিত । এই রাজ্যের দেওয়ান নথে খাঁ ঝাঁশী আক্রমণের জন্য কুড়ি হাজার সৈন্য লইয়া, নগরের নিকটবর্তী বেত্রবতী নদীর তীরে উপস্থিত হইলেন । এই সময়ে রাণীর সৈন্যসংখ্যা অধিক ছিল না । ইংরেজ গবর্ণমেন্ট ঝাঁশী অধিকার পূর্বক সৈন্যসংখ্যা কমাইয়া দিয়াছিলেন, তোপ ও গোলাবারুদ প্রভৃতি নষ্ট করিয়া ফেলিয়াছিলেন । কিন্তু রাণী ইহাতেও ভীত বা কর্তব্যবিমূখ হইলেন না । তিনি অভিনব সৈন্যসংগ্রহ করিলেন । তিনি গোলাবারুদ প্রভৃতি যুদ্ধোপকরণ প্রস্তুত করিবার কারখানা খুলিলেন । তিনি দুর্গমধ্যে প্রোথিত তিনটি এবং প্রাসাদমধ্যে লুক্কায়িত চারিটি কামান আনাইলেন । বসুধার গর্ভে বা নির্জ্জন গৃহের অন্ধকারের মধ্যে থাকিলেও, এই সকল অস্ত্র এখন প্রয়োজনীয় কার্যসাধনের অনুপযোগী হইল না । এদিকে রাণী বুদ্ধেলখণ্ডের সর্দারদিগকে আহ্বান করিলেন । তাঁহার সাদর আহ্বানে সর্দারগণ ঝাঁশীতে সমাগত হইয়া, ইংরেজ গবর্ণমেন্টের আধিপত্যরক্ষার জন্য রাণীর সাহায্য করিতে সম্মত হইলেন । রাণী ইহাতে নিরতিশয় সন্তোষ প্রকাশ করিলেন । তাঁহার আদেশে কামান সকল দুর্গের প্রাচীরে স্থাপিত হইল । তাঁহার আমন্ত্রণে ঝাঁশীর সর্দারগণ সশস্ত্র অনুচর লইয়া, আগমন করিলেন । তাঁহার ইচ্ছাক্রমে প্রধান সেনাপতি নির্বাচিত হইলেন । সেনাপতি সৈনিকদিগকে যথাস্থানে সন্নিবেশ করিলেন । রাণী পাঠানীবেশ পরিগ্রহপূর্বক দুর্গের প্রধান বুরুজের উপর রহিলেন । ঐ স্থানে ইংরেজের জয়পতাকা এবং পেশওয়ার নিশান স্থাপিত হইল । নথে খাঁ দুর্গ আক্রমণ করিলেন, কিন্তু কৃতকার্য হইতে পারিলেন না । তাঁহার পরাজয় হইল । অতঃপর বোর্ছা সরকারের প্রস্তাব ক্রমে উভয়পক্ষে সন্ধি ঘটিল । বোর্ছার রাণী লক্ষ্মী বাঈর সহিত ঝাঁশীর রাণী লক্ষ্মী বাঈর সখীভাব জন্মিল । লক্ষ্মী বাঈ, এই ঘটনা ইন্দোরের এজেন্ট স্যার রবার্ট হামিল্টনের নিকটে লিখিয়া পাঠাইলেন । কিন্তু পত্র হামিল্টন সাহেবের হস্তগত হইল না । নথে খাঁ পত্রবাহককে ধরিয়া, ঐ পত্র নষ্ট করিয়া ফেলিলেন, অধিকন্তু তিনি হামিল্টন সাহেবের নিকটে লিখিলেন যে, লক্ষ্মী বাঈ উত্তেজিত সিপাহীদিগের সহিত সন্মিলিত হওয়াতে তাঁহাকে তদ্বিরুদ্ধে যুদ্ধে প্রবৃত্ত হইতে হইয়াছে । সুতরাং প্রকৃত ঘটনা ইংরেজরাজপুরুষের গোচর হইল না । রাণীর চারি দিকে পূর্বের

শ্রায় নিবিড় তমোজাল রহিল। নিয়তির অপরিবর্তনীয় বিধান অপ্রতিহত থাকিল।

আগরাপ্রবাসী মার্টিন সাহেব রাণীর ঝাঁশীরাজ্যসংরক্ষণ সম্বন্ধে পূর্বোক্ত পত্রের এক স্থানে এই ভাবে লিখিয়াছেন—“বিপ্লবকারী সৈনিকেরা ঝাঁশী পরিত্যাগ করিলে রাণী তদীয় রাজ্য অধিকার করিয়াছিলেন। দতিয়া এবং তেহরী রাজ্য অনায়াসে আমাদের লোকদিগকে রক্ষা করিতে পারিত। যদিও ঝাঁশীর কাওয়ারের ক্ষেত্র হইতে বোরছা (তেহরী) রাজ্যের সীমা দেড় মাইল এবং দতিয়া ছয় মাইলের অধিক দূরবর্তী নহে, তথাপি এই উভয় রাজ্যের সীমান্তভাগে বহুসংখ্য সশস্ত্র লোক আমাদের সৈন্তের কার্যপর্যবেক্ষণ করিলেও, উক্ত দুই রাজ্যের কেহই আমাদের সাহায্যের জন্য একটি অঙ্গুলিও উত্তোলন করে নাই। এই উভয় রাজ্যের শাসনকর্তারা ভাবিয়াছিলেন, যুদ্ধের জন্য রাণীর কোনরূপ আয়োজন নাই; তাঁহারা অনায়াসে তদীয় রাজ্য হস্তগত করিতে পারিবেন; এজন্য তাঁহাদের সম্মিলিত সৈন্ত ঝাঁশী আক্রমণ করে, এবং অনেক বার উক্ত রাজ্যের সাহসিনী নারী কর্তৃক পরাজিত হয়।” এই উক্তি প্রতাপ হইতেছে, রাণী আপনার বাহুবলে ঝাঁশীরক্ষা করিতেছিলেন, পার্শ্ববর্তী দতিয়া এবং তেহরীর লোক সুযোগ বুঝিয়া, উক্ত রাজ্য আক্রমণ করিলেও কৃতকার্য হইতে পারে নাই। দতিয়া এবং তেহরী ব্রিটিশ গবর্ণমেন্টের অনুগ্রহভাজন হয়। কিন্তু ঝাঁশীর অদৃষ্টলিপি অখণ্ডিত থাকে।

ঝাঁশী ইংরেজদিগের অধিকারচ্যুত হইলে রাণী লক্ষ্মী বার্জি নয় দশ মাস কাল স্থানিয়মে রাজ্য শাসন করেন। কি সৈনিকশৃঙ্খলা, কি বিচারকার্য, কি শাস্তিস্থাপন, প্রত্যেক বিষয়েই তাঁহার অসামান্য কর্মক্ষমতা পরিস্ফুট হয়। যৌবনের পূর্ণবিকাশে তাঁহার দেহ যেমন সুগঠিত ও সৌন্দর্য্যশালী ছিল, দয়ালু সৌন্দর্য্য প্রভৃতি গুণের সমবায়ে তাঁহার প্রকৃতিও সেইরূপ কমনীয় হইয়াছিল। তিনি কোন বিষয়ে অবনত হইতেন না, কোন অংশে দুর্বলতার পরিচয় দিতেন না বা কোনরূপে অবলম্বিত ব্রতপালনে ওদ্যোগ প্রকাশ করিতেন না। প্রজা-লোকে তাঁহার সৌন্দর্য্যসহকৃত কমনীয় ভাবে, তাঁহার অসামান্য দৃঢ়তা ও নির্ভীকতায় তৎপ্রতি অপারিসীম শ্রদ্ধা প্রকাশ করিত। তিনি তাহাদের শাসনে ও পালনে ব্যাপ্ত ছিলেন, তাহাদের হৃদয়ের উপর তাঁহার এইরূপ আধিপত্য

জন্মিয়াছিল। এই আধিপত্য, এই সাহসময়চরিত্রগত শক্তির জ্ঞা তিনি অভঃপর ঘটনাচক্রে পড়িয়া, ইংরেজ সেনাপতির বিরুদ্ধাচরণে সমর্থ হইয়াছিলেন। অপেক্ষাকৃত অল্পক্ষমতামালা সেনাপতি হইলে তাঁহার প্রয়াস সফল হইত। ইংরেজ ঐতিহাসিক এই ভাবেই তাঁহার ক্ষমতার প্রশংসা করিয়া গিয়াছেন।\* যে যুদ্ধকুশল সাহসী সেনাপতি তাঁহার বিরুদ্ধে দণ্ডায়মান হইয়াছিলেন, তিনিও তাঁহার ক্ষমতায় মোহিত হইয়া, লিখিয়াছিলেন—“রাণীর বংশগোরব, সৈনিক-গণ ও অনুচরদিগের প্রতি তাঁহার অপরিমিত উদারতা, তাঁহার সর্বপ্রকার বিঘ্নবিপত্তিতে অবিচলিত দৃঢ়তা, তাঁহাকে আমাদের প্রভূতক্ষমতাপন্ন ও ভয়াবহ প্রতিদ্বন্দ্বী করিয়া তুলিয়াছিল।” †

রাণী প্রতিদিন বেলা তিন টার সময় প্রায়শঃ পুরুষবেশে কখন কখন নারী-বেশে সজ্জিত হইয়া, দরবারে উপস্থিত হইতেন। পায়ে পায়জামা, অঙ্গে বেগুনী রঙের অঙ্গরক্ষা, মাথায় টুপী, উহার উপর পাঠানী পাগড়ি, কোমরে জরির দোপাটা, উহাতে লক্ষমান রত্নখচিত অসি, তাঁহার এইরূপ পুরুষবেশে তদীয় ঘোবনোদ্ভাসিত গোরকাস্তি অধিকতর রমণীয় হইত। পতিবিয়োগের পর তিনি হাতে হীরার বালা, গলায় মুক্তার মালা, এবং অনামিকায় হীরার অঙ্গুরী ভিন্ন, আর কোন অলঙ্কার ধারণ করিতেন না। তাঁহার কেশ গ্রস্থিবদ্ধ থাকিত, শ্বেত শাটী ও শ্বেত কঞ্চুলিকা তাঁহার পরিচ্ছদ ছিল। এইরূপ নারী-বেশে তাঁহাকে মূর্ত্তিমতী গোরী বলিয়া বোধ হইত। তিনি দরবার ঘরে বসিতেন না। তাঁহার বসিবার ঘর দরবার ঘরের সংলগ্ন ছিল। এই গৃহের দ্বারদেশে পর্দা থাকিত। স্তূতরাং বাহিরের লোকে তাঁহাকে দেখিতে পাইত না। তিনি গদির উপর তাকিয়া ঠেস দিয়া বসিয়া, সমীপস্থিত কর্মচারীদিগকে রাজ্য-শাসন সন্দন্ধে যথাযোগ্য আদেশ দিতেন। কখন কখন আদেশপত্র তৎকর্তৃক লিপিবদ্ধ হইত। তাঁহার যেমন রাজ্যশাসন ক্ষমতা, সেইরূপ দেবভক্তি, আশ্রিত-জনপ্রতিপালন-প্রবৃত্তি ও দীনহুঃখীদিগের প্রতি দয়া ছিল। নখে খাঁর সহিত যুদ্ধের সময়ে তাঁহার অসীম দয়ার্দ্রভাব পরিস্ফুট হইয়াছিল। তিনি আপনার আহত

\* *Malleon, Indian Mutiny. Vol. I., p. 191.*

† *Sir Hugh Rose's Despatch, April 30th, 1858, quoted in Martin's Indian Empire. Vol. II., p. 485, note.*



সৈনিকদিগের চিকিৎসাকালে অশ্রুপূর্ণনয়নে তাহাদের পার্শ্বে দণ্ডায়মান থাকিতেন, স্নেহময়ী জননীর গায় তাহাদের গায়ে হাত বুলাইতেন, প্রশংসাবাদে তাহাদের কণ্ঠের লাঘব করিতেন । এইরূপ সদয়ভাব, এইরূপ স্নিগ্ধ ব্যবহার, এইরূপ প্রীতিময় কোমলতায় তিনি প্রজালোকের মাতা ছিলেন । তাঁহার সভায় নানা দেশীয় গুণিজনের সমাগম হইত । পূর্বে উক্ত হইয়াছে, আপনাদের উপাশ্রয় দেবী শ্রীমহালক্ষ্মীর প্রতি তাঁহার অসীম ভক্তি ছিল । তিনি প্রতি শক্রবার ও মঙ্গলবার সন্ধ্যাকালে প্রিয়তম পুত্র দামোদর রাওকে সঙ্গে লইয়া, সরোবরমধ্যস্থিত মন্দিরে শ্রীমহালক্ষ্মীর দর্শনে যাইতেন ।

এইরূপে লক্ষ্মী বাঈ আট দশ মাস কাল ঝাঁশী রক্ষা করেন । দেওয়ানি ও ফৌজদারি বিচার ভিন্ন রাজ্যরক্ষণ ও বহিঃশত্রুর আক্রমণনিবারণের জন্ত অগ্রাণু বিষয়েও তাঁহার সবিশেষ দৃষ্টি ছিল । তাঁহার আদেশে টাকশালা স্থাপিত, দুর্গ প্রভৃতি আত্মরক্ষার স্থল সুরক্ষিত, সৈন্য সংগৃহীত, কামান নির্মিত হয় । এইরূপে ১৮৫৭ অব্দের জুন মাসে সর্কাপেক্ষা ক্ষমতাপন্ন, সর্কাপেক্ষা কর্মকুশল, সর্কাপেক্ষা প্রজাপ্রিয় শাসনকর্তার গায় সর্ববিষয়ে তাঁহার দক্ষতা প্রকাশ পাইয়াছিল । তিনি ইংরেজের অনুপস্থিতিতে রাজ্যশাসনে প্রবৃত্ত হইয়াছিলেন, যেহেতু তাঁহার বিশ্বাস ছিল যে, ইংরেজ উপস্থিত হইলে, তিনি তাঁহাদের হস্তে শান্তিপূর্ণ এবং সুব্যবস্থিত রাজ্য সমর্পণ করিবেন । তিনি ঝাঁশীর যাবতীয় ঘটনা ইংরেজ রাজপুরুষদিগের গোচর করিয়াছিলেন, যেহেতু তাঁহার ধারণা ছিল যে, রাজপুরুষেরা তাঁহার সদভিপ্রায় অবগত হইয়া, তৎপ্রতি সন্তুষ্ট হইবেন । তিনি ইংলণ্ডে দূত পাঠাইয়াছিলেন, যেহেতু তাঁহার আশা ছিল যে, ইংলণ্ডের কর্তৃপক্ষ গায়পরতার বশীভূত হইয়া, তদীয় পুত্রের স্বত্ব রক্ষা করিবেন । এইরূপে সকল বিষয়েই তাঁহার আশা ছিল । কিন্তু তাঁহার আশা ফলবতী হইল না । তাঁহার উপর রাজপুরুষদিগের সন্দেহ জন্মিয়াছিল । এই সন্দেহ শক্রভাবে পরিণত হইল । ইংরেজ সেনাপতি স্মার হিউ রোজ্ তাঁহার বিরুদ্ধে ঝাঁশীর অভিমুখে অগ্রসর হইলেন ।

স্মার হিউ রোজ্ ১৮৫৮ অব্দের ১৯শে মার্চ ঝাঁশীর ১৪ মাইল দূরবর্তী চঞ্চনপুর নামক স্থানে যাত্রা করেন । এই স্থান হইতে তিনি তৎপরদিন একদল অস্বারোহী এবং কামানসমেত একদল গোলন্দাজকে ঝাঁশীপর্য্যবেক্ষণের জন্ত পাঠাইয়া দেন । ইংরেজসৈন্য ঝাঁশীর অভিমুখে অগ্রসর হইতেছে, এই সংবাদ

রাজপ্রাসাদে প্রচারিত হয় । পূর্বে উক্ত হইয়াছে যে, ঝাঁশীর দরবারে উপযুক্ত কর্মচারী ছিলেন না । নবীন দেওয়ান লক্ষ্মণ রাওয়ের তাদৃশ কর্মপটুতা ছিল না । সুতরাং এই সঙ্কটকালে কর্তব্যনির্ধারণ সম্বন্ধে গোলযোগ ঘটিল । একজন প্রাচীন কর্মচারী অভিনব দেওয়ানকে অনেক বুঝাইলেন । কিন্তু দেওয়ান তাঁহার কথায় কণপাত করিলেন না । অবশেষে তিনি গোপনে রাণীর সহিত সাক্ষাৎ করিয়া, তাঁহার নিকটে গবর্ণমেন্টকে তদীয় সদভিপ্রায় ও বিশ্বস্ততা জানাইবার জন্ত, এক জন সুচতুর দূত পাঠাইবার প্রস্তাব করিলেন । প্রস্তাব গ্রাহ হইল । ঝাঁশী ইন্দোরের এজেন্টের অধীন ছিল । রাণী দেওয়ানকে প্রস্তাব অনুসারে উক্ত স্থানের এজেন্ট স্মার্ট রবার্ট হামিল্টনের নিকটে উপযুক্ত দূত পাঠাইতে কহিলেন । কিন্তু দেওয়ান নবীন কর্মচারীদিগের মধ্য হইতে এক জন অনুপযুক্ত ও অকৃতকর্মা লোককে প্রেরণ করিলেন । এই ব্যক্তি নির্দিষ্ট স্থানে গেল না, এজেন্ট সাহেবের সহিত সাক্ষাৎ করিল না, স্থানান্তরে থাকিয়া ঝাঁশীর দরবারে অনেক অসত্য কথা লিখিয়া পাঠাইতে লাগিল । দরবারের লোক সন্তুষ্ট থাকিল । অভাগিনী রাণীর পতনকাল আসন্ন হইল ।

পূর্বে উক্ত হইয়াছে যে, ইংরেজ সৈন্য ঝাঁশীর বিরুদ্ধে অগ্রসর হইল দরবারে গোলযোগ ঘটয়াছিল । ঝাঁশী ব্রিটিশ গবর্ণমেন্টের অধিকৃত হওয়াতে অনেক পুরাতন ভৃত্যের কর্ম গিয়াছিল । ইহারা নখে খাঁর সহিত যুদ্ধের সময়ে ঝাঁশীর অভিনব সৈনিকদলে প্রবেশ করিয়াছিল । এখন ইংরেজদিগের সহিত যুদ্ধ করিতে ইহাদের আগ্রহ পরিস্ফুট হইল । নবীন কর্মচারীগণও ইহাদের মতানুবর্তী হইলেন । পুরাতন কর্মচারীগণ ইংরেজের সহিত মিত্রতাস্থাপনে পরামর্শ দিলেন । এ বিষয়ে রাণীরও মত ছিল । রাণীর এইরূপ মত সৈনিকগণ বা অভিনব কর্মচারীদিগের প্রীতিকর হইল না । ইংরেজের অধিকারে ইহারা ক্ষতিগ্রস্ত হইয়াছিল । সুতরাং ইংরেজের উপরে ইহাদের বিদ্বেষভাব দূর হইল না । ইহারা এখন এই বিদ্বেষভাবে উত্তেজিত হইয়া, যুদ্ধের জন্ত আগ্রহ প্রকাশ করিতে লাগিল । রাণী হুর্গমধ্যে অবস্থিতি করিতেন । প্রধান কর্মচারীগণ ব্যতীত আর কেহ তাঁহার নিকটে যাইতে পারিত না । সুতরাং প্রকৃত বৃত্তান্ত তাঁহার গোচর হয় নাই । এ সময়ের কথা নানা ভাবে পরি-

কীর্তিত হইয়া থাকে। \* যাহা হউক, রাণী ঘটনাচক্রে পড়িয়া যুদ্ধে কৃতনিশ্চয় হইলেন। এ বিষয়ে বাবু কুমার সিংহের সহিত তাঁহার সাদৃশ্য লক্ষিত হয়। ইংরেজের বিরুদ্ধাচরণে কুমার সিংহের প্রবৃত্তি ছিল না। নানা প্রতিকূল ঘটনা তাঁহাকে তাঁহার অনিচ্ছাক্রমে যুদ্ধে প্রবর্তিত করিয়াছিল। লক্ষ্মী বাঈও এইরূপ প্রতিকূল ঘটনার অভিঘাতে আপনার লক্ষ্য বিষয় হইতে পরিভ্রষ্ট হইলেন। তিনি যখন দেখিলেন যে, ইংরেজের সহিত সম্ভাবনাকার জন্ত অনেক চেষ্টা করিয়াও কৃতকার্য হইতে পারিলেন না, অধিকন্তু তিনি যখন বুঝিলেন যে, যাহাদের জন্ত তিনি এত প্রয়াস স্বীকার করিলেন, তাঁহারাও তাঁহাকে বিপদগ্রস্ত করিতে উদ্যত হইয়াছেন, তখন যুদ্ধ ভিন্ন আর কোন উপায় রহিল না। অভিমানিনী নারী অপমানবিষে অধীর হইয়া, এখন যুদ্ধসজ্জার আয়োজনে ব্যাপ্ত হইলেন।

অতি অল্প সময়ের মধ্যে সুশিক্ষিত ইংরেজসৈন্যের সহিত যুদ্ধের ব্যবস্থা করা সহজ নহে। কিন্তু লক্ষ্মী বাঈ এই দুঃসাধ্য কৰ্ম সাধন করিলেন। তিনি এক সময়ে রাজ্যশাসনে দক্ষতার পরিচয় দিয়াছিলেন, এখন যুদ্ধক্ষেত্রে পরাক্রান্ত বিপক্ষের সমক্ষে প্রকৃত বীরোচিত গুণের পরিচয় দিতে প্রবৃত্ত হইলেন। তাঁহার অনেক আফগণ ও বুদ্ধেলা সৈন্য ছিল বটে, কিন্তু সুশিক্ষিত সৈন্যের সংখ্যা অধিক ছিল না। ঐতিহাসিক মালিসন সাহেবের মতে রাণীর সৈন্যসংখ্যা এগার হাজার ছিল। যাহা হউক, রাণী এখন সৈনিকদলের শৃঙ্খলাসাধন পূর্বক স্বয়ং উহাদের পরিচালনভার গ্রহণ করিলেন, দুর্গের জীর্ণসংস্কার করাইলেন, তোপগুলি যথাস্থানে সন্নিবেশ করিতে আদেশ দিলেন, নানা সাহেবের সাহায্যপ্রার্থনা করিয়া, তাঁহার নিকটে পত্র পাঠাইলেন। এইরূপে প্রতি কার্যে তাঁহার উদ্যম ও অধ্যবসায় প্রকাশ পাইতে লাগিল। রাণীর বীর-

\* কেহ কেহ বলেন, এ সময়ে ইংরেজপক্ষ হইতে সংবাদ আইসে যে, রাণী অস্ত্র পরিত্যাগ পূর্বক দেওয়ান প্রভৃতি মন্ত্রীদিগকে লইয়া, ইংরেজের শিবিরে উপস্থিত হইলে ইংরেজেরা তাঁহাদিগকে ক্ষমা করিবেন। এই কথা নাকি রাণীর মনঃপুত হয় নাই। তাহাতেই যুদ্ধের সূত্রপাত হয়। কেহ কেহ বলেন যে, ইংরেজেরা সঙ্কল্প করিয়াছিলেন, রাণী শিবিরে গেলে তাঁহারা তাঁহাকে বন্দী করিবেন, এইরূপ জনরব প্রচারিত হওয়াতে রাণী যুদ্ধে উদ্যত হইলেন। আবার কেহ কেহ বলেন, রাণী ইংরেজদিগের নিকটে সন্ধির প্রস্তাব করিয়া দূত পাঠাইয়াছিলেন, ইংরেজেরা তাঁহার ফাঁসী দিয়াছিলেন বলিয়া যুদ্ধ ঘটে। উপস্থিত বিষয়ে এইরূপ নানা কথার প্রচার হইয়াছিল।

রমণীগণও যুদ্ধের আরোহনে তাঁহার সহায়তা করিতে লাগিলেন । এত অল্প সময়ের মধ্যে এরূপ শৃঙ্খলার সহিত যাবতীয় কৰ্ম সম্পন্ন হইল যে, উহাতে অতঃপর ইংরেজকেও যার পর নাই বিশ্বয় প্রকাশ করিতে হইয়াছিল ।

গবর্নর-জেনেরল লর্ড কানিং এবং বোম্বাইর গবর্নর লর্ড এল্‌ফিন্‌ষ্টোন, উভয়েই ঝাঁশী অধিকার করা, নিরতিশয় আবশ্যক বলিয়া মনে করিয়াছিলেন । ঝাঁশীতে তাঁহাদের আধিপত্য, তাঁহাদের প্রাধান্ত, তাঁহাদের ক্ষমতার বিলোপ ঘটয়াছিল, ঝাঁশীতে তাঁহাদের স্ত্রীপুরুষ, বালকবালিকা নিরতিশয় নৃশংসভাবে নিহত হইয়াছিল, ঝাঁশীর তেজস্বিনী রাণীর উপর তাঁহাদের গভীর স্নেহ জন্মিয়াছিল । সুতরাং যে কোন রূপে হউক, ঝাঁশীতে তাঁহারা আপনাদের প্রাধান্তের পুনঃস্থাপন করিতে ইচ্ছা করিয়াছিলেন । সেনাপতি স্মার্ট হিউ রোজ্ এই কৰ্মসম্পাদনে নিয়োজিত হইলেন । তিনি যে, অশ্বসাদী ও গোলন্দাজ সৈন্ত ঝাঁশীর পর্য্যবেক্ষণের জন্ত পাঠাইয়া দেন, তাহা পূর্বে হইয়াছে । অতঃপর তিনি স্বয়ং পদাতি সৈন্ত লইয়া, ২১শে মার্চ ঝাঁশীতে উপনীত হইলেন ।

স্মার্ট হিউ রোজ্ যে স্থানে শিবিরসন্নিবেশ করেন, সেই স্থান এবং নগর ও দুর্গের মধ্যভাগে কতকগুলি ভগ্নপ্রায় বাংলা ছিল । নগরের নিকটে কতিপয় দেবমন্দির এবং তেঁতুল বৃক্ষের বন রহিয়াছিল । ইংরেজ সেনাপতির সৈন্তসন্নিবেশস্থলের দক্ষিণ ভাগে পাহাড়ের শ্রেণী বহুদূর পর্য্যন্ত বিস্তৃত ছিল । এই পাহাড়ের মধ্য দিয়া কাল্পীর পথ গিয়াছিল । বাম ভাগে অগ্ন্যাত্ত পাহাড় এবং সতিয়ার পথ প্রসারিত ছিল । উত্তর দিকে উন্নত পর্ব্বতের উপর ঝাঁশীর প্রসিদ্ধ দুর্গ স্বকীর দৃঢ়তা প্রকাশ করিতেছিল ।

প্রকৃতির শক্তি এবং মানবের শিল্পনৈপুণ্য, উভয়েই ঝাঁশীর দুর্গের বলবৃদ্ধি হইয়াছিল । উহা উন্নত পর্ব্বতের উপর স্থাপিত, সুদৃঢ়ভাবে নির্মিত এবং চারি দিকে দুর্ভেদ্য প্রাচীরে পরিবেষ্টিত । দুর্গের পশ্চিম এবং দক্ষিণ দিকের কিরদংশ ব্যতীত আর সকল দিকেই ঝাঁশীনগর প্রসারিত থাকিয়া, লোকারণ্যে আপনার অপূৰ্ব্ব সম্ভাবনার মেখাইতেছিল ।

ঝাঁশী নগরের পরিধি সাড়ে চারি মাইল । উহা আঠার হইতে ত্রিশ ফিট পর্য্যন্ত উচ্চ প্রাচীরে পরিবেষ্টিত । দুর্গপ্রাচীরের গায় নগরপ্রাচীরেও গুলি-নিষ্ক্ষেপের রক্ত এবং কামানসমূহের সন্নিবেশের স্থল নির্দিষ্ট ছিল । স্মার্ট হিউ

রোজ্ ২১শে মার্চ দুর্গ পর্য্যবেক্ষণ করেন । ঐ দিন সৈনিকদল যথাস্থানে স্থাপিত এবং দুর্গের অভ্যন্তরভাগ পরিদর্শনের জন্ত একটি উচ্চ মঞ্চ নির্মিত হয় । রাত্রিতে প্রথম ব্রিগেড অশ্বসাদী স্থানান্তর হইতে তাঁহার শিবিরে পদার্পণ করে । পর দিন অশ্বসাদী দল কর্তৃক নগর এবং দুর্গ সম্পূর্ণরূপে অবরুদ্ধ হয় । রাত্রিকালে ইংরেজসৈন্য দুর্গ আক্রমণ করে । যুদ্ধের পূর্বে রাণী এক বিষয়ে বুদ্ধিচাতুর্য্যের পরিচয় দিয়াছিলেন । তিনি পার্শ্ববর্তী স্থানের তৃণশুল্কাদি বিনষ্ট করিয়া ফেলিয়াছিলেন । সুতরাং ঘোটক প্রভৃতির পরিপোষণের জন্ত কোথাও ঘাস প্রভৃতি পরিলক্ষিত হয় নাই । কিন্তু তেহরির রাণী এবং মহারাজ শিন্দে এই অভাবের মোচন করেন । ইঁহাদের যত্নে ঘাস, জ্বালানি কাঠ, তরকারি প্রভৃতি পর্য্যাপ্তপরিমাণে সংগৃহীত হয় ।

এইরূপে ২৩শে মার্চ উভয় পক্ষে প্রকৃতপ্রস্তাবে যুদ্ধের আরম্ভ হইল । প্রথম আক্রমণে ঝাঁশীর গোলন্দাজদিগের পরাক্রমে আক্রমণকারীদিগের উত্তম ব্যর্থ হইয়া গেল । রাত্রিকালে ইংরেজপক্ষ অবসর বুঝিয়া, অগ্রসর হইল । কিন্তু রাণী নিশ্চেষ্ট ছিলেন না । তাঁহার সৈনিকদলের মধ্যে সমস্ত রাত্রি যুদ্ধের আয়োজন হইতে ছিল । সমস্ত রাত্রি চারি দিক রণবাণের ভৈরব রবে পরিপূর্ণ এবং সমগ্র নগর প্রজ্বলিত মসালের আলোকে উদ্ভাসিত ছিল । প্রভাত হইবা মাত্র গোলন্দাজেরা দুর্গপ্রাচীর হইতে কামানের গোলা চালাইতে লাগিল । কিন্তু এই সকল গোলা কার্য্যকর হইল না । উহা ইংরেজসৈন্যের মাথার উপর দিয়া দূরে পড়িতে লাগিল । কিন্তু যখন “ঘনগর্জ্জ” নামক প্রসিদ্ধ তোপ হইতে গোলাবৃষ্টি হইতে লাগিল, তখন ইংরেজসৈন্য স্থিরভাবে থাকিতে পারিল না । এই তোপ হইতে এমন বেগে গোলা বহির্গত হইত যে, বিপক্ষদিগের মধ্যে উহার পতনের পূর্বে তোপ হইতে সমুখিত ধূমরাশি তাহাদের দৃষ্টিপথবর্তী হইত না । সুতরাং তাহারা সতর্ক হইবার অবসর পাইত না । \*

২৪শে তারিখ ইংরেজসৈন্য চারিটি তোপমঞ্চ প্রস্তুত করিয়া, নগরের দক্ষিণ দিকে গোলাবর্ষণে উদ্বৃত হইল । এই গোলায় ঝাঁশীর তোপখানার কয়েক জন গোলন্দাজ দেহত্যাগ করিল । তাহাদের পরিচালিত তোপ বন্ধ হইল, এবং

\* এজন্য ইংরেজেরা এই তোপের নাম “হইস্লিংডিক্” রাখিয়াছিলেন ।

প্রাচীরে কিয়দংশ ভগ্ন হইয়া গেল। ইতঃপূর্বে ইংরেজসৈন্য নগরের সম্মুখে তোপমঞ্চ প্রস্তুত করিবার চেষ্টা করিয়াছিল। কিন্তু তাহাদের চেষ্টা সফল হয় নাই। তৃতীয় দিবসে ইংরেজ সেনাপতি বৃষ্টিতে পারিলেন যে, পশ্চিম দিক আক্রমণ করিলে সহজে নগর অধিকৃত হইতে পারে। সুতরাং ঐ দিক আক্রান্ত হইল। ইংরেজসৈন্যের নিষ্কিপ্ত কুলুপী গোলা ( ইংরেজী নাম শেল্, উহার অন্তর্ভাগ ফাঁপা) অবিরত প্রবলবেগে নগরে নিপতিত হইতে লাগিল। উহাতে নগরবাসিগণ নিরতিশয় ভীতিবিহ্বল হইয়া উঠিল। তাহাদের গমনাগমনের পথ রুদ্ধ হইল। অনেকের গৃহ ভস্মীভূত হইয়া গেল, অনেকে দেহত্যাগ করিল। এই দুঃসময়ে রাণী অপরিসীম ক্ষমতা ও বদান্ততার পরিচয় দিতে লাগিলেন। যেখানে বলক্ষয় ঘটতেছিল, সেই খানেই তাঁহার আবির্ভাব হইতে লাগিল। তিনি আক্রান্তদিগের উৎসাহ বর্দ্ধন করিতে লাগিলেন, গৃহহীন দরিদ্র লোকের জন্ত আশ্রয়স্থান নির্দেশ করিয়া দিলেন, তাহাদের আহারের জন্ত অন্নসত্র খুলিলেন। এইরূপে সকল বিষয়েই তাঁহার শ্রমশীলতা পরিস্ফুট হইতে লাগিল। এক দিকে তিনি যেমন বিপক্ষের আক্রমণনিবারণের জন্ত প্রকৃত বীরের গ্ৰায় দৃঢ়তা দেখাইতে লাগিলেন; অপর দিকে তিনি সেইরূপ কোমলপ্রকৃতি মাতার গ্ৰায় স্নিগ্ধভাব দেখাইয়া, অনাথ ছুঃখীদিগের হৃদয়ে শান্তিবিধানে ব্যাপ্ত হইলেন।

২৫শে তারিখ দুর্গের দক্ষিণ দিক আক্রান্ত হইল। এই সময়ে রাণীর গোলন্দাজ গোশ খাঁ দক্ষিণ দিকের বুরুজ হইতে এরূপ তীব্রবেগে গোলা বৃষ্টি করিতে লাগিল যে, উহাতে আক্রমণকারীদিগের তোপ বন্ধ হইয়া গেল। লক্ষ্মী বাঈ এই বীরপুরুষের উৎসাহবিধানে উদাসীন থাকিলেন না। তিনি এক তোড়া টাকা পারিতোষিক দিয়া, তাহাকে উৎসাহিত ও পরি-তোষিত করিলেন। এইরূপে ৩১শে মার্চ পর্য্যন্ত আক্রমণকারিগণ আক্রান্ত-দিগের সহিত তুল্যপরাক্রমে ও তুল্যসাহসে যুদ্ধ করিল। তাহারা যদিও আক্রমণকারীদিগের গ্ৰায় সুশিক্ষিত বা উৎকৃষ্ট অস্ত্রাদিতে বলসম্পন্ন ছিল না, তথাপি তাহাদের এরূপ পরাক্রম, এরূপ সাহস, এরূপ লক্ষ্যভেদকৌশল পরিস্ফুট হয় যে, উহাতে ইংরেজ সেনাপতি অতিমাত্র বিস্মিত হইলেন। ৩১শে মার্চ পর্য্যন্ত বীররমণী এইরূপ বীরোচিত রণকৌশল প্রদর্শন পূর্বক প্রতি-পক্ষের যাবতীয় উদ্যম ব্যর্থ করিয়া ফেলেন। তিনি সর্বদা সৈনিকদিগকে

সুশৃঙ্খল ভাবে রাখিতেন, সর্বদা উৎসাহবাক্যে তাহাদিগকে উত্তেজিত করিয়া তুলিতেন। তাঁহার ক্ষমতাদর্শনে, তাঁহার উৎসাহবাক্যশ্রবণে স্ত্রীলোক এবং বালকবালিকারা পর্য্যন্ত শক্তিসম্পন্ন ও উৎসাহিত হইয়া উঠিয়াছিল। ইহারা দুর্গপ্রাচীরের সংস্কারে সাহায্য করিত, যুদ্ধে ব্যাপ্ত সৈনিকদিগের জন্ত খাদ্য ও পানীয় আনিত, কোথায় কি অভাব ঘটিয়াছে, জানিয়া, তৎপূরণে উদ্যত থাকিত।

বাঁশীর একজন সম্ভ্রান্ত অধিবাসী স্বয়ং এই ভয়াবহ যুদ্ধ দেখিয়াছিলেন। তিনি এই ভাবে উহার বর্ণনা করিয়াছেন,—“প্রত্যহ রাত্ৰিকালে নগরে ও দুর্গে অজস্র গোলা পতিত হইত। সে দৃশ্য সাতিশয় ভয়ঙ্কর। ইংরেজদিগের তোপ হইতে নিঃসৃত ৫০৬ সের ওজনের এক একটা গোলা যখন বেগে ছুটিয়া আসিত, তখন কন্দুকের ঞ্চায় ক্ষুদ্র ও প্রজ্বলিত খদিরাদ্বারের ঞ্চায় রক্তবর্ণ দেখাইত। দিবসের প্রথর সূর্যালোকে গোলাগুলি স্পষ্ট দেখা যাইত না, কিন্তু নৈশ অন্ধকারে সে গুলি রক্তবর্ণ ক্রীড়াকন্দুকের ঞ্চায় সবেগে ইতস্ততঃ ধাবিত হইতে দেখা যাইত। দুর্গের প্রত্যেকেই তদর্শনে মনে করিত যে, গোলাটি আমার উপরেই আসিয়া পড়িবে, কিন্তু প্রায়ই উহা ৭৮ শত পদ দূরে গিয়া পড়িত। দিবসে ও রাত্ৰিতে, সমভাবে যুদ্ধ হইত; সর্বদা যুদ্ধব্যাপারে নগরবাসীরা সম্ভ্রান্ত হইয়া উঠিত। পঞ্চম ও ষষ্ঠ দিবসেও এইরূপে যুদ্ধ হয়। প্রায় দেড়প্রহর পর্য্যন্ত রাণীর পক্ষীয়দিগের জয়লাভ হইত, ইংরেজদিগের সৈন্যক্ষয় ও তাঁহাদের তোপ বন্ধ হইয়া যাইত। কিয়ৎকাল পরে পুনর্বার ইংরেজদিগের জয় ও রাণীর পরাজয় ঘটিত। রাণীর তোপ বন্ধ হইত। সপ্তম দিবসে সূর্যাস্তের পর হইতে দুর্গের পশ্চিম দিকের তোপ বন্ধ হয়। ইংরেজপক্ষের কামানের অগ্নিবৃষ্টিতে কেহ স্থিরভাবে থাকিতে পারে নাই। এই গোলাবর্ষণে রাণীর তোপমঞ্চও ভগ্ন হইয়া যায়। রাণী রাত্ৰিকালে রাজমন্ত্রী দ্বারা মঞ্চনির্মাণের ব্যবস্থা করেন। রাজমন্ত্রী ও মজুরগণ কষলের দ্বারা সর্বাঙ্গ ঢাকিয়া, রজনীর অন্ধকারের মধ্যে ধীরে ধীরে, নিঃশব্দে ইষ্টকাদি বুরুজের উপর স্থাপন করে, এবং শয়ানভাবে থাকিয়া তোপমঞ্চ বাঁধিতে থাকে। এইরূপে প্রতিপক্ষের অলক্ষিতভাবে তোপমঞ্চ নির্মিত হইলে দুর্গ হইতে গোলাবর্ষণ আরম্ভ হয়। ইংরেজসৈন্য অসতর্ক ও নিশ্চিন্ত ছিল, এজন্য এই আকস্মিক অগ্নিবর্ষণে তাহাদের সবিশেষ ক্ষতি হয়। প্রায় দুই প্রহর পর্য্যন্ত তাহাদের তোপ বন্ধ থাকে।

“অষ্টম দিবসে প্রাতঃকালে ইংরেজেরা পুনর্বার তোপ চালাইতে আরম্ভ করেন। তাঁহাদের নিকটে দুর্গপরিদর্শনের উপযোগী যে সকল উৎকৃষ্ট ছর-বীক্ষণ যন্ত্র ছিল, তদ্বারা তাঁহারা দুর্গমধ্যস্থিত জলের চৌবাচ্চা সকল লক্ষ্য করিয়া গোলা চালাইতে লাগিলেন। ৭৮ জন জলবাহী ভৃত্য সেই সময়ে জল আনিতে গিয়াছিল। তাহাদের মধ্যে চারি জনের প্রাণান্ত ঘটিল, অবশিষ্ট জলবাহীরা বাক ফেলিয়া পলায়ন করিল। জলাভাবে দুর্গবাসীদিগের স্নানাদি প্রায় এক প্রহর পর্য্যন্ত বন্ধ থাকিল। এই সময়ে দুর্গের দক্ষিণ ও পশ্চিম দিকের বুরুজের গোলন্দাজেরা জলের চৌবাচ্চা রক্ষার জন্য ইংরেজ গোলন্দাজদিগের উপর প্রবলবেগে গোলাবর্ষণ পূর্বক তাহাদের তোপ বন্ধ করিল। ইহাতে জলের চৌবাচ্চা গুলি পূর্বের ত্রায় সুরক্ষিত রহিল। উহার জলে দুর্গবাসীদিগের স্নানাদির সমাপন হইল। সকলে ভোজন করিতেছে, এমন সময়ে সহসা বিকট শব্দ হইল, সঙ্গে সঙ্গে গাঢ় ধূমরাশিতে ও ধূলিপটলে চারি দিক পরিপূর্ণ হইয়া গেল। অল্পক্ষণ পরে ধূমরাশি অপগত হইলে জানা গেল যে, রাজপ্রাসাদের পুরোবর্তী প্রান্তরে বাকুদের কারখানায় প্রতিপক্ষের একটি গোলা পতিত হওয়াতে এই ভয়ঙ্কর শব্দ সমুখিত হয়। এই দুর্ঘটনায় ত্রিশটি পুরুষ ও আটটি রমণী নিহত এবং ৪০।৫০ জন অর্ধদগ্ধ হয়।

“অষ্টম দিবসে নগরে সাতিশয় গোলযোগ ঘটয়াছিল। সে দিনকার যুদ্ধও পূর্বাপেক্ষা ভয়ঙ্কর হইয়াছিল। বীরপুরুষদিগের সিংহনাদে, বন্দুক ও কামানের ধ্বনিতে, ভেরী, শৃঙ্গ ও বিগুল প্রভৃতির শব্দে গগনমণ্ডল আপূরিত হইয়াছিল। ধূলিপটলে ও ধূমরাশিতে চারি দিক সমাচ্ছন্ন হইয়া উঠিয়াছিল। ইংরেজসৈন্য সে দিন বীরত্বের সবিশেষ পরিচয় দিয়াছিল। নগরের সহস্রাধিক লোক নিহত হইয়াছিল। দুর্গপ্রাচীরে যে সকল গোলন্দাজ ও সিপাহী ছিল, তাহাদের মধ্যেও অনেকে দেহত্যাগ করিয়াছিল। লক্ষ্মী বাঈ অপর গোলন্দাজ ও সিপাহীর সমাবেশ পূর্বক সেই স্থান পূর্ণ করিয়াছিলেন। এই কয়েক দিনের যুদ্ধে তাঁহার নিরতিশয় শ্রম হইয়াছিল। তিনি চারি দিকে সমভাবে দৃষ্টি রাখিতেন, যেখানে যাহার অভাব লক্ষিত হইত, স্বয়ং উপস্থিত হইয়া, উৎকর্ণাৎ তাহার পূরণ করিবার উপায় বিধান করিতেন। এজন্য তাঁহার সৈনিকগণ সাতিশয় উৎসাহসম্পন্ন হইয়া প্রতিপক্ষের সহিত যুদ্ধ করিতেছিল।



ইংরেজসৈন্য যদিও যথোচিত পরাক্রম প্রকাশ করিয়াছিল, তথাপি ঝাঁশীর দৃঢ়সঙ্কল্প সৈনিকগণ, আপনাদের গোলাগুলি নিঃশেষপ্রায় হইলেও, ৩১শে মার্চ পর্য্যন্ত তাহাদিগকে দুর্গে প্রবেশ করিতে দেয় নাই।”

যখন আক্রান্তগণ এই ভাবে আক্রমণকারীদিগের পরাক্রমস্পর্কী হইয়া উঠিয়াছিল, তখন ইংরেজ সেনাপতির সমক্ষে একটি অভিনব বিপত্তির সংবাদ উপস্থিত হয়। ৩১শে মার্চ স্মার্ হিউ রোজ্ অবগত হইলেন যে, উত্তর দিক হইতে অবরুদ্ধদিগের উদ্ধারের জন্ত সৈনিকদল আসিতেছে। এই সৈন্য তাত্যা টোপের। তাত্যা টোপে ইংরেজ সেনানায়ক ওয়াইণ্ডহামের সহিত যুদ্ধে জয়লাভ করিয়া, শেষে যেরূপে প্রধান সেনাপতি স্মার কোলিন কাম্প-বেল কর্তৃক পরাজিত হইলেন, তাহা পাঠকের গোচর করা হইয়াছে। রাও সাহেবের আদেশে তাত্যা টোপে কালীতে উপস্থিত হইলেন। তিনি যখন চিরকারি নামক স্থান অধিকার করেন, তখন লক্ষ্মী বাঈর সাহায্যপ্রার্থনার পত্র প্রাপ্ত হইলেন। তাত্যা টোপে এসম্বন্ধে রাও সাহেবের আদেশ জানিতে চাহেন। রাও সাহেব সম্পূর্ণরূপে রাণীর প্রার্থনার অনুমোদন করেন। সুতরাং তাত্যা টোপে কুড়ি হাজার সৈন্য ও ২৮টি কামান লইয়া, ঝাঁশীর অবরোধকারী ইংরেজসৈন্যের বিরুদ্ধে যাত্রা করেন।

তাত্যা টোপে বহুসংখ্যক সৈন্য লইয়া, ঝাঁশীতে আসিতেছেন শুনিয়া, স্মার্ হিউ রোজ্ চিন্তিত হইলেন। ঝাঁশীর সুদৃঢ় দুর্গ তখনও তাঁহার অধিকৃত হয় নাই। উহার সৈনিকদল তখনও তাঁহার নিকটে পরাজয়স্বীকার করে নাই। উহার তেজস্বিনী রক্ষয়িত্রী তখনও তাঁহার সমক্ষে সাহসে বা উৎসাহে বিসর্জন দেন নাই। এই সঙ্কটকালে আবার অভিনব সৈনিকদলের সহিত অত্র একজন রণকুশল বীরপুরুষের সমাগমবার্তায় ইংরেজ সেনাপতি চিন্তিত হইলেন বটে, কিন্তু কর্তব্যপালনে উদাসীন রহিলেন না। এই বিপ্লবময় ঘটনার অনেক স্থলে দেখা গিয়াছে যে, প্রতিপক্ষগণ অধিকতর সৈনিকবলে সহায়সম্পন্ন ও অধিকতর অস্ত্রবলে শক্তিসম্পন্ন হইয়াও, ইংরেজের নিকটে পরাজয় স্বীকার করিয়াছে। ইংরেজ যেরূপ বুদ্ধিচাতুরী প্রকাশ করিয়াছেন, প্রতিপক্ষগণ সেরূপ বুদ্ধির পরিচয় দিতে পারে নাই। ইংরেজ যেরূপ উদ্যমশীলতা দেখাইয়াছেন, প্রতিপক্ষগণ অনেক স্থলে সেইরূপ উদ্যমে কর্মপ্রবণ

হইয়া উঠিতে পারে নাই । তাত্যা টোপে বেত্রবতীর তীরবর্তী প্রান্তরে শিবির স্থাপন করিয়াছিলেন । প্রতিপক্ষের সৈন্য অল্প ভাবিয়া, তিনি নিশ্চিত ছিলেন । ঝাঁপীর অবরোধভঙ্গের জন্ত তৎকর্তৃক একদল সৈন্য প্রেরিত হইয়াছিল । কিন্তু শার হিউ রোজ্ তাঁহার গায় নিশ্চিতভাবে থাকেন নাই । তাঁহার সৈন্যসংখ্যা অল্প ছিল । তথাপি তিনি দুর্গ অবরোধের জন্ত যথোপযুক্ত সৈন্য রাখিয়া, অবশিষ্ট সৈন্যের সহিত তাত্যা টোপের সৈনিকদলের বিরুদ্ধে যাইবার বন্দোবস্ত করিলেন । তাত্যা টোপের অগ্রগামী সৈনিকদল তাঁহার আক্রমণে পরাজিত হইল । ইহাদিগকে পরাজিত দেখিয়া, তাত্যা টোপে শঙ্কিত হইলেন । তাঁহার মুখ্য সৈনিকদলও আতঙ্কগ্রস্ত হইয়া উঠিল । তিনি যে স্থানে শিবির স্থাপন করিয়াছিলেন, উহার পুরোভাগ জঙ্গলে আচ্ছন্ন ছিল । মার্ত্তণ্ডের প্রথর তাপে জঙ্গল শুষ্ক হইয়া গিয়াছিল । তাত্যা টোপে জঙ্গলে আগুন লাগাইয়া দিলেন । শুষ্কপ্রায় বৃক্ষ ও তৃণ-গুন্মাদি সহজে জলিয়া উঠিল । নিবিড় ধূমরাশিতে চারি দিক আচ্ছাদিত হইল । তাত্যা টোপে বিপক্ষের আগমনপথ এইরূপ ধূমস্তূপ ও প্রজ্বলিত পাবকে বিপত্তিময় করিয়া, বেত্রবতী পার হইয়া কাল্লীর অভিমুখে প্রস্থান করিলেন । ইংরেজসৈন্য এই বিপত্তিময় পথেও তাঁহার পশ্চাদ্ধাবিত হইল । যুদ্ধে তাঁহার বহুসংখ্যক সৈন্য দেহত্যাগ করিল । তাঁহার প্রায় সমুদয় কামান প্রতিপক্ষের অধিকৃত হইল ।

তাত্যা টোপের আগমনবার্তা শ্রবণ পূর্বক দুর্গবাসিগণ আহ্লাদে উৎফুল্ল হইয়া, সমস্ত রাত্রি মশাল জালিয়া, যুদ্ধের আয়োজন করিয়াছিল । রণপার-দর্শিনী রাণী দুর্গবন্দ্রে থাকিয়া, সৈনিকদিগকে উৎসাহিত ও উত্তেজিত করিতে ছিলেন । তাত্যা টোপের পরাজয়েও তাহাদের উৎসাহ দূরীভূত বা উত্তেজনা তিরোহিত হইল না । ১লা এপ্রেল আবার তাহারা পূর্বের গায় শক্তির পরিচয় দিতে লাগিল । পরবর্তী দুই দিন তাহাদের এইরূপ উদ্যম পরিস্ফুট হইল । তৃতীয় দিবসে অর্থাৎ ৩রা এপ্রেল ইংরেজসৈন্যের নগরপ্রবেশের সুবিধা ঘটিল । ইংরেজসৈন্য নগরে যাইবার প্রধান পথ বোর্ছা দরওয়াজা অধিকার করিল এবং অধিরোহণীর সাহায্যে প্রাচীরে উঠিতে সচেষ্ট হইল ।\*

\* লক্ষ্মী বাঈর জীবনীলেখক বলেন, রাণীর পক্ষের দলাজী ঠাকুর নামক একজন বুদ্ধেলা সর্দারের সহায়তায় ইংরেজসৈন্যের বোর্ছা দরওয়াজা অধিকার করিবার সুযোগ ঘটে ।

যে সকল অধিরোহনী তাহাদের নিকট ছিল, তৎসমুদয়ের কোন কোন খানি প্রাচীরের উচ্চতার পরিমাণ অনুসারে ছোট হইল। কোন কোন খানি আরোহীর দেহভারে ভাঙ্গিয়া গেল। যাহা হউক, এক জন সৈনিক একখানি অধিরোহণীর সাহায্যে প্রাচীরে উঠিল। অপর সৈনিকগণ অবিলম্বে তাহার অনুগমন করিল। এইরূপে ইংরেজসৈন্য নগরে প্রবিষ্ট হইল। তাহার। নগরের যে পথে অগ্রসর হইল, উহার দুই পার্শ্বের গৃহগুলিতে আগুন লাগাইয়া দিল। হতাশন প্রবলবেগে প্রজ্বলিত হইয়া উঠিল। এ দিকে আক্রমণকারীদিগের অস্বাধাতে নগরবাসীদিগের প্রাণান্ত হইতে লাগিল। কোমলপ্রাণ বালকেরাও এই ভীষণ আক্রমণ হইতে পরিত্রাণ পাইল না।\* অনেকে প্রাণের ভয়ে উদ্ভ্রান্তভাবে চারি দিকে পলায়ন করিতে লাগিল। কেহ কেহ সঙ্কীর্ণ গলির মধ্যে আত্মগোপন করিল। কেহ কেহ গৃহের কোণে লুকায়িত হইল। কেহ কেহ গৌপদাড়ি কামাইয়া নারীর বেশ পরিগ্রহ করিল। এইরূপে যে, যেরূপ সুযোগ পাইল, সে, সেইরূপে প্রাণরক্ষার চেষ্টা করিতে লাগিল। †

শ্রী হিউ রোজ্ নগরের মধ্যভাগস্থিত রাজপ্রাসাদ আক্রমণ করিলেন। যখন তাহার সৈন্য প্রাসাদের প্রাঙ্গণে উপস্থিত হয়, তখন প্রহরী সৈনিকেরা তাহাদিগকে বাধা দিবার জন্ত প্রস্তুত হইতে থাকে। ইংরেজসৈন্য প্রাসাদের এক গৃহ হইতে আর এক গৃহে উপনীত হয়। প্রতিগৃহে প্রাসাদরক্ষক সৈনিকগণ সাহস, তেজস্বিতা ও ক্ষমতার একশেষ প্রদর্শন করেন। আক্রমণকারিগণ সঙ্কীর্ণ সাহায্যে তাহাদের ক্ষমতা পূর্ন করিয়া ফেলে। এ দিকে প্রজ্বলিত হতাশনে প্রাসাদরক্ষকগণ নিরুপায় হইয়া পড়ে। প্রাসাদ ইংরেজ

\* এইরূপ নিধনব্যাপার ঝাঁপীতে “বিজন” নামে পরিচিত হইয়াছে।

† নগরের মধ্যে “ভিড়ের বাগ” নামে একটি উদ্যান ছিল। বহুসংখ্য লোক এই উদ্যানে আশ্রয় লইয়াছিল। ইংরেজসৈন্য উদ্যানে প্রবেশ করিলে ইহার। কাতরভাবে জীবনভিক্ষা করিয়া কহে—“যুদ্ধের সহিত আমাদের কোনরূপ সংশ্রব নাই। আমরা যোদ্ধা নহি, নিরপরাধ, নিরীহ প্রজা, প্রাণের দায়ে এই স্থানে আশ্রয় লইয়াছি।” ইংরেজ সেনানায়ক শরণাগতদিগকে অভয় দিয়া, চারি দিকে প্রহরী নিযুক্ত করিলেন, এবং উদ্যানের ঘর অবরুদ্ধ করিয়া, বহির্ভাগ হইতে অন্তর্ভাগে ও অন্তর্ভাগ হইতে বহির্ভাগে লোকের গমনাগমন নিষিদ্ধ করিয়া দিলেন।

সেনাপতির অধিকৃত হয়। প্রাসাদের অশ্বশালায় ৫০ জন অশ্বারোহী ছিল, তাহারা সকলেই রাণীর পক্ষসমর্থনে আত্মোৎসর্গ করে, এবং সকলেই সেই রক্ষণীয় স্থানে যার পর নাই সাহসের সহিত যুদ্ধ করিয়া, অনন্ত নিদ্রায় অভিভূত হয়। গবর্নর-জেনেরল লর্ড উইলিয়ম বেণ্টিন্‌ক্‌ রাণীর স্বামী গঙ্গাধর রাওয়ের পিতামহকে তাঁহার বিশ্বস্ততার পুরস্কারস্বরূপ আপনাদের জাতীয় পতাকা দিয়া কহিয়াছিলেন যে, তিনি কোন স্থানে যাত্রাকালে এই পতাকা সঙ্গে লইয়া যাইতে পারিবেন। রাজপ্রাসাদ অধিকারকালে উক্ত পতাকা ইংরেজসৈন্তের হস্তগত হয়।

ইংরেজসৈন্ত নগরে প্রবেশ করিলে লক্ষ্মী বাঈ দুর্গে গিয়া অবস্থিতি করেন। প্রথমে ইংরেজসৈন্তের রসদ ইত্যাদি নিঃশেষিতপ্রায় হইয়া ছিল। ইংরেজ সেনাপতি তাত্যা টোপেকে পরাজিত করিয়া, তাঁহার রসদ প্রভৃতি অধিকার করেন। সুতরাং খাদ্য দ্রব্য, যুদ্ধোপকরণে ইংরেজসৈন্ত সহায়সম্পন্ন হইয়া উঠে। এই সময়ে প্রতিপক্ষকে বাধা দেওয়া রাণীর অসাধ্য হইয়া উঠিল। তাঁহার নগরের অধিকাংশ ভস্মীভূত হইয়াছিল। তাঁহার সাহসিক গোলন্দাজগণ রণস্থলে একে একে দেহত্যাগ করিয়াছিল। তাঁহার বিশ্বস্ত সৈনিকগণের অনেকের প্রাণবিয়োগ ঘটিয়াছিল। সুতরাং তিনি এখন অন্য উপায় না দেখিয়া, আপনার প্রিয়তমরাজ্যপরিত্যাগে কৃতসঙ্কল্প হইলেন। তদীয় সঙ্কল্পসিদ্ধির কোন ব্যাঘাত হইল না। তাঁহার পিতা মোরোপস্ত তাহা প্রস্তুত হইলেন। তাঁহার বিশ্বস্ত অনুচরগণ সজ্জিত হইল। তাঁহার অমুগতা পরিচারিকারা যাত্রার যাবতীয় আয়োজন করিল। তিনি স্বয়ং পুরুষবেশ পরিগ্রহ পূর্বক অশ্বপৃষ্ঠে অধিষ্ঠিত হইলেন। মোরোপস্ত তাহাও অশ্ব আরোহণ করিলেন। একটি হাতীর হাওদার মধ্যে মণিমাণিক্য প্রভৃতি পুরিয়া দেওয়া হইল। মণিমাণিক্য ব্যতীত রাণীর আর একটি ধন ছিল। এই ধনের জ্ঞান তিনি আত্মোৎসর্গে কৃতনিশ্চয় ছিলেন। এখন এই প্রাণাধিক ধন দামোদর রাওকে তিনি স্বকীয় পৃষ্ঠদেশে রেশমী কাপড় দিয়া বাধিয়া লইলেন।

এইরূপে প্রস্তুত হইয়া, রাণী সহচরদিগের সহিত প্রতিপক্ষের অলক্ষিতভাবে ঠা এপ্রেল নিশীথকালে দুর্গের উত্তর দ্বার দিয়া বহির্গত হইলেন। তাঁহার প্রস্থানের সংবাদ অবগত হইয়া, ইংরেজ সেনাপতি তাঁহাকে ধরিবার জ্ঞান

লেফটেনেন্ট বোকারকে সৈনিকদলের সহিত পাঠাইয়া দিলেন । বোকার একুশ মাইল পথ অতিক্রম করিলেন, কিন্তু অভীষ্ট বিষয়ে কৃতকার্য হইতে পারিলেন না । রাণীর বেগগামী অশ্ব অদৃশ্য হইয়া গেল । ইংরাজসেনানী আহত হইয়া ফিরিয়া আসিলেন । কিন্তু রাণীর পিতার অদৃষ্টে নিষ্ফলিতলাভ ঘটিল না । মোরোপন্ত হস্তীর সহিত যাইতে ছিলেন । পথে সহসা তাঁহার নিজের তরবারির খোঁচায় তদীয় জজ্বাদেশ কাটিয়া গেল । রুধিরস্রাবে তাঁহার পরিচ্ছদ পরিষিক্ত হইল । তিনি এই অবস্থায় দতিয়া রাজ্যে উপনীত হইলেন । রাজমন্ত্রী তাঁহাকে ধরিয়া ইংরেজদিগের নিকটে পাঠাইয়া দিলেন । স্মার রবার্ট হামিল্টনের আদেশে তাঁহার ফাঁসী হইল ।

রাণীর প্রস্থানের পর আবার ঝাঁশীতে ভয়াবহ “বিজনের” আরম্ভ হইল । কাণপুর ও দিল্লীর গ্রাম ঝাঁশীও ইংরেজ সৈন্তের নিরতিশয় উত্তেজনার উদ্দীপক ছিল । কাণপুর এবং দিল্লীর গ্রাম এই স্থানেও তাহাদের অসহায় সজাতির শোণিতপাত হইয়াছিল । কাণপুর এবং দিল্লীতে যাহা ঘটয়াছিল, ঝাঁশীতেও তাহাই ঘটিল । কথিত আছে, ইংরেজসৈন্ত ঝাঁশীর পাঁচ হাজার অধিবাসীকে বধ করিয়াছিল । \* অনেকে মর্যাদাহানির আশঙ্কায় নিজ হস্তে নিজের আত্মীয়স্বজনের শোণিতপাতে প্রবৃত্ত হইয়াছিল । অনেক মহিলা আত্মসম্ম-রক্ষার জন্ত কূপে ঝাঁপ দিয়া দেহত্যাগ করিয়াছিল । কিন্তু ইংরেজসৈনিকেরা মহিলাদিগের প্রতি অঙ্গপ্রয়োগ করে নাই । ঘটনাক্রমে কেহ কেহ নিহত হইয়াছিল বটে, কিন্তু সাক্ষাৎসম্বন্ধে কেহই ইংরেজসৈন্তের অস্ত্রে প্রাণ বিসর্জন করে নাই । ঝাঁশীর দুর্গ এবং নগর বিলুপ্তি হয় । ইংরেজ সেনাপতি ঠুত জুব্বাদি হইতে নিরস্ত্র দুঃখীদিগকে আহাৰ্য্য দিতে অনুমতি করেন ।†

\* *Martin, Indian Empire. Vol. II., p. 485.*

† যুদ্ধের পর দিল্লীতে এবং লক্ষ্নৌতে বিলুপ্ত ও বিধ্বংসের যেকোন দৃশ্য ভয়ঙ্করভাবে প্রকাশ করিয়াছিল, ঝাঁশীতেও তাহারই আবির্ভাব হয় । উন্নত সৈনিকেরা সম্মুখে যাহা পায়, তাহাই ভাঙ্গিয়া ফেলে । আয়না, ঝাড়লঠন, চেয়ার, কার্পেট, সাটিনের বিছানা, রূপার পায়াওয়াল পাট, হাতীর দাঁতের জুব্বাদি সমস্তই বিনষ্ট এবং গৃহের চারি দিকে বিক্ষিপ্ত হইয়া যায় । অবশেষে এই উচ্ছৃঙ্খল সৈনিকদলে কিয়দংশে শৃঙ্খলা স্থাপিত হয় ।—  
*Lowe, Central India.*

এই এপ্রেল ঝাঁশীর দুর্গ ইংরেজসৈন্যের অধিকৃত হয়। ঝাঁশীর সৈনিকেরা আপনাদের রাণীর জন্য ১৩ দিন অসীমসাহসসহকারে যুদ্ধে প্রমত্ত থাকে। ১৩ দিন পর্য্যন্ত তাহাদের বন্দুক, তাহাদের কামান আক্রমণকারীদিগের সমক্ষে যেন অগ্নিময় আস্তরণপট বিস্তার করে; উহার মধ্য হইতে প্রতিপক্ষের বিল্লাশের জন্ত অবিরত গোলা গুলি, প্রস্তর, সূদূত কাষ্ঠখণ্ড প্রভৃতির বৃষ্টি হইতে থাকে। একজন ইংরেজ লেখক\* এই যুদ্ধের বর্ণনাপ্রসঙ্গে উল্লেখ করিয়াছেন,—“যুদ্ধকালে বোধ হইত যেন, যম এবং তাহার সর্পবেণী-ধারিণী, উগ্রপ্রকৃতি পরিচারিকাগণ আমাদের মধ্যে আসিয়া পড়িয়াছে। দুর্গের অন্তর্ভাগে অবিরত ভেরী, টমটম প্রভৃতির গভীর শব্দ হইত, বহির্ভাগে বন্দুক এবং কামানের নির্ঘোষে চারি দিক সমাকুল হইতে থাকিত, সন্ধে সন্ধে মৃত্যু তাড়াতাড়ি আমাদের লোকদিগকে লইয়া যাইত।” এইরূপ ১৩ দিন ঘোরতর যুদ্ধের পর ঝাঁশীর সৈন্য পরাজয় স্বীকার করে। পরাজিত হইলেও, তাহারা বীরেন্দ্রসমাজের বরণীয়; যে নারীর পরিচালনায় তাহাদের এইরূপ শ্রদ্ধা পরিষ্কৃত হইয়াছে, তিনি অতীতদর্শী ঐতিহাসিকদিগের স্মার পৃথিবীর প্রতিভাশালী বীরপুরুষদিগেরও চিরস্মরণীয়।

এ দিকে রাণী কালীতে উপনীত হইলেন। এই স্থানে রাও সাহেব এবং তাত্যা টোপে অবস্থিতি করিতেছিলেন। রাণীর সঙ্গে সৈন্য ছিল না। সুতরাং তিনি রাও সাহেবের নিকটে সাহায্য প্রার্থনা করিলেন। রাও সাহেব সৈনিক-দল পরিদর্শন করিয়া, তাহাদিগকে যুদ্ধের জন্ত উৎসাহিত করিয়া তুলিলেন। তাহাদের পরিচালনের ভার তাত্যা টোপের উপর সমর্পিত হইল। যখন যাবতীয় সৈন্য এক স্থানে সমবেত হইবে, তখন তাত্যা টোপে, রাও সাহেবের সহিত সম্মিলিত হইবেন বলিয়া, সংগৃহীত সৈন্য লইয়া, কালীর ৪০ মাইল দূরে কুঁচ নামক নগরে গমন করিলেন। এই স্থানে স্মার হিউ রোজের সহিত যুদ্ধে তাহারা পরাজয় হইল। রাণী যুদ্ধস্থলে উপস্থিত ছিলেন। কিন্তু তাত্যা টোপে সৈনিকদলের পরিচালনাসম্বন্ধে তাহারা পরামর্শ গ্রহণ করেন নাই। বাহা হউক, পরাজিত হইলেও, তাহাদের সৈনিকদল একরূপ শৃঙ্খলা, একরূপ নৈপুণ্য, একরূপ

\* Lowe, Central India.

কৌশলের সহিত পশ্চাদ্গমন করে যে, উহাতে বিজয়ী ইংরেজসৈন্য যার পর নাই বিস্মিত হইয়া উঠে । কর্ণেল মালিসন্ সাহেব লিখিয়া গিয়াছেন যে, তাহারা যে প্রণালীতে পশ্চাদ্গমন করিয়াছিল, তাহা অপেক্ষা অধিকতর উৎকৃষ্ট প্রণালী আর হইতে পারে না ।\* যদিও তাহাদের শ্রেণী দৈর্ঘ্যে দুই মাইল পর্য্যন্ত ছিল, তথাপি উহার কোন অংশ বিচলিত বা শৃঙ্খলাচ্যুত হয় নাই । কোন অংশে কোনরূপ গোলযোগ ঘটে নাই । যুদ্ধসময়ে সৈনিকশ্রেণীর মধ্যে যেরূপ শৃঙ্খলা থাকে, উহাদের মধ্যেও সেইরূপ শৃঙ্খলা রহিয়াছিল । একদল পশ্চাদ্গমনকারী প্রতিপক্ষদিগের দিকে বন্দুক ছুড়িল, এবং দৌড়িয়া দ্বিতীয় দলের নিকটবর্তী হইল । দ্বিতীয় দল আবার প্রথম দলের ন্যায় বন্দুক ছুড়িয়া দৌড়িতে লাগিল । এইরূপে সমগ্র দল শৃঙ্খলার সহিত হটিয়া গেল ।

কুঁচের যুদ্ধের পর কান্নীর ছয় মাইল দূরে যমুনার তীরবর্তী গলাবলী নামক স্থানে যুদ্ধ হয় । এই যুদ্ধে বাঁদার নবাব দুই হাজার অশ্বসাদী এবং কতিপয় কামান লইয়া উপস্থিত ছিলেন । লক্ষ্মী বাঈ ইতঃপূর্বে রাও সাহেবকে সৈনিকদলের শৃঙ্খলা করিতে বলিয়াছিলেন । রাও সাহেব স্ত্রীলোকের উপর সমগ্র সৈনিকদলের পরিচালনভার না দিয়া, যশোলাভের জন্ত সয়ং কর্তৃত্ব গ্রহণ করেন । রাণী কেবল আড়াই শত মাত্র অশ্বারোহী সৈন্যের পরিচালনভার প্রাপ্ত হইলেন । তাঁহাকে যমুনার দিক রক্ষা করিতে অনুরোধ করা হয় । তিনি আপনার সৈনিকদিগকে যথোপযুক্ত স্থলে সন্নিবেশ করিয়া, ঐ দিক রক্ষায় ব্যাপৃত থাকেন । ইংরেজসৈন্য গলাবলীর যুদ্ধে জয়ী হইয়া মে মাসের শেষভাগে কান্নী অধিকার করে । গলাবলীর যুদ্ধে পরাভূত হইয়া, রাও সাহেব এবং বাঁদার নবাব প্রভৃতি পলায়নের পরামর্শ করিয়াছিলেন । কিন্তু রাণী ইহাতে বাধা দিয়া, তাঁহাদিগকে স্থিরভাবে রাখেন । তিনি কান্নীর যুদ্ধে যথোচিত বীরত্ব ও সাহসের পরিচয় দেন । তাঁহার পরাক্রমে ইংরেজসৈন্য একান্ত বিব্রত হইয়া পড়ে । তদীয় সৈনিকগণ এমন সাহসসহকারে অগ্রসর হয়, এমন ক্ষিপ্ৰকারিতার সহিত অস্ত্রচালনা করে, এমন বীরত্বসহকৃত যুদ্ধকৌশলের পরিচয় দেয় যে, প্রতিপক্ষগণ পরাজিতপ্রায় হয় । লক্ষ্মী বাঈ অশ্বারোহণে, এই সাহসী সৈনিক-

\* *Indian Mutiny, Vol. III., p. 178.*

দিগকে লইয়া এমন পরাক্রমে ইংরেজসৈন্তের দক্ষিণ ভাগ আক্রমণ করিয়া-  
ছিলেন যে, উহাতে তাহারা হটিয়া গিয়াছিল। অধিকন্তু তিনি একরূপ বেগে  
অগ্রসর হইয়াছিলেন যে, তাঁহার নিকট হইতে প্রতিপক্ষের তোপ কুড়ি গজের  
অধিক দূরবর্তী ছিল না। এমন সময়ে ইংরেজপক্ষের অভিনব সৈনিকদল  
উপস্থিত হওয়াতে তাঁহার আশাভঙ্গ হয়। একজন ইংরেজ সেনানায়ক  
যুদ্ধস্থলে উপস্থিত ছিলেন। তিনি কর্ণেল মালিসনের নিকটে উপস্থিত  
যুদ্ধের প্রসঙ্গে এই ভাবে লিখিয়াছিলেন,—“আমরা প্রায় পরাজিত হইয়া-  
ছিলাম। এমন সময়ে উষ্ট্রারোহী সৈনিকদল\* এবং প্রায় দেড় শত নূতন  
সৈন্ত উপস্থিত হওয়াতে ঘটনাস্রোত অগ্র দিকে প্রবাহিত হয়। উষ্ট্রারোহী  
সৈন্তই স্মার্ট হিট রোজের সৈনিকদলকে রক্ষা করে। বিপক্ষগণ আমাদের  
কামানের কুড়ি গজ দূরে উপস্থিত হইয়াছিল। আর পনের মিনিট অতীত  
হইলেই সংহারকার্য্য ঘটত। এই দিন হইতে আমি উটকে স্নেহের চক্ষে  
দেখিয়া থাকি।” বস্তুতঃ এই যুদ্ধে লক্ষ্মী বাঈ কোনরূপে প্রতিপক্ষের নিকটে  
পরাজয় স্বীকার করেন নাই। তিনি প্রথম হইতে শেষ পর্য্যন্ত সমান বিক্রম—  
সমান তেজস্বিতার সহিত সৈনিকদলের পরিচালনা করিয়াছিলেন। শেষে রাও  
সাহেব সৈন্ত লইয়া পলায়ন করাতে তাঁহাকেও রণস্থলপরিত্যাগে বাধ্য হইতে  
হয়। তাত্যা টোপে কালীতে গোলা গুলি প্রস্তুত করিবার কারখানা করিয়া-  
ছিলেন। কামান, বারুদ ইত্যাদি পর্য্যাপ্তপরিমাণে সংগৃহীত ছিল। এই  
স্থান ইংরেজের অধিকৃত হইলে রাও সাহেব প্রভৃতি গোয়ালিয়রের ৪৬ মাইল  
দক্ষিণপশ্চিমে গোপালপুর নামক স্থানে প্রস্থান করেন।

অন্তঃপর কি করিতে হইবে, তদ্বিষয়ে পরামর্শ হয়। এই স্থানে রাও  
সাহেব উপস্থিত ছিলেন। বাঁদার নবাব সমাগত হইয়াছিলেন। তাত্যা  
টোপে অবস্থিতি করিতেছিলেন। সর্ব্বোপরি কাঁশীর তেজস্বিনী রাণী  
রহিয়াছিলেন। প্রথম দুই জন কোনরূপ কৌশলের উদ্ভাবনে সমর্থ ছিলেন না।  
তৃতীয় ব্যক্তিরও ঐ বিষয়ে তাদৃশ নৈপুণ্য ছিল না। কিন্তু যে যুবতী  
বীরাক্ষরী ইহাদের মধ্যে ছিলেন, তাঁহার যেরূপ সাহস, সেইরূপ প্রতিভা

\* ইহারা প্রথমতঃ তীরধনুকের সাহায্যে যুদ্ধ করিয়াছিল।



ছিল।\* প্রতিভাবলে তিনি অভিনব উপায়ের উদ্ভাবন করিলেন। পরাজয়েও তাঁহার তেজস্বিতা, তাঁহার অধ্যবসায়, তাঁহার বলবতী প্রতিহিংসা তিরোহিত হইল না। তিনি পরামর্শ দিলেন যে, কোন দুর্গে থাকিয়া যুদ্ধ না করিলে প্রতিপক্ষের ক্ষমতারোধ করা যাইবে না। গোয়ালিয়রের দুর্গ অধিকার পূর্বক ধর্ম ও সজ্জাতিপ্রেমের নামে তত্রত্য সৈনিকদলকে উত্তেজিত করিলে, ইংরেজের সমক্ষে আপনাদের প্রাধান্যরক্ষার সম্ভাবনা আছে। এইরূপ সঙ্কল্প সর্বাপেক্ষা সাহসী, এবং সর্বাপেক্ষা রণকৌশলসম্পন্ন বীরপ্রবরের মস্তিষ্ক হইতে সমুৎপন্ন হইতে পারে। গোয়ালিয়রে মহারাজ জয়াজী রাও শিন্দে আধিপত্য করিতেছিলেন। বিচক্ষণ মন্ত্রী দিনকর রাও রাজ্যশাসনে ব্যাপ্ত ছিলেন। গোয়ালিয়রের দুর্গ ছুরারোহ পর্বতের উপর প্রতিষ্ঠিত ছিল। কন্দর্ভ মন্ত্রী কর্তৃক পরিচালিত পরাক্রান্ত মহারাজের ক্ষমতারোধ পূর্বক তাঁহার দুর্গ অধিকার করা নিঃসন্দেহ অসংসাহসিক কর্ম। কিন্তু প্রতিভা রাণীকে এইরূপ অসংসাহসিক কর্মে প্রবর্তিত করিতে নিরস্ত থাকিল না। রাণীর প্রস্তাবে রাও সাহেব সন্তুষ্ট হইলেন, তাত্যা টোপে সম্মতি প্রকাশ করিলেন। ৩০ মে ইঁহারা গোয়ালিয়রে যাইবার জন্ত গোপালপুর পরিত্যাগ করিলেন।

গোয়ালিয়রের বিচক্ষণ মন্ত্রী দিনকর রাও আত্মরক্ষার উপায়বিধানে নিশ্চেষ্ট থাকিলেন না। এবিষয়ে কূট রাজনীতি তাঁহার অবলম্বনীয় হইল। তিনি জানিতেন যে, পেশওয়ার ভ্রাতা উপস্থিত হইলে দরবারের সৈনিকগণ সম্ভবতঃ তাঁহার পক্ষ সমর্থন করিবে। সুতরাং রাও সাহেব প্রভৃতির প্রতি প্রকাশ্যরূপে বিরুদ্ধভাব দেখাইলে সৈনিকেরা সহসা উত্তেজিত হইয়া উঠিবে। ইহা ভাবিয়া, দিনকর রাও, রাও সাহেবের সৈনিকদিগের প্রতি বাহিরে সমবেদনা দেখাইতে লাগিলেন, কিন্তু অন্তর্দিকে তাহাদিগকে নিষ্কাশিত করিবার জন্ত ইংরেজপক্ষের সাহায্য প্রার্থনা করিলেন। তিনি আপাততঃ আগন্তুক সৈনিকদলকে আক্রমণ না করিয়া, কেবল আত্মরক্ষার বন্দোবস্ত করিবার ইচ্ছা করিয়াছিলেন। মহারাজও উহাতে সম্মতি প্রকাশ করিয়া-

\* মালিসন্ সাহেব এই ভাবে রাণীর প্রশংসা করিয়াছেন।—*Indian Mutiny. Vol. III., p. 204.*

ছিলেন। ৩১শে মে নিশীথকালে মন্ত্রী প্রাসাদ পরিত্যাগ পূর্বক স্বকীয় ভবনে গমন করিলেন। মহারাজও মন্ত্রীর কথা ভুলিয়া, রাও সাহেবের সৈনিকদিগের সমক্ষে আত্মপ্রাধাণ্য দেখাইতে প্রস্তুত হইলেন। তিনি দেখিয়াছিলেন যে, দিল্লী ইংরেজের অধিকৃত হইয়াছে, লক্ষ্মী এবং উত্তরপশ্চিম প্রদেশ ইংরেজের পদানত হইয়া উঠিয়াছে। মধ্যভারতবর্ষের অধিকাংশ স্থানে ইংরেজের জয়পতাকা উড়ীন হইয়াছে। সুতরাং ইংরেজ যে, পরিণামে সর্বত্র সর্বতোমুখী প্রভুতার রক্ষায় সমর্থ হইবেন, তদ্বিষয়ে তাঁহার সংশয় ছিল না। তিনি এইরূপে নিঃসন্দেহ হইয়া, ইংরেজ গবর্ণমেন্টের প্রতি আপনার অনুরাগ, অধিকন্তু ইংরেজের নিকটে আপনার বীরত্বগৌরবের পরিচয় দিবার জন্ত রণবেশে সজ্জিত হইলেন। পর দিন প্রভাতকালে তাঁহার সঙ্কল্প অনুসারে কার্য্য হইল। ঐ দিন ( ১লা জুন ) তিনি ৬০০০ হাজার পদাতি, ১,৫০০ হাজার অশ্বারোহী, তাঁহার নিজের ৬০০ শরীররক্ষক সৈনিক এবং ৮টি কামান লইয়া, মোরারের দুই মাইল পূর্বে উপস্থিত হইলেন। বেলা ৭টার সময়ে তাঁহার কামান হইতে গোলাবৃষ্টির আরম্ভ হইল। রাও সাহেব ভাবিলেন যে, মহারাজ তাঁহার অভিনন্দনের জন্ত আসিতেছেন; তাঁহার সম্মানার্থে এইরূপ কামানের ধ্বনি হইতেছে। সুতরাং তিনি একরূপ নিশ্চেষ্টভাবে থাকিলেন। কিন্তু লক্ষ্মী বাঈ তাঁহার গায় নিশ্চেষ্ট রহিলেন না। তিনি দুই তিন শত মাত্র সৈন্য লইয়া এমন বেগে মহারাজের তোপের মুখে গিয়া পড়িলেন যে, গোলন্দাজেরা তাঁহার প্রতাপ সহিতে না পারিয়া পলায়ন করিল। এদিকে গোয়ালিয়রের সৈনিকেরা রাও সাহেবের সৈনিকদলের প্রতি সমবেদনা দেখাইতে লাগিল। অনেকে ঐ দলে সম্মিলিত হইল। অনেকে যুদ্ধস্থল পরিত্যাগপূর্বক তরমুজের ক্ষেত্রে গিয়া, আপনাদের পিপাসাশান্তি এবং রসনার তৃপ্তিসাধন করিতে লাগিল। মহারাজের শরীররক্ষক সৈনিকগণ কোন দিকে বিচলিত না হইয়া, তাঁহার পক্ষসমর্থনের জন্ত সচেষ্ট রহিল বটে, কিন্তু লক্ষ্মী বাঈর আক্রমণে মহারাজ পরাজিত হইলেন। তাঁহার সৈনিকদিগের অনেকে দেহত্যাগ করিল। অল্পমাত্র অনুচরের সঙ্গে তাঁহাকে রণস্থল হইতে পলায়ন করিতে হইল। আগরায় উপস্থিত না হওয়া পর্য্যন্ত তিনি আর স্বকীয় বাহনের রশ্মি সংঘত করিলেন না। গোয়ালিয়রের রণক্ষেত্রে বীরাজনার অদ্ভুতবীরত্বচাতুরী প্রদর্শিত হইল।

এইরূপে লক্ষ্মী বাঈর প্রস্তাব কার্যে পরিণত হইল। দিনকর রাও মহারাজের পরাজয়বার্তা শুনিয়া সর্বপ্রথম রাণীদিগকে নরবর নামক স্থানে পাঠাইবার বন্দোবস্ত করিলেন, অতঃপর তিনি মহারাজের অনুসরণে প্রবৃত্ত হইলেন। রাও সাহেব বিজয়োল্লাসে নগরে প্রবেশ করিলেন। নগরের সহিত দুর্গ, ধনাগার, অস্ত্রাগার তাঁহার অধিকৃত হইল। তাঁহার আদেশে সৈনিকগণ বিলুপ্তনে নিরস্ত থাকিল। নানা সাহেব মহারাষ্ট্রের পেশওয়ে এবং রাও সাহেব গোয়ালিয়রের শাসনকর্তা, এই বলিয়া, ঘোষণা করা হইল। গোয়ালিয়রের দরবারের এবং রাও সাহেবের সৈনিকেরা পর্যাপ্তপরিমাণে উপহার পাইয়া, সন্তোষ লাভ করিল। রাম রাও গোবিন্দ নামক গোয়ালিয়রের দরবারের একজন অপদস্থ পারিষদ প্রধান মন্ত্রী হইলেন। গোয়ালিয়রে আসিবার জন্ত বাণপুর এবং শাহগড়ের রাজার নিকটে অনুরোধপত্র প্রেরিত হইল।

এই সময়ে এক বিষয়ে রাও সাহেবের নিতান্ত অমনোযোগ প্রকাশ পাইল। গঙ্গা দশহরা পর্ব উপস্থিত হওয়াতে রাও সাহেব সৈনিকগণের শৃঙ্খলাসাধনে মনোনিবেশ না করিয়া, বহুসংখ্য ব্রাহ্মণ ভোজন করাইতে লাগিলেন। এদিকে ইংরেজ সেনাপতি স্মার্ট হিউ রোজ্ মহারাজকে গোয়ালিয়রে আসিতে আহ্বান করিয়া, স্বয়ং ঐ স্থানের অভিমুখে অগ্রসর হইলেন। কিন্তু রাও সাহেব উৎসবে বিরত থাকিলেন না। লক্ষ্মী বাঈ পূর্বেই রাও সাহেবকে উৎসবের পরিবর্তে সৈনিকদলের শৃঙ্খলাসাধনে মনোযোগী হইতে অনুরোধ করিয়াছিলেন। তাঁহার অনুরোধ রক্ষিত না হওয়াতে তিনি নিরতিশয় বিরক্ত হইয়া উঠিলেন। ইংরেজ সেনাপতির সমাগমবার্তা শ্রবণেও রাও সাহেবের চমক ভাঙ্গিল না। রাও সাহেব কেবল তাত্যা টোপেকে যুদ্ধসজ্জা করিতে আদেশ দিলেন। তাত্যা টোপে সৈনিকদল লইয়া, ইংরেজ সেনাপতির অভিমুখে অগ্রসর হইলেন। কিন্তু তাঁহার অভীষ্ট সিদ্ধ হইল না। ১৬ই জুন মোরার স্মার্ট হিউ রোজের অধিকৃত হইল। রাও সাহেব তখন চিন্তাকুল হইয়া, রাণীর পরামর্শ জিজ্ঞাসা করিলেন। রাণী, রাও সাহেবের অব্যবস্থিতায় পূর্বেই বিরক্ত হইয়াছিলেন, কিন্তু বিরক্তির আবেগে তাঁহার কর্তব্যজ্ঞান তিরোহিত হয় নাই। তিনি রাও সাহেবকে কহিলেন যে, তাঁহার অমনোযোগে ও আমোদাসক্তিতে স্বেযোগ নষ্ট হইয়াছে। এখন সৈনিকদিগের শৃঙ্খলাসাধন

ও ইংরেজদিগের আক্রমণনিবারণ করা ব্যতীত আর কোন উপায় নাই। তাত্যা টোপে সম্মত হইলেন। গোয়ালিয়রের পূর্বভাগ রক্ষার ভার রাণীর উপর সমর্পিত হইল। রাণী বীরপুরুষের বেশে সজ্জিত ও অশ্বপৃষ্ঠে অধিষ্ঠিত হইয়া, সমস্তদিন সৈনিকদলের পরিদর্শন এবং শৃঙ্খলাসাধন করিতে লাগিলেন। এইরূপ কৰ্মকুশলতায় ও শ্রমশীলতায় বীররমণী বীরপুরুষদিগকেও অতিক্রম করিলেন।

১৮ই জুন ( ইংরেজ ঐতিহাসিকদিগের মতে ১৭ই জুন ) ফুলবাগের রাজপ্রাণাদের নিকটবর্তী পার্কতা ভূখণ্ডে ইংরেজ সেনানায়ক স্মিথের সহিত রাও সাহেবের সৈনিকদলের যুদ্ধ হয়। ঐ স্থান কোঠা-কি-সরাই নামে প্রসিদ্ধ। উহার নানাস্থান সক্ষীর্ণ খাল দ্বারা পরিচ্ছিন্ন। সুতরাং ঐস্থলে অশ্বসাদীদিগের পরিক্রমণের তাদৃশ সুবিধা ছিল না। যাহা হউক, ঐ ক্ষেত্রে প্রায় সমস্ত দিন যুদ্ধ হইল। রাণী সমস্ত দিন বীরপুরুষের বেশে সজ্জিত ও অশ্বপৃষ্ঠে অধিষ্ঠিত থাকিয়া, সমরক্ষেত্রে সৈনিকদিগকে উৎসাহিত করিলেন। কিন্তু তাঁহার এইরূপ উদ্যম, এইরূপ অধ্যবসায়, এইরূপ নির্ভীকতাতেও তদীয় জয়লাভের সুবিধা ঘটিল না। রাণী, আপনার বিশ্বস্ত পরিচারিকা ও কতিপয় অনুচরের সহিত রণস্থল পরিত্যাগ করিলেন।

রাণীর নিজের বাহন সাতিশয় পরিশ্রান্ত হওয়াতে রাণী উহাকে বিশ্রামের জন্য রাখিয়া, মহারাজ শিন্দের অশ্বশালা হইতে একটি অশ্ব গ্রহণ করেন।\* এই অশ্ব শেষে তাঁহার কালস্বরূপ হইল। যুদ্ধক্ষেত্রে রাণী ঐ অশ্বে অধিষ্ঠিত ছিলেন, ঐ অশ্বে অধিষ্ঠিত থাকিয়াই যুদ্ধস্থল পরিত্যাগ করিয়াছিলেন। বাহন সবেগে ধাবিত হইয়াছিল। পথে “মরিলাম মরিলাম” বামাকণ্ঠনিঃসৃত এই করুণ আৰ্ত্তনাদ রাণীর শ্রুতিপ্রবিষ্ট হইল। রাণী পশ্চাদিকে মুখ ফিরাইয়া দেখিলেন, তাঁহার প্রিয় পরিচারিকা মুন্দরা একজন ইংরেজ অশ্বসাদী কর্তৃক আক্রান্ত হইয়াছে। রাণী বিদ্যাহুগে আক্রমণকারীর অভিমুখে বাহন চালনা করিলেন, এবং অসির আঘাতে আক্রমণকারীকে নিহত করিয়া, পুনর্বার সবেগে ধাবিত

\* অশ্বপরীক্ষায় রাণীর যথোচিত ক্ষমতা ছিল। এ স্থলে বোধ হয়, উৎকৃষ্ট অশ্বের অভাবে তাঁহাকে ঐ অশ্ব গ্রহণ করিতে হইয়াছিল।

হইলেন। সম্মুখে একটি সক্ষীর্ণ খাল ছিল। ঘোটক সেই জলপ্রবাহ দেখিয়া, থমকিয়া দাঁড়াইল। রাণী খাল পার হইতে অনেক চেষ্টা করিলেন, কিন্তু ছুট অথ কিছুতেই অগ্রসর হইল না। ইহার মধ্যে কয়েক জন ইংরেজ অশ্বারোহী তাঁহাকে আক্রমণ করিল। কিয়ৎক্ষণ রাণীর সহিত তাহাদের অসিযুদ্ধ হইল। একজন প্রতিপক্ষের অসির আঘাতে রাণীর মস্তকের দক্ষিণ ভাগ বিচ্ছিন্ন হইল। ইহার পরেও আঘাতকারী তাঁহার বক্ষঃস্থলে সঙ্গীনের আঘাত করিল। এইরূপে আহত হইয়াও, রাণী তাহার প্রাণনাশ করিলেন। অতঃপর তাঁহার ইঙ্গিতক্রমে তদীয় বিশ্বস্ত অমুচর সর্দার রামচন্দ্র রাও দেশমুখ তাঁহাকে নিকটবর্তী একটি পর্ণশালায় লইয়া গেলেন। কুটীরস্বামী গঙ্গাধর বাবাজী পবিত্র গঙ্গাজল দিয়া, তাঁহার অস্তিম পিপাসাশান্তি করিলেন। মুহূর্ত্তকাল পরে এই পর্ণ-কুটীরে, প্রতিপক্ষের এইরূপ অস্ত্রাঘাতে তাঁহার অস্তিম কাল আসন্ন হইল। তিনি প্রাণাধিক স্নেহের ধন গঙ্গাধর রাওয়ের মুখের দিকে এক বার গভীর স্নেহভরে দৃষ্টিপাত করিয়া, অনন্ত নিদ্রায় অভিভূত হইলেন। \*

এইরূপে ঝাঁপীর চিরপ্রসিদ্ধ রাণীর দেহাত্ম্য হইল। বীররমণী তেইশ বৎসর বয়সে যেরূপ সাহস, যেরূপ বীরত্ব দেখাইয়াছিলেন, তাহাতে তদীয় প্রতিপক্ষ বীরপুরুষদিগেরও যার পর নাই বিশ্বয় জন্মিয়াছিল। সেনাপতি স্যার হিউ রোজ্ রাণীর সম্বন্ধে লিখিয়াছিলেন যে, যদিও তিনি নারী, তথাপি বিপক্ষদের মধ্যে তাঁহার সর্বাপেক্ষা অধিক দক্ষতা ছিল।† অল্প-বয়স্কা বীরান্ননার বীরত্ব এইরূপে ইংরেজ সেনাপতির নিকটেও প্রশংসার বিষয় হইয়াছিল। এইরূপ বীরত্বে মুগ্ধ হইয়া, ইংরেজ সেনানায়কগণ, বোধ হয়, তাঁহাকে জীবিতাবস্থায় ধরিবার চেষ্টা করিয়াছিলেন। কিন্তু তাঁহাদের চেষ্টা ব্যর্থ হয়। রাণী পুরুষবেশে সজ্জিত থাকাতে, যে ইউরোপীয় অশ্বারোহী তাঁহার পশ্চাক্রাবিত হইয়া, তৎপ্রতি অস্ত্রাঘাত করে, সেও তাঁহাকে চিনিতে পারে নাই। যাহা হউক, ইংরেজসৈন্য, রাণীর দেহ স্পর্শ করিতে না পারে, এই জন্ত রামচন্দ্র

\* রাণীর দুইটি পরিচারিকা—মুন্দরা ও কাশী, তাঁহার স্যায় বীরপুরুষের বেশে সজ্জিত হইয়া, যুদ্ধক্ষেত্রে উপস্থিত ছিল।

† *Martin, Indian Empire. Vol. II., p., 489.*

রাও নিকটবর্তী স্তূপীকৃত শুষ্ক তৃণরাশির মধ্যে চিতা রচনা পূর্বক তাঁহার দেহ স্থাপন করেন । অগ্নিসংযোগে দেখিতে দেখিতে ত্রয়োবিংশতিবর্ষীয়া লাবণ্যময়ী বীরাজনার দেহ ভস্মীভূত হইয়া যায় ।\*

মালিসন্ সাহেব এই বীররমণীর বিষয়ে লিখিয়া গিয়াছেন যে, ইংরেজদিগের চক্ষে রাণীর দোষ যেরূপই দেখা যাউক না কেন, তাঁহার স্বদেশীয়গণ চিরকাল তাঁহাকে এই জন্ত স্মরণ করিবে যে, ইংরেজের অবিচার তাঁহাকে বিদ্রোহে প্রবর্তিত করিয়াছিল, তিনি তাঁহার দেশের জন্ত প্রাণধারণ করিয়াছিলেন— দেশের জন্তই প্রাণত্যাগ করিয়াছেন । † রাণী প্রতিহিংসার আবেগে অস্ত্র-ধারণ করিতে পারেন, কিন্তু তিনি যে শক্তি দেখাইয়াছেন, তাঁহার প্রতিপক্ষ-গণ বা তাঁহার চরিত্রসমালোচকগণের মধ্যে কেহই সেই মহাশক্তির প্রতি অসম্মান প্রকাশ করেন নাই ।

১৮ই জুন গোয়ালিয়রের মহারাজের অবস্থিতিস্থল লঙ্কর এবং ফুলবাগ অধিকৃত হয় । ঐ দিন রাত্ৰিকালে বিপক্ষগণ দুর্গ পরিত্যাগ পূর্বক স্থানান্তরে গমন করে । ২০শে জুন মহারাজ জয়াজী রাও শিন্দে আপনার রাজধানীতে প্রত্যাভর্তন করেন ।

আর দামোদর রাও ? যে বালক লক্ষ্মী বাঈর প্রাণাধিক ধন ছিল । স্নেহময়ী মাতার প্রাণত্যাগের পর তাহার অদৃষ্টে কি ঘটিল ? দামোদর রাও কতিপয় বিশ্বস্ত অনুচরের সহিত জঙ্গলে আশ্রয়গোপন করেন । নিবিড় অরণ্য তাঁহার আশ্রয়স্থল, আরণ্য বৃক্ষ শীতাতপ ও বাতবৃষ্টির পরাক্রম হইতে তাঁহার রক্ষার প্রধান সহায় হইয়া উঠে । এইরূপ কষ্টে দুই বৎসর অতিবাহিত হয় । অতঃপর দামোদর রাও ইংরেজের হস্তে পতিত হইলেন । ইন্দোরের তদানীন্তন রেসিডেন্ট স্যার রিচমণ্ড্ সেক্সপীয়ার তাঁহার প্রতি সৌজন্যপ্রকাশে পরাধুখ হইলেন নাই । রেসিডেন্টের নিয়োগক্রমে একজন কাশ্মীরী ব্রাহ্মণের ( ইনি রেসিডেন্টের মুন্সী ছিলেন ) প্রতি তাঁহার শিকার ভার সমর্পিত হয়, এবং

\* কেহ কেহ লিখিয়াছেন, প্রতিপক্ষের বন্দুকের গুলিতে রাণী দেহত্যাগ করেন । কিন্তু বিশ্বাস্য প্রমাণ অনুসারে অসির আঘাতে তাঁহার দেহত্যাগ হয় ।

† Malleon, *Indian Mutiny*. Vol. III., p. 221.

রেসিডেন্টের প্রস্তাব অনুসারে গবর্নমেন্ট তাঁহার মাসিক দেড় শত টাকা বৃত্তি নির্ধারণ করেন। অতঃপর রাজপ্রতিনিধি লর্ড নর্থক্রুক তাঁহার দৈন্যদশা শ্রবণে দয়ার্ভ হইয়া, তদীয় ঋণপরিশোধের জন্ত দশ হাজার টাকা দেন। তাঁহার বৃত্তিও দেড় শত টাকার স্থলে দুই শত টাকা নির্ধারিত হয়। কাঁশী রাজ্যের সহিত গঙ্গাধর রাওয়ের যাবতীয় স্বেপার্জিত সম্পত্তি গবর্নমেন্ট গ্রহণ করিয়াছেন। তাঁহার পুত্র এখন মাসিক দুই শত টাকা বৃত্তিভোগী হইয়া, ইন্দোরে অবস্থিতি করিতেছেন। লক্ষ্মী বাঈ গবর্নমেন্টের বিরুদ্ধে অস্ত্র ধারণ করিয়াছিলেন। গবর্নমেন্ট সকল দিক দেখিয়া, তাঁহার পুত্রকে আশ্রয় দিতে বিমুখ হইয়েন নাই।

## দ্বিতীয় অধ্যায় ।

### ঝাঁশীর পার্শ্ববর্তী স্থান ।

নওগাঁর সিপাহীদিগের উত্তেজনা—তত্রত্য ইউরোপীয়দিগের পলায়ন—ভাঁহাদের সহিত বিশ্বস্ত সিপাহীদিগের গমন—পথে ভাঁহাদের দুর্দশা—ভাঁহাদের প্রতি ছত্রপুরের রাণী এবং চিরুকারির রাজার সদ্যবহার—বাঁদার ঘটনা—নাগোদের বিশ্বস্ত সিপাহী—গলাতকদিগের নাগোদে উপস্থিতি ।

ঘটনাচক্রের অনিবার্য্য আবর্তনে, নিয়তির অপ্রতিবিধেয় পরাক্রমে যেক্রমে ঝাঁশীর চিরপ্রসিদ্ধ রাণীর সমগ্র পার্থিব বন্ধন বিচ্ছিন্ন হয়, তাহা পূর্বে উক্ত হইয়াছে। ঝাঁশীর সিপাহীদিগের মধ্যে যখন উত্তেজনার আবির্ভাব হয়, তখন পার্শ্ববর্তী অন্যান্য স্থানে যাহা ঘটিয়াছিল, তাহা এই স্থলে সংক্ষেপে বিবৃত হইতেছে ।

ঝাঁশীর প্রায় দুই শত মাইল পূর্বে নওগাঁ অবস্থিত । ঝাঁশীতে যে বার-সংখ্যক পদাতিদল ছিল, তাহার একাংশ নওগাঁতে অবস্থিতি করিতেছিল । এতদ্ব্যতীত ১৪ সংখ্যক অনিয়মিত অশ্বারোহিদলের একাংশ এবং কতিপয় গোলন্দাজ সৈন্য ছিল । মেজর কির্কে নামক সৈনিক পুরুষ নওগাঁর সৈনিকের অধ্যক্ষ ছিলেন । ১৮৫৭ অব্দের ৩০শে মে পর্য্যন্ত এই সৈনিকদলের মধ্যে কোন-রূপ অশান্ত্যভাব লক্ষিত হয় নাই । ক্রমে মে মাস অতিবাহিত হয় । জুনের প্রথর আতপতাপের সহিত সিপাহীদিগের স্নিগ্ধভাবও অপগত হইতে থাকে । ৫ই জুন নওগাঁর অধিনায়ক সমগ্র সৈনিককে কাওয়াজের ক্ষেত্রে একত্র করিয়া, তাহাদের বিশ্বস্ততা ও প্রভুভক্তির সুখ্যাতি করেন । সিপাহীরা অধিনায়কের মুখে আপনাদের প্রশংসাবাদ শুনিয়া, আহ্লাদে এরূপ উন্মত্ত হয় যে, গোলন্দাজেরা কামান চালাইবার উপক্রম করে । পদাতিগণ অস্ত্রাদি লইয়া সজ্জিত হইতে থাকে । অশ্বারোহিগণ নিমকের মর্যাদা রক্ষার জন্ত সবিশেষ আগ্রহ প্রকাশ করে । আফিসরগণ ইহা দেখিয়া সন্তুষ্ট হইলেন । কিন্তু এই প্রগাঢ় প্রশান্ত্যভাব ও রাজভক্তির আতিশয্য যে, গভীর উত্তেজনার পূর্বসূচনা স্বরূপ, আফিসরেরা তাহা বুঝিতে পারিলেন না । কয়েক দিন বিনা গোলযোগে অতিবাহিত হইল । ১০ই জুন ঘোরতর বিপদের চিহ্ন পরিস্ফুট হইল । একজন দীর্ঘকায় শিখ দুই জন অনুচরের সহিত, যে স্থানে সিপাহীদিগের পাহারা বদল হয়, সেই স্থানে গিয়া, সহসা হাবেলদারকে গুলির আঘাতে বধ করিল । অতঃপর সৈনিক-



নিবাসের দিকে বন্দুকের ধ্বনিতে স্পষ্ট প্রকাশ পাইল যে, আফিসরদিগের বিশ্বস্ত সিপাহীদিগের মধ্যে গভীর অবিশ্বাসের সঞ্চার হইয়াছে। যাহারা ইতঃপূর্বে কাওয়াজের ক্ষেত্রে আপনাদের প্রভুভক্তির পরিচয় দিয়াছিল, তাহারা প্রভুর বিপক্ষতাচরণে দৃঢ়প্রতিজ্ঞ হইয়াছে।

এখন পলায়ন ব্যতীত অল্পসংখ্যক ইউরোপীয়দিগের আশ্রয়স্থান আর কোন উপায় রহিল না। অতীত কালের সৌজন্য ও সদাশয়তার কথা, ভবিষ্যতে পুরস্কারের প্রতিশ্রুতি, এ সময়ে কার্যকর হইবে বলিয়া, কেহই মনে করিলেন না। সুতরাং ইংরেজ আফিসরগণ সর্বপ্রকার চেষ্টায় বিরত হইয়া, স্থান-পরিত্যাগের আয়োজন করিলেন। বালকবালিকাগণ ও কুলমহিলারা তাঁহাদের অধিকতর চিন্তার কারণ হইল। ৮৭ জন বিশ্বস্ত সিপাহী এই পলায়ন-কারীদিগের রক্ষক হইল। পলাতকগণ প্রথমে এলাহাবাদে যাইতে ইচ্ছা করিয়াছিলেন। কিন্তু পথে নানারূপ বিপদ আছে ভাবিয়া, কলিঙ্গর ও মীর্জাপুরের দিকে প্রস্থান করিলেন। পথে ইঁহাদের যাতনার একশেষ হইয়াছিল। ইঁহাদের মধ্যে যাহারা জীবিত ছিলেন, তাঁহারা বিশদভাবে আপনাদের গভীর মর্শবেদনার বর্ণনা করিয়া গিয়াছেন। সিপাহীদিগের উত্তেজনাকালে মেজর কিরকের মস্তিষ্ক বিকৃত হইয়াছিল। এখন চা ও সুরার অভাবে তাঁহার তেজস্বিতা অন্তর্হিত হইল। তিনি সময়ে সময়ে আশ্রয়ের কথা বলিতে লাগিলেন, সময়ে সময়ে কোন কোন পদার্থ এ ভাবে খাইতে লাগিলেন যে, উহা যেন তাঁহার জীবনস্বরূপ। তিনি আপনার উপাদেয় পানীয় ও আহারীয় আনিবার জন্য নওগাঁতে দুই জন সৈনিক কর্মচারীকে পাঠাইয়া দিলেন। সময়ে সময়ে অসমর্থ প্রলাপবাক্য তাঁহার মুখ হইতে বহির্গত হইতে লাগিল। পলাতকগণ প্রথমে ছত্রপুর নামক স্থানে উপস্থিত হইলেন। এই জনপদ লর্ড ডালহাউসীর পররাজ্যগ্রহণবিষয়িণী রাজনীতির আক্রমণ হইতে রক্ষা পাইয়াছিল। বিধবা রাণী আপনার অপ্রাপ্তবয়স্ক পুত্রের জন্ত রাজ্য শাসন করিতেছিলেন। পলাতকদিগের প্রতি ছত্রপুরের দয়ালী রাণীর যথোচিত সৌজন্য ও সদাশয়তা প্রকাশিত হয়। পলাতকগণ ইঁহার নিকট হইতে আবশ্যিক দ্রব্যাদি প্রাপ্ত হইয়া, ঐ স্থান পরিত্যাগ করেন। ইহার মধ্যে মেজর কিরকে অদৃশ্য হইল। মস্তিষ্কের বিকৃতি প্রবৃত্ত তাঁহার বোধ হইয়াছিল যেন, সিপাহীরা তাঁহাকে মারিয়া

ফেলিবার জন্ত বড়বন্দ করিতেছে। এই কাল্পনিক ভয়ে তিনি আত্মগোপন করিয়াছিলেন। ১৬ই জুন তিনি আবার নওগাঁ হইতে প্রেরিত এক গাড়ি চা ও সুরা লইয়া, আপন দলের সহিত মিশিলেন। অতীষ্ট দ্রব্য লাভে তাঁহার কিয়ৎপরিমাণে শান্তি লাভ হইল। তাঁহারা অতঃপর বুদ্ধেলখণ্ডের অন্তর্গত চিরকারির অভিমুখে প্রস্থান করিলেন। এই স্থানের রাজা আহাৰ্য্য দিয়া, তাঁহাদিগকে পরিতোষিত করিলেন, টাকা দিয়া, তাঁহাদের অভাবমোচনের সুবিধা করিয়া দিলেন। কিন্তু এইরূপ শান্তি, এইরূপ ভূপ্তি অল্পক্ষণের জন্ত রহিল। কতকগুলি সশস্ত্র লোক তাঁহাদিগকে নিরাপদে কলিঙ্গরে পঁছছাইয়া দিবে বলিয়া, প্রতিশ্রুত হওয়াতে তাঁহারা ঐ স্থানের অভিমুখে অগ্রসর হইলেন। পরিশেষে এই সকল লোক তাঁহাদিগকে আক্রমণ করিল। তাঁহাদের কেহ কেহ ইহাদের অস্ত্রাঘাতে দেহত্যাগ করিলেন। আক্রমণকারিগণ গাড়ি গুলি অবরোধ করিয়াছিল। সুতরাং আক্রান্তগণ কেহ কেহ পদব্রজে, কেহ কেহ অশ্বারোহণে পলায়ন করিলেন। এখন মাহোবার দিকে ফিরিয়া যাওয়াই স্থির হইল। কিন্তু তাঁহাদের অধিনায়কের অদৃষ্টে ঐ স্থানে যাওয়া ঘটিল না। উপস্থিত দুর্ঘটনায় মেজর কির্কের হৃদয় অবসন্ন হইয়া পড়িয়াছিল। কয়েক মাইল পথ যাওয়ার পরেই তিনি অশ্ব হইতে ভূপতিত ও গতাস্থ হইলেন।

কাপ্তেন স্কট এখন পলাতকদিগের অধিনায়ক হইলেন। ইনি মেজর কির্কে অপেক্ষা অল্পবয়স্ক এবং চা ও মদিরার প্রতি অল্পমুরাগী ছিলেন। রক্ষণীয় লোকদিগের সুবিধার জন্ত ইঁহার যত্ন ও উত্তমের একশেষ দেখা যাইতে লাগিল। কিন্তু এ সময়ে মৃত্যু অনিবার্য্য ছিল। জুন মাসের সূর্য্যতাপ এমন অসহনীয় হইয়া উঠিল যে, উহাতে অনেকে উন্নত হইয়া উঠিল। মৃত্যু অনেকের জালা-যন্ত্রণার শান্তি করিল। গতাস্থ দেহগুলি পথের পার্শ্বে পড়িয়া রহিল। এইরূপ দুঃসহ কষ্ট ভোগের পর অবশিষ্ট পলাতকগণ আজীগড়ের অভিমুখে অগ্রসর হইতে লাগিলেন। আজীগড়ের রাণী এবং বাদার নবাব এই দুঃসময়ে ইঁহাদের সবিশেষ সাহায্য করেন। ইঁহাদের সাহায্য না পাইলে, প্রায় সকলকেই জীবনের আশার বিসর্জন দিতে হইত। কেবল ইঁহারাই নিরতিশয় দুর্দশাগ্রস্ত পলাতকদিগের জীবন রক্ষা করেন। \*

\* Malleon, Indian Mutiny. Vol. I., p, 196-197.

এস্থলে বাঁদার ঘটনা সংক্ষেপে বলা যাইতেছে। অন্ত্যান্ত স্থানের ঞায় বাঁদাতেও সৈনিকনিবাস ছিল। এই স্থলের ৫৬ সংখ্যক পদাতিদল নওগাঁর সংবাদ শুনিয়া, ১৪ই জুন ব্রিটিশ গবর্ণমেন্টের বিরুদ্ধে নবাবের সৈন্তের সহিত সন্মিলিত হয়। ইহারা ধনাগার লুণ্ঠন করে। এই সময়ে নবাব ইংরেজ আফিসরদিগের জীবন রক্ষা করেন। অন্ত্যান্ত স্থান হইতে যে সকল পলাতক উপস্থিত হইয়াছিলেন, তাঁহারাও ইঁহার চেষ্টায় নিরাপদ হইলেন। কিন্তু শেষে ঘটনাচক্রে পড়িয়া, নবাব গবর্ণমেন্টের বিরোধী হইয়া উঠেন। তিনি যে, রাও সাহেব এবং তাত্যা টোপের সহিত সন্মিলিত হইয়াছিলেন, তাহা পূর্বে উক্ত হইয়াছে।

বুন্দেলখণ্ডের অন্তর্গত যে যে স্থানে সৈনিকনিবাস ছিল, তৎসমুদয়ের প্রায় সকল গুলিতেই সিপাহীদিগের উত্তেজনা পরিস্ফুট হইয়াছিল। কেবল নাগোদের সিপাহীগণ প্রশান্তভাবে ছিল। যখন অন্ত্যান্ত সৈনিকনিবাসের সিপাহীগণ খ্রীষ্টধর্মাবলম্বীদিগের শোণিতপাতে উত্তত হয়, তখন নাগোদের ৫০ সংখ্যক এতদেশীয় পদাতিদল ব্রিটিশ গবর্ণমেন্টের পক্ষসমর্থনে প্রস্তুত থাকে। ইহাদের মধ্যে কেবল ১৪ জন সিপাহী অসন্তোষের চিহ্ন প্রকাশ করিয়াছিল। \*

পূর্বে উক্ত হইয়াছে যে, কতিপয় সিপাহী নওগাঁর পলাতকদিগের রক্ষক হইয়াছিল। এ সময়ে প্রায় সমগ্র জনপদে ব্রিটিশ গবর্ণমেন্টের আধিপত্য বিলুপ্ত হইয়াছিল। উত্তেজিত লোকে দিল্লীর বাদশাহের প্রাধাণ্যঘোষণা করিতেছিল। পূর্বোক্ত বিশ্বস্ত সিপাহীগণ পলাতকদিগকে খাণ্ড দ্রব্যাদি সংগ্রহ করিয়া দেওয়াতে পার্শ্ববর্তী স্থানের উত্তেজিত লোকেরা সাতিশয় অসন্তুষ্ট হইয়াছিল। সুতরাং এ সময়ে পলাতকদিগকে পরিত্যাগ করা সিপাহীদিগের শ্রেয়ঃ জ্ঞান হইল। কাপ্তেন কট্ট কোনরূপ আপত্তি না করিয়া, এই বিশ্বস্ত সিপাহীদিগকে বিশ্বস্ততার নিদর্শন-স্বরূপ প্রশংসাপত্র দিলেন। সিপাহীরা সন্তুষ্টচিত্তে এলাহাবাদের দিকে প্রস্থান করিল। পলাতকেরা নিদারুণ কষ্টে বিষণ্ণচিত্তে, আত্মীয়গণের মৃত্যুতে সন্তপ্ত-হৃদয়ে আজীগড় হইতে নাগোদে গিয়া জীবন রক্ষা করিলেন। †

\* Malleon, *Indian Mutiny*. Vol. I., p. 198.

† Kaye, *Sepoy War*. Vol. III., p. 377.

## তৃতীয় অধ্যায় ।

### তাত্যা টোপে ।

তাত্যা টোপের পশ্চাৎকাবন—তাঁহার নানা স্থানে গমন—তাঁহার অবরোধ—তাঁহার ফাঁসী ।

গোয়ালিয়র অধিকৃত এবং মহারাজ শিন্দে পুনর্বার রাজপদে প্রতিষ্ঠিত হইলে স্মার্ট হিউ রোজ্ ২২শে জুন মধ্যভারতবর্ষের সেনাপতির পদ পরিত্যাগ করেন। তিনি ছয় মাস কাল মধ্যভারতবর্ষের নানা স্থানে যুদ্ধ করিয়া, জয়লাভ করিয়াছিলেন। ব্রিগেডিয়ার-জেনেরল রবার্ট নেপিয়্যার তৎপদে প্রতিষ্ঠিত হইলেন। এদিকে তাত্যা টোপে, রাও সাহেব এবং বাঁদার নবাবের সহিত ২২শে জুন উত্তরপশ্চিম দিকে প্রস্থান করেন। শরমথুরা নামক স্থানে উপনীত হইলে তিনি জানিতে পারিলেন যে, ব্রিগেডিয়ার সাওয়ার্স তাঁহার বিরুদ্ধে সৈন্য প্রেরণ করিয়াছেন। সুতরাং তিনি জয়পুরে উপস্থিত হইবার জন্ত পশ্চিমাভিমুখে অগ্রসর হইলেন, যেহেতু তাঁহার বিশ্বাস ছিল যে, এই স্থানে, তদীয় পক্ষসমর্থনের জন্ত সৈনিকদল প্রস্তুত থাকিবে। কিন্তু ২৭শে জুন জয়পুরের পলিটিকাল এজেন্ট্ কাপ্তেন ইডেন সাহেব রাজপুতনার সেনাপতি রবার্টসের নিকটে সংবাদ পাঠান যে, পলায়িত মরাঠা সেনাপতি জয়পুরের অসম্বল্ট লোকদিগকে উত্তেজিত করিবার জন্ত চর প্রেরণ করিয়াছেন। সংবাদপ্রাপ্তি মাত্রেই রবার্টস্ ২৮শে জুন ঐ স্থানে যাত্রা করেন, এবং তাত্যা টোপের পূর্বেই তথায় উপস্থিত হইলেন। এ স্থলে বলা উচিত যে, তাত্যা টোপেকে ধরিবার জন্ত ইংরেজ সেনাপতিগণ যার পর নাই চেষ্টা করেন। এই উদ্দেশ্যে গোয়ালিয়রে একদল সৈন্য থাকে। কাঁশীতে আর এক দল প্রতিষ্ঠিত হয়। সিপ্রিতে অপর দল অবস্থিতি করে। গুণাতে চতুর্থ দল সমাবেশিত হয়। নসিরাবাদে পঞ্চম দল। এই উদ্দেশ্যসাধনে অভিনিবিষ্ট থাকে। ভরতপুরে ষষ্ঠ দল সন্নিবেশিত হয়। এতদ্ব্যতীত অগ্ৰাণ্ড স্থানেও ভিন্ন ভিন্ন সৈনিকদল আপনাদের সূচতুর প্রতিপক্ষকে হস্তগত করিবার জন্ত সর্বদা সতর্কভাবে অবস্থিতি করিতে থাকে। এইরূপে তাত্যা টোপে যে দিকে প্রস্থান করিবেন,

যে স্থানে উপনীত হইবেন, যে জনশূণ্য নিবিড় জঙ্গলে আশ্রয় গ্রহণ করিবেন, সেই দিক, সেই জনপদ, সেই জনশূণ্য স্থান বিভিন্ন ইংরেজ সৈনিকদলের পর্যবেক্ষণের বিষয়ীভূত হয়। কিন্তু এই মরাঠা সেনাপতি একরূপ ক্ষমতাপন্ন, একরূপ বুদ্ধি-কৌশলসম্পন্ন, একরূপ রণচতুর ছিলেন যে, নয় মাসেরও অধিক কাল তাঁহার সমক্ষে ইংরেজ সেনাপতিদিগের যাবতীয় চেষ্টা ব্যর্থ হয়। চারি দিকে সৈনিকদলে পরিবেষ্টিত থাকিলেও, তিনি কখন এক জনপদ হইতে আর এক জনপদে পদার্পণ করেন, কখন নিবিড় জঙ্গলে আত্মগোপনে উদ্ভূত হইয়েন, কখন সহস্র সৈন্য ও কামান সংগ্রহ করিয়া, প্রতিপক্ষের পরাক্রমস্পর্শী হইয়া উঠেন, তাহা ইংরেজ সেনাপতিদিগের কাহারও গোচর হয় নাই। পূর্বে উক্ত হইয়াছে যে, ইংরেজ সেনাপতি জয়পুরের অভিমুখে অগ্রসর হইয়াছিলেন। কিন্তু তাত্যা টোপে এই সংবাদ পাইয়া, জয়পুরের পরিবর্তে দক্ষিণদিকে প্রস্থান পূর্বক টঙ্কে উপনীত হইয়েন। কর্ণেল হলমেস্ তাঁহার পশ্চাৎকাবিত হইয়েন। তাত্যা টোপে মধুপুর এবং ইন্দ্রগড়ের দিকে যাত্রা করেন। এই সময়ে প্রবলবেগে বৃষ্টিপাত হওয়াতে চঞ্চলনদের জল বৃদ্ধি হইয়াছিল, সুতরাং তাত্যা টোপে ইন্দ্রগড় হইতে নদ পার হইতে না পারিয়া দক্ষিণপূর্বাভিমুখে প্রস্থান পূর্বক বুঁদীতে উপনীত হইয়েন। বুঁদীর মহারাও রাম সিংহ তাঁহার পক্ষসমর্থন না করিয়া, দুর্গ দ্বার অবরুদ্ধ করেন। তাত্যা টোপে অবিলম্বে সেই স্থান পরিত্যাগ পূর্বক দক্ষিণ দিকে যাত্রা করেন। এই আগষ্ট কোটারিয়া নদীর তীরে ভিলবারা নামক স্থানে তাঁহার সহিত সেনাপতি রবার্ট্‌সের যুদ্ধ হয়। তিনি আপনার সৈন্য ও কামান লইয়া, অক্ষতশরীরে যুদ্ধস্থল পরিত্যাগ করেন। এই যুদ্ধে চতুর মরাঠা সেনাপতি সর্বিশেষ বুদ্ধিচাতুরীর পরিচয় দিয়াছিলেন। তাঁহার সৈনিকদলের একাংশ বিপক্ষদিগকে ক্রমাগত বাধা দিতে থাকে। এদিকে সৈনিকদলের প্রধান অংশ কামান লইয়া নদী পার হয়। সে সময়ে অশ্বারোহী সৈন্য না থাকাতে রবার্ট্‌স, তাত্যা টোপের পশ্চাৎকাবিত হইতে পারেন নাই। পর দিন অশ্বারোহী সৈন্য উপস্থিত হয়। ইংরেজ সেনাপতি পশ্চাৎকাবনে প্রবৃত্ত হইয়েন। এদিকে তদীর সুচতুর প্রতিপক্ষ তাঁহার হস্তপরিভ্রষ্ট হইয়া পড়েন।

তাত্যা টোপে স্বধর্ম্মে নিষ্ঠাবান ছিলেন। তিনি ১৩ই আগষ্ট নাথদ্বার নামক স্থানে দেবদর্শনে গমন করেন। নিশীথকালে তীর্থস্থান হইতে প্রত্যাগত হইয়া,

শুনিতে পাইলেন যে, ইংরেজসৈন্য তাঁহার নিকটবর্তী হইয়াছে । এজন্য তিনি স্থানান্তরে প্রস্থানে কৃতসঙ্কল্প হইলেন । কিন্তু তাঁহার পদাতিগণ একান্ত পথক্রান্তি প্রযুক্ত বিশ্রাম করিবার অভিপ্রায় প্রকাশ করে । তাহারা কহে যে, পর দিন প্রাতঃকালে কামানগুলি তাহাদের সঙ্গে যাইবে । অশ্বারোহীদিগের যেরূপ ইচ্ছা, সেইরূপ করিতে পারে । সুতরাং যুদ্ধ করা ভিন্ন তাত্যা টোপের আর কোন গতি রহিল না ।

পর দিন প্রাতঃকালে তাত্যা টোপে অধ্যুষিত স্থানের অবস্থা বিবেচনা করিয়া, যে ভাবে সৈন্য সন্নিবেশিত করা উচিত, তাহা করিলেন । এ বিষয়ে তাঁহার পক্ষে কোনরূপ কৌশল বা কোনরূপ বুদ্ধিচাতুরীর অভাব লক্ষিত হইল না । ১৪ই আগষ্ট বেলা ৭টার সময়ে বনাস নদীর তীরে তাঁহার সহিত ইংরেজ সেনাপতির যুদ্ধ আরম্ভ হইল । কিন্তু তদীয় সৈনিকদল প্রতিপক্ষের পরাক্রম-নাশে সমর্থ হইল না । তাত্যা টোপে চারিটি কামান ফেলিয়া, যুদ্ধস্থল পরিত্যাগ করিলেন । তিনি চম্বল নদ পার হইবেন ভাবিয়া, একজন ইংরেজ সেনানায়ক ঐ নদের অভিমুখে অগ্রসর হইলেন । কিন্তু এই অধিনায়ক নদের তটে উপনীত হইয়া দেখিলেন যে, তটবিভাগে কয়েকটি অকর্ম্মণ্য টাটু মাত্র রহিয়াছে । অপর তটবর্তী আম্রকাননের মধ্যে বিপক্ষগণ অদৃশ্য হইয়া গিয়াছে । ইংরেজ অধিনায়কের প্রয়াস বিফল হইল । স্মৃচতুর মহারাষ্ট্রীয় বীর তাঁহার হস্ত হইতে স্থলিত হইলেন ।

তাত্যা টোপে চম্বল পার হইয়া, ঝালবার প্রদেশের রাজধানী ঝালরপত্তনে পঁহুছিলেন । প্রসিদ্ধ জলিম সিংহের বংশধর পৃথীসিংহ এই সময়ে ঝালরপত্তনের অধিপতি ছিলেন । ব্রিটিশ গবর্ণমেন্টের প্রতি তাঁহার অপরিসীম অমুরাগ ছিল । তিনি মরাঠা সেনাপতিকে নিষ্কাশিত করিবার জন্ত আপনার সৈনিকদল একত্র করিলেন । কিন্তু এই সৈনিকেরা গোয়ালিয়রের সৈনিকদলের স্তায় ব্যবহার করিল । তাহারা আপনাদের অধিপতির পক্ষ সমর্থন না করিয়া, আক্রমণকারী মরাঠা সেনাপতির পার্শ্বে দণ্ডায়মান হইল । তাত্যা টোপে রাণার কামান, গোলাগুলি, ঘোটক, বলদ প্রভৃতি অধিকার পূর্বক তাঁহার প্রাসাদ পরিবেষ্টন করিলেন । পর দিন তাঁহার সহিত রাণার সাক্ষাৎ হইল । তিনি রাণার নিকটে যুদ্ধের জন্ত অর্থপ্রার্থনা করিলেন । রাণা পাঁচ লক্ষ টাকা

দিতে চাহিলেন । কিন্তু উহা আক্রমণকারীর নিকটে পর্যাপ্ত বোধ হইল না । রাও সাহেব, পেশওয়ারের প্রতিনিধি স্বরূপ উপস্থিত হইয়া, রাণার নিকটে পঁচিশ লক্ষ টাকা চাহিলেন । রাণা অবশেষে পনের লক্ষ টাকা দিতে চাহিলেন ; উহার মধ্যে পাঁচ লক্ষ প্রদত্ত হইল । কিন্তু রাণা সেই রাত্রিতেই রাজধানী পরিত্যাগ পূর্বক মোতে প্রস্থান করিলেন । কথিত আছে, তিনি প্রস্থানকালে রাণী এবং পরিবারের অন্যান্য লোককে কতকগুলি বারুদ দিয়া কহিয়াছিলেন যে, যদি কেহ তাঁহাদের প্রতি কোনরূপ অসদ্ব্যবহার করিতে চেষ্টা করে, তাহা হইলে এই বারুদরাশি যেন তাঁহাদের আত্মবিসর্জনের সহায় হয় ।\*

তাত্যা টোপে পাঁচ ছয় দিন ঝালরপত্তনে অবস্থিতি করেন । বর্ষার আবির্ভাবে চম্বলের পরিপুষ্টি ঘটয়াছিল । সুতরাং তাঁহার পশ্চাদ্ধাবনকারী প্রতিপক্ষের উহা সহজে পার হওয়ার সম্ভাবনা ছিল না । তিনি ঝালবারের রাজধানীতে পাঁচ দিন নিরুদ্ধে থাকিয়া, সংগৃহীত অর্থে আপনার সৈনিকদিগের বেতনাদি পরিষ্কার করেন । এই সময়ে তাঁহার সহচর রাও সাহেব এবং বাদার নবাব অপেক্ষাকৃত সাহসিককর্মসাধনে সচেষ্ট হইলেন । তাঁহারা তাত্যা টোপেকে কহেন যে, ইংরেজসৈন্যের উপস্থিতির পূর্বে যদি হোলকরের রাজধানীতে পঁছছিতে পারা যায়, তাহা হইলে তথাকার সৈনিকেরা তাঁহাদের সহিত সম্মিলিত হইতে পারে । এইরূপ সম্মিলন ঘটিলে হোলকরের প্রজাবর্গ পেশওয়ার পক্ষ-সমর্থনও করিতে পারে । রাও সাহেবের প্রস্তাব অনুসারে তাত্যা টোপে ইন্দোরের অভিমুখে অগ্রসর হইলেন । কিন্তু নলকেরা নামক স্থানে দুই দল ইংরেজসৈন্য রহিয়াছে শুনিয়া, তিনি প্রাচীরবেষ্টিত রাজগড় নগরের নিকটে শিবির স্থাপন করেন । তদীয় প্রতিপক্ষগণ কিছুতেই তাঁহার পশ্চাদ্ধাবনে নিরস্ত ছিলেন না । তাত্যা টোপে যে দিকে অগ্রসর হইতেছিলেন, তাঁহারাও সেই দিকে যাইতে-ছিলেন । একজন ইংরেজ সেনানায়ক পর দিন প্রাতঃকালে রাজগড়ে উপস্থিত হইয়া দেখিলেন যে, মরাঠা সেনাপতি আপনার সৈনিকদল লইয়া অদৃশ্য হইয়া-ছেন । ইংরেজ সেনাপতি পথমধ্যবর্তী কামানের ঢাকা ধরিয়া, অগ্রসর হইতে লাগিলেন । কিয়দূরে তিনি বিপক্ষদিগকে দেখিতে পাইয়া, আক্রমণ করিলেন ।

\* Pursuit of Tantia Topee.—Blackwood's Magazine. August 1860, p. 180.

তাত্যা টোপে কামান ফেলিয়া যুদ্ধস্থল হইতেনিষ্ক্রান্ত হইলেন । তিনি অতঃপর বেত্রবতী নদীর উভয় পার্শ্ববর্তী আরণ্য ভূভাগে কিয়ৎকাল পরিভ্রমণ করেন । শেষে পূর্বাভিমুখে প্রস্থান পূর্বক শিরোঞ্জ নামক স্থানে উপনীত হইলেন ।

বর্ষা প্রযুক্ত সমগ্র জুলাই মাস ইংরেজসৈন্যের বিশ্রামস্থলে অতিবাহিত হয় । যাহা হউক, রাজগড়ে তাত্যা টোপের পরাজয়ের পর একটি অভিনব ঘটনার আবির্ভাব হয় । গোয়ালিয়রের ৪৪ মাইল দক্ষিণে নরবর অবস্থিত । এই জনপদ মহারাজ শিন্দের অধীন । নরবরের সদার মান সিংহ গোয়ালিয়রের দরবারের ব্যবহারে বিরক্ত হইয়া, উহার বিরুদ্ধে অস্ত্রধারণ করেন । তৎকর্তৃক পাওরী নামক দুর্গ অধিকৃত হয় । ইংরেজ সেনানায়ক উপস্থিত হইলে তিনি কহেন, কেবল গোয়ালিয়রের দরবারের সহিত তাঁহার যুদ্ধ ঘটিয়াছিল । ইংরেজের সহিত তাঁহার কোনরূপ বিরোধ নাই । ইংরেজ সেনাপতি উত্তর করেন, তিনি এই জনপদের শান্তিস্থাপনে নিয়োজিত হইয়াছেন । যে ব্যক্তি যে কোনরূপে হউক, শান্তির ব্যাঘাত জন্মাইবে, তিনি তাহার সহিত যুদ্ধ করিতে বাধ্য । উভয়ের কথা শেষ হইল । যুদ্ধ অনিবার্য হইয়া উঠিল । যুদ্ধস্থলে মান সিংহের পিতৃব্য অজিত সিংহ উপস্থিত হইলেন । ইংরেজ সেনানায়কের সৈন্যসংখ্যা পর্যাপ্ত ছিল না, তাঁহার সাহায্যার্থে অপর সৈন্য আসিলে, দুর্গ আক্রান্ত হইল । ২৩শে আগষ্ট রাত্রিকালে মান সিংহ এবং অজিত সিংহ নিবিড় বনভূমি দিয়া, দক্ষিণাভিমুখে প্রস্থান করিলেন । তাঁহাদের দলের কতিপয় পলাতক তাত্যা টোপের সহিত সম্মিলিত হইল ।

এ দিকে মরাঠা সেনাপতি শিরোঞ্জে আট দিন বিশ্রাম করেন, এই স্থান হইতে আরণ্য ভূভাগ দিয়া ইশাগড়ে উপস্থিত হইলেন । উক্ত স্থলে রসদ প্রভৃতি সংগৃহীত হয় । অতঃপর তাত্যা টোপে চন্দ্রির দুর্গ আক্রমণ করেন । মহারাজ শিন্দের একজন অনুগত সেনানায়ক এই দুর্গ রক্ষা করিতেছিলেন । তিনি কিছুতেই তাত্যা টোপের বশীভূত হইলেন না । তাত্যা টোপে বিফল-মনোরথ হইয়া, মঙ্গ্রাওলীর অভিমুখে প্রস্থান করেন । এই স্থানে তাঁহার সহিত ইংরেজ সেনানায়কের কিয়ৎক্ষণ যুদ্ধ হয় । তিনি কামান ফেলিয়া, অক্ষতদেহে পলায়ন করেন । ইহার পর তাত্যা টোপে বেত্রবতী উত্তীর্ণ হইয়া, প্রথমে জাক্লোন, তৎপরে ললতপুরে উপনীত হইলেন । এই স্থানে তাঁহার সহিত রাও



সাহেবের সাক্ষাৎ হয়। তাত্যা টোপে ললতপুরে অবস্থিতি করেন। রাও সাহেব পর দিন আপনার কামান ও সৈন্য লইয়া, অতিকষ্টে জাকুলোনের নিবিড় জঙ্গল অতিক্রম পূর্বক বেত্রবতীর প্রায় ত্রিশ মাইল পূর্বে একটি জনপদে উপনীত হইলেন। ইংরেজ সেনাপতি তাঁহাকে আক্রমণ করেন। রাও সাহেব যুদ্ধস্থল পরিত্যাগ পূর্বক, পুনর্বার ললতপুরে তাত্যা টোপের সহিত সাক্ষাৎ করেন।

ইহার পর কি করিতে হইবে, নির্দ্ধারণের জন্ত উভয় সেনাপতি পরামর্শ করেন। নর্মদার উত্তরদিকবর্তী জনপদের পথ তাঁহাদের সমক্ষে অবরুদ্ধ ছিল। ইংরেজ সেনাপতিগণ নানা স্থানে উপস্থিত হওয়াতে, তাঁহাদের পরিক্রমণের স্থল ক্রমেই সঙ্কীর্ণ হইয়া পড়িয়াছিল। সুতরাং তাঁহারা নর্মদার উত্তর দিকে না থাকিয়া, আপনাদের পরিক্রমণের স্থল ভেদ পূর্বক ঐ নদীর দক্ষিণ দিকে গমনে কৃতসঙ্কল্প হইলেন। ইংরেজ সেনাপতিগণ চারি দিকে তাঁহাদের অনুসন্ধান করিতেছিলেন। ইঁহাদের হস্ত হইতে নিষ্ফ্রতিলাভ পূর্বক, দক্ষিণাভিমুখে গমন করা দুঃসাধ্য ছিল। কিন্তু তাঁহারা এই দুঃসাধ্যসাধনে সচেষ্ট হইলেন।

তাত্যা টোপে এবং রাও সাহেব ললতপুর পরিত্যাগ করিলেন। ইংরেজ সেনাপতিগণ চারি দিকে ইঁহাদের গন্তব্যপথের নির্ণয়ের জন্ত যার পর নাই চেষ্টা করিতেছিলেন। নদী উত্তরণের স্থলে, নিবিড় জঙ্গলের প্রান্তভাগে, জনপূর্ণ লোকালয়ে, যে স্থানে তাঁহাদের সূচতুর বিপক্ষের গমনের সম্ভাবনা ছিল, তাঁহারা সেই স্থানই অবরোধ করিবার চেষ্টা করিতেছিলেন। কিন্তু তাঁহাদের চেষ্টা ব্যর্থ হইল। রাও সাহেব ও তাত্যা টোপে নর্মদা উত্তীর্ণ হইলেন। পরাক্রান্ত পেশওয়েগণ যে প্রদেশে এক সময়ে আপনাদের অসীম প্রতিপত্তি ও প্রাধান্য রক্ষা করিয়াছিলেন, এখন সেই প্রদেশে তাঁহাদের আত্মীয় পদার্পণ করিলেন। নানা সাহেবের সেনাপতি এবং তাঁহার ভ্রাতার আগমনে বোম্বাই প্রেসিডেন্সি আন্দোলিত হইল। কিন্তু গবর্নর লর্ড এলফিনষ্টোন শান্তিরক্ষায় উদ্যোগী ছিলেন। মাদ্রাজের গবর্নর লর্ড হারিস্ ও বিপ্লবের নিবারণে চেষ্টা করিতেছিলেন। যাহাহউক, তাত্যা টোপের পথ অবরুদ্ধ রহিল না। তাত্যা টোপে এক বার নর্মদা উত্তীর্ণ হইলেন। ইংরেজসৈন্য আসিতেছে শুনিয়া, তিনি পুনর্বার নর্মদা পার হইয়া গাইকবাড়ের রাজ্যে যাইতে প্রস্তুত হইলেন। কারগাঁ নামক স্থানে তিনি এক-

জন ইংরেজ সেনাপতি কর্তৃক আক্রান্ত হইলেন । কিন্তু এই সেনানায়ক তাঁহাকে অবরুদ্ধ করিতে পারিলেন না । তিনি বরোদার অভিমুখে ৫০ মাইল পথ অতিক্রম করিয়াছেন, এমন সময়ে পশ্চাদ্ধাবনকারী ইংরেজসৈন্যকে সমীপাগত জানিয়া, তিনি আবার নর্মদা পার হইয়া ছোট উদয়পুরে উপস্থিত হইলেন । এই স্থানে এক জন সেনাপতি তাঁহাকে আক্রমণ করিলেন, কিন্তু তিনি ধৃত হইলেন না । বাণেশ্বরের নিবিড় অরণ্য এখন তাঁহার আশ্রয়স্থল স্থল হইল । ইংরেজ সেনাপতি এই স্থানে উপস্থিত হইলে, তিনি এই অরণ্য ভূভাগও পরিত্যাগ পূর্বক সাহসসহকারে উদয়পুরের অভিমুখে যাত্রা করিলেন । আরাবলী পর্বতমালার আশ্রয়ে, তিনি কিয়ৎকাল বিশ্রাম করিতে পারিতেন, কিন্তু অপর একজন ইংরেজ সেনাপতি পথে উপস্থিত হওয়াতে, তিনি পুনর্বার অরণ্যে প্রত্যাবৃত্ত হইলেন, অনন্তর সহসা জঙ্গল হইতে বহির্গত হইয়া, মুন্দেশ্বরের অভিমুখে যাত্রা করিলেন । এই স্থানের ছয় মাইল দূরে রাত্রি যাপন করিয়া, তাত্যা টোপে তিন দিনে নীমচের এক শত মাইল দূরে জীরাপুর নামক স্থানে উপস্থিত হইলেন । ইংরেজসৈন্য কিছুতেই তাঁহার পশ্চাদ্ধাবনে নিরস্ত ছিল না । তিনি জীরাপুরে স্থিরভাবে থাকিতে না পারিয়া, বড়োদ নামক স্থানে পলায়ন করিলেন ।

তাত্যা টোপে অতঃপর দীশায় উপনীত হইলেন । ইংরেজ সেনাপতি চরমুখে এই সংবাদ পাইয়া, তাঁহাকে আক্রমণ করেন । রাও সাহেব এবং ফিরোজ শাহ তাঁহার সহিত ছিলেন । তাঁহারা আশ্চর্য্যরূপে প্রতিপক্ষের হস্ত হইতে নিষ্কতি লাভ করিলেন । তাত্যা টোপের কোশলে ইংরেজ সেনানায়কের চেষ্টা ব্যর্থ হইল । তাত্যা টোপে মুক্তি লাভ করিলেন বটে, কিন্তু কোন্ দিকে যাইবেন, কোন্ স্থানে উপস্থিত হইবেন, তাহা সহসা ঠিক করিতে পারিলেন না । প্রায় সমস্ত পথ অবরুদ্ধ হইয়াছিল । কেবল তাঁহার সমক্ষে জয়পুর দিয়া মারবাড়ের দিকের পথ বিমুক্ত ভাবে ছিল । তাঁহারা এই পথ অবলম্বন করিলেন, এবং আলবার অতিক্রম পূর্বক ২১শে জানুয়ারি সকলে সিকার নামক স্থানে উপস্থিত হইলেন । একজন ইংরেজ সেনানায়ক সংবাদ পাইয়া, তাঁহাদিগকে আক্রমণ করিলেন । এই আক্রমণে তাত্যা টোপের সৈনিকদল বিচ্ছিন্ন হইয়া গেল । যুদ্ধের দিন ফিরোজ শাহ তাত্যা টোপেকে পরিত্যাগ করিলেন । বাণেশ্বরে জঙ্গলে তাত্যা টোপের

সহিত রাও সাহেবের অসম্ভাব ঘটয়াছিল। এখন সেই অসম্ভাব বিবাদে পরিণত হইল। কথিত আছে, তাত্যা টোপে একান্ত শান্ত হইয়া পড়িয়াছিলেন। যেখানে স্মবিধা ঘটিল, সেখানেই তিনি রাও সাহেবকে ছাড়িয়া যাইতে বাধ্য হইতেন। রাও সাহেব এখন তাঁহাকে পরিত্যাগ পূর্বক আপনার অনুচরদিগকে সঙ্গে লইয়া, প্রস্থান করিলেন। এতদিন রাও সাহেব, ফিরোজ শাহ, মান সিংহ এবং অজিত সিংহ তাত্যা টোপের সহযোগী ছিলেন। এখন ফিরোজ শাহ অদৃশ্য হইলেন। আর তাঁহার কোন সংবাদ পাওয়া গেল না। তাত্যা টোপের সহিত বিচ্ছিন্ন হইয়া, রাও সাহেব ভিন্ন ভিন্ন স্থানে পদার্পণ করিলেন বটে, কিন্তু শেষে তিনিও ফিরোজ শাহের গায় চির দিনের জন্ত প্রতিপক্ষের দৃষ্টিপথবহির্ভূত হইয়া পড়িলেন। অবশিষ্ট তিন জনের কথা সংক্ষেপে বর্ণনীয়। তাত্যা টোপে আপনার সৈন্য পরিত্যাগপূর্বক পারণ নামক স্থানের নিবিড় অরণ্যে প্রস্থান করিলেন। এই সময়ে দুই জন পাচক ব্রাহ্মণ, একজন সহিস, দুইটি ঘোড়া, এবং একটি টাটু তাঁহার সঙ্গে ছিল। শেষে সহিস তাঁহাকে ছাড়িয়া গেল। এইরূপ অবস্থায় সেই নিবিড় অরণ্যে মান সিংহের সহিত তাঁহার সাক্ষাৎ হইল। মান সিংহ কহিলেন—“আপনি সৈনিকদিগকে ছাড়িয়া দিলেন কেন? এ কাজ আপনার ভাল হয় নাই।” তাত্যা টোপে উত্তর করিলেন, “নানা স্থানে ধাবিত হওয়াতে একান্ত শান্ত হইয়া পড়িয়াছি। এখন ভালই করি, মন্দই করি, তোমার সঙ্গে থাকিব।” পরিশ্রান্ত মরাঠা সেনাপতি পরিতপ্তহৃদয়ে মান সিংহকে এই কথা কহিলেন।

কিন্তু তাত্যা টোপে যঁহাকে আপনার প্রধান সহায় ভাবিলেন, যঁহার সহিত একত্র অবস্থিতি করিতে লাগিলেন, তিনি বন্ধুজনোচিত বিশ্বস্ততা দেখাইলেন না। মান সিংহ বন্ধুকে ধরিবার জন্ত ইংরেজ সেনানায়ক মীডের সহিত পরামর্শ করিতে লাগিলেন। মান সিংহ পরিবারবর্গের সহিত ইংরেজের হস্তে আত্ম-সমর্পণ করিয়াছিলেন। ইংরেজ তাঁহার জীবনরক্ষায় প্রতিশ্রুত হইয়াছিলেন, ইংরেজের সাহায্যে তিনি প্রগষ্ট স্বত্বের উদ্ধারের ইচ্ছা করিয়াছিলেন। এখন তিনি ইংরেজ সেনানায়কের প্রস্তাব অনুসারে আপনার আত্মীয়, আপনার বন্ধু, আপনার বিপত্রিকালের প্রধান সহায়কে অপরূদ্ধ করিতে উদ্বৃত হইলেন। অজিত সিংহ তাঁহার পিতৃব্য, অজিত সিংহ যুদ্ধক্ষেত্রে তাঁহার সহযোগী, তাঁহার

ভূসম্পত্তির উদ্ধারের প্রধান উদ্যোগী, মহারাজ শিন্দের বিপক্ষতাচরণে প্রধান সহায় । স্বার্থান্ধ মান সিংহ এইরূপ আত্মীয়কেও ইংরেজের সাহায্যে ধরিতে চেষ্টা করিলেন । চেষ্টা ব্যর্থ হইল । অজিত সিংহ ভ্রাতৃস্পুত্রের উদ্দেশ্যে বৃষ্টিতে পারিয়া, সমস্ত্রমে পলায়ন করিলেন । অতঃপর মান সিংহ আপনার প্রধান বন্ধু-জনের অনিষ্টসাধনে উদ্বৃত্ত হইলেন । তাত্যা টোপের চরণ সর্বদা ইংরেজের শিবিরে বিচরণ করিত । তাত্যা টোপে নিবিড় জঙ্গলে যাহার উপর নির্ভর করিয়াছিলেন, তিনি যে, ইংরেজের সহিত সম্মিলিত হইয়াছেন, ইহা তাঁহার অবিদিত ছিল না । তথাপি মান সিংহের উপর তাঁহার প্রগাঢ় বিশ্বাস ছিল । তিনি তাঁহার পরামর্শমত আত্মগোপনের স্থল নির্দিষ্ট করিয়া লইয়াছিলেন । যখন মান সিংহ সেনানায়ক মীডের সহিত ষড়যন্ত্র করিতেছিলেন, তখন তাত্যা টোপে নিরুদ্ধেগে পারণের গভীর অরণ্যে অবস্থিতি করিতেছিলেন । এই স্থানে থাকিয়া, তিনি তাঁহার পুরাতন সহযোগীগণের সংবাদ প্রাপ্ত হইলেন । ইহাদের কেহ কেহ তাত্যা টোপেকে আহ্বান করেন । তাত্যা টোপে কর্তব্যনির্ধারণের জন্ত মান সিংহের পরামর্শগ্রহণে উদ্বৃত্ত হইলেন । মান সিংহ স্থানান্তরে ছিলেন, তাত্যা টোপের প্রেরিত সংবাদ অবগত হইয়া, বলিয়া পাঠাইলেন যে, তিনি তিন দিনের মধ্যে দেখা করিবেন ।

মান সিংহ আপনার কথা রক্ষা করিলেন । কিন্তু তাঁহার উদ্দেশ্যে ভিন্নরূপ হইল । ৭ই এপ্রেল—তৃতীয় দিনের গভীর নিশীথকালে মান সিংহ তাত্যা টোপের আত্মগোপনের স্থলে—পারণের সেই আরণ্য প্রদেশে উপস্থিত হইলেন । তাঁহার সাহায্যার্থে কিয়দূরে বোম্বাইর সিপাহীগণ অবস্থিতি করিতে লাগিল । তাত্যা টোপে নিদ্রিত ছিলেন, নিদ্রিত অবস্থাতেই ধৃত হইলেন । ধৃত হইবার সময়ে বিশ্বাসঘাতক বন্ধুর কঠোরতায় তাঁহার নিদ্রাভঙ্গ হইল । তিনি ৮ই এপ্রেল প্রাতঃকালে সেনানায়ক মীডের শিবিরে আনীত হইলেন ।\*

সেনানায়ক মীড সিপিথে সামরিক আইন অনুসারে তাত্যা টোপের বিচার করিলেন । তাত্যা টোপে ১৮৫৭ অব্দের জুন মাস এবং ১৮৫৮ অব্দের ডিসেম্বর মাসের মধ্যে ব্রিটিশ গবর্ণমেণ্টের বিরুদ্ধে যুদ্ধ করিয়াছিলেন বলিয়া, অপরাধী হই-

\* *Pursuit of Tantia Topce.—Blackwood's Magazine. August 1860, p. 172-194.*

লেন। তিনি আত্মপক্ষসমর্থনের জন্তু কহিলেন—“কারী অধিকৃত হওয়া পর্য্যন্ত আমি যাবতীয় বিষয়ে আমার প্রতিপালক প্রভু নানা সাহেবের আদেশ-পালন করিয়াছি। অতঃপর রাও সাহেবের আদেশ অনুসারে সমুদয় কর্ণে প্রবৃত্ত হইয়াছি। ইহার উপর একটি কথা ভিন্ন আমার আর কিছু বলিবার নাই। আমি কোন ইউরোপীয় স্ত্রীপুরুষ, বা বালকবালিকার প্রাণহানি করি নাই, কিংবাকোন সময়ে কাহাকেও ফাঁসী দিতে অনুমতি দিই নাই।” এই যুক্তি বিচারালয়ে গ্রাহ্য হইল না। বিচারকগণ অপরাধীর প্রতি ফাঁসীর আদেশ দিলেন। ১৮৫৯ অব্দের ১৮ই এপ্রেল সিপ্রিতে এই আদেশ কার্য্যে পরিণত হইল।

কর্ণেল মালিসন্ উপস্থিত বিষয়সম্বন্ধে এই ভাবে লিখিয়াছেন \*—“সে সময়ে সাধারণ মত অনুসারে এই দণ্ডদেশ সঙ্গত বলিয়া প্রতিপন্ন হইয়াছিল। কিন্তু আমার বোধ হয়, উত্তর কালে উহার সমর্থন হইবে কি না, তদ্বিষয় সন্দেহস্থল। ইংরেজের অধিকারে তাত্যা টোপের জন্ম হয় নাই। তাত্যা টোপে জন্ম গ্রহণ করিয়া, ইংরেজের ভৃত্যশ্রেণীতে নিবেশিত হইয়া নাই। ১৮১২ অব্দে যখন তাঁহার জন্ম হয়, তখন তাঁহার প্রভু পশ্চিম ভারতবর্ষের বিস্তীর্ণ অংশের অধিপতি ছিলেন। যে জাতি তাঁহার প্রভুকে সম্পত্তিচ্যুত করিয়াছে, বিশ্বস্তভাবে এবং শ্রদ্ধাসহকারে সেই জাতির কৰ্ম্মসম্পাদনে তিনি বাধা ছিলেন না। তদীয় প্রভুও তাঁহার ঞায় ইংরেজের সহিত কোনরূপ বন্ধনে আবদ্ধ ছিলেন না। যখন সেই প্রভু, পেশওয়ার প্রগল্ভ অধিকারের পুনঃপ্রাপ্তির সুবিধা দেখেন, তখন তাঁহার মোসাহেব, তাঁহার অনুচর, তদীয় আদেশ পালন করিয়াছিলেন, এবং তদীয় সৌভাগ্য বা দুর্ভাগ্যের অনুগামী হইয়াছিলেন। তাত্যা টোপে স্পষ্টাক্ষরে নির্দেশ করিয়াছিলেন যে, তিনি নরহত্যায় লিপ্ত হইয়া নাই। তাঁহাকে নরহত্যাতেও অপরাধী করা হয় নাই। তিনি পূর্ক্বতন পেশওয়ার পরিবারের মধ্যে একজন অনুচর ছিলেন। ইংরেজের বিরুদ্ধে যুদ্ধ করাতে তাঁহার উপর অপরাধের আরোপ করা হইয়াছিল। তিনি কেবল এই বিষয়েই অপরাধী বলিয়া নির্দিষ্ট হইয়াছেন, এবং কেবল এই অপরাধেই তাঁহার ফাঁসী হয়। সমস্ত ঘটনার আলোচনা করিলে সিদ্ধান্ত হইবে যে, তাঁহার শাস্তি, তাঁহার অপরাধ

\* *Indian Mutiny. Vol. III., p. 380-381.*

অপেক্ষা গুরুতর হইয়াছে । তিনি আপনার প্রভুর আদেশ পালন করিয়াছিলেন এবং অস্ত্রপরিগ্রহ পূর্বক সম্মুখযুদ্ধে প্রবৃত্ত হইয়াছিলেন ।

হোফারকে \* গুলি করিয়া বধ করাতে, উত্তর কালে নেপোলিয়ন দোষী হইয়াছিলেন । হোফার এবং তাত্যা টোপের মধ্যে অনেক বিষয়ে সাদৃশ্য আছে । উভয়ে, যে জাতির বিরুদ্ধে যুদ্ধ করিয়াছিলেন, সেই জাতির শাসনাধীন ছিলেন না । উভয়ে, যে জাতির অন্তর্নিবিষ্ট ছিলেন, সে জাতি বিদেশীয়-কর্তৃক বিজিত হইয়াছিল । বিজিত জাতি কর্তৃক যে বিপ্লব অনুষ্ঠিত হইয়াছিল, উহার সহিত উভয়েরই সাক্ষাৎসম্বন্ধে কোনরূপ স্বার্থের সংশ্রব ছিল না । উভয়েই, আপন আপন জাতির প্রতিনিধিস্বরূপ ছিলেন । উভয়েই অসামান্য ক্ষমতার সহিত পরাক্রান্ত জাতির বিরুদ্ধাচরণ করিয়াছিলেন । উভয়েই আপন আপন স্বদেশীয়গণের মধ্যে মহাপুরুষ বলিয়া পরিচিত । একজন অর্থাৎ ইউরোপীয় ব্যক্তি এখনও পৃথিবীতে মহাপুরুষ বলিয়া গণ্য । অল্প জন অর্থাৎ মহারাষ্ট্রীয় পুরুষও সেইরূপ । কে বলিতে পারে যে, তাঁহার নাম চম্বল, নর্মদা, পার্বতীর তীরবর্তী ভূখণ্ডে সম্মান ও অনুরাগের সহিত উল্লিখিত হয় না ?”

ফলতঃ তাত্যা টোপে বীরপুরুষ । খণ্ডযুদ্ধে তাঁহার অদ্ভুত ক্ষমতা প্রদর্শিত হইয়াছে । তিনি বারংবার রাজপুতনা এবং মালব ঘুরিয়া বেড়াইয়াছেন । এই দুই রাজ্যের পরিধি ১,৬১,৭০ বর্গ মাইল । এই বিস্তীর্ণ জনপদে পরিভ্রমণের সময়ে তিনি একবারও প্রতিপক্ষের হস্তে পতিত হইয়াছেন নাই । অনেক ইংরেজ সেনাপতি তাঁহার অনুসরণ করিয়াছেন । অনেক স্থানে ইঁহাদের সহিত তাঁহার যুদ্ধ হইয়াছে । অনেক যুদ্ধে তিনি পরাজিত হইয়াছেন । তাঁহার কামান তদীয় হস্ত হইতে

\* আণ্ডিস্ হোফার অষ্ট্রিয়ার অন্তর্গত টাইরোলের অধিবাসী । নেপোলিয়ন বোনাপার্ট কর্তৃক অষ্ট্রিয়া আক্রান্ত হইলে টাইরোলের অধিবাসিগণ তাঁহার বিরুদ্ধে সমুথিত হয় । হোফার ইহাদের অধিনায়ক হইলেন । ইনি যুদ্ধে একরূপ ক্ষমতা প্রকাশ করেন যে, তিন দিনের মধ্যে বিপক্ষেরা ঐ প্রদেশ হইতে তাড়িত হয় । শেষে নেপোলিয়ন অষ্ট্রীয় সৈন্য পরাজিত করিয়া, টাইরোলপ্রদেশের অধিকারী হইলেন । হোফার স্বদেশের জন্য যুদ্ধ করিয়া, লুকায়িতভাবে থাকেন । তাঁহার একজন পূর্বতন বন্ধু তাঁহাকে ফরাসীদিগের হস্তে সমর্পণ করে । বিচারে তাঁহার প্রতি প্রাণদণ্ডের আদেশ হয় । তিনি ১৮১০ অব্দের ফ্রেব্রুয়ারি মাসে যাতকের নিকিণ্ড গুলিতে দেহত্যাগ করেন । তাঁহার আত্মীয়েরা তৎপ্রতি সম্মান-প্রদর্শনে বিমুখ হইয়াছেন নাই । তাঁহাদিগকর্তৃক তাঁহার সমাধিস্থানে তদীয় প্রতিমূর্তি স্থাপিত হয় ।

পরিভ্রষ্ট হইয়াছে । তাঁহার সৈনিকদল বিচ্ছিন্ন হইয়া পড়িয়াছে । তাঁহার দ্রব্যাদি ইতস্ততঃ বিক্ষিপ্ত হইয়া গিয়াছে । তথাপি তিনি আশ্চর্য্যরূপে আত্মরক্ষা করিয়াছেন । তাঁহাকে ধরিবার জন্ত ব্রিগেডিয়ার পার্ক ক্রমাগত নয় দিনে ২৪০ মাইল অতিক্রম করিয়াছেন । ব্রিগেডিয়ার সমার্সেট নয় দিনে ২৩০ মাইল, পুনর্বার ৪৮ ঘণ্টায় ৭০ মাইল গিয়াছেন । কর্ণেল হল্‌মেস ২৪ ঘণ্টার কিছু অধিক সময়ের মধ্যে বালুকাময় মরুভূমি দিয়া, ৫৪ মাইল পথ অতিবাহন করিয়াছেন । ব্রিগেডিয়ার হোনার চারি দিনে ১৪৫ মাইল গিয়াছেন । তথাপি ইঁহাদের কেহই তাত্যা টোপেকে ধরিতে পারেন নাই । তাত্যা টোপে এমন স্নকৌশলে নিবিড় অরণ্যে আত্মগোপন করিয়াছেন, এমন চতুরতার সহিত দুস্তর নদী উত্তীর্ণ হইয়াছেন, এমন ক্ষিপ্ৰকারিতাসহকারে এক স্থান হইতে স্থানান্তরে গিয়াছেন যে, তাঁহার পরাক্রান্ত প্রতিপক্ষগণ বহু সৈন্তের সাহায্যেও তাঁহাকে অবরুদ্ধ করিতে সমর্থ হইয়েন নাই । তিনি যে বন্ধুর উপর বিশ্বাস স্থাপন করিয়াছিলেন, অবশেষে সেই বন্ধুর বিশ্বাসঘাতকতায় ধৃত হইয়েন । তাঁহার অবরোধের সহিত মধ্যভারতবর্ষের যুদ্ধ শেষ হইয়া যায় । এই ভূখণ্ড হইতে তাত্যা টোপের নাম বিলুপ্ত হয় নাই ।\*

\* এই ইতিহাসের তৃতীয় ভাগে (২০৯ পৃষ্ঠে) লিখিত হইয়াছে যে, কে সাহেব সতী চৌরাঘাটের নরহত্যায় তাত্যা টোপেকে দোষী বলিয়াছেন (*Sepoy War, II. p. 340-341, note*). কিন্তু এইরূপ নির্দেশের বিরুদ্ধে অল্প প্রমাণ আছে । লঙ্কোর চর মহম্মদ আলী খাঁ ফরব্‌স-মিচেল সাহেবকে যাহা কহিয়াছিলেন, তাহাতে স্পষ্ট বোধ হয় যে, কোনরূপ নরহত্যায় তাত্যা টোপে লিপ্ত ছিলেন না ( এই গ্রন্থের ৩৬১ পৃষ্ঠ দেখ ) ।

## চতুর্থ অধ্যায় ।

সিপাহীযুদ্ধের শেষ ভাগের ঘটনা—সম্পূর্ণভাবে যুদ্ধের অবসান—উপসংহার ।

১৮৫৮ অব্দের শেষ ভাগে প্রধান সেনাপতি স্মার্ট কোলিন্ কাম্প্বেল লক্ষ্মী অধিকারের জন্ত লর্ড উপাধি পাইয়া, লর্ড ক্লাইড্ নামে প্রসিদ্ধ হইলেন । লর্ড ক্লাইড্ অযোধ্যায় শান্তিস্থাপনের জন্ত যেরূপ চেষ্টা করিয়াছিলেন, তাহা পূর্বে উক্ত হইয়াছে । তাঁহার চেষ্টা অনেকাংশে ফলবতী হইয়াছিল । কিন্তু ১৮৫৯ অব্দ পর্য্যন্ত স্থানে স্থানে পরাক্রান্ত বিপক্ষেরা বিপক্ষতাচরণ করিতেছিলেন । আর্মিয়েটের রাজা লালমাধব সিংহ এবং শঙ্করপুরের রাণা বেণীমাধব, অযোধ্যার বেগমের পক্ষ অবলম্বন পূর্বক ইংরেজের সহিত যুদ্ধে ব্যাপৃত ছিলেন । রাজা লালমাধব সিংহকে আত্মসমর্পণ করিতে বলা হয় । ১৮৫৮ অব্দের ৬ই নবেম্বর তিনি এই প্রস্তাব অনুসারে কাষ্ঠ্য না করাতে ইংরেজসৈন্য তাঁহার দুর্গ আক্রমণ করে । লালমাধব উপায়ান্তর না দেখিয়া ১০ই নবেম্বর প্রধান সেনাপতির হস্তে আত্মসমর্পণ করেন । তাঁহার দুর্গ অধিকৃত হয় ।

রাণা বেণীমাধবও আত্মসমর্পণে অনুরুদ্ধ হইলেন । কিন্তু তিনি বেগম হজরৎ মহল এবং তাঁহার পুত্রের জন্ত এই অনুরোধ পালন করেন নাই । লর্ড ক্লাইড্ ১৫ই নবেম্বর তাঁহার বিরুদ্ধে অগ্রসর হইলেন । বেণীমাধব আপনার সশস্ত্র সৈনিকদল, পরিবারবর্গ এবং অর্থাদি লইয়া স্থানান্তরে প্রস্থান করেন । ইংরেজসৈন্য ভিন্ন ভিন্ন দলে বিভক্ত হইয়া, তাঁহার অনুসরণ করে । বেণীমাধব দন্দিয়াখেরা নামক স্থানে অবস্থিত করিতেছিলেন । ইংরেজসৈন্য এই স্থানের নিকটবর্তী বিধোরা নামক পল্লীতে উপস্থিত হইলে, বেণীমাধবকে আত্মসমর্পণের জন্ত পুনর্বার অনুরোধ করা হইল । কিন্তু দেড় ঘণ্টা অতীত হইয়া গেল, বেণীমাধবের নিকট হইতে কোন সংবাদ আসিল না । সুতরাং প্রতিপক্ষগণ তাঁহার অধ্যুষিত স্থানের অভিমুখে অগ্রসর হইল ।\* দন্দিয়াখেরার যুদ্ধে রাণা বেণীমাধব যথোচিত সাহসের পরিচয় দিয়াছিলেন । কিন্তু শেষে তাঁহার সৈনিকদল সাতিশয় ক্ষতিগ্রস্ত ও বিচ্ছিন্ন হইয়া গেল । ইহাতেও বেণীমাধব বিজ়েতার বশীভূত হইলেন না । ইংরেজগবর্নমেন্টের উপর তাঁহার প্রগাঢ় বিদ্বেষভাব ছিল । অযোধ্যা

\* *Lieut.-General Shadwell, Life of Lord Clyde. Vol. II., p. 342.*



অধিকৃত হইলে যখন পুনর্কার ভূমির বন্দোবস্ত হয়, তখন তিনি আপনার অধিকৃত ২২৩ খানি গ্রামের মধ্যে ১১৯ খানি গ্রামের স্বত্ব হইতে বিচ্যুত করেন।\* নবাবের অধিকারে তাঁহার ভূসম্পত্তি সুরক্ষিত ছিল। সুতরাং তিনি নবাবের আত্মীয়স্বজনের পক্ষসমর্থনে কিছুতেই নিরস্ত থাকেন নাই। তিনি নিমকের সম্মানরক্ষার জন্ত স্বাথত্যাগের একশেষ প্রদর্শন করেন। হজরৎ মহল এবং ব্রিজিস্কাদেরের আদেশপালনে তাঁহাকে কখনও উদাস্ত প্রকাশ করিতে দেখা যায় নাই। তাঁহাদের জন্ত এই পরাক্রান্ত ভূস্বামী আপনার দুর্গ, আপনার সম্পত্তি, আপনার অনুচরবর্গ, সমস্তই পরিত্যাগ পূর্বক নেপালের পার্বত্য প্রদেশে—তরাইর অস্বাস্থ্যকর নিবিড় জঙ্গলে লুকায়িতভাবে অবস্থিতি করেন।

যাঁহারা এই ভয়াবহ অভিনয়ের প্রধান পরিচালক ছিলেন, তাঁহারা একে একে রক্তক্ষেত্র হইতে অপসারিত হইলেন। মৃত্যু কাহাকে কাহাকে শোণিতময় ভীষণ কর্মক্ষেত্র হইতে চির দিনের জন্ত অন্তরিত করিল। দুর্গম অরণ্য বা ছুরারোহ পর্বতমালা কাহাকে কাহাকে চিরকালের মত অপরূপভাবে রাখিল। কৈজাবাদের মৌলবী এবং তাত্যা টোপে প্রভৃতির অদৃষ্টে যাহা ঘটয়াছিল, তাহা পূর্বে উক্ত হইয়াছে। গণ্ডার রাজা দেবী বক্স নেপালতরাইতে পলায়ন করেন।† পৃথীপাল সিংহ প্রভৃতি অযোধ্যার অন্যান্য রাজা বিপক্ষতা পরিত্যাগ পূর্বক ব্রিটিশ গবর্নমেন্টের বশীভূত হইলেন। ফরাকাবাদের নবাব আত্মসমর্পণ করিলে তাঁহার অপরাধ ক্ষমা করা যাইবে বলিয়া, ইংরেজ রাজপুরুষ মেজর্ বারো স্বীকার করিয়াছিলেন। এই কথায় বিশ্বাস স্থাপন পূর্বক উপস্থিত হওয়াতে গবর্নর-জেনেরল নবাবের প্রাণদণ্ড রহিত করেন। নবাব আপনাদের পুণ্য-ভূমি মক্কায় গমনে কৃতসঙ্কল্প হইলেন। ১৮৫৯ অব্দে ৭ই জানুয়ারি মেন্দি হুসেন আত্মসমর্পণ করেন।‡ বাল রাও নেপালের পার্বত্য প্রদেশে আত্মগোপনে বাধ্য

\* *Indian Empire. Vol. II., p. 497, note.*

† কথিত আছে, নেপাল তরাইতে ১৮৫৯ অব্দের নবেম্বর মাসে জঙ্গ বাহাদুরের সহিত যুদ্ধে বেগীমাধব তসুত্যাগ করেন। গণ্ডার রাজারও মৃত্যু হয়। তাঁহার পত্নী আত্মসমর্পণ করেন। অধিকন্তু বাল সাহেবেরও মৃত্যু ঘটে।—*Martin, Indian Empire. Vol. II., p. 498, note.*

‡ *Shadwell, Life of Lord Clyde. Vol. II., p. 370.*

হয়েন ।\* ঐ দুর্গম ভূমি বেগম হজরৎ মহলের আশ্রয়স্থল হয় । ১৮৫৮ অন্ধের জুলাই মাসে বেরিলীর কোতওয়াল তাহির বেগ কর্তৃক খাঁ বাহাদুর খাঁ ধৃত হয়েন । কয়েক দিন পরে বেরিলীর কোতওয়ালীতে তাঁহার ফাঁসী হয় ।† বাণপুরের অধিপতি এবং শাহগড়ের রাজা আত্মসমর্পণ করিলে গবর্ণমেন্টের আদেশে লাহোরে গিয়া বাস করেন । মিথোলীর বৃদ্ধ রাজা আন্দামানে নির্বাসিত হয়েন । বাদার নবাব আত্মসমর্পণ করিলে, গবর্ণমেন্ট তাঁহাকে বার্ষিক চারি হাজার টাকা বৃত্তি দিবার বন্দোবস্ত করেন । কুমার সিংহের ভ্রাতা অমর সিংহকে ও গবর্ণমেন্টের নিকটে আত্মসমর্পণ করিতে হয় । নানা সাহেব ও আজিম উল্লা খাঁ নিরুদ্দেশ হয়েন । নানাকে ধরিবার জন্ত ইংরেজের যাবতীয় চেষ্টা ব্যর্থ হয় । তিনি কোথায় যাইতেন, কোন্ শিবিরে অবস্থিতি করিতেন, তাহা কেহই জানিত না । তিনি শিবিরে আছেন কিনা, কেহ জিজ্ঞাসা করিলে অবিলম্বে তাহার প্রাণ দণ্ড হইত ।‡ স্মরণ্য সে সময়ে কেহই নানা সাহেবের কোন সন্ধান করিতে পারে নাই । যাহা হউক ১৮৫৯ অন্ধে অযোধ্যার কোন কোন স্থানে অশান্তির আবির্ভাব ছিল । শ্বার্ হোপ্ গ্রাণ্টের চেষ্টায় উহা তিরোহিত হয় । ঐ অন্ধের মে মাসে ভয়ঙ্কর বিপ্লববহি সর্ব্বাংশে নিৰ্ব্বাপিত হইয়া যায় ।

এই ঘটনার পূর্বে দুর্দান্ত প্রতিপক্ষের সমক্ষে ইংরেজের অসীম প্রতাপ পরিব্যক্ত হয় । দুই শত বৎসর পূর্বে যাহারা সুবিস্তৃত ভারতের পনর কোটি প্রজার অধিনায়ক প্রভু ছিলেন, ইষ্ট ইণ্ডিয়া কোম্পানির এজেন্টগণ ভারতের উপকূলবর্ত্তী একটি সামান্য নগরে বাস করিবার অনুমতিপ্রার্থনার জন্ত যাহাদের সমক্ষে যুক্তকরে অবনতবদনে দণ্ডায়মান থাকিতেন, এখন তাহাদের বংশধর তাহাদের চিরপ্রসিদ্ধ দরবারগৃহ—দেওয়ান-ই খাসে, তাহাদেরই অনুগৃহীত ইষ্ট ইণ্ডিয়া কোম্পানির অধস্তন কর্মচারীগণের নিকটে বিচারপ্রার্থী হইলেন । ১৮৫৮ অন্ধের ২৭শে জানুয়ারি ইউরোপীয় সৈনিককর্মচারীগণ বৃদ্ধ বাহাদুর

\* *Life of Lord Clyde, p. 371.*

† মার্টিন সাহেব লিখিয়াছেন, জঙ্গ বাহাদুর কর্তৃক খাঁ বাহাদুর খাঁ ধৃত হয়েন (*Indian Empire. Vol. II., p. 500*). কিন্তু করবস্-মিচেল ঘটনাস্থলে উপস্থিত ছিলেন, তিনি লিখিয়াছেন, তাহির বেগ কর্তৃক খাঁ বাহাদুর খাঁ ধৃত হয়েন (*Reminiscences &c. p. 263-264*). দিল্লীর নিকটবর্ত্তী ঝঝঝরের নবাব এবং বলরামগড়ের রাজারও দিল্লীতে ফাঁসী হয় ।

‡ *Raikes, Notes on the Revolt &c. p. 117.*

শাহের বিচারার্থে সমবেত হইলেন। তাঁহার উপর চারি দফা অপরাধ ধার্য হইল। ৪০ দিনে বিচার শেষ হইয়া গেল। বিচারকগণ প্রধান প্রধান অপরাধে বাহাদুর শাহকে দোষী স্থির করিলেন। তাঁহার নির্কাসনদণ্ড হইল।\* তিনি অপেক্ষাকৃত জনশূন্য স্থানে পরিবারবর্গের সহিত জীবনের অবশিষ্টকালযাপনের জন্ত পেণ্ডতে (কোন কোন মতে রেঙ্গুনের তিন শত মাইল দূরবর্তী টজু নামক স্থানে) প্রেরিত হইলেন।

এই মহাবিপ্লবের সজ্বাতে ভারতবর্ষে কোম্পানির রাজত্ব বিলুপ্ত হয়। শ্রীশ্রীমতী মহারাণী বিক্টোরিয়া স্বয়ং ভারতবর্ষের শাসনভার গ্রহণ করেন। যে আইন অনুসারে এই পরিবর্তন ঘটে, তাহা ১৮৫৮ অব্দের ২রা আগষ্ট মহারাণী বিক্টোরিয়া কর্তৃক স্বাক্ষরিত হয়। মহারাণী পরবর্তী ১লা নবেম্বর ভারতবাসীদিগের মধ্যে ঘোষণাপত্র প্রচার করিয়া, ভারতসাম্রাজ্যশাসনে উত্তর হইলেন। যখন মহারাণী বিক্টোরিয়া ভারতবর্ষের শাসনভার গ্রহণ করেন, তখন লর্ড ডার্কি ইংলণ্ডের প্রধান মন্ত্রী ছিলেন। প্রথমে যে ভাবে ঘোষণাপত্র লিখিত হইয়াছিল, তাহা মহারাণী এবং তদীয় স্বামী যুবরাজ আলবার্টের অনুমোদিত হয় নাই। মহারাণী আপনার আপত্তিনির্দেশ পূর্বক প্রধান মন্ত্রীকে জানাইয়াছিলেন যে, তিনি যেন তদীয় অত্যুৎকৃষ্ট ভাষায় ঘোষণাপত্রখানি লিখেন। তাঁহার মনে রাখা উচিত যে, একটি রাণী শোণিতময় যুদ্ধের পর প্রাচ্য জনপদের বহুসংখ্য প্রজার শাসনভারগ্রহণকালে, তাহাদিগকে ভাবী রাজত্বে শ্রাঘ্য অধিকার দিয়া, আপনার শাসননীতি বুঝাইতেছেন। সুতরাং এইরূপ ঘোষণাপত্রে মহত্ব, দয়ালুতা, ধর্মসম্বন্ধে উদারতার নিদর্শন থাকা উচিত, এবং ভারতবাসী প্রজাগণ যে, ব্রিটিশ প্রজাদিগের সহিত সমানভাবে অধিকার লাভ করিবে, উহাতে তাহারও উল্লেখ থাকা বিধেয়। যে নারীর নামে কোটা কোটা ভারতবাসী ভক্তিশ্রদ্ধাভরে অবনতমস্তক হইতেছে, ভারতসাম্রাজ্যের শাসনভারগ্রহণের পূর্বক্ষণেই ভারতবর্ষীয়দিগের প্রতি তাঁহার এইরূপ সমদর্শিতা প্রদর্শিত হইয়াছিল। আর যিনি তাঁহার সুখের—প্রীতির—শান্তির অধিতীয় অবলম্বনরূপ ছিলেন, তিনিও এইরূপ সমদর্শিতার পরিপোষক হইয়াছিলেন। সুতরাং ঘোষণাপত্রখানি পুনর্বার লিখিত হয়, এবং এইরূপে উহা শ্রীশ্রীমতী

\* *Trial of Ex-King of Delhi.*

মহারাণী বিক্টোরিয়ার অসামান্য মহানুভাবতা ও সমদর্শিতার পরিচয়স্থল হইয়া উঠে।\* মহারাণী ভারতবর্ষের প্রজালোককে অভয় দিতে বিমুখ হইবেন নাই। যাহারা সাক্ষাৎসম্মুখে ইউরোপীয়দিগের নিধনে লিপ্ত হয় নাই, যাহারা অপরের প্ররোচনার গবর্ণমেন্টের বিরুদ্ধাচরণে প্রবৃত্ত হইয়াছে, তাহারা যদি ১৮৫৯ অব্দের ১লা জানুয়ারির পূর্বে বশীভূত হয়, তাহা হইলে তাহাদের অপরাধ ক্ষমা করা হইবে বলিয়া, মহারাণী আপনার প্রজাবর্গকে আশ্বাসিত করেন।

এইরূপে ১৮৫৭-৫৮ অব্দের ভীষণ অভিনয়ের যবনিকাপতন হইল। এই মহা-বিপ্লব পৃথিবীর ইতিহাসের একটি চিরস্মরণীয় প্রধান ঘটনা। এই ঘটনায় মানবের মহত্তর গুণের যেরূপ পূর্ণবিকাশ হইয়াছে, সেইরূপ তাহার নীচ প্রবৃত্তি, তাহার দুর্দান্ত ভাব, তাহার জিঘাংসাসুলভ স্বাপদপ্রকৃতিও পরিস্ফুট হইয়াছে। অধিকন্তু এই ঘটনায় ইংরেজ আপনার অসামান্য শক্তির পরিচয় দিয়াছেন। দিল্লীর অধিকারে, লক্ষ্মীর বিপন্ন সজাতির উদ্ধারে, উত্তরপশ্চিম প্রদেশ, রোহিলখণ্ড ও মধ্যভারতবর্ষের বিপ্লবনিবারণে তাহারা যেরূপ একাগ্রতা, যেরূপ অধ্যবসায়, যেরূপ উৎসাহ প্রদর্শন করিয়াছেন, সেইরূপ বীরত্ব ও সাহসে বীরেন্দ্রসমাজের বরণীয় হইয়াছেন। পক্ষান্তরে এই বিপ্লবের কালে প্রতিপক্ষের ধলেও প্রকৃত বীর পুরুষের আবির্ভাব হইয়াছে, এবং বীররমণী অপূর্ব বীরত্ব দেখাইয়া, চিরপ্রসিদ্ধি লাভ করিয়াছেন।

এই ঘটনা ভারতবাসীর অপারিসীম রাজভক্তির সাক্ষীস্বরূপ। উপস্থিত গ্রন্থের অনেকস্থলে এই রাজনিষ্ঠার পরিচয় প্রদত্ত হইয়াছে। প্রধানতঃ ভারতবর্ষের সৈনিকগণের গভীর উত্তেজনায় এই ঘটনা অধিকতর ভয়ঙ্করভাবে পরিণত হইয়াছিল। কিন্তু সমগ্র সৈনিকদলের মধ্যে বিশ্বস্ততার অভাব লক্ষিত হয় নাই। ভারতের অনেক সৈনিকপুরুষ এই ঘোর বিপত্তিকালে ইংরেজের পার্শ্বে দণ্ডায়মান হইয়া, তাহাদের স্বদেশের, সজাতির, স্বধর্মের লোকের বিরুদ্ধে যুদ্ধ করিতেও বিমুখ হয় নাই। লর্ড রবার্টস্ লিখিয়া গিয়াছেন যে, শিখ এবং গুর্খা সৈন্য সাহায্য না করিলে দিল্লী অধিকৃত হইত না। শ্যার হেনরি লরেন্সের সাদর আহ্বানে হিন্দুস্থানী সৈনিকগণ উপস্থিত না হইলে, লক্ষ্মী কখনও রক্ষা করা যাইত না। পঞ্জাবের

\* ঘোষণাপত্রের ভাবানুবাদ পরিশিষ্টে প্রকাশিত হইল।

ও সিদ্ধনদের অপর তীরস্থ লোকেরা যদি বিশ্বস্তভাবে না থাকিত, তাহা হইলে শ্রী জন লরেন্স কলিকাতার উত্তর হইতে সমগ্র জনপদের অধিকারে সমর্থ হইতেন না।\*

এই ঘটনায় নিরবচ্ছিন্ন কুফলের উদ্ভব হয় নাই। প্রবল ঝটিকা যেমন চারি দিকের দূষিত বায়ু বাহির করিয়া দেয়, উহার অবসানে যেমন প্রকৃতির প্রশান্ত-ভাব লক্ষিত হয়, এই ঘোর বিপ্লবের শেষেও অপকৃষ্ট বিষয় সকল তিরোহিত ও শান্তি স্থাপিত হইয়াছে। ১৮৫৭-৫৮ অব্দের পূর্বে ব্রিটিশ গবর্ণমেন্ট এতদেশীয় অধিপতিদিগের রাজ্যশাসনসংক্রান্ত বিষয়ের আলোচনাকালে, কোন নির্দিষ্ট নিয়মের অনুবর্তী হইতেন না। যিনি যখন গবর্ণর-জেনেরল হইতেন, তখন তাঁহার অভিমতের উপর এতৎসংক্রান্ত যাবতীয় বিষয় অনেকপরিমাণে নির্ভর করিত। সুতরাং রাজ্যাধিপতিদিগের হৃদয় হইতে আশঙ্কা বা উদ্বেগ অন্তর্হিত হইত না। তাঁহারা আপনাদের পুরুষানুক্রমিক স্বত্বের জ্ঞাত সর্বদা চিন্তাযুক্ত থাকিতেন। এই ঘটনার অবসানে মহারাণী ভারতবর্ষের শাসনভারগ্রহণকালে যে ঘোষণাপত্র প্রচার করেন, তদ্বারা অধিপতিদিগের উক্তরূপ আশঙ্কা ও উদ্বেগ অন্তর্হিত হইয়াছে। রাজপুরুষগণ তাঁহাদের প্রতি অধিকতর সমবেদনা-প্রদর্শনে আগ্রহযুক্ত হইয়া উঠিয়াছেন। এইরূপ সমবেদনাপ্রযুক্ত যে প্রীতি-বন্ধন ঘটিয়াছে, তাহারই দৃঢ়তা, লর্ড লিটনের সময়ে দিল্লীর প্রসিদ্ধ দরবারে প্রতিপন্ন হইয়াছে। যাহারা পূর্বপুরুষানুগত ভূসম্পত্তি হইতে স্বলিত হওয়াতে পথের ভিখারী হইয়াছিল, বা দেনার দায়ে রাজস্ববিভাগের কর্মচারীদিগের বিচারে, যাহাদের সর্বস্বাস্ত্র ঘটিয়াছিল, তাহারা যে, সুযোগ বুঝিয়া, এই ঘটনা অধিকতর ভয়ঙ্করভাবে পরিণত করিতে অভিনিবিষ্ট হইয়াছিল, তাহা যথাস্থলে বিবৃত হইয়াছে। এই ভয়ঙ্কর ঘটনাই শেষে, এই শ্রেণীর লোকের প্রকৃতি প্রশান্ত করিয়া তুলিয়াছে। রাজপুরুষেরা এখন ইহাদের সম্পত্তিসংরক্ষণে—ইহাদের স্বত্বনির্ধারণে অধিকতর মনোযোগী হইয়াছেন। যে সিপাহীগণ হইতে এইরূপ ভীষণ ঘটনার উদ্ভব হইয়াছিল, তাহাই উত্তরকালে সেই সিপাহীদিগের ধর্ম্মানু-শাসন ও স্বত্বের সংরক্ষণসম্বন্ধে গবর্ণমেন্টকে সমবেদনা দেখাইতে প্রবর্তিত

\* *Forty-one years &c. Vol. I. Preface, p. VIII-IX.*

করিয়াছে । লর্ড ডালহৌসীর সময়ে যাহার সূত্রপাত হইয়াছিল, এই ঘটনার পর তাহা সম্প্রসারিত ও সুব্যবস্থিত হইয়া উঠিয়াছে । রেলওয়ে টেলিগ্রাফ প্রভৃতি পরস্পরবিচ্ছিন্ন ভূখণ্ডকে একীভূত করিয়াছে । অধিকন্তু এই ঘটনা বিজেতা ও বিজিতের মধ্যে পার্থক্য দূর করিবার সহায় হইয়াছে । শ্রীশ্রীমতী মহারাণীর ঘোষণাপত্র বিজেতা ও বিজিত, উভয়কেই গুণানুসারে সমান অধিকার সমর্পণ করিয়াছে । রাজ্যের শাসনকর্তারা প্রজালোকের অধিকার, সামাজিক ব্যবস্থা, ধর্ম্মানুগত নিয়ম প্রভৃতির সম্মানরক্ষায় পূর্ব্বাপেক্ষা অধিকতর মনঃসংযোগ করিয়াছেন ।

কি কি কারণে এই ভীষণ ঘটনার আবির্ভাব হইয়াছিল, তৎসমুদয় যথাস্থলে বিবৃত ও তৎসম্বন্ধে নানামত আলোচিত হইয়াছে । পররাজ্যগ্রহণে, পরকীয় স্বত্বের উচ্ছেদে, অধিকন্তু ইউরোপীয় সভ্যতার অদৃষ্টপূর্ব্ব ও অচিন্ত্যপূর্ব্ব ফলদর্শনে লোকের মন নিঃসন্দেহ চঞ্চল হইয়া উঠিয়াছিল । এই চাঞ্চল্যের সময়ে বসায়ুক্ত টোটা সম্বন্ধে নানা কথা প্রচারিত হয় । ঐ সকল কথা লোকের হৃদয়নিহিত বিদ্বেষাগ্নির উদ্দীপনসম্বন্ধে অকার্য্যকর হয় নাই । সম্ভবতঃ টোটার অপবিত্র দ্রব্য ছিল । উহাতে কি কি দ্রব্য দেওয়া হইত, তখন গবর্ণমেন্ট তদ্বিষয়ের অনুসন্ধান উত্তম করেন নাই ।\* যাহা হউক, নানা কারণে বিপ্লব ঘটয়াছিল ।

\* ফরেস্ট্ সাহেব ১৮৫৭-৫৮ অব্দের সিপাহীযুদ্ধ সম্বন্ধে সৈনিকবিভাগস্থিত প্রয়োজনীয় কাগজপত্রের সংগ্রহ করেন । উহাতে বসায়ুক্ত টোটার বিষয় বিবৃত হইয়াছে । ১৮৫৭ অব্দের ৫ই মার্চ ৭০ সংখ্যক পদাতিকদলের জমাদার শালিকরাম সিংহ বারাকপুরে প্রকাশ্যভাবে অভিনব টোটার ব্যবহারে অসম্মতি প্রকাশ করে । এই অপরাধে পরবর্ত্তী ২১শে মার্চ সামরিক বিচারালয়ে তাহার বিচার হয় । এই সময়ে কর্ণেল আবটের সাক্ষ্য বোধ হয়, সম্ভবতঃ টোটার সিপাহীদিগের অস্পৃশ্য বসায়ুক্ত ব্যবহৃত হইত ।—*Forrest, Selections from the Letters, Despatches and other State Papers, preserved in the Military Department of the Government of India, 1857-58. Appendix, p. 67. Comp. Lord Roberts, Forty-one years in India. Vol. I., p. 431, উক্ত সংগ্রহের অন্ত্যস্ত স্থানেও এই বিষয়ের উল্লেখ আছে ।—Selections &c. p. 3.*

এই স্থলে আর একটি কথা উল্লেখ করা আবশ্যিক । কেহ কেহ নির্দেশ করিয়াছেন যে, ইংরেজের রাজ্যে লোকের ধর্ম্ম নষ্ট হইতেছে, এইরূপ ইঙ্গিত করিবার জন্য, চাপাটি গ্রামে প্রেরিত হইয়াছিল । কিন্তু স্মার্ট সৈয়দ আহম্মদ খাঁ নির্দেশ করিয়াছেন যে, চাপাটি গ্রাম হইতে গ্রামান্তরে প্রেরিত হইলে লোক মনে করে যে, ওলাউঠা দূরীভূত হয় । এইরূপ সংস্কার বশতঃ উহা নানা স্থানে প্রেরিত হইয়াছিল ।—*Causes of the Indian Revolt, p. 3.*

এতদেশীয়ের প্রগাঢ়রাজভক্তিসহকৃত পরাক্রমে ও বিশ্বস্তভাবে এবং ইংরেজের অসামান্যবীরত্বসহকৃত সাহসে ও অধ্যবসায় উহার শাস্তি হইয়াছে । ইংরেজ এই মহাবিপ্লবের কথা বিশ্বতিসাগরে নিমজ্জিত হইতে দেন নাই । বস্তুতঃ, এই ঘটনা নরশোণিতের সহিত সংশ্লিষ্ট থাকিলেও, মানবের প্রধান শিক্ষার বিষয় । উহা শাসক ও শাসিত, উভয়েরই হৃদয়ে কর্তব্যজ্ঞানের সঞ্চারণ করিয়াছে । উহাতে লোকচরিত্রের বিভিন্ন পরিবর্তন পরিব্যক্ত হইয়াছে । উহার বৈচিত্র্য ঐতিহাসিকের বর্ণনাচাতুরীপ্রদর্শনের যেরূপ সহায় হইয়া উঠিয়াছে, পাঠকেরও সেইরূপ কোতূহলের উদ্দীপন করিয়াছে । উহার অপরিমিত বৈচিত্র্য, উহার অন্তর্নিহিত বহুমূল্য উপদেশ, উহার অভাবনীয় ও অবারণীয় মহাশক্তিতে আকৃষ্ট হইয়া, আমি কুড়ি বৎসরেরও অধিক কাল হইল, এই ইতিহাসপ্রণয়নে প্রবৃত্ত হইয়াছিলাম । ঘটনাচক্রের বহুবিধ আবর্তনে আমার উত্তম দীর্ঘকাল অবরুদ্ধ ছিল । শেষে নানা বিষয় অতিক্রম পূর্নক সঙ্কল্পসাধনে পুনর্বার কর্মক্ষেত্রে অবতীর্ণ হই । আশানুরূপ উপকরণের অভাবে আমার সঙ্কল্পসিদ্ধির অন্তরায় ঘটিয়াছে । যাবতীয় উপকরণের সংগ্রহে এবং যথাস্থলে উহার বিনিয়োগে দেশকালের অনিবার্য গতি ও আমার প্রতিকূল হইয়াছে । আমি এই প্রতিকূলতার নিরোধে সমর্থ হই নাই । এখন আমার কর্ম শেষ হইল । আমি আমার সামান্য ক্রমতা অনুসারে যাহা করিতে পারিয়াছি, কুড়ি বৎসরের পর, এখন তাহা মহাদয় পাঠকের হস্তে সম্পূর্ণভাবে সমর্পণ করিলাম ।



# পরিশিষ্ট ।

## মহারাণীর ঘোষণাপত্র ।

“আমি—বিক্টোরিয়া, জগদীশ্বরের প্রসাদে গ্রেটব্রিটন ও আয়ারল্যান্ড, এই সম্মিলিত রাজ্যের এবং ইউরোপ, এশিয়া, আফ্রিকা, আমেরিকা ও অস্ট্রেলিয়াতে উক্ত সম্মিলিত রাজ্যের যে সকল উপনিবেশ ও অধীন জনপদ আছে, তৎসমুদয়ের অধীশ্বরী ও ধর্মরক্ষাকারিণী ।

“ভারতবর্ষের যে সকল প্রদেশ আমার অধিকারে আছে, এত দিন ইষ্ট ইণ্ডিয়া কোম্পানি তৎসমুদয় শাসন করিয়া আসিতেছিলেন। এক্ষণে আমি পার্লামেন্ট মহাসভার সম্মতিক্রমে ভারতবর্ষের উক্ত প্রদেশসমূহের শাসনভার স্বহস্তে গ্রহণ করিতেছি।

“এই ঘোষণাপত্র দ্বারা সাধারণকে জানাইতেছি যে, আমি পার্লামেন্ট মহাসভার পরামর্শে ও সম্মতিক্রমে ভারতসাম্রাজ্যের শাসনভার স্বহস্তে লইলাম। ভারতবর্ষের প্রজাবর্গের প্রতি আমার এই আদেশ যে, তাহারা প্রজার যথার্থ ধর্ম পালন করিবে, আমার এবং আমার উত্তরাধিকারিগণের প্রতি শ্রদ্ধা দেখাইবে, আমি ভারতবর্ষের শাসনকার্যনির্বাহের জন্ত যে সকল কর্মচারী নিযুক্ত করিব, তাঁহাদের প্রতি সম্মান প্রদর্শন করিবে এবং তাঁহাদের আদেশ অনুসারে চলিবে।

“আমার বিশ্বস্ত অমাত্য ও প্রিয়পাত্র শ্রীযুক্ত চার্লস্ জন্ বাইকোন্ট কানিঙ্ক বাহাদুরের প্রভুভক্তি, কর্মদক্ষতা ও সদ্বিবেচনার উপর সম্পূর্ণরূপে নির্ভর করিয়া, আমি তাঁহাকে আমার ভারতসাম্রাজ্যের প্রথম বাইসরয় ( রাজপ্রতিনিধি ) ও গবর্নর-জেনেরলের পদে নিযুক্ত করিলাম। আমি, আমার কোন প্রধান সেক্রেটারি দ্বারা সময়ে সময়ে যে সকল নিয়ম ও আদেশ প্রচার করিব, সেই সকল নিয়ম ও আদেশের অনুবর্তী হইয়া, বাইকোন্ট কানিঙ্ক বাহাদুর ভারতসাম্রাজ্যের শাসনকার্যনির্বাহ করিবেন।

“ইষ্ট ইণ্ডিয়া কোম্পানির আধিপত্যসময়ে যে সকল ব্যক্তি রাজকীয় কর্মে নিয়োজিত আছেন, তাঁহাদিগকে তাঁহাদের আপন আপন কর্মে রাখা গেল।



কিন্তু ভবিষ্যতে আমার যেরূপ ইচ্ছা হইবে, অথবা যে সকল নিয়ম বিধিবদ্ধ করা যাইবে, ঐ সকল কর্মচারীকে রাখা বা না রাখা, সেই ইচ্ছা ও সেই নিয়ম অনুসারে নির্দিষ্ট হইবে।

“এতদ্বারা ভারতবর্ষের ভূপতিগণকে জানান যাইতেছে যে, ইষ্ট ইণ্ডিয়া কোম্পানি তাঁহাদের সহিত যে সকল সন্ধি ও তাঁহাদের নিকটে যে সকল প্রতিজ্ঞা করিয়াছেন, আমি সেই সকল সন্ধিরক্ষা ও সেই সকল প্রতিজ্ঞাপালন করিব ; আশা করি, ভারতবর্ষের ভূপতিগণও আমার গ্ৰায় সন্ধিরক্ষা ও প্রতিজ্ঞাপালন করিবেন।

“ভারতবর্ষে এখন আমার যে অধিকার আছে, তাহার আর বৃদ্ধি করিব না। অন্তে আমার রাজ্য আক্রমণ করিলে, তাহাদিগকে সমুচিত প্রতিফল দিতে ক্রটি করিব না। যাহারা আমাদের পক্ষে আছেন, তাঁহাদিগকেও অপরের রাজ্য আক্রমণ করিতে দিব না। আমি ভারতবর্ষের ভূপতিদিগের অধিকার, পদ ও মর্যাদা, নিজের অধিকার পদ ও মর্যাদার মত জ্ঞান করিব। দেশে শান্তি থাকিলে যেরূপ সুখ ও সৌভাগ্য ঘটতে পারে, ভারতবর্ষের ভূপতিগণ এবং আমার প্রজাবর্গও সেইরূপ সুখে ও সৌভাগ্যে কালযাপন করিবেন।

“রাজধর্মের পালন জন্ত আমি অপরাপর প্রজার নিকটে যেরূপ প্রতিজ্ঞায় আবদ্ধ আছি, ভারতবর্ষের প্রজাবর্গের নিকটেও সেইরূপ প্রতিজ্ঞায় আবদ্ধ থাকিব। সর্বশক্তিমান্ জগদীশ্বরের প্রসাদে আমি ঐ প্রতিজ্ঞার যথারীতি পালন করিব।

“খ্রীষ্টীয় ধর্মে আমার দৃঢ় বিশ্বাস আছে। এই ধর্মের আশ্রয় লইলে যে, সুখ ও সম্ভ্রাষ জন্মে, তাহাও আমি কৃতজ্ঞচিত্তে স্বীকার করি। কিন্তু আমি আমার প্রজাবর্গসম্বন্ধে এই বিশ্বাস অনুসারে কোন কার্য করিব না। আমি প্রকাশ করিতেছি যে, কোন ব্যক্তি তাহার বিশ্বাসমত কোন ধর্মসম্মত কার্যের অনুষ্ঠান করিলে অনুগ্রহীত, নিগ্রহীত বা উৎপীড়িত হইবে না। সকলেই আপনাদের বিশ্বাস অনুসারে আপন আপন ধর্মসম্মত কর্মের অনুষ্ঠান করিতে পারিবে এবং সকলেই আমার অধিকারে তুল্যরূপে রক্ষিত ও প্রতিপালিত হইবে। যাহারা আমার অধীন ভারতবর্ষের শাসনকার্যে নিয়োজিত থাকিবেন, তাঁহাদিগকে আমি এই আদেশ দিতেছি যে, তাঁহারা যেন, আমার কোন প্রজার

ধর্ম্মে কোনরূপে হস্তক্ষেপ না করেন । যিনি হস্তক্ষেপ করিবেন, তিনি আমার যার পর নাই বিরাগভাজন ও কোপে পতিত হইবেন ।

“আমার প্রজারা যে জাতি বা যে ধর্ম্মাবলম্বী হউক না কেন, আপনাদের বিদ্যা, ক্ষমতা ও সচ্চরিত্রতাবলে গবর্ণমেন্টের অধীনে যে সকল কর্ম্ম করিতে সমর্থ হইবে, তাহাদিগকে বিনা পক্ষপাতে সেই সকল কর্ম্মে নিযুক্ত করা যাইবে ।

“ভারতবর্ষীয়গণ আপন আপন পূর্বপুরুষ হইতে যে সকল ভূসম্পত্তি প্রাপ্ত হয়, তৎসমুদয়ের উপর তাহাদের যে, কত মায়া ও কত যত্ন জন্মে, তাহা আমি সবিশেষ অবগত আছি । ঐ সকল ভূসম্পত্তিতে যাহার যেরূপ স্বত্ব ও অধিকার আছে, তাহাকে সেই স্বত্ব ও অধিকার হইতে বঞ্চিত করা হইবে না । কিন্তু তাহাকে গবর্ণমেন্টের প্রাপ্য অংশ যথানিয়মে দিতে হইবে । আইন প্রস্তুত করা ও আইন অনুসারে কার্য্য করার সময়ে ভারতবর্ষীয়দিগের প্রাচীন স্বত্ব ও প্রাচীন রীতিনীতির উপর দৃষ্টি রাখা যাইবে ।

“কতকগুলি ছুরাশয় লোকে অমূলক জনরব তুলিয়া দিয়া, তাহাদের স্বদেশীয়দিগকে প্রতারণিত ও রাজবিদ্রোহে প্রবর্তিত করাতে দেশের অনেক অনিষ্ট ঘটয়াছে । আমি এজন্য সাতিশয় হুঃখিত আছি । রাজবিদ্রোহ নিবারণিত হওয়াতে আমাদের প্রভাব ও পরাক্রম প্রদর্শিত হইয়াছে । যে সকল লোক প্রতারণিত হইয়াছিল, এখন যদি তাহারা পুনরায় প্রজার ধর্ম্ম অবলম্বন করে, তাহা হইলে তাহাদের অপরাধের মার্জ্জনা করিব, এবং তাহাদের প্রতি দয়া ও সৌজন্য দেখাইব ।

“ভারতসাম্রাজ্য নিরূপদ্রব করিবার অভিপ্রায়ে, ইহার পূর্বে আমার প্রতিনিধি ও গবর্ণর-জেনেরল বাইকোর্ট কানিঙ্ক বাহাদুর একটি প্রদেশের অপরাধীদিগকে তাহাদের অপরাধ মার্জ্জনা করিবার আশা দিয়াছেন । যাহাদের অপরাধ মার্জ্জনার যোগ্য নয়, তাহাদিগকে যে, যথোচিত শাস্তি দেওয়া হইবে, তিনি তাহারও উল্লেখ করিয়াছেন । আমি গবর্ণর-জেনেরলের কার্য্যের অনুমোদন করিতেছি । অধিকন্তু, সাধারণের গোচরার্থে প্রকাশ করিতেছি যে,—

“যাহারা সাক্ষাৎসম্বন্ধে আমার ব্রিটিশ প্রজাদিগের নিধনে লিপ্ত ছিল, তাহারা ব্যতীত আর সকলের প্রতি করুণা প্রদর্শিত হইবে ।

“এই নরঘাতকদিগের প্রতি গ্ৰাম্যানুসারে দয়া প্রদর্শিত হইতে পারে না ।

“যাহারা জানিয়া শুনিয়া, নিজের ইচ্ছায় নরঘাতকদিগকে আশ্রয় দিয়াছে, কিংবা যাহারা গত রাজবিদ্রোহে কর্তৃত্ব করিয়াছে, তাহাদের প্রাণদণ্ড হইবে না, কিন্তু অন্ত উপযুক্ত দণ্ড হইবে। ঐ সকল লোককে যথাযোগ্য দণ্ড দিবার সময়ে বিবেচনা করিতে হইবে যে, উহারা কি অবস্থায় অস্ত্রের কুমন্ত্রণায় ভুলিয়া, রাজবিদ্রোহীদিগকে প্রশ্রয় দিয়াছিল। প্রতারকদিগের কুমন্ত্রণায় ভুলিয়া, যাহারা অত্যাচার করিয়াছে, তাহাদের প্রতি যথোচিত অনুগ্রহ প্রদর্শিত হইবে।

“এতদ্ব্যতীত যাহারা গবর্ণমেন্টের বিরুদ্ধে অস্ত্রধারণ করিয়াছিল তাহারা যদি আপনাদের গৃহে ফিরিয়া গিয়া, শাস্তভাবে বৈষয়িক কর্মে লিপ্ত হয়, তাহা হইলে তাহাদের অপরাধের মার্জনা করা হইবে, এবং তাহারা যে, অপরাধ করিয়াছিল, তাহা আর মনে করা হইবে না।

“অপরাধমার্জনা ও অনুগ্রহপ্রদর্শন সম্বন্ধে যে সকল নিয়ম উল্লিখিত হইল, যাহারা আগামী ১লা জানুয়ারির পূর্বে সেই সকল নিয়ম পালন করিবে, তাহাদের সকলকে ক্ষমা করা যাইবে এবং সকলের প্রতি অনুগ্রহ প্রদর্শিত হইবে।

“ঈশ্বরের আশীর্ব্বাদে শান্তি স্থাপিত হইলে, ভারতবর্ষের কৃষি-বাণিজ্য-সংক্রান্ত কার্যে যথোচিত উৎসাহদান, সাধারণের উপকারক ও শ্রীবৃদ্ধিসাধক বিষয়ের উৎকর্ষসাধন এবং ভারতবর্ষের প্রজাবর্গের উপকারের জন্ত ভারত-সাম্রাজ্যশাসন করা হইবে। ভারতবর্ষের প্রজাবর্গের শ্রীবৃদ্ধি হইলেই, আমি আপনাকে প্রবল ও পরাক্রান্ত মনে করিব, প্রজারা সন্তুষ্ট থাকিলেই, আমি আপনাকে নিঃশঙ্ক ও নিরাপদ ভাবিব, এবং প্রজারা সন্তুষ্ট হইয়া, যে কৃতজ্ঞতা ও রাজভক্তি দেখাইবে, তাহাই আমি সর্বোৎকৃষ্ট পুরস্কার জ্ঞান করিব। পরিশেষে প্রার্থনা এই, প্রজাবর্গের মঙ্গলার্থে এই সকল সঙ্কল্প যাহাতে আমি কার্যে পরিণত করিতে পারি, সর্বশক্তিমান্ জগদীশ্বর আমাকে এবং আমার আদেশে যাহারা রাজ্যশাসন করিবেন, তাহাদিগকে সেইরূপ ক্ষমতা দান করুন।”




শ্রীমন্ত দামোদর রাওয়ের নামে আগরাপ্রবাসী মার্টিন সাহেবের পত্র :—

“Your poor Mother was very unjustly and cruelly dealt with, and no one knows her true case as I do. The poor thing took no part whatever in the massacre of the European residents of Jhansi in June 1857. On the contrary she supplied them with food for 2 days after they had gone into the Fort, got 100 matchlock men from Kurrura, and sent them to assist us, but after being kept a day in the Fort, they were sent away in the evening. She then advised Major Skene and Captain Gordon to fly at-once to Dattia and place themselves under the Raja's protection, but this even they would not do; and finally they were all massacred by our own troops—the Police, Jail &c. Cas : Este. \* \* \*

\* \* After the mutinous troops had quitted Jhansi, she certainly took possession of her country, when the two states Dattia and Tehree who could easily have protected our people, but would not, so much as raise a finger to help us, though the Orcha boundary was not more than a mile and half from the Jhansi parade grounds, and that of Dattia only 6 miles—with large bodies of armed men on their respective frontier watching the doings of our troops. Imagining that the Ranee being unprepared, and that they would with ease wrest her country from her hands, attacked her with their combined forces, and were, from time to time, thrashed back by that gallant Lady. \* \*  
\* \* She sent Kharreetas to Col. Erskine at Jubbulpore, to Col. Fraser, Chief Commissioner of Agra, which I handed to him with my own hand, to hear her explanation, but No ?—Jhansi had been a byword and was condemned unheard.”

Letter from Agra, dated 20th August, 1889.





## সংশোধনী ।

গ্রন্থে অনেক গুলি মুদ্রাপ্রমাদ ঘটিয়াছে । তৎসমুদয়ের মধ্যে নিম্নলিখিত আবশ্যিক বিষয়গুলি এই স্থলে নির্দিষ্ট হইল :—

পৃষ্ঠ	পঙ্ক্তি	অশুদ্ধ	শুদ্ধ
১১	২৫	আলীগড় আগরার ৫০ মাইল দূরে যমুনার অপর তটে অবস্থিত ।	আলীগড় আগরার ৫০ মাইল দূরে অবস্থিত ।
৫০	৭	নিমতুল্লা	নিয়ামৎ উল্লা
৮১	২০	মুসলমানেরা	মুসলমানদিগের
৯৬	৩	তাঁহা	তাহা
১০৩	২২	উত্তমর্ণের আক্রমণে অধমর্ণের	অধমর্ণের আক্রমণে উত্তমর্ণের
১১৩	১৩	বিলুণ্ণপ্রিয়	বিলুণ্ণনিপ্রিয়
১৩৬	২৭	তাঁহার	তাহাদের
১৩৬	২৮	তাঁহাদের	তাহাদের
১৪৭	১	নগর	নবাব
১৪৭	২১	এক লক্ষ ত্রিশ হাজারেরও	এক লক্ষ ত্রিশ হাজার বর্গ মাইলেরও
১৬৪	৯	সন্নিধ	সন্নিধ
১৭৭	১১	প্রতীকারের	প্রতীকারে
১৭৮	১০	সদ্য প্রসূত	সদ্যঃপ্রসূত
১৮৫	৭	বিঘ্নিত	বিঘ্নেবপর
২০২	২৩	ত্রিগেডিয়ারকে গুলি করিল ।	ত্রিগেডিয়ারকে গুলি করিয়া, বধ করিল
২০৬	১২	আত্মীয়স্বজন	আত্মীয়স্বজন
২১৬	১১	বিভিন্ন	বিঘ্ন
২২৭	৬	স্থল	স্থলে
২৭৪	২১	সুখসৌভাগ্যের	সুখসৌভাগ্যের
২৭৭	৭	অধরোহণে	অধরোহণে
৩০৩	১২	ত্রিখেডের	ত্রিখেডের

৩০৫	২০	মুহুর্তেই	মুহুর্তেই
৩০৬	৪	তাহারা	তাহারা
৩০৮	১৮	অন্তর্ভাগ	অন্তর্ভাগে
৩১১	৭	ইংলণ্ডের	ইংলণ্ডে
৩১১	২৬	বিরক্তি	বিরক্ত
৩৩৮	১৩	বিধ্বংস ব্যাপার	বিধ্বংসব্যাপার
৩৩৯	৭	উদ্ধারে	উদ্ধারের
৩৪৭	২৫	নিরতিশয়	নিরতিশয়
৩৫৭	১৮	ইচ্ছার	ইচ্ছা
৩৬০	৮	কুলনারী	কুলনারী
৩৭৩	১৪	অধিনায়কে	অধিনায়কে
৩৭৫	৭	মোলবীর	মোলবীর
৩৭৫	২১	পরিচর	পরিচর
৩৭৬	১৪	তাহাদের	তাহাদের
৪০৪	৭	শুক্রবার	শুক্রবার
৪০৯	১	প্রাচীরে	প্রাচীরের

---











